


Tūpa Ñehengagüer



New Testament in Guarayu (BL:gyr:Guarayu)

Tǔpa Ŧehengagüer New Testament in Guarayu (BL:gyr:Guarayu)

copyright © 2011 Wycliffe Bible Translators, Inc.

Language: Guarayu

Translation by: Wycliffe Bible Translators, Inc.

Guarayu [gyr], Bolivia

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Guarayu

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 21 Feb 2024 from source files dated 29 Jan 2022

c27c2d97-c359-59f5-b367-83efb2e33739

Contents

SAN MATEO	1
SAN MARCOS	74
SAN LUCAS	118
SAN JUAN	197
LOS HECHOS	253
ROMANOS	324
1 CORINTIOS	355
2 CORINTIOS	387
GALATAS	407
EFESIOS	418
FILIPENSES	428
COLOSENSES	435
1 TESALONICENSES	442
2 TESALONICENSES	448
1 TIMOTEO	452
2 TIMOTEO	461
TITO	467
FILEMÓN	471
HEBREOS	473
SANTIAGO	496
1 SAN PEDRO	504
2 SAN PEDRO	513
1 SAN JUAN	518
2 SAN JUAN	525
3 SAN JUAN	527
SAN JUDAS	529
APOCALIPSIS	532

MATEO REMBICUACHIA JESUS RECOCUER RESENDAR SAN MATEO

Ava eta oyesu vahe Jesucristo yesu renondeve

¹ Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

² Abraham rahir Isaac, Isaac rahir evocoiyase Jacob, ipare Jacob rahir ahe Judá ambuae tiquehir, tivireta reseve. ³ Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoiyase Aram. ⁴ Aram rahir Aminadab, Aminadab rahir Naasón, Naasón rahir evocoiyase Salmón, ⁵ Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, ⁶ Isaí rahir mborerecuar guasu David, David rahir evocoiyase Salomón, Uriás rembirecocuer pipe oyesu vahe.

⁷ Salomón rahir Roboam, Roboam rahir Abías, Abías rahir Asa. ⁸ Asa rahir Josafat, Josafat rahir Joram, Joram rahir evocoiyase Uzías. ⁹ Uzías rahir Jotam, Jotam rahir Acaz, Acaz rahir ahe Ezequías. ¹⁰ Ezequías rahir Manasés, Manasés rahir Amón, Amón rahir evocoiyase Josías. ¹¹ Josías rahir Jeconías tivireta reseve, Babilonia ve mbiguai yuvirecoi vahecuer.

¹² Mbiguai yuvirecoire Jeconías omboyesu Salatiel, Salatiel rahir ahe Zorobabel. ¹³ Zorobabel rahir Abiud, Abiud rahir ahe Eliaquim, Eliaquim rahir evocoiyase Azor. ¹⁴ Azor rahir Sadoc, Sadoc rahir ahe Aquim, Aquim rahir evocoiyase Eliud. ¹⁵ Eliud rahir Eleazar, Eleazar rahir ahe Matán, Matán rahir evocoiyase Jacob. ¹⁶ Jacob rahir José, María mer, María evocoiyase Jesús si secoi. Ahe imembri Tūpa Rembiporavo Poropisirosar.

¹⁷ Evocoiyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota aravíter Poropisirosar haragüer rupi, ahe omomba iri avei ambuae catorce yesu yoapi agüer.

Jesucristo yesu agüer

¹⁸ Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoiēhi viteseve rumo, Espíritu Santo píratasa pipe imembri. ¹⁹ Evocoiyase José, imevi, ahe ava seco catupri vahe, “Tapoiño ayase ava icuaēhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer avíye vahe’ ohesa

pípe. ²⁰ Aipo opíhañemoñeta reseve oque. Iquierve rumo, Túpa rembiguai oyemboycua chupe aipo ehi: “José, David suindar, eresiquíyei rene María rese nde menda água. Esepio, Espíritu Santo sui ou imembirā. ²¹ María vírecose omembri, pemondora sererguā Jesús. Esepio, ahe oipísirora omu judío eta yangaipa sui” ehi.

²² Co rupi opa yaviye yande Yar remimombehugüer aipo ehi vahecuer iñehe mombehusar aracahe:

²³ “Cuña ndaseco marai vahe imembira.

Ahe imembri rer-ra Emanuel” ehi

(“Túpa yande rese ité secoi’ oya aipo ehi).

²⁴ Omahese José, Túpa rembiguai oyeupe ñehe agüer omboyeroya ité. Ichui omenda María rese cute. ²⁵ Ndoyapo vítei eté rumo mbahe oyese yuvíreco. Yipíndar imembira rane ité, ahese José omondo Jesús sererguā.

2

Ava yasitata rese oyembohe vahe ari sësa cotindar yuvíraso pítani repia

¹ Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sësa coti sui Jerusalén ve. ² Ahe oporandu Herodes upe yuvíreco aipo ehi:

—¿Que vo aipo oha judío rerecuar guasu? Esepio niha, caharu coti yasitata orosepio. Sese oroyu ari sësa coti sui imboetei água —ehi yuvíreco chupe.

³ Aipo ihese, mborerecuar Herodes oyembosiquíye tēi, ava Jerusalén pendar avei ëgue ehi pâve yuvíreco. ⁴ Iyavei cûriteimi opa omonuha uca pahi rerecuareta, Moisés porocuaita rese oporombohe vahe avei. Ipare oporandu chupe:

—¿Que vo aipo ohara Poropísírosar? —ehi.

⁵ Ahe omboyeví yuvíreco chupe:

—Ahe ohara Judea rupi Belén ve —ehi—. Esepio, Túpa ñehe mombehusar Miqueas rembicuachiagüer pípe aipo ehi:

⁶ ‘Pe, tecua mini Belén pipendar, ndahei ivi coti tēi vahe ambuae tecua Judá pipendar sui peico.

Esepio, pe sui osëra mborerecuar che recua iguar Israel yocuai água’ ehi —ehi

yuvíreco Herodes upe.

⁷ Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvíreco’ oyapave oporandu: “¿Mbahe yasi pípe ité vo pesepia ramo aipo yasitata?” ehi.

⁸ Oyeupe mombehu pare, omondopa Belén ve aipo ehi chupe:

—Peso evocoiyase, peseca pītani. Acoi peyosuse, co rupi avei peyevi cheu icua uca ãgua. Che avei evocoiyase tasomi imboetei —ehi angahu chupe.

⁹ Aipo oyeupe he pare, yasitata rese oyembohe vahe osiríño voi yuviraso. Ahe pipeve yasitata oyemboycua iri senonera. Ichui pītani recosa rese tupri tecua Belén ve opita yasitata. ¹⁰ Sepiase, ovihareté yuvireco. ¹¹ Ipare yuviroique oí pipe, osepia pītani ichi María reseve yuvireco. Ichui oñenopiha sovai imboeteisa pipe. Ipare opõhe ombahe rīru pipe yuvireco oicuavéhe vaherā oporerecosa sepírusu vahe oro, itaisi, ambuae mbahe sīacua vahe mirra serer vahe avei. ¹² Yuviroyevise güecuave yuviraso, ndoyuviroyevi iri Jerusalén rupi mborerecuar Herodes upe imombehu. Esepia, Tūpa aipo omombehu iquierve chupe ambuae peri rupi iyevi ãgua.

Jesús pītani seroñemisa Egipto ve

¹³ Aipo ava yepepi pare, José upe oyemboycua Tūpa rembiguai iquierve, aipo ehi chupe: “Eñarapuha, eroñemi pītani ichi reseve eraso Egipto ve. Aheve erepitara acoi che amombehuse voi nde yevi ãgua. Esepia, mborerecuar Herodes osecara pītani yuca ãgua oico” ehi chupe.

¹⁴ Ahe pītu pipeve voi José viraso pītani ichi reseve Egipto ve. ¹⁵ Aheve yuvirecoi co mborerecuar Herodes mano rāro. Co rupi imboaviyesa Tūpa ñehe mombehusar remimombehugüer: “Egipto sui anose che Rahir” ehi vahe.

Herodes oyuca uca chīhivahe eta

¹⁶ Mborecuar Herodes rumo oñemoiró iteanga yasitata rese oyembohe vahe ombopa tēisa rese. Sese, “Toyuviraso sundao tecua Belén ve, toyucapa chīhivahe cuimbahemi yuvireco opacatu ñuvirío aravíter ovireco vahe, chīhivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe aravíter opa cūritei. ¹⁷ Ëgüe ehi yaviye Tūpa ñehe mombehusar Jeremías remimombehugüer aipo ehi vahe:

¹⁸ “Oyeendu ava Ramá ve.

Ahe Raquel oyaseho ité omembireta manose; ndoyemboviha catui eté ipipe” ehi.

¹⁹ Mborecuar Herodes manore, Egipto ve José upe oñeho iri Tūpa rembiguai iquierve aipo ehi: ²⁰ “Eñarapuha, eroyevi pītani ichi reseve Israel recuave. Esepia, opa omano pītani yuca potasar yuvireco” ehi.

²¹ Aipo oyeupe hese, oñarapuha, viroyevi pītani ichi reseve Israel recuave. ²²⁻²³ Peri rupi oyanduse rumo Arquelao vu recoyar mborerecuar chinise, ahese oyembosiquiye aheve

oso ãgua. Coiyemi tēi iquierve Tūpa, “Peso Galilea ivi rese” ehi chupe. Ichui yuviraso tecua Nazaret ve. Aheve opita yuvireco cute. Ëgüe ehi yaviye Tūpa ñehe mombehusar remimombe-hugüer: “Nazaret pendar’ ehira serecosa” ehi vahe.

3

Juan Oporoãpiramo vahe ivi iporupirëhisa rupi secoi

¹ Ipare Juan Oporoãpiramo vahe Tūpa recocuer rese oñehe oico Judea ivi rupi ava yemboerecuaëhisave ² aipo ehi: “¡Pemboasi pe angaipa; peyevi Tūpa upe! Esepia, co Tūpa mborerecuasa cõimi secoi yandeu” ehi.

³ Co Juan rese niha oñehe yipive Tūpa ñehe mombehusar Isaías aipo ehi güembicuachiagüer pipe:

“Oyeendu ñehesa ava yemboerecuaëhisave:

‘Pemoingatu yande Yar raperä; pemohivi tupri avei’ ehi aracahe.

⁴ Juan turucuar ahese camello ragüer apopri, sumbicuasa mbahe pirer, sembihu evocoiyase tucru, eiri caha pipendar avei. ⁵ Opacatu ava Jerusalén pendar, Judea rupindar tecua, iai Jordán rerovica pendar avei yuviraso iñehe rendu ⁶ oangaipagüer mombehu ãgua. Ahese Juan oñapiramo iai Jordán pipe.

⁷ Yugüeru atise rumo fariseo iyavei saduceo oñeapiramo uca ãgua, Juan aipo ehi ahe ava upe: “¡Pe mboi mboetasá tēi peico! ¿Ava vo, ‘Pesëra Tūpa ñemoirosa ou vaherä sui’ ehi tupri tēi pëu? ⁸ Yipindar toyecua tupri rane Tūpa upe pe yevisa pe angaipa mboasisa pipe. ⁹ Iyavei ndapeyeroyai chira ‘ore Abraham suindar oroico’ pe hesa rese tēi pe ñepisiro ãgua. Esepia, Tūpa oicatuño ité co ita sui Abraham suindar nungar tupri apo ãgua oyeupe nara yepi. ¹⁰ Hacha niha imoingatusa voi eté opacatu ivira ndihai vahe sapo rupi yasia ãgua. Ichui yasia pare imondosa tatave. ¹¹ Che i pipe tēi opoãpiramo Tūpa upe pe yevi ãgua. Oura rumo ambuae che raquicuei, ahe pe ãpiramora Espíritu Santo tata nungar pipe. Ahe seco pírata catu vahe secoi che sui. Sese cheu ndiyai eté ahe ipitaquisä yora ãgua ichui. ¹² Ahe oipehara mbahe rähii ihigüer sui. Sähii evocoiyase oyapocatura, ihigüer rumo omondora tata apirëhi vahesave” ehi.

Jesús ãpiramosa

¹³ Ipare Jesús oso Galilea sui iai Jordán ve Juan recosave ‘tache ãpiramo’ oya. ¹⁴ Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo ãgua? —ehi.

¹⁵ —Ñegüe tehiño aipo. Iyacatu yayapora Tūpa porocuaita — ehi Juan upe.

Evocoiyase Juan, “Avíye” ehi chupe. ¹⁶ Oãpiramo pare, osẽ íve sui. Ahe pipeve voi iva oyemboi tupri, aheseve avei osepia Tūpa Espíritu ogüeyise ou iharíve apicasu nungar. ¹⁷ Iyavei oyendu ñehesa iva suindar aipo ehi vahe: “Co che Rahir, che rembiaisu. Sese aviharete vichico” ehi.

4

Jesús recoāhasa

¹ Ipare Tūpa Espíritu viraso Jesús ava yemboerecuaēhisave ‘tosecoāha Caruguar’ ohesa pipe.

² Aheve cuarenta ari, cuarenta p̄itu ndocarui. Sese ndasiepoi eté oico. ³ Evocoiyase oyemboya Caruguar sese secoāha água, aipo ehi chupe:

—Tūpa Rahir ité nde recose, co ita sui eyapo pan cūritei —ehi.

⁴ Jesús rumo omboyevi chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ñegüe ehi rumo opacatu Tūpa Ñehengagüler reroya pipe ava yuvirecovera yepi’ ehi —ehiño chupe.

⁵ Ichui Caruguar viraso Jesús Jerusalén maranehí pipendar tūparo torre apiterve. ⁶ Aheve aipo ehi chupe:

—Tūpa Rahir ité nde recose, eviapi coháve sui. Esepiá niha, icuachiapri pipe:

‘Tūpa oyocuaira güembiguai eta nde rāro água.

Ahe nde mopuhara yuvireco que ñepei ita nde momara rāgüler sui’ ehi —ehi Caruguar chupe.

⁷ Evocoiyase omboyevi Caruguar upe:

—Icuachiapri pipe rumo aipo ehi avei no: ‘Nderesecoāhai chira nde Yar Tūpa’ ehi —ehi chupe.

⁸ Ipare Caruguar viraso iri ivitri ivate vahe apiterve secoāha água. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe, ⁹ aipo ehi:

—Che rovai ereñenopihase che mboeteisave, co opacatu mbahe nde rembiepia amondora nde mahera —ehi Caruguar chupe.

¹⁰ Aipo oyeupe hese:

—Eyepepi che sui cūritei, Caruguar —ehi—. Esepiá, icuachiapri: ‘Emboetei nde Yar Tūpa, ahe güeraño tupri avei eremboyeroyara’ ehi —ehi Caruguar upe.

¹¹ Ahese Caruguar oyepepi ichui. Ipare Tūpa rembiguai yuvirogüeyi Jesús rese hañeco água yuvireco.

Jesús omboipí oporombohe Galilea rupi

¹² Jesú斯 oyanduse Juan roquendasa, oso Galilea ivi rese Nazaret ve. ¹³ Ndopitai rumo aheve. Osoño Capernaum ve, aheve opita. Ahe tecua ipa Galilea ivii, ivi Zabulón iyavei Neftalí rupi avei. ¹⁴ Na ehi yavíye Tūpa ñehe mombehusar Isaías rembiciachiagüer aipo ehi vahe aracahe:

¹⁵ “Co ava ivi Zabulón pendar, Neftalí pendar, para guasu ivirindar, iai Jordán rovaindar iyavei Galilea pipendar ndahei vahe judío,

¹⁶ ahe avíye pítumimbisave yuvirecoi vahe, osepia ramo vahe tesapesa yuvireco; iyavei mano rágüer pipe yuvirecoi vahe upe avei avíye oyecua ramo vahe tesapesa” ehi.

¹⁷ Ahe ari suive Jesú斯 omombehu Tūpa recocuer ava upe: “Pemboasi pe angaipa; peyevi Tūpa upe. Esepia, cōimi eté Tūpa mborerecuasa secoi” ehi.

Jesú斯, “Perio che rupi” ehi irungatu pira mbohasar upe

¹⁸ Coiye ipa Galilea ivii oguatase, Jesú斯 osepia mbia Simón Pedro serer vahe tivri Andrés reseve. Ahe pira omboha yuvireco. ¹⁹ Evocoiyase:

—Pe pira recasar peico. Perio che rupi. Na peye aveira ava reca água cheu nara —ehi chupe.

²⁰ Aipo he ramoseve, opoi opira mbohasa sui yuvireco, yuviraso supi.

²¹ Coi coti catu aipo Jesú斯 osepia ambuae mbia Santiago tivri Juan reseve, ahe oguapi yuvínoi carite pipe oyesupa Zebedeo piri; omoingatu opira mbohasa yuvínoi. ²² “Perio che rupi” he ramoseve, opaño oporaviquisa sui opoi yuvireco, oseyáño oyesupa, yuviraso supi.

Jesú斯 ombohe ava rehii

²³ Jesú斯 evocoiyase oguata opacatu Galilea ivi rupi, judío tūparo yacatu rupi oporombohe oico. Aheve ñehesa avíye vahe omombehu Tūpa mborerecuasa resendar. Oporombogüera avei opacatu-catu tēi mbaherasisa ava vireco vahe sui. ²⁴ Oyepotase rumo serácu opacatu Siria ivi rupindar upe, ahese güeru opacatu iparaísu vahe yuvireco chupe: imbaheasi vahe, caruguar vireco vahe, que nañaca pōrai vahe iyavei ndoguatai vahe. Ahe opa tupri ombogüera.

²⁵ Ëgue ehi ava rehii oguata yuvireco opacatu iguatasa rupi supi: Galilea pendar, Decápolis pendar, Jerusalén pendar, opacatu Judea pendar, iai Jordán rovaindar avei no.

¹ Ñepei ari pipe, ava rehii repiase, Jesús oyeupi ivitri rese. Aheve oguapi oī. Ahese semimbohe oyemboya yuvireco sese.
² Ichui omboipi imbohe aipo ehi:

³ "Sorivete catura acoi ava oicuase mbahe ipane vahe Tūpa rese ité güeco tupri äqua. Esepia niha, chupe nara ité Tūpa mborerecuasa.

⁴ "Sorivete catura acoi ava oyaseho vahe oviharëhisa pipe. Esepia niha, Tūpa omboura viharetesa chupe coiye.

⁵ "Sorivete catura ndaseco asimi vahe. Esepia, ahe chupe imondosara co ivi imahera curi.

⁶ "Sorivete catura ava oipota vahe teco catuprisa Tūpa suindar. Esepia, chupe ité ahe imondosara.

⁷ "Sorivete catura acoi ava oporoparaisuereco vahe. Esepia, ahe Tūpa oiparaisuerecora.

⁸ "Sorivete catura acoi ava ipihañemoñeta tupri vahe. Esepia niha, ahe osepiara Tūpa yuvireco curi.

⁹ "Sorivete catura acoi ava oporomoñeroi vahe mbahe tupri pipe. Ahe chupe, 'Che rahir ité' ehira Tūpa.

¹⁰ "Sorivete catura acoi ava seco catupri rese imombaraisupri. Esepia, ahe chupe nara Tūpa mborerecuasa.

¹¹ "Perorivete catura pe acoi ava iñehe-ñehe tēise pēu, iyavei pe mombaraisuse, acoi oyapo-yapo tēise güemira-mira tēi pipe mbahe pe rese che recocuer sui tēi yuvireco. ¹² Pe rumo peyemboviñaora. Esepia, ivave tuvichá vahe porerecosa peipisira curi. Ëgüe ehi avei niha yipindar evoco ava ramoi Tūpa ñehe mombehusareta mombaraisu yuvireco aracahe" ehi.

Jesús reroyasar aviyeyucrī iyavei tesapesayuvirecoi ava upe

¹³ "Co ivi pipe pe aviyeyucrī peico opacatu ava upe. Yucrī rumo nasehe irise, ndayaicatui imoehe iri äqua, ndiporusai chietera; imombopasara ava pírunga äqua yuvireco.

¹⁴ "Iyavei pe tesapesa nungar peico opacatu ava upe co ivi pipe inungar que tecua guasu yapoprí ivitri rese. Ahe ndayaicatui ñomi äqua. ¹⁵ Iyavei ndayamoendii chira tataendi mbahevriye tēi. Iyacatu rumo yasupi ivate sendave opacatu oi pipendar ava resape äqua. ¹⁶ Pe ëgüe peye aveira pemboye-cua ava eta upe pe recocuer aviyey vahe. Ipipe sui tomboetei yande Ru Tūpa ivi pendar yuvireco" ehi ava rehii upe.

Jesús oporombohe Moisés porocuaita rese

¹⁷ "Aní chira, 'Co mbia revo oporombohe Tūpa ñehe mombehusar rembicuachía mboyeroyaëhi äqua iyavei Moisés porocuaita cuachiapri mboyeroyaëhi äqua avei no' peye tēi cheu. Ëgüe ehi rumo che ayu imboaviyé äqua. ¹⁸ Supi eté co ivi avei yandeu oime vitemiseve, ndipoi chietera que ñepei yepe Moisés porocuaita, que ambuae Tūpa ñehe

mombehusar rembicuachiagüer ocañi tēi vaherā; ñepei-peí porocuaita imombehuprī imboaviyesaño itera.¹⁹ Sese acoi ava ndovíroyai vahe que ñepei mborocuaitamira viña, ombohe avei ava seroyaëhi äqua, ahe evocoiyase íví cotí catu vahe aveira Tūpa mborerecuasave yuvirecoi. Acoi viroya vahe rumo Tūpa porocuaita yuvireco iyavei oporombohe vahe yuvireco sese, ahe evocoiyase Tūpa osecomboivate catura omborerecuasave curi.²⁰ Iyavei amombehu pēu: acoi pe reco ívi tuprisa ndaheise aviye catu vahe fariseo recocuer sui iyavei ndaheise aviye catu vahe Moisés porocuaita rese oporombohe vahe recocuer sui avei, ahese ndapeiquei chietera Tūpa mborerecuasave” ehi.

Jesús oporombohe ñemoiroëhi äqua rese

²¹ “Pe peicua acoi pe ramoi aracahendar upe aipo ehi vahe: ‘Peporoyucai rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirā’ ehi.²² Che rumo aipo ahe pēu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde ëgue ere tēi vahe eico’ ehi vahe ambuae ava upe, ahe serasosara porandu äqua mborerecuar ívate catu vahe rovai. Acoi ava rumo oñehé marase seroïrosave ambuae ava upe, ahe iyacatu imondosa ité tata guasuve.

²³ “Sese Tūpa upe pe porerecosa reropovëhesave tūparo pipe pemahenduhase ava pe amotarëhimbar rese,²⁴ peseya rane pe porerecosa aheve; peyevi rane pe amotarëhimbar upe pēu iñero äqua rese. Acoi peñero oyeupe, ahese voi peyevi, tapeicuavéhe pe porerecosa Tūpa upe.

²⁵ “Iyavei peyeamotarëhise, peñero voi oyeupe peyoepiase. Anise, aviyeteramo coiye catu tēise pe mombehu tēira pe amotarëhimbar mborerecuar upe pe reraso äqua. Ichui aviyeteramo ahe pe roquenda ucara.²⁶ Supi eté aipo ahe pēu: Ndapesëi chietera acoi peyemboepipase voi eté pesëra ichui” ehi.

Jesús oporombohe yemboaguasaëhi äqua rese

²⁷ “Peicua niha Moisés porocuaita yipindar: ‘Peaguasai rene ambuae ava rembireco rese’ ehi vahe.²⁸ Che rumo aipo ahe pēu: Acoi ava omahese cuña rese ipotasa pipe, ahe inungar oyapo vahe ité mbahe sese opiha pipe yepi.

²⁹ “Iyavei inungar que pe resa pe acato cotindar oipota rai ucase mbahe pēu pe mboangaipa äqua tēi, iya penose ité, pemombo amombri peyesui. Aní pe mundo uca opacatu pe recocuer tata guasuve.³⁰ Iyavei inungar que pe po pe acato cotindar pe mboangaipa ucase, iya peyasía ité imombo amombri peyesui. Aní pe mundo uca opacatu pe recocuer tata guasuve” ehi.

Jesús oporombohe ava mendasa sui poiēhi água rese

³¹ “Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi. ³² Che rumo aipo ahe pēu: ava opoise güembireco sui, cuña ndoyaviise mbahe, ahese ombopiháñemoñeta tiéterá güembireco mboaguasa uca água. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

Jesús oporombohe Vu Tūpa rer poru tēiēhi água rese

³³ “Iyavei peicua acoi aipo ehi vahe pe ramoi upe aracahe: ‘Pemboaviye itera pemoingatu tuprise Tūpa rer pipe mbahe pemombehu vahe yepi’ ehi. ³⁴ Che rumo, ‘Ndapeñehei chira que mbahe rer pipe, iva rer pipe tēi avei’ ahe pēu. Esepia, ahe niha Tūpa renda; ³⁵ iva rer pipe tēi avei ndapeñehei chira. Esepia, ahe Tūpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua. ³⁶ Pe ãca rer pipe avei ndapeñehei chira. Esepia, ndapeicatui chira que ñepei pe ha momorochi água, imou água avei. ³⁷ Sese niha peñehese, ñepei reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi’ ehi.

Jesús oporombohe yande amotarēhisar upe mbahe tēi mboyeviēhi água

³⁸ “Peicua acoi Moisés porocuaita aracahendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sāi ichui, sāi avei senosesara’ ehi vahe. ³⁹ Che rumo aipo ahe pēu: Aní chira pemboyevi pēu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei pemoporēhiñora chupe. ⁴⁰ Porandusave pe rerasose pe camisa rerocua água yuvireco pe sui, pe saco avei pemondoñora chupe. ⁴¹ ‘Ñepei legua rupi evosii co mbahe rese cheu’ ehise que ava pēu, pe rumo perasoñora ñuvirío legua rupi chupe. ⁴² Iyavei oporanduse que pe mbahe rese yuvireco pēu, pemondoño avei chupe. Aní chira perecatēhi sese” ehi.

Pesaisu pe amotarēhimbar

⁴³ “Iyavei pesendu ñehesa yipindar: ‘Pesepia potai rene pe amotarēhimbar, pe mborípar güeraño pesaisu’ ehi vahe. ⁴⁴ Che rumo aipo ahe pēu: Pesaisu catu pe amotarēhimbar iyavei peyeroqui pe momara potasar rese. ⁴⁵ Evoco nungar apo pipe pe Ru Tūpa iva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei. ⁴⁶ Pe raisupar güeraño pesaisu catu tēise,

ndapeipisi'i chietera porerecosa evoco nungar sui. Esepio niha, ava guarepochi rerocuasar ndipihi vahe guaisupar tēi osaisu yuvireco yepi.⁴⁷ Ndahei yande mboripar upe güeraño yayapora 'avirave'. Esepio, ava ndoicuai vahe avei Tūpa oyapo 'avirave' omboripar upe yuvireco yepi.⁴⁸ Sese pe recocuer perecora pe Ru Tūpa iva pendar seco catupri vahe nungar" ehi.

6

Jesús oporombohe mbahe aviyé vahe apo águá rese

¹ "Tūpa upe mbahe peyapo potase, 'Tache repia ava yuvireco' ndapeyei chira. Esepio, ēgue peyese, ndapeipisi'i chietera pe Ru Tūpa iva pendar porerecosa. ² Evocoiyase iparaisu vahe rese peporerecose, 'Tamombehupa ava upe vichico' ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbi omoñehe yuvireco 'Co ava aviyé ité yuvirecoi, tehi angahu yuvireco yandeu' oya tēi. Supi eté aipo ahe pēu: Ēgue ehi vahe rumo opa voi oipisi porerecosa co ivi pipe tēi yuvireco. ³ Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña. ⁴ Peporereco catu ava pe repiaehisa pipe; pe Ru Tūpa niha mbahe ndoyecuai vahe osepia. Ahe omboura porerecosa pēu opacatu ava rembiepiave curi" ehi.

Jesús oporombohe yerure águá rese

⁵ "Acoi peyerurese, peicoi rene acoi ava 'tosepio che yeruresa yuvireco' ehi vahe nungar. Esepio, ahe opūhpūha catu tūparo pipe oyeroqui yuvireco cupiha yacatu avei 'tayande repia angahu ava' ohesa pipe tēi. Supi eté che aipo ahe pēu: Ēgue ehi vahe opa voi eté co ivi pipeve tēi oipisi porerecosa yuvireco. ⁶ Iyacatu rumo pe, peyeroqui potase, peiquera pe rēta pipe peyequendara pe ae pe yeroqui águá pe Ru Tūpa upe. Evocoiyase pe Ru Tūpa oicua vahe mbahe pe rembiapo, iporerecora pe rese.

⁷ "Iyavei peyeroquise, ndapemboyevi-yevi chira pe ñehe pe poranduse mbahe rese Tūpa upe inungar ava Tūpa ndoicuai vahe. Ahe omboyevi-yevi oyeruresa 'Tūpa revo co rupi yande mbooyeroya voira' ohesave yuvireco viña. ⁸ Aní chira inungar tēi peico. Esepio, pe Ru Tūpa oicua pe porandu renondeve mbahe ipane vahe pēu. ⁹ Sese aipo peyera peyeroqui: 'Ore Ru Tūpa, ivave ereico vahe, imboeteipri nde rer tasecoi. ¹⁰ Tou nde mborerecuasa oreu. Tayaposa nde remimbotar co ivi pipe, inungar ivave yaposa. ¹¹ Embou ore rembihu ari yacatundar oreu co ari pipe.'

12 Iyavei ndeñero ore angaipa rese oreu inungar ore oreñero ore amotarëhimbar upe.

13 Ore mboangaipa ucai rene eve; eipeha mbahe naporai vahe ore sui' peyera.

14 "Esepia, pe amotarëhimbar upe peñerose, pe Ru iva pendar avei iñerora pëu; ¹⁵ ndapeñeroise rumo, ahe avei niñeroi chietera pëu" ehi.

Jesús oporombohe yecuacusa rese

16 "Acoi peyecuacuse, ndapemboycuai chira pe viharëhisa, inungar acoi Tüpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, 'Co oyecuacu vahe, tehi ava yande repiasar yuvireco yandeu' ohesa pipe tēi. Supi eté aipo ahe pëu: Ëgüe ehi vahe opa voi oipisi porerecosa ava güepia pipe tēi yuvireco. ¹⁷ Pe rumo peyecuacuse, peñeaca mondoro tuprira, peyovai tupri aveira. ¹⁸ Evocoiyase, 'Co oyecuacu vahe' ndehi chira ava yuvireco pëu. Pe Ru Tüpa, ndayasepiai vahe, güeraño oicuara pe yecuacusa. Ahe evocoiyase iporerecora pe rese curi" ehi.

Mbahe porañeté vahe oime iva

19 "Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe rasoi omboaso ati-ati imocañipa, iyavei sâve-sâve tēi oPOCHI ati-ati oapocatusave, imonda vahe avei evocoiyase imondaño sese pëu. ²⁰ Iya peseca catu tecocuer aviyese vahe iva nara. Aheve niha ndipoi chira co ivi pipendar nungar pe reco mocañi ägua. ²¹ Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ivi pipe, anise que iva avei" ehi.

Yande resa inungar tataendi yande recocuer uve

22 "Iyavei yande resa inungar tataendi yande retecuer upe. Evocoiyase yande resa aviyese, opacatu yande retecuer upe osesape; ²³ acoi imarase rumo, opacatu yande retecuer pítumimbisave tēi secoi. Tesapesa oime vahe yande rese, ahe ogüese rumo yande sui, mbahe tēi eté, pítumimbi nungar opacatu yande recocuer upe" ehi.

Guarepochi pota raisa; Tüpa mboyeroyaëhisa

24 "Iyavei ndipoi chietera que ava ñuvirío güerecuar omboyeroya vahe. Esepia, ñepei oyamotarëhira imboyeroya potaëhisa pipe, ambuae evocoiyase osaisu catura imboyeroya pipe. Ëgüe peye avei, ndapeicatui Tüpa mboyeroya guarepochi pota raisa pipe" ehi.

Tüpa osäro guahireta

²⁵ “Iyavei ndapeyemomahenduha guasu ai chira mbahe pe remihura rese pe recove ãgua, pe ihu ãgua rese, pe turucuarã rese tẽi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no. ²⁶ Pesepia vĩrai eta oveve vahe: nomahetii vahe, nomonuhai avei, ndoyapocatui avei mbahe yuvireco. Pe Ru Tũpa iva pendar ité niha omoime mbahe itohu. ¡Pe rumo ivate catu vahe ité peico vĩrai sui! ²⁷ Ndipoi que ñepei pe pãhu pendar oicatu vahe opihañemoñetaса pipe tẽi güecocuer mopucu iri ãgua.

²⁸ “Ndahei chira pe turucuarã rese tẽi peyemomahenduha guasu ai. Pemahecua ru mbahe potri caha pipendar rese: ndoporaviqui eté iyavei ndoipiai oturucuarã. ²⁹ Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. ³⁰ Tũpa niha omboporañete raimi tẽi mbahe potri caha pipendar, moviro ari tẽi yasepia, ichui sapisapaño horno pipe. ¡Ahe rumo omondo catura turucuar pẽu, pe ava nimbahe reroya tuprii vahe! ³¹ Sese, ‘¿Mbahe pĩha yahura, yaíhura?’ Iyavei, ‘¿mbahe pĩha yamondera?’ ndapeyei chira pe yemomahenduha guasu aisa pipe. ³² Ava Tũpa reroyasaréhi aipo nungar reseño tẽi ipihañemoñeta yuvireco yepi. Pe Ru Tũpa iva pendar rumo oicua ité pẽu mbahe ipane vahe. ³³ Pemahenduha rane Tũpa rese pe recocuer tupri pipe ipovrîve mbahe pe yapo ãgua semimbotar rupi, ahese omboura opacatu co mbahe ipane vahe pẽu. ³⁴ Peyemomahenduha guasa ai eme mbahe peyapo vaherã rese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoingatu vaherã yepi.

7

Aní, “Oyavi mbahe” peye voi ambuae upe

¹ “Ndiyai, ‘Oyavi ité mbahe’ peye voiño tẽi ambuae ava upe; evocoiyase Tũpa, ‘Oyavi mbahe’ ndehi chira pẽu. ² Esepia, inungar pe ambuae ava upe peico, ëgue ehi aveira niha Tũpa pẽu. ³ ¡Mahera ambuae ava rembiavimi rese tẽi pemahe! ¡Iya rumo peyese rane mbahe tuvichá catu vahe pesepia! ⁴ Ndiyai pẽu, ‘Che toropítivii mbahe nde rembiavi rese’ peye vaherã chupe. Esepia, ¡pe peyavi guasu catu mbahe ichui! ⁵ ¡Pe Tũpa reroyasar angahu tẽi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

⁶ “Pemondo eme mbahe maranehí ava cave nungar tẽi upe, iyavei ndapemondoi chira mbahe porañete vahe ava cuchi

nungar tēi upe. Aviyeteramo oyemboyerera mbahe-mbahe tēi apo yuvireco pēu” ehi.

Peporandu Tūpa upe pēu mbahe ipane vahe rese

7 “Peporandu mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgue peyera pe yeroquisa pipe Tūpa upe, ahese imbousara pe porandusa pēu. 8 Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeroquisa pipe omota vahe oquenda Tūpa upe, chupe imboisara.

9 “Ndipoi eté revo que ñepei pe pāhu pendar omondo vaherā ita tēi guahir upe pan rese oyeupe poranduse. 10 Que pira rese oyeupe poranduse revo, ndomondoi chiaveira mboi tēi chupe. 11 Yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar oipota catu mbahe aviye vahe mundo água acoi ava mbahe rese oporandu vahe upe!

12 “Acoi mbahe peipota vahe ambuae ava oyapo vaherā pēu, ahe tupri avei peyapora chupe. Ahe niha Moisés porocuaita iyavei Tūpa ñehe mombehusareta porombohesa” ehi.

Oime peri icāhimi vahe ava recocuer upe nara

13 “Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuviraso; 14 teco apirēhisave oso vahe rumo oquendipi, peri reseve icāhimi. Supi guata água yavai eté; moviromi tēi ava oseca yuvireco” ehi.

Ivira aviye vahe icuasa iha rese

15 “Coye Yuguerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evoco nungar sui. 16 Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sachi ati vahe sui. 17 Evocoiyase ivira aviye vahe, iha aviye avei; ivira naporai vahe, iha naporai avei no. 18 Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe. 19 Sese opacatu ivira iha naporai vahe yasiasa yepi. Ichui imondosapa tatave. 20 Na peyera ava recocuer cuá sembiapo rese” ehi.

Ndahei chira opacatu ava yuviroique Tūpa mborerecuasave

21 “Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru iva pendar remimbotar aposar año tupri rumo yuviroiquera

aheve. ²² Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo caruguar ava sui nde rer pipe, setá poromondiisa oroyapo’ ehi tēira yuvireco cheu. ²³ Che rumo, ‘Aní, ndopocuau! ¡Pe mbahe tēi peico vahe, peyepepi che sui!’ aheñora aipo nungar upe” ehi.

Ñuvirío oí apoprí

²⁴ “Iyavei que ava osendu vahe che ñehengagüer, omboavíye vahe avei, ahe inungar ava ipihañemoñeta tupri vahe omopuha ita harive güëtarã. ²⁵ Yepe ahe oí upe oyepota tēi ivitú ai, amarusu reseve, ichui oyeapo tēi avei iai chupe, oí rumo ndoviapi eté. Esepia, ita harive ité yaposa. ²⁶ Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriñehisa pipe omopuha vahe ivi cuhi harive tēi güëtarã. ²⁷ Ipare rumo oyepotase ivitu ai amarusu reseve chupe, ndaracaheimi ahe oí omondurupa” ehi Jesús ava rehii upe.

²⁸ Iñehe renduse ava rehii, “¿Mara ehi rutei?” ehi tēi yuvireco chupe. ²⁹ Esepia, ndahei Moisés porocuaita rese oporombohe vahe nungar; ahe rumo oporombohe güeco píratasa pipe.

8

Jesús ombogüera ava lepra vireco vahe

¹ Ivitri sui ogüeyise Jesús, ava rehii avei yuvirecoi supi. ² Ahese ava lepra vireco vahe ou, oñenopihā sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

³ Aipo ihese, Jesús opoco sese aipo ehi:

—Taa, aipota. ¡Ecuera cüritei! —ehi.

Aipo ihe ramoseve, ocuera voi eté.

⁴ —Nde cuerasa eremombehu eme ambuae ava upe —ehi— . Nde poyavaño eso, eyemboyecua judío pahi upe. Ipare eicuavéhe nde porerecosa nde cuera agüer resendar Moisés porocuaita rupi. Ipípe sui toicua ava nde cuerasa yuvireco —ehi.

Jesús ombogüera sundao rerecuar remimboacua

⁵ Ipare Jesús oguataño, ñgue ehi tecua Capernaum ve oyepota oso. Aheve oime sundao rerecuar Roma iguar. Ahe ou chupe ⁶ aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tēi ombaherasisa ou —ehi.

⁷ —Aviye, cüritei evocoiyase asora imbogüera —ehi.

⁸ —Aní, che Yar, ndiyai eté che rēta pipe nde reique água; iyacatu niha cohapeve ereñeheño tēi icuera água. Evocoiyase nde ñehe pipe tēi che remimboacua ocuerara. ⁹ Esepiá, che niha serecua vahe avei no, areco avei sundao che voya. Ahe chupe, “Eso peve” ahese, cūrитеi oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei –ehi.

¹⁰ “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiai eté ava imbahe reroya vahe yuvireco yepi co ava nungar. ¹¹ Che aipo ahe pēu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tūpa mborerecuasave Abraham, Isaac iyavei Jacob piri coiye. ¹² Judío eta rumo, oyeupe ñehesa reroyaëhi pipe setá pítumimbisave ocañi tēira yuvireco. Aheve oyaseho tēira yuvireco iyavei oñeaimbotere-tere tēira mbaherasicuer rereco yuvireco –ehi oñehe.

¹³ Evocoiyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu –ehi.

Ahe pipeve semimboacua ocuera tupri ité.

Jesús ombogüera Pedro rembireco si

¹⁴ Ipare Jesús oso Pedro rētave. Aheve osepia Pedro rembireco si sohí iteangase vupave ou. ¹⁵ Opocose ipo rese, ahe ramoseve sohí opituhu ichui. Ocuerare, oñarapuha ava rese ohañeco água.

Jesús ombogüera setá ava imbaheasi vahe

¹⁶ Ipare pítu ramose setá caruguar vireco vahe ogüeru yuvireco chupe. Jesús rumo ñepei reseve oñehe pipe tēi omombopa caruguar ava rehii sui, iyavei opacatu imbaheasi vahe ombogüera avei no. ¹⁷ Ëgüe ehi omboaviye Tūpa ñehe mombehusar Isaías rembicuachiagüer aipo ehi vahe aracahe: “Ahe ae virocua opacatu yande mbaherasisa yande sui iyavei oiporara opacatu mbahe tasi vahe yande rese” ehi.

Oguata pota tēi vahe ava Jesús rupi yuvireco

¹⁸ Jesús osepia ave rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so água” ehi. ¹⁹ Ahese Moisés porocuaita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi –ehi.

²⁰ Jesús rumo aipo ehi imboyevi chupe:

—Yavaira rumo ndeu. Esephia, vīrai vireco guaiti, iyavei aguara vireco oquesa; che rumo, Ava Riquehir, ndarecoi que che rēta ité che pituhu āgua yepi —ehi.

²¹ Ipare ūnepe i voya aipo ehi chupe:

—Che Yar, che ru manore voi che nde rupiño ité aicora —ehi.

²² —Aní, cūritei voi eyu che rupi —ehi—. Êgue tehiño ava secocuer omano vahe nungar, ahe ae toñefieti yuvireco —ehi chupe.

Jesús omombituhu ivitu ai, ohitu vahe avei

²³ Ipare Jesús yuviroha güemimbohe reseve yuviraso carite pipe. ²⁴ Ipa pipe yuviraso pucu ramoseve Jesús oque ou. Ahese aviyeteramo tēi ivitu ai opūha ipa pipe; i ohitu vahe ndiguayi eté, seni-seni carite oyopi. ²⁵ Evocoiyase semimbohe yuviraso voi imomahe:

—¡Ore Yar, yande rerasora mo co carite ipive! ¡Yande písirō eve! —ehi yuvireco chupe.

²⁶ Evocoiyase aipo ehi:

—¡Mahera pesiquiye! ¡Ndapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, ivitu ai upe avei no: “Pepituhupa” ehi. Aheseve voi opa tupri opituhu yuvireco.

²⁷ —¿Mara ehi rutei pīha co? —ehi tēi semimbohe yuvireco chupe—. ¿Mara ehi vahe pīha co ava secoi?

Esephia niha, ivitu, para guasu avei ombooyeroya yuvireco no —ehi.

Jesús omboye pepipa caruguar Gadara pendar sui

²⁸ Jesús oguataño güemimbohe eta reseve oyepota ipa rovai Gadara ivi rese yuviraso. Aheve ūvirío ava caruguar vireco vahe yugüeru sovaichi. Ahe ava tehōgürer ruvipa rupi tēi yuvirecoi vahe, iyavei ndiporomboetei vahe yuvireco. Ichui osiquiye pave ava ndoguata potai ahe peri rupi yuvireco yepi. ²⁹ Jesús repia ramoseve rumo, oñehe pīrata yuvireco chupe aipo ehi:

—¡Jesús, Tūpa Rahir, eyepepi ore sui! Esephia niha, ndoyepota vitei ari nde ore mombaraisu āgua oreu —ehi tēi yuvireco.

³⁰ Namombríimi cuchi rehii yuvirecoi ichui. ³¹ Caruguar evocoiyase aipo ehi yuvireco chupe:

—Ore mombopaño tēi eve evoco cuchi rese —ehi.

³² —Aviye, peso —ehi caruguareta upe.

Aipo hese, caruguar opa yuvinose ava sui, yuviroique cuchi rehii aviterve. Ipare rumo cuchi ndayaracua iri yuvireco; ivi socuer rupi yuvinoña yuviraso, opa ipa pipe ocañi tēi yuvireco.

³³ Yuvinoña evocoiyase cuchi rārosar tecuave yuviraso opacatu mbahe güembiepia mombehu ava upe yuvireco.

³⁴ Ichui opacatu ava tecua pendar yuvinose ati Jesús upe, “¡Eso cohave sui!” ehi yuvireco chupe.

9

Jesús ombogüera ava ndoguatai vahe

¹ Ipare Jesús oha carite pipe osasa iri ipa rovai oso güecua Capernaum ve. ² Aheve, ava ndoguatai vahe omboyovai seraso imbaheasi vahe riru pipe yuvireco chupe. Ahe oicuase co ava yuvirecoi vahe oyece yeroja, aipo ehi imbaheasi vahe upe:

—Che rahir, eyemopoase, che ñero nde angaipa rese ndeu —ehi.

³ “¡Co mbia oyemboivate ai tēi vahe, Tūpa ñehe nungar pipe tēi oñehe!” ehi Moisés porocuaita rese oporombohe vahe yuvireco chupe. ⁴ Jesús rumo oicua ipihañemoñetasa, sese aipo ehi chupe:

—Mahera pepihañemoñeta rai pe yapisacasa rereco! ⁵ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise, ‘Epūha, eguata’ hesa tie? ⁶ Tapeicua ru che, Ava Ríquehir, areco mborerecuasa co ivi pipe ava angaipa upe che ñero ãgua —ehi.

Evocoiyase aipo ehi imbaheasi vahe upe:

—Epūha, esupi nde rupa seraso nde rētave —ehi.

⁷ Ahese opūha voi, oso güêtave. ⁸ “¡Too! ¿Mara ehi rutei vo?” ehi ava rehii yuvireco imboeteisave. “Esepio, ahe niha ombou opíratasa ava upe” ehi yuvireco chupe.

Jesús, “Erio che rupi” ehi Mateo upe

⁹ Ichui osose Jesús, che repia, che Roma pendar mborerecuuar guasu upe guarepochi rerocuasa mesave che rēise. Ipare aipo ehi cheu:

—Erio che rupi —ehi.

Evocoiyase apūha, aso voi supi.

¹⁰ Ahe arí pipeve Jesús güemimbohe reseve yuviroique che rētave. Ambocaru setá ambuae ava guarepochi Roma pendar mborerecuuar guasu upe monuhasar reseve, ava angaipa viyar yuvirecoi vahe reseve avei. ¹¹ Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoí nungar ava angaipa viyar pāhuve tēi? —ehi seroñrosa pipe yuvireco chupe.

¹² Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopōsano vahe; imbaheasi vaheño rumo oseca yuvireco. ¹³ Peyapisaca icuachiapri aracahendar aipo ehi vahe rese: ‘Poroparaísuerecosa aipota; ndaipotai mbahe cheu serocuavéhepri tēi’ ehi. Esepio, ndayui

ava seco catupri vahe reca, ñgue ehi rumo ayu ava angaipa viyar reca –ehi Jesús ava eta upe.

Yecuacu rese ñhesa

¹⁴ Ipare Juan Oporoāpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoiyase nde remimbohe eta ndoyecuacui yuvireco yepi? —ehi yuvireco chupe.

¹⁵ Ahe rumo omboyeví ahe ava upe:

—¡Ndiyai eté ichohopri mendasave ndoyembovihai yuvireco imer oicovese ipāhuvel! Oimera rumo arí imer reraso água ichui curi. Ahese ramo oyecuacura yuvireco cute —ehi.

¹⁶ “Ndipoi chietera revo que ava oturucuar cuacula oyapete vahe turucuar ipiasu vahe pipe. Esepiá niha, yapetesipiasu vahe oichohoño turucuar cuacula imondoro. Ichorosa evocoiyase tuvicha catu-catuno ité. ¹⁷ Iyavei ndiyai ava uva ricuer piasu oyapocatu siru mbahe pirer cuacula vahe pipe. Ñgue ehise, mbahe pirer opura viña, ocañi tēira, uva ricuer avei evocoiyase ocañi tēi aveira viña no. Acoi uva ricuer ipiasu vahe mbahe pirer ipiasu vahe pipe yapocatupri rumo oyoya ndoyemomarai yuvireco” ehi.

Jairo rayrī iyavei cuña Jesús turucuar rese opoco vahe

¹⁸ Jesús oporombohe viteseve, ou mborerecuar oñenopihá sovai aipo ehi chupe:

—Che rayrī mo cūritei omano pota ité. Yaso, nde eremondose rumo nde po sese oicovera —ehi chupe.

¹⁹ “Aviye” ehi. Evocoiyase opūha yuviraso güemimbohe reseve supi. ²⁰ Ahe pipeve cuña doce araviter rupi suvi ndopai vahe opoco saquicuei coti iturucuar popi rese. ²¹ Esepiá, ahe aipo ehi opihapipe: “Yepe que iturucuar popi resemi tēi apocora, acuerara rumo” ehi. ²² Jesús evocoiyase oyemboyere cuña rese aipo ehi chupe:

—Che rayrī, eyemopoase, errecuera cūritei nde yeroyasa pipe —ehi.

Aipo ihe ramoseve, cuña ocuera voi eté.

²³ Oyepotase Jesús mborerecuar rētave, osepiá omimbí vahe iyemoingatupase omano vahe tī água, ava yaseho atise avei no. ²⁴ Ahese aipo ehi ava oyaseho vahe upe:

—Pesēpa cohabe sui. Co cuñatai nomanoi; oque tēi ou —ehi.

Ahe ava rumo opucaete atiño seroyaēhisave yuvireco. ²⁵ Ichui opa ava omose, ahese oique oí pipe oipopisi cuñatai. Evocoiyase ahe oñarapuha voi. ²⁶ Co sembiapo evocoiyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoí vahe

²⁷ Acoi osëse evocoí oi sui Jesús, ahese ñuvirío ndasesapisoí vahe osaquiue moña, osapucaí yuvireco chupe aipo ehi:

—¡Jesús, David suindar, ore paraisuerecomi tēi eve! —ehi pucu-pucu yuvireco chupe.

²⁸ Oi pipe seiqueste, oyemboya ndasesapisoí vahe yuvireco sese. Ahese Jesús oporandu chupe:

—¿Che reroya ité vo pe mbogüera áqua rese peye? —ehi.

—Nde reroyasa ité, ore Yar —ehi yuvireco.

²⁹ Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pēu —ehi.

³⁰ Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

³¹ Ahe rumo ichui oyepepi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñehengatui vahe

³² Ichiri ramoseve rumo, ambuae ava viroyepota ava niñehengatui vahe caruguar rerecosar Jesús upe yuvireco.

³³ Ichui omosese caruguar, iñehengatu cute. Sepiase opacatu ava,

—¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tēi yuvireco.

³⁴ Fariseo eta rumo aipo ehiño yuvireco:

—Caruguar rerecuar píratasa pipe co mbia omose caruguar ava sui —ehi tupri tēi yuvireco chupe viña.

Jesús oiparaisuereco ava

³⁵ Ichui opacatu tecua rupi Jesús oguata oporombohe tūparo yacatu. Omombehu tecovesa aviyé vahe Vu mborerecuasa resendar iyavei oporombogüera opacatu catu tēi mbaherasisa sui avei no. ³⁶ Osepiase ava rehii, oiparaisuereco yuvireco. Esepiá, ahe oñemosaoño tēi mbahe rasicuer pāhuve inungar ovesa ndovirecoi vahe guārosar yuvireco ³⁷ Evocoiyase aipo ehi güemimbohe upe:

—Supi eté mbahe miti imonuhapirā setá iteanga; sese oporavíqui vahe rumo moviromi tēi. ³⁸ Sese peporandu mbahe miti Yar upe, ahe tomondo ava imonuha áqua —ehi güemimbohe eta upe.

10

Jesús oiporavo doce tupri apóstol

¹ Evocoiyase, “Perio” ehi Jesús doce güemimbohe upe. Chupe omundo güeco píratasa caruguar ava sui imboyepepi áqua iyavei iporombogüera áqua opacatu-catu tēi mbaherasisa sui.

² Ahe ava doce tupri apóstol yuvirecoi vahe: yipindar Simón Pedro, ahe tivri Andrés; ambuae Santiago, Zebedeo rahir, ahe tivri Juan; ³ Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; ⁴ iyavei Simón, güecua rese secatéhi vahe pāhu pendarer; ipa vahe Judas Iscariote, ahe Jesús omondo vahe yamotarēhimbar upe.

Jesús oyocuai güemimbohe Vu mbororecuasa mombehu água

⁵⁻⁶ Ipare oyocuai güemimbohe imondo aipo ehi chupe: “Pensora yipindar judío recua rupi. Esepia, inungar ovesa ocañi vahe, égue ehi tēi secocuer yuvireco. Evocoiyase pesoi rene ndahei vahe judío recua rupi iyavei ndapeiquei chira tecua Samaria ve” ehi. ⁷ “Judío recua rupi pesoseve, ‘Cōimi Tūpa mbororecuasa secoi yandeu’ peyera imombehu. ⁸ Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei caruguar pemboyepipi serecosar sui. Esepia niha, peipisi píratasa ndasepii vahe. Sese peyapoño evoco mbahe guarepochi pisihisa pipe.

⁹⁻¹⁰ “Ava oporaviqui pipe sui ocaru yepi. Sese ndaperaso chira guarepochi peyese. Ndaperaso chiaveira pe mbahe ríru, iyavei ambuae pe turucuar, pe pitaqui; peyesendar güeraño tupri perasora. Pe pococa avei ndaperaso chira” ehi.

¹¹ “Iyavei que tecuave peyepotase, peseca rane ava imboyeroyapri. Ahe sétave pepitami ranera. Pemboaviyese pe cuaita, ahese ramo pesora ichui” ehi. ¹² “Evocoiyase peique ramoseve oi pipe, peyapora, ‘Avirave, Tūpa tape rovasa’ peyera chupe. ¹³ Acoi aviyese oi pipendar ava pēu, ahe oipisira Tūpa porovasasa; acoi ndahaviyeise rumo ava, ndoipisi chira Tūpa porovasasa yuvireco. ¹⁴ Acoi ndosendu potaise pe ñehe, ndape pisi potaise avei yuvireco, ahese peséño ahe oi pipe sui, anise tecua sui. Peipipetera pe pi ivi rātachigüer sui, pesé pecua ichui ‘toipisi Tūpa ñemoirosa yuvireco’ pe yapave. ¹⁵ Evocoiyase supi eté arí cañi oyepotase co tecua upe, ivate catura Tūpa ñemoirosa ava Sodoma, Gomorra iguar upendar sui curi” ehi.

Yamotarēhiprira Jesús reroyasar

¹⁶ “¡Pesendu tupri che ñehe! Che opomondo ovesa nungar ava mbahe mimba oñaro ai vahe nungar pāhuve. Sese peresaeté tuprira peyese mboi nungar, iyavei inungar apicasu seco tupri vahe peicora. ¹⁷ Iyavei peicua catu peamotarēhimbar sui. Esepia, mbororecuuar rovai pe rerasora iyavei pe nupara otūparo pipe yuvireco, ¹⁸ ichui pe reraso aveira mbororecuarea ivate catu vahe rovai yuvireco che recocuer sui tēi, égue peyera peñehe che recocuer rese chupe iyavei ava

ndahei vahe judío upe avei. ¹⁹ Acoi pe rerasose mborerecuar upe yuvireco, ‘¿Mbahe pīha amombehura chupe?’ ndapeyei chira; acoi peñehe potase rumo, Tūpa omondora pe ñehe água pēu. ²⁰ Esepio, ndahei chira peyesui tēi peñehe, pe Ru Tūpa Espíritu pemoñehe ucara.

²¹ “Ipare rumo ava vivri omondora oamotarēhisar upe ‘toyuca yuvireco’ oya. Ëgüe ehi aveira ava guahir upe; tahir avei oyamotarēhira oyesupa yuca uca água yuvireco che recocuer rese. ²² Iyavei opacatu ava ndape ambotai chira che recocuer sui tēi yuvireco. Acoi oyemoviracua vaheño rumo ari ipa vahe rupi, ahe ipísiroprí yuvirecoira curi. ²³ Iyavei acoi pe mañeco tēise ñepei tecuave yuvireco, ahese peyepepiñora ichui ambuae tecua pipendar upe che recocuer mombehu água. Supi eté Ava Riquehir oura ndapemboaviye vitéiseve pe guatasa judío recua rupi.

²⁴ “Ñepei yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe güerecuar sui. ²⁵ Iyavei semimbohe, ‘Aviye ité’ ehiñora ombohesar osecoupitise. Ëgüe ehi aveira mbiguai güerecuar upe. Acoi oíyar upe: ‘Caruguar rerecuar Beelzebú’ ehise, aipo ehi aveira niha oípipendar upe yuvireco no” ehi.

¿Uma sui pīha siquyesara?

²⁶ “Sese ndapesiquiyei chira ava pe amotarēhimbar sui. Esepio, yaposa vahe imombehupiréhi cûritei, icuasaño itera curi; iyavei mbahe ñomiprí, icuasaño aveira no. ²⁷ Acoi che amombehu vahe pítumimbisave pēu, pemombehu ari pipe coiye, iyavei acoi amombehu vahe pēuñomi, perosapucái pe rēta haríve imombehu opacatu ava upe. ²⁸ Iyavei ndapesiquiyei chira acoi ava peyuca potasar sui. Esepio, ndoicatui niha ava hā moçañi água yuvireco. Tūpa sui rumo pesiquiye catura. Esepio, ahe oicatu yande retecuer, yande hā reseve imocañi água tata guasu pipe” ehi.

²⁹ “Yamondo niha ñuvirí vîraimi repirâ ñepeimi guarepochi yepi. Yande Ru Tūpa ndoipotaise rumo, ndoviapi chietera que ñepei vîraimi” ehi. ³⁰⁻³¹ “Sese pesiquiye eme. Esepio, pe niha ivate catu vahe ité peico opacatu vîrai sui. Supi eté Tūpa niha oicua opacatu ñepei-peí pe ha retacuer” ehi.

“Che aicua Jesucristo” ehi vahe opacatu ava rovaque

³² “Acoi ava ‘che aicua Jesucristo’ ehi vahe opacatu ava rovaque, che avei evocoiyase: ‘Co ava che rupindar secoi’ ahera che Ru íva pendar upe. ³³ Acoi ava ‘che ndahei Cristo rese aico’ ehi vahe rumo cheu ava rovaque, che avei evocoiyase, ‘Ndahei co che rupindar secoi’ ahera che Ru íva pendar upe.

Jesús reroyasa pipe sui oimera yeamotarēhisa

34 “Mbahe tupri ai revo güeru co ivi pipe’ ndapeyei chira cheu. Ëgue ehi rumo che yusa omoime ucara yeamotarēhisa. 35-36 Sese ava oñemu ae oyeamotarēhi-rēhira yuvireco; ava oyesupa oyamotarēhira, iyavei cuña membrí osi oyamotarēhira, cuña vovayar oyamotarēhi aveira.

37 “Iyavei acoi oyesupa tēi osaisu catu vahe che sui, ahe ndiyai eté secoi che voyarā; inungar avei osaisu catu vahe guahir, anise guayri che sui. 38 Iyavei acoi noñemosai vahe mbahe rasicuer upe, inungar-ra curusu rese ovosii vahe ité viña che rupi oguata pipe, ahe chupe ndiyai eté che voya seco äqua. 39 Acoi ava oipisiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepisirora” ehi Jesús güemimbohe eta upe.

Porerecosa resendar ñehesa

40 “Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar. 41 Acoi ava oipisi tupri vahe ambuae ava Tūpa ñehe mombehusar secosa rese, ahe oipisi aveira porerecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porerecosa inungar tupri. 42 Iyavei acoi omondo vahe que chihí i sôhisa vahe que ñepei seco mbegüemi catu vahe toihu che reroyasar seco rese, ahe oipisi aveira Tūpa suindar porerecosa” ehi.

11

Juan Oporoäpiramo vahe ovoya omundo Jesús recocuer cua uca äqua

1 Opase Jesús oyocuai doce güemimbohe, ahese yuviraso oporombohe Tūpa Ñehengagüer rese judío recua rupi yuvireco.

2 Ahese Juan Oporoäpiramo vahe voquendasave chinise, oyandu mbahe Jesucristo rembiapo. Sese omundo vupindar Jesús upe mbahe rese 3 imboporandu äqua: “¿Nde ité vo Tūpa Rembiporavo aipo sârombri ereico? anise, ¿oime tie ambuae orosâro vaherâ?” ehi yuvireco chupe.

4 Ipare omboyevi chupe aipo ehi: “Peso, pemombe-hupa Juan upe mbahe pe rembiepia iyavei pesendu vahe. 5 ‘Ndasesapisoí vahe osareco tupri cûritei yuvireco, ipäri-päri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaísu vahe upe imombehusa pisirosa resendar ñehesa’ peyera chupe. 6 ¡Ovharetera acoi ava oyeroyaño vahe che rese!” ehi Juan rupindar upe.

⁷ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave capihiaita ivitu ombova-mbova vahe nungar pīha?

⁸ Anise, ¿pesepia tie iturucuar porañete ai vahe iyemboeteise? ¡Aní! Ëgüe ehi vahe rumo secoi mborerecuar guasu rētave yepi. ⁹ Evocoiyase pesepiase, ¿‘Ava’ peye vo pe chupe? ¿Tūpa ñehe mombehusar ité pīha? Taa, ahe ité. Evoco niha ivate catu vahe Tūpa ñehe mombehusar sui. ¹⁰ Ahe chupe ité Tūpa icuachiapri aracahendar pipe aipo ehi:

‘Che amondora nde renondeve che ñehe mombehusar nde raperā moingatu ãgua’ ehi.

¹¹ Supi eté ndipoi que ñepei ava seco ivate catu vahe Juan Oporoäpiramo vahe sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

¹² “Juan yusa suive tupri Tūpa povri pendar oiporara mbahe tēi yuvireco. Osāha-sāha ava opíratasa pipe imocañi ãgua. ¹³ Opacatu Tūpa ñehe mombehusar rembicuachía pipe, Moisés porocuaita icuachiapri pipe avei imombehusa Juan yusa rupive co Tūpa mborerecuasa resendar. ¹⁴ Yepe yavaira seroya ãgua pēu viña, Juan rumo, Tūpa ñehe mombehusar Eliás. Ahe imombehupri ou vahe. ¹⁵ Acoi ava osendu pota vahe che ñehe, toyapisacaño sese” ehi.

¹⁶ “¿Mbahe rese pīha amboyoyara ava recocuer cūriteindar? Esepia, co ava inungar acoi chīhivahe iguayi tēi vahe ocar rupi. Ipare oñehe pucu-pucu omboripar upe yuvireco aipo ehi: ¹⁷ ‘Oromoñehe tēi mimbi pēu, ndapepívoi eté rumo iyavei orosapuai tēi sapucaisa vīharēhisa resendar pēu, pe rumo ndapeyasehoi eté’ ehi. ¹⁸ Esepia, ouse Juan Oporoäpiramo vahe, ahe ndohui tembihu sepirusu ai vahe iyavei ndoihui uva rīcuer ipírata vahe, sese, ‘Co mbia caruguar vīreco vahe oyese’ peye tupri tēi chupe. ¹⁹ Coiye che ayu, Ava Riquehir, acaru, aihu tupri avei. Ipare, ‘Co icaru guasu ai vahe secoi, iihu guasu ai vahe avei’ peye cheu; ‘Ava angaipa viyar mboripar tēi iyavei guareepochi rerocuasar mboripar tēi’ peye avei cheu. Acoi ava supi eté vīreco vahe Tūpa mbahecuada, ahe icuasara sembiapo rese yepi” ehi.

Tecua ndiporeroysi vahe

²⁰ Ahese Jesús oñehe pīrata moviro tecua pendar upe. Esepia, aheve acoi oyapo ati catu mbahe poromondiisa viña. Ahe pendar ava rumo ndosecuñaro potai eté güecocuerai Tūpa upe nara yuvireco. Evocoiyase aipo ehi chupe: ²¹ “¡Peperaisu, ava tecua Corazín pendar! ¡Pe avei peparaisu tecua Betsaida

pendar! Esepiá, acoi poromondiisa pe pāhuve yapopri, ya posara yipive tecua Tiro, Sidón ve viña, co tecua pendar aracaheve anga omondera turucuar viharēhisa resendar, tanimbu avei omondora oaca rese oangaipa mboasisa pipe yuvireco viña no. ²² Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye. ²³ Pe avei no, tecua Capernaum pendar pemoha co ivave pe reco água viña. ¡Pe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pāhuve yaposara viña, cüritei oime vitera ahe tecua viña. ²⁴ Sese, pe peipisira ivate catu Tūpa ñemoirosa ava Sodoma iguar sui ari cañi pipe coiye” ehi.

Peyu cheu mbituhusa reca

²⁵ Iyavei ahe ari pipe Jesús oyerure: “Che Ru, aviye ndeu. Nde niha iva pendar, ivi pipendar Yar ereico. Esepiá, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe. ²⁶ Ëgüe ere niha mbahe nde remimbotar apo, che Ru” ehi.

²⁷ “Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evoco nungar upe aicua uca tuprira. ²⁸ Peyu cheu opacatu icuerai vahe. Che amondora pe pituhu água. ²⁹⁻³⁰ Peico che povriven, peyembohe avei che sui. Esepiá, che ndache reco asii, iyavei che povriven pe recosa ndayavaimi eté. Ahese ramo oimera mbituhusa pēu” ehi.

12

Mbituhusa ari pipe Jesús remimbohe oipoho trigo yuvireco

¹ Mbituhusa ari pipe Jesús yuviraso güemimbohe rese, oguata mbahe miti pāhu rupi. Ahese semimbohe ndasiepoi. Evocoiyase trigo rāhii oipoho-pohomi güemihura yuvireco. ² Fariseo yuvirecoi vahe osepiase, aipo ehi Jesús upe:

—Esepiá nde remimbohe. Oporavíquño mbituhusa ari pipe yuvireco —ehi yuvireco chupe.

³ Ahe rumo omboyevi ahe fariseo upe:

—Peicua tēi niha icuachiapri aracahendar mborerecuar guasu David rembiapoguer resendar ñehesa onduguer reseve ndasiepoise yuvireco. ⁴ Ahe niha yuviroique ité tūparo pipe pan imboeteipri Tūpa upendar hu água onduguer reseve. Ahe chupe acoi ndipotasai ihu água yuvireco viña. Judío pahi yuvirecoi vahe upeno ité niha ipotasa ihu água yepi. ⁵ ¿Ndapeyeroqui vo Moisés porocuaita resendar pipe? Esepiá,

judío pahi tūparo rese hañecosar ndopituhui eté tūparo pípe yuvíreco mbituhusa arí pípe yepi. Ndahei rumo oyemboangaipa ipípe yuvíreco. ⁶ Cüritei coháve oime ava ívate catu vahe tūparo sui. ⁷ Evocoiyase pe ndapesenducuai eté Tūpa Ñehengagüer aipo ehi vahe: ‘Che aipota peporoparaísueroco, aní chira peropovéhepa porerecosa mbahe mimba tēi cheu’ ehi vahe. Pesenducuase viña, ahese, “Oyaví mbahe” ndapeye voi chira che remimbohe mbahe ndoyavíi vahe upe viña. ⁸ Esepio, Ava Ríquehír mbituhusa arí rerecuar ité secoi –ehi fariseo eta upe.

Mbia ipo nomii vahe Jesús ombogüera

⁹ Ichui osose Jesús, oique judío tūparove. ¹⁰ Aheve oime mbia ipo co cotigüer nomii vahe. Aheve avei fariseo, “Yaiñehengapo angahu Jesús” ehi yuvíreco viña. Sese,

—¿Iyaño píha mbituhusa arí pípe ava imbogüerasa yepi’ –ehi yuvíreco chupe.

¹¹ Evocoiyase Jesús aipo ehi imboyevi:

—¿Ava vo pe pāhu pendar acoi mbituhusa arí pipe ovíapise seimba ovesa ívicuarve ndosoi chira senose viña? ¹² ¡Ava niha avíye catu ovesa sui! Sese iyacatu yande yayapo mbahe avíye vahe mbituhusa arí pípe yepi –ehi.

¹³ Ahese aipo ehi aipo mbia upe:

—Eichoho nde yíva –ehi.

Evocoiyase oichohose oyiva, ocuera tupri voi inungar ambuae iyíva. ¹⁴ Evocoiyase fariseo opa yuvínose yuvíraso oyemoingatu Jesús yuca áqua yuvíreco.

Yaviye aracahendar imombehupri Jesús recocuer resendar

¹⁵ Evocoiyase Jesús oicuase fariseo píhañemoñetasa, osé oso, ava rehii avei yuvíraso supi. Setá avei imbaheasi vahe ombogüera, ¹⁶ iyavei, “Che mombehui rene ava upe peyé” ehi. ¹⁷ Ëgüe ehi yaviyepa Tūpa ñehe mombehusar Isaías remimombehugüer:

¹⁸ “Co ité che mboyeroyasar che rembiporavo.

Ahe asaisu etepri.

Sese ité ayembovíha.

Amondora che Espíritu chupe.

Ahe omombehu aveira mbahe ihívi vahe opacatu ava ívi pipendar upe.

¹⁹ Noiñehopoepi-epii chira ava, nasase-sasei tēi chiaveira; iyavei ndosendui chietera ava iñehe ocar rupi.

²⁰ Iyavei nomopei chietera que ñepei pataviími oyeapa vahe; nombogüei chiaveira tataendi sãtachiñomi tēi vahe.

Ëgüe ehira mbahe ihívi vahe pípe opacatu secopípa.

21 Evocoiyase opacatu tecua pendar ava ndahei vahe judío
oyeroyara yuvireco sese' ehi
Isaías aracahe.

"Jesús vireco caruguar píratasa oyese" ehi tēi ava yuvireco

22 Ichui ava ndasesapisoī vahe, noñehei vahe caruguar rerecosar viraso Jesús upe yuvireco. Evocoiyase Jesús ombogüera. Ahese osareco, oñehe avei. 23 Evocoiyase opacatu ava oyepihamondiisave aipo ehi yuvireco: "¿Tūpa Rembiporavo David suindar pīha co?" ehi yuvireco chupe.

24 Osenduse rumo fariseo, "Co mbia caruguar rerecuar Beelzebú píratasa pipe tēi omboyepepi caruguar ava sui" ehi yuvireco.

25 Oicuaño rumo ipihañemoñetasa. Sese aipo ehi: "Que mborerecuar guasu povri pendar ovava-vavase oyeupe oyeamotarēhisave yuvireco, ahese evoco mborerecuar píratasa ocañi tēira. Iyavei que tecua pendar, anise, que ava omu rese ovavase oyeupe, oyoya oyemocañi tēira yuvireco.

26 Ëgue ehi avei caruguar. Esepia, serecuar omboyepepise opovri pendar, ovavara oyeupe yuvireco viña. Evocoiyase ahe oyemocañi tēira yuvireco. 27 Iyavei pe, 'Beelzebú píratasa pipe sui tēi omboyepepi caruguar ava sui' peye tēi cheu. Evocoiyase, ¿ava píratasa pipe vo pe voya eta omboyepepi caruguar ava sui yuvireco? Tūpa píratasa pipese, che avei evocoiyase ayapo evoco nungar ipíratasa pipe. Pe voya ae omboyecuara pe ñehe pe rembiavi yuvireco pēu. 28 Che rumo Tūpa Espíritu píratasa pipe amboyepepi caruguar ava sui. Sese cüritei pesepia ité Tūpa mborerecuasa.

29 "Iyavei no, que ava oique potase ambuae ava ipírata etepri vahe rētave imbahe rerocua ãgua ichui viña, yipindar opa rane itera oñapichi-pichi. Ipare voi opara virocua imbahe ichui.

30 "Iyavei acoi ava ndache mboyoyai vahe, ahe che amotarēhimbar yuvirecoi; acoi ava ndosecai vahe ava cheu nara, ahe omosai tēi yuvireco che sui.

31 "Sese ava upe oimera ñeroisa opacatu angaipa rese iyavei iñehe mara-mara tēi vahe upe avei. Co catu acoi iñehe-ñehe tēi vahe Tūpa Espíritu upe, ahe chupe ndipoi chietera ñeroisa.

32 Iyavei acoi ava oñehe-ñehe tēi vahe che, Ava Riquehir rese, ahe chupe oimeño ñeroisa; acoi oñehe-ñehe tēi vahe rumo Espíritu amotarēhisave, ahe chupe ndipoi chira ñeroisa co ivi pipe iyavei ivave" ehi Jesús fariseo eta upe.

Ava recocuer icuasa sembiapo rese

33 "Emoatiro tupri ivira, ahe iha aviyera; nderemoatiro tupriise ivira, ahe evocoiyase virecora oha naporai vahe. Esepia, ivira icuasa iha rese. 34 Evocoiyase pe, mboi nungar tēi

peico vahe, pe recocuer naporaisse, ndapeicatui chira mbahe aviyé vahe rese pe ñehe água! Esepia, pe piha pipe sui tēi osē pe ñehe água. ³⁵ Iyavei acoi ava aviyé vahe oñehe tupri opíhañemoñeta catuprisa pipe; acoi ava recocuer naporai vahe rumo, opíhañemoñeta raisa pipe tēi oñehe. ³⁶ Sese ari cañi pípe opacatu ava opara omombehu oñehe-ñehe tēisa Tūpa rovai yuvireco. ³⁷ Esepia, pe ñehe aviyé vahe reprí peipisira, pe ñehe naporai vahe reprí peipisi aveira” ehi Jesús.

Ava eta ndaseco pōrai vahe oporandu poromondiisa rese yuvireco

³⁸ Evocoiyase fariseo iyavei Moisés porocuaita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua água —ehi yuvireco.

³⁹ Jesús rumo omboyevi iñehe:

—Pe ava ndaseco pōrai vahe, ndiporeroyai vahe, peporrandu tēi poromondiisa tecocuer cua água rese. Che rumo namboyecuai chira ambuae poromondiisa; Jonás recocuer rese güeraño opomomahenduhara. ⁴⁰ Esepia, inungar Jonás secoi mbosapi ari pira guasu aviterve aracahe, ñgue ehi aveira Ava Riquehir mbosapi ari ivivrive tuira omano vahe pāhuve. ⁴¹ Evocoiyase ari cañi pípe ava tecua Nínive pendar porandusave omombehura ava cüriteindar cañipa água. Esepia, Nínive pendar niha omboasise oangaipa, oyevi Tūpa upe yuvireco Jonás omombehuse Tūpa Ñehengagüer chupe. Cüritei rumo oime Jonás sui aviyé catu vahe pe pāhuve. ⁴² Iyavei ari cañi pípe cuña mborerecuar guasu irohi coti secua vahe porandusave, omombehura cüriteindar ava cañipa água. Esepia, ahe ou amombrí sui Salomón mbahecusa rendu água. Cüritei rumo oime ivate catu vahe Salomón sui —ehi fariseo eta upe.

Caruguar oyevi iri ava güeco agüerve

⁴³ “Iyavei caruguar osēse ava sui, oguata tēi ivi ipiru vahe rupi opituhu água reca. Ipare rumo ndoyosuisse, ipíhañemoñeta, ⁴⁴ ‘Ayevi irira che reco agüerve vicho’ ehi. Aheve oyevise, osepia iri secocuer inungar oi ndiporusai vahe, sahuvapri tupri. ⁴⁵ Sepiase, oso siete caruguar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui. Ñgue ehi aveira ava cüriteindar ndaseco pōrai vahe upe” ehi.

Jesús si, tivireta avei

⁴⁶ Jesús oñehe viteseve ava upe, ahese ichi, tivireta reseve ocarve yuvinohai. Ahe oñehe pota yuvireco chupe.

⁴⁷ Evocoiyase mbia omombehu Jesús upe:

—Nde si, nde rivireta reseve co ocarve yuvínohai. Ahe oñehe pota yuvireco ndeu —ehi.

⁴⁸ Ahe rumo,

—¿Ava pīha che si; ava pīha che rivri? —ehi ahe mbia upe.

⁴⁹ Evocoiyase omboyecua opo pipe güemimbohe eta aipo ehi:

—Co che si eta, co che rivireta. ⁵⁰ Esepia, acoi che Ru iva pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

13

Mbahe miti sui yembohesa

¹ Ahe ari pipe Jesús osē oi sui oso, oguapi ipa popive oī.

² Aheve ava oñemonuha atise yuvireco, oha carite pipe oguapi oī, evocoiyase opacatu ava opita ipa popi rupi yuvireco.

³ Ahese omboyoya-yoya oporombohesa setá mbahe rese aipo ehi:

“Ñepei mbia osē omaheti oico. ⁴ Ahe otíapi-apíise mbahe rāhii oso, moviro oiti peri rupi. Vírai ogüeyise rumo sese, opaño yuvirohu. ⁵ Iyavei moviro oiti ivi nayanai vahesave ita pāhuve. Sese cüriteimi sori; ⁶ ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rāhii oiti yu pāhuve. Ahe yu rumo sori poyava catu yuvireco ichui. Sese opaño oyopi. ⁸ Ambuae rumo oiti ivi aviye vahesave, ahe setá iha imonuhasa; ñepei ihí sui osē cién iha, ambuae sui osē sesenta, ambuae sui treinta. ⁹ Acoi ava osenducua pota vahe che ñehe, toyapisacaño sese” ehi Jesús ava eta upe.

¿Mahera pīha co yembohesa imboyoyasa ambuae mbahe rese?

¹⁰ Ichui semimbohe eta oyemboya Jesús rese yuvireco mbahe rese oporandu água chupe: “¿Mahera vo eremboyoya-yoya mbahe rese nde porombohesa ava upe yepi?” ehi.

¹¹ Jesús aipo ehi: “Pérum Túpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté. ¹² Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasañora ichui. ¹³ Sese añehese chupe, amboyoya-yoya aipo nungar mbahe yavai vahe ambuae mbahe rese yepi. Esepia, ahe osepia tēi, ndosepiacuai rumo yuvireco iyavei osendu tēi, ndosenducuai avei yuvireco no. ¹⁴ Na ehi yaviye Túpa Ñehengagüer Isaías remimombehu:

‘Pe niha pesendu tēira, ndapeicuai chira rumo; iyavei pesepia tēira, ndapesepiacuai chira rumo.

¹⁵ Esepia, evocoi ava eta upe yavai eté ipiha pipe imbahe reroya água, ndayapisai eté sendu potaëhisave; ndoyemboesapisoí avei sepia potaëhisave.

Esepiá, ndosenducua potai opíha pípe yuvíreco cheu oyeví
potaéhisave ombogüera águá' ehi
Isaías aracahe.

¹⁶ “Pe rumo perorivete ité sepiacuase, pesenducuase avei no. ¹⁷ Supi eté setá Túpa ñehe mombehusar iyavei ava seco catupri vahe aracahendar osepiá pota tēi mbahe pe rembiepia, ahe rumo ndosepiai eté yuvíreco; iyavei osendu pota tēi co pe remiendo, ahe rumo ndosendui avei yuvíreco” ehi Jesús güemimbohe eta upe.

Jesús omombehu yembohesa mbahe miti resendar

¹⁸ Ipare aipo ehi: “Peyapisaca omaheti vahe recocuer rese. ¹⁹ Acoi osendu tēi vahe Túpa Ñehengagüer imbororecuasa resendar, ipare rumo ndosenducuai, ahe inungar acoi mbahe rāhii oviapi vahe peri rupi. Ipare rumo caruguar ou chupe. Ahe ipíha pípe osendu vahe Túpa Ñehengagüer opa tupriño omocañi ichui. ²⁰ Iyavei acoi mbahe rāhii seitípri ita pāhuve, ahe inungar ava recocuer yípiño osendu vahe, oipisi vahe avei vorívetesa pípe Túpa Ñehengagüer. ²¹ Ipare rumo inungar co mbahe miti ndovírecoi vahe guapo ovíracua água, ñgue ehi avei evocoí nungar ava oimese mbahe-mbahe tēi Túpa Ñehengagüer sui chupe, cüríteimi seroyaéhisave oyepepi ichui. ²² Acoi mbahe rāhii seitípri yu pāhuve, ahe inungar ava osendu vahe Túpa ñehe. Ipare rumo ahe ipíhañemoñeta catu saísusave opacatu ombahe eta co ivi pípendar rese. Ipípe sui oyembopa uca ombahe eta upe. Ichui ndoguata iriño Túpa Ñehengagüer rupi. Sese secocuer ndavíye iri eté, inungar mbahe miti ndihai vahe. ²³ Acoi itísa vahe mbahe rāhii ivi avíye vahe rese, ahe inungar ava osenducua vahe Túpa Ñehengagüer. Iyavei inungar acoi co mbahe miti ihá iteanga vahe, ñgue ehi avei ava secocuer avíye vahe inungar ñepei-peí sähii sui osé que cien iha, sesenta iha, anise que treinta” ehi Jesús güemimbohe eta upe.

Trigo pāhuve caha naporai vahe sui yembohesa

²⁴ Jesús omombehu iri co ambuae mbahe rese yembohesa oyoya vahe: “Túpa mbororecuasa oyoya tupri ava oivi pípe mbahe rāhii oñoti vahe rese. ²⁵ Opacatu ava queseve rumo oyepota yamotaréhisar, caha tēi rāhii oñoti trigo pāhuve oso. ²⁶ Acoi trigo iha potase, supive avei sori caha. ²⁷ Evocoiyase oporavíqui vahe yuvíraso, omombehu iyar upe aipo ehi yuvíreco: ‘Ore rerecuar, ¿ndahei vo acoi mbahe rāhii avíye vahe ereñoti nde ivi pipe? ¿Que sui ru caha sori ipāhuve?’ ehi yuvíreco chupe. ²⁸ Iyar rumo aipo ehi chupe: ‘Oime revo que che amotaréhisar’ ehi. Evocoiyase oporavíqui vahe oporandu yuvíreco chupe: ‘¿Ndiyai píha caha tēi orosapohopara ichui

viña?’ ehi. ²⁹ Ahe rumo aipo ehi chupe: ‘Aní, aviyeteramo caha rupive pesapoho tiētera trigo’ ehi. ³⁰ ‘Evocoiyase peseya, tocuacuaño oyoya yuvireco. Yaviyese voi mbahe miti, ahese che ayocuaira oporaviqui vahe caha tēi rane rerocua água imboapuha uca sapi. Ipare oyapocatura trigo rāhii che mbahe apocatusave yuvireco’ ehi ivi yar” ehi Jesús.

Yembohesa mostaza rāhii suindar

³¹ Jesús omombehu iri co ambuae mbahe rese yembohesa oyoya vahe: “Tūpa povri pendar oyoya tupri mostaza rāhii rese. Ahe mbia oñoti vahe oivi pipe. ³² Supi eté co mostaza rāhii tahimi catu opacatu ambuae mbahe rāhii sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sāca rese vīrai rehii oyapo guaitirā” ehi oporombohe.

Yembohesa pan mboapeposa sui

³³ Ipare Jesús oporombohe iri ambuae mbahe rese aipo ehi: “Tūpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo água yepi” ehi oporombohe.

Jesús oiporu oporombohe água mbahe rese mboyoyasa yepi

³⁴ Jesús omombehu opacatu evoco nungar mbahe omboyoya-yoyase oporombohesa ambuae mbahe rese opacatu ava upe. ³⁵ Co rumo na ehi Tūpa ñehe mombehusar rembicuachiagüer aviye água:

“Che añehese, amboyoyara che porombohesa ambuae mbahe rese.

Iyavei amombehura Tūpa ivi apo suive mbahe naporéhii vahe” ehi.

Jesús omombehu tupri oporombohesa caha tēi resendar

³⁶ Ahese Jesús, “Aviye” ehi ava upe. Ipare oique oi pipe. Aheve semimbohe oyemboyapa yuvireco sese ‘tomombehu trigo pāhuve caha oime vahe resendar yandeu’ oya. ³⁷ Evocoiyase omboyevi chupe: “Acoi ava mbahe rāhii aviye vahe oñoti vahe, ahe che, Ava Riquehir. ³⁸ Ivi mbahe miti rupa, ahe ava co ivi pipendar. Iyavei mbahe rāhii aviye vahe, ahe ava Tūpa povri pendar; caha naporai vahe, ahe ava caruguar suindar yuvirecoi vahe. ³⁹ Acoi yamotaréhimbar, oñoti vahe caha, ahe niha Caruguar ité. Evocoiyase ari mbahe miti pohosa, ahe ari cañisa; acoi omonuha vahe mbahe miti, ahe Tūpa rembiguai iva pendar yuvireco. ⁴⁰ Iyavei inungar acoi caha tēi imonuhapri sapi água, égue ehi aveira ari cañi pipe coiye. ⁴¹ Evocoiyase che, Ava Riquehir, che rembiguai iva pendar amondora opacatu ava ambuae omboangaipa uca vahe, mbahe-mbahe tēi aposar avei rerocua água che povrīve

yuvirecoi vahe pāhu sui. ⁴² Ichui omondopara tata guasuve. Aheve oyaseho tēira iyavei ombotere-tere tēira guāi yuvireco. ⁴³ Aheseve voi ava Tūpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

Mbahe repirusu ñomimibri sui yembohesa

⁴⁴ “Evocoiyase Tūpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tēi oyosura viña. Ahe rumo aheve avei oñomi. Ipare vorivetesha pipe opacatu ombahe omondopa co ivi rerocua água mbahe sepirusu vahe pota raisa pipe” ehi.

Mbohir sepirusu catu vahe sui yembohesa

⁴⁵ “Iyavei Tūpa mborerecuasa inungar ava mbahe rerocuasar oseca vahe mbohir icatupri vahe yepi. ⁴⁶ Ahe oyosuse mbohir sepi catu vahe, oso opacatu ombahe mondo co sepi catu vahe rerocua água.

Pira mbohasa sui yembohesa

⁴⁷ “Iyavei Tūpa mborerecuasa inungar pira mbohasa. Imondopri ipive. Ipare omboha opacatu-catu tēi pira. ⁴⁸ Acoi savapi pose pira mbohasa, vinose ivi átasave yuvireco. Aheve oiporavo pira aviyé vahe oñoñapa ombahe ríruve yuvínoi, naporai vahe rumo opaño omombo yuvireco. ⁴⁹ Ëgüe ehi aveira ari cañi pipe: ahese Tūpa rembiguai iva pendar yuvínosera opacatu ava ndaseco pōrai vahe mboyepépi água ava seco catupri vahe sui. ⁵⁰ Evocoiyase ava ndaseco pōrai vahe imondosara tata guasuve. Aheve oyaseho tēira iyavei ombotere-tere tēira guāi yuvireco” ehi.

Mbahe ipiasu vahe iyavei ocuacua vahe sui yembohesa

⁵¹ Evocoiyase oporandu güemimbohe eta upé:

—¿Pesenducua vo aipo opacatu? —ehi.

—Taa —ehi yuvireco chupe.

⁵² Evocoiyase ahe aipo ehi:

—Acoi ava oporombohe vahe porocuaita rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upé.

Jesús Nazaret ve secoi

⁵³ Oñehe pare, Jesús osē ichui ⁵⁴ oyepota güecuave oso. Aheve ombohe ava judío tūparo pipe oico. Evocoiyase ahe pendar ava oyepihamondii tēi:

—¿Que pīha co ava oyembohe catu ombahecua água? iyavei, ñmara ehi pīha co mbahe poromondiisa apo? —ehi yuvireco—.

⁵⁵ ¿Ndahei vo acoi carpintero rahir tēi? Ichí niha acoi María,

iyavei yuvirecove tivri, ahe Santiago, José, Simón, Judas. ⁵⁶ Seindri avei niha yuvirecove yande pāhuve. Evocoiyase, ¿que pīha oyembohera viña? —ehi tēi yuvireco chupe.

⁵⁷ Ipīpe sui ndoviroyai yuvireco. Ahe rumo aipo ehi chupe:

—Tūpa ñehe mombehusar niha omboetei opacatu rupi yuvireco yepi. Secua pipendar, sēta pipendar ae rumo nomboetei yuvireco —ehi.

⁵⁸ Evocoiyase, ahe ava vīroyaēhisa rese, moviro tēi oyapo mbahe poromondiisa ipāhuve.

14

Juan Oporoāpiramo vahe mano agüer

¹ Ahe ari rupi Herodes, mbororecuar guasu Galilea pendar, oyandu Jesús rerācua. ² Evocoiyase aipo ehi opītiviisar upe: “Juan Oporoāpiramo vahe revo ocuerayevi. Sese oyapo poromondiisa ipīrata vahe” ehi.

³ Esepia niha, yipindar Herodes Juan oipisi, oñapichi carena pipe soquenda água vivri Felipe rembireco Herodías sui tēi, ⁴ “Ndiyai eté nde rembireco nungar ererecora” oyeupe hese.

⁵ Herodes oyuca pota Juan viña, osiquiyeño rumo ava eta sui. Esepia, ahe, “Tūpa ñehe mombehusar secoi” ehi yuvireco chupe. ⁶ Acoi Herodes haragüer mboeteisa pipe rumo aipo cuña Herodías membri osē opivoi ava rehii rembiepiave. Herodes upe evocoiyase aviye ai eté. ⁷ Sese ahe oyemoingatu ñepei reseve que mbahe oyeupe oporanduse imondo água chupe. ⁸ Evocoiyase ahe cuñatai oyeupe osi remimombihu rupi, aipo ehi Herodes upe:

—Embou Juan Oporoāpiramo vahe áca poratu pipe cheu —ehi.

⁹ Aipo ñehesa nombovihai eté Herodes; ndiya iri rumo, “Aní” ohe água. Esepia, opacatu ava güemimbori eta rovaque aipo ehi. Sese, “Taperu chupe” ehiño. ¹⁰ Ahese oporocuai Juan áca hasia água soquendasave. ¹¹ Ipare viraso poratu pipe cuñatai upe yuvireco. Evocoiyase ahe omondo osi upe.

¹² Ahese Juan remimbohe oyepota yugüeru, viraso sete ñoti yuvireco. Ipare yuviraso Jesús upe imombihu.

Jesús oyopoi cinco mil cuimbahe

¹³ Jesús oyanduse Juan manosa, ahese ahe ae oso ava porēhisave carite pipe. Ava rehii rumo oyanduse, yuvinose voi güecua sui, ivi rupi yuviraso osupiti secosave yuvireco.

¹⁴ Evocoiyase osēse carite pipe sui, osepia ava rehii. Ahese oiparaísuereco ava eta. Sese opa ombogüera imbaheasi vahe serasopri. ¹⁵ Evocoiyase caharuse semimbohe oyemboya yuvireco sese aipo ehi:

—Caharú ité moco cute iyavei ndipoi oí co rupivemi vahe. ¿Ndiyai vo eremondopa ava tecua-tecuami rupi, ahe supi tovirocua mbahe güemihura yuvireco? —ehi yuvireco chupe.

¹⁶ —Aní, ndiyai yuviraso. Pe pemondora mbahe semihura yuvireco —ehiño chupe.

¹⁷ —Poyandepomi tēi rumo pan orovireco iyavei ñuviriomi tēi avei pira —ehiño semimbohe yuvireco chupe.

¹⁸ —Peruño ave cheu —ehi güemimbohe upe.

¹⁹ Ipare aipo ehi ava rehíi upe: “Peguapi capihi haríve” ehi. Evocoiyase oipisi poyandepomi vahe pan, ñuviriomi vahe pira. Ichui omahese íva rese, “Avíye ndeu, che Ru” ehi. Ichui omombite-mbite pan imondo güemimbohe upe. Ahe evocoiyase omboyaho-yaho ava eta upe semihura yuvireco.

²⁰ Evocoiyase opacatu ava ocaru vahe ihítaropa tēi yuvireco. Ipare semimbohe omboapipopa doce tupri iruova sembihu rumbirer yuvireco. ²¹ Ahe cuimbahe ocaru vahe retacuer cinco mil. Cuña rumo iyavei chíhivahe ndipapasai yuvireco.

Jesús oguata i harí rupi

²² Ipare Jesús, “Peha pe rane carite pipe, pesasa ipa peso che renondeve. ‘Avíye’ tahe rane ava eta upe” ehi güemimbohe upe. ²³ “Avíye” ohe pare ava upe, oyeupi oso ahe ae ívitri rese oyeroquí áqua. Pítuse chupe, opitaño aheve. ²⁴ Aheseve carite oso pucuse ipa popi sui, ívitu ipírata vahe osovaichi yuvireco. Sese ohitu vahe nambegüe-mbegüei ocua sese. ²⁵ Cöhe potase, oguata i harí rupi oso güemimbohe coti. ²⁶ Semimbohe i harí rupi iguatase, oyembosiquíye yuvireco ichui. Sese,

—¡Ndahei vo evocoí hágüer secoi! —ehi yuvireco chupe.

²⁷ Güemimbohe upe rumo aipo ehi:

—¡Peyemovíracuaño, che tēi! ¡Pesiquiye eme che sui! —ehi.

²⁸ —Che Yar —ehi Pedro—. Nde ité ereicose, taguata i harí rupi vicho nde piri —ehi.

²⁹ —Erio ru —ehi chupe.

Evocoiyase Pedro ogüeyi carite pipe sui, oguata i harí rupi. Osora ipiri viña. ³⁰ Ívitu pírata repiase rumo, osiquiye ichui. Oso senise rumo ipive,

—¡Che Yar! ¡Che písiromi eve! —ehi.

³¹ Ahese cüriteimi voi oipisi Pedro po rese, aipo ehi chupe:

—¡Chíhi tēi ereyeroya che rese! ¡Mahera ndereyeroya tupri che rese! —ehi.

³² Oyuvirohase rumo carite pipe, opituhu voi ívitu.

³³ Evocoiyase carite pipe yuvirecoi vahe oñenopiha sovai,

—¡Supi eté catu nde Túpa Rahír ereico! —ehi yuvireco chupe.

Jesús ombogüera imbaheasí vahe Genesaret pendar

³⁴ Osasase ipa, oyepota Genesaret ivi rese yuviraso.
³⁵ Opacatu ahe pendar ava oicuase Jesús yepota, ahese opacatu tecuami rupi omombehu-mbehu ava upe yuvireco. Evocoiyase viraso imbaheasi vahe chupe, ³⁶ aipo ehi yuvireco: “Topocomi tēi nde turucuar popi rese yuvireco” ehi; evocoiyase opacatu sese opoco vahe, ocuerapa voi eté yuvireco.

15

Porombohesa yande mboangaipa vahe resendar

¹ Oyemboya Jesús rese moviro fariseo iyavei Moisés porocuaita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

² —¿Mahera vo nde remimbohe ndoguatai yande ramoi aracahendar aracuasa rupi yuvireco? ¿Mahera vo yande porocuaita mboaviyeēhisa pipe ndoyepoi ocaru água yuvireco yepi? —ehi.

³ Jesús omboyevi aipo ehi chupe:

—Pe no, ¡mahera ndapemboyeroyai Tūpa porocuaita pe ramoi aracahendar aracuasa rupi tēi pe guata água! ⁴ Esepiá, Tūpa aipo ehi: “Pemboyeroyara iyavei peipítivíira pe ru, pe si avei no. Acoi iñehe mara vahe oyesupa upe, ahe tomanoño” ehi aracahe. ⁵ Pe rumo aipo peye tēi: “Acoi ava aipo ehi vahe vu upe, osi upe avei no: ‘Ndiyai chira mbahe mundo água pēu. Esepiá, che opacatu mbahe areco vahe imondopri Tūpa upe’ ehise, ⁶ ahese ndiyai eté ipítivii água chupe” peye. Ëgüe peye pe aracua raisa pipe pemocañi Tūpa porocuaita peyesui. ⁷ ¡Pe Tūpa reroyasar angahu tēi peico vahe! Supi tupri ité Tūpa ñehe mombehusar Isaías rembicuachía aracahendar omombehu pe recocuer:

⁸ ‘Co tecua pendar ava oyuru pipe tēi che mboetei yuvireco; ipihañemoñetasa rumo amombri tēi che sui.

⁹ Oyerure tupri tēi yuvireco cheu.

Esepiá, iporombohesa ava porocuaita tēi’ ehi Isaías rembicuachiagüer pipe aracahe —ehi Jesús imombehu.

¹⁰ Ipare,

—Perio —ehi ava rehii upe—. Peyapisaca, pesenducua tupri che ñehe: ¹¹ mbahe oique vahe ava yuru rupi nomboangaipa ucai. Mbahe osē vahe ava yuru pipe sui, ahe rumo omboangaipa uca —ehi.

¹² Evocoiyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

¹³ Ahe rumo aipo ehi chupe:

—Opacatu mbahe miti ndahei vahe che Ru iva pendar remiti, opara sapohosa curi —ehi—. ¹⁴ Ëgüe tehiño yuvireco. Esepiá, evocoí inungar ndasesapisoí vahe virogua ambuae ava ndasesapisoí vahe yuvireco. Ahe evocoiyase oyoya voira ovíapi ivicuar pipe yuviraso —ehi.

¹⁵ Evocoiyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

¹⁶ —¿Ndapesenducua vitei avei catu pe co ñehesa?

¹⁷ ¿Ndapeicuai vo opacatu mbahe acoi ava yuru rupi oique vahe oso yaviterve, ipare osë setecuer sui?

¹⁸ Ava pihañemoñetasa sui osë vahe rumo iyuru rupi, ahe ava omboangaipa. ¹⁹ Esepiá, ava pihañemoñetasa sui osë pihañemoñeta raisa, porapichisa, mendasa sui yemboaguasasa, nomendai vahe yemboaguasa tēisa, mondasa, temira iyavei ava rese ñemoñeta tēisa. ²⁰ Evocoí nungar mbahe rumo omboangaipa ava; ndahei angaipa acoi yande caru renonde yande yepoiéhisa nungar —ehi.

Cuña ndahei vahe judía viroya Jesús

²¹ Ichui osë Jesús oso, oguata Tiro ivi rupi, Sidón ivi rupi avei. ²² Cuña cananea, Tiro, Sidón ivi rese secoi vahe oyemboya Jesús rese aipo ehi:

—¡Che Yar, David suindar, che paraísuerecomi eve! ¡Che membrí vireco caruguar oyese! —ehi pucu-pucu ou chupe.

²³ Ahe rumo nomboyevi eté chupe. Evocoiyase semimbohe oyemboya yuvireco sese aipo ehi:

—Emboyepepi co cuña yande sui. Esepiá, sâse pucu-pucu ou yande raquicuei —ehi yuvireco chupe.

²⁴ Evocoiyase aipo ehi güemimbohe upe:

—Che Ru Tüpa rumo che mbou Israel recua pendar upeño. Esepiá, ahe ovesa ocañi têi vahe nungar yuvireco —ehi.

²⁵ Ahe cuña rumo oñenopîha sovai, aipo ehi chupe:

—¡Che Yar, che pítiviimi eve! —ehi.

²⁶ Ahe rumo aipo ehi chupe:

—Naporai rumo yarocua pan tahir sui cave tohu yamondo vaherä —ehi.

²⁷ —Supi eté, che Yar, cave avei rumo ohuño ité pan rahicuer ovíapi vahe yepi —ehiño chupe.

²⁸ —¡Cuña, tuvichá nde yeroyasa! Aviye, ëgüe tehi eté nde remibotar rupi —ehi.

Aipo ihe ramoseve, ocuera voi eté imembrí.

Jesús setá ombogüera ava imbaheasi vahe

²⁹ Ichui Jesús osē oso ipa Galilea ivii. Ipare oyeupi ivitri rese oguapi oī. ³⁰ Aheve setá ava oyepota, güeru ati imbaheasi vahe yuvireco chupe: ndipindugüei vahe, ndasesapisoí vahe, ipāri-pāri vahe, niñehengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera. ³¹ Ichui ava niñehengatui vahe oñehe; ipāri-pāri vahe ocuera tupri; ndoguatai vahe oguata avei iyavei ndasesapisoí vahe osareco yuvireco. Sepiase ava rehii oyepihamondii aipo ehi: “Imboeteipri Israel Tūpa tasecoi” ehi yuvireco.

Jesús oyopoi cuatro mil cuimbahe

³² Evocoiyase Jesús oñehe güemimbohe upe aipo ehi:

—Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semi-hura. Ndiyai sétave sie porēhi reseve amondo. Aviyeteramo oviroviapi-api tiétera tieporēhi peri rupi yuvireco viña —ehi.

³³ Evocoiyase semimbohe aipo ehi yuvireco chupe:

—¿Que sui pīha orosecara tembihu ava rehii upe nara co-have ava porēhisave viña? —ehi yuvireco.

³⁴ —¿Mbovi vo pan pereco? —ehi.

—Orovirecomi siete pan iyavei moviromi tēi pirami —ehi semimbohe yuvireco chupe.

³⁵ Evocoiyase, “Peguapi ivi harive” ehi ava rehii upe.

³⁶ Ahese oipisi siete pan, pirami reseve, “Aviye ndeu” ehi Vu upe. Ichui omboyaho-yaho güemimbohe upe imondo. Ahe evocoiyase omondopa ava rehii upe yuvireco. ³⁷ Opacatu ava ocaru vahe ihitaro yuvireco. Ipare semimbohe omboapipo iri rane sumbirer siete iruova yuvireco. ³⁸ Cuimbahe ocaru vahe retacuer cuatro mil. Cuña, chihivahé retacuer rumo ndicuasai. ³⁹ Ipare Jesús, “Aviye” ehi ava upe, ahese oha carite pipe oso ivi Magadán rupi.

16

Fariseo iyavei saduceo oporandu poromondiisa rese yuvireco

¹ Fariseo iyavei saduceo yuviraso Jesús repia secoāha áqua yuvireco viña. “Emoporēhi Tūpa suindar nde recosa poromondiisa pipe oreu” ehi yuvireco chupe.

² Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pīrá iteanga’; ³ iyavei añihivei: ‘Co pipe ari naporai chira. Esepia, iva rese pīra vai anga, pītu guasu-guasu avei’ peye. Pe niha peicua mbahe iva resendar tēi oyecua vahe mombehu; ndapeicuau rumo mara oyapave co poromondiisa cūriteindar ava upe imombehu. ⁴ Co ava ndaseco pōrai vahe oyepepi vahe Tūpa sui oporandu poromondiisa rese ‘¿Tūpa

suindar ité pīha?" oyapave. Che rumo namboynecua chira ambuae poromondiisa chupe; acoi poromondiisa Tūpa oyapo Jonás upe güeraño tupri aseyara chupe" ehi.

Ichui oseyapaño ava rehi oso.

Fariseo iyavei saduceo porombohesa inungar pan mboapeposa

⁵ Evocoiyase semimbohe oyepota ipa rovai yuviraso. Pan sui rumo sesarai eté yuvireco. ⁶ Evocoiyase Jesús aipo ehi chupe:

—Peicua catu fariseo iyavei saduceo pan mboapeposa sui —ehi.

⁷ Iñehe renduse, semimbohe aipo ehi oyeupe yuvireco:

—¡Ndayarui eté rumo pan! —ehi—ehi tēi oyeupe yuvireco.

⁸ Ahe rumo oicua güemimbohe pīhañemoñetasa. Sese aipo ehi chupe:

—¡Mahera, “Ndayarui pan” peye! ¡Pe ndapeyeroya tuprii che rese! ⁹ ¿Ndapeicua vitei vo che rembiapo? ¿Ndapeyemahenduha vitei eté vo acoi moyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase? ¹⁰ ¿Ndapeyemahenduha vitei avei vo acoi amboyaho vahe siete pan ava cuatro mil vahe upe, iyavei mbovi iruova pemboapipo sumbirer? ¹¹ ¡Too, mara peye rutei pe aipo senducuaéhi! Ndahei mo pan rese ité añahe. Peicua catu fariseo iyavei saduceo pan mboapeposa sui —ehi.

¹² Ahese ramo oicua yuvireco cute, ndahei pan mboapeposa rese ité oñahe, Jesús rumo oñahe fariseo iyavei saduceo eta porombohesa rese tēi.

Pedro oicua uca Jesús Tūpa Rembiporavo secose

¹³ Oyepotase Jesús, oso tecua Cesarea coti Filipo ivi rese, aheve oporandu güemimbohe upe aipo ehi:

—¿Mara ehi vo ava oñahe yuvireco che rese, Ava Riquehir che recose? —ehi.

¹⁴ Semimbohe evocoiyase aipo ehi yuvireco chupe:

—Amove ava: “Juan Oporoäpiramo vahe” ehi yuvireco ndeu; ambuae aipo ehi yuvireco: “Eliás”; ambuae ava aipo ehi avei yuvireco: “Jeremías”; anise ambuae ava, “Tūpa ñehe mombehusar mboetasas” ehi yuvireco ndeu —ehi.

¹⁵ —Pe no, ¿Ava co secoi’ peye ru pe cheu no? —ehi güemimbohe upe.

¹⁶ —Nde niha Tūpa supi eté vahe Rembiporavo imombrehupri; Tahir ité ereico —ehi Simón Pedro.

¹⁷ —Nde sovasaprí ereico Simón, Jonás rahir. Esepiá, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—. ¹⁸ Nde Pedro ereico, co ita guasu

haríve amopuhara che tūparoguā. Ñepei yepe manosa ndosecoreroyii chietera opíratasa pipe. ¹⁹ Evocoiyase che amondo Tūpa mborerecuasa resendar mboisa ndeu; acoi, “Aviye” erese que mbahe uve co ivi pipe, ēgue ehi aveira ivave; iyavei, “Aní” erese que mbahe uve co ivi pipe, ēgue ehi aveira ivave –ehi.

²⁰ Ipare Jesús aipo ehi güemimbohe upe: “Co Tūpa Rembiporavo Poropísiosar’ peye eme ava upe cheu” ehi.

Jesús omombehu omano água

²¹ Ichuive tupri Jesús omboipi imombehu güemimbohe upe oico: “Iya niha cheu che so áqua tecua guasu Jerusalén ve. Aheve judío rerecuar, pahi rerecuar ivate catu vahe iyavei Moisés porocuaita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari pipe acuerayevira” ehi. ²² Pedro rumo víraso co cotimi chupe oñehengata áqua:

—¡Tūpa ndoiptai eté evocoí nungar nde reco áqua, che Yar! ¡Ndipoi chietera mbahe ndeu! —ehi Pedro chupe viña.

²³ —¡Esíri che sui, Caruguar! —ehi Pedro upe—. Nde che reiti pota eve mbahe tēi pipe. Esepia, nandepihañemoñetai mbahe Tūpa upendar rese, ava nungar tēi nde pihañemoñeta eico —ehi.

²⁴ Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosiira viña, toyemoingatu voi che recocuer rese oparaisu áqua iyavei toguata tupri che rupi. ²⁵ Esepia, acoi ava güetecuer tēi raisupar, ocañi tēi etera; acoi ava omocañi tēi vahe rumo güetecuer che recocuer rese, ahe oñepisirora. ²⁶ Esepia, ¿aviye ai angahu pīha ava upe opacatu mbahe co ivi pipendar pisi áqua, ahe ae tēi omocañise güecocuer yuvireco viña? ¿Mbovi pīha omondora ava güecocuer repíra viña? ²⁷ Esepia che, Ava Riquehir, ayevira che Ru reco píratasa pipe che rembiguai iva pendar reseve curi. Che evocoiyase aicuara ñepei-peí ava rembiapo agüer rupi chupe. ²⁸ Supi eté oimera amove coháve ava nomano vītei chivaherā, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

17

Jesús ñecuñaro agüer

¹ Seis ari pare Jesús víraso Pedro, Santiago, tīvri Juan reseve co coti ivitri ivate vahesave oyeupi. ² Aheve, aviyeteramo tēi oñecuñaro güemimbohe rovai. Evocoiyase sendi sova inungar

ari, iturucuar morochí, sendi avei. ³ Aheseve voi oyemboye-cua Moisés, Elías reseve yuvireco chupe. Ahe oñemoñeta oyeupe yuvinotha. ⁴ Ahese Pedro aipo ehi chupe:

—Che Yar, javiye ai eté cohaye yaico! Ereipotase, ayapora mbosapi teyupami: ñepei ndeu nara, ambuae Moisés upe, ambuae evocoiyase Elías upe nara —ehi.

⁵ Aviyeteramo tēi iwa quiha rese osesapé ogüeyi ou oyopi pa tupri ité. Ipāhuve oyeendu ñehesa aipo ehi: “Co che Rahir, che rembiaisu. Che mbovharete; peyapisaca catu iñehe rese” ehi vahe.

⁶ Aipo renduse, semimbohe osiquiyé iteangasa pi pipe opaño ivi rese oñaca mboya yuvireco ichui. ⁷ Ahese oyemboya oso güemimbohe rese, oñatoi aipo ehi chupe:

—Pepūha; pesiquiyei rene —ehi.

⁸ Evocoiyase omahe yuvireco sese, ahese ahe güeraño os epia imoha yuvireco.

⁹ Ipare yuvirogüeyi ivitri sui aipo ehi evoco mbosapi güemimbohe upe:

—Ndapemombehui chietera que ñepei ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰ Evocoiyase semimbohe oporandu yuvireco:

—¿Mahera ru Moisés porocuaita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹ Evocoiyase omboyevi güemimbohe upe aipo ehi:

—Elías rane ité niha oura opacatu mbahe moingatu água curi. ¹² Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ñgue ahe aveira niha cheparaisura ahe ava povrīve vichico —ehi.

¹³ Evocoiyase semimbohe osenducua ramo iñehe yuvireco. Ñgue ehi Jesús oñehe Juan Oporoäpiramo vahe rese.

Jesús ombogüera chihivahe caruguar rerecosar

¹⁴ Víroyepota Jesús güemimbohe ava rehiisave seraso. Aheve mbia oyemboya oso sese, oñenopicha sovai aipo ehi chupe:

¹⁵ —Che Yar, ereiparaisuerecomi tēira che rahir cheu viña. Esephia, ahe ipiha mbaheasi vahe, oyemombaraisú iteanga. Setá yupagüer oviapi tatave, ive avei no. ¹⁶ Sese aru tēi nde remimbohe upe. Nombogüera catui rumo yuvireco —ehi.

¹⁷ —¡Too, ndapeyeroya tupri vítei eté che rese! ¡Co coti tēi vite pe pihañemoñetas! ¡Mboví rupi rutei vo aico vitera pe pāhuve che ñemosasa pipe! Peru evoco chihivahe cheu —ehi.

¹⁸ Ahese oñehe pírata caruguar upe chihivahe sui imose. Aheseve ocuera tupri voi eté.

¹⁹ Ipare semimbohe oporandu co cotimi yuvireco chupe:
—¿Mahera pīha ndoromose catui eté caruguar ichui? —ehi yuvireco.

²⁰ —Esepiá, ndapeyeroya tupri Tūpa rese. Supi eté sese pe yeroyasa, yepe ndoyavii chira mostaza rāhii tahimi vahe viña, aipo peyera co ivitri upe: ‘Esíri, eso coi cotí’ peyera. Evocoiyase ivitri osiriño itera. Ahese ndapemboavaimi chira mbahe. ²¹ Evocoí nungar caruguar imosesa yayerurese yande yecuacusa pipe —ehi.

Jesús omombehu iri omano água

²² Jesús oguata viteseve Galilea ivi rupi, aipo ehi güemimbohe upe oico:

—Che, Ava Ríquehir, imondopri aicora che amotaréhímbar povrīve. ²³ Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihaí tēi yuvireco.

Jesús omondo guarepochi tūparo uve nara oyeupe oporandu vahe upe

²⁴ Oyepotase Jesús güemimbohe reseve tecua Capernaum ve, aheve guarepochi rerocuasar tūparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondoi guarepochi tūparo upe nara? —ehi.

²⁵ —Omboepi niha —ehi Pedro chupe.

Evocoiyase oiqueso Pedro oí pipe, aheve Jesús rane oñehe chupe aipo ehi:

—¿Mara ehi nde pīhañemoñeta, Simón? ¿Ava sui vo virocua guarepochi mborerecuar guasu co ivi pipe yepi? ¿Omu sui pīha, ambuae ava sui tie? —ehi.

²⁶ Pedro evocoiyase omboyeví chupe:

—Ambuae ava sui —ehi.

—¡Taa! —ehi—. Evocoiyase mborerecuar povri pendar nomboepii chira yuvireco —ehi—. ²⁷ Guarepochi rerocuasar moñemoiroëhi água rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepei guarepochi. Ahe eraso chupe. Ipípe iyacatura imboepi água yandeu —ehi Jesús Pedro upe.

18

¿Ava vo seco ivate catu vahe?

¹ Ahe ari pipeve semimbohe oyemboya Jesús rese yuvireco mbahe rese oporandu água chupe:

—¿Uma vo seco ivate catu vahe Tūpa mborerecuasa pipendar? —ehi.

² Evocoiyase Jesús: “Erio” ehi ñepei chīhivahemi upe, omundo güemimbohe pāhuve imoha,³ aipo ehi:

—Supi eté, acoi ndapeñecuñaroise iyavei ndapeicoise chīhivahemi nungar, ahese ndapeiquei chira Tūpa mborerecuasa pipe.⁴ Acoi oñemomini vahe rumo inungar co chīhivahemi, evoco nungar seco ivate catura Tūpa mborerecuasave.⁵ Acoi ava oipisi vahe co chīhivahemi nungar che rer pipe sereco, che ité che pisí yuvireco —ehi.

Iparaisu itera ava oporomboangaipa uca vahe

⁶ “Acoi que ava rumo omboangaipa uca vahe co chīhivahemi nungar che reroyasar, iyacatu evoco nungar ava ñapichisa ita guasu iyesiho rese para guasu pipe imombo água.⁷ Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroátoisa yepi, jahe imboangaipa ucasar rumo iparaisu itera!

⁸ “Sese inungar pe po, anise que pe pi avei pemboangaipa uca vahe, peyasia, pemombora amombrí peyesui viña. Esepi, aviye catu peiquera tecove apirēhisave ñepei pe pi, pe po rese, peso rāgür sui tata guasu apirēhisave ñuvirío pe po, que ñuvirío pe pi reseve.⁹ Iyavei pe resa pe mboangaipa ucase, penose, pemombo amombrí peyesui. Esepi niha, aviye catu peiquera ñepeimi pe resa rese tecove apirēhisave, ñuvirío pe resa rese tata guasu apirēhisave pe reique rāgür sui.

Porombohesa ovesa ocañi tēi vahe resendar

¹⁰ “Peroíroi rene que ñepei chīhivahemi che reroyasar. Esepi, ivave sembiguai che Ru pírindar ité yuvirecoi yepi” ehi.¹¹ “Che niha, Ava Riquehir, ayu ava ocañi tēi vahe písiro água.

¹² “¿Mara ehi pe pi have? Acoi virecose mbia cien tupri ovesa güeimba, ipare rumo ocañira ñepei ichui viña, evocoiyase oseya ranera noventa y nueve tēi vahe ovesa ivitri rese. Oyevira ocañi vahe reca oso.¹³ Ipare oyosuse rumo, oviharete catuñora evoco ovesa rese ambuae noventa y nueve nocañii vahe sui.¹⁴ Ëgue ehi avei che Ru ivave secoi vahe, ndoipotai eté que ñepei ava che reroyasar chīhivahemi nungar cañi água” ehi.

Porombohesa yande ñero água rese

¹⁵ “Acoi nde mboetasa Tūpa reroyasar oyapose que mbahe tēi ndeu, eresora nde ae, eñehe mbahe ndeu oyaví vahe rese chupe. Nde ñehe viroyase, ahese peñero oyeupe cute.¹⁶ Nande reroyaíse rumo, ahese ereñehera ñepei, anise ñuvirío ava upe nde pítivii água rese. Ahe avei tosendu pe ñehe. Ahese oimera que ñuvirío, anise mbosapi sendusar.¹⁷ Acoi

ndoviroyaise pe ñehe, ahese emombehu opacatu Jesús reroysar upe; ahe ndoviroyaise ité no, evocoiyase Tūpa ndoicuai vahe nungar pereco iyavei inungar mbahe-mbahe tēi aposar, ēgüe peye sereco” ehi.

¹⁸ “Supi eté acoi, ‘Aviye’ peyese que mbahe upe co ivi pipe; ēgüe ehi aveira ivave. Iyavei co ivi pipe, ‘Aní’ peyese que mbahe upe, ēgüe ehi aveira ivave.

¹⁹ “Iyavei co amombehu potami avei pēu: Acoi ñuvirío co ivi pipe pe pihañemoñetaso oyoya turprise que mbahe rese peporandu água pe yeruresa pipe, evocoiyase che Ru iva pendar omondora pe porandusa pēu. ²⁰ Esepia, acoi ava ñuvirío, que mbosapi oñemonuhase che rer pipe yuvireco, aheve che aico ipāhuve” ehi.

²¹ Ipare Pedro oyemboya sese oporandu:

—Che Yar, ¿mboví rupi vo che ñerora che mboetasa mbahe tēi cheu oyapose? ¿Siete yupagüer rupi pīha? —ehi.

²² —¡Aní! —ehi—. ¡Setenta rupi siete oyupagüer! —ehi Pedro upe.

Yembohesa ava niñero potai vahe resendar

²³ “Tūpa mborerecuasa inungar mborerecuar guasu omoingatu pota vahe güembiguai revesa chupe. ²⁴ Evocoiyase omboipi imoingatu água, ahese ipítiviisar güeru ireve ati catu vahe guarePOCHI rese chupe. ²⁵ Ahe rumo ndovirecoi imboepi água. Sese co mborerecuar oyocuai opítiviisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepipa água cheu’ ehi. ²⁶ Evocoiyase sembiguai oñenopiha sovai aipo ehi chupe: ‘¡Too! Che rerecuar, eñemosaañomi tēi cheu. Opara niha amboepi ndeu’ ehi chupe. ²⁷ Ahese oiparaisuereco, opoi irevesa sui.

²⁸ “Aheseve voi rumo sembiguai osēse, osepia ambuae ondugüer oyeupe ndaseta tuprii vahe ireve. Ahe chupe aipo ehi iyesiho pisi: ‘¡Emboepipa acoi nde revesa cheu!’ ehi.

²⁹ ‘¡Aní!’ ehi oñenopiha oso sovai, ‘Eñemosaañomi tēi cheu’ ehi, ‘amboepipara niha acoi che revesa ndeu’ ehi. ³⁰ Niñero potai eté rumo. ‘Tomboepipa rane ité orevesa cheu’ ehi soquenda uca. ³¹ Osepiase rumo ambuae imboetasa, tasí iteanga ipiha pipe. Ahese yuviraso omombehu güerecuar uve opacatu sembiapocuer yuvireco. ³² Evocoiyase ahe serecuar güeru uca aipo ehi chupe: ‘¡Mbahe tēi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu. ³³ ¡Ndiyai vo nde avei ereiparaisuereco nde mboetasa viña, inungar che oroparaisuereco!’ ehi.

³⁴ Ichui serecuar oñemoirosave oyocuai imombaraisu água ‘tomboepipa rane ité orevesa cheu’ oyapave.

³⁵ “Indó, evocoiyase ëgue ehi aveira che Ru iva pendar pēu ndapeñeroise ité peyeupe” ehi Jesús güemimbohe upe.

19

Jesús oporombohe mendasa sui poiēhi ãgua

¹ Ipare Jesús osē Galilea sui, oso Judea ivi rupi ari sēsa coti iai Jordán rovai. ² Ava rehii yuviraso saquicuei. Aheve setá imbaheasi vahe ombogüera.

³ Evocoiyase oyemboya fariseo Jesús rese yuvireco; secoāhasave oporandu yuvireco chupe:

—¿Aviye pīha opoi cuimbahe güembireco sui que mbahe tēi oyapose? —aipo ehi yuvireco chupe.

⁴ Ahe rumo omboyevi fariseo upe:

—¿Ndapesenducuaimi vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi?

⁵ Iyavei aipo ehi: ‘Sese niha cuimbahe omendase, oyepepira oyesupa sui güembireco rese ité yuvirecoi ãgua. Evocoiyase ñuvirío yuvirecoira ñepei ava nungar’ ehi. ⁶ Sese ndahe iri ñuvirío, ñepei vahe ité yuvirecoira. Evocoiyase ava Tūpa omomenda vahe oyese, ndiyai ava tēi omboyepepi yuvireco oyesui —ehi.

⁷ Evocoiyase fariseo oporandu yuvireco chupe:

—¿Mahera ru oyocuai Moisés cuimbahe omondo vaherā güembireco upe cuachiar poisa resendar opoi ãgua ichui? —ehi.

⁸ —Pe poreroyaēhisa pipe niha Moisés ëgue ehi pēu. Yipisuive ité rumo Tūpa ndoipotai oyesui opoi ãgua yuvireco.

⁹ Esepia, acoi opoi vahe güembireco mbahe ndoyavii vahe sui omendase ambuae cuña rese, ahe oyemboaguasa tēi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ëgue ehise cuimbahe güembireco rese, evocoiyase aviye catu ndayamendai chira —ehi.

¹¹ —Ndahei chira rumo opacatu osenducua che aipo ahe vahe yuvireco. Tūpa ombou vahe sembiaporā, ahe güeraño osenducuara yuvireco —ehi güemimbohe upe—. ¹² Esepia, oime pīhañemoñetasa ava mendaēhi ãgua: amove ohasa suive ndatahii vahe, ambuae nomboahi ucai ava yuvireco, ambuae evocoiyase nimendasei. Esepia, ahe oporavíqui pota Tūpa mborerecuasa reseño ité. Acoi oicatu vahe co ñehesa reroya ãgua, toviroyaño —ehi.

Jesús osovasa chihivahé

¹³ Ipare ahe pendar güeru moviro chihivahe Jesús upe yuvireco 'tomondo opo iharive; toyerure avei sese no' oypave; semimbohe rumo, "¿Mahera vo peruño tēi chihivahe?" ehiño serusar upe yuvireco. ¹⁴ Jesús rumo aipo ehi:

—¡Mahera ndapeipotai iyu água! Toyugüeruño chihivahe cheu. Esepiá, co chihivahe nungar ava yuviroiquera che Ru povriven —ehi.

¹⁵ Ipare omundo opo chihivahe harive osovasa. Ichui osé oso.

Mbia chihivahe imbahe eta vahe omoñeta Jesús

¹⁶ Mbía chihivahe mbahe yar oso Jesús upe oporandu:

—Porombohesar, ¿mbahe vo avíye vahe ayapora tecovesa apiréhi vahe rereco água? —ehi.

¹⁷ —¡Mahera ereporandu cheu mbahe avíye vahe rese! —ehi—. Ñepeíño ité avíye vahe oime. Erereco potase rumo tecovesa apiréhi vahe, emboyeroya mborocuaita —ehi.

¹⁸ —¿Uma vo aipo mborocuaita? —ehi.

Ahese omboyevi chupe:

—Ndereporoyucái chira, nandeaguassai chira, nandemonday chira, nanderemirai chiaveira ambuae ava rese, ¹⁹ eremboyeroyara nde ru, nde si avei, eresaisura ambuae ava nde yeaisu nungar eico' ehi icuachiapí pipe —ehi mbahe yar upe.

²⁰ —Co rumo mborocuaita opacatu amboaviye ité yepi. ¿Mbahe vo evocoiyase ipane vité che ayapo vaherá? —ehi.

²¹ —Ereipotase mbahe tupri pipe nde reco água, emondopa rane nde mbahe; ahe sepri evocoiyase eremondora ava iparaísu vahe upe. Ichui ererecora mbahe avíye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbía oyepepiño ichui oviharéhisave oso. Esepiá, mbahe yar ité secoi.

²³ Evocoiyase aipo ehi güemimbohe upe:

—Supi eté yavai eteanga imbahe eta vahe upe oique vaherá che Ru mborerecuasave. ²⁴ Aipo ahe iri: Yavai rai camello upe yucuar rupi seique água; ava imbahe eta vahe upe rumo yavai catu che Ru mborerecuasave seique água —ehi.

²⁵ Aipo iñehesa renduse, semimbohe oyepihamondii aipo ehi:

—¡Ava angahu píha evocoiyase oñepisirora yuvireco viña! —ehi yuvireco.

²⁶ Omahe güemimbohe rese, aipo ehi:

—Ava tēi upe yavai aipo nungar mbahe apo. Túpa upe rumo mbahe opacatú ndayavaimi eté —ehi.

²⁷ Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata ãgua. ¿Mbahe evocoiyase oimera oreu? —ehi.

²⁸ —Oime itera niha mbahe pẽu. Esepiá, acoi ari oye-potase opacatu mbahe recuñaro ãgua, ahese che, Ava Ríquehir, aguapira che rendave che mborerecua guasusave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuer rese peporandura curi. ²⁹ Acoi opacatu ava oseya vahe güëta, anise que viquehir, anise vivri, güeindri, que vu, anise osi, guahir, que oivi avei che raisusa pipe, ahe oipísira omahera cien yupagüer rupi mbahe oseya vahe iyavei virecora tecovesa apirëhi vahe. ³⁰ Seta vai rumo cûritei yipindar vahe, ipa têira yuvirecoi; setá aveira cûritei ipa têi vahe, yipindar yuvirecoira curi —ehi.

20

Yembohesa oporavíqui vahe resendar

¹ “Túpa mborerecuasa inungar acoi ava ívi yar osẽ añihiveive oyeupe nara oporavíqui vahe reca ‘toporavíqui che uva tive yuvireco’ oyapave. ² Oyosuse ava, ahese omoingatu oyeupe oporavíqui vaherã upe ñepei ari mboravíqui reprí imboepi ãgua. Ahese opa omondo obove imboporavíqui. ³ Ipare osẽ, oso añihivei, arivate catumi osepiá ocarusu pipe ambuae ava oporavíquisa ndovirecoi vahe, ⁴ aipo ehi chupe: ‘Peso, tapeporavíqui che uva tive. Amboepi tuprira niha pẽu’ ehi. Ahe evocoiyase yuviraso oporavíqui ãgua icove. ⁵ Ipare oso iri mbiter ari rupi oyeupe oporavíqui vahe reca, ñgue ehi tupri avei caharuse, las tres rupi. ⁶ Ipa osẽ iri las cinco pipe, aheve avei osepiá ambuae ava ndovirecoi vahe oporavíquisa yuvinoha. Chupe aipo ehi: ‘¿Mahera peyembohi têi ari momba cohabe pehã?’ ⁷ ‘¡Aní!’ ehi yuvireco, ‘Esepiá, ndipoi eté ava, tapeporavíquimi, ehi vahe oreu’ ehi. Evocoiyase, ‘Peso, pe avei peporavíqui tive’ ehi. ⁸ “Pitu ramose, cove yar aipo ehi oporavíqui vahe rese yangarecuar upe: ‘Eñehepa ava oporavíqui vahe upe. Emboepi ipa yugüeru vahe upe rane iporavíqui yuvireco chupe. Ipare tenonendar uve’ ehi. ⁹ Evocoiyase las cinco pipe yuviroique vahe oporavíqui, ahe rane tenonde yugüeru. Oyacatu ñepei-peí ñepei ari rupindar oipisi guarePOCHI yuvireco. ¹⁰ Ipare tenonde catu yuviroique vahe oporavíqui, ahe chupe ipa têi imboepisa. Ahe ipiñañemoñeta, ‘Yaipisi catura revo guarePOCHI’ ehi oyeupe yuvireco viña. Ipare rumo ahe tupriño avei oipisi ñepei ari rupindar yuvireco. ¹¹ GuarePOCHI pisire rumo oñemoiro cove yar upe yuvireco, ¹² aipo ehi: ‘Co ava yugüeru ipa têi vahe, ñepei horami têi oporavíqui yuvireco. Nde rumo eremboepi oyoya tupriño ité oreu eremboepi vahe rese. Oroñemosaño têi

oroporaviquí ari momba sacucuer upe oroico' ehi. ¹³ Cove yar rumo aipo ehi ñepei ipāhu pendar upe: 'Mbori, ndahei mbahe tēi ayapo ndeu. Esepi, amboepi guarepochi ñepei ari resendar ndeu acoi, Aviye, peye vahecuer rese cheu' ehi. ¹⁴ Evocoiyase ndo co, eipisi nde guarepochi, eraso. Che rumo amondo pota co ava ipa tēi oique vahe upe inungar tuprī ndeu amboepi. ¹⁵ Esepi, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aviye vahe chupe' ehi.

¹⁶ "Indó, ñgue ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaherā yuvireco curi" ehi güemimbohe upe.

Jesús omombehu iri omano água

¹⁷ Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

¹⁸ —Peyapisaca tuprī che ñehe rese: yasora tecua Jerusalén ve. Aheve che, Ava Riquehir, che pisira, che mundo pahi eta rerecuar iyavei Moisés porocuaita rese oporombohe vahe povrīve yuvireco. Ahe, "Tomano" ehira yuvireco cheu. ¹⁹ Ipare che mondora ava ndahei vahe yande mu upe marama tēi che rereco água che reroírosa pípe. Ipípe che yucara curusu rese yuvireco. Imombosapisa ari pípe rumo acuerayevira —ehi.

Santiago, Juan si oporandu Jesús upe mbahe rese omembri upe nara

²⁰ Ipare Zebedeo rembireco ñuvirío omembri reseve, oyemboya Jesús rese yuvireco. Ahese oñenopíha sovai oporandu água mbahe rese. ²¹ Evocoiyase,

—¿Mbahe vo ereipotami? —aipo ehi ichi upe.

—Che aipota che membri eremboguapira ndeyepiri ñepei nde mbahe rese pocosa coti, ambuae nde mbahe rese pocoéhisa coti nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura píha co mbahe-mbahe tēi aiporara vaherā, inungar-ra que igua iro vahe aihu vaherā viña? —ehi.

—Taa, oroicatuño itera —ehi yuvireco.

²³ —Supi eté peiporarara mbahe-mbahe tēi. Co rumo ndiyai cheu, che píri opomboguapi água che mbahe rese pocosa coti, ambuae che mbahe rese pocoéhisa coti avei. Che Ru rumo omoingatu güembiporavo upe nara oguapi vaherā che ipíve —ehi.

²⁴ Aipo iñehesa renduse ore ambuae diez semimbohe, oroñemoiro Santiago, Juan upe avei. ²⁵ Evocoiyase, "Perio" ehi oreu.

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe, iyavei acoi ivate catu vahe oyeecoapirásá omborerecuasa pipe yepi. ²⁶ Pe rumo ēgue ndapeyei chira peico. Iyacatu rumo acoi ava oipota vahe ivate catu güeco água pe pāhuve, ihañeco rane itera opacatu ambuae ava rese. ²⁷ Iyavei acoi pe pāhu pendar oipota vahe tenonde catu güeco água, ihañeco tupri ranera opacatu pe pāhu pendar rese. ²⁸ Esepio, che, Ava Riquehir, ayu ndahei ava che rese ihañeco água, che rumo ayu ava rese che hañeco água iyavei amano vaherā ava eta repirā Caruguar povrī sui senose água —ehi.

Jesús ombogüera ñuvirío ndasesapisoí vahe

²⁹ Ipare Jesús, güemimbohe reseve oñocuase tecua Jericó yuvireco, ahese ava rehii yuviraso saquicuei. ³⁰ Aheve peri popive ñuvirío ava ndasesapisoí vahe oguapi yuvínoi. Evocoiyase osenduse Jesús ocuase supi, osapucai pírata yuvireco chupe aipo ehi:

—¡Ore Yar, mborerecuar guasu David suindar, ore paraisuerecomi tēi eve! —ehi yuvínoi.

³¹ Ahe ava oyaca-yacaño: “Quiriri” ehi yuvireco chupe. Ahe rumo osapucai pírata catuño ité yuvireco aipo ehi:

—¡Ore Yar, David suindar, ore paraisuerecomi tēira eve viña! —ehi iriño ité yuvireco.

³² Evocoiyase osendu iñehe, opita, “Perio” ehi chupe. Ipare,

—¿Mbahe vo peipota ayapo vaherā pēu? —ehi.

³³ —¡Ore Yar, ore mbosarecomi tēi eve! —ehi.

³⁴ Evocoiyase saisusave opoco sesa rese. Ahe ramoseve ndasesapisoí vahe osareco tupri ai eté yuvireco. Ipare yuvirasoño ité supi.

21

Jesús oique Jerusalén pipe

¹ Acoi orovirovise Jerusalén, oroyepota tecuami Betfagé popive, ivitri Olivo serer vahe ipsisimi. Aheve omondo ñuvirío güemimbohe ² aipo ehi chupe:

—Peso co tecuami yande rovaindarve. Aheve pesepiara guaricu imembrí reseve ñapichimbrí imoha. Ahe peyorañora seru cheu. ³ Acoi que ava oporanduse yuvireco pēu sese, “Yar oiporu pota, ipare niha omboyevi voiñora” peyera chupe —ehi güemimbohe upe.

⁴ Co ēgue ehi chupe aracahendar Tūpa ñehe mombehusar ñehengagüer mboavíye água, aipo ehi vahe:

⁵ “Pemombehu Sión pendar upe:

'Pesepia, pe rerecuar guasu ou oico güeco mbegüesa pipe pēu guaricu harive imembrí reseve' peyera" ehi.

⁶ Evocoiyase evocoi semimbohe yuviraso, oyapo ité ocuaisa yuvireco. ⁷ Güeru guaricu imembrí reseve yuvireco chupe. Omondo oturucuar icupeao áqua yuvireco. Ipare Jesús oyeupi iharive. ⁸ Iyavei ava rehii oipipira oturucuar peri rupi imboetei guasusa pipe. Ambuae evocoiyase oyasia pindo omondo peri rupi yuvireco saperā. ⁹ Ava rehii senonde, saquicuei avei oguata vahe osapucai yuvireco aipo ehi:

—¡Co mborerecuar guasu David suindar, imboeteipri tasecoi! —ehi—. ¡Sovasapri secoi ou vahe yande Yar rer pipe! ¡Iwave imboeteipri tasecoi! —ehi yuvireco.

¹⁰ Oiques Jerusalén pipe, opacatu co tecua pipendar oyepihamondii yuvireco. Iyavei setá oporandu-randu yuvireco:

—¿Ava pīha co mbīa? —ehi tēi yuvireco.

¹¹ Ava rehii oguata vahe Jesús rupi aipo ehi yuvireco chupe:

—Co niha Jesús, Tūpa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepisar tūparo pipe sui

¹² Ipare Jesús oique judío tūparo guasu pipe. Ipiendar opa omombo ichui ava mbahe mondosar, mbahe rerocuasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo. ¹³ Ipare aipo ehi chupe:

—Icuachiapri aracahendar pipe aipo ehi: 'Che rēta yeruresa rētarā' ehi. Pe rumo imonda rai vahe rēta nungar tēi pereco —ehi.

¹⁴ Aheve oyemboya Jesús rese yugüeru ava ndasesapisoí vahe, ipāri-pāri vahe avei. Ahe opa ombogüera. ¹⁵ Osepiase rumo pahi rerecuar guasu iyavei judío porocuaita rese oporombohe vahe yuvireco mbahe ndayasepiai vahe sembi-apo, iyavei tūparo pipe osenduse chīhivahe sapucaisa: "¡Imboeteipri David suindar tasecoi!" ehise, ahese oñemoiro yuvireco ¹⁶ aipo ehi chupe:

—¡Eresendu vo aipo ehi tēi vahe chīhivahe yuvireco! —ehi.

—Taa, asendu ité —ehi—. Pe no, ¿ndapeyeroquii vo sesendar ñehesa icuachiapri pipe:

'Chīhivahemi, pītanimi avei osapuaira nde mboeteisa pipe yuvireco' ehi vahe? —ehi.

¹⁷ Ipare opaño oseyá ava oso tecua Betania ve. Aheve ñepei pītu oque.

Jesús omomara ivira higuera ndihai vahe oñeho pipe

¹⁸ Ahere ayihive añihiveive, oyevise tecua Jerusalén ve, Jesús ndasiepoi oico. ¹⁹ Aheve peri popive osepia ivira higuera. Ahe

sese oyemboya oso ‘¿iha pīha?’ oya viña. So güeraño tēi rumo osepia. Evocoiyase ahe aipo ehi chupe:

—¡Co pipe suive nandehai chietera! —ehi.

Aheseve voi opa ipiru.²⁰ Ahe mbahe repiase, ore,

—¡Too, mara ehi rutei pīha co cūriteimi opa voi ipiru! —orohe tēi chupe.

²¹ Ahese omboyeví oreu:

—Acoi peyeroyase ité Tūpa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu pipe’ peyese, ahe evocoiyase osiriño itera.
²² Indó, acoi peyerurese mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

Jesús mborerecuasa

²³ Ichui Jesús oique iri judío tūparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā ndeu? —ehi.

²⁴ Evocoiyase ahe aipo ehi chupe:

—Che avei aporandura mbahe rese pēu. Pemboyevise che porandusa, ahese che avei amombehura ava porocuaita rupi eté pīha ayapo co mbahe vichico.²⁵ ¿Ava vo Juan ombou ava ãpiramo ãgua? ¿Tūpa pīha, ava tēi tie? —ehi.

Evocoiyase oñemoñeta aipo ehi oyeupe yuvireco: “‘Tūpa ombou’ yahese chupe, ahe evocoiyase omboyevira yandeu: ‘¿Mahera ru evocoiyase ndaperoyai?’ ehira.²⁶ Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vase ñehesa Tūpa suindar’ ehi eté yuvireco chupe” ehi.²⁷ Sese,

—Ndoroicuai eté Juan mbousar —ehiño yuvireco.

Ahese ahe aipo ehi:

—Evocoiyase che avei, “Ahe iporocuaita pipe co mbahe ayapo” ndahei chietera pēu —ehi mborerecuar guasu upe.

Ñuvirío ava rahir recocuer sui yembohesa

²⁸ Iyavei Jesús aipo ehi judío rerecuareta upe:

—¿Mara ehi pe pīhañemoñetasa co rese? Oime mbia vireco vase ñuvirío guahir. Ahe aipo ehi ocuacua catu vase upe: ‘Che rahir, co pipe eresora, epovavíqui cove’ ehi.²⁹ ‘¡Nachequerēhii!’ ehi voiño. Coiye rumo, ‘¿Mahera ēgue ahe?’ ehi. Ipare osoño ité, oporavíqui.³⁰ Ipare oso ambuae guahir upe: ‘Eresora, epovavíqui cove’ ehi tupri avei. Evocoiyase, ‘Asora, che ru’ ehi angahu. Ipare rumo ndosoi eté.³¹ ¿Uma vo co ñuvirío yuvirecoi vase oyapo vu remimbotar? —ehi.

—Co yipindar vase —ehi yuvireco.

—Supi eté. Esephia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera Tūpa mborerescuasave pe sui. ³² Esephia, Juan Oporoāpiramo vahe ou co tecocuer ihívi vahe mboyecua água pēu pe reco tupri água viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoī mbahe viña, ipare rumo ndapeñecuñaroī pe recocuerai sui seroya água —ehi mborerescuar guasu yuvirecoi vahe upe.

Ava mbahe tēi oporavíqui vahe recocuer sui yembohesa

³³ “Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva riavii água; oyapo avei oi ivate vahe ahe sese mahemoha água. Ipare oseyá oivi ava oporavíqui vahe upe iporu água. Ichui osē oso amombrí vahesa rupi. ³⁴ Coiye oyepotase ari uva pohosa, ahese omundo güembiguai oporavíqui vahe upe imboporandu água ‘taipisi uva pohopri cheundar cute’ oyapave viña. ³⁵ Ipare rumo oporavíqui vahe oipisi sembiguai yuvireco: amove oinupa-nupa yuvireco, amove oyuca, oyapiyapi avei amove ita pipe yuvireco. ³⁶ Ipare rumo ivi yar setá catu omundo iri güembiguai. Oporavíqui vahe rumo mara-mara tēiño avei vireco yuvireco.

³⁷ “Coiye rumo guahir teieté omundo chupe cute. Ahe ipihañemoñeta: ‘Ombooyeroya catura revo che rahir yuvireco’ ehi viña. ³⁸ Evocoiyase ahe ava tahir repiase, ‘Co aipo oipisira vu mbahe; yayucaño, evocoiyase co ivi opitara yandeu nara’ ehi oyeupe yuvireco. ³⁹ Evocoiyase oipisi, vinose miti pāhu sui, oyuca ité yuvireco” ehi.

⁴⁰ “Acoi ouse ivi yar, ¿mbahe vo oyapora oporavíqui vahe upe?” ehi oñehe rendusar upe.

⁴¹ Ahe evocoiyase,

—Opara revo oyuca saisuēhisa pipe ité co ava ndipiñai vahe yuvireco. Ipare revo omondora oivi ambuae ava oporavíqui vahe uve iporu água ‘ahe tombou voimi uva ipohopirer cheundar cheu curi’ ohesa pipe —ehi yuvireco.

⁴² Aipo ihe pare, aipo ehi oñehe rendusar upe:

—¿Ndaþeyeroquii vo co aipo ehi vahe icuachiapri pipe? ‘Co ita oi aposar opaño omombo yuvireco.

Ahe ita rumo avíye catu vahe oi movíracua tupri água.

Êgüe ehi niha Yar yapo yande mohapisi ai eté’ ehi icuachiapri pipe. ⁴³ Sese che Ru Tūpa mborerescuasa serocuasara pe sui. Ambuae ava upe rumo imondosara. Ahe virasora che Ru mombahesa chupe. ⁴⁴ Acoi que ovíapi vahe evocoī ita haríve, opa tēira ahe ae oyemomara; iyavei acoi

oviapise evocoit aha que ava harive, ahese opa tupri aveira omocañi –ehi Jesús oñeho oyese.

⁴⁵ Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco. ⁴⁶ Aheseve oipisi pota voi yuvireco viña. Osíquyeño rumo ava rehii sui yuvireco. Esepio, opacatu ava ipihañemoñeta: “Co ité Tūpa píratasa piye oñeho” ehi yuvireco chupe.

22

Jesús oporombohe carusa mendasa resendar rese

¹ Ipare Jesús oporombohe iri ambuae ava recocuer rese aipo ehi:

² “Tūpa omborerecuasave inungar mborerecuar guasu guahir mendase oyapo pieta. ³ Ipare oyocuai güembiguai eta ‘ava ichohopri upe toyugüeru cute’ oya. Ichohopri rumo niqueréhi iri yugüeru aheve. ⁴ Ipare oyocuai iri ambuae güembiguai eta aipo ehi: ‘Aipo peyera ichohopri upe: ¡Toyugüeruño ité! Esepio, opa ité oingatu tembihu iyavei ayuca uca tivi iyavei ambuae mbahe mimba iquira vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembiguai upe. ⁵ Ichohopri rumo ndovíroyai eté yuvireco. Evocoiyase ñepei osoño obove, ambuae oso ombahe movendesave, ⁶ ambuae rumo oipisi sembiguai mara-mara tēi sereco água. Ahe ipipe oyuca yuvireco. ⁷ Evocoiyase mborerecuar guasu oñemoiro eteprisave omondo osundao eta co ava oporapichi vahe yuca ucapa água, iyavei secua rapipa água. ⁸ Ipare aipo ehi ambuae güembiguai eta upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vaherā cohabe. ⁹ Sese peso opacatu ava guata catusa rupi, peñehe mendasave yugüeru vaherā opacatu pe rovañhisar upe’ ehi. ¹⁰ Evocoiyase sembiguai eta yuvinosepa yuviraso ocar rupi. Ahe osovaichi vahe setá omonuha yuvireco que seco tupri vahe, seco rai vahe avei; égue ehi ava savapipo tupri oí guasu mendasave yuvireco.

¹¹ “Evocoiyase acoi mborerecuar oique ava ichohopri repia. Ipare omahecua tupri ñepei ava ipáhu pendar rese. Ahe rumo ndomondei turucuar mendasa resendar. ¹² Evocoiyase aipo ehi chupe: ‘Che mborípar, ¿mara ere eique ave co turucuar mendasa resendar poréhi?’ ehi. Ahe rumo noñeheiño ité chupe. ¹³ Evocoiyase, ‘Peipisi co mbia, peñapichi ipi, ipo avei, pemose ocarve pítumimbisave. Aheve oyaseho tēira, sáitere-tere tēira mbaherasicuer rereco’ ehi ichohopri rese hañecosar upe. ¹⁴ Esepio, setá tēi ichohopri, movíromi tēi rumo iporavoprí ipáhu sui” ehi mborerecuareta uve.

Fariseo osecoāha iri tēi Jesús guareepochi rese yuvireco

¹⁵ Ipare fariseo oñemonuha, ipihañemoñeta yuvireco oyeupe Jesús ñehe yavi uca ãgua mborerecuar rovai imomara-mara tēi ãgua. ¹⁶ Ahe evocoiyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei ereporombohe mbahe supi tupri vahe Tūpa recocuer rese. Nde niha ndereroyai vahe ava ñehesa tēi. Esepia, ava pihañemoñeta rupi ndereicoi vahe; nde pihañemoñeta rumo ñepei reseve erereco. ¹⁷ ¿Mara ehi nde pihañemoñeta? ¿Aviyera pīha yamondo guareepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁸ Oicua rumo fariseo pihañemoñeta raisa. Sese aipo ehi chupe:

—Pe seco tupri angahu tēi vahe peico. ¡Mahera che moingue pota mbahe tēi pipe peye! ¹⁹ Pemboyecua ru ñepei guareepochi mborerecuar guasu upendar cheu —ehi.

Evocoiyase güeru yuvireco chupe.

²⁰ —¿Ava rahanga vo co guareepochi rese chini iyavei ava rer vo co chini sese no? —ehi.

²¹ —Roma pendar mborerecuar guasu —ehiño fariseo yuvireco chupe.

—Pemondora evocoiyase mborerecuar upe mbahe chupendar, Tūpa upendar mbahe evocoiyase pemondora Tūpa upe —ehi fariseo upe.

²² Osenduse, oyepihamondii tēi yuvireco. Evocoiyase yuvinose yuviraso ichui.

Saduceo oporandu Jesús upe cuerayevisa rese secoāhasave

²³ Ahe arí pipe saduceo “ndipoi eté cuerayevisa” ehi vahe yugüeru Jesús upe, oporandu tēi angahu yuvireco chupe:

—Porombohesar, Moisés aipo ehi aracahe:

‘Que cuimbahe omanose guahiēhiseve, ahese tīvrí omendara sembirecocuer rese ahe víquehir omano vahecuer upe nara tahirā oico’ ehi —ehi yuvireco chupe—.

²⁵ Cohave, ore pāhuve, oime siete tupri oyesuindar pāve yuvirecoi vahe. Yipindar vahe omenda. Ipare omanoño guahiēhiseve. Evocoiyase tīvrí omenda sembirecocuer rese.

²⁶ Ahe omano guahiēhiseve avei no. Êgue ehi avei opacatu ambuae tīvrí, omano avei guahiēhiseve yuvireco. ²⁷ Opacatu imano pare, cuña avei omano cute. ²⁸ Evocoiyase opase ocuerayevi yuvireco, ¿uma rese ité pīha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

²⁹ —Pe pihañemoñetasa co cotí tēi eté. Esepiá, ndapeicuai eté Tūpa ñehe icuachiapri aracahendar, ndapeicuai avei Tūpa píratasa —ehi—. ³⁰ Esepiá, acoi omano vahe ocuerayevise, chupe ndipo iri chira mendasa. Ahe rumo Tūpa rembiguái iva pendar nungar yuvirecoira iva —ehi—. ³¹ Co cuerayevisa resendar rumo amombehura pēu. Aviye ndapeyeroquii anga vahe acoi Tūpa omombehu vahecuer rese. Supi eté ahe aipo ehi aracahe: ³² ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

³³ “¡Too!” ehi ava rehii. “¡Mara ehi rutei iporombohesa!” ehi tēi yuvireco.

Porocuaita aviye catu vahe

³⁴ Ipare fariseo oyanduse yuvireco Jesús omonguiriri-pañoñose saduceo oyesui, ahese oñemonuha yuvireco. ³⁵ Ñepei ipāhu pendar Moisés porocuaita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuaita sui yandeu’ oyapave viña:

³⁶ —Porombohesar, ¿uma ité vo porocuaita aviye catu vahe opacatu ambuae porocuaita sui? —ehi.

³⁷ Evocoiyase ahe aipo ehi chupe:

—‘Eresaisura nde Yar Tūpa opacatu nde pihañemoñetasa pipe, opacatu nde recocuer pipe, nde yapisacasa pipe avei’ ehi. ³⁸ Co porocuaita aviye catu vahe ambuae porocuaita sui.

³⁹ Imoñuviriosa inungar tupri avei aipo ehi no: ‘Eresaísura ambuae ava nde yeaisu nungar’ ehi. ⁴⁰ Co ñuvirío porocuaita rupi oguata opacatu Moisés porocuaita icuachiapri, opacatu Tūpa ñehe mombehusar rembicuachía avei —ehi.

¿Ava suindar pīha Poropīsirosar?

⁴¹ Fariseo ñemonuha viteseve, ⁴² Jesús oporandu chupe:

—¿Mara ehi pepihañemoñeta acoi Tūpa Rembiporavo ou vaherā ava pīsiro água rese? ¿Ava suindar-ra pīha secoi? —ehi.

—Ahe niha David suindar secoira —ehi fariseo yuvireco chupe.

⁴³ Ahese aipo ehi fariseo upe:

—¿Mahera pīha evocoiyase David oñehese Espíritu píratasa pipe aracahe, “Che Yar” ehi chupe? Esepiá, ahe aipo ehi:

⁴⁴ ‘Yar aipo ehi che Yar upe:

Eguapi che acato cotí acoi che amondose voi eté nde amo-taréhimbar nde povrīve yuvireco’

ehi David aracahe. ⁴⁵ Evocoiyase, ¿mahera ru: “Poropīsirosar David suindar secoira” peye, David teiteté, “Che Yar” ehise chupe? —ehi fariseo upe.

⁴⁶ Evocoiyase ndoicatu iri imboyevi ãgua yuvireco cute. Ahe ari pipe sui ndipo iri que ñepei iquerëhi vahe iñehe avi uca ãgua oñehe pipe yuvireco.

23

Jesús oicua uca fariseo iyavei Moisés porocuaita rese oporombohe vahe recocuerai

¹ Ipare Jesús aipo ehi ava eta upe, oreu avei no: ² “Co Moisés porocuaita rese oporombohe vahe iyavei fariseo eta, ahe icuaita Moisés porocuaita mombehu tupri ãgua yuvireco. ³ Sese iya peroyaño ité iyavei peyapo opacatu mbahe semi-mombehu; aní chira rumo peyapo mbahe sembiapo ai. Esepio, omombehu tupri tēi mbahe viña, ipare rumo co coti tēi mbahe oyapo yuvireco. ⁴ Iyavei omondo porocuaita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepei oporocuaita yuvireco no. ⁵ Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tēi. Osiva rese, oyiva rese avei ipe guasu vahe vireco-reco tēi oturucuar rese Tūpa Ñehengagüer cuachiapri yuvireco. Iyavei ipi catu vahe oturucuar popi moaro ãgua omondo yuvireco. ⁶ Oipota carusa rupi güenara aviye catu vahe yuvireco, oseca avei tenda porañete catu vahe güenara otúparo pipe yuvireco no. ⁷ Oipota avei ava oyeupe ‘avirave’ apo ãgua omboeteisave ocar rupi iyavei oipota, ‘Porombohesar’ oyeupe he yuvireco.

⁸ “Pe rumo, ‘Porombohesar’ ndapembohe ucai chira ava peyeupe. Esepio, pe opacatu guasu peyeivrí peico, iyavei ñepeiño ité pereco pe Mbohesar. ⁹ Iyavei, ‘Che ru’ ndapeyei chira que ava co ivi pipendar tēi upe. Esepio, ñepeiño ité pe Ru pereco, ahe niha iva pendar. ¹⁰ Ndiyai avei, ‘Mborerecuar’ pembohe uca ava peyeupe. Esepio, Poropísirosar güeraño ité pe rerecuar secoi. ¹¹ Acoi ava seco ivate catu vahe, ahe toporopítivi güeco mbegüesa pipe. ¹² Esepio, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

¹³ “¡Peparaisu catu itera pe Moisés porocuaita rese oporombohe vahe iyavei pe fariseo peico vahe, pe seco tupri angahu tēi vahe peico! Pemombitaño ava Tūpa povrive seique rágüer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rágüer sui.

¹⁴ “¡Peparaisu catu itera pe Moisés porocuaita rese oporombohe vahe iyavei pe fariseo peico vahe, pe seco tupri angahu tēi vahe peico! Esepio, perocua-rocuáño tēi cuña imer mano vahecuer rēta ichui, ipare peyeroqui tupri tēi angahu ava

rembiepiave. Sese peipisira Tūpa ñemoirosa ipírata catu vahe curi.

15 “¡Peparaisu catu itera pe Moisés porocuaita rese oporombohe vahe, pe avei fariseo, pe guata tēi angahu vahe Tūpa rese! Peguata opacatu ívi rupi iyavei para guasu rovai rupi ava mbohe. Ipare rumo pe remimbohecuer mbahe tēi catu pe sui. Pe nungar caruguar ratave nara tēi pereco uca.

16 “¡Peparaisu catu itera, pe ava mbohesar ndasesapisoí vahe nungar peico! Pe aipo peye tēi vahe: ‘Yamombehuse mbahe tūparo rer pipe yande ñehe mboaviye ãguá, ëgüe yahe tēi eté; co rumo yamombehuse mbahe oro tūparo pendar rer pipe, ahese iya itera yamboaviye yepi’ aipo peye tēi. 17 ¡Pe ndapembahecuai vahe nungar, ndasesapisoí vahe nungar avei peico! ¿Uma vo aviye catu vahe: oro pīha, anise tūparo tie? Tūparo pipe niha oro rovasasa yepi. 18 Iyavei co uve avei aipo peye tēi peico: ‘Yamombehuse mbahe seropovëhepri renda rer pipe yande ñehe mboaviye ãguá, ëgüe yahe tēi eté; co rumo mbahe yamombehuse mbahe seropovëhepri renda hari pendar rer pipe yande ñehe mboaviye ãguá, ahese iya ité yamboaviyera yande ñehe yepi’ aipo peye tēi. 19 ¡Pe ndasesapisoí vahe nungar peico yepi! ¿Uma vo aviye catu vahe? ¿Evocoí porerecosa seropovëhepri pīha, anise mbahe seropovëhepri renda tie? Ahe tenda haríve niha porerecosa sovasasa yepi. 20 Sese acoi mbahe omombehu vahe mbahe seropovëhepri renda rer pipe oñehe mboaviye ãguá, ndahei serer pipe güeraño, omombehu avei opacatu ihari pendar mbahe seropovëhepri rer pipe, 21 iyavei acoi ava omombehu vahe mbahe tūparo rer pipe oñehe mboaviye ãguá, ahe omombehu ipipendar rer pipe avei. Ahe niha Tūpa secoi. 22 Iyavei acoi omombehu vahe mbahe que ambuae ava upe íva resendar rer pipe oñehe mboaviye ãguá, omombehu avei Tūpa recua rer pipe, Tūpa rer pipe avei. Esepi, Tūpa aheve ité secoi.

23 “¡Peparaisu catu itera, pe Moisés porocuaita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepei-peí diez pe remítí menta, anís, comino pereco vahe sui ñepei Tūpa uve nara viña, pe rumo pepoi co porombohesa aviye catu vahe porocuaita resendar sui. Ahe peyapora mbahe ihívi vahe, peporoparaísuerecora iyavei pemboaviye tupríra pe cuaita yepi. Iyacatu rumo ahe pemboaviye aveira viña. 24 ¡Pe ava mbohesar ndasesapisoí vahe nungar peico! Pe pembogua rutei mbahe rahicuer sui pe ígua; mbahe tuvicha vahe rumo pemocoño ité evocoiyase. Ëgüe peye co mborocuaita upe.

25 “¡Peparaísu itera pe Moisés porocuaita rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar īqua rīru iyavei tembihu rīru icupe rupi tēi yoseipri. Ipīpe rumo iquha opitaño ité. Ēgue ehi tēi pe recocuer pe monda raisave, mbahe pota-pota tēisave avei. 26 ¡Pe fariseo peico vahe, ndapepihañemoñetai vahe mbahe pe rembiapo ai rese, pemoatiro rane pe piha pihe mbahe yavaeté vahe sui! Ahese ramo pe rembiapo icatuprira cute.

27 “¡Peparaísu catu itera, pe Moisés porocuaita rese oporombohe vahe, fariseo peico vahe, peyapo angahu tēi vahe mbahe pe recocuer pihe peico! Pe recocuer inungar tuvípa imomorochimbrí tēi. Iharive tēi icatuprī chupe. Ipīpe rumo tehōgür cangüer iyavei opacatu mbahe yavaeté vahe ovireco oyese. 28 Ēgue peye: ava rembiepiave aviye pe reco ihīvi vahe viña, pe piha pihe rumo oime pe porombopasa iyavei opacatu mbahe-mbahe tēi.

29 “¡Peparaísu catu itera pe Moisés porocuaita rese oporombohe vahe, pe fariseo peico vahe, pe reco tupri angahu tēi vahe! Esepia, pemoingatu Tūpa ñehe mombehusar ruvīpagüer peico sese pe yemomahenduha īqua iyavei pemoporañete ai tēi ava seco ihīvi vahe ruvīpagüer yepi viña. 30 Ipare aipo: ‘Yande yaicose revo aracahe yande ramoi re cose, ndayaipítiví chietera Tūpa ñehe mombehusar yuca īqua yuvireco viña’ peye tupri tēi. 31 Aipo peyese rumo, pemboye-cua Tūpa ñehe mombehusarer yucasar suindar pe yesusa. 32 ¡Pemboyeapi iriño evocoiyase pe ramoi rembiapocuerai!

33 “¡Pe mboi vai suindar tēi peico! Ndapesoyepei chira rumo Tūpa ñemoirosa sui, pesora rumo tata guasuve. 34 Evocoiyase che amboura pēu Tūpa ñehe mombehusar ava yaracua vahe iyavei ava pe mbohe īqua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi. 35 Sese pēuño ité oura Tūpa ñemoirosa opacatu ava aviye vahe yuca agüer rese co ivi pihe; Abel seco ivi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tūparo pihe mbahe seropovēhepri renda rovai. 36 Supi eté opacatu co mbahe tēi oura pe recove viteseve” ehi.

Jesús oyaseho Jerusalén pendar rese

37 “¡Too rutei, pe Jerusalén pendar, peyuca vahe Tūpa ñehe mombehusar, ita pihe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrīve! Ēgue ahe pota tēi pe

rereco viña, pe rumo ndapeipotai eté evocoí nungar pe rereco ãgua. ³⁸ Sese seyapirā tēi peicora. ³⁹ Esepiá, ndache repiaí chira peye acoi, ‘¡Imboeteipri Yar remimbou tasecoi!’ peye se voi che repia irira peye” ehi Jesús ava eta upé.

24

Jesús omombehu judío tūparo guasu mocañi ãgua

¹ Ipare Jesús osē judío tūparo pípe sui oso. Aheseve ore semimbohe oroyemboya sese aipo orohe chupe: “¡Ore Yar, eseplia co tūparo!” orohe. ² Ahe rumo:

—Supi eté amombehu pēu: co opacatu pesepia vahe, ndipoi chietera que ñepei ita oyeha vité vahe. Opacatu ité imondurusara curi —ehi oreu.

Jesús omombehu mbahe oime vaherā ari cañi renonde

³ Ipare Jesús oso ivitri Olivo ve oguapi oī. Aheve ore güeraño tupri oroso chupe rese ore porandu ãgua:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu ãgua iyavei ari cañi ãgua? —orohe chupe.

⁴ —Peicua catu, peyembopa ucai rene ambuae ava upé peico. ⁵ Esepiá, setá ava yugüerura, ‘Che aico Tūpa remimbou ava písiro ãgua’ ehi tēira ava eta mbopa yuvireco. ⁶ Iyavei pesendura ñehesa vavasa resendar coháve iyavei que rupi. Ndapeyembosiquíyei chira rumo ichui. Esepiá, ñgue ehi rane itera niha; ndehi vitéi chira rumo ari cañisa. ⁷ Esepiá, ñepei ivi pipendar ovavara ambuae ivi pipendar rese oyeupe yuvireco. Ahese oimera tiavor, ivi rírii opacatu-catu tēi tecua rupi. ⁸ Opacatu evocoí mbahe rumo omboipi ramomi vahe mbahe tēi porarasa.

⁹ “Ahese pe pisira yuvireco mara-mara tēi pe rereco ãgua, pe yuca ãgua avei. Iyavei opacatu ava-ava tēi ndape ambotai chira che recocuer sui tēi yuvireco. ¹⁰ Ahe ari rupi evocoiyase setá ava ndache reroya iri chira yuvireco. Ahe oyeamotaréhira iyavei omondora ambuae omboetasagüer yamotaréhimbar povriva yuvireco. ¹¹ Iyavei setá Tūpa ñehe mombehusrangahu tēi oimera, ahe ava ombopa-mbopa tēira yuvireco. ¹² Ombouvicha catura mbahe-mbahe tēi naporai vahe. Ipípe sui ndoyeaisu tupri iri chira ava yuvireco. ¹³ Acoi ava oyemoviracua vaheño rumo ari ipa vahe rupi, ipísropri yuvirecoira. ¹⁴ Iyavei co ñehesa icatupri vahe Tūpa mborerecuasa resendar imombehusapa ranera opacatu ivi rupi icua uca ãgua. Ahese ramo oimera cañisa co ivi pipe” ehi oreu.

¹⁵ “Tūpa ñehe mombehusrangahu Daniel oicuachía mbahe-mbahe tēi aposa resendar oime vaherā tūparo guasu maranehi vahe

pípe aracahe. Ahe pesepiase oí maranehi pípe –acoí oyeroqui vahe, ahe tosenducua tupri yuvireco—, ¹⁶ evocoiyase Judea ve yuvirecoi vahe toñemipa poyava ívitri rese yuvireco ichui; ¹⁷ iyavei acoí güëta haríve yuvirecoi vahe ogüeyise, toique iri eme güëtave ombahe reca; ¹⁸ iyavei acoí que rupi tēi yuvirecoi vahe, toyevi iri eme güëtave que oyeaosa renose água yuvireco. ¹⁹ ¡lparaisu itera cuña ipuruha vahe, imembí pítani vahe avei yuvireco! ²⁰ Peporandu Tūpa upe pe recua pípe sui pe sëehi água irohi pípe, mbituhusa ari pípe avei. ²¹ Esepia, ahe ari pípe ava iparaisu catura opacatu yípive ava ívi apo ramo suive yuvirecoi vahe sui. Ipare ndipo iri chietera evocoi nungar. ²² Iyavei nomombituhuse Tūpa co ari naporai vahe, ndipoi chietera ava oñepisiro vahe yuvireco viña. Ahe rumo güembiporavo raisusa pípe omombituhura” ehi.

²³ “Iyavei que ava, ‘Esepia co Poropísiosar secoi’; anise, ‘Peve secoi’ ehise yuvireco pëu, aní chira peroya aipo ehi vahe. ²⁴ Esepia, yuguerura ava ‘che Poropísiosar aico’ ehi tēi vahe iyavei ‘che amombehu vahe Tūpa Ñehengagüer’ ehi angahu tēi vahe; iyavei oyapora mbahe ava ndoyapoi vahe poromondisa güeco píratasa mboyecua água yuvireco. Ipípe osecoâhara Tūpa rembiporavo imbopa água yuvireco. ²⁵ Opa aipo co senondeve amombehu pëu. ²⁶ Sese que ava pëu: ‘Pesepia pe ívi iporupirëhisave secoi’ ehise, pesoí rene aheve seroyasave, aní chiaveira peroya acoí ‘pesepia co secoi oí pípe’ ehi vahe yuvireco. ²⁷ Che rumo inungar overa vahe sendi añihivei sui caharu cotí ocua íva rese, ëgue ahera che, Ava Ríquehir, opacatu ava rembiepiave ayevi irise vitu curi. ²⁸ Esepia, mbahe rehögüer reimesave, uruvu oñemonuha ati yuvireco yepi” ehi güemimbohe eta upe.

Jesús yevi água resendar

²⁹ “Ahe ari pípe mbahe-mbahe tēi pare cûriteimi ndoyecua iri chira ari, yasi avei ndosesape iri chira, yasitata avei opara ovíapi íva sui iyavei íva resendar mbahe oririira yuvireco. ³⁰ Ahese oimera íva rese iporëhi vahe che, Ava Ríquehir, yu água resendar. Evocoiyase opacatu ava-ava tēi co ívi pipendar oyaseho têira osiquiyepave yuvireco. Che repia aveira yuvireco agüeyise íva quiha rese che píratasa rendigüer porañetesá pípe. ³¹ Iyavei amboura che rembiguai eta íva pendar. Ahe evocoiyase güemimbí omoñehe píratara opacatu che rembiporavo co ívi rupindar que amombrí rupi yuvirecoi vahe monuha água” ehi.

³² “Peyembohera ívira higuera recocuer sui: Co ívira soqui ramose, yaicua cõimi ari sacu vahe yepota água yandeu yepi. ³³ Na ehi aveira pëu che ñehe rupi tupri mbahe pesepiase, sese

peicuara cōimi eté che yevi ãgua. ³⁴ Supi eté yuvirecove vitera ava osephia vahe co mbahe opase yaviye. ³⁵ Iva, ivi opara ocañi, che ñehengagüer rumo imboavíyesa rane itera.

³⁶ “Ndipoi eté rumo ava oicua vahe ari iyavei hora che yevi ãgua. Iva pendar che Ru rembiguai avei ndaicuai yuvireco. Che avei ndaicuai eté. Che Ru güeraño ité rumo oicua.

³⁷ “Inungar ava Noé recose yuvirecoi aracahe, ñegüe ehi tupri aveira che, Ava Riquehir, yevi ãgua renonde. ³⁸ Yipive amarusu renonde, ahese ava ocaru, oihu; guahir, guayri avei omomendaño yuvireco. Noé arca pípe seiquese, ñegüe ehi vité yuvireco. ³⁹ Nomohai eté rumo amarusu viapi ãgua yuvireco oyeupe viña, ñegüe ehi rumo aviyeteramo tēi amar ovíapi imocañipa. Ñegüe ahe aveira che, Ava Riquehir, ayevi aviyeteramo tēi. ⁴⁰ Evocoai ari pípe oimera ñuvirío ava amombri güecua sui yuvirecoi vahe: ñipei serasosara, indugüer rumo opitara. ⁴¹ Ñegüe ehi aveira ñuvirío cuña ohicho vahe upe: ñipei serasosara, indugüer rumo opitara.

⁴² “Sese pemahemoha yepi. Esephia, ndapeicuai mbahe ari pípe che, pe Yar, ayevira iva sui. ⁴³ Iyavei peyapisaca tupri co rese: inungar acoi oi yar oicuase revo que hora pítu pípe imonda vahe yepota ãgua, ahese imahemohara sese güëta pípe seiqueëhi ãgua viña. ⁴⁴ Ñegüe peye aveira peyemoingatu che yevi ãgua rese. Esephia niha, che, Ava Riquehir, aporoesapiha tēira vitu curi” ehi.

Mbiguai omboavíye vahe ocuaita, nomboavíyei vahe avei

⁴⁵ “Acoi ava mbahe rese ñangarecuar omboavíye tupri vahe ocuaita, yaracua vahe avei, ahe chupe serecuar oseya icuaitarä güëta pípendar rese hañeco ãgua ‘tembihu tomondo che rëta pipendar upe che porocuaita rupi’ ohesave. ⁴⁶ Acoi omboavíyesa ocuaita, ahese oviharetera güerecuar yevise. ⁴⁷ Supi eté niha serecuar oyocuaira opacatu ombahe rese hañeco ãgua. ⁴⁸ Ahe mbiguai rumo ndipiñaise ‘ndoyepota vitéi chira revo che rerecuar’ oya, ⁴⁹ omboetasa omboipí marama tēi sereco iyavei oyemboya caguar tēi rese ipiri ocaru iyavei oihu tēi ãgua. ⁵⁰ Ipare rumo serecuar oyepotara imahemohaëhiseve. ⁵¹ Ahese omombaraisu catura, ‘Tinupasa, ava seco tupri ai angahu tēi vahe nupasa nungar pipe’ ehira chupe. Ahese oyaseho tēira, oyemoaitere-tere tēi aveira” ehi güemimbohe upe.

¹ “Evocoi ari pípe Tūpa mbororecuasa inungar-ra mendasave diez cuñatai ndaseco marai vahe virasora tataendi ambuae cuña meví písi água yuvireco. ² Ipāhuve yuvirecove cinco ndipihañemoñetai vahe, ambuae cinco rumo ipihañemoñeta tupri vahe yuvireco. ³ Ipare ndipihañemoñetai vahe oipisi guataendirā yuvireco, ndovirasoí rumo yandi guataendi ríru mboapípo irí água yuvireco; ⁴ evocoi ipihañemoñeta tupri vahe rumo viraso yandi siru pípe guataendi reseve yuvireco. ⁵ Acoi ndoyepota apihaise cuña meví, ahese sopesii tēi yuvireco. Coiye opaño yuviroque yuvireco ichui. ⁶ Pítu mbiter senise rumo, osendu ñehesa aipo ehi vahe yuvireco: ‘¡Coi imevi turi! ¡Pesé ipisi água cute!’ ehi. ⁷ Evocoiyase opacatu evocoi cuñatai oñarapuha voi iyavei omoingatu guataendi yuvireco. ⁸ Ahese nimahemohai vahe aipo ehi ambuae imahemoha vahe upe yuvireco: ‘Pemboumi tēi chīhi pe yandi oreu. Esepia, ogüe pota ité ore rataendi’ ehi tēi yuvireco. ⁹ ‘Aní, ndiyai chira revo oromondo vaherā pēu. Iyacatu revo peso imboepisave serocua peyeupe nara’ ehi. ¹⁰ Imboepí yuviraso viteseve, ou cuña meví cute. Oyemoingatu vahe rumo yuviroique supi mendasave. Evocoiyase saquicuerive voi omboya oquenda rārosar. ¹¹ Ipare oyepotase ambuae cinco cuñatai yugüeru aipo ehi yuvireco oí yar upe: ‘¡Emboimi tēi oreu!’ ehi tēi yuvinoha. ¹² ‘Aní, ndopocuai vahe ité’ ehiño chupe.

¹³ “Pe evocoiyase pemahemohara. Esepia, ndapeicuai mbahe ari pípe, mbahe hora pípe che, Ava Ríquehir, ayevíra” ehi Jesús oreu.

Ñehesa guarepochi mondosa resendar

¹⁴ “Iyavei Tūpa ombororecuasave inungar-ra ava mbahe yar oso água renonde ivi amombrisave omonuha güembiguai oguarepochi rāro água viña. ¹⁵ Yipindar ñepei upe omondo cinco mil guarepochi, ambuae upe omondo dos mil, iyavei imombosapisa upe omondo mil tēi: ahe omondo ñepei-peí upe seco etegüer rupi-rupi. Ipare voi oso cute. ¹⁶ Evocoiyase evocoi mbiguai oipisi vahe cinco mil guarepochi, ahe oporavíqui co guarepochi rese. Ipipe sui coiye oipisi catu irí ambuae cinco. ¹⁷ Inungar avei ambuae oipisi vahe dos mil, ichui oipisi catu irí ambuae dos mil. ¹⁸ Ambuae oipisi vahe rumo ñepei guarepochi, ahe oyoho ivicuar. Aheve oñoti güerecuar guarepochi.

¹⁹ “Ipare coiye oyevise serecuar, ahese oñehe güembiguai upe oguarepochi retacuer cua água. ²⁰ Yipindar cinco mil guarepochi oipisi vahe ranengatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi. ²¹ ‘Aviye ité, nde mbiguai seco aviye vahe ereico iyavei eremboaviye tupri

vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovhara che rese' ehi chupe. ²² Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: 'Ndo co erembou vahe dos mil cheu. Ipipe sui co ambuae aipisi irimi dos mil avei ndeu' ehi. ²³ 'Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarā. Indó, eique che piri, yayembovhara che rese' ehi avei chupe.

²⁴ "Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: 'Che aicua nde reco; nde acoi ndihavai vahe ereico. Esepia, ava remitiguer tēi eremonuha iyavei imbovevepirer tēi avei ereipisi ndeyeupe nara. ²⁵ Sese che siquiyesa pipe añomi ivivrive nde guarepochi. Ndo co nde mbahe' ehi chupe. ²⁶ 'Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañotii vahe sui. ²⁷ Ereyapocatumira che guarepochi guarepochi apocatusave cuese rahe viña che yevise voi senose água cheu imboyevi catumi água viña' ehi. ²⁸ Ipare aipo ehi: 'Perocua guarepochi ichui, pemondora evocoí diez rupi guarepochi omboeta vahe upe' ehi. ²⁹ 'Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui. ³⁰ Sese pemose co mbiguai égue ehi tēi vahe ocarve pítumimbisave. Aheve toyaseho, tasáitere tēi oĩ ehira serecuar chupe" ehi Jesús oreu.

Jesús oura opacatu ava recocuer rese porandu água

³¹ "Che, Ava Ríquehir, ayevise, opacatu che Ru rembiguai iva pendar reseve che reco ivateguer pipe, ahese aguapira che renda porañete vahesave ava recocuer rese porandu água. ³² Evocoiyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rārosar oipeha vahe ovesa cavara sui. ³³ Che evocoiyase ovesa aipehara mbahe rese che pocosa coti, cavara mbahe rese che pocoëhisa coti. ³⁴ Ahese che mborerecuar ivate catu vahe aipo ahera che acato cotindar upe: 'Perio pe opacatu che Ru sui sovasaprí peico vahe, peique che Ru mborerecuasa pipe; ahe acoi yipive ivi apo ramo suive imoingatupri pēu nara. ³⁵ Esepia, ndacheriepoise, pe evocoiyase pembou mbahe che remihura; iyavei che huseise, pe evocoiyase pembou taíhu; che aguata tēise pe recua rupi vichico, pe avei oí pembou che que água. ³⁶ Turucuar cheu ipanese, pe avei pembou che turucuarā; chombaheasise, peso avei che piri; che roquendasave

peso avei che repia no' ehi. ³⁷ Evocoiyase evocoí seco catupri vahe aipo ehira yuvireco cheu: ‘Ore Yar, ¿mbahese vo nde repiasa nanderiepoise eico iyavei imondosa nde remihura? ¿Mbahese vo nde repiasa ndehuseise, ipare imondosa tereihu? ³⁸ ¿Mbahese vo nde repiasa nde guatase ore recua rupi, ipare nde monguesa ore piri, ipanese nde turucuarã, ore aipo evocoiyase oromondo ndeu? ³⁹ Iyavei, ¿mbahese vo aipo nde repiasa nembahreasise, anise que nde roquendasave, aheve aipo oroso nde repia yepi?’ ehira yuvireco cheu. ⁴⁰ Evocoiyase che, mborerecuar ivate vahe, amboyevira yuvireco chupe aipo ahera: ‘Supi eté, opacatu mbahe peyapose que ñepei seco mbegüemi vahe che reroyasar pâhu pendar upe viña, cheu rumo ëgüe peye’ ahera.

⁴¹ “Ahese aipo ahera cute che mbahe rese pocoëhisa cotindar upe: ‘Pesiri che sui. Esepia, pe peico Tüpa ñemoirosavri pendar. Pesopa tata guasu apirëhisave, evocoí imoingatupri opacatu caruguar upe nara serecuar reseve. ⁴² Esepia, ndacheriepoise, pe evocoiyase: Yamondomi icaru äqua, ndapeyei eté cheu; che huseise, ahese, Yamondomi toihu, ndapeyei avei cheu; ⁴³ ambuae tecua pipe aguata tëise vichico, ahese, Eique che rëtave che piri, ndapeyei eté cheu. Ipanese che turucuarã, pe rumo ndapemboui cheu, chembahreasise vichico, iyavei che roquendasave, Yasomi tëi sepia, ndapeyei eté cheu’ ahera. ⁴⁴ ‘Ore Yar, ¿marase vo aipo nde repiasa nanderiepoise, anise aipo nde huseise, ipanese nde turucuarã ndeu no, nembahreasise, anise nde roquendasave, marase vo mbahe rese nande pëtiviisai?’ ehi tëira yuvireco cheu. ⁴⁵ ‘Supi eté acoi amove mbahe ndapeyapoise que seco mbegüemi vahe upe viña. Ipípe rumo cheu avei mbahe ndapeyapoi eté’ ahera. ⁴⁶ Ahe ava yuvirasora Tüpa ñemoirosa apirëhi vahesave. Seco ívi vahe rumo teco ori opaëhisave yuvirasora” ehi Jesús oreu.

26

Jesús yamotarëhimbar omboguai yuca äqua yuvireco

¹ Ipare Jesús aipo ehi oreu:

² —Pe peicua ñuvirío ari tëi ipane vîte co Pascua pieta yepota äqua yandeu. Ahese che, Ava Riquehir, imondopri aicora che atica äqua curusu rese yuvireco —ehi.

³ Ahe pípeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate catu vahe Caifás rëtave. ⁴ Aheve oñemoñeta: ‘Yambopa ipisi yuca äguá’ ehi yuvireco oyeupe. ⁵ Ahe rumo:

—Ndiyai pieta pípe ité yaipisi ava rehii yemondii guasuëhi äqua yandeu —ehi.

Cuña oipiyere Jesús ãca rese mbahe s̄iacuá vahe

⁶ Jesú tecua Betania ve secoi, Simón lepra vireco vahecuer r̄etave. ⁷ Aheve mesave chiniseve, cuña vireco vahe mbahe s̄iacuá vahe s̄iru reseve viroyepota chupe. Ahe oipiyere Jesús ãca rese. ⁸ Orosepiase rumo oroñemoiro aipo orohe oreyeupe:

—¡Mahera vo co omocañi t̄ei! ⁹ Omondo vahe ité tie co setá guarepochi rupi ava iparaisu vahe p̄itivii água viña —orohe t̄ei chupe.

¹⁰ Jesú rumo oicua ore p̄ihañemoñetasa. Sese aipo ehi oreu:

—¡Mahera vo co cuña pemañeco t̄ei! Esepia, co mbahe oyapo vahe avíye ité cheu. ¹¹ Ava iparaisu vahe niha yuvirecoiño itera pe p̄ahuve. Che rumo égue ndahe víteñoi chira vichico pe p̄ahuve. ¹² Esepia, co cuña oipiyere mbahe s̄iacuá vahe che rese che t̄i água renondeve. ¹³ Supi eté aipo ahe p̄eu: co ñehesa p̄isirosa resendar mombehuse opacatu tecua rupi, imombehusa aveira co cuña rembiapo sese mahenduha água —ehi.

Judas Iscariote oyemoingatu Jesús mundo água yamotaréhimbar povr̄ive

¹⁴ Ipare ñepei ore p̄ahu pendar, Judas Iscariote, oso, oñehe pahi eta rerecuar yuvirecoi vahe upe ¹⁵ aipo ehi:

—¿Mbovi rupi vo pemboepira cheu amondose Jesús p̄eu viña? —ehi.

“Treinta guarepochi rupi” ehi yuvireco chupe. ¹⁶ Ahesa reseve voi oseca Jesús mundo água yamotaréhimbar upe.

Jesús caru agüer ipa vahe güemimbohe rese

¹⁷ Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

¹⁸ Evocoiyase,

—Peso tecua guasuve che cua vahe r̄etave aipo peyera chupe: ‘Ore Mbohesar aipo ehi: Cõimi che mano água, sese ayapo potami s̄etave Pascua pieta che remimbohe reseve, ehi ndeu’ peyera chupe —ehi.

¹⁹ Evocoiyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

²⁰ P̄itu ramomise, opacatu oroguapi mesave Jesús piri ore caru água. ²¹ Ore carusave aipo ehi oreu:

—Supi eté aipo ahe p̄eu: ñepei pe p̄ahu pendar che mondora che amotaréhisar upe —ehi.

²² —Che Yar, ¿che p̄iha? —orohe-rohe t̄ei ñepei-peí ore yacatu ore viharéhisa pipe chupe.

²³ —Omondo vahe opo che caro pipe, ahe che mondora che amotarēhisar upe —ehi—. ²⁴ Imboaviyesa itera che, Ava Riquehir, rese ñehesa icuachiapri. ¡Iparaisu catura rumo acoi mbia che mondosal! Aviye catura ndoyesuise viña —ehi.

²⁵ Ahese Judas imondosaví oprandu:

—Ore Mbohesar, ¿che tie? —ehi.

—Taa, ñinde ité niha ëgüe erera! —ehi chupe.

²⁶ Ore caru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi oreu imondo, aipo ehi:

—Ndo co, pehu co che rete —ehi.

²⁷ Ipare oipisi ñigua ríru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui. ²⁸ Esepiá, co che ruvi, ahe omoimera che Ru remimbotar ipiasu vahe pëu, ahe oyepiyerera ava rehii angaipa rese ñiero ãgua. ²⁹ Ndaihu iri chira uva ricuer cheu ari oyepotase voi che Ru mborerecuasave aihura pe rese ambuae uva ricuer ipiasu vahe —ehi oreu.

Jesús, “‘Ndaicuai vahe ité aipo mbia’ erera cheu” ehi Pedro upe

³⁰ Ore sapucaire, oroso ivítri Olivo ve. ³¹ Evocoiyase Jesús aipo ehi oreu:

—Opara pemocañi che rese yeroyasa peyesui co pítu pipe. Esepiá, acoi icuachiapri pipe aipo ehi: ‘Ayucara ovesa rãrosar, ahese oñemosai têira ovesa opacatu rupi yuvireco’ ehi vahe. ³² Che cuerayevire rumo, aso voi etera pe renonera Galilea ve —ehi.

³³ Pedro rumo,

—Yepe ambuae opacatu nande reroya iri chira yuvireco, che rumo ndayepepii chietera nde sui —ehi chupe.

³⁴ —Che rumo supi eté aipo ahe ndeu: co pítu pipeve voi eté tacura ñehe renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

³⁵ Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi—ehi catuño ité chupe.

Aipo orohe pâve tupri têi chupe.

Jesús oyeroqui Getsemaní ve

³⁶ Ipare Jesús rupi orosoño Getsemaní ve. Aheve aipo ehi oreu:

—Peguapi cohabe; che aso ranera peve catumi, ayeroqui —ehi.

³⁷ Aheve viraso Pedro oyeupi iyavei ñuvirío Zebedeo rahir. Ahese oyandu oviharéhisa oico. ³⁸ Evocoiyase ahe aipo ehi chupe:

—Ndavīhai eté. Esepio, che hā oyandu ité manosa. Pepita rane cohave iyavei pemahemohara pe yeroqui pipe che rese —ehi.

³⁹ Evocoiyase oso tenonde catumi. Aheve oñenopīha ovapi ivi rese oyeroqui Vu upe aipo ehi: “Che Ru, iyase ndeu che renose mbahe-mbahe tēi sui eve; tayapo eme ru che remimbotar tēi, nde remimbotar rupi catu tayapo” ehi.

⁴⁰ Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—¡Ndapeñemosai eté vo pe ropesii upe che rāro ãgua que ñepei hora che mondugüe ãgua peye! ⁴¹ Pemahemoha, peyeroqui mbahe tēi pipe pe viapiëhi ãgua. Supi eté pequerëhi ité viña, pe retecuer tēi niha nípiratai pēu —ehi.

⁴² Ichui imoñuviriosa rupi oso iri oyeroqui aipo ehi: “Che Ru, ereipotase che reique ãgua co mbahe tēi pipe, eyapo nde remimbotar che rese” ehi.

⁴³ Ipare oyevise, osesapīha iri iqueseve ou. Esepio, sopesii nomboyeroyai eté yuvireco. ⁴⁴ Evocoiyase oseyapa iri oso oyeroqui ãgua imombosapisa rupi. Aipo ehi tupriño avei oyeroqui Vu upe. ⁴⁵ Ipare oyevi iri güemimbohe upe aipo ehi chupe no:

—¡Pequeño vîte vo peyu! Osupiti che, Ava Riquehir, mundo ãgua ava yangaipa vahe povrîve. ⁴⁶ Pepûha, yaso. Esepio, cōimi eté che amotarëhisar upe che mondo vaherâ secoi —ehi.

Jesús oipisi yuvireco

⁴⁷ Jesús ñehe vîteseve, Judas oyepota oso chupe. Ahe ñepei semimbohe ore pâhu pendar, iyavei setá iteanga ava yugüeru quise pucu, ivira reseve-seve supi. Ahe pahi eta rerecuar yuvirecoi vahe judío rerecuareta porocuaita rupi oyapo yuvireco. ⁴⁸ Yipindar rumo imondosar Judas aipo ehi: “Asovaupite, ahese peicuara; ahe peipisira” ehi. ⁴⁹ Ipare oyemboya voi oso sese.

—¡Avirave, Porombohesar! —ehi sovaupite.

⁵⁰ —Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

⁵¹ Evocoiyase semimbohe secoi vahe supi vinose oquise pucu, oyasia pahi rerecuar ivate catu vahe rembiguai nambi.

⁵² —¡Aní! —ehi güemimbohe upe—. Emoingue siru pipe nde quise pucu. Esepio, acoi ava opacatu ovava vahe oquise pipe yuvireco, ipipe avei opara yucasa yuvireco. ⁵³ ¿Ndereicuai vo aporanduse che Ru uve viña, ahe evocoiyase cûritei voi omboura doce mil sui setá catu vahe güembiguai che repi ãgua viña? ⁵⁴ Ëgüe ehise rumo Tüpa Ñehengagüer icuachiapri ndayaviyei chietera viña, ahe co cûritei osupiti —ehi.

55 Ahese aipo ehi ava rehii upe:

—Pe quise pucu, ivira reseve-seve rutei co peyu che ropeña che pisí água imonda rai vahe nungar che rereco peye. Che ari yacatu rupi aguapise pe pāhuve pe mbohe água tūparo pipe, ndapeyapoi eté co nungar cheu. ⁵⁶ Co rumo opacatu ēgue peye Tūpa ñehe mombehusar rembicuachiagüer mboaviye água cute —ehi ava rehii upe.

Ahese voi opacatu oroñemosipa, oroseya ahe aetemi Jesús ava rehii upe imoha.

Jesús serasosa pahi rerecuar ivate catu vahe rovai

57 Ahese Jesús pisísar viraso Caifás rētave yuvireco, ahe pahi rerecuar ivate catu vahe secoi. Aheve oñemonuha Moisés porocuaita rese oporombohe vahe, judío rerecuar yuvirecoi vahe avei no. ⁵⁸ Pedro rumo amombri rupive tēi osaquicue moña oso. Ēgue ehi oyepota pahi rerecuar ivate catu vahe rēta rocar áchisave. Aheve oique ipipe, iyavei oguapi oīsundao pāhuve ‘¿mara ehi etera pīha sereco yuvireco?’ oya.

59 Ahese pahi eta rerecuar iyavei opacatu porandusa ivate catu vahe pendar, ahe oñehengapo-ngapo uca tēi ava Jesús amotarēhisave yuca uca água yuvireco, ⁶⁰ yepe oyemboyecua setá iteanga yamotarēhisar semira-mira tēi vahe yuvireco viña, ndoyosui eté rumo mbahe sembiapo naporai vahe yuca uca água yuvireco. Aheseve yugüeru ñuvirío yamotarēhisar oporombopa-mbopa tēi vahe yuvireco cute.

61 —Co mbia aipo ehi: ‘Che aicatu co tūparo monduru; aicatu aveira imopuha iri mbosapi ari rupi’ ehi —ehi tēi yuvireco chupe.

62 Ahese pahi rerecuar ivate catu vahe opūha, oporandu Jesús upe:

—¿Mahera vo nderemboyevii eté iñehe yuvireco chupe? ¿Mbahe ehi vo aipo nde amotarēhisar nde rese oñehe? —ehi.

63 Noñeheti eté rumo. Ahese,

—Che orocuai Tūpa supi eté vahe rer pīpe emombehu oreu: ¿Poropísicosar ité nde ereico, Tūpa Rahir? —ehi pahi rerecuar ivate catu vahe chupe.

64 —Taa, supi eté niha aipo aipo ere cheu, co catu amombe-hura pēu, che repiara niha peye che, Ava Riquehir, aguapise Tūpa mbahe mboavaisarēhi acato coti, ayevise avei iva quiha rese curi —ehi.

65 Evocoiyase pahi rerecuar ivate catu vahe imboasipave omondoro oturucuar aipo ehi:

—¡Indó, mbahe tēi eté iñehe Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñehe-ñehe tēisa cūritei. ⁶⁶ ¿Mara ehi aipo pe pīhave? —ehi.

—Supi eté, oyaví mbahe. ¡Tomanoño ité! —ehiño ivoya eta yuvíreco chupe.

⁶⁷ Ahese ondívì-ndívì sova rese iyavei yuvírocua-rocuá yuvíreco sese. Ambuae osovapete-pete, ⁶⁸ aipo ehi yuvíreco chupe:

—Nde niha aipo ereico Tūpa remimbou Poropísiosar, ¿eicua ité ru, ava evocoí ocua nde rese? —ehi yoyai catu-catú yuvíreco.

Pedro, “Ndaicuai vahe evocoí mbia” ehi Jesús upé

⁶⁹ Pedro evocoiyase oguapi sāro ocarve ñachimbrí pipe oí. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰ Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upé.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvírecoi vahe upé imombehu:

—Co ava avei acoi secoi Jesús Nazaret pendar rupi yepi —ehi ava upé.

⁷² —¡Aní! —ehi iri ahe cuña upé—. ¡Tūpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvírecoi vahe, oyemboya sese aipo ehi yuvíreco chupe:

—Nde avei eté niha supindar ereico. Esepia, nde ñehe pārigüer rese nde cuasaño —ehi yuvíreco.

⁷⁴ Ahe evocoiyase,

¡Tūpa niha oicua ndopombopai eté niha! ¡Che ndaicuai vahe ité evocoí mbia, ahe mo aipo pēu! —ehi angahu tēi chupe.

Aipo iheseve, tacura oñeha. ⁷⁵ Ahese Pedro oyemomahenduha Jesús oyeupe, ‘Acoi tacura ñehe renondeve mbosapi oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osē, oyasehó iteanga oso.

27

Jesús serasosa Pilato rovai

¹ Cōhe ramose, ahese opacatu pahi eta rerecuár, judío rerecuár avei oñemonuha atí oyemboyoya guasu ‘Jesús tayucasa ité’ oyapave yuvíreco. ² Ipare oipocua-pocua seraso mborerecuár guasu Pilato upé yuvíreco.

Judas yejuca agüer

³ Judas, acoi Jesús omondo vahe yamotarēhisar uve oicua, ‘Jesús tayucasa cute’ ehise, ahese tasí iteanga chupe. Evocoiyase oso voi tēi tūparo guasuve pahi eta rerecuár yuvírecoi

vahe upe iyavei judío rerecuareta upe treinta guarepochi mboyevi ãgua aipo ehi:

⁴ —Che ayemboangaipa tiête vichico. Esepio, amondoño tēi mbia seco catupri vahe pēu yuca uca ãgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoiyase opaño guarepochi omombó tūparo pipe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa ríru pipe. Esepio, ava yucapirā reprí tēi —ehi yuvireco.

⁷ Ipare oyoya guasu ipihañemoñeta yuvireco co guarepochi rese ñaihu rese oporavíqui vahe ivi rerocua ãgua ‘toime ava secua ambuae vahe rehögür tī ãgua’ oyapave yuvireco.

⁸ Sese cūritei co ivi upe, “Ava ruví reprí tēi” ehi yuvireco yepi. ⁹ Ëgue ehi co imboaviye ité Tūpa ñehe mombehusar Jeremías remimombehugüer aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoí mbia pisí ãgua. ¹⁰ Ipipe virocua ñaihu rese oporavíqui vahe ivi yuvireco. Cheu che Yar omombehu vahecuer rupi tupri ité oyapo yuvireco” ehi Tūpa ñehe mombehusar aracahendar.

Jesús serasosa mborerecuar Pilato rovai

¹¹ Jesús serasosa mborerecuar Pilato upe, ahese Pilato oportandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyevi Pilato upe.

¹² Evocoiyase acoi pahi eta rerecuar iyavei judío rerecuareta oñemonuha vahe eipeve oñehengapo-ngapo tēi yuvireco. Nomboyevii eté rumo iñehe chupe oyeipi ãgua.

¹³ Evocoiyase:

—¿Nderesendui vo aipo co opacatu ndeu ñehe-ñehe tēisa? —ehi Pilato chupe.

¹⁴ Nomboyevii eté rumo que ñepei angara ñehesa chupe viña. “¡Too, mara ehi rutei vo co!” ehi-ehi tēi mborerecuar chupe.

“¡Tayaticasa!” ehi Jesús upe ava yuvireco

¹⁵ Mborerecuar guasu recosa ité ñepei ava soquendapri renose ãgua Pascua pieta pipe ava rehii remimbotar rupi yepi.

¹⁶ Aheve oime soquendapri mbia icuapri vahe ité Barrabás serer vahe; ¹⁷ evocoiyase ava rehii oñemonuha atise, Pilato oportandu chupe yuvireco:

—¿Uma peipota che amose ucara pēu: Barrabás pīha, anise Jesús “Poropisirosar” ehi vahe yuvireco chupe tie? —ehi.

¹⁸ Esepiá, ahe oicuaño ité ava rese yemoecatéhisa pipe sui imondopri secoise.

¹⁹ Pilato güendave chini viteseve, sembireco omondo oñehé chupe aipo ehi: “Ereyapoi rene mbahe evocoí ava seco catupri vahe upé. Esepiá, che querve asepiá mbahe tēi eté sesendar” ehi.

²⁰ Evocoí pahi eta rerecuar iyavei judío rerecuareta rumo ava rehii omongueréhi, “Barrabás tosé; Jesús evocoiyase tomano” he ãgua yuvireco. ²¹ Evocoiyase Pilato oporandu iri ava rehii upé:

—¿Uma peipota catu co ñuvirío yuvirecoi vahe sui amose vaherá pēu? —ehi.

—¡Barrabás tosé! —ehi yuvireco.

²² —¿Mbahe vo evocoiyase che ayapora Jesús rese chupe acoi ava, “Poropisirosar” ehi yuvireco? —ehi.

—¡Tayaticasa curusu rese! —ehi ati-atiño yuvireco chupe.

²³ —¿Mbahe ité vo oyapo naporai vahe? —ehi tēi ava rehii upé.

Ahe rumo:

—¡Tayaticasa ité curusu rese! —ehi ati-ati iriño yuvireco chupe.

²⁴ Evocoiyase Pilato: “Ndaicatui mbahe moingatu sepí ãgua” ehi tēi oyeupe. Sese ava yaivu guasu catu-catu irise, ogüeru uca i. Ipipe oyepoi opacatu ava rehii rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

²⁵ —¡Ore rese ité, ore rahir rese avei toviapi que mbahe tēi co mbia mano sui! —ehi atiño ité yuvireco.

²⁶ Ahese Pilato omose uca Barrabás; Jesús rumo oinupá iteanga uca tucumbo tupeicha nungar pipe imondo curusu rese yatica ãgua.

²⁷ Evocoiyase mborerecuar sundao víroique Jesús ambuae oi pipe. Aheve opacatu omboetasa omboyere tupri uca sese yuvireco. ²⁸ Ahese osequiipa iturucuar ichui. Ipare omonde turucuar pīra vahe yuvireco sese ²⁹ iyavei omonde ñaca rese yu piapri, omondo avei ñepei tacuarmi mbahe rese ipocosa coti ipove yuvireco. Ipare oñenopiha angahu sovai yuvireco aipo ehi:

—¡Imboeteipri judío rerecuar tasecoi! —ehi angahu sese oguayi tēisa pipe yuvireco.

³⁰ Iyavei ondīví-ndíví yuvireco sese. Ipare yuvirocua-rocua ipo pendar tacuarmi pipe ñaca rese yuvireco. ³¹ Ëgue ehi yoyai catu-catu yuvireco. Ipare vírocuaase turucuar pīra vahe

ichui, ahese omonde iturucuar ité yuvireco sese. Ichui vîraso curusu rese yatica ãgua yuvireco cute.

Jesús yaticasa curusu rese

³² Acoi yuvinosese yuvîraso, osepia mbia Cirene pendar, Simón serer vahe. Ahe chupe, “Erio, terevosii co curusu Jesús vireco vahe rese” ehi voiño têi yuvireco.

³³ Oyeptase yuvîraso Gólgota serer vahesave, ahe ‘ava ãcagüer’ oya aipo ehi chupe, ³⁴ aheve uva ricuer imboyese-hapri mbahe pihaupiar rese omondo têi yuvireco Jesús toihu. Osâha têi, ndoihu potai rumo.

³⁵ Ipare oyatica curusu rese yuvireco. Ahese sundao iguayiño oyeupe iturucuar mboyaho-yaho ãgua rese. ³⁶ Ipare aheve oguapi yuvinoi sâro. ³⁷ Iyavei omombehu ivate curusu rese ñaca harive mbahe sui oyuca yuvireco: “Co Jesús judío rerecuar guasu” ehi icuachiapri oï.

³⁸ Ñuvirío imonda rai vahe yaticasa avei curusu rese supive yuvireco, ñepei mbahe rese ipocosa coti, ambuae evocoiyase mbahe rese ipocoëhisa coti yuvireco. ³⁹ Acoi ava ñocuasar iñeha-ñeha têi, oñeaca mbovava, ⁴⁰ aipo ehi yuvireco chupe:

—Nde acoi, “Opara tûparo amonduru. Ipare mbosapi ari rupi opa irira amopuha” ere acoi cuese. ¡Eñepisiro ru nde ae cute! ¡Tûpa Rahir nde recose, egüeyi curusu sui! —ehi têi yuvireco chupe.

⁴¹ Aipo ehi avei pahi eta rerecuar, Moisés porocuaita rese oporombohe vahe iyavei judío rerecuareta avei; ahe iñeha mara-mara têi yuvireco chupe aipo ehi:

⁴² —Oipísiro ambuae, ahe ae rumo ndoicatui oñepisiro. Israel rerecuar guasu secoise, ¡tögüeyi curusu sui cûritei, ahese voi seroyasara! ⁴³ Ahe oyeroya Tûpa rese, Tûpa evocoiyase oipotase, toipísiro cûritei. Esepia, ahe, “Che Tûpa Rahir aico” ehi yandeu cuese —ehi yuvireco.

⁴⁴ Imonda rai vahe avei rumo acoi yaticaprí supive, ahe avei mara ehi-ehi têi chupe.

Jesús mano agüer

⁴⁵ Ahese mbiter ari pipe, opa tupri pîtu ivi rupi. Ëgue ehi las tres rupi. ⁴⁶ Ahese tupri avei Jesús oñeha pîrata aipo ehi: “Elí, Elí, ¿lema sabactani?” ehi, (ahe ‘che Ru Tûpa, che Ru Tûpa, ¿mahera vo che reya eve?’ oyapave aipo ehi).

⁴⁷ Ava aheve yuvirecoi vahe osenduse iñeha, aipo ehi yuvireco:

—Esedu co mbia, Tûpa ñeha mombehusar Elías upe oñeha —ehi yuvireco chupe.

⁴⁸ Aheseve voi imboetasa oña, oso mbahe saviyu vahe reca, omoaqui vinagre pípe imondo ivira apri rese chupe 'toihu' oya. ⁴⁹ Ambuae rumo aipo ehiño yuvireco:

—Égue tehiño rane, ¿oura píha Elías ipísiro água? —ehi yuvireco.

⁵⁰ Ahese Jesús sâse pírata iri, omano. ⁵¹ Ahe pipeve voi tûparo guasu turucuar ivate coti sui ovo tupri. Aheseve avei ivi oríri iyavei ita guasu-guasu oyeca. ⁵² Tehögür ruvípa ita apopri avei oyemboi yuvireco iyavei setá Túpa reroyasar omano vahecuer, ahe avei opa ocuerayevi yuvireco. ⁵³ Égue ehi Jesús cuerayevire, ahe opa yuvínose tehögür ruvípa sui. Ipare yuviroique Jerusalén maranehi pípe. Aheve setá ava upe oyemboyecua yuvireco.

⁵⁴ Evocoiyase co sundao rerecuar iyavei Jesús rârosareta, ahe oyanduse ivi rírii yuvireco iyavei ambuae mbahe égue ehi vahecuer repiase, ahese oyembosiquiye guasu aipo ehi yuvireco:

—¡Supi eté catu co mbia Túpa Rahir ité secoi! —ehi têi yuvireco.

⁵⁵ Iyavei setá cuña aheve amombrive osepia catu yuvínoha, ahe acoi Galilea sui yugüeru vahecuer Jesús rupi iyavei setá rupi oipítivii yuvireco yepi. ⁵⁶ Ahe ipâhuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

Jesús apocatu agüer tuvípa pípe

⁵⁷ Pítu potase, ou mbia mbahe yar José serer vahe, ahe Jesús reroyasar tecua Arimatea pendar. ⁵⁸ Evocoiyase ahe oso Pilato upe operandu Jesús rehögür rese. Evocoiyase Pilato aipo ehi: "Aviye, timondosaño chupe" ehi. ⁵⁹ José evocoiyase víraso sehögür. Ipare oimama tupri turucuar secose vahe ndiquihai vahe pípe. ⁶⁰ Ichui omoingue ombahe tuvípa ipiasu vahe, ita oyoho uca vahe pípe. Ipare osovapi ita guasu yapayere vahe pípe oso. ⁶¹ Aheve María Magdalena ambuae María rese suvípa rovai oguapi yuvínoi.

Jesús ruvípa osâro sundao yuvireco

⁶² Ahere ayihive mbituhusa arí pípe, yuvíraso pahi eta rerecuar iyavei fariseo Pilato upe mbahe rese operandu água ⁶³ aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: "Acuerayevira mbosapi arí pare omano vahe pâhu sui" ehi acoi cuese oicove vîtese —ehi yuvireco—. ⁶⁴ Sese emondo sundao sehögür ruvípa râro tupri água mbosapi arí rupi semimbohe ñomiëhi água pítu pípe yuvireco. Aviyeteramo, "Ocuerayevi omano vahe pâhu

sui" aipo ehi tupri tēi tiētera ava upe yuvireco. Aipo ehise yuvireco, yipindar semira tēi vahe sui ivate catura serecosa –ehi yuvireco.

65 Pilato evocoiyase aipo ehi chupe yuvireco:

—Aviye —ehi—. Amondora sundao pēu. Peraso, pemoviracua tupri ité sāro ãgua —ehi.

66 Evocoiyase yuviraso tehögürer ruvipa rāro tupri ãgua yuvireco. Ahese omondo tehögürer rovapisa ita guasu rese mbahe imomisa cua ãgua yuvireco. Ipare oseya aheve sundao sāro ãgua yuvireco cute.

28

Jesús ocuerayevi

1 Cōhe ramomise, domingu pípe, María Magdalena iyavei ambuae María yuviraso tehögürer ruvipa repia yuvireco.

2 Aviyeteramo tēi oririí píratá ivi Tūpa rembiguai ivi sui igüeyise. Ëgüe ehi oyepota tehögürer ruvipave ou, ahe virocua itape guasu sovapisa ichui. Ipare iharive oguapi oī. 3 Ëgüe ehi sendí iteanga aviye acoi overa vahe. Iturucuar evocoiyase morochí eté. 4 Osepiase sundao, oririí eteanga osiquiyepave yuvireco ichui, opa oyuca pucu-pucu tēi yuvireco. 5 Tūpa rembiguai rumo aipo ehi voi eté cuña upe:

—Pesiquiyei rene. Esepi, che aicua pe peseca Jesús yaticapirer. 6 Ndipoi eté cohabe. Esepi, ahe ocuerayevi güemimombehu rupi eté. Tapesepia ru supagürer —ehi.

Ipare aipo ehi:

7 —Peso poyava voi, tapemombehu semimbohe eta upe: 'Ocuerayevi' omano vahe pāhu sui iyavei ahe rane osora pe renonera Galilea ve. Aheve pesepiara' tapeye chupe. Co che cuaita imombehu ãgua pēu —ehi Tūpa rembiguai cuña upe.

8 Evocoiyase cuña yuviraso poyava voi suvípa sui, osiquiye pāhuve rumo oviháño yuvireco; ëgüe ehi yuvinoñá iteanga imombehu yugüeru oreu. 9 Ahese Jesús oyemboyecua cuña upe cute omboavirave. Ahe cuña evocoiyase oyemboya sese oñenopicha ipicuhaguā imboeteisave yuvireco. 10 Evocoiyase ahe aipo ehi chupe:

—Pesiquiyei rene che sui. Pesoño, tapemombehu che reroy-asareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

11 Cuña yuviraso viteseve, ahese moviro sundao yuviroique tecua guasu Jerusalén pípe yuvireco. Ahe omombehupa pahi eta rerecuar upe opacatu mbahe osepi vahecuer yuvireco.

12 Evocoiyase pahi rerecuareta oñemoñeta judío rerecuar rese

opīhañemoñeta mboyoya ãgua. Ichui omondo setá guarepochi sundao upe yuvireco,¹³ aipo ehiño yuvireco chupe:

—Aipo peyera ava uve: “Oroque vîteseve pîtu pîpe, ahese revo Jesús remimbohe yugüeru sehôgüler ñomi ãgua ore sui” peyera —ehi mborerecuar yuvireco chupe—. ¹⁴ Acoi oyanduse rumo mborerecuar guasu curi, ahese opoviroya ucara chupe. Evocoiyase ndipoi chira mbahe pe rese —ehiño pahi eta rerecuar sundao upe yuvireco.

¹⁵ Evocoiyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ëgüe ehi vite cûritei judío Jesús cuerayevisa reroyaëhi yuvireco yepi.

Jesús omondo güemimbohe ivi yacatu rupi oñehengagüer mombehu ãgua

¹⁶ Evocoiyase ëgüe orohe oroso semimbohe once oroico vahe Jesús remimombehu ivi Galilea pendar ivitrive. ¹⁷ Acoi orosepiase rumo Jesús, ahese oromboetei oroico, yepe moviro têi ore pâhu pendar ndoviroya tupri vitei yuvireco viña. ¹⁸ Evocoiyase ahe oyemboya ore rese aipo ehi oreu:

—Tûpa che mbou mborerecuar ivate catu vahe che reco ãgua ivave, ivive nara avei no —ehi—. ¹⁹ Peso ava upe opacatú ivi rupi iyavei pembohe che recocuer rupi eté yuvirecoi vaherä; peñapiramo avei che Ru rer pîpe, che rer pîpe, Espíritu Santo rer pipe avei no. ²⁰ Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.

MARCOS REMBICUACHIA JESUS RECOCUER RESENDAR San Marcos

Juan Oporoāpiramo vahe ivi iporupirēhisa rupi secoi

¹ Co yipindar aviye vahe ñehesa Jesucristo, Tūpa Rahir, recocuer resendar amombehu potami pēu. ² Yipiindar Tūpa aipo ehi imombehu oñeho mombehusar Isaías rembicuachía pi pipe aracahe:

“Amondora che ñehe mombehusar nde renonera, ndeu peri moatiro ãgua” ehi.

³ “Oyeendu ñehesa ipirata vahe ava porēhisave: ‘Pemoingatu yande Yar raperā; pemohivi tupri avei’ ehi” ehi arac- ahe.

⁴ Ëgüe ehi Juan ou ava ãpiramo ivi iporupirēhisa rupi oico, aipo ehi: “Pemboasi pe angaipa, peyevi Tūpa upe, ahese opoāpiramora Tūpa pēu ñero ãgua pe angaipa rese” ehi ava upe.

⁵ Opacatu ava oyugüeru iñehe rendu ãgua ivi Judea rupindar, iyavei tecua Jerusalén pendar oangaipagüer mombehu ãgua. Ahese Juan oñapiramo iai Jordán pi pipe.

⁶ Juan turucuar camello ragüer apopri, sumbicuasa mbahe pirer, sembihu evocoiyase tucru, eiri caha pi pendar avei.

⁷ Ahe aipo ehi oñeho ava upe oico: “Che raquicuei oura seco pírata catu vahe che sui, sese cheu ndiyai chira ayeaivi ipitaquisā yora ãgua. ⁸ Che supi eté opoāpiramo i pi pipe tēi; ahe rumo pe ãpiramora Espíritu Santo pi pipe” ehi.

Jesús ãpiramo agüer

⁹ Ipare Jesús osē tecua Nazaret sui oso Galilea rupi. Aheve Juan oñapiramo iai Jordán pi pipe. ¹⁰ Osē ramoseve i sui, Jesús os- epia iva oyemboi tupri, ahese Espíritu ogüeyi iharive apicasu nungar. ¹¹ Ahese oyeendu ñehesa iva sui aipo ehi: “Nde che Rahir ereico, che rembiaisu, avīha etepri nde rese” ehi vahe.

Jesús recoāhasa

¹² Ipare voi, Espíritu Santo viroguata Jesús ava porēhisa rupi. ¹³ Aheve Jesús secoi cuarenta ari mbahe mimbá vai pāhuve. Aheve avei Caruguar osecoāha; Tūpa rembiguai iva pendareta rumo ihañecoño yuvireco sese.

Jesús omboipi oporaviqui Galilea rupi

¹⁴ Juan roquenda pare, Jesús oso ivi Galilea rupi, omombehu ñehesa aviye vahe Vu recocuer resendar ava upe oico ¹⁵ aipo ehi: “Oyepota ari iyavei cōimi eté Tūpa mborerecuasa yandeu. Sese, pemboasi pe angaipa, peyevi

Tūpa upe, iyavei peroya co ñehesa aviye vahe Tūpa suindar” ehi.

Jesús, “Perio che rupi” ehi irungatu pira mbohasar upe

¹⁶ Ñepei ari Jesús oguata ipa Galilea ivii. Ahese osepia Simón, tivrí Andrés avei, ahe pira omboha yuvireco. ¹⁷ Ahese Jesús aipo ehi chupe:

—Pe pira recasar peico, perio che rupi, na peye aveira ava reca ãgua cheu nara —ehi.

¹⁸ Aipo he ramoseve voi, opoi opira mbohasa sui yuvireco, yuviraso supi.

¹⁹ Ipare chīhi oguata irimise, ahese osepia Santiago, Zebedeo rahir, tivrí Juan reseve carite pipe omoingatu opira mbohasa yuvinoi vu piri. ²⁰ Ahe chupe avei: “Perio che rupi” ehi, evocoiyase vu oseya carite pipe ipitivisar reseve, yuviraso supi.

Mbia caruguar vireco vahe oyese

²¹ Oyepotase tecua Capernaum ve yuvireco mbítuhusa ari pipe, Jesús oique oporombohe tūparove. ²² Evocoiyase ava osenduse iporombhesa, “¿Mara ehi rutei?” ehi tēi yuvireco chupe. Esepiá, ahe oporombohe güeco píratasa pipe, ndahei Moisés porocuaita rese oporombohe vahe nungar. ²³ Aheve mbía ahe tecua pendar vireco vahe caruguar oyese, oñehe pírata chupe aipo ehi:

²⁴ —¿Mahera vo ereyuño tēi cohabe oreu, Jesús Nazaret pendar? ¿Ereyu vo ore mocañi ãgua tēi? Che orocua ité, nde Tūpa suindar ndaseco marai vahe ereico —ehi chupe.

²⁵ Oñehe pírata rumo caruguar upe aipo ehi: —¡Quiriri, esē co mbía sui! —ehi chupe.

²⁶ Evocoiyase caruguar mbía rese secoi vahe omoehoha seití ivive, sāse, osē oso ichui. ²⁷ Opacatu ava ombosikiye, ichui oporandu-randu oyeupe yuvireco aipo ehi:

—¿Mbahe pīha co? ¡Iporombhesa ipiasu vahe ité! ¡Co mbía vireco ité ombororecuasa! ¡Caruguar avei eté omboyeroya oyeupe iñehese! —ehi tēi ava yuvireco.

²⁸ Cūriteimi voi yandusa serācua opacatu ivi Galilea rupi.

Jesús ombogüera Pedro rembireco si

²⁹ Jesús yuvinoiese tūparo sui, yuviraso Santiago, Juan rese Simón, Andrés rētave. ³⁰ Aheve Simón rembireco si sohí iteanga vupave ou. Evocoiyase omombehu Jesús upe imbaherasisa yuvireco. ³¹ Ahese oso chupe oipisi ipo rese imopuha, ahe ramoseve, sohí opituhu ichui. Ipare voi ahe cuña ihañeco semihura rese.

Jesús setá ombogüera ava imbaheasi vahe

³² P̄tu ramosē opacatu imbaheasi vahe iyavei caruguar vireco vahe yuvireco chupe imbogüera āgua. ³³ Opacatu ava ahe tecua pendar oñemonuha oquendip̄ive yuvireco. ³⁴ Evocoiyase setá ombogüera mbaherasi-rasí t̄ei vireco vahe, iyavei omboyepepi setá caruguar ava sui. Ndoipotai rumo caruguar ñehe. Esepia, ahe oicua ité evocoiya seco yuvireco.

Jesús Vu Tūpa Ñehengagüer omombehu judío tūparo rupi

³⁵ Ayihiteve Jesús oñarapuha oso ava porēhisave oyeroqui āgua. ³⁶ Evocoiyase Simón ondugüer reseve yuviraso seca. ³⁷ Osepiase,

—Opacatu ava nde reca t̄ei yuvireco —ehi yuvireco chupe.

³⁸ Ahe rumo,

—Yaso ambuae tecua namombrii vahesa rupi Tūpa Ñehengagüer mombehu āgua aheve; evocoi nungar apo āgua niha che ayu —ehi.

³⁹ Ègue ehi oguata opacatu Galilea ivi rupi, omombehu Vu Tūpa Ñehengagüer judío tūparo yacatu rupi oico, iyavei setá omose caruguar ava sui.

Jesús ombogüera mbia lepra vireco vahe

⁴⁰ Ñepei mbia lepra rerecosar oyemboya Jesús rese, oñenopīha sovai aipo ehi:

—Ereipotase, iya nde che mbogüerami eve —ehi.

⁴¹ Iparaisuerecosave opoco sese.

—Aipota. ¡Erecuerara cūritei! —ehi chupe.

⁴² Aipo ihe ramoseve, ocuera voi eté. ⁴³ Ahese aipo ehi iri chupe icho renondeve:

⁴⁴ —Aní chira eremombehu ambuae ava upe, esoño ipa voi pahi upe nde cuerasa mombehu, iyavei eremondora porerecosa nde cuerasa resendar Moisés porocuaita rupi. Evocoiyase toicua opacatu ava yuvireco nde cuerasa —ehi chupe viña.

⁴⁵ Ahe mbia rumo oso omombehu-mbehu opacatú ava upe. Sese Jesús ndoicatu iri güeique āgua güecocuer mombehuse tecua rupi; secoiño t̄ei tecua popi rupi ava porēhisave. Ava rumo yugüeruño ité opacatu tecua rupindar sepia.

2

Jesús ombogüera ava ndoguatai vahe

¹ Ñepei ari p̄ipe Jesús oyevi ou tecua Capernaum ve, ahese opacatu oyandu ñepei oive secoise yuvireco. ² Cūriteimi voi eté setá ava oñemonuha yuvireco secosave. Sese ndipoi eté ava reique iri āgua oi pipe oquendipi rupi. Ahe rumo omombehuño ité Vu Ñehengagüer. ³ Aheseve irungatu mbia viroyepota

ndoguatai vahe yuvireco chupe. ⁴ Ahe rumo ndiyai seroique ãgua Jesús uve ava rehiisave yuvireco. Sese viroyeupi oi haríve seraso yuvireco. Aheve teca virocua oi sui yuvireco; supi viroyi supa reseve imondo Jesús rovai tupri yuvireco. ⁵ Ahe oicuase co mbia yuvirecoi vahe oyese yeroya, aipo ehi imbaheasi vahe upe:

—Che rahir, che ñero nde angaipa rese ndeu —ehi.

⁶ Moisés porocuaita rese oporombohe vahe rumo ipihañemoñeta aheve yuvinoi: ⁷ “¿Mahera co mbia aipo ehiño tēi oñehe? Ahe oyemboivate ai tēi vahe Tūpa ñehe nungar pipe tēi oñehe. Tūpaño ité niha oicatu ava angaipa upe oñeroi ãgua” ehi. ⁸ Ahe rumo oicuaño ipihañemoñetasa, sese aipo ehi:

—¿Mahera vo pepihañemoñeta rai tēi che rese? ⁹ ¿Uma rupi vo ñehesa ndayavaimi catu ndoguatai vahe upe: “Nde angaipa rese che ñero ndeu” hesa pīha, anise: “Eñarapuha, esupi nde rupa, eguata” hesa tie? ¹⁰ Tapeicua ru che, Ava Riquehir, areco mborerecuasa co ivi pipe ava angaipa upe che ñero ãgua —ehi.

Evocoiyase aipo ehi imbaheasi vahe upe:

¹¹ —Eñarapuha, esupi nde rupa, eso nde rētave —ehi.

¹² Imbaheasi vahe aipo ihe ramoseve, oñarapuha, osupi vupagüer, osẽ oso ichui opacatu ava rembiepiave. Sese opacatu oyepihamondii yuvireco, omboetei Tūpa yuvireco aipo ehi:

—Yipisuive ndayasepiai vahe ité co nungar mbahe —ehi tēi yuvireco.

Jesús oñehe mbia Leví serer vahe upe

¹³ Ipare Jesús oso iri ipa ivii. Aheve oporombohe oyese ava rehii yemboyase. ¹⁴ Ichui oguata vitese, osepia Leví, Alfeo rahir, guarepochi rerocuasave chinise, aipo ehi chupe:

—Erio che rupi —ehi.

Evocoiyase Leví opūha, oso voi supi.

¹⁵ Ipare ocaru Leví rētave güemimbohe reseve yuvireco, ava sui guarepochi rerocuasar iyavei ava yangaipa vahe pāhuve. Esepia, setá ava osaquicue moñaño ité yuvireco. ¹⁶ Evocoiyase Jesús ocaruse ipāhuve, fariseo eta, oporombohe vahe Moisés porocuaita rese avei oporandu semimbohe eta upe yuvireco:

—¿Mahera ru pe mbohesar ocaru ava guarepochi rerocuasar iyavei yangaipa guasu vahe pāhuve tēi? —ehi.

¹⁷ Ahe rumo osenduse iñemoñetasa, aipo ehi chupe:

—Ava nimarai vahe ndosecai eté oporoposano vahe, imbaheasi vaheño rumo oseca yuvireco. Che ndayui ava seco tupri vahe reca; che rumo ayu ava yangaipa guasu vahe reca —ehi.

Yecuacula rese ñehesa

¹⁸ Ñepei arí pipe Juan Oporoāpiramo vahe remimbohe oye-cuacu yuvireco, fariseo eta avei oyecuacu yuvireco no. Evocoiyase moviro mbia ipáhu pendar yuviraso, oporandu Jesús upé:

—¿Mahera ru nde remimbohe ndoyecuacui eté yuvireco? Esepio, Juan remimbohe iyavei fariseo eta oyecuacu yuvireco yepi —ehi yuvireco chupe.

¹⁹ Evocoiyase omboyevi ahe ava upé:

—¡Ndiyai eté ichohopri mendasave iynecuacu água imer oicove vitese ipáhuve! ²⁰ Oimera rumo arí imer reraso água ichui curi, ahese ramo oyecuacura yuvireco cute —ehi.

²¹ “Ndiyai yayapete turucuar cuacula turucuar ipiasu vahe pipe. Esepio niha, ipiasu vahe oichohó turucuar cuacula imondoro iri água, ichorosa evocoiyase tuvicha catu-catuno ité. ²² Iyavei uva ricuer ipiasu vahe ndiyai iñasa mbahe pirer cuacula pipe. Esepio, uva ricuer ipiasu vahe osose mbahe pirer cuacula vahe pipe, ombopuñora, uva ricuer evocoiyase ocañipa tēira, iyavei mbahe pirer ocañi tēi aveira. Sese uva ricuer ipiasu vahe ñoñasara mbahe pirer ipiasu vahe pipe yepi” ehi.

Jesús remimbohe oipoho trigo mbituhusa arí pipe yuvireco

²³ Ñepei mbituhusa arí pipe, Jesús oguata güemimbohe rese trigo pāhu rupi fariseo rembiepiave yuvireco. Ahese semimbohe oipoho-poho sāhii yuvireco. ²⁴ Evocoiyase fariseo aipo ehi:

—¿Mahera nde remimbohe mbituhusa arí pipe oporaviquiño yuvireco! —ehi yuvireco chupe.

²⁵ Ahe rumo aipo ehi:

—Peyeroqui niha icuachiapri aracadendar pipe mborere-cuar guasu David rembiapogüer rese acoi ndasiepoise on-dugüer reseve yuvireco aracahe. ²⁶ Pahi rerecuar ivate catu vahe Abiatar serer vahe recose, ahese David oique Tūpa rēta pipe pan imboeteipri Tūpa upendar reca ondugüer reseve yuvirohu água. Ahe chupe acoi ndipotasaki ihu água yuvireco viña; judío pahi yuvirecoi vahe upeno ité niha ipotasa ihu água yepi. Ahe rumo ohuño, omondo avei ava oyeupindar tohu aracahe —ehi.

²⁷ Iyavei aipo ehi:

—Mbituhusa arí yaposa ava upé nara, ndahei ava yaposa mbituhusa arí upé nara. ²⁸ Sese Ava Riquehir mbituhusa arí rerecuar secoi —ehi Jesús fariseo upé.

3

Mbia ipo nomii vahe Jesús ombogüera

¹ Jesú斯 oique iri judío tūparove. Aheve oime mbia ipo co cotigüer nomii vahe. ² Aheve avei fariseo ‘¿ombogüerara pīha mbituhusa ari pipe?’ oya omahengatu yuvireco sese ‘yaiñehengapo angahu’ oyapave tēi. ³ Evocoiyase Jesú斯 aipo ehi co mbia ipo nomii vahe upe:

—Epūha ore mbiterve —ehi.

⁴ Ipare oporandu ambuae upe:

—¿Mbahe vo yaposara mbituhusa ari pipe yepi: mbahe aviye vahe pīha, mbahe naporai vahe tie? ¿Yaipísiro pīha ava recocuer, yamocañi uca tēi tie? —ehi chupe.

Ahe rumo opaño iquiriri tupri yuvireco. ⁵ Evocoiyase omahe ava oyese oyere tupri vahe rese voriñhisave iyavei ndovihai ava ndosenducua catuise yuvireco. Sese aipo ehi ipo nomii vahe uve:

—Eichoho nde yiva —ehi.

Evocoiyase oichoho oyiva, ocuera tupri ité. ⁶ Ahese fariseo opa yuvínose yuvíraso oyemoingatu Herodes rupindar rese Jesú斯 yuca água yuvireco.

Ava rehii ipa popi rupi yuvirecoi

⁷ Ipare Jesú斯 yuvíraso güemimbohe reseve ipa popi rupi, ava rehii avei ivi Galilea rupindar yuvíraso supi. ⁸ Oyanduse mbahe sembiapo yuvireco, setá avei ambuae ava yugüeru Judea rupindar, Jerusalén pendar, Idumea rupindar, iai Jordán cotindar avei, opacatu ava Tiro, Sidón pendar yugüeru sephia água. ⁹ Sese oyocuai güemimbohe vireco voi vaherā ñepei carite yuvireco ava omboti etepriñhi água yuvireco. ¹⁰ Esepia, setá imbaheasi vahe ombogüera. Sese opacatu ambuae imbaheasi vahe yuvíraso chupe sese opoco água.

¹¹ Iyavei ava caruguar vireco vahe sepiase, oñenopiha sovai, oñehe pucu-pucu yuvíraso:

—¡Nde Tūpa Rahir ereico! —ehi.

¹² Jesú斯 rumo oñehe pírata chupe: “Che mombehui rene ava rovaque peye” ehiño imondo.

Jesú斯 oiporavo doce tupri güemimboherā

¹³ Ipare Jesú斯 oyeupi ivitri rese oso. Aheve ava viroyasar upe oñehe iporavo água güemimbotar rupi. Ichui oyugüeru yuvíraso chupe. ¹⁴ Ahe ipāhu pendar osenoí doce tupri güemimboherā ‘togaataño che rupi, tomombehu Tūpa Nehengagüer opacatu ivi rupi’ oya. Ahe osero “apóstol” ¹⁵ ‘toipisi avei mborerecuasa caruguar ava sui imboyepepi água yuvíraso’ oyapave. ¹⁶ Evocoí doce yuvíreas vahe, ahe: Simón (sererguã acoi omundo Pedro), ¹⁷ Santiago iyavei tivri Juan Zebedeo rahir, ahe avei omundo sererguã Boanerges (‘osunu vahe rahir’ oya aipo ehi); ¹⁸ iyavei Andrés, Felipe,

Bartolomé, Mateo, Tomás, Santiago Alfeo rahir; Tadeo, Simón, ava güecua rese secatēhi vahe pāhu pendarer; ¹⁹ iyavei Judas Iscariote, ahe omondo vaherā Jesús yamotarēhisar upe.

“Jesús caruguar pīratasa vīreco oyese” ehi tēi ava yuvīreco

²⁰ Ipare Jesús oique oi pipe güemimbohe reseve. Aheve oñemonuha ati irise ava yuvīreco sese, ndiyai icaru ãgua yuvīreco. ²¹ Oyanduse imu secocuer yuvīreco, oyugüeru seraso ãgua ‘ndayaracua iri revo’ oya.

²² Iyavei oporombohe vahe Moisés porocuaita rese oyugüeru vahe Jerusalén sui aipo ehi: “Co mbia caruguar rerecuar Beelzebú oyocuai vahe, ipīratasa pipe tēi omboyepepi caruguar ava sui” ehi yuvīreco.

²³ Evocoiyase Jesús omombehu caruguar recocuer aipo ehi: “¿Mara ehira aipo caruguar ahe ae oyeenose ava sui viña? ²⁴ Acoi mborerecuar guasu povri pendar, ahe ovava-vavase oyeupe; evoco nungar mborerecuar pīratasa ocañi tēira. ²⁵ Acoi oñemu oyese ae oyeamotarēhise, oyemboyahose yuvīreco viña, ahe ndipocopii chiaveira yuvīreco. ²⁶ Acoi caruguar oyemboyahose ovava ãgua oyeupe ae yuvīreco, ndipocopii chiaveira yuvīreco, ahe evocoiyase secocuer ocañi tēi vaherā ité yuvīreco.

²⁷ “Ndipoi eté niha ava oique vahe que ava ipīrata etepri vahe rēta pipe imbahe rerocuapa ãgua ichui; oñapichi rane itera. Ipare voi opara imbahe virocua ichui.

²⁸ “Supi eté aipo ahe pēu: Acoi ava yangaipa vahe upe Tūpa iñerora opacatu yangaipa rese, iñehe-ñehe tēisa rese avei. ²⁹ Acoi iñehe-ñehe tēi vahe rumo Espíritu Santo rese, ahe chupe ndipo iri chietera ñerosa apirēhi vaherā ité” ehi.

³⁰ Aipo ehi Jesús imboyeví ava upe. Esepia, “Caruguar tēi erereco” ehiño ava yuvīreco chupe.

Jesús si, tivīreta avei

³¹ Coiye opa oyepota Jesús rivireta iyavei ichi; ahe rumo opitaño ocarve yuvīreco. Ichui omondo oñehe yuvīreco chupe oyeupe ichē ãgua. ³² Yivii yuvīnoi vahe oñehe yuvīreco chupe:

—Nde si, nde rivireta, nde reindri reseve ocarve nde reca tēi yuvīreco —ehi.

³³ Ahe rumo,

—¿Ava pīha che si; ava pīha che rivireta yuvīrecoi? —ehi.

³⁴ Evocoiyase omahe ava oívirindar yuvīnoi vahe rese aipo ehi iri chupe:

—Co che si eta; co che rivireta. ³⁵ Esepia, acoi Tūpa remimbotar oyapo vahe yuvīreco, ahe che rivri, che reindri, che si avei yuvīrecoi —ehi.

4*Mbahe miti sui yembohesa*

¹ Jesúś oporombohe iri ipa popi rupi. Aheve ava rehii oyemboya yuvireco sese. Ipare oha carite imbehive tui vahe pipe. Aheve oguapi oñi oñehe. Ava rumo opacatu ivi ãtasa rupi opitaño yuvireco. ² Evocoiyase ava mbohe água omboyoya tecocuer mbahe tísā rese aipo ehi:

³ “Pesendu co ñehesa: Ñepei mbia osē omaheti. ⁴ Ahe otiapi-apiise mbahe rāhii oso, moviro oviapi peri rupi. Virai yugueruse rumo, opaño yuvirohu. ⁵ Iyavei moviro oiti ivi nayanai vahe save, ita pāhuve. Sese cūriteimi sori. ⁶ Ari tasise rumo, opaño ipiru. Esepia, ndasapoi niha. ⁷ Iyavei ambuae mbahe rāhii oiti yu pāhuve; ahe yu rumo sorí poyava catu. Sese opaño oyopi. Evocoiyase ahe miti ndihai eté. ⁸ Ambuae mbahe rāhii oiti ivi avíye vahe save. Ahe opa ocuacua miti, iha tupri ai yuvireco: amove iha treinta tupri ohi rese, amove sesenta, amove cien tupri ité oha vireco” ehi.

⁹ Evocoiyase, “Acoi osendu pota vahe che ñehe, toyapisacaño sese” ehi Jesúś ava rehii upe.

¿Mahera pīha co yembohesa imboyoyasa ambuae mbahe rese?

¹⁰ Ipare Jesúś opita ahe ae. Ava opita vīte vahe semimbohe eta reseve oyemboya yuviraso sese oporandu yuvireco chupe, “¿Mara oya vo co yembohesa aipo ehi?” ehi yuvireco chupe. ¹¹ Ahe aipo ehi: “Pēu niha Tūpa oicua uca mbahe ndicuasai vahe omborerecuasa resendar. Ndache reroya potai vahe upe rumo imboyoyasa mbahe ambuae mbahe rese yepi. ¹² Yepe osepia tēira, ndosepiacuai chietera rumo yuvireco. Iyavei yepe osendu tēira, ahe rumo ndosenduacuai chietera yuvireco, Tūpa upe oyevi potaēhisave, ipipe sui ndipoi chira ñeroisa yuvireco chupe” ehi.

Jesúś omombehu tupri yembohesa mbahe tísā resendar

¹³ Iyavei aipo ehi: “¿Ndapesenducuaimi vo aipo porombohesa? ¿Mara peyera ru opacatu ambuae che porombohesa cua tupri água? ¹⁴ Evoco mbahe rāhii oñoti vahe, Tūpa Ñehengagüer mombehusar nungar. ¹⁵ Amove ava recocuer inungar co mbahe rāhii seitipri peri rupi: osendu angahu Tūpa Ñehengagüer. Sendu pare rumo, ou Caruguar ovirocuapaño oique vahe ipiha pipe ichui. ¹⁶ Ambuae ava recocuer inungar mbahe rāhii seitipri ita pāhu rupi: osendu Tūpa Ñehengagüer, oipisi tupri angahu oyeupe nara vorivetesa pipe; ¹⁷ ndovirecoi rumo guapo oyese opírata água. Evocoiyase yuvirecoise mbahe-mbahe tēi pipe Tūpa Ñehengagüer sui tēi, cūriteimi

seroyaēhisave, ‘Apaira ichui’ ehi yuvireco. ¹⁸ Ambuae ava recocuer inungar mbahe rāhii ñotimbrí yu pāhu rupi: osenduse ñehesa Tūpa suindar, ¹⁹ ahe rumo ipihañemoñeta catu opacatu ombahe eta co ivi pipendar rese saisusave. Oyembopa uca rumo ombahe eta upe. ‘Opacatu ité mbahe tareco’ ehi tiête viña. Ipipe sui omocañi tēi Tūpa Ñehengagüer. Ndoyapo ucai avei mbahe eta aviye vahe evocoí nungar ava upe. ²⁰ Ambuae ava rumo osendu vahe Tūpa Ñehengagüer seroyasa piþe, oyapoño ité mbahe aviye vahe. Ahe inungar mbahe rāhii ñotimbrí ivi aviye vahe rese: amove vireco ohi rese treinta, ambuae sesenta, ambuae cien” ehi.

Tataendi resendar porombohesa

²¹ Iyavei aipo ehi: “¿Serecosa vo tataendi mbahe riruvrīve nara tēi iyavei yande rupavrīve nara tēi no? Aní, tataendi imondosa ivate poroesape água. ²² Ndipoi chietera mbahe ñomipri ndayasepiai vaherā curi. ²³ Acoi osendu pota vahe che ñehe, toyapisacaño yuvireco sese” ehi.

²⁴ Iyavei aipo ehi: “Peyapo catu mbahe pesendu vahe. Pe rembiapo nungar rupi tupri asenducua ucara che ñehe pēu. Ihariñe amondo iri catura pēu. ²⁵ Vireco tupri vahe upe, imondosa catura. Acoi ndovireco tuprii vahe sui, serocuasañora” ehi.

Yembohesa mbahe rāhii rorisa resendar

²⁶ Aipo ehi iri avei Jesú: “Tūpa mborerecuasa co ivi piþe inungar que ava oñoti vahe mbahe rāhii. ²⁷ Omaheti pare, oso oque. Ipare coiye catu oñarapuha. Ahe oñocua pítu, ari avei, evocoiyase mbahe rāhii sorí poyava yuvireco. Itísar rumo ndoicuai mara ehi vori. ²⁸ Iví rese niha oyesu mití: yipindar sorí, ipare iha, ipare sähii yuvinose sese. ²⁹ Evocoiyase co mbia mbahe ha yaviyese, oipoho. Esepia, oyepota ari ipoho água chupe” ehi.

Yembohesa mostaza rāhii suindar

³⁰ Iyavei aipo ehi: “¿Mara ehi vo Tūpa povri pendar co ivi piþe pēu; mbahe rese píha iyacatu imboyoyasa icua água? ³¹ Ahe oyoya tupri mostaza rāhii rese. Ahe tahimi catu opacatu ambuae mbahe rāhii sui. ³² Ñotí pare rumo, sorí, ocuacuase tuvichá catu ambuae mbahe mití sui. Säca tuvichá ité, sese vĩrai oyemboaití sovri rupi yuvireco” ehi.

Jesús oporoyoya ambuae mbahe rese oporombohe yepi

³³ Ëgue ehi Jesú oporombohe Tūpa Ñehengagüer rese, omboyoya-yoya ñepei mbahe ambuae mbahe rese ava mbahecuagüer rupi. ³⁴ Nomombehui eté mbahe ambuae mbahe rese imboyoyaëhi piþe. Ahe rumo omombehu tupri güemimbohe upe ahe aemi yuvirecoise.

Jesús omombítuhu i ohitu vahe, ivit u ai reseve

³⁵ Ahe ari pipe pítu ramomise, aipo ehi güemimbohe upe:

—Yaso ipa rovai —ehi.

³⁶ Evocoiyase ava sui osiri yuvireco, yuviraso carite pipe. Ambuae carite pipendar avei yuviraso supi. ³⁷ Oyeptase rumo ivit u ai ipírata vahe, i ohitu vahe oha guasu-guasu carite pipe, omboapipo seni yuvireco chupe. ³⁸ Jesús rumo oyeatocoño, oque ou supita coti. Evocoiyase omomahe voi yuvireco, aipo ehi chupe:

—¡Porombohesar! ¿Nandemahemohaimi rutei vo yande rese?
¡Opara moco yaso ipive! —ehi.

³⁹ Evocoiyase aipo hese, omahe, oñehe pírata ivit u ai upe, ipa upe avei:

—¡Pepituhu! —ehi.

Aheseve voi opituhu tupri. ⁴⁰ Ipare aipo ehi güemimbohe upe:

—¿Mahera pesiquiyé iteanga? ¿Ndapeyeroya vitei vo che rese?
—ehi.

⁴¹ Ahe rumo osiquiyepave oporandu-randu oyeupe yuvireco:

—¿Ava píha co mbia secoi? Esepia niha, ivit u ai, ipa avei omboyeroya —ehi tēi yuvireco chupe.

5

Mbia Gerasa iguar vireco vahe caruguar oyese

¹ Jesús güemimbohe reseve oyepota ipa rovai Gerasa ivi rese yuviraso. ² Yuvinose pare carite pipe sui, ahese mbia caruguar rerecosar tuvípa pāhu rupi secoi vahe oso Jesús upe. ³ Co mbia tuvípa pāhu rupi secoi vahe yepi. Ndipoi eté ava secopisar, carena avei eté opa-opaño omondoso. ⁴ Setá yupagüer rupi tēi ñapichisa carena pipe ipi, ipo rupi avei yepi. Ahe rumo opa-opaño ité omondoso carena yepi. Ndipoi eté ava osecoreroyi vahe. ⁵ Ari, pítu rupi oguata, osapucai oico ivitri mahugüer rupi, tuvípa mahugüer rupi avei; ocua-ocua ita pipe oyese yepi. ⁶ Amombri Jesús repia ramoseve, oña senonde oñenopiha voi sovai, ⁷ oñehe pírata chupe:

—¡Eyepepi che sui Jesús, Tūpa seco ivate catu vahe Rahir!
¡Aporandu Tūpa rer pipe che mombaraisuëhi água eve! —ehi.

⁸ Aipo ehi, esepia, yipindar Jesús aipo ehi chupe:

—¡Caruguar mbahe tēi vahe, esē co mbia sui! —ehi chupe.

⁹ Aheve oporandu chupe:

—¿Mara vo nde rer? —ehi.

Ahe omboyevi chupe:

—Che rer Legión. Esepia, ore rehii eté —ehi.

¹⁰ Oporanduño chupe omondopaëhi ãgua co ivi sui. ¹¹ Ichui namombrëimi setá cuchi ocaru vahe ivitri rese yuvireco. ¹² Sese caruguar oporandu yuvireco chupe:

—Ore mondopaño cuchi avíterve eve —ehi yuvireco.

¹³ Evocoiyase Jesús omondo caruguar së ãgua ahe mbia sui. Ahe opa yuviroique cuchi avíterve. Ahe cuchi retacuer dos mil tupri vahe, ahe yuvinoña yuviraso ivivate sui ipa pipe ocañipa.

¹⁴ Evocoiyase cuchi rärosar yuvinoña osiquiyepave yuviraso imombehu ãgua tecuave, caha pipe rupi yuvirecoi vahe upe avei. Sese ava opa yugüeru sepia ‘¿mbahe pña?’ oya yuvireco. ¹⁵ Oyepotase Jesús recosave, aheve osepia mbia caruguar vireco vahecuer yuvireco oyemonde tuprise oñ, yaracua tuprise avei. Ahese oyembosiquiye tēi yuvireco. ¹⁶ Mbahe oime vahe caruguar vireco vahe rese, cuchi rese avei, ahe sepiasar omombehupa ambuae ava upe yuvireco. ¹⁷ Evocoiyase ava Jesús upe: “Esē cohabe sui” ehi yuvireco.

¹⁸ Oha irise Jesús carite pipe, co mbia caruguar rerecosarer oporandu chupe supi oso ãgua. ¹⁹ Ahe rumo,

—Esoño nde rētave, nde mu piri. Aheve emombehupa Yar oporoaisusa pipe mbahe oyapo vahecuer nde rese —ehiño chupe.

²⁰ Ahe mbia oso, omombehu opacatu tecua Decápolis rupi Jesús oyapo vahecuer mbahe sese. Evocoiyase ava opacatu, ‘¡Mara ehi rutei!’ ehi tēi yuvireco.

Jesús ombogüera Jairo rayri, iyavei cuña opoco vahe iturucuar rese ombogüera

²¹ Oyevise Jesús carite pipe ipa rovai oso, aheve oñemonuha ati ava yuvireco chupe. Ahe evocoiyase opitaño ipa popive. ²² Evocoiyase oyepota mbia mborerecuar tūparo pendar, ahe serer Jairo. Jesús repiase, oñenopicha sovai, ²³ aipo ehi chupe:

—Che rayri omano pota. Yaso, teremondomi tēi nde po iharive imbogüera ãgua —ehi.

²⁴ Evocoiyase oso supi. Ava rehii avei yuviraso supi.

²⁵ Ipâhuve avei oime cuña doce araviter rupi suvi yepiyereyere vahe. ²⁶ Iparaisú iteanga, setá oporoposano vahe ndoicatu imbogüera yuvireco omomandaivete catu iposanosa pipe yuvireco. Opa tupri tēi omundo mbahe vireco vahe, ivate catuño rumo imbaherasisa chupe. ²⁷ Co cuña osenduse Jesús rese ñehesa, oguata saquicuei oso ava rehii pâhuve, iturucuar rese opoco. ²⁸ Aipo ehi oyeupe oico: “Iturucuar rese apocese rumo, acuerara” ehi. ²⁹ Ahe ramoseve voi ndasuví yepiyere iri. Ipare oyandu güetecuer yemoingatu tuprisa, ocuerase ombaherasisa sui. ³⁰ Jesús rumo oyandu osése opíratasa oyesui. Sese omahe guaquicuei coti ava rese, ahese oporandu:

—¿Ava vo opoco che turucuar rese? —ehi.

³¹ Semimbohe omboyevi yuvireco chupe:

—¿Nderemahei vo ava oyere tupri yuvireco nde rese? ¿Mahera ru, ‘¿Ava vo opoco che rese?’ ere iri? —ehi yuvireco chupe.

³² Ahe rumo omaheño vité ité ava oiviindar rese ‘¿uma ité pīha opoco che turucuar rese?’ oya. ³³ Evocoiyase co cuña oicuase mbahe oyesendar, oyembosiquiye. Ipare oso sovai, oñenopiha, ahese opacatu mbahe supi vahe omombehu chupe. ³⁴ Evocoiyase Jesús aipo ehi chupe:

—Che rayri, erecuera cūritei nde yeroyasa pipe. Eso tupri. Esepiá niha, erecuera nde mbaherasisa sui —ehi chupe.

³⁵ Iñehe viteseve, oyepota moviro Jairo rēta pendar tayri mano mombehu yuvireco:

—Omano ité nde rayri. Aní eremañeco tēi vité Porombohesar —ehi yuvireco chupe.

³⁶ Ahe rumo Jairo upe aipo ehi:

—Aní eresiquiye. Eyeroya catuño —ehi.

³⁷ Ndoipotai rumo ambuae ava oyeupi icho água; Pedro, Santiago, Juan güeraño oipota. ³⁸ Oyepotase Jairo rētave, osepiá ava yemondii oyaseho vahe. ³⁹ Ichui oiquese oí pipe, aipo ehi:

—¿Mahera vo perāse guasu tēi peyaseho peyu? Co cuñatai nomanoi, oque tēi ou —ehi ava upe.

⁴⁰ Ava rumo opucaete-eteño seroyaëhisave yuvireco. Evocoiyase omose opacatu ava. Ipare omoingue iyesupa, ichi, oyeupindar reseve cuñatai rehōgüersave. ⁴¹ Ipare oipopisi aipo ehi:

—Talita, cum —ehi chupe ('cuñatai, eñarapuha, ahe ndeu' ohesave aipo ehi).

⁴² Ahe ramoseve voi cuñatai doce araviter vahe oñarapuha, ipare oguata. Sepiase ava, oyembosiquiye guasu yuvireco.

⁴³ Jesúz rumo oyocuai imombehuëhi água ambuae ava upe. Ipare,

—Pembocaru co cuñatai —ehi.

6

Jesús Nazaret ve secoi

¹ Jesúz osẽ co tecua sui oso güecuave; semimbohe avei yuviraso supi. ² Oyepotase mbituhusa ari, ahese oporombohe tūparo pipe. Setá ava iñehe rendusar oyepihamondiisave oporandu-randu yuvireco:

—¿Que sui vo co ava oicuapa opacatu mbahe? ¿Que sui pīha vinose co mbahecuada co poromondiisa apo água? —ehi yuvireco oyeupe—. ³ Co niha carpintero, María membrí;

Santiago, José, Judas iyavei Simón riquehir, seindri avei yuvirecove yande pāhuve –ehi.

Sese ndoviroyai yuvireco.⁴ Jesús rumo aipo ehi ahe ava eta upe:

—Tūpa ñehe mombehusar avei niha ava omboetei opacatu rupi yuvireco yepi, imu sēta pipendar ae rumo nomboetei yuvireco –ehi.

⁵ Ndoicatui mbahe oporomondii vahe apo āqua ava viroyaēhisa pīpe, sese moviro tēi imbaheasi vahe harive omondo opo imbogüera āqua. ⁶ Ndoyembovihai ava viroyaēhisa rese.

Jesús oyocuai güemimbohe Tūpa mborerecuasa mombehu āqua

Ipare Jesús oso, oguata tecua-tecuami namombrii vahe rupi oporombohe oico.

⁷ Evocoiyase, “Perio” ehi güemimbohe doce vahe upe. Ipare oyocuai ñuvirío-río, iyavei omondo güeco pīratasa caruguar mboyepipi āqua chupe.

⁸ —Ndaperasoí chira rumo mbahe peguataso rupi, pe pococa güeraño ité perasora –ehi—. Ndiyai avei peraso mbahe rīru, pan, guarepochi avei. ⁹ Iyavei pemondera pītaqui güeraño. Ndapemondugüei chiaveira pe camisa seraso.

¹⁰ —Que pesosave peiqueso oí pīpe, pepitaño ipīpe, ichuive tupriño ité pesēra pecua. ¹¹ Acoi ambuae tecua pendar ndape pīsi potaise, ndosendu potaise avei pe ñehe yuvireco, peyepepiñora ichui. Peipipeteño aveira pe pī ivi rātachigüer sui. Ëgüe pe hesa omboyeecuara cañisa apirēhi yuvireco chupe –ehi.

¹² Evocoiyase semimbohe eta yuviraso, “Pemboasi pe angaipa, peyevi Tūpa upe” ohe āqua yuvireco. ¹³ Iyavei setá omboyeepipi caruguar ava sui, setá avei omondo mbahe quira ava imbaheasi vahe rese imbogüera āqua yuvireco.

Juan Oporoāpiramo vahe mano agüer

¹⁴ Mborecuar guasu Herodes oyandu ñehesa Jesús resendar, iyavei opacatu rupi oicua yuvireco. Sese Herodes aipo ehi:

—Juan Oporoāpiramo vahe revo ocuerayevi. Sese oyapo poromondiisa ipīrata vahe –ehi.

¹⁵ Ambuae rumo,

—Tūpa ñehe mombehusar Elías mo evocoí –ehi yuvireco.

Ambuae evocoiyase,

—Tūpa ñehe mombehusar aracahendar mo evocoí –ehi yuvireco.

¹⁶ Osenduse Herodes co nungar ñehesa, aipo ehi:

—Juan ité niha evocoí che añaca asia uca vahecuer, ahe cūrитеi ocuerayevi —ehi.

¹⁷ Herodías recocuer sui tēi niha Herodes Juan oñapichi uca carena pípe soquenda. Esepiá, co cuña Herodías yipindar Felipe rembireco, co Felipe Herodes rivri viña. Herodes rumo omendaño vivri rembireco rese. ¹⁸ Juan aipo ehi Herodes upe: “Ndiyai eté nde ererecora nde rivri rembireco” ehi.

¹⁹ Herodías evocoiyase oyuca pota Juan yamotaréhísave; ndoicatui rumo yuca. ²⁰ Esepiá, Herodes osiquiyeño ichui oicuase co mbia reco tupri aisa iyavei seco maranehise. Sese osepi ité; yepe ndoyembohe catui osenduse iñehe viña, ahe rumo osendu pota raiño ité. ²¹ Coiye rumo osupiti arí Herodías remimbotar apo água, ahese Herodes oharagüer pípe oyapo carusa guasu mborerecuareta rese, ava Galilea pendar icuapri ivate catu yuvirecoi vahe rese avei. ²² Herodías membrí cuñatai oique carusave. Aheve opivoi ava rovaque. Ipivoisa aviye ai Herodes upe, ambuae ava ocaru vahe upe avei. Ichui aipo ehi cuñatai upe:

—Eporandu mbahe nde remimbotar rese cheu, che evocoiyase amondora ndeu —ehi.

²³ Ipare aipo ehi iri opacatu ava rovaque chupe: “Amondora nde remimbotar ndeu, anise, che mbahe eta amboya-hora ndeu” ehi. ²⁴ Ahe cuñatai osé oso, osí upe oporandu:

—¿Mbahe rese píha aporandura chupe? —ehi.

Ichi aipo ehi chupe:

—Eporandu Juan Oporoápiramo vahe áca rese —ehi chupe.

²⁵ Ipare cuñatai oña, oique oso mborerecuar guapisave, aipo ehi chupe:

—Che aipota co pípeve voi eremboura Juan Oporoápiramo vahe áca poratu pípe cheu —ehi.

²⁶ Mborerecuar rumo ndoyembovihai tēi. Esepiá, ava ichohopri rovaque ité yipindar oñehe. Sese ndoicatui, “Aní” ohe água. ²⁷ Evocoiyase ipare voi mborerecuar oyocuai sundao Juan áca reru água. ²⁸ Sundao oso soquendasave, oyasia Juan áca, seru poratu pípe. Mborerecuar omondo co cuñatai upe, evocoiyase cuñatai omondo osí upe.

²⁹ Oyanduse Juan remimbohe, yuviraso setecuer reca. Ipare viraso yuvireco tuvipave yapocatu.

Jesús oyopoi cinco mil cuimbahe

³⁰ Co pare, apóstol oñemonuha Jesús piri yuvireco. Ipare omombehu mbahe güembiapogüer, oporombohe agüer avei yuvireco chupe. ³¹ Ahese aipo ehi oapóstol upe:

—Perio cohabe, yaso, yapituhumi rane co cotí —ehi.

Esepiá, oyepindecuaño ité ava yugüeru chupe, sese ndiyai icaru água yuvireco. ³² Evocoiyase ahe güeraño apóstol reseve

yuviraso carite pipe co coti ava sui. ³³ Setá rumo ava osepio ichose. Ichui opacatu ava tecua rupindar osaquicue moñaño; ahe ranengatu oyepotapa yuvireco ichui. ³⁴ Ogüeyise rumo carite pipe sui, osepio ava rehi, ahese iparaisu ava eta chupe, inungar ovesa ndovirecoi vahe guārosar. Ipare ombohe opacatu mbahe rese. ³⁵ Caharuse rumo, semimbohe oyemboya yuvireco sese, aipo ehi yuvireco chupe:

—Caharu etepri moco, iyavei ndipoi oi co rupivemi vahe. ³⁶ ¿Ndiyai vo eremondopa ava tecua-tecuami cōi vahesa rupi? Aheve tovirocua ocaru ãgua yuvireco —ehi yuvireco chupe.

³⁷ Ahe rumo omboyevi:

—Pe pemondora mbahe semihura —ehi.

Semimbohe aipo ehi yuvireco chupe:

—¿Iyacatura p̄ha oreu dosciento denario pan repirā ava mbocaru ãgua? —ehi.

³⁸ Jesús aipo ehi:

—¿Mbovi vo pereco pan? Peso, tapesepia —ehi.

Sepia pare, omombehu:

—Poyandepo pan, ñuvirío pira —ehi yuvireco chupe.

³⁹ Evocoiyase omboyaho-yaho ava imboguapi capihi hari rupi. ⁴⁰ Cincuenta, cien rupi-rupi oyemboyaho yuvireco.

⁴¹ Ichui Jesús oipisi poyandepo pan, ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehi upe imondo ãgua yuvireco. Pira ñuvirío vahe avei omboyaho-yaho opacatu ava upe. ⁴² Evocoiyase opacatu ava ocaru vahe ihitaropa tēi yuvireco. ⁴³ Ipare semimbohe omboapipop a doce tupri iruova pan iyavei pira rumbirer yuvireco. ⁴⁴ Cuimbahe ocaru vahe retacuer cinco mil tupri.

Jesús oguata i hari rupi

⁴⁵ Ipare Jesús, “Peha pe rane carite pipe, pesasa ipa Betsaida ve peso che renondeve. ‘Aviye’ tahe rane ava eta upe” ehi güemimbohe upe. ⁴⁶ “Aviye” ohe pare ava upe, oyeupi oso ivitri rese oyeroqui ãgua. ⁴⁷ Pítuse carite ipa mbiterve ité secoi. Jesús rumo ahe ae opitaño ivive. ⁴⁸ Ahese omahe güemimbohe rese iyeapicui catuēhise. Esepia, ivitu ipirata vahe osovaichi yuvireco. Cōhe potase, oguata i hari rupi güemimbohe coti oso. Aviye ité acoi oñocuaño vaherā oso. ⁴⁹ Sepiase rumo ‘hāgüler tēi revo’ oya, sāse pucu-pucu i hari rupi iguatase semimbohe yuvireco. ⁵⁰ Esepia, opacatu osepiase osiquiye yuvireco ichui. Ahe rumo aipo ehi:

—¡Peyemoviracuaño, che tēi! ¡Pesiquiye eme che sui! —ehi güemimbohe upe.

⁵¹ Ahe ohase carite pipe, opituhi voi iñitu. Evocoiyase, “¡Mara ehi rutei!” ehi tēi yuvireco. ⁵² Esepia, ndoicua vîtei eté pan apo ati agüer yuvireco, yavai vîte seroya ãgua yuvireco chupe.

Jesús ombogüera ava imbaheasi vahe Genesaret pendar

⁵³ Osasase ipa, oyepota Genesaret ivi rese yuviraso, ahe imbehîve oñapichiño carite yuvireco. ⁵⁴ Yuvinosepa ramomiseve, ava oicua voi Jesús yuvireco. ⁵⁵ Ichui opacatu ahe ivi pipendar güeru imbaheasi vahe Jesús upe yuvireco. ⁵⁶ Oyepotase que tecuamive, anise tecua guasuve, caha pipe oi-oími rupi, ahe supi imbaheasi vahe ocar rupi vinosepa voi yuvireco. “Topocomi tēi nde turucuar popi rese” ehi yuvireco chupe. Evocoiyase opacatu sese opoco vahe, ocuerapa voi eté yuvireco.

7

Mbahe omonguiha vahe ava recocuer

¹ Evocoiyase fariseo eta, Moisés porocuaita rese oporombohe vahe avei yugüeru Jerusalén sui oyemboya Jesús rese yuvireco. ² Ahese ahe osepia Jesús remimbohe ocaru ãgua iye-poiëhise porocuaita mboavíyeëhise yuvireco, sese oñemoiro yuvireco chupe. ³ (Esepia, fariseo iyavei opacatu judío eta aracahendar recocuer sui ndipoisai eté yuvireco, sese oyepoiëhise ndocarui eté yuvireco yepi. ⁴ Mbahe rerocuasa sui oyevise, ndocarui oyepoiëhi viteseve yuvireco. Iyavei tecocuer aracahendar tēi oyapo vîte yuvireco inungar igua ríru piisa, mbahe ríru guarepochi apopri iyavei vupa moatiro tuprisa.) ⁵ Sese fariseo eta iyavei Moisés porocuaita rese oporombohe vahe oporandu Jesús upe yuvireco:

—¿Mahera vo nde remimbohe yande ramoi aracahendar recocuer ndoviroya iri yuvireco? Esepia ru, ahe ocaruño opo quiha reseve yuvireco —ehi.

⁶ Jesús rumo aipo ehi chupe:

—Pe Túpa reroyasar angahu tēi peico vahe, supi tupri ité Túpa ñehe mombehusar Isaías rembicuachía aracahendar aipo ehi:

‘Co tecua pendar ava oyuru pipe tēi che mboetei yuvireco; ipihañemoñeta rumo amombri tēi che sui.

⁷ Oyerure tupri tēi yuvireco cheu.

Esepia, iporombohesa ava porocuaita tēi’ ehi.

⁸ Ëgüe peye pepoipa Túpa porocuaita sui ava recocuer aracahendar rupi tēi pe guata ãgua —ehi.

⁹ Iyavei aipo ehi iri chupe:

—Pe ramoi recocuer aracahendar pipe tēi peseyaño co coti Túpa porocuaita. ¹⁰ Esepia, Moisés aipo ehi: ‘Pemboyeroyara

iyavei peip̄it̄iv̄ira pe ru, pe si avei no. Acoi iñehe mara vahe oyesupa upe ahe, Tomanño, ehi' ehi aracahe. ¹¹ Pe rumo aipo peye t̄ei: 'Acoi ava aipo ehi vahe vu upe, osi upe avei no: Ndiyai chira mbahe mundo água p̄eu. Esepi, che opacatu mbahe areco vahe Tūpa upe imondopri, ahe Corbán, ehi' peye; ¹² pe evocoiyase, aipo ehi vahe upe, 'Ndiyai eté oyesupa p̄it̄iv̄i água' peye. ¹³ Co nungar apo pipe Tūpa porocuaita ndaperoyai. Esepi, ndapepoi potai ava recocuer aracahendar sui. Setá mbahe co nungar peyapo vite –ehi.

¹⁴ Ipare, "Perio" ehi iri ava rehii upe.

—Peyapisaca, pesenducua tupri che ñehe: ¹⁵ Ndahei ocar sui t̄ei ou ava recocuer monguiha água. Ahe rumo osē ipiha sui. ¹⁶ Acoi osendu pota vahe che ñehe, toyapisacaño sese –ehi.

¹⁷ Ipare oseyapase ava, oique oí pipe. Aheve semimbohe eta oporandu yuvireco co porombohesa omombehu vahe rese chupe. ¹⁸ Ahe evocoiyase aipo ehi güemimbohe upe:

—Evocoiyase pe avei no, ¿ndapesenducuai? ¿Ndapeicuai vo acoi ocar sui oique vahe ava avíterve nomboangaipai eté? ¹⁹ Esepi niha, ndahei ipihave oso, ahe rumo oso yavíterve. Ipare osē ichui –ehi 'opacatu tembihu aviyeño ité' oyapave aipo ehi.

²⁰ Ipare aipo ehi:

—Ava piha sui osē vahe rumo mbahe, ahe omonguiha ava recocuer. ²¹ Esepi, ava pihañemoñetasa sui osē pihañemoñeta raisa, yemboaguasasa, mondasa, porapichisa, ²² mendasa sui yemboaguasasa, mbahe pota raisa, teco raisa, porombopasa, mbahe t̄ei pota raisa, mbahe rese ñemoñosa, ava rese ñemoñeta t̄eisa, teco ivate aisa, pihañemoñetasa nihivi vahe. ²³ Co mbahe opacatu naporai vahe yuvinose ava sui imboangaipa uca água –ehi.

Cuña ndahei vahe judía viroya Jesús

²⁴ Ichui Jesús osē oso tecua Tiro coti. Aheve oique oí pipe, ndoyecua uca potai ava upe viña; ndoicatui rumo ava sui oñemi. ²⁵ Oime cuña vireco vahe omembri cuñatai, ahe vireco caruguar oyese; ahe cuña oicuase Jesús recosa, oso voi sovai oñenopiha. ²⁶ Ahe rumo ndahei judía, sirofenicia iguar ité. Ahe aipo ehi Jesús upe: "Enose che membra sui caruguar" ehi. ²⁷ Jesús rumo aipo ehi chupe:

—Tahir judío rane toipisi mbahe yuvireco. Esepi, naporai yarocua pan tahir sui cave tohu imondo água –ehi.

²⁸ Co cuña aipo ehi:

—Supi eté, che Yar, cave avei rumo ohuño ité pan rahicuer ovíapi vahe tahir mesavri pendar –ehi.

²⁹ Aipo ihese, aipo ehi:

—Aviye ité nde ñehe. Eyevi eso. Caruguar osẽ nde membrí sui —ehi chupe.

³⁰ Co cuña oyepotase güëtave, osephia omembrí supave; yipive rumo osẽ caruguar ichui.

Jesús ombogüera mbia ndayapisai, iñehe ipiti-piti vahe

³¹ Jesús oyevi oso Tiro ivi sui. Ipare osasa Sidón rupi oso, ambuae tecua eta Decápolis ivi rupi avei. Ichui oyepota ipa Galilea ve. ³² Aheve mbia ndayapisai, iñehe ipiti-piti vahe rerasosar: “Emondomi tēi nde po iharive” ehi yuvireco chupe. ³³ Ichui Jesús vîraso coi cotimi ava sui. Aheve ocuã omonde yapisa pipe. Ipare omondo güendi ñapecu rese. ³⁴ Ipare omahe iva rese, ipituhe pucu aipo ehi: “¡Efata!” ehi (‘timboisa’ ohesave aipo ehi).

³⁵ Ahe pipeve voi yapisa tupri, oñehe tupri avei.

³⁶ “Ndapemombehui chira ambuae upe” ehi ahe mbia upe. Ahe rumo oicua ucaño ité ambuae ava upe yuvireco.

³⁷ Evocoiyase ava oyemboviha guasusave, aipo ehi yuvireco: “Aviye ité rumo mbahe sembiapo. ¡Esephia, ndayapisai vahe omboapisa, iñehe ipiti-piti vahe avei omoñehengatu tupri!” ehi yuvireco.

8

Jesús oyopoi cuatro mil cuimbahé

¹ Ñepei ari pipe setá ava oyemboya iri Jesús rese yuvireco. Ndipoi rumo mbahe icaru ãgua. Sese oñehe güemimbohe eta upe aipo ehi:

² —Iparaisu catu co ava yuvireco cheu. Esephia, mbosapi ari yuvirecoi yande piri, iyavei ndipoi eté mbahe semihura. ³ Amondopase sétave sieporéhi reseve, virovíapi-api tiéterá tieporéhi peri rupi yuvireco viña. Esephia, setami ava yugüeru amombri sui —ehi.

⁴ Semibohe aipo ehi yuvireco chupe:

—¿Mara yahera vo ava tohu mbahe mondo coháve ava poréhisave? —ehi.

⁵ Ahe oporandu:

—¿Mbovi vo pan pereco? —ehi.

—Orovíreco siete pan —ehi semimbohe yuvireco chupe.

⁶ Evocoiyase, “Peguapi ivi harive” ehi ava rehii upe. Ahese oipisi siete pan, “Aviye ndeu” ehi Tüpa upe. Ichui omboyaho-yaho pan imondo güemimbohe upe, semimbohe evocoiyase omundo ava rehii upe yuvireco. ⁷ Iyavei vireco moviro pirami yuvireco, sese avei, “Aviye ndeu” ehi iri Tüpa upe. Ichui güemimbohe upe, “Pemboyaho-yaho ava upe” ehi. ⁸ Opacatu ité ava ocaru vahe ihitaro yuvireco. Ipare rumo semimbohe omboapipo iri rane sumbirer siete iruova yuvireco. ⁹ Ava

rehii ocaru vahe retacuer cuatro mil tupri. Ipare Jesús, "Aviye, peso tupri" ehi ava upe. ¹⁰ Ipare voi eté yuviraso güemimbohe eta reseve carite pipe Dalmanuta ivi rese.

Fariseo eta oporandu poromondiisa rese yuvireco

¹¹ Ipare fariseo eta oyepota Jesús ñehe poepi-epi água yuvireco. Jesús recoáha água, oporandu iva pendar poromondiisa rese '¿Túpa sui eté píha ou?' oya yuvireco chupe. ¹² Sese Jesús ipituhe pucu, aipo ehi:

—¡Mahera vo co ava oipota iva pendar poromondiisa che recocuer cua água yuvireco! Namboye cuai chietera rumo que ñepei evoco nungar mbahe pēu —ehi.

¹³ Ipare oseyapaño ava. Ichui yuviroha iri carite pipe, osasapa ipa yuviraso sovai.

Fariseo porombohesa inungar pan mboapeposa

¹⁴ Jesús remimbohe sesarai pan sui yuvireco, ñepeimi tēi pan viraso güemihura yuvireco. ¹⁵ Evocoiyase Jesús aipo ehi:

—Peicua catu fariseo iyavei Herodes pan mboapeposa sui —ehi güemimbohe upe.

¹⁶ Aipo ehise, semimbohe: "Pan ndayaruise revo aipo ehi yandeu" ehi-ehi tēi oyeupe yuvireco.

¹⁷ Ahe rumo oicua güemimbohe píhañemoñetasa, aipo ehi:

—¿Mahera, "Pan ndayarui" peye? ¿Ndapeicua vitei vo che rembiapo? ¿Yavai vite tie seroya água pēu? ¹⁸ Oime tēi pe resa, ndapesepiai rumo; oime tēi pe nambi, ndapesendui rumo mbahe. ¿Ndapeyemomahenduha iri vo ¹⁹ acoi amboyaho-yahose cinco pan sui ava cinco mil vahe tohu? ¿Mbovi iruova vo acoi sumbirer pemonuha iri? —ehi.

—Doce iruova —ehi yuvireco chupe.

²⁰ —Iyavei acoi amboyaho-yahose siete pan sui ava cuatro mil vahe tohu, ¿mbovi iruova vo acoi pemonuha sumbirer no? —ehi.

—Siete iruova —ehi yuvireco chupe.

²¹ Ipare aipo ehi:

—¿Ndapesenducua vitei vo? —ehi güemimbohe upe.

Jesús ombogüera ava ndasesapisoí vahe tecua Betsaida ve

²² Oyepotase Jesús tecua Betsaida ve, ahe ramoseve voi ogüeru ndasesapisoí vahe yuvireco chupe 'epocomi tēi sese' oya yuvireco. ²³ Evocoiyase oipopisi ndasesapisoí vahe seraso co cotimi tecua sui. Aheve omundo güendi sesa rese, omundo avei opo iharive. Ipare oporandu chupe: "¿Eresepia vo mbahe?" ehi. ²⁴ Ndasesapisoí vahe omahese, aipo ehi:

—Asepia ava inungar ivira oguata vahe yuvireco —ehi.

²⁵ Evocoiyase omondo iri opo sesa rese. Ipare co mbia omahe tupri ité cute, ocuera ité, opacatu mbahe osepia tupri.
²⁶ Ichui Jesús omondo sétave aipo ehi chupe:

—Ereyevi iri eme tecuave —ehi.

Pedro oicua uca Jesús Tūpa Rembiporavo seco rese

²⁷ Ipare yuviraso Jesús güemimbohe reseve ivi Galilea sui tecua Cesarea coti, Filipo ivi rese. Peri rupi oporandu güemimbohe upe:

—¿Mara ehi vo ava oñeho yuvireco che rese? —ehi.

²⁸ Semimbohe evocoiyase omboyevi yuvireco chupe:

—Amove ava, “Juan Oporoāpiramo vahe” ehi yuvireco ndeu; ambuae evocoiyase, “Elías” ehi; ambuae, “Tūpa ñehe mombehusr mboetasa” ehi yuvireco ndeu —ehi.

²⁹ Evocoiyase oporandu iri güemimbohe upe:

—Pe no, ¿ava, “Co secoi” peye ru pe cheu no? —ehi.

Pedro evocoiyase aipo ehi chupe:

—Nde niha Tūpa Rembiporavo Porop̄isirosar ereico —ehi.

³⁰ Jesús rumo, “Pemombehui rene que ñepei ava upe” ehi.

Jesús omombehu omano águia

³¹ Evocoiyase Jesús omboipi oporombohe: “Che, Ava Riquehir, che paraísu itera, iyavei opacatu judío rerecuarea, pahi rerecuar ivate catu vahe iyavei Moisés porocuaita rese oporombohe vahe remiamotaréhi aicora. Ahe avei che yuca ucara yuvireco. Acuerayevira rumo mbosapi ari rupi” ehi.
³² Ahe omboyecua tupri ité chupe. Evocoiyase Pedro víraso co cotimi chupe oñehengata águia. ³³ Oyemboyere rumo, omahe güemimbohe eta rese, oñehengata Pedro upe aipo ehi:

—¡Esiri che sui, Caruguar! Esepia, nde nandepihañemoñetai mbahe Tūpa upendar rese; ava nungar tēi nde pihañemoñeta eico —ehi.

³⁴ Evocoiyase Jesús, “Perio” ehi güemimbohe upe, iyavei ambuae ava upe aipo ehi:

—Acoi ava oguata pota vahe che rupi, topoi mbahe güemimbotar tēi aposa sui, iyavei inungar-ra curusu rese ovosiira viña, toyemoingatu voi che recocuer rese oparaísu águia iyavei toguata tupri che rupi. ³⁵ Esepia, acoi ava güetecuer tēi raisupar, ocañi tēi etera. Acoi ava omocañi tēi vahe rumo güetecuer che recocuer rese, ñehesa ñepisirosa sui avei, ahe oñepisirora. ³⁶ ¿Aviye ai angahu pīha ava upe opacatu mbahe ivi pipendar pisi águia tēi, ahe ae tēi omocañi güecocuer yuvireco viña? ³⁷ ¿Mbovi pīha omondora ava güecocuer repirā viña? ³⁸ Esepia, acoi ava yuvinochi ai vahe che sui iyavei che ñehengagüer sui ava angaipa viyar ndaseco tuprii vahe rovai, che avei, Ava Riquehir, ñegüe ahera acoi

ayevise che Ru reco pírata porañetesa pipe, sembiguai rehii iva pendar maranehi reseve curi –ehi.

9

¹ Ipare Jesús aipo ehi iri:

—Supi eté, oimera amove cohave ava nomano vîtei chivaherâ, osepia rane itera ouse Tûpa mborerecuasa ipíratasa pipe yuvireco curi –ehi.

Jesús ñecuñaro agüer

² Seis arî pare, Jesús víraso Pedro, Santiago, Juan reseve ivitri ivate vahesave oyeupi. Aheve aviyeteramo têi oñecuñaro güemimbohe rovai. ³ Iturucuar sendí, morochí eteanga. Ndipoi eté que ava co nungar co ivi pipe turucuar oyosei vahe. ⁴ Iyavei aviyeteramo têi oyemboycua Elías, Moisés reseve Jesús rese oñemoñeta yuvinoha. ⁵ Ipare Pedro aipo ehi chupe:

—Ore mbokesar, javiye ai eté cohave yaico! Toroyapo mbosapi teyupami: ñepei ndeu nara, ambuae Moisés upe, ambuae evocoiyase Elías upe nara –ehi.

⁶ Osiquiye têi semimbohe yuvireco. Sese Pedro ndoicuaise oñehe água, aipo ehiño têi. ⁷ Ahe ramoseve avei ogüeyi iva quiha iharîve, oyopipa tupri yuvireco. Ahe ipâhuve oyendu ñehesa aipo ehi vahe: “Co che Rahir, che rembiaisu; peyapisaca catu iñehe rese” ehi vahe. ⁸ Ahe ramoseve avei omahese oivii yuvireco, ndosepiai eté que ambuae ava, Jesús güeraño tupri ité osepia opâhuve yuvireco.

⁹ Ipare ogüeyi ivitri sui yuvireco, aipo ehi güemimbohe upe ou: “Ndapemombehui chietera que ñepei ava upe co mbahe pesepia vahe, pemombehura rumo acoi che, Ava Riquehir, acuerayevise voi” ehi. ¹⁰ Oyeupeñomi têi vireco aipo ñehesa yuvireco, ahe rumo oporandu-randu oyeupe: “¿Mara oya pîha aipo, ‘Acuerayevira’ ehise?” ehi têi yuvireco. ¹¹ Evocoiyase semimbohe oporandu chupe:

—¿Mahera ru Moisés porocuaita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹² Evocoiyase aipo ehi chupe:

—Elías rane ité niha oura opacatu mbahe moingatu água. ¿Mahera aracahendar icuachiapri pipe aipo ehi: “Ava Riquehir oiporarara mbahe, yamotarëhimbri avei secoira” ehi? ¹³ Che niha aipo ahe pêu: Elías rumo ou ité, ava evocoiyase opacatu güemimbotar têi oyapo yuvireco sese. Ëgue ehi opacatu yaviye aracahendar icuachiapirer sese —ehi.

Jesús ombogüera chihivahé caruguar rerecosar

¹⁴ Ipare oyevi yuvireco güemimbohe recosave. Aheve osepias ava rehii oyere guasuse yuvireco sese, iyavei oime aheve Moisés porocuaita rese oporombohe vahe oiñehopoepi-epi semimbohe yuvireco. ¹⁵ Ichui Jesús repiase, opacatu yuvinoña yuviraso chupe “avirave” apo. ¹⁶ Evocoiyase ahe oporandu ava eta upe:

—¿Mbahe rese vo peporandu-randu peyeupe? —ehi.

¹⁷ Ñepei ipāhu pendar omboyevi chupe:

—Porombohesar, co aru che rahir ndeu, vireco vahe caruguar oyese, nomoñehengatu ucai vahe yepi. ¹⁸ Iyavei que iguatasa rupi co caruguar aviyeteramo tēi opocose sese, oiti voi ivive iyavei sendiriyuiyusu, sāitere-tere avei; sese cūritei nimirata iri eté. “Penosemi caruguar ichui” ahe tēi nde remimbohe eta upe. Ahe rumo ndoicatui eté yuvireco —ehi.

¹⁹ Jesús omboyevi chupe:

—¡Too, ndapeyeroya tupri vitei eté che rese! ¿Mbovi rupi rutei vo aico vitera pe pāhuve che ñemosasa pipe? Peru evoco chīhivahe cheu —ehi.

²⁰ Evocoiyase ogüeru yuvireco chupe. Osepiase caruguar Jesús, oiti uca iri chīhivahe ivive. Omboapayere-yere iyavei sendiriyui guasu-guasu. ²¹ Sese oporandu tu upe:

—¿Mbahese vo na ehi chupe? —ehi.

Tu evocoiyase aipo ehi:

—Ichīhivahemi suive ité. ²² Amove co caruguar oiti uca tatave, ivé avei yuca pota uca água yepi. Sese ereicatuse, ore pītiviiñomi tēi catu eve ore paraisuerecosave —ehi.

²³ Jesús aipo ehi chupe:

—¡Mahera, “Ereicatuse” ere cheu! Acoi che rese oyeroaya vahe upe opacatu mbahe yaposa —ehi.

²⁴ Aipo hese tu,

—¡Oroviroya niha, che pītivii ru eve nde reroya catu água! —ehi pīrata chupe.

²⁵ Osepiase Jesús ava rehii, oyemboyase sese, oñeho pīrata caruguar upe aipo ehi:

—Caruguar noñehei vahe, ndayapisai vahe, che orocuai, epoi co chīhivahe sui, ereique iri eme secocuer rese —ehi.

²⁶ Caruguar sāse pucu chīhivahe yuca tupri oso. “Omano ité co chīhivahe” ehi ambuae ava yuvireco. ²⁷ Jesús rumo oipopisi imopuha; evocoiyase chīhivahe opūha tupri voi eté.

²⁸ Ichui oique oí pipe. Aheve semimbohe ahe aemi oporandu yuvireco chupe:

—¿Mahera pīha ndoromose catui eté caruguar ichui? —ehi yuvireco.

²⁹ Jesús rumo aipo ehi güemimbohe upe:

—Yeroqui iyavei yecuacu pipeño ité niha co nungar caruguar yaicatu imombo —ehi.

Jesús omombehu iri omano água

³⁰ Ichui yuvinosepase, yuviraso ivi Galilea rupi. Jesús rumo ndoyemboyeucua uca potai eté que ambuae ava upe. ³¹ Esepiá, güemimbohe güeraño ité ombohe aipo ehi:

—Che, Ava Ríquehir, imondopri aicora che amotaréhimbar povrive, che yuca aveira yuvireco, mbosapi ari rupi rumo acuerayevira —ehi.

³² Semimbohe rumo ndosenducuai eté oyeupe ñehesa yuvireco iyavei osiquiye chupe porandu áqua yuvireco yepi.

¿Ava vo seco ivate catu vahe?

³³ Ipare oyepota tecua Capernaum ve yuvireco. Yuviroique se oí pipe,

—¿Mbahe rese vo acoi peyeaca-aca peico peri rupi? —ehi güemimbohe upe.

³⁴ Ahe rumo noñehei tupri yuvireco chupe. Esepiá, peri rupi, “¿Ava píha ivate catu vahe?” ehi asi-así oyeupe yuvireco.

³⁵ Evocoiyase oguapisave, “Periopa” ehi güemimbohe upe, aipo ehi avei:

—Oimese pe pâhu pendar oyemboivate ai vahe, ahe rumo seco ivi coti catura opacatu sui ava eta pítivi áqua —ehi.

³⁶ Ipare oipisi chihivahe güemimbohe pâhuve senoha aipo ehi:

³⁷ —Acoi ava oipisi vahe co chihivahemi nungar che rer pipe sereco, che ité che pisi yuvireco; iyavei acoi ava che pisi vahe, ndahei che güeraño che pisi, oipisi aveira che mbousar —ehi.

Acoi ndahei vahe yande amotaréhimbar, ahe yande mboyoyasar secoi

³⁸ Evocoiyase Juan aipo ehi chupe:

—Ore mbohesar, orosepia mbia nde rer pipe omombo vahe caruguar. Ahe rumo ndoguatai cûritei ore rupi; ore ité ndoroipotai chupe —ehi.

³⁹ Jesús rumo,

—Aní ñgue peye —ehi—. Esepiá, ndipoi eté que ambuae oyapo vahe poromondiisa che rer pipe, oicatu vaherá oñeha rai che rese. ⁴⁰ Sese ndayande amotaréhi vahe, ahe yande mboyoyasar secoi. ⁴¹ Acoi que omondo vahe i vaso pipe che rupi pe recosa pipe pêu, evocoi nungar oipisi itera porerecosa oyeupe nara —ehi.

Yaicua catura mbahe têi apoëhi áqua

⁴² “Acoi que ava omboangaipa uca vahe co chihivahemi nungar che reroyasar, iyacatu evocoi nungar ñapichisa ita mbahe mbocuhisa iyesiho rese para guasu pipe imombo áqua.

43 Sese pe po pe mboangaipa uca vahe peyasia ité peyesui. Esepiá, aviyé catu peiquera tecove apiréhisave ñepei pe po rese, peso rágüer sui que ñuvirío pe po rese tata guasu apiréhisave. 44 Aheve acoi uru nomanoi vahe, tata ndogüei vahe avei. 45 Pe pi pe mboangaipa ucase, peyasia avei peyesui. Esepiá, aviyé catu ndape píndugüei peique tecovesave, que ñuvirío pe pi rese peique rágüer sui tata guasu ndopai vahesave. 46 Aheve acoi uru nomanoi vahe, tata ndogüei vahe avei. 47 Pe resa avei pe mboangaipa ucase, penose ité peyesui. Esepiá, aviyé catu peique ñepei pe resa rese Túpa mborerecuasave que ñuvirío pe resa rese tata guasu apiréhisave pe reique rágüer sui. 48 Aheve acoi uru nomanoi vahe, tata ndogüei vahe avei.

49 “Esepiá, opacatu ava imoehesara tata nungar pipe. 50 Sese yucrì aviyé ai eté. Nasehe irise rumo, ndayaicatui chira imoehé iri água. Peico catu yucrì nungar mbahe tupri pipe peyeupe nara” ehi.

10

Jesús oporombohe mendasa sui poiēhi água

¹ Ipare Jesús osẽ tecua Capernaum sui, oso Judea ivi rupi iai Jordán rovai ari sësa coti. Aheve ava rehii oñemonuha iri yuvireco sese. Iyavei ombohe iri ava güecocuer rupi tupri. ² Evocoiyase fariseo oyemboya seco räha água tēi yuvireco sese, “¿Aviyé pihá cuimbahe omenda vahe opoi güembireco sui?” ehi yuvireco chupe. ³ Ahe rumo omboyevi chupe:

—¿Mara ehi vo acoi Moisés porocuaita pipe? —ehi.

⁴ Ahe evocoiyase omboyevi yuvireco chupe:

—Moisés remimombehu aipo ehi: “Pemondora pe rembireco upé cuachiar poisa resendar pe poi água pe rembireco sui” ehi —ehi fariseo yuvireco chupe.

⁵ Evocoiyase fariseo upé aipo ehi:

—Moisés omondo co porocuaita pe poreroyaëhisa pipe sui pëu. ⁶ Yipisuive ité niha, Túpa oyapo opacatu mbahe, oyapo avei cuimbahe, cuña reseve. ⁷ Sese niha cuimbahe omendase, oyepepíra oyesupa sui güembireco rese ité yuvirecoi água. ⁸ Evocoiyase ñuvirío yuvirecoira ñepei ava nungar. Sese ndahe iri ñuvirío, ñepei nungar ité yuvirecoira. ⁹ Evocoiyase ava Túpa omomenda vahe oyese, ndiyai ava tēi omboyepipi yuvireco oyesui —ehi.

¹⁰ Oive yuvirecoi vitese, semimbohe oporandu iri co mbahe rese yuvireco chupe. ¹¹ Evocoiyase ahe aipo ehi:

—Acoi opoi vahe güembireco sui omendase ambuae cuña rese, oyemboaguasa tēi vahe güembireco sui. ¹² Acoi cuña opoise omer sui omendase ambuae cuimbahe rese, ahe oyemboaguasa tēi vahe avei —ehi güemimbohe upé.

Jesús osovasa chīhivahe

¹³ Ipare ogüeru chīhivahe Jesús upe yuvireco sese ipoco ãgua. Semimbohe rumo, “¿Mahera vo peruño tēi chīhivahe?” ehi opīha vīracuasa pipe serusar upe yuvireco. ¹⁴ Evocoiyase Jesús osepiase, ndasorii güemimbohe upe aipo ehi:

—¡Mahera ndapeipotai iyu ãgua! Toyugüeruño chīhivahe cheu. Esepia, co chīhivahe nungar ava yuviroiquera che Ru Tūpa mborerecuasave. ¹⁵ Supi eté, acoi ndoipisii vahe che Ru Tūpa mborerecuasa chīhivahe nungar yuvireco, ahe evocoiyase ndoyuviroiquei chietera ipipe —ehi.

¹⁶ Evocoiyase oipisi, omondo opo iharive osovasa.

Ñepei mbia chīhivahe imbahe eta vahe oñeho Jesús upe

¹⁷ Oguata vitese Jesús yuvireco, aheseve mbia chīhivahe oña oso sovai, oñenopīha, oporandu chupe:

—Porombohesar aviye vahe, ¿mbahe vo ayapora tecovesa apirēhi vahe rereco ãgua? —ehi.

¹⁸ Jesús evocoiyase aipo ehi ahe mbia upe:

—¿Mahera vo, “Aviye vahe” ere cheu? Oime rumo ñepei aviye vahe ité, ahe Tūpa secoi. ¹⁹ Ereicua niha Tūpa porocuaita: ‘Ndereporoyucái chira, nandeaguasai chira, nandemonundai chira, nanderemirai chira ambuae ava rese, ndereporombopai chira, eremboyeroyara nde ru, nde si avei’ ehi vahe —ehi.

²⁰ Ahe mbia rumo,

—Porombohesar, che aipo nungar opacatu amboaviye ité che chīhivahe suive —ehi.

²¹ Evocoiyase omahe saisusave sese, aipo ehi chupe:

—Ñepei mbahe rumo ipane vite ndeu: eso, emondopa rane nde mbahe; ahe sepri evocoiyase emondo ava iparaísu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

²² Aipo oyeupe hese rumo, ahe mbia oyepepiño ichui oviharēhisave oso. Esepia, ahe mbahe yar ité secoi.

²³ Evocoiyase omahe oiviindar güemimbohe rese, aipo ehi:

—¡Yavai eté rumo ava mbahe yar reique ãgua che Ru Tūpa mborerecuasave! —ehi.

²⁴ Semimbohe evocoiyase, “¡Mara ehi rutei!” ehi tēi iñehe renduse yuvireco. Ahe rumo omombehu iri:

—Che rahireta, ¡yavai eté Tūpa mborerecuasave imbahe eta vahe reique ãgua ombahe eta rese tēi ipīhañemoñeta vahe upe!

²⁵ Yavai rai camello upe yucuar rupi seique ãgua, ava imbahe eta vahe upe rumo yavai catu che Ru mborerecuasave seique ãgua —ehi.

²⁶ Aipo nungar renduse oyepihamondii guasu yuvireco. Oporandu-randu tēi oyeupe yuvireco: “¿Ava angahu pīha oñepisirora yuvireco viña?” ehi.

²⁷ Evocoiyase omahe güemimbohe rese aipo ehi:

—Ava tēi upe rumo yavai aipo nungar mbahe apo ãgua; Tūpa upe rumo ndayavaimi eté. Esepia, Tūpa opacatu mbahe mboavaisarēhi secoi —ehi.

²⁸ Ipare Pedro aipo ehi:

—Ore Yar, ore rumo oroseyapa opacatu ore mbahe nde rupi ore guata ãgua —ehi chupe.

²⁹ Omboyevi rumo Pedro upe:

—Supi eté co aipo ahe pēu: acoi che rāsusā pipe iyavei ñehesa ñepisirosa rāsusā pipe oseyapa vahe güēta, viquehir, vivri, güeindri, vu, osi, guahir iyavei oivi, ³⁰ ahe oipisira omahera co ivi pipe cien yupagüer rupi avei oi, vivri, güeindri, osi, guahir iyavei ivi. Yepe oiporarara mbahe-mbahe tēi viña. Ipare rumo tecua ambuaeve oipisi aveira tecovesa apirēhi vahe curi. ³¹ Setá vai rumo cūritei yipindar vahe; ipa tēira yuvirecoi. Setá aveira cūritei ipa tēi vahe, yipindar yuvirecoira curi —ehi.

Jesús omombehu imombosapisa rupi omano ãgua

³² Yuvirasose Jerusalén ve, Jesús tenonde secoi güemimbohe upe. Semimbohe rumo ndoyembovihai iyavei saquicuerindar osiquiye yuvireco. Aheve Jesús oñeho iri co cotimi güemimbohe doce yuvirecoi vahe upe. Ichui omboipi imombehu co mbahe-mbahe tēi reime ãgua chupe aipo ehi:

³³ “Peicua niha, yasora tecua Jerusalén ve, aheve rumo che, Ava Riquehir, che pisira che mundo pahi eta rerecuar iyavei Moisés porocuaita rese oporombohe vahe povrīve yuvireco. Ahe, ‘Tomano’ ehira yuvireco cheu. Ipare che mondo aveira ava ndahei vahe yande mu upe yuvireco. ³⁴ Mara ehi-ehi tēira yuvireco cheu, ondīvi-ndivira, oyuvirocua-rocuara che rese, che yuca aveira yuvireco. Mbosapi ari rupi rumo acuerayevira” ehi güemimbohe upe.

Mbahe avīye vahe rese oporandu Santiago, Juan reseve yuvireco

³⁵ Ipare oyemboyase Zebedeo rahir Santiago, Juan Jesús rese aipo ehi yuvireco chupe:

—Ore mbohesar, oroipota ereyapo mbahe avīye vahe oreu —ehi.

³⁶ Ahe evocoiyase,

—¿Mbahe vo peipota ayapo vaherā pēu? —ehi chupe.

³⁷ —Ore oroipota nde mborerecua porañetesave ore mboguapira ndeyepiri eve, ñepei nde mbahe rese pocosa

coti, ambuae nde mbahe rese pocoēhisa coti —ehi yuvireco chupe.

³⁸ Evocoiyase omboyevi:

—Pe ndapeicuai mbahe rese pe porandu. ¿Peiporara catura pīha che co mbahe-mbahe tēi aiporara vaherā, inungar-ra que igua iro vahe aihu vaherā viña? Iyavei, ¿peicatura pīha che āpiramosa aipisi vaherā pisí? —ehi.

³⁹ —Taa, oroicatuño itera —ehi yuvireco.

Evocoiyase ahe aipo ehi chupe:

—Supi eté peihura co mbahe iro vahe, peipisi aveira āpiramosa che aipisi vaherā nungar. ⁴⁰ Co rumo ndiyai cheu che piri pe guapi āgua, che mbahe rese pocosa coti, ambuae che mbahe rese pocoēhisa coti. Che Ru Tūpa omoingatu güembiporavo upe nara oguapi vaherā che ipive —ehi.

⁴¹ Evocoiyase ambuae semimbohe diez yuvirecoi vahe iñehe renduse, oñemoiro Santiago, Juan upe yuvireco. ⁴² Ahe rumo, “Perio” ehi opacatu upe. Ipare aipo ehi:

—Peicua niha acoi mborerecuar guasu yuvirecoi vahe Tūpa cuaparēhi oporocuai oporoyuca ai tēisa pipe. Iyavei acoi ivate catu vahe oyeecoopirasá iteanga omborerecuasa pipe yepi. ⁴³ Pe rumo ēgue ndapeyei chira pe yeereco. Iyacatu rumo acoi ava oipota vahe ivate catu güeco āgua pe pāhuve, ihañeco rane itera opacatu ambuae ava rese. ⁴⁴ Iyavei acoi pe pāhu pendar oipota vahe tenonde catu güeco āgua, ihañeco tupri ranera opacatu pe pāhu pendar rese. ⁴⁵ Aherā niha che, Ava Riquehir, ayu ndahei ava che rese ihañeco āgua; che rumo ayu ava rese che hañeco āgua, iyavei amondo vaherā che recocuer manosave ava eta repirā Caruguar povri sui senose āgua —ehi.

Jesús ombogüera Bartimeo sesapisoēhisa sui

⁴⁶ Ipare oyepota tecua Jericó ve yuvireco. Ahe tecua sui yuvinosese güemimbohe reseve, ava rehii avei, aheve peri popive mbia ndasesapisoí vahe Bartimeo serer vahe, Timoteo rahir, oguapi oĩ. ⁴⁷ Osenduse, “Jesús Nazaret pendar” hesa, osapucai pīrata:

—¡Jesús, David suindar, che paraisuerecomi tēi eve! —ehi chupe.

⁴⁸ Ava rumo oyaca-yacaño, “¡Quiriri!” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pīrataño ité chupe.

⁴⁹ Evocoiyase osenduse iñehe, opita,

—Peñehe chupe —ehi.

Ichui oñehe yuvireco chupe:

—Eyemonguerēhi, epūha. Esepia, oñehe aipo ndeu —ehi.

⁵⁰ Aipo oyeupe he ramoseve, omomboño oturucuar guasu, opūha yesapiha oso chupe. ⁵¹ Evocoiyase oporandu ndasesapisoī vahe upe:

—¿Mbahe vo ereipota ayapo vaherā ndeu? —ehi.

Ahe evocoiyase,

—Porombohesar, che mbosarecomi tēira eve viña —ehi.

⁵² Evocoiyase aipo ehi ahe mbia upe:

—Eso tupriño eico; erecuera niha. Esepiā, ereyeroya ité che rese —ehi.

Ahe ramoseve ndasesapisoī vahe osareco tupri ité. Ipare osoño ité Jesús raquicuei peri rupi.

11

Jesús oique Jerusalén pipe

¹ Ovirovise tecua Jerusalén yuviraso, serovicave oime ñuvirío tecuami: Betfagé, Betania avei ivitri Olivo ípiimi. Aheve Jesús omundo ñuvirío güemimbohe,² aipo ehi chupe:

—Peso evocoí tecuami yande rovaindarve. Peyepotase aheve, pesepiara guaricu ñapichimbrí imoha, ava ndoyeupi vitei vahe yuvireco sese, ahe peyorañora seru. ³ Acoi que ava: “¿Mahera vo égue peye?” ehise pēu, “Ore Yar oiporu pota, ipare niha omboyeví voiñora” peyera chupe —ehi.

⁴ Evocoiyase ahe yuviraso peri rupi. Aheve guaricu ñapichimbrí osepiā imoha yuvireco oquendipive. Ichui oyoraño seru yuvireco.

⁵ Evocoiyase ahe pendar ava,

—¿Mbahe peyapo? ¿Mahera vo peyora guaricu? —ehi yuvireco chupe.

⁶ Ahe rumo Jesús ombohesa rupi tupri ité omboyeví yuvireco chupe. Evocoiyase, “Tovirasoño” ehi yuvireco chupe. ⁷ Ipare viraso guaricu Jesús upe, iyavei oturucuar omundo iharive yuvireco. Ahese Jesús oyeupi iharive. ⁸ Setá ava oipipira oturucuar peri rupi, ambuae ava evocoiyase oyasia pindo omundo peri rupi saperā yuvireco. ⁹ Ava senonendar, saquicuerindar avei,

—¡Imboeteipri, sovasapri tasecoi ou vahe yande Yar rer pipe! —ehi pírata yuvireco chupe—. ¹⁰ ¡Sovasapri yande ramoi David mborerecuasa tasecoi ou vahe oico! ¡Ivave imboeteipri tasecoi! —ehi yuvireco chupe.

¹¹ Égue ehi Jesús oiquese Jerusalén ve. Ipare oique tūparo pipe. Aheve opacatu rupi mbahe osepiā. Ipare yuviraso Betania ve caharuse ité doce güemimbohe rese.

Jesús vireco megua higuera ndihai vahe

¹² Ahere ayihive, yuvinosese Jesús tecua Betania sui, ndasiepoi oico. ¹³ Osepiase amombri ivira higuera so ati

vahe, oso chupe ‘¿iha pīha?’ oyapave. Ahe rumo osepia so pāve tēi sese. Esepiá, ahe ivíra upe ndosupiti vītei iha água. ¹⁴ Evocoiyase aipo ehi ahe ivíra upe:

—¡Co pipe suive ndipo iri chira ava nde ha yuvírohu vaherā! —ehi.

Semimbohe osendu iñehe yuvireco.

Jesús omombopa ava mbahe mboepisar tūparo pipe sui

¹⁵ Ipare oyepota Jerusalén ve yuvireco. Aheve Jesús oiquese judío tūparo guasu pipe, omboipi ava mbahe mondosal, mbahe rerocuasar mombopa tupri ocarve oico iyavei ava guarepochi recuñarosar opa ombovapi mesa imondo, apicasu mondosal renda avei omboviapi imondo. ¹⁶ Ndoipotai eté que ambuae mbahe seroiquepirā tūparo pipe. ¹⁷ Ipare oporombohe aipo ehi:

—Icuachiapri aracahendar pipe aipo ehi: ‘Co che rēta yeruresa rētarā opacatu ava iví pipendar uve nara’ ehi. Pe rumo imonda rai vahe rēta nungar tēi pereco —ehi.

¹⁸ Pahi eta rerecuar iyavei oporombohe vahe Moisés porocuaita rese osenduse, “¿Mara yahera pīha sereco yuca uca água?” ehi voi yuvireco chupe. Osiquiye rumo opacatu ava sui. Esepiá, ahe ndoyembovihai iporombohesa rese yuvireco. ¹⁹ Pītu ramomise, Jesús yuvinose güemimbohe eta reseve yuviraso ahe tecua sui.

Ivíra higuera ndihai vahe ipiru

²⁰ Ahere ayihive, añihiveive yuvirasose, osepia ivíra higuera sapo suive ipirupa vahe yuvireco. ²¹ Evocoiyase Pedro oyemomahenduha voi iñehe agüer rese, sese aipo ehi Jesús upe:

—Ore mbohesar, eseplia co ivíra higuera upe ereñehe rai vahecuer, opa ité ipiru —ehi.

²² Jesús evocoiyase,

—Peyeroya Tūpa rese —ehi—. ²³ Supi eté aipo ahe pēu: acoi que ava ivitri upe: ‘Esiri ave sui, eso para guasu pipe’ ehi vahe oyeroya tuprise ité aipo hesa rese, égüe ehi etera chupe. ²⁴ Sese aipo ahe pēu: opacatu que mbahe rese peporanduse pe yeroquisa pipe, peyeroya itera mbahe oime vaherā rese pēu, ahese peipisi itera. ²⁵ Acoi peyeroquise, yipindar peñero rane que pe amotaréhimbar upe, ahese égüe ehi aveira pe Ru ivá pendar iñero pe angaipa rese pēu. ²⁶ Égüe ndapeyeise, pe Ru ivá pendar avei niñeroi chira pe angaipa rese pēu —ehi.

Jesús mborerecuasa

²⁷ Ipare oyevi Jerusalén ve yuvireco. Aheve Jesús secoise judío tūparo guasu pipe, pahi eta rerecuar, Moisés porocuaita rese oporombohe vahe, ava rerecuar guasu avei oyemboya yuvireco sese. ²⁸ Aheve oporandu yuvireco chupe:

—¿Ava nde cuaita pipe vo erezapo co nungar eico? ¿Ava vo ombou nde mborerecuarā ndeu co nungar apo ãgua? —ehi yuvireco chupe.

29-30 Evocoiyase omboyevi chupe:

—Che avei aporandura mbahe rese pēu: ¿Ava vo Juan ombou ava ãpiramo ãgua; Tūpa pīha, ava tēi tie? Pemboyevise cheu, ahese che avei amombehura pēu ava porocuaita rupi eté pīha ayapo co mbahe vichico —ehi.

31 Evocoiyase oñemoñeta aipo ehi oyeupe yuvireco: “Tūpa ombou’ yahese chupe viña, ahe evocoiyase: ‘Mahera ru ndaperoyai?’ ehira yandeu. 32 ‘Ava tēi remimbou’ ndayahei chiaveira chupe” ehi. Ahe osiquiye tēi ambuae ava sui yuvireco. Esepia, opacatu ité oicua Juan oñehe Tūpa suindar ñehesa rese yepi. 33 Evocoiyase omboyevi chupe yuvireco:

—Ndoroicuai eté Juan mbousar —ehi.

Ahese ahe aipo ehiño chupe:

—Sese che avei, “Ahe iporocuaita pipe co mbahe ayapo” ndahei chietera pēu —ehi mborerecuar guasu upe.

12

Ava mbahe tēi oporavíqui vahe recocuer sui yembohesa

1 Evocoiyase Jesús omboyoya tecocuer ambuae ava recocuer rese aipo ehi: “Oime mbia oñoti vahe uva oivi pipe, ahe oñachi tupri sereco iyavei oyapo mbahe uva ricuer renose ãgua. Oyapo avei oí ivate vahe opacatu mbahe moha ãgua. Ipare oseya oivi ava oporavíqui vahe upe iporu ãgua. Ichui osẽ, oso amombri vahesa rupi. 2 Oyepotase ari uva pohosa, ahese omondo güembiguai oporavíqui vahe upe imboporandu ‘tomboumi uva pohoprí cheundar cheu cute’ oyapave viña. 3 Ahe rumo oipisiño, inupa-nupa imboyevi tupri tēi yuvireco. 4 Evocoiyase ahe ivi yar omondo iri ambuae güembiguai. Ahe oyapicha-pichaño ñaca rupi, iñeha mara-mara tēiño avei yuvireco chupe. 5 Ipare omondo iri ambuae. Ahe oyucaño yuvireco. Ichui omondo ati iri tēi. Ahe ipáhu pendar rese yuvirocua-rocuáño yuvireco, oyucaño avei ambuae yuvireco.

6 “Iyavei ñepei opita vite, tahir ité, sembiaisu. Ahe omondo ipa ‘co omboyeroyara yuvireco’ oyapave viña. 7 Oporavíqui vahe rumo aipo ehi oyeupe yuvireco: ‘Co aipo oipisira vu mbahe. Yayucaño, yandeu nara pâve topita co ivi’ ehi yuvireco. 8 Ichui oipisi, oyucaño yuvireco. Ipare ovino sehõgür ahe miti sui co coti yuvireco.

9 “¿Mbahe vo evocoiyase oyapora ivi yar? Osora chupe, opara oyuca oporavíqui vahe, iyavei omondopara oivi ambuae ava upe.

¹⁰ “¿Ndapeyeroquii vo pe co icuachiapri pipe? Aipo ehi niha acoi:

‘Co ita oi aposar opaño omombo yuvireco.

Ahe ita rumo aviyé catu vahe oi moviracua tupri água.

¹¹ Ëgüe ehi niha yande Yar yapo.

¡Mara ehi rutei revo! ehi icuachiapri pipe” ehi.

¹² Evocoiyase oviraso pota voi Jesús soquenda água yuvireco. Esepiá, ahe osenducua ité oyesendar iporombohesa yuvireco. Ava sui osiquiyepave rumo opoiño yuvireco ichui.

Fariseo osecoäha iri tēi Jesús guarePOCHI rese yuvireco

¹³ Ipare mborerecuar omondo fariseo iyavei mborerecuar Herodes rupindar avei Jesús upe ‘toyavi angahu oñehé’ oya yuvireco chupe. ¹⁴ Ahe yuviraso chupe aipo ehi:

—Porombohesar, ore oroicua nde supi eté vahe mbahe eremombehu eico, nde niha ndereroyai vahe ava ñehesa tēi. Esepiá, “Ëgüe ehi co mbia” nderei eté ava upe iyavei ereporombohe mbahe supi tupri vahe Tūpa remimbotar apo água rese. ¿Aviyera pīha yamondo guarePOCHI rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁵ Oicua ité rumo fariseo pihaëhisa, sese aipo ehi voi chupe:

—¿Mahera che moingue pota mbahe tēi pipe peye? Peru evocoiyase ñepei guarePOCHI cheu, tasepiá —ehi.

¹⁶ Ipare fariseo güeru yuvireco chupe, ahe guarePOCHI repiase, oporandu chupe:

—¿Ava rahanga vo co chini sese, iyavei ava rer vo co chini sese no? —ehi chupe.

—Roma pendar mborerecuar guasu —ehiño fariseo yuvireco chupe.

¹⁷ Evocoiyase aipo ehi fariseo upe:

—Pemondora mborerecuar upe mbahe chupendar; Tūpa upendar mbahe evocoiyase pemondora Tūpa upe —ehi.

Evocoiyase oyepihamondii tēi aipo oyeupe hese yuvireco.

Saduceo oporandu Jesús upe cuerayevisa rese secoähasave

¹⁸ Evocoiyase saduceo “ndipoi eté cuerayevisa” ehi vahe yugüeru Jesús upe. Oporandu tēi angahu yuvireco chupe:

¹⁹ —Porombohesar, Moisés niha oseyá güembicuachiagüer yandeu aipo ehi: “Que cuimbahe omenda vahe omanose guahiëhiseve, tivri evocoiyase omendara sembirecocuer rese ahe viquehir omano vahecuer upe nara tahira oico.” ²⁰ Oime siete tupri oyesuindar pāve yuvirecoi vahe. Yipindar vahe omenda. Ichui omanoño, ndatahii eté rumo. ²¹ Ipare tivri omenda viquehir rembirecocuer rese. Ahe rumo omanoño,

ndatahii avei rumo. Êgüe ehi tupri avei tivri imombosapisa. ²² Êgüe ehi co siete tupri omenda ahe cuña rese, ndatahii eté rumo yuvireco. Coiye rumo cuña omano avei no. ²³ Evocoiyase opase ocuerayevi yuvireco, ¿uma rembireco itera píha? Esepia niha, siete tupri ité omenda tēi yuvireco sese –ehi yuvireco chupe.

²⁴ Evocoiyase Jesús omboyevi chupe:

—Pe piñañemoñeta pipe peyavi. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa píratasa. ²⁵ Supi eté omano vahe ocuerayevise, chupe ndipo iri chira mendasa. Ahe rumo Tūpa rembiguai iva pendar nungar yuvirecoira ivave. ²⁶ Co cuerayevisa resendar rumo amombehura pēu: aviye ndapeyeroquii anga vahe Moisés rembicuachiagüer pipe, acoi caha rese sendi guasu vahe avíterve Tūpa aipo ehise chupe: ‘Che Abraham, Isaac, iyavei Jacob Tūpa aico’ ehi vahe. ²⁷ ¡Tūpa ndahei omano vahe cuer Tūpa! ¡Ahe rumo oicove vahe Tūpa secoi! Sese pe piñañemoñeta pipe peyavi –ehi saduceo yuvirecoi vahe upe.

Porocuaita aviye catu vahe

²⁸ Ñepei Moisés porocuaita rese oporombohe vahe osendu iñehe píratase oyeupe yuvireco, oicua avei Jesús omboyevi tuprise iñehe yuvireco chupe, evocoiyase oyemboya sese oporandu chupe:

—¿Uma vo porocuaita aviye catu vahe opacatu sui? —ehi.

²⁹ Jesús omboyevi chupe:

—Yipindar mborocuaita aviye catu vahe aipo ehi: ‘Pessendu Israel: yande Yar Tūpa aheño ité ñepei yande Yar secoi. ³⁰ Eresaisura nde Yar Tūpa opacatu nde piñá pipe, opacatu nde recocuer pipe, opacatu nde yapisacasa pipe iyavei opacatu nde píratasa pipe’ ehi. ³¹ Iyavei imoñuviriossa porocuaita ahe co: ‘Eresaisura ambuae ava nde yeaisu nungar’ ehi. Ndipo iri ambuae porocuaita aviye catu vahe co sui —ehi.

³² Evocoiyase porocuaita rese oporombohe vahe aipo ehi chupe:

—Aviye tupri ité aipo nde ñehe, Porombohesar. Supi eté aipo ere oime ñepei Tūpa iyavei ndipoi eté ambuae. ³³ Iyavei yasaisura Tūpa opacatu yande piñá pipe, opacatu yande yapisacasa pipe, opacatu yande píratasa pipe, iyavei yasaisura ava yande yeaisu nungar. Ahe ité aviye catu mbahe seropovëhepri sui iyavei opacatu porerecosa sapipri tēi sui —ehi.

³⁴ Evocoiyase Jesús icuase co ava piñañemoñeta tuprisa, aipo ehi chupe:

—Namombríimi ereico Tūpa mborerecuasa sui —ehi.

Ipare ndipo iri oyemonguerēhi vahe oporandu vaherā mbahe rese yuvireco chupe.

¿Ava suindar pīha Poropīsirosar?

³⁵ Jesús oporombohese tūparo pipe aipo ehi:

—¿Mahera ru Moisés porocuaita rese oporombohe vahe: “Poropīsirosar David suindar ité” ehi yuvireco? ³⁶ Esepiá, David ité aipo ehi Espíritu Santo pīratasa pipe:
‘Yar aipo ehi che Yar upe:

Eguapi che acato coti, acoi che amondose voi eté nde amo-taréhimbar nde povrīve yuvireco’

ehi David aracahe. ³⁷ ¿Mahera ru, “Poropīsirosar David suindar secoira” peye, David teiteté, “Che Yar” ehise chupe? —ehi.

Ava rehii oquerēhisave ité osendu Jesús ñehe yuvireco.

Jesús oicua uca Moisés porocuaita rese oporombohe vahe recocuerai

³⁸ Jesús aipo ehi oporombohesave: “Peicua catu Moisés porocuaita rese oporombohe vahe sui. Esepiá, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo ãgua ocar rupi omboeteisa pipe yuvireco.

³⁹ Oseca avei tenda porañete catu vahe güenara otūparo pipe yuvireco yepi, iyavei carusave tenda avíye catu vahesave oguapi yuvireco yepi no. ⁴⁰ Iyavei cuña imer mano vahecuer réta virocua-rocuá tēi ichui. Oarondaguá tēi avei oyeroqui pucu-pucu yuvireco. Ahe rumo oipísira Tūpa ñemoirosa ipírata catu vahe yuvireco curi” ehi.

Cuña imer mano vahecuer porerecosa

⁴¹ Ñepei ari Jesús oguapi oí porerecosa ríru rovai ava repia ãgua mara ehi oporerecosa imondo ipipe yuvireco. Aheve setá mbahe yar omondoño ité guarePOCHI yuvireco. ⁴² Ahe pipeve oyepota cuña imer mano vahecuer iparaísu vahe. Ahe avei omondo ñUVIRIOMI guarePOCHI oporerecosa ipipe. ⁴³ Evocoiyase Jesús oñehe güemimbohe upe aipo ehi:

—Supi eté che aipo ahe pēu: co cuña imer mano vahecuer iparaísu vahe setá catu guarePOCHI oporerecosa omondo ambuae ava eta sui co guarePOCHI ríru pipe. ⁴⁴ Ambuae ava eta rumo oguarePOCHI rumbíremi tēi omondo oporereco ãgua yuvireco; co cuña rumo oparaíusa pipe opa ité omondo oguarePOCHI —ehi güemimbohe upe.

13

“Imondurusara tūparo guasu” ehi Jesús

¹ Jesús osëse tūparo guasu pipe sui, ahese ñepei semimbohe aipo ehi chupe:

—Ore mbohesar, jesepia oí ita imopuhapri, icatupri ai! —ehi.

² Jesú rumo omboyeví chupe:

—¿Pesepia co oí tuvichá vahe ité? Ndipoi chietera rumo que ñepei ita oyeha vité vahe; opacatu ité imondurusara curi —ehi.

Cañi renonde mbahe oime vaherá

³ Evocoiyase Jesú yuviraso ivitri Olivo ve, ahe ivitri tūparo guasu rovai tupri. Aheve Jesú oguapise oí, Pedro, Santiago, Juan iyavei Andrés oporandu co cotimi mbahe rese yuvireco chupe: ⁴“¿Mbahese vo aipo mbahe yavíyera? ¿Mbahé poromondiisa rese rane vo icuasara?” ehi.

⁵ Jesú rumo omboyeví chupe: “Peicua catu, peyembopa ucai rene ambuae ava upe. ⁶Esepia, setá ava yugüerura, ‘Che niha Poropísiosar aico’ ehi tēira ava eta mbopa yuvireco.

⁷ “Pesenduse rumo ñehesa vavasa resendar coháve, iyavei que rupi, ndapeyembosiquíyei chietera. Esepia niha, ñgue ehi rane itera; ndehi vitéi chira rumo arí cañi. ⁸Esepia, ñepei ivi piendar ovavara ambuae ivi pipendar rese oyeupe yuvireco; iyavei oimera ivi ririí opacatu-catu tēi tecua rupi, tiavor avei. Co rumo omboipi ramomira mbahe tēi porarasa.

⁹ “Peñearo catu. Esepia, pe rerasora mborerecuar rovai yuvireco, iyavei pe nupara tūparove yuvireco. Pe reraso aveira mborerecuareta rovai, iyavei mborerecuar ivate catu vahe rovai che recocuer sui tēi yuvireco. Ñgue peyera peñehé che recocuer rese chupe. ¹⁰ Cañi renonde rumo co ñehesa písrosa resendar opacatu rane ité ava upe icua ucasara ivi rupi. ¹¹ Iyavei, ‘¿Mbahé píha amombehura chupe?’ ndapeyei chira pe mondose mborerecuar rovai yuvireco. Aheve voi eté omboyecuara Tūpa pe ñehe água pēu. Esepia, ndahei chira peyesui tēi peñehé, Espíritu Santo ité oñehera. ¹² Ipare rumo ava omondoñora vivri yamotaréhisar upe ‘toyuca yuvireco’ oya. Ñgue ehi aveira ava guahir upe; tahir avei oyamotaréhiñora oyesupa yuca uca água yuvireco che recocuer rese. ¹³ Opacatu avei ava ndape ambotai chira che recocuer sui tēi yuvireco. Acoi ava oyemovíracua vaheño rumo arí ipa vahe rupi, ahe ipísropri yuvirecoira.

¹⁴ “Tūparo guasu maranehi pípe pesepiase mbahe-mbahe tēi aposa —acoí oyeroqui vahe, ahe tosenducua tupri yuvireco—, evocoiyase acoi yuvirecoi vahe ivi Judea rupi, toñemipa poyava ivitri rese yuvireco. ¹⁵ Acoi güéta haríve secoi vahe, ahe arí toique iri eme güétave mbahe renose água. ¹⁶ Acoi que rupi tēi secoi vahe, toyevi eme avei güétave oyeosa renose água. ¹⁷ ¡Iparaisu itera cuña ipuruha vahe ahe arí pípe, imembí pítani vahe avei! ¹⁸ Peporandu Tūpa upe, toime eme co nungar mbahe sōhisa vahe pípe pēu. ¹⁹ Esepia, ahe arí pípe ava iparaísu catura opacatu yípive ava ivi apo

ramo suive yuvirecoi vahe sui; ipare ndipo iri chietera evoco nungar. ²⁰ Iyavei yande Yar nomombituhuise ari naporai vahe, ndipoi chietera oñepisiro vahe yuvireco viña; ahe rumo güembiporavo raisusa pipe omombituhura.

²¹ “Que oimese aipo ehi vahe: ‘Esephia, co Poropísirosar secoi’ ehi, anise, ‘Peve secoi’ ehise yuvireco pēu, aní chira peroya aipo ehi vahe. ²² Esephia, yuguerura ava, ‘Che Poropísirosar aico’ ehi tēi vahe, iyavei, ‘Che amombehu vahe Tūpa Ñehengagüer’ ehi angahu tēi vahe, iyavei oyapora mbahe ava ndoyapoi vahe poromondiisa güeco píratasa mboyecua áqua yuvireco. Aviyeteramo ombopa aveira ava Tūpa reroyasar. ²³ ¡Peicua catura! opa aipo co senondeve amombehu pēu” ehi.

Mara ehira Tūpa Rahir oyevise

²⁴ “Ahe ari pipe rumo co mbahe-mbahe tēi pare ndoyecua iri chira ari, yasi avei ndosesape iri chira, ²⁵ yasitata avei opara oviapi iva sui, iyavei iva resendar mbahe oririira yuvireco. ²⁶ Ahese che, Ava Riquehir, iva quiha rese ayecua itera vitu che píratasa pipe che rendigüer porañetes a pipe avei. ²⁷ Ipare amboura che rembiguai eta iva pendar. Ahe evocoyase omonuhara opacatu ivi rupindar che rembiporavo yuvireco, que amombri rupi yuvirecoi vahe, que iva rese yuvirecoi vahe avei.

²⁸ “Peyembohera ivira higuera recocuer sui: co ivira soqui ramose, yaicua cōimi ari sacu vahe yepota áqua yandeu yepi. ²⁹ Na ehi aveira niha pēu che ñehe rupi tupri mbahe pesepiase. Sese peicuara che, Ava Riquehir, cōimi eté che yevi áqua. ³⁰ Supi eté yuvirecove vitera ava osephia vahe, co mbahe opase yaviye. ³¹ Iva, ivi opara ocañi; che ñehengagüer rumo imboaviyesa rane itera.

³² “Ndipoi eté rumo ava oicua vahe ari iyavei hora che yevi áqua yuvireco, che Ru rembiguai iva pendar avei ndoicuai yuvireco, che avei ndaicuai eté. Che Ru güeraño ité rumo oicua.

³³ “Sese niha pemahemohara yepi, che rārora peye. Esephia niha, ndicuasai che yevi áqua. ³⁴ Inungar que mbia amombri oso pota áqua renonde, güembigui oseyapa güëta rāro áqua, omondo avei ñepei-peí upe iporavíqui áqua, iyavei omondo güëta roquendipi rāro áqua. ³⁵ Pe evocoyase pemahemohara. Esephia, ndapeicuai marase che oí yar ayevira pēu, aviyeteramo pítu ramose, pítu mbiter, tacura ñehese, anise añihivei. ³⁶ Ndaipotai pemahemohaëhiseve tēi ayevira. ³⁷ Che aipo ahe pēu, opacatu upe avei: ¡Pemahemohaño ité yepi!” ehi güemimbohe eta upe.

14

Oyemomborandu Jesús yuca ãgua rese yuvireco

¹ Ipare ñuvirío arí judío Pascua pieta ãgua ipane, ahe pieta pipe yuvirohu pan ndayapepoi vahe yepi, pahi rerecuarea, Moisés porocuaita rese oporombohe vahe avei oyemomborandu: “¿Mara yahera Jesús mbopa ipisi yuca ãgua?” ehi yuvireco. ² Ambuae rumo aipo ehi yuvireco:

—Ndiyai pieta pipe ité yaipisi ava rehií yemondiiéhi ãgua yandeu —ehi.

Cuña Jesús rese mbahe sīacua vahe oipiyyere

³ Ahese Jesús secoi Betania ve Simón lepra vireco vahecuer rētave. Aheve mesave chiniseve, cuña güeru mbahe sīacua vahe siru reseve sepí iteanga vahe. Ahe osovapisa rerocua, ipare oipiyyere Jesús áca rese. ⁴ Ambuae ava aheve yuvínoi vahe rumo oñemoiro tēi aipo ehi yuvireco oyeupe:

—¿Mahera vo co omocañi tēi mbahe sīacua vahe? ⁵ Omondo vahe ité tie co tresciento arí rupindar mboravíqui reprí rupi ava iparaisu vahe pítivii ãgua viña —ehi yuvireco.

Omañeco tēi avei ahe cuña yuvireco.

⁶ Jesús rumo aipo ehi ahe ava upe:

—Teheni, ēgue tehiño, ¿mahera vo pemañeco tēi? Co mbahe oyapo vahe rumo cheu aviye ité. ⁷ Ava iparaisu vahe niha yuvirecoño itera pe pāhuve, iyavei peyapoño itera mbahe aviye vahe peyapo potase chupe; che rumo ēgue ndahe viteñoi chira vichico pe pāhuve. ⁸ Iyavei co cuña oyapo mbahe ocatugüer rupi; opa voi omoiacua che rete che manoëhi viteseve. ⁹ Supi eté aipo ahe pēu: ñehesa písirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas oyemoingatu Jesús mundo ãgua yamotaréhimbar upe

¹⁰ Evocoiyase Judas Iscariote, semimbohe doce vahe pāhu pendar, oso pahi eta rerecuuar upe imoñeta Jesús mundo ãgua. ¹¹ Senduse, oyemboviharete: “Yamondo guarePOCHI chupe” ehi voi eté yuvireco. Evocoiyase Judas oseca voi Jesús mundo ãgua yamotaréhimbar upe.

Jesús caru agüer ipa vahe güemimbohe rese

¹² Yipindar arí pan ndayapepoi vahe husa pipe, ahese avei ovesa Pascua resendar yucaprí seropovëhesa yepi, ahe arí pipe semimbohe oporandu Jesús upe yuvireco:

—¿Que vo ereipota oromoingatura carusa Pascua pieta resendar yandeu? —ehi.

¹³ Aipo oyeupe hese, omondo ñuvirío güemimbohe, aipo ehi chupe:

—Peso tecuave. Aheve pesepiara mbia vireco vahe cambuchi pipe i. Supi pesora,¹⁴ seiqueste save aipo peyera sēta vahe upe: ‘Ore mbohesar oporandu: ¿Uma oi pipe vo Pascua pieta resendar orohura che remimbohe reseve? ehi’ peyera.¹⁵ Evocoiyase ahe omboyecuara oi guasu ivatendar imoingatupri pēu. Aheve pemoingatu mbahe yahu vaherā —ehi güemimbohe upe.

¹⁶ Evocoiyase semimbohe yuviraso tecuave. Aheve semimombehu rupi tupri osepia mbahe yuvireco. Ichui omoin-gatupri carusa Pascua pieta resendar yuvireco.

¹⁷ Pītu ramomise, Jesús doce güemimbohe rese aheve oyepota yuviraso. ¹⁸ Iyavei ocaruse ité mesave yuvinoi, güemimbohe upe aipo ehi:

—Supi eté aipo ahe pēu: ñepei pe pāhu pendar yande piri ocaru vahe che mondora che amotarēhimbār upe —ehi.

¹⁹ Evocoiyase semimbohe ndoyembovihai tēi yuvireco, iyavei oporandu-randu tēi ñepei-peíchupe yuvireco:

—¿Che pīha? —ehi yuvireco.

²⁰ Omboyevi rumo güemimbohe upe:

—Ñepei eté pe pāhu pendar ahe co omoaquí pan che caro pipe. ²¹ Supi eté che, Ava Riquehir, amboaviyera icuachiapri; jiparaisu catura rumo acoi mbia che mondosar! Aviye catura ahe mbia ndoyesuisse viña —ehi.

²² Yuvirocaru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi imondo güemimbohe upe aipo ehi:

—Peipisi; co che rete —ehi.

²³ Ipare oipisi igua riru, “Aviye ndeu” ehi Vu upe. Aipo ohe pare omondo güemimbohe upe, ipare opacatu yuviroihu.

²⁴ Ahese aipo ehi:

—Co che ruvi, ahe che Ru remimbotar ipiasu vahe pēu nara. Oyepiyerera ava rehii recocuer rese nara. ²⁵ Supi eté aipo ahe pēu: ndaihu iri chietera uva ricuer cheu ari oyepotase voi che Ru Tūpa mborerecuasave aihura uva ricuer ipiasu vahe —ehi.

“Pedro, ‘Ndaicuai vahe evocoí mbia’ erera cheu” ehi Jesús Pedro upe

²⁶ Osapucaire, opa yuviraso ivitri Olivo ve. ²⁷ Ahese Jesús aipo ehi:

—Opara pemocañi che rese yeroyasa peyesui. Esepia, acoi icuachiapri pipe aipo ehi: ‘Ayucara ovesa rārosar, ahese oñemosai tēira ovesa opacatu rupi yuvireco’ ehi. ²⁸ Che cuer-ayevire rumo aso voi etera pe renonera Galilea ve —ehi.

—Evocoiyase Pedro aipo ehi chupe:

—Yepe ambuae opacatu nande reroya iri chira yuvireco, che rumo ëgue ndahei chietera —ehi.

³⁰ Aipo ehi rumo Pedro upe:

—Che rumo supi eté aipo ahe ndeu: co p̄itu pipeve voi eté tacura ñehe yupagüe renondeve, “Ndaicuai vahe evocoí mbia” erera mbosapi oyupagüer rupi cheu —ehi.

³¹ Ahe rumo,

—Yepe che amano t̄ira nde rupi viña, che rumo, “Ndaicuai vahe evocoí mbia” ndahei chietera —ehi-ehi catuño ité chupe.

Ambuae opacatu aipo ehi tupri t̄i avei yuvireco chupe.

Jesús oyeroqui Getsemaní ve

³² Ipare yuviraso Getsemaní ve yuvireco. Aheve Jesús aipo ehi güemimbohe upe:

—Peguapi cohabe, che aso ranera ayeroqui peve —ehi.

³³ Aheve viraso Pedro, Santiago, Juan oyeupi. Ahese ndoyepihambovihai eté oico ³⁴ aipo ehi:

—Che cūritei ndavihai eté. Esepiá, che hā oyandu ité manosa. Pepita rane cohabe, iyavei pemahemohara pe yeroqui pipe —ehi güemimbohe viraso vahe upe.

³⁵ Evocoiyase oso tenonde catumi. Aheve oyaiví iví rese oso, oporandu Tūpa upe mbahe tasi vahe reimeëhi ãgua oyeupe.

³⁶ Oyeroqui pipe aipo ehi: “Che Ru, che rembiaisu, ndeu niha mbahe ndayavai vahe ité: che renose co mbahe-mbahe t̄i sui eve; tayapo eme che remimbotar t̄i, nde remimbotar rupi catu tayapo” ehi.

³⁷ Ipare oyeví güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—Simón, ¿ereque? ¿Ndereñemosai eté vo que ñepei hora nde ropesií upe? ³⁸ Pemahemoha, peyeroqui mbahe t̄i pipe pe viapiëhi ãgua. Pe niha pequerëhi ité viña, pe retecuer t̄i rumo nimiratai pēu —ehi.

³⁹ Ichui oso iri oyeroqui, aipo ehi tupri avei oñehe. ⁴⁰ Ipare oyevise, osesapiha iri iqueseve t̄i avei. Esepiá, sopesii nomboyeroyai eté yuvireco, ahese ndoicatui eté iñehe mboyeví yuvireco. ⁴¹ Imombosapisa rupi oso irise aipo ehi chupe:

—¡Pequeño vite vo peyu! Aviye revo peque. Osupiti ité che, Ava Riquehir, mundo ãgua ava yangaipa vahe povriva.

⁴² Pepúha, yaso. Esepiá, cōimi eté che amotarëhisar upe che mundo vaherä secoi —ehi.

Jesús ipisisa

⁴³ Jesús oñehe viteseve ohā, Judas oyepota oso chupe, ahe doce pāhu pendar semimbohe, iyavei setá ava yuguér quise pucu, ivira reseve-seve supi. Ahe pahi eta rerecuar, Moisés porocuaita rese oporombohe vahe, judío rerecuareta porocuaita rupi oyapo yuvireco. ⁴⁴ Yipindar rumo imondosar Judas aipo ehi: “Asovaupite vahe rese peicuara. Ahe peipisi

tupri itera seraso" ehi. ⁴⁵ Oyepotase Jesús upe, oyemboya voi oso sese aipo ehi chupe:

—¡Porombohesar! —ehi sovaupite.

⁴⁶ Ahese oipisi Jesús yuvireco.

⁴⁷ Semimbohe secoi vahe supi ovinose oquise pucu. Ipipe oyasia pahi rerecuar ivate catu vahe rembiguai nambi.

⁴⁸ Ahese Jesús aipo ehi ava upe:

—Pe quise pucu, ivira reseve-seve rutei co peyu che ropeña che pisí água. Imonda rai vahe nungar che rereco peye.

⁴⁹ Ari yacatu rupi niha pe pahuve aporombohese tūparove vichico, na ndapeyei eté cheu. Co rumo ēgue peye icuachiapri mboaviye água cute —ehi.

⁵⁰ Ahese semimbohe oñemosaipa oseya Jesús ahe ae tupri imoha yuvireco. ⁵¹ Mbía chihivahe rumo turucuar pipe güerañomi oñemama vahe supive secoi viña; ⁵² ahe avei oipisi yuvireco. Oipoequiño rumo oturucuar reya oso nani tupri.

Jesús serasosa pahi rerecuar ivate catu vahe rovai

⁵³ Evocoiyase Jesús vraso pahi rerecuar ivate catu vahe rovai yuvireco. Aheve oñemonuha pahi eta rerecuar, judío rerecuar, Moisés porocuaita rese oporombohe vahe avei no. ⁵⁴ Pedro avei amombrí rupive tēi oique ité oso pahi rerecuar ivate catu vahe rēta áchisa pipe. Aheve oguapiño mbía sundao pahuve tata ipive oyepuhe oí.

⁵⁵ Pahi eta rerecuar rumo iyavei opacatu porandusa ivate catu vahe pendar oseca-seca tēi ava oñehe-ñehe tēi vaherā Jesús rese yamotarēhisave yuca uca água yuvireco; ndoicatui eté rumo yuvireco. ⁵⁶ Iyavei setá iteanga tēi semira yuvireco sese; oyecopi-copi tēi rumo güemira pipe. ⁵⁷ Amove aipo ehi tēi yuvireco seco momara água:

⁵⁸ —Ore orosendu iñehe aipo ehise: ‘Che opara amonduru co tūparo ava tēi rembiapo. Ipare rumo mbosapi ari rupi opara amopuha. Ndahe iri chira evocoiyase ava tēi rembiapo’ ehi —ehi tēi yuvireco chupe.

⁵⁹ Ndafoyoyai rumo ambuae imombehusa rese.

⁶⁰ Ahese pahi rerecuar ivate catu vahe opūha oporandu Jesús upe:

—¿Nderemboyevi chira vo iñehe yuvireco chupe? ¿Mbahe vo aipo nde amotarēhimbar oñehe nde rese? —ehi chupe.

⁶¹ Noñeheiño ité rumo chupe. Pahi rerecuar ivate catu vahe rumo oporandu iri chupe:

—¿Poropísiosar ité vo nde ereico, Tūpa imboeteipri Rahir? —ehi.

⁶² —Taa, ahe ité niha che aico. Pe niha che repiara peye che, Ava Riquehir, aguapise che Ru mbahe mboavaisarēhi acato coti; ayevise avei iva quiha rese curi —ehi chupe.

⁶³ Evocoiyase pahi rerecuar ivate catu vahe omondoro oturucuar aipo ehi:

—¿Mbahe iri vo yande yaipota vîte yaico? ⁶⁴ Yasendupa niha aipo Tûpa upe iñehe-ñehe têisa, ¿mara ehi aipo evocoiyase pe pihave? —ehi.

Ipare opacatu guasu ava, “¡Tomanoño ité!” ehi yuvireco chupe.

⁶⁵ Ahese amove ava ondîvi-ndîvi sese iyavei osesacua, ipare yuvirocua-rocu sese aipo ehi yuvireco:

—¡Eicua ité ru, ava evoco ocua nde rese! —ehi-ehi yuvireco chupe.

Sundao tûparo rârosar avei osovapete-pete yuvireco.

Pedro, “Ndaicuai vahe evoco mbia” ehi Jesús upe

⁶⁶ Pedro ivive ñachimbri pipe secoi. Aheve cuña oyepota ou pahi mborerecuar ivate catu vahe rembiguai chupe.

⁶⁷ Osepiasse Pedro iyepehese tata ipive, omahengatu ohã sese aipo ehi chupe:

—Nde avei acoi Jesús Nazaret pendar rupindar ereico —ehi.

68 Ahe rumo aipo ehiño:

—Ndaicuai vahe ité rumo aipo mbia; ndaicuai avei aipo nde ñehesa —ehiño chupe.

Ichui osëe oquendipive ohã, ahese oñehe tacura. ⁶⁹ Omahe irise co cuña mbiguai sese, ahe aipo ehi ahe pendar ava yuvirecoi vahe upe:

—Co ava niha supindar ité —ehi.

⁷⁰ Pedro rumo, “Ndahei eté che” ehiño. Iparemi têi ambuae ava aheve yuvirecoi vahe aipo ehi iri yuvireco chupe:

—Nde ité niha supindar ereico. Esepia, nde Galilea iguar ité ereico —ehi chupe.

⁷¹ Pedro evocoiyase,

—¡Tûpa niha oicua, ndopombopai eté niha aipo, ndaicuai eté aipo mbia pe ñehesa! —ehi.

⁷² Aipo iheseve, tacura oñehe imoñuviriosa rupi. Ahese Pedro oyemomahenduha, “Tacura ñehe yupagüesa renondeve, mbosapi oyupagüer rupi, ‘Ndaicuai vahe evoco mbia’ erera cheu” ihe agüer rese. Sese oyasehó iteanga.

15

Jesús serasosa Pilato rovai

¹ Cõhe potase, pahi eta rerecuar, judío rerecuar, Moisés porocuaita rese oporombohe vahe iyavei opacatu ava porandusa ivate catu vahe pendar oñemonuha yuvireco. Ipare oipocua-pocua Jesús seraso Pilato upe yuvireco. ² Pilato aheve oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, “Ahe ereico” ere cheu —ehi.

³ Pahi eta rerecuar rumo omombehu-mbehu tēi mbahe sembiaviēhi yuvireco chupe. ⁴ Evocoiyase Pilato oporandu iri chupe aipo ehi:

—¿Mahera vo ndereñehei eté? Esepio, setá mbahe nde rembiaví omombehu yuvireco —ehi.

⁵ Nomboyevii eté rumo Pilato upe. Evocoiyase, “¿Mara ehi rutei pīha?” ehi tēi.

“¡Tayaticasa!” ehi ava Jesús upe yuvireco

⁶ Mborerecuar guasu recosa ité ñepei ava soquendapri renose ãgua Pascua pieta pipe ava rehii porandusa rupi yepi. ⁷ Mbía Barrabás serer vahe, ahe pipeve avei soquendas a yuvireco ambuae oporapichi vahe reseve. ⁸ Ava yugüeru Pilato upe ‘tayaposa pieta pipe yaposa vahe yepi’ oyapave yuvireco. ⁹ Pilato rumo aipo ehi:

—¿Peipota amose vaherā judío rerecuar? —ehi.

¹⁰ Esepio, Pilato oicuaño ité ava rese yemoecatéhisa pipe sui pahi eta rerecuar remimondo secoise. ¹¹ Pahi eta rerecuar rumo ‘Barrabás tosē’ ombohe ati-atí uca ava yuvireco. ¹² Evocoiyase Pilato oporandu ahe ava upe:

—¿Mbahe vo peipota ayapora co mbía chupe acoi, ‘Judío rerecuar’ peye vahe rese? —ehi.

¹³ Ahe rumo omboyevi Pilato upe:

—¡Tayaticasa curusu rese! —ehi ati-atíño yuvireco.

¹⁴ Pilato rumo aipo ehi ava upe:

—¿Mbahe ité vo oyapo naporai vahe? —ehi.

Ahe rumo,

—¡Tayaticasa ité curusu rese! —ehi ati-atí iriño yuvireco.

¹⁵ Evocoiyase Pilato, mbahe tupri opita ãgua ava rese, omose uca Barrabás. Ipare oinupá iteanga uca Jesús tucumbo tupeicha nungar pipe, imondo curusu rese yatica ãgua.

¹⁶ Ahese sundao viraso mborerecuar rēta sui ambuae oi pipe, aheve opacatu omboetasa omonuha yuvireco. ¹⁷ Aheve omboyemonde turucuar pīraumbi vahe pipe yuvireco, ipare yu piapri omonde ñaca rese. ¹⁸ Sāse avei yuvireco:

—¡Imboeteipri judío rerecuar tasecoi! —ehi angahu yuvireco chupe.

¹⁹ Iyavei yuvirocua-rocua ivira pipe ñaca rupi yuvireco sese, ondīvi-ndīvi avei oñenopiha-piha avei sovai yuvireco imboeteisave angahu. ²⁰ Mara-mara tēi sereco pare, ovirocua iturucuar pīraumbi vahe yuvireco ichui, ahese omonde iturucuar ité yuvireco sese. Ichui vīnose ocarve yatica ãgua yuvireco.

Jesús yaticasa curusu rese

²¹ Ñepei mbia Simón serer vahe Cirene pendar, Alejandro, Rufo yesupa, ahe pi-pe avei oyepota chupe que co cotí rupi sui ou. Oñocua potase ocua viña: “Erio, terevosii curusu co Jesús vireco vahe rese” ehi voiño tēi yuvireco chupe.

²² Jesús oviraso Gólgota serer vahesave yuvireco ('Ava Āca Cangüer' oyapave aipo ehi). ²³ Iyavei uva ricuer oyeseha vahe mirra rese omondo tēi yuvireco chupe. Ahe rumo ndoihui eté. ²⁴ Evocoiyase oyatica yuvireco. Ipare sundao iguayiño Jesús turucuar rese ‘¿uma pīha virasora oyeupe’ oyapave yuvireco.

²⁵ Ahe oyatica añihivei la nueve rupi yuvireco. ²⁶ Curusu rese rumo omombehu mbahe sui oyuca yuvireco: “Judío rerecuar guasu” ehi icuachiapri oī. ²⁷ Supive avei yaticasa ñuvirío imonda rai vahe ñepei mbahe rese ipocosa cotí, ambuae mbahe rese ipocoēhisa cotí. ²⁸ Ëgüe ehi imboaviye icuachiapri aipo ehi vahe: “Ava mbahe-mbahe tēi aposar nungar ipāhuve serecosa” ehi.

²⁹ Acoi ava ñocuasar iñehe-ñehe tēi, oñeaca mbovava aipo ehi yuvireco chupe:

—Nde acoi, “Opara tūparo amonduru. Ipare mbosapi ari rupi opa irira amopuha” ere acoi cuese. ³⁰ ¡Eñepisiro ru nde ae cute; egüeyi curusu sui! —ehi yuvireco chupe.

³¹ Ëgüe ehi avei pahi eta rerecuar, oporombohe vahe avei Moisés porocuaita rese iñehe mara-mara tēi yuvireco chupe, aipo ehi yuvireco oyeupe:

—Oipisiro ambuae. Ahe ae rumo ndoicatui oñepisiro. ³² ¡Poropisirosar Israel rerecuar guasu, toyeeroyi ahe ae curusu sui cūritei, ahese voi seroyasara —ehi.

Iyavei supive yaticapri mara ehi-ehi tēi avei chupe.

Jesús mano agüer

³³ Osupitise rumo mbiter ari, opa tupri pītu ivi rupi. Ëgüe ehi las tres rupi. ³⁴ Ahese tupri avei Jesús oñehe pīrata aipo ehi: “Eloi, Eloi, ¿lema sabactani?” ehi, (ahe ‘che Ru Tūpa, che Ru Tūpa, ¿mahera vo che reya eve?’ oyapave aipo ehi).

³⁵ Aheve ava yuvirecoi vahe rumo osenduse iñehe, aipo ehi yuvireco:

—Pesendu aipo Tūpa ñehe mombehusar Elías upe oñehe —ehi yuvireco chupe.

³⁶ Evocoiyase ñepei imboetasa oña oso mbahe saviyu vahe reca. Ahe omoaquí vinagre pi-pe imondo ivira apri rese chupe ‘toihu’ oya:

—Ëgüe tehiño rane, ¿oura pīha Elías seroyi água curusu sui? —ehi.

³⁷ Ahese Jesús sāse pīrata. Ipare omano. ³⁸ Aheseve tūparo asiasa turucuar ivate cotí sui ovo tupri. ³⁹ Iyavei sundao

rerecuar Roma īguar, ahe Jesús rehōgürer rese omahengatu ohā. Osenduse Jesús rāse iyavei osepiase imano, aipo ehi:

—Supi eté catu, co mbia Tūpa Rahir ité —ehi.

⁴⁰ Iyavei cuña aheve amombrive osephia catu yuvinoha; ahe yuvirecoi María Magdalena, José si María, ahe avei Santiago chīhivahe catu vahe si iyavei ambuae cuña Salomé. ⁴¹ Co cuña eta yuvirecoiño vahe ité Jesús rupi, oipītivii vahe avei Galilea ve yuvirecoise. Setá avei ambuae ava supi yugüeru vahe Jerusalén ve yuvirecoi.

Jesús apocatu agüer tuvípa pipe

⁴² Pītu ramose, ahe ari pipe oyemoingatu ava yuvireco ari mbituhusa upe nara yepi, ⁴³ ahese José, tecua Arimatea pendar, porandusa ivate catu vahe pendar, acoi Tūpa mborerecuasa osāro vahe oico, oquerēhisa pipe ité oique oso Pilato upe oporandu āqua Jesús rehōgürer rese. ⁴⁴ Pilato rumo oyepihamondii tēi, “Omano” hese. Oñelhe sundao rerecuar upe oporandu āqua ‘¿marase vo ēgue ehi?’ ⁴⁵ Sundao rerecuar omombehuse chupe, ahese omondo sehōgürer José upe. ⁴⁶ Evocoiyase José vīrocua turucuar secose vahe. Curusu sui seroyi pare, oimama voi eté ipipe. Ipare omoingue tuvípa ita yohopri pipe. Ichui ita yapayere vahe pipe osovapi. ⁴⁷ María Magdalena iyavei María, José si, osepiaino yapocatuse yuvireco.

16

Jesús ocuerayevi

¹ Mbituhusa ari pare, María Magdalena, María, Santiago si, Salomé avei, ahe vīrocua mbahe sīacua vahe Jesús rehōgürer rese nara yuvireco. ² Iyavei añihiveive, yipindar ari semana pipe, oyepota Jesús ruvipave icatu ramose yuviraso. ³ Aheve aipo ehi oyeupe yuvireco:

—¿Ava pīha co tehōgürer rovapisa vīrocvara yuvireco yandeu? —ehi.

⁴ Osepiase rumo ita guasu yuvireco, ndahe irise güendave ihāi, ⁵ yuviroiquese tehōgürer ruvipave yuvireco, aheve osephia mbahe rese pocosa coti mbia chīhivahe, iturucuar pucu morochi vahe oguapise oī. Ahese cuña oyembosiquiye yuvireco. ⁶ Ahe rumo aipo ehi chupe:

—Pesiquiye eme. Pe peseca Jesús Nazaret pendar, yaticapri. Ahe rumo ocuerayevi; ndipoi eté cohabe. Pesepia ru supagüer. ⁷ Peso, tapemombehu semimbohe eta upe iyavei pemombehu Pedro upe: ‘Jesús rane osora pe renonera Galilea ve. Aheve pesepiara mbahe che remimombehu rupi tupri’ peyera —ehi.

⁸ Evocoiyase ahe cuña yuvínosese tuvípa sui, yuvínoña yuvíraso, orírii avei osíquiyepave. Iyavei nomombehui eté ambuae ava upe osíquiyepave yuvíreco.

Jesús oyemboyecua María Magdalena upe

⁹ Jesús ocuerayevire añihiveive domingu pipe, oyemboyecua yipíndar María Magdalena upe, ahe ichui acoi siete tupri caruguar opa omboyepepi. ¹⁰ Ahe oso imombehu supindar upe. Ahe rumo oyaseho víte ovíharéhisave yuvíreco. ¹¹ Osenduse cuña ñehe: “Jesús ocuerayevi, che ité asepia” ehise, ndovíroyai eté yuvíreco.

Jesús oyemboyecua ñuvirío güemimbohe upe

¹² Ipare Jesús oyemboyecua iri ñuvirío güemimbohe upe ambuae güepiaca pipe peri rupi. ¹³ Ahe avei yuvíraso omboetasa upe imombehu; ndovíroya víteiño avei rumo yuvíreco.

Jesús oyocuai güemimbohe

¹⁴ Coiye catumi tēi, Jesús oyemboyecua güemimbohe once tupri yuvírecoi vahe upe mesave yuvínoi viteseve, oñehengata ahe oyese yeroyaéhisa rese chupe, iyavei ocuerayevisa mombehusar reroyaéhi rese avei. ¹⁵ Ipare aipo ehi güemimbohe upe: “Peso opacatu ivi rupi, pemombehu co ñehesa písrosa resendar peico. ¹⁶ Acoi víroya vahe, iyavei oñepiramo vahe, ahe oñepisirora yuvíreco; acoi ndovíroyai vahe rumo, ahe imocañípirá tēi yuvírecoira. ¹⁷ Co mbahe poromondiisa omboyecua che reroyasar yuvíreco: Che rer pipe omboyepepira caruguar ava sui. Oñehe aveira ñehesa ndicuasai vahe pipe yuvíreco. ¹⁸ Oipisi aveira mboi yuvíreco, yuvíroíhuse mosa oporoyuca vahe, ndoyapoi chietera mbahe yuvíreco chupe; iyavei omondose opo ava imbaheasi vahe haríve, ombogüera aveira yuvíreco” ehi.

Jesús oso ívave

¹⁹ Oñehe pare, yande Yar Jesús oso ívave. Aheve oguapi Vu Túpa acato coti oí. ²⁰ Semimbohe evocoiyase opa yuvíraso opacatu ivi rupi ñehesa písrosa resendar mombehu. Yande Yar avei oipítivii, iyavei mbahe poromondiisa pipe omboyecua uca ité ñehesa písrosa resendar supi eté vahe. Aipo rupive.

LUCAS REMBICUACHIA JESUS RECOCUER RESENDAR SAN LUCAS

Lucas oicuachía Teófilo upe

¹⁻² Imboeteipri Teófilo, setá ava oicuachía yuvireco opacatu aracahendar mbahe imombehupri mboavíyesa cûritei yande pâhuve co Jesucristo recocuer resendar. Acoi ava yipisuive osepia vahe omombehu tupri vahe Jesucristo recocuer ava upe yuvireco, ahe omombehu tupri avei yuvireco cheu. ³ Sese che avei opa aseca tupri yipisuive opacatu co mbahe cua tupri ãgua, Teófilo. Ichui che amoingatu tupri pota icuachiapri sesendar ndeu nara avei sereco. ⁴ Evocoiyase nde ereicua tuprira co porombohesa supi eté vahe acoi nde mbohe agüer.

Túpa rembiguai omombehu Juan Oporoãpiramo vahe ha ãgua

⁵ Yipindar Jesús ha renondeve, Herodes mborerecuar ívi Judea rupindar recose aracahe, ahese aipo judío pahi secoi Zacarías serer vahe. Ahe pahi Abías rupindar secoi. Sembireco aipo pahi Aarón suindar, ahe serer Isabel. ⁶ Co ñuvirío secocuer aviye tupri Túpa upe; viroya tupri opacatu Yar porocuaita yuvireco. Evocoiyase ndipoi eté que ava “mara” ehi vahe yuvireco chupe. ⁷ Zacarías rumo yipisuive ndatahii vahe. Esepia, sembireco ndimembii vahe ité, iyavei oyoya ité ocuacua-cuacuami yuvireco.

⁸ Ñepei ari aipo osupití icuaita tûparo pipe imboetasa reseve iporavíqui ãgua Túpa rovaque yuvireco. ⁹ Pahi recosa ité ëgue ehi aracahe suive, ahese iporavosa Zacarías yipindar yasiapri tûparo maranehi pipe oique vaherä itaisi rapi ãgua. ¹⁰ Itaisi rapi viteseve aipo, opacatu ava oyerure yuvireco ocarve. ¹¹ Aheseve aipo oyemboyecka yande Yar rembiguai itaisi renda maranehi ique coti chupe. ¹² Túpa rembiguai repiase aipo, oyembosiquiyé iteanga. ¹³ Túpa rembiguai rumo aipo ehiño chupe:

—Zacarías —ehi—, eresiquiye eme. Túpa osendu nde yeruresa. Sese nde rembireco Isabel imembira ndeu. Ahe nde rahir rer-ra Juan. ¹⁴ Ereviharetera sese, iyavei oyembovharetera opacatu ava yuvireco nde rahir ohase. ¹⁵ Esepia niha, nde rahir secocuer tuvichara oico Túpa rovaque. Ndoihui chietera uva ricuer sai vahe, iyavei que ambuae mbahe sai vahe; secoira rumo Espíritu Santo reseohaëhi viteseve. ¹⁶ Ëgue ehira omonguerëhi setá ava judío Yar Túpa reroya iri ãgua oico. ¹⁷ Ahe virecora espíritu

píratasa oyese oyoyara Tūpa ñehe mombehusar Elías rese ‘ava guahir rese tiñero yuvireco oyeupe’ oya, ‘toyembohe avei ava ndiporерoyai vahe yuvireco seco catupri vahe aracuasa mboyeroya água rese’ oyapave. Ëgüe ehira ava mbohe imoingatu yande Yar pisi água sereco –ehi chupe.

¹⁸ Evocoiyase,

—¿Mara ahera píha aipo reroya? Che rumo acuacuami eté vichico, iyavei che rembireco ocuacuami avei no –ehi Tūpa rembiguai upe.

¹⁹ —Aní —ehi chupe—. Che aico Tūpa rembiguai Gabriel, Tūpa rovaindar. Ahe niha che mbou ndeu che ñehe água iyavei co ñehesa aviyé vahe mombehu água. ²⁰ Nde rumo ndereroyai acoi amombehu vahe ndeu. Sese co pipe suive ité nandeñehengatui chira eico. Osupitise voi che remimombe-hugüer, acoi ohase nde rahir, ahese ramo ndeñehengatura —ehi aipo Tūpa rembiguai chupe.

²¹ Osáro pucu tēi aipo ocarve ambuae imboetasa eta yuvireco. “¿Mahera píha nose vitéi tūparo pipe sui?” ehi tēi yuvireco chupe. ²² Osëse aipo tūparo pipe sui, niñehengatui voi eté. “Ñaro osepia mbahe tūparo pipe” ehiño ité aipo imboetasa eta yuvireco chupe. Ipo ãta-ãta tēi aipo oñehengatuëhise mbahe mombehu oico.

²³ Ipare omboaviyese ocuaita tūparo pipe, oyevi oso güëtave.

²⁴ Coiye aipo sembireco Isabel ipuruha oico. Judío porocuaita mboyeroyasave nose iri eté ambuae ava píri poyandepo yasi rupi. Ipihañemoñeta: ²⁵ “Yar Tūpa ité ëgüe ehi cheu ava che rese ñeheëhi iri água yuvireco” ehi vorivetesa pipe aracahe.

Tūpa rembiguai Jesú yesu água omombehu

²⁶ Coiye seis yasi pipe Tūpa omundo güembiguai Gabriel tecua Nazaret ve ivi Galilea rupi ²⁷ cuñatai ndaseco marai vahe upe iñehé água; ahe serer María. Ahe omenda pota vahe cuimbahe mborerecuar guasu David suindar José serer vahe rese. ²⁸ Tūpa rembiguai oique co cuña rëtave aipo ehi chupe:

—¡María, Tūpa nde rovasa, erereco mbahe icatupri vahe pítiviisa Yar Tūpa suindar! Tūpa nde rese ité secoi; nde rovasa catu opacatu cuña sui —ehi chupe.

²⁹ Tūpa rembiguai repiase, “¿Mara oya píha co aipo ehi cheu?” ehi tēi osiquiyepave opichañemoñeta rereco. ³⁰ Evocoiyase Tūpa rembiguai aipo ehi chupe:

—María, eresiquiye eme. Esepiá niha, Tūpa ité nde poravo nde rovasa água. ³¹ Cûritei voira rumo ndemembira: ererecora nde membrí; ahe serer-ra Jesú. ³² Ahe niha secovicha catu vaherá secoira; “Tūpa seco ivate vahe Rahir secoi” ehira yuvireco chupe. Iyavei niha Yar Tūpa ité omoinguera

mborerecuar guasu seco ãgua inungar tamoi David aracahe.
 33 Mborerecuar guasu secoira judío recua rupi apirëhi vaherã; imborerecuasa niha apirëhi vaherã ité secoira –ehi.

34 Evocoiyase ahe aipo ehi:

—¿Mara ahera vo aipo che membí viña? Esepiá niha, ndaico vitei vahe cuimbahe rese –ehi Tüpa rembiguai upe.

35 —Espíritu Santo ogüeyira nde harive iva quíha nungar; Tüpa güeco píratasa pipe nde momembira. Sese acoi ohase nde membri seco maranehi vahe, “Tüpa Rahir” hesara chupe.

36 Cûritei nde mu Isabel avei ocuacuami pipe imembí oico; ahe niha ndimembíi vahe yipindar viña, cûritei rumo vireco seis yasi omembrí vie pipe. 37 Esepiá niha, Tüpa upe ndipoi eté mbahe yavai vahe –ehi.

38 Evocoiyase María aipo ehi:

—Che Yar rembiguai aico, tayaviye ayase Tüpa remimbotar cheu nde ñehe rupi –ehi.

Aipo ihe pare, Tüpa rembiguai oyepepi oso ichui.

María oso omu Isabel píri

39 Ahese María oso voi eté ivitri rupi tecua ivi Judea ve.

40 Aheve aipo Zacarías rëta pipe oiqueso oso, oyapo “avirave” omu Isabel upe. 41 Evocoiyase Isabel rie pipe omii imembri ñehe renduse. Ahese Espíritu Santo oique Isabel aviterve.
 42 Ipare osapucai pírata aipo ehi chupe vorivetesave:

—¡Tüpa nde rovasa cuña opacatu sui, iyavei osovasa nde membri! 43 Noromohai eté che píri ereyu vaherã viña, che Yar si. 44 Esepiá, cheu “avirave” ereyapose, che membri omii voi vorivetesave che rie pipe. 45 ¡Sovasapri ereico! Esepiá, ereroya ité ñehesa ndeundar. Iyavei Tüpa omboaviyera güemimombehu nde rese –ehi Isabel chupe.

46 Evocoiyase aipo ihese,

“Che niha amboetei che Yar vichico;

47 cheroriveté Tüpa che Písiosar rese.

48 Esepiá, ahe omahe che rese che reco yemominisa pipe seroyasar che recosave.

Co pipe suive, ‘Sovasapri secoi’ ehira opacatu ava yuvireco cheu.

49 Esepiá niha, Tüpa mbahe mboavaisarëhi, oyapo mbahe tuvichá vahe cheu.

¡Tüpa imboeteipri catu tasecoi yepi!

50 Ahe oiparaísueroco opacatu omboeteisar yepi.

51 Nomboavai eté mbahe yapo.

Osecoreroyi ava oyemboívate ai tẽi vahe.

52 Viroyi mborerecuar seco pírata vahe píratasa sui; ava seco mbegüemi vahe rumo osecomboívate.

53 Ava yaracua pota vahe, omboaracua; ava ‘che aracua vai’ ehi vahe rumo, nomboaracuai eté.

54 Oip̄itivii niha opacatu viroyasareta judío yuvirecoi vahe.

Esepia, ndasesarai eté poroparaisuerecosa mundo äqua
55 güemimombehugüer rupi yande ramoi aracahendar Abraham upe, ichuindar upe avei yepi no” ehi vorivetesapipe omu

Isabel upe.

56 Ipare María opita Isabel piri mbosapi yasi rupi. Ichui oyevi oso güetave.

Juan Oporoäpiramo vahe haragüer

57 Osupitise ari Isabel upe, imembira. Ahe imembrí cuimbahemi. 58 Imu iyavei icotindar oyanduse Tüpa rembiapo mbahe aviyé vahe, aipo ehi yuvireco chupe: “Aviyé ai catu Yar Tüpa secoi co cuña rese” ehi vorivetesave yuvireco. 59 Ocho ari pipe aipo, ahe pítani ombocircuncida yuvireco judío porocuaita mboyeroyasa pipe. Ipare aipo omondo pota iyesupa Zacarías rer yuvireco sese viña, 60 ichi rumo,

—Aní —ehiño—. Juan itera rumo serer —ehi.

61 —¿Mahera vo? Ndipoi eté rumo nde mu rer aipo nungar —ehi yuvireco chupe.

62 Evocoiyase aipo omahe pítani yesupa rese yuvireco ‘¿mbahe píha ahe omondo pota sererguã viña?’ oyapave yuvireco. 63 Evocoiyase aipo iyesupa oporandu ivirapemi rese sese serer oicuachía vaherá. Ahe serer oicuachía: ‘Juan sererguã’ ehi imoi. Ahese aipo opacatu ava: “¿Mara ehi rutei píha co?” ehi tēi oyeupe yuvireco. 64 Ahese ramo Zacarías iñehengatu, omboipi Tüpa upe osapucal oico. 65 Opacatu aipo sēta cotindar oyembosiquiye tēi yuvireco, iyavei aipo opacatu Judea recua rupi omombehu-mbehu mbahe osenia vahecuer yuvireco. 66 Mbahe osendu vahecuer rese avei aipo oporandu-randu oyeupe yuvireco: “¿Mbahe píha aipo pítani oyapora curi?” ehi. Esepia niha, supi eté Tüpa osovasa.

Zacarías sapucai agüer

67 Zacarías, Espíritu Santo píratasa pipe, oñehe Tüpa oyeupe ñehesa pipe aipo ehi:

68 “¡Yande Yar Tüpa imboeteipri tasecoi!

¡Esepia niha, ahe ou yande judío yaico vahe písiro äqua!

69 Ombou niha Poropísiosar güembiguai David suindar yandeu.

70 Ëgüe ehi imombehu opacatu oñehengagüer mombehusar seco maranehi vahe upe aracahe.

71 Ahe yande písirora yande amotarëhimbar sui.

72 Ëgüe ehi Tūpa imbou oporoparaisuerecosa yande ramoi aracahendar upe, iyavei iyemomahenduha äqua güemimbotar maranehi mombehu agüer rese.

73 Evocoiyase, ‘Che supi eté ayapora evoco mbahe’ ehi yande ramoi Abraham upe aracahe

74 yande renose äqua yande amotarëhimbar povri sui ‘tache mboetei osiquiyeëhisa pípe yuvireco’ oya;

75 ‘toyuvirecoi che rembiepiave güeco ñvisa pípe iyavei güeco maranehisa pipe ari yacatu rupi’ oyapave.

76 Nde, che rahir, ‘Co Tūpa ñate vahé ñehe mombehusar secoi’ ehira ava yuvireco ndeu.

Esepia, nde eremoingatura ava recocuer Yar pisi äqua senon-deve eico.

77 Supi eté nde niha eremboyecuara opacatu ava Tūpa up-endar yuvirecoi vahé upe angaipa sui ñeroisa pisi äqua iñepisiro äqua.

78 Esepia, yande Ru Tūpa, oporoparaisuerecosa pípe ombou oporoesapesa ñva pendar yandeu yande reco mbopiasu äqua

79 iyavei ava Tūpa cuaparëhi resape äqua ‘toyuvirecoi mbahe tupri pípe’ oyapave.

Esepia, ahe inungar ava pítumimbisave yuvirecoi vahé, ocañi tēi vaherä yuvireco”

ehi Zacarías.

80 Ichui pítani ocuacua iyavei vireco píratasa Espíritu suindar oyese. Ipare rumo oso oyemboerecua ñvi iporupirëhi rupi. Coiye oyemboyecuara omu Israel pendar upe oico.

2

Jesús yesu agüer

¹ Yipindar mborerecuar guasu Augusto oporocuai oico, “Tayecuachiasa opacatu tecua rupi” ehi. ² Ahe yipindar yecuachiasa mborerecuar Cirenio, Siria pendar rëise. ³ Opacatu ava yuviraso güecua yacatu rupi oyecuachía äqua yuvireco.

⁴ Sese José avei osë Nazaret, Galilea ñvi rupi sui oso ñvi Judea rupindar tecua Belén ve. Esepia niha, aracahendar mborerecuar guasu David aheve oha vahecuer, iyavei José ichuindar avei secoi. ⁵ Ëgüe ehi oyoya yuviraso güembirecoví María rese oyecuachía äqua. María rumo imembira pota ité oico. ⁶ Aheve oyepota ramose, osupiti ari imembira äqua. ⁷ Aheve oha imembrí yipindar vahé cuimbahemi. Ahese María oyao omembri turucuar pípe, ëgüe ehi imoñeno imondo mbahe mimba rembihu ríru pípe. Esepia niha, ndoyosui eté oque äqua aheve yuvireco.

Tūpa rembiguai eta omombehu Jesús haragüer ovesa rārosar upe yuvireco

⁸ Namombríimi Belén sui ovesa rārosar yuvirecoi. Aheve osāro ovesa pítu pipe yuvireco. ⁹ Aviyeteramo tēi oyemboyecua Tūpa rembiguai íva pendar chupe. Tūpa porañetesea avei sendi yívii chupe yuvireco. Ahe sepiase, oyembosiquiyé iteanga tēi yuvireco ichui. ¹⁰ Ahe rumo aipo ehi chupe: “Pesiñuiye eme. Esepiá, che ayu mbahe icatupri vahe mombehu água pēu pe mbovharete água iyavei opacatu ava mbovharete água avei no. ¹¹ Co pipe oha David recua Belén ve Poropísirosar pēu nara. Ahe niha Tūpa Rembiporavo, pe Yarguã secoi. ¹² Icua água peyosura pítani yaopri tuprīmi vahe tui mbahe mímba rembihu ríru pipe” ehi.

¹³ Aviyeteramo tēi oyemboyecua ambuae setá Tūpa rembiguai íva pendar yívii yuvireco. Tūpa upe osapucal yuvireco aipo ehi:

¹⁴ “¡Imboeteipri tasecoi Tūpa ívave!

Ívive ava Tūpa rembiaisu toyuvirecoi tupri oyeaísusa pipe!” ehi osapucal yuvireco.

¹⁵ Opase oyevi Tūpa rembiguai ívave yuviraso, ahese ovesa rārosar aipo ehi oyeupe yuvireco:

—Yaso ru Belén ve; yasepiara aipo mbahe, acoi oicua uca vahe Yar oico yandeu —ehi yuvireco.

¹⁶ Evocoiyase ipoyava yuviraso. Ipare osepiá María, José, Jesús pítani avei yuvireco cute. Ahe pítani omoñenomi mbahe mímba rembihu ríru pipe ino. ¹⁷ Ipare yuvínose omombehumbehu ambuae ava upe Tūpa rembiguai remimombehugüer pítani resendar ñehesa yuvireco. ¹⁸ Evocoiyase opacatu ava oyepíhamondii co ñehesa renduse yuvireco. ¹⁹ María rumo opacatu co mbahe rese oyapisacaño; ahe ehiño ité ipihañemoñetasa. ²⁰ Oyevise ovesa rārosar yuviraso, omboetei iyavei osapucal Tūpa upe yuvireco. Esepiá niha, opacatu mbahe osendu vahe, osepiá vahecuer yuvireco imombehupri rupi tupri ité.

Jesús pítani seropovéhesa Tūpa upe tūparo pipe

²¹ Ocho ari pipe ahe pítani ombocircuncida yuvireco; omundo sererguã Jesús yuvireco, ahe terer tupri avei acoi Tūpa rembiguai omombehu María upe imembíehi viteseve.

²² Ipare omboavíyese ohari güétave oñemoatiro água, ahe aipo ëgue ehi Moisés porocuaita rupi yuvireco yepi, ahese vínose pítani seraso tecua guasu Jerusalén tūparo pipe seropovéhe água Yar upe yuvireco. ²³ Ëgue ehi yuvireco. Esepiá, Yar porocuaita aipo ehi icuachiapri pipe aracahe: “Opacatu yipíndar pítani cuimbahe mini yuviroha vahe

ipehasara Tūpa upe nara yepi” ehi. ²⁴ Yuviraso oporerecosa reropovēhe ãgua yuvireco yande Yar porocuaita rupi: “Ñepei oyovaichor reseve picuhi, anise ñuvirío apicasu peropovēhera” ehi vahe.

²⁵ Ahe pipe mbia Jerusalén ve secoi Simeón serer vahe. Ahe mbia avíye etepri vahe. Oyerure vahe Tūpa upe, osāro vahe avei Israel recua pendar Písicosar imombehupri. Ahe secoi vahe ité Espíritu Santo rese. ²⁶ Ahe chupe Espíritu Santo opa uca oicua “eresepia rane itera Poropísicosar Tūpa remimbou nde mano renondeve” ehi vahe. ²⁷ Ahe ari pipe Espíritu Santo viroguata tūparove. Oyepotase José, María reseve yuvireco tūparove Jesús pítani reropovēhe ãgua Tūpa porocuaita rupi tupri, ²⁸ ahese Simeón oyemboya oso sese, osupi ichi sui, viroyeroqui Tūpa upe señoha aipo ehi:

²⁹ “Che Yar, cüritei che, nde rembiguai, amano tupriño itera. Esephia niha, nde remimombehugüer eremboavíye ité cheu.

³⁰ Asephia ité niha Poropísicosar vichico cute.

³¹ Nde niha erembou opacatu ava rembiepiave.

³² Ahe niha poroesapesa ité secoi.

Esephia, omboyecuara mbahe supi eté vahe ava ndahei vahe judío yuvirecoi vahe upe,
iyavei omondara poromboeteisa nde recua Israel pendar
judío yuvirecoi vahe upe”
ehi oyeroqui.

³³ José iyavei María ndoyembovhai tēi yuvireco pítani rese Simeón yeroqui renduse. ³⁴ Evocoiyase Simeón osovasa ahe pítani iyesupa reseve. Ipare aipo ehi ichi María upe:

—Esendu, co pítani reroyaëhisa pipe setá yande mu judío ovíapira mbahe tēi pipe yuvireco; ambuae rumo seroya pipe sovasapri yuvirecoira. Ahe avei omboyecuara mbahe ava upe. Amove rumo viroïroñora yuvireco. ³⁵ Ipipe sui ava piñañemoñetasa icuasara curi. Iyavei co opacatu mbahe tasira nde piña pipe inungar quise pucu osasara nde piña viña —ehi chupe.

³⁶ Aheve avei cuña cuacuami yaracua vahe secoi, ahe serer Ana, Fanuel rayri, Aser suindar. Ocuñataimiseve rumo omenda, iyavei secoi raimi tēi omer rese siete aravíter rupive.

³⁷ Cüritei secoi omer mano pare ochenta y cuatro aravíter. Nosei eté tūparo pipe sui oico. Ëgue ehi yande Yar mboetei pítu, ari rupi oyecuacusa pipe iyavei oyeruresa pipe avei oico no. ³⁸ Ahe evocoiyase ahesa reseve avei ou pítani upe, “Avíye ndeu” ehi Tūpa upe. Ipare oñehe secocuer rese opacatu ava Jerusalén pendar osāro vahe güecua písiro ãgua upe oico.

Jesús pítani reroyevi agüer Nazaret ve

³⁹ Evocoiyase opacatu Moisés porocuaita mboaviyere, opa oyevi Galilea pendar güecua Nazaret ve yuvireco. ⁴⁰ Ahese pítani ocuacua catumi imbahecua-ecua irimi eté oico iyavei ipírata catu irimi. Esepio, Tüpa osovasa ité sereco no.

Jesús chihivahē tūparo pipe secoi

⁴¹ Iyesupa yuviraso aravíter yacatu Jerusalén ve Pascua pieta repia yepi. ⁴² Jesús doce aravíter virecose, ahese viraso iyesupa Jerusalén ve oyeupi pieta repia yuvireco. Esepio, ēgüe ehi eté judío recocuer pietase yuvireco yepi. ⁴³ Ahe pieta pare voi, oyevise yuvireco güecosave, ahese Jesús opitaño Jerusalén ve; ichi rumo iyavei tu José ndoicuai eté ipitase yuvireco. ⁴⁴ “Ouño revo ava pāhu rupi” ehi yuvireco chupe viña; aipo ehiño ité ñepei ari pipe yuvireco chupe. Oseca tēise rumo omu pāhu rupi, iyavei omboripar pāhu rupi avei no, ⁴⁵ ndoyosui eté yuvireco. Ahese oyevi iri tēi Jerusalén ve seca yuvireco.

⁴⁶ Imombosapisa ari pipe oyosu ramo tūparo pipe yuvireco. Aheve oguapi ava Tüpa porocuaita rese oporombohe vahe pāhuve oī; oyapisaca iñehre rese iyavei oporandu-randu ahe ava upe Tüpa Nehengagüer rese oī. ⁴⁷ Evocoiyase opacatu ava ndoyemboviñai tēi imbahecua vaisa rese yuvireco. Esepio, oporanduse mbahe rese yuvireco chupe, omboyevi tupri voi-voiño ité ñehesa. ⁴⁸ Oyosuse iyesupa, oyepihamondii yuvireco. Ahese ichi aipo ehi chupe:

—Che membri, ¿mahera vo ēgüe ere eico oreu? Nde recasa tēi opacatu rupi, ore mopihañemoñeta ati uca eve —ehi.

⁴⁹ Evocoiyase,

—¿Mahera vo che reca co coti rupi tēi peye peico? ¿Ndapeicuai vo che Ru rēta pipe aico vaherā? —ehi osi upe.

⁵⁰ Iyesupa rumo ndosenducuai eté aipo oyeupe hesa yuviréco.

⁵¹ Evocoiyase oyevi Nazaret ve oso supi. Aheve omboyeroyaño ité oyesupa. Ichi niha opacatu co mbahe rese oyapisacaño ité. ⁵² Ahese Jesús ocuacua-cuacua iri, iyetei catu avei imbahecua catu iri avei oico no. Secoi tupri ai eté Tüpa upe iyavei ava eta upe avei no.

3

Juan Oporoñpiramo vahe secoi ivi iporupirēhisa rupi

¹ Quince aravíter pipe mborerecuar guasu Tiberio recose, Poncio Pilato evocoiyase mborerecuar secoi Judea rupi, Herodes avei mborerecuar secoi Galilea ve, tivri Felipe evocoiyase mborerecuar secoi Iturea ve iyavei Traconite ve, Lisanias avei mborerecuar secoi Abilinia ve. ² Anás iyavei Caifás ahe pahi rerecuar ivate catu vahe yuvirecoi. Ahese

Tūpa, “Emombehu che ñehe ava upe cute” ehi Zacarías rahir Juan upe oico ivi iporupirēhisave. ³ Juan evocoiyase oso opacatu iai Jordán ivi oico, supi aipo ehi ava upe: “Pemboasi pe angaipa, peyevi Tūpa upe, ahese opoāpiramora Tūpa pēu ñero ãgua pe angaipa rese” ehi. ⁴ Co yaviye ité Tūpa ñehe mombehusar Isaías rembicuachiagüer pipendar aipo ehi vahe:

“Sendusa ivi iporupirēhisave ava sapucaisa aipo ehi vahe: ‘Pemoingatu yande Yar raperā, pemohivi tupri avei’ ehi.

⁵ Evocoiyase opacatu ivisocuer opara imboapiposa chupe, opacatu ivitri ïvate vahe iyavei ivitri mini opara imboyoyasa tupri no.

Acoi peri ipari vahe, ahe imohivisapara; peri ipicucu ati vahe opara imboapiposa tupri chupe.

⁶ Iyavei opacatu ava osendura ñehesa pisirosa resendar Tūpa remimbou yuvireco cute’ ehi vahe” ehi.

⁷ Ava rehii yuvinosepa chupe ‘tayande ãpiramo’ oyapave yuvireco viña. Ahe rumo aipo ehi: “¡Pe mboi mboetasa tēi peico! ¿Ava vo, ‘Pesēra Tūpa ñemoirosa ou vaherā sui’ ehi tupri tēi pēu? ⁸ Yipindar toyecua tupri rane yande Yar upe peyevisa pe angaipa mboasisa pipe. Iyavei ndapeyeroyai chira ‘ore Abraham suindar oroico’ pe hesa rese tēi peñepisiro ãgua. Esepia, Tūpa oicatuño ité co ita sui Abraham suindar nungar tupri apo ãgua oyeupe nara yepi. ⁹ Hacha niha imoingatusa voi eté opacatu ivira iha naporai vahe sapo rupi yasia ãgua yepi. Yasiapri evocoiyase imondosapara tatave” ehi.

¹⁰ —¿Mbahé pihá evocoiyase oroyapora ore recocuer recuñaro ãgua oroico? —ehi ava rehii oporandu yuvireco chupe.

¹¹ —Pe pereco vahe ñuvirío pe camisa, ñepei pemondo ava ndovirecoi vahe upe; iyavei pe pereco vahe tembihu, pemboyahomi tēi ambuae ava ndovirecoi vahe upe —ehi imboyevi ava upe.

¹² Yugüeru avei moviro ava sui guarePOCHI rerocuasar ‘tayande ãpiramo’ oyapave yuvireco. Ipare oporandu Juan upe mbahe rese yuvireco:

—Porombohesar, ¿mbahé vo ore oroyapora Tūpa rupi ore guata ãgua oroico? —ehi yuvireco chupe.

¹³ Evocoiyase aipo ehi ahe ava yuvirecoi vahe upe:

—Aní perocua catu iri guarePOCHI pēu imombehusa sui —ehi.

¹⁴ Iyavei amove sundao oporandu mbahe rese yuvireco chupe:

—Ore no, ¿mbahé vo ore oroyapora? —ehi.

—Ndaperocuai chietera que mbahe ambuae ava sui, ndapeñeha-ñehe tēi chira ava upe sembiapoëhi rese, iyavei peyembovihñora pe poraviqui reprí rese —ehi sundao upe.

¹⁵ Ava rumo, “¿Ndahei pīha co Poropīsirosar sārombri secoi?” ehi tēi Juan upe yuvireco. ¹⁶ Juan rumo aipo ehi opacatu ava upe: “Che oponipiramo i pipe tēi; oura rumo ambuae che raquicuei, ahe pe āpiramora Espíritu Santo tata nungar pipe. Ahe seco pīrata catu vahe secoi che sui. Sese cheu ndiyai eté ahe ipitaquisā yora āqua ichui” ehi. ¹⁷ “Ahe güeru trigo mbovevesa ihigüer sui ipeda āqua. Sāhi evocoiyase yapocatusa, ihigüer rumo imondosa tata apirēhi vahesave” ehi ava upe.

¹⁸ Omombehu-mbehu vite ñehesa avīye vahe ava upe ‘toymonguerēhi güecocuer recuñaro āqua yuvireco’ oya. ¹⁹ Ipare rumo Juan oñeho pīrata mborerecuar Herodes upe secocuerai rese. Esepiá, vivri Felipe rembireco Herodías rese secoi, iyavei setá ambuae mbahe naporai vahe sembiapo. ²⁰ Sese Herodes oyapoño ambuae mbahe tēi: seroyaēhisa pipe osoquenda ucaño Juan sereco.

Jesús āpiramosa

²¹ Yipindar rumo voquenda viteēhiseve Juan oñapiramo setá ava oico, aheseve avei oñapiramo Jesús. Jesús yerure viteseve, aviyeteramo tēi oyemboi tupri iva. ²² Ipare Espíritu Santo ogüeyi ou iharive apicasu nungar, iyavei oyeendu ñehesa iva sui aipo ehi vahe:

—Nde che Rahir ereico, che rembiaisu; sese avīha ité nde rese —ehi.

Ava eta oyesu vahe Jesucristo yesu renondeve

²³ Jesús virecose treinta aravíter, ahese ramo omboipi oporombohe. Ahe icuaprí vahe ité José rahir secose viña. José Elí rahir secoi, ²⁴ Elí evocoiyase Matat rahir, ahe Matat evocoiyase Leví rahir, Leví evocoiyase Melqui rahir, ahe Melqui evocoiyase Jana rahir, Jana evocoiyase José rahir, ²⁵ ahe José Matatías rahir, Matatías evocoiyase Amós rahir, ahe Amós evocoiyase Nahúm rahir, Nahúm evocoiyase Esli rahir, ahe Esli Nagai rahir, ²⁶ Nagai evocoiyase Maat rahir, ahe Maat Matatías rahir, Matatías evocoiyase Semei rahir, ahe Semei evocoiyase Josec rahir, Josec evocoiyase Judá rahir, ²⁷ ahe Judá Joanán rahir, Joanán evocoiyase Resa rahir, ahe Resa evocoiyase Zorobabel rahir, Zorobabel evocoiyase Salatiel rahir, ahe Salatiel Neri rahir, ²⁸ Neri evocoiyase Melqui rahir, ahe Melqui Adi rahir, Adi evocoiyase Cosam rahir, Cosam evocoiyase Elmadam rahir, Elmadam evocoiyase Er rahir, ²⁹ ahe Er Jesús rahir, Jesús evocoiyase Eliezer rahir, ahe Eliezer Jorim rahir, Jorim evocoiyase Matat rahir, ³⁰ ahe Matat Leví rahir, Leví evocoiyase Simeón rahir, ahe Simeón evocoiyase Judá rahir, Judá evocoiyase José rahir, ahe José

Jonam rahir, Jonam evocoiyase Eliaquim rahir,³¹ Eliaquim Melea rahir, ahe Melea Mena rahir, Mena evocoiyase Matata rahir, ahe Matata evocoiyase Natán rahir,³² Natán David rahir, ahe David evocoiyase Isaí rahir, Isaí Obed rahir, ahe Obed evocoiyase Booz rahir, Booz Sala rahir, ahe Sala evocoiyase Naasón rahir,³³ Naasón Aminadab rahir, ahe Aminadab evocoiyase Admin rahir, Admin evocoiyase Arni rahir, Arni evocoiyase Esrom rahir, ahe Esrom evocoiyase Fares rahir, Fares evocoiyase Judá rahir,³⁴ ahe Judá Jacob rahir, Jacob evocoiyase Isaac rahir, ahe Isaac Abraham rahir, Abraham evocoiyase Taré rahir, Taré evocoiyase Nacor rahir,³⁵ ahe Nacor Serug rahir, Serug evocoiyase Ragau rahir, ahe Ragau evocoiyase Peleg rahir, Peleg Heber rahir, ahe Heber evocoiyase Sala rahir,³⁶ Sala Cainán rahir, ahe Cainán evocoiyase Arfaxad rahir, Arfaxad evocoiyase Sem rahir, ahe Sem evocoiyase Noé rahir, Noé evocoiyase Lamec rahir,³⁷ ahe Lamec Matusalén rahir, Matusalén evocoiyase Enoc rahir, Enoc evocoiyase Jared rahir, ahe Jared Mahalaleel rahir, Mahalaleel evocoiyase Cainán rahir,³⁸ ahe Cainán evocoiyase Enós rahir, Enós evocoiyase Set rahir, ahe Set Adán rahir, Adán evocoiyase Túpa rahir.

4

Jesús recoāhasa

¹ Jesú斯 Espíritu Santo rese ité secoi. Ahe osē iai Jordán sui oso. Ipare Espíritu viroguata ivi iporupirēhisa rupi. ² Aheve cuarenta ari secoise Caruguar osecoāha. Ndocarui avei oico. Sese ndasiepoi eté. ³ Caruguar evocoiyase aipo ehi chupe:

—Túpa Rahir ité nde recose, co ita sui eyapo pan cūritei —ehi.

⁴ Evocoiyase Jesú斯 omboyevi chupe:

—Che Ru ñehe rumo icuachiapri pipe aipo ehi: ‘Ndahei chira pan suiño ava yuvirecovera’ ehi —ehi Caruguar upe.

⁵ Ipare Caruguar viraso ivate vahesave. Aheve ñepei reseve opacatu ava-ava tēi mborerecuasa ivi pipendar omboycua chupe. ⁶ Ipare aipo ehi chupe:

—Che amondora opacatu ivi rupindar mborerecuar pīratasa iyavei mbahe porañete vahe nde povrīve. Esepi niha, co opacatu cheu imbourpri; iya ité amondo vaherā ava upe che remimbotar rupi. ⁷ Acoi ereñenopihase cheu che mboetei áqua, ahese opacatu co mbahe ereipisira nde mahera —ehi tēi Caruguar chupe.

⁸ —Icuachiapri pipe rumo: ‘Emboetei nde Yar Túpa, ahe güeraño tupri avei eremboyeroyara’ ehi —ehi Caruguar upe.

⁹ Ipare Caruguar víraso oyeupi tecua guasu Jerusalén ve. Aheve ovíroyeupi tūparo apíterve. Aheve Caruguar aipo ehi chupe:

—Tūpa Rahir ité nde recose, eviapi coháve sui. ¹⁰ Esepiá niha, icuachiapri pípe:

‘Tūpa oyocuaira güembiguai eta nde rāro água.

¹¹ Ahe nde mopuhara yuvireco que ñepei ita nde momara rāgúer sui’ ehi —ehi Caruguar chupe.

¹² Evocoiyase omboyevi Caruguar upe:

—¡Aní! Icuachiapri pípe niha aipo ehi avei: ‘Nderesecoáhai chira nde Yar Tūpa’ ehi —ehi chupe.

¹³ Ahese Caruguar ndoicatu iri eté Jesús recoáha água oico. Ipare oyepepiño raimi tēi oso ichui.

Jesús omboipi oporombohe Galilea rupi

¹⁴ Jesús, Espíritu Santo reco píratasa pípe, oyevi oso Galilea ve. Ipare serácula oguata opacatu tecua-tecuami rupi.

¹⁵ Esepiá, ahe oporombohe judío tūparo pípe oico. Ahese opacatu ava omboetei yuvireco.

Jesús oyevi Nazaret ve

¹⁶ Ichui Jesús oyevi Nazaret ve ocuacua agüerve. Aheve judío mbituhusa ari pípe oique tūparove inungar oyapo yepi.

Ahese opúha ‘tayeroqui icuachiapri maranehi pípe’ oya.

¹⁷ Evocoiyase tūparo rese ñangarecuar pítiyiisar omondo Tūpa ñehe mombehusar Isaías rembicuachía chupe. Oyorase ahe cuachiar, oyeroqui icuachiapri aipo ehi vahe pípe ohā:

¹⁸ —“Yar Espíritu secoi che rese.

Esepiá niha, ahe ombou che cuaitarā cheu co ñehesa avíye vahe mombehu água ava iparaísu vahe upe.

Che cuaita avei ava mbahe-mbahe tēivriye yuvirecoi vahe senose água ichui, iyavei ava ndasesapísoi vahe ambosarecora; iyavei che cuaita ava mbahe-mbahe tēi rasicuer oiporara vahe sui senose água,

¹⁹ iyavei ‘cūritei Yar oyemoingatu oporovasasa mundo água pēu’ he água” ehi icuachiapri pípe

—ehi oyeroqui.

²⁰ Sese oyeroqui pare, oyapoapipa cuachiar imondo tūparo rese ñangarecuar pítiyiisar upe. Ipare oguapi oī ava rembiepi-ave. Ahese opacatu tūparo pipendar omahe ati yuvireco sese.

²¹ Evocoiyase ahe oñeha aipo ehi:

—Cūritei yaviye co icuachiapri pipendar opacatu pe rovaque —ehi.

²² Opacatu ava oñeha tupriño ité yuvireco sese. Ndoyembóvihai tēi iñeha tupri renduse yuvireco. Oporandu-randu rumo yuvireco oyeupe:

—¿Ndahei vo acoi co José rahir tēi? —ehi yuvireco chupe.

²³ Ahe rumo aipo ehi ava upe:

—Pe aipo peyera cheu: ‘Oporombogüera vahe, eñeposano nde ae eico’ peyera. Ipare aipo peyera cheu: ‘Acoi orosendu vahe nde rembiapogüer Capernaum pipe, ēgue ere avei eyapo cohabe nde recua pipe ité’ peyera cheu —ehi.

²⁴ —Supi eté, ndipoi eté niha que ñepei yepe Tūpa ñehe mombehusar oipisi tupri vahe güecua pipe yuvireco yepi. ²⁵ Supi tupri ité Tūpa ñehe mombehusar Elías recose, ñehe rupi tupri ndoquii eté mbosapi araviter yemombitesa rupi oico. Sese oime tiavor opacatu Israel ivi rupi aracahe. Ahese setá etepri cuña imer mano vahecuer oime Israel recua rupi viña, ²⁶ Tūpa rumo nomondoi Elías cuña imer mano vahecuer Israel pendar upe ipitivii água. Ēgue ehi rumo omundo cuña ndahei vahe Israel pendar ipitivii água. Ahe cuña tecua Sarepta pendar, ahe Sarepta Sidón ípiimindar. ²⁷ Iyavei setá ava oime Israel recua pipendar imbaheasi vahe lepra rericasar yuvireco evocoí Tūpa ñehe mombehusar Eliseo recose. Evocoí ava yuvirecoí vahe rumo ndipoi eté que ñepei ocuera vahe yuvireco; Naamán año rumo Eliseo opa uca ombogüera, ahe mbia Siria pendar ndahei vahe Israel pendar secoi —ehi ava upe.

²⁸ Ahese opacatu ava judío tūparo pipendar oñemoiró iteanga yuvireco sese aipo mbahe renduse. ²⁹ Sese opa voi eté opūha Jesús reraso água tecua pipe sui ivitri ivi socuerve yuvireco, ahe iharive tecua yaposa. Ahe ichui oiti pota yuvireco viña. ³⁰ Jesús rumo ipāhu sui osē tupriño oso.

Jesús ombogüera mbia caruguar vireco vahe oyese

³¹ Ichui Jesús oso Capernaum ve, ahe tecua Galilea rupindar. Aheve ombohe ava oico mbītuhusa ari pipe. ³² Ipare opacatu ava, “¡Mara ehi rutei!” ehi tēi iporombohesa renduse yuvireco. Esepiá niha, ahe oñehe güeco pīratasa pipe.

³³ Aheve judío tūparo pipe oime mbia vireco vahe caruguar oyese, ahe oñehe pīrata Jesús upe:

³⁴ —¡Ore mañeco tēi eme eve! ¡Mahera ereyuño tēi cohabe oreu, nde, Jesús Nazaret pendar! ¿Ereyu vo ore mocañi água tēi? Che orocua ité. Nde niha seco maranehi vahe ereico Tūpa suindar —ehi chupe.

³⁵ Evocoiyase,

—¡Quiriri, esē co mbia sui! —ehi oñehe pīrata caruguar upe.

Ahese caruguar omboviapi ahe mbia ava rovai, osē ocua ichui; nomomarai eté rumo. ³⁶ Opacatu ava oyembosi quiye, iyavei oporandu-randu tēi mbahe rese oyeupe yuvireco:

—¿Mara ehi vo aipo oñehe oico? ¡Esepiá, co mbia opīratasa pipe oyocuai caruguar ava sui imose água! —ehi yuvireco.

³⁷ Sese Jesús rerācua oyandu opacatu tecua-tecuami ivirindar yuvireco.

Jesús ombogüera Simón Pedro rembireco si

³⁸ Evocoiyase Jesús osē judío tūparo pipe sui oso, oique Simón Pedro rētave. Simón rembireco si sohí iteanga ou. Evocoiyase oñeha ahe pendar sese Jesús upe ‘tombogüerami tēi’ oyapave yuvireco. ³⁹ Evocoiyase Jesús oyeaiví oso chupe sohí sui imbogüera ãgua. Ocuera pare voi ahe cuña oñarapuha; ohañeco ahe ava yuvirecoi vahe rese.

Jesús ombogüera setá ava imbaheasí vahe

⁴⁰ Ari so ramomise opacatu ava imbaherasisa ambuae tēi vahe güeru Jesús upe yuvireco. Ahe evocoiyase opo omundo iyacatu iharive ñepei-peí imbogüera. ⁴¹ Iyavei setá ava sui opa omose caruguar. Evocoiyase caruguar osapucai tēi aipo ehi yuvireco:

—¡Nde acoi Tūpa Rahir ité ereico! —ehi.

Ahe rumo oñeha pírata caruguar upe, nomoñeha iri. Esepia niha, caruguar oicua ité ahe Tūpa Rembiporavo seco rese yuvireco.

Jesús oporombohe judío tūparo rupi oico

⁴² Ahere ayihive cõhe ramomise, Jesús osē tecua pipe sui, oso ivi iporupiréhisave. Ava rumo oseca-secaño ité yuvireco; osupitiño ité secosave yuvireco. Oipota ahe oyesui ichoëhi ãgua ité yuvireco vinã. ⁴³ Ahe rumo aipo ehi ava eta upe:

—Tamombehu rane catu ambuae tecuave avei ñhesa aviye vahe Tūpa mborerecuasa resendar ava upe. Esepia, aherā niha che mbousa —ehi.

⁴⁴ Ëgüe ehi Jesús oguata oporombohe Judea tūparo rupi oico.

5

Pira mboha ati agüer

¹ Ñepei ari Jesús secoi ipa Genesaret popi rupi. Aheve ava rehii oyepota yuvireco chupe, oyere ati yuvireco sese. Esepia niha, ahe osendu pota ité Tūpa Ñehengagüer yuvireco. ² Aheve oime ñuvirío carite imbehí popi. Ahe ava pira mbohasar opa yuvinose evocoi carite pipe sui yuvireco. Ipare opira mbohasa oyosei yuvinoi. ³ Evocoiyase Jesús osepiase, oha Simón carite pipe iyavei aipo ehi chupe: “Tosiri catumi tēi chihí coi coti iai popi sui” ehi. Ipare oguapi oñi carite pipe. Aheve ombohe ava cute. ⁴ Oñeha pare aipo ehi Simón upe:

—Yaso ipa tipi catu vahesave. Aheve erembohabara pira —ehi.

⁵ Simón rumo omboyevi chupe:

—Porombohesar, orosāha tēi niha pītu momba pira mboha oroico. Nde porocuaita pipe rumo amondo irira pira mbohasa īve —ehi.

⁶ Ëgüe ehise, pira rehii omondoromi ombohasa yuvireco. ⁷ Ahese oyaiti yuvireco omboetasa evoco ambuae carite pipe yuvirecoi vahe upe ‘toyugüerumi yande pītivii’ oyapave yuvireco chupe. Ahe yugüeru chupe. Ipare opa ñuvirío carite omboapipo tupri yuvireco; seni iri rumo omondo ipive. ⁸ Co mbahe repiase, Simón Pedro oñenopihā oso sovai aipo ehi chupe:

—¡Eyepepimi tēi che sui, che Yar! ¡Esepiá, che yangaipa vahe tēi aico! —ehi.

⁹ Esepiá, Simón iyavei opacatu ava yuvirecoi vahe supi osiquiyé iteanga co pira rehii repiase yuvireco. ¹⁰ Iyavei Simón mboetasa ambuae carite pipendar ahe Santiago, Juan Zebedeo rahir yuvirecoi. Jesús rumo aipo ehiño Simón upe:

—Eresiquiye eme; co pipe suive inungar pira eremboha, ëgüe ere aveira ava reca cheu nara —ehi.

¹¹ Evocoiyase opa vīnose carite ivi ãtasave yuvireco, oseyapaño opacatu mbahe. Ipare yuviraso supi.

Jesús ombogüera ava lepra rerecosar

¹² Ñepei ari Jesús secoise tecua pipe, aheve oime mbia lepra vireco vahe opacatu güetecuer rese. Jesús repiase, oñenopihā oyeaivi oso chupe. Ipare oporandu aipo ehi:

—Che Yar, ereipotase, iya nde che mbogüerami eve —ehi chupe.

¹³ Evocoiyase, opocose sese,

—Aipota. ¡Erecuerara cūritei! —ehi chupe.

Aipo ihe ramoseve voi eté ocuera. ¹⁴ Ipare oyocuai aipo ehi chupe:

—Eremombehu eme nde cuerasa ambuae ava upe; esoño, eyemboyecua judío pahi upe. Ipare eicuavēhe nde porercosa nde cuerasa resendar Moisés porocuaita rupi. Ipipe sui toicua opacatu ava nde cuerasa yuvireco —ehi chupe.

¹⁵ Jesús rerācua rumo oyembouvicha catu-catu iri eté. Evocoiyase setá ava oyemboya yuvireco sese ifiehe rendu ãgua ‘tayande mbogüerami tēi yande mbaherasisa sui’ oyapave yuvireco. ¹⁶ Ava rehii sui rumo amove Jesús oyepepiño ahe aemi oyerure ãgua yepi.

Jesús ombogüera ava ndoguatai vahe

¹⁷ Ñepei ari Jesús oporombohe oico. Yar Tūpa pīratasa vireco oyese ava mbogüera ãgua. Aheve avei oguapi yuvinoi fariseo, Moisés porocuaita rese oporombohe vahe avei ipiri yuvireco. Ahe yugüeru opacatu Galilea tecua-tecuami rupi sui

yuvireco. Iví Judea rupi sui, tecua Jerusalén sui avei yugüeru no. ¹⁸ Ahese ava ndoguatai vahe güeru supa pipe yuvireco. Viroique pota oi pipe sovai eté seroyí água yuvireco viña; ¹⁹ ndoicatui eté rumo seroique yuvireco ava rehii pāhu rupi. Evocoiyase viroyeupi yeupisa rupi ahe oi ipe vahe harive yuvireco. Aheve virocua teca ichui. Supi viroyí imbaheasi vahe supa pipe imondo yuvireco opacatu ava rembiepiave sovai. ²⁰ Ahe oicuase co mbia yuvirecoi vahe oyese yeroysa, ahese aipo ehi imbaheasi vahe upe:

—Che mboripar, che ñero nde angaipa rese ndeu —ehi.

²¹ Ichui oporombohe vahe Moisés porocuaita rese iyavei fariseo ipihañemoñeta ati voi tēi yuvireco: “Co mbia oyemboivate ai tēi vahe Tūpa ñehe nungar pipe tēi; Tūpaño ité niha oicatu ava angaipa upe oñero água” ehi tēi oyeupe yuvireco.

²² Ahe rumo oicuaño ité ahe ava pihañemoñetasa. Evocoiyase aipo ehi chupe:

—¡Mahera vo pepihañemoñeta rai tēi che rese! ²³ ¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pīha, anise: ‘Epūha, eguata’ hesa tie? ²⁴ Tapeicua ru che, Ava Ríquehir, areco ité mbororecuasa co iví pipe ava angaipa upe che ñero água —ehi.

Evocoiyase,

—Eñarapuha, esupi nde rupa, eso nde rētave —ehi imbaheasi vahe upe.

²⁵ Ahese opūha voi ava rovaque, osupi vupagüer. Ipare osapucai oso güétave Tūpa upe. ²⁶ Ahese opacatu tupri ité ava, “¡Too! ¿Mara ehi rutei pīha co?” ehi tēi imboeteisave yuvireco. Iyavei osiquiyepave aipo ehi yuvireco:

—Co pipe yaselia mbahe ndayasepiai vahe ité —ehi.

Jesús oñehe Leví upe

²⁷ Ichui osëse Jesús, osepia mbia Roma ve nara guarePOCHI rerocuasar Leví serer vahe, ahe guarePOCHI rerocuasave chini. Sepiase,

—Erio che rupi —ehi chupe.

²⁸ Evocoiyase Leví opūha. Oseyapa oporavíquisa, oso supi.

²⁹ Ipare Leví oyapo pieta guasu chupe nara güétave. Aheve iyemborisave setá imboetasa ava guarePOCHI rerocuasar iyavei ambuae ava ocaru yuvínoi ipíri. ³⁰ Pieta repiasar fariseo yuvirecoi vahe rumo iyavei ipāhu pendar Moisés porocuaita rese oporombohe vahe avei, ahe omboipi semimbohe upe oñehe mara aipo ehi yuvireco chupe:

—¡Mahera ru pecaru iyavei pecahu guarePOCHI rerocuasar rese iyavei ambuae ava yangaipa guasu vahe rese tēi avei no! —ehi.

³¹ Jesú rumo aipo ehi chupe:

—Ava nimarai vahe ndosecai eté oporoposano vahe; imbaheasi vaheño rumo oseca yuvireco. ³² Esepi, che ndayui ava seco catupri vahe reca; che rumo ayu ava yangaipa vahe reca Tūpa uve iyevi äqua yuvireco —ehi.

Yecuacusa rese ñhesa

³³ Ipare ava oporandu yuvireco chupe:

—Mahera vo oyecuacu serai iyavei oyerure Juan Oporoäpiramo vahe rupindar yuvireco, fariseo rupindar avei no; nde remimbohe rumo yuvirocaruño ité, yuviroihuño avei no? —ehi.

³⁴ Ahe rumo omboyevi chupe aipo ehi:

—Ndiyai eté ichohopri mboycuacu mendasave imer oicove viteseve ipähuve. ³⁵ Oimera rumo ari imer reraso äqua ichui, ahese ramo oyecuacura yuvireco cute —ehi.

³⁶ Iyavei ambuae mbahe rese oporombohe imboyevi äqua:

—Ndiyai eté ava upe virocua vaherä turucuar ipiasu vahe sui ambuae turucuar cuacuami vahe apete äqua. Esepi niha, ägue ehise evocoiyase turucuar ipiasu vahe omomara; iyavei turucuar ipiasu vahe apirer naporai chira turucuar cuacula vahe rese —ehi—. ³⁷ Iyavei no, ndiyai eté ñoñasa uva ricuer piasu mbahe pirer cuacula pipe no. Esepi niha, ägue ehise, uva ricuer piasu evocoiyase oparaombopu mbahe pirer cuacula viña, ägue ehira oyepiyerepa, mbahe pirer avei evocoiyase ocañi tēira viña. ³⁸ Uva ricuer piasu rumo yamondora mbahe pirer piasu pipe. ³⁹ Iyavei ndipoi eté que ava oihu vahe uva ricuer ipiasu vahe yuvireco uva ricuer cuacula vahe yusei ai pare. Esepi niha, ava aipo, ‘Co uva ricuer cuacula vahe aviye catu vahe yepi’ ehi yuvireco —ehi ava upe.

6

Jesús remimbohe oipoho trigo mbituhusa ari pipe yuvireco

¹ Ñepei mbituhusa ari pipe Jesú viroguata güemimbohe mbahe miti pahu rupi. Semimbohe evocoiyase oipoho-poho yuviraso trigo rāhi. Ipare oyequii opo pipe sāhi yuvireco igua. ² Evocoiyase fariseo osepiase, aipo ehi yuvireco semimbohe eta upe:

—¡Mahera peporavíquiño tēi co mbituhusa ari pipe peico! —ehi.

³ Jesú rumo omboyevi chupe:

—Peicua tēi niha icuachiapri aracahendar mborerecuar guasu David rembiapogüer resendar ñhesa ondugüer reseve ndasiepoise yuvireco. ⁴ Ahe niha oique ité Tūpa rēta pipe, opoco pan imboeteipri Tūpa upendar rese evocoi pahi upe

güeraño ipotasa vahe ihu ãgua yepi. Ahe rumo ohu, ondugüer tohu avei omondo —ehi.

⁵ Iyavei aipo ehi chupe:

—Ava Ríquehir mbítuhusa arí rerecuar ité secoi —ehi fariseo upe.

Jesús ombogüera mbia ipo nomii vahe

⁶ Ambuae mbituhusa arí pipe, Jesús oique judío tūparo pipe oporombohe oico. Aheve mbia yasu cotí ipo nomii vahe secoi. ⁷ Moisés porocuaita rese oporombohe vahe, fariseo avei omahengatu Jesús rese yuvireco ‘ombogüerara pīha co mbia mbituhusa arí pipe?’ oya; ‘yaiñehengapo angahu’ oya-pave tēi yuvireco. ⁸ Ahe rumo oicuaño ité ipīhañemoñetasa oico. Ipare aipo ehi evocoí mbia ipo nomii vahe upe:

—Epūha cohabe terehā ava pāhuve —ehi.

Ahe mbia evocoiyase opūha, opita aheve ohā ⁹ Ahese Jesús oporandu ahe ava upe:

—Aporandura mbahe rese pēu —ehi—. ¿Mbahe vo yaposara mbituhusa arí pipe yepi, mbahe tupri pīha, anise mbahe naporai vahe tie? ¿Yaipísiro pīha ava recocuer; yamocañi uca tēi tie? —ehi.

¹⁰ Evocoiyase omahengatu oyese ava oyere tupri vahe rese. Ipare aipo ehi ava ipo nomii vahe upe:

—Eichoho nde yiva —ehi.

Ahe mbia evocoiyase oichoho oyiva; evocoiyase ipo ocuera tupri ité. ¹¹ Evocoiyase oñemoiro catuño ité yuvireco sese, iyavei oporandu-randu oyeupe yuvireco ‘¿mara yahera pīha imomara ãgua?’ oya.

Jesús oiporavo doce tupri güemimboherā

¹² Ahe arí rupi Jesús oso ivitrive,oyerure pītu momba tupri Vu upe oico. ¹³ Cöhese, “Perió” ehi güemimbohe eta upe. Ipāhu sui oiporavo doce tupri, ahe chupe, “Apóstol” ehi. ¹⁴ Co ahe yuvirecoi: Simón, ahe acoi Pedro avei serer; Andrés Simón rivri; Santiago, Juan, Felipe, iyavei Bartolomé; ¹⁵ Mateo, Tomás, Santiago Alfeo rahir; Simón, ava güecua rese secatéhi vahe pāhu pendarer; ¹⁶ Judas Santiago rivri; iyavei Judas Iscariote, ahe omondo vahe Jesús yamotaréhimbar uve.

Jesús ombohe ava rehii

¹⁷ Ipare Jesús ogüeyi ivitrí sui yugüeru co doce güemimbohe reseve. Ipare opita ivi yoya tuprisave. Aheve ambuae semimbohe eta oyemboa ati yuvireco sese iyavei setá ava yuvirecoi opacatu tecua Judea rupindar, Jerusalén rupindar iyavei yemboyassa Tiro, Sidón cotindar, ahe oyemboa avei yuvireco sese. Ahe ava ëgue ehi iñehe rendu potasave yuvireco ‘tayande mbogüerami tēi yande mbaherasisa sui’ oyapave

yuvireco. ¹⁸ Acoi espíritu naporai vahe remimombaraisu avei ocuera tupri yuvireco. ¹⁹ Evocoiyase opacatu ava opoco pota ité sese yuvireco. Esepi niha, ahe oporombogüera opacatu güeco píratasa pipe oico.

Ava sorivete vahe iyavei ava ndoyembovihai vahe

²⁰ Ipare omahe Jesús güemimbohe rese aipo ehi chupe:

“Perorivete catu pe iparaisu vahe. Esepi niha, Tūpa mborerecuasa pēu nara ité secoi.

²¹ “Perorivete catu cüriteindar ndasiepoi vahe. Esepi niha, pehitarora peico curi.

“Perorivete catu pe acoi ava cüritei oyaseho vahe. Esepi niha, pevharetera coiye peico.

²² “Perorivete catu pe acoi ava pe amotarëhise, pe mboyepepiñose avei oyesui yuvireco, iñehe-ñehe tēise yuvireco pēu pe amotarëhisave, iyavei acoi viroirose pe rer mbahe tēi pipe che, Ava Riquehir, recocuer sui tēi yuvireco. ²³ Peyembovihaño iyavei perorivete catuñora ahe ari pipe peico. Esepi niha, ipare peipisira porerecosa tuvichá vahe ivave. Ëgue ehi tupri avei evocoii ava ramoi aracahendar mara-mara tēi Tūpa ñehe mombehusar sereco yuvireco” ehi.

²⁴ “¡Peparaisu catu rumo cüritei mbahe yar peico vahe! ¡Esepi niha, pemboaviye pe rorivetes peico!

²⁵ “¡Peparaisu catu acoi pe ihitaro vahe cüritei! ¡Esepi niha, ndaperiepoi chira peico coiye!

“¡Peparaisu catu acoi peviha vahe pe pietase cüritei! ¡Esepi, peyasehora pe viharëhisa pipe peico coiye!

²⁶ “¡Peparaisu catu acoi peipisi vahe pe mboeteisa opacatu co ivi pipendar ava tēi sui! ¡Esepi niha, Ëgue ehi tupri tamoi Tūpa ñehe mombehusar angahu tēi vahe upe yuvireco aracahe!” ehi.

Iyacatu yasaisu yande amotarëhimbar

²⁷ “Pe che ñehe rese peyapisaca vahe upe rumo aipo ahe: Pesaisu ava pe amotarëhimbar; peyapo tupri mbahe aviyé vahe ava nape ambotai vahe upe. ²⁸ Peporandu Tūpa porovasasa rese ava pēu iñehe-ñehe tēi vahe upe nara; peyerure Tūpa upe pēu mbahe tēi oyapo vahe recocuer rese. ²⁹ Acoi que pe amotarëhimbar pe rovapetese, co cotindar avei pemoporëhiñora chupe. Iyavei acoi que ava virocuaño tēise pe yeaosa pe sui, toviraso avei pe yemondesa güemimbotar rupi” ehi. ³⁰ “Acoi oporanduse que pe mbahe rese yuvireco pēu, pemondoño avei chupe. Iyavei acoi que ava virocuaño tēise pe mbahe pe sui, ndapeporandui chira pēu imboyevi água rese. ³¹ Acoi mbahe peipota vahe ambuae ava oyapo vaherā pēu, ahe tupri avei peyapora chupe.

³² “Acoi ava pe raisupar güeraño pesaisu catu tēise, ndipoi eté mbahe aviye vahe ipipe. Esepi niha, ava naporai vahe ēgue ehi yuvireco yepi. ³³ Anise, acoi ava mbahe tupri ai oyapo vahe pēu, chupe güeraño mbahe tupri peyapose, ¿mbahe vo evocoiyase oime aviye vahe ipipe? Esepi niha, ava angaipa viyar avei ēgue ehi yuvireco yepi. ³⁴ Acoi pemondoño tēise mbahe ava upe ‘tomboyevi mbahe cheu’ pe hesave, ¿mbahe vo evocoiyase oime aviye vahe ipipe? Esepi niha, ava angaipa viyar ēgue ehi avei yuvireco. ³⁵ Pe rumo pesaisu catura ava pe amotarēhisar, peyapoñora mbahe aviye vahe chupe. Iyavei pemondoño itera mbahe chupe, ‘Tasāroño rane mbahe cheu imboyevi água vichico’ ndapeyei chietera. Ahese oimera porerecosa aviye catu vahe pēu. Pe evocoiyase Tūpa seco ivate catu vahe rahir peicora. Esepi niha, ahe aviye etepri vahe ava ‘aviye ndeu’ ndehi vahe upe iyavei ava yangaipa guasu vahe upe avei. ³⁶ Pe peporoparaisuereco inungar pe Ru Tūpa oporoparaisuereco yepi” ehi.

Ndiyai ambuae ava seroñrosa

³⁷ “Ndiyai, ‘Oyaví ité mbahe’ peye voiño tēi ambuae ava upe. Evocoiyase Tūpa, ‘Oyaví mbahe’ ndehi chira pēu. Pemocañi uca tēi eme ambuae ava. Evocoiyase Tūpa ndape mocañi tēi chira. Peñeroño catu ambuae ava upe, ahese Tūpa iñero itera pēu. ³⁸ Pemondose mbahe ava upe, evocoiyase Tūpa omundoño itera mbahe aviye vahe pēu inungar-ra omundo pe mbahe riru pipe pēu sāhambri tupri aviye vahe viña. Ēgue ehira mbahe imondo pēu. Tūpa oicua tupri itera pēu inungar pe mbahe pemondo ambuae ava upe” ehi.

³⁹ Ipare Jesús omombehu co ambuae porombohesa: ‘¿Oicatu pīha ñepei ndasesapisoí vahe ambuae ndasesapisoí vahe reroguata? ¡Aní eté! Esepi, oyoya voi ovíapira que ivicuar pipe yuvireco viña. ⁴⁰ Ñepei yepe niha ava oyembohe vahe ndahei eté ivate catu ombohesar sui. Acoi omomba vahe rumo oyembohesa ahe osupitira ombohesar” ehi.

⁴¹ “¿Mahera ambuae ava rembiavimi rese tēi pemahe? Iya rumo peyese rane mbahe tuvicha catu vahe pesepiara. ⁴² Ndiyai pēu, ‘Che toropítivií mbahe nde rembiaví rese’ peye vaherā chupe. Esepi, pe peyaví guasu catu mbahe. ¡Pe Tūpa reroyasar angahu tēi peico vahe! Penose uca rane pe rembiaví tuvicha catu vahe peyesui, ahese ramo ambuae ava rembiaví tahimi vahe moingatu peicatura” ehi oporombohe.

Ava recocuer icuasa sembiapo rese

⁴³⁻⁴⁴ “Ivíra aviye vahe icuasa iha rese. Esepi, ivíra aviye vahe, iha aviye avei; ivíra naporai vahe, iha naporai avei no. Supi eté ndipohosai ivíra sāchi atí vahe sui higuera ha,

iyavei ndahipohosai uva, yu pāhu sui. ⁴⁵ Êgüe ehi avei ava upe. Ava aviyé vahe oyapo mbahe tupri. Esepio, ahe vireco mbahe tupri opia pipe yepi. Iyavei acoi ava ndaseco pōrai vahe oyapo mbahe tēi. Esepio niha, ahe vireco mbahe tēi eté opia pipe yepi. Esepio niha, pe piha pipe sui tēi osē pe ñehe água” ehi.

Ava oyemoviracua vahe iyavei ndoyemoviracuai vahe Jesús reroyasáve

⁴⁶ “¿Mahera vo, ‘Che Yar, che Yar’ peye tēi peico cheu; ipare ndapeyapoi eté mbahe che remimombehu? ⁴⁷ Amombehura rumo mbahe pēu uma nungar tupri ité acoi ava ou vahe cheu che ñehe rese oyapisaca vahe, iyavei oyapo ité vahe mbahe che remimombehu: ⁴⁸ ahe inungar tupri ité acoi ava oyapo vahe güetara ita harive yepi. Yipindar rumo oyoho picucu rane ité ita harive imopuha água. Yepe ahe oí upe oyepota tēi ivitu ai, amarusu reseve oinupa pírata tēi, nomboyerocuai eté rumo. Esepio niha, vireco ité oviracuasa. ⁴⁹ Acoi ava che ñehengagüer rese ndoyapisacai vahe rumo, ahe ndoyavíi acoi ava oyapo vahe güetara ivi cuhi harive tēi, ndovirecoi eté oviracuasa. Ipare amar, ivitu ai reseve oinupa píratá, opaño omonduru; ocañi tēi eté evocoiyase” ehi Jesús ava mbohe.

7

Jesús ombogüera chihivahé sundao rerecuar Roma iguar remimboacua

¹ Jesús oñehepase ava upe oico, oso Capernaum ve. ² Ahe tecua pipe sundao rerecuar ndahei vahe judío secoi vireco vahe güemimboacua güembiaisu. Ahe imbaheasi guasu ité ou; omano pota ité. ³ Jesús rerácula anduse rumo, oyocuai moviro tēi omborípar judío imboeteipri chupe iñehe água ‘toumi tēi che remimboacua mbogüera’ oyapave. ⁴ Ahe judío evocoiyase oyemboya Jesús rese yuvireco iyavei oporandu yuvireco chupe aipo ehi:

—Ore mborípar sundao rerecuar oipota nde ereyapomi tēira mbahe icatupri vahe chupe viña. ⁵ Esepio niha, ore raisu iyavei ahe teieté oyapo uca tūparo oreu nara —ehi yuvireco chupe.

⁶ Evocoiyase oso ahe yuvirecoi vahe rupi. Virovise rumo sēta yuvireco, ahese sundao rerecuar omondo ambuae omborípar chupe. Imborípar evocoiyase omombehu iñehe aipo ehi vahe: “ ‘Che Yar, ereyemañecoi rene. Esepio niha, ndiyai eté che rēta pipe nde reique água. ⁷ Sese niha che teieté ndasoi nde reca. Nde ñehe pipe tēi rumo che remimboacua erembogüerara. ⁸ Esepio, che avei niha areco che cuaita. Iyavei areco sundao che voya. Eso peve, ahese ñepei upe, ahe

evocoiyase oso voi eté; ambuae upe: Erio, ahese, ou voiño ité cheu. Ipare, Ereyapora co mbahe, ahese che rembiguai upe, ahe evocoiyase che reroyaño voi' ehi ore mborípar" ehi Jesús upe yuvireco.

⁹ Aipo oyeupe hese Jesús, "¡Too!" ehi. Ipare aipo ehi vupindareta upe:

—Supi eté ndasepiai vahe ité co mbia che reroya tupri vahe nungar judío eta pāhuve —ehi.

¹⁰ Yuviroyevipase sundao rerecuar mborípar sétave yuvireco, aheve osepia evocoí semimboacua yuvireco ocuera tuplicate.

Jesús ombogüerayevi cuña imer mano vahecuer membre cuimbahe

¹¹ Ipare voi Jesús oso tecua Naín ve, iyavei semimbohe yuvirasoño ité supi ava rehii reseve avei no. ¹² Virovise tecua oso, osepia tehögür ava virocuese yuvireco ñoti água. Ahe cuña imer mano vahecuer membre ñepei vahe ité viña. Tecua pípendar setá iteanga ava yuviraso supi. ¹³ Cuña repiase rumo, oiparaísuereco. Ipare aipo ehi chupe:

—Ereyaseho eme —ehi.

¹⁴ Evocoiyase oyemboya oso, opoco tehögür riru rese. Sese ovosii vahe evocoiyase viropitaño yuvireco chupe. Ipare aipo ehi tehögür upe:

—Mbía chihivahe, che aipo ahe ndeu: ¡Eñarapuha! —ehi.

¹⁵ Evocoiyase omano vahecuer oñarapuha oī iyavei oñehe no. Ichui Jesús omundo ichi upe. ¹⁶ Opacatu tupri ité ava oyembosiquíe sepiase yuvireco:

—Cúritei oyemboyecua Tūpa ñehe mombehusar seco ivate vahe yande pāhuve cute —ehi yuvireco.

Iyavei,

—Tūpa niha ou güecua pítivií água oico —ehi avei yuvireco.

¹⁷ Ipare co Jesús rerácu yandusa opacatu Judea rupi, yivirindar rupi avei no.

Juan Oporoápiramo vahe omondo vupindar Jesús recocuer cua uca água

¹⁸ Juan avei oyandu opacatu co mbahe oico. Esepiá niha, supindareta omombehupa co mbahe yuvireco chupe.

¹⁹ Evocoiyase omondo ñuvirío vupindar Jesús upe mbahe rese porandu água '¿nde ité vo Tūpa Rembiporavo aipo sārombri ereico, anise oime tie ambuae orosáro vaherá?' oyapave.

²⁰ Evocoiyase oyepota yuviraso Jesús upe aipo ehi yuvireco chupe:

—Juan Oporoāpiramo vahe ore mbou ndeu co mbahe rese porandu āgua: ¿Nde ité vo Tūpa Rembiporavo ereico imombehupri ereyu vaherā, anise ambuae pīha orosārora oroico? —ehi yuvireco chupe.

²¹ Ahe arī pīpeve voi Jesús ombogüera setá ava imbaherasisa sui oico, ava caruguar rerecosar sui avei no. Iyavei ava ndasesapisoī vahe setá ombogüera. ²² Ahese ramo aipo ehi chupe cute:

—Peso, pemombehupa Juan upe mbahe pe rembiepia iyavei pesendu vahe: “Ndasesapisoī vahe osareco tupri cūritei yuvireco, ipāri-pāri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayevi yuvireco iyavei ava iparaisu vahe upe imombehusa pīsīrosa resendar ñehesa” peyea chupe. ²³ ¡Ovharetera acoi ava oyeroayaño vahe che rese! —ehi Juan rupindar upe.

²⁴ Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave, capihiata ívitu ombova-mbova vahe nungar pīha? ²⁵ Anise, ¿pesepia tie iturucuar porañete ai vahe iyemboeteise? Ëgue ehi vahe rumo secoi mborerecuar guasu guapisave yepi. ²⁶ ¿‘Mara ehi secocuer’ peye vo chupe? ¿Tūpa ñehe mombehusar ité pīha? Ahe ité, iyavei evocoī niha ivate catu vahe Tūpa ñehe mombehusar sui. ²⁷ Ahe chupe ité Tūpa icuachiapri aracahendar pīpe aipo ehi:

‘Amondora che ñehe mombehusar nde renondeve nde raperā moingatu āgua’ ehi.

²⁸ Aracahe suive ndipoi eté ivate catu vahe Juan sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

²⁹ “Co iñehe renduse opacatu ava, opacatu guarepochi rerocuasar yuvirecoi vahe avei oñeapiramo uca vahecuer Juan upe yuvireco: ‘Supi eté Tūpa aviyé vahe ité’ ehi eté yuvireco cute. ³⁰ Fariseo eta rumo iyavei Moisés porocuaita rese oporombohe vahe ahe noñeapiramo uca potai vahe Juan upe yuvireco, ahe viroiroño Tūpa remimbotar oyeupendar yuvireco.

³¹ “¿Mbahe rese pīha amboyoyara ava recocuer cūriteindar? ¿Mara ehi pīha secocuer? ³² Ahe inungar chīhivahe iguayí tēi vahe ocar rupi. Ipare oñehe pucu-pucu omboripar upe yuvireco aipo ehi: ‘Oromoñehe tēi mimbi pēu, ndapepivoi eté rumo; iyavei orosapucai tēi sapucaisa viharēhisa resendar pēu, ndapeyasehoi avei’ ehi. ³³ Esepiā, ou Juan Oporoāpiramo vahe oico. Ahe ndohui vahe pan iyavei ndohui vahe uva ricuer. Pe evocoiyase, ‘Co mbia caruguar vīreco vahe’ peye

tupri tēi chupe no. ³⁴Coiyé che ayu, Ava Riquehir, acaru iyavei aihi tupri avei. Ipare, ‘Co mbia icaru guasu ai vahe secoi, iihu guasu ai vahe avei no’ peye cheu; ‘Ava angaipa viyar mboripar tēi iyavei ava guarepochi rerocuasar mboripar tēi’ peye avei cheu. ³⁵Ava Tūpa mbahecusa vireco vahe rumo icuasara sembiapo rese” ehi.

Fariseo Simón serer vahe rētave Jesús secoi

³⁶ Fariseo Simón serer vahe oñeho Jesús upe: “Terecarumi che piri” ehi. Jesús evocoiyase oso sētave oguapi oñi mesave.

³⁷ Ahese cuña angaipa viyar evoco tecua pendar secoi vahe oyandu ichose Simón rētave icaru água. Sese viroyepota aheve mbahe siacua vahe siru pipe seraso sepirusu vahe chupe.

³⁸ Aheve oyasehó ite oñenopihá Jesús pive iyavei güesai pipe opa tupri omoaqui ipi. Ipare opaño omombiru oha apri pipe ichui, iyavei oipirupite, oipiyere avei mbahe siacua vahe ipi rese. ³⁹Sepiase fariseo, ipihañemoñeta tēi: “Co mbia Tūpa ñehe mombehusar itese, oicuaño itera co cuña opoco vahe oyese ndipihai vahe viña” ehi tēi fariseo chupe. ⁴⁰Evocoiyase aipo ehi fariseo upe:

—Simón, amombehu potami mbahe ndeu —ehi.

—Aviye Porombohesar, emombehu ru cheu —ehi.

⁴¹ Evocoiyase Jesús aipo ehi chupe:

—Ñuvirío mbia oime virocua guarepochi mbia guarepochi mondoso sui yuvireco. Ñepei virocua guarepochi quiniento tupri mboravíqui repirā ichui. Ambuae evocoiyase cincuenta rupive virocua. ⁴²Ipare ndoicatu irise ité imboyeví água yuvireco chupe, evoco mbia guarepochi mondoso iñeroño chupe yuvireco —ehi—. Esáha, emombehu cheu, ¿uma evocoiyase osaisu catura mbia guarepochi mondoso? —ehi fariseo upe.

⁴³—Cheu ndoyavíi guarepochi virocua catu vahe ichui —ehi Simón.

—Taa, supi eté aipo ere —ehi Simón upe.

⁴⁴ Evocoiyase omahe cuña rese aipo ehi Simón upe:

—¡Emahe co cuña rese! Aiqueso acoi nde rēta pipe, nde nderembouimi eté i che pisei água cheu; co cuña rumo güesai pipe oyosei che pi. Ipare omombiru oha apri pipe ae no.

⁴⁵ Iyavei nde ndache rovarupitei eve; co cuña rumo, acoi nde rēta pipe che reique ramomiseve che pirupite voi eté.

⁴⁶ “Nde nderemondoi mbahe siacua vahe che áca rese; co cuña rumo opa tupri voi oipichi mbahe siacua vahe che pi rese. ⁴⁷Sese co cuña opa oipisi ñerosa oangaipa guasu rese. Esepia, che raisú iteanga. Acoi ava upe nañerosa tuprii vahe rumo, ahe ndoporoaisu tuprii avei” ehi.

48 Ahese aipo ehi cuña upe:

—Oime nde angaipa upe ñerosa ndeu —ehi.

49 Evocoiyase ambuae ava ichohopri oguapi vahe yuvínoi aheve, ahe aipo ehi oyeupe yuvíreco:

—¡Uma pīha co mbia iñero vahe ité angaipa upe! —ehi.

50 Jesús rumo aipo ehiño cuña upe:

—Nde yeroyasa pipe ereipisi písrosa. Sese eso tupriño eico —ehi.

8

Cuña oipítivii vahe Jesús yuvíreco

1 Ipare Jesús oguata opacatu tecua rupi, omombehu ñehesa avíye vahe Tūpa mbororecuasa resendar oico. Doce vahe apóstol supive yuvírecoi. **2** Cuña avei yuvíraso supi, ahe ombogüera vahecuer caruguar rerecosa sui imbaherasisa sui avei no. Ahe ipāhuve avei María secoi, Magdalena serer yoapisa vahe, ahe ichui osē vahecuer siete tupri caruguar; **3** iyavei Juana Cuza rembireco, ahe mbia Herodes mbahe rese ñangarecuar; Susana iyavei ambuae setá cuña oipítivii mbahe güembiereco pipe yuvíreco.

Yembohesa mbahe miti rese tecocuer mboyoyasa

4 Setá ava yuvínose tecua yacatu rupi pipe sui Jesús repia áqua yuvíreco. Ipare oñemonuha guasuse yuvíreco, ahese Jesús setá mbahe rese omboyoya-yoya oporombohe aipo ehi:

5 “Ñepei mbia osē omaheti oico. Ahe otiapi-apiise mbahe rāhii oso, moviro oiti peri rupi. Ahe opa tēi oicambe yuvíreco, iyavei vīrai opa tēi yuvírohu. **6** Iyavei moviro tēi oiti ivi nayanai vahesave ita pāhuve. Sese cūritei sori; opaño rumo ipiru. Esepia niha, ivi nañauquii chupe. **7** Iyavei ambuae oiti yu pāhuve. Ipare oyoya tupri sori yuvíreco; yu rumo opaño oyopi. **8** Ambuae rumo oiti ivi avíye vahesave. Ipare sorise, iha vai eté yuvíreco; ahe iha retacuer amove cien tupri ité ñepei-peí mbahe miti sui osē” ehi.

Aipo ohe pare, Jesús oñeho pīratá iteanga aipo ehi: “¡Acoi ava osenducua pota vahe che ñehe, toyapisacaño sese!” ehi ava rehii upe.

¿Mahera pīha co yembohesa imboyoyasa ambuae mbahe rese?

9 Ipare semimbohe eta oporandu yuvíreco chupe: “¿Mara oyapave vo aipo co yembohesa?” ehi. **10** Evocoiyase omboyevi chupe: “Pēu Tūpa oicua uca ité mbahe ndicuasai vahe mbororecuasa resendar; ambuae ava rumo ambohe tēi ambuae mbahe mboyoyasa pipe; yepe osepia mbahe viña ‘tomahecua eme iyavei yepe osenduño mbahe tosenducua eme yuvíreco’ viya” ehi.

Jesús omombehu tupri yembohesa mbahe tīsa resendar

¹¹ “Co yembohesa resendar aipo oyapave aipo ehi: Mbahe rāhii ahe inungar Tūpa Ñehengagüer; ¹² iyavei mbahe rāhii perí rupi seitipri, ahe inungar acoi ava osendu tēi vahe Tūpa Ñehengagüer yuvireco oyapave. Ipare rumo ou vīrai chupe, ahe inungar caruguar ou vahe chupe opaño oyaracua mocañi Tūpa Ñehengagüer sui ‘toviroya eme iyavei toñepisiro eme yuvireco’ oyapave tēi. ¹³ Acoi mbahe rāhii seitipri ita mahugüer rupi, ahe inungar acoi ava osendu tēi vahe Tūpa Ñehengagüer yuvireco iyavei oipisi tupri oviharetesa pīpe yuvireco viña no. Ahe rumo inungar co mbahe miti ndovirecoi vahe guapo ovīracua água; vīroya raimi tēi yuvireco. Oyepotase rumo mbahe tēi chupe, oyepepi voiño yuvireco ichui. ¹⁴ Acoi mbahe rāhii seitipri yu pāhu rupi, ahe inungar acoi osendu tēi vahe. Ipare rumo oyemboyepepi uca mbegüeño ambuae mbahe rese opīhañemoñetá iteangasa pīpe tēi, ombahe eta rese iyavei güemimbotarai mbahe tēi potasa pīpe avei. Ëgüe ehi ahe ava inungar mbahe miti ndihai vahe ité. ¹⁵ Acoi mbahe rāhii seitipri rumo ivi aviyé vahesave, ahe inungar ava vireco vahe opīhañemoñetasa aviyé vahe iyavei oyemoingatu voi Tūpa Ñehengagüer rese oyapisaca água yepi; vīroya tupri ité no; yuvirecoiño ité sese. Ëgüe ehise, oyapo mbahe aviyé vahe yuvireco” ehi.

Yembohesa tataendi resendar

¹⁶ “Ndiyai eté ava upe guataendi omoendise omoha vahe que mbahe pīpe, ‘Tamondo che rupavrīve’ ndehi eté chupe; osupiño ivate imoi opacatu oi pīpe yuviroique vahe resape água. ¹⁷ Esepia, ndipoi eté mbahe ñomipri, ndayasepiai vaherā curi. Iyavei yaposa vahe imombehupirēhi, icuasaño itera curi.

¹⁸ “Sese peyapisaca tupri co ñehesa rese. Esepia, acoi oyapisaca tupri vahe, chupe imondosa catura; acoi nomombitai vahe rumo mbahe güembieroja oyese, ichui serocuasaño itera” ehi oporombohe.

Jesús si, tivireta avei

¹⁹ Ichui Jesús si iyavei tivireta oyepota secosave yuviraso. Ndiyai eté rumo chupe yuviraso vaherā yuvireco ava rehii sui. ²⁰ Oime rumo ambuae ava imombehusar chupe,

—Nde si, nde rivireta reseve nde repia pota tēi ocarve yuvireco —ehi chupe.

²¹ Ahe rumo aipo ehi chupe:

—Acoi ava osendu vahe che Ru Ñehengagüer yuvireco, vīroya tupri vahe avei, ahe che si, che rivri yuvirecoi —ehiño Jesús chupe.

Jesús omombítuhu i ohitu vahe, ivit u ai reseve

²² Ñepei ari Jesús oha carite pipe güemimbohe eta reseve. Ipare aipo ehi:

—Yaso peve ipa rovai —ehi.

Evocoiyase ahe yuviraso. ²³ Yuviroguata viteseve, oqueño Jesús ou. Ahese ipa pipe aviyeteramo tēi ivit u ai omboha guasu-guasu carite pipe i, omondo pota ité ipive viña. ²⁴ Evocoiyase semimbohe yuviraso imomba aipo ehi chupe:

—¡Porombohesar! ¡Porombohesar! ¡Yande rerasora moco carite ipive! —ehi yuvireco.

Ahese omahe. Ipare oñehe pírata ivit u ai upe iyavei i ohitu vahe upe: “¡Pepituhu!” ehi. Aheseve voi opituhu tupri.

²⁵ Evocoiyase aipo ehi güemimbohe eta upe:

—¿Mahera vo ndapeyeroyai che rese? —ehi.

Ahe rumo osiquiyeño, ndoyembovihaiño iyavei oporandu randu tēi oyeupe yuvireco:

—¡Mara ehi vahe pīha co mbia! Esepia niha, ivit u ai, para guasu avei omboyeroya —ehi tēi oyeupe yuvireco.

Mbia Gerasa iguar vireco vahe caruguar oye

²⁶ Coiye oyepota yuviraso Gerasa ivi rese cute, ahe ambuae ipa coti ivi Galilea rovai. ²⁷⁻²⁹ Aheve mbia tecua iguar caruguar vireco vahe secoi. Aracahe suive nani tupri ité secoi iyavei ndopitai vahe ité oi pipe yepi; ēgue ehi rumo ahe tehōgür ruvípa rupindar tēi secoi. Setá rupi caruguar ombohe ité sereco yepi. Yepe ava oipocuhacua-acua carena pipe sereco, ipi rupi avei no ‘toviraso iri eme caruguar’ oyapave yuvireco chupe viña, ahe rumo ombosando-sandoño ité iyavei caruguar omoñemi ucaño ava porēhisa rupi sereco. Evocoiyase Jesús osese carite pipe sui, osovaichi ahe mbia. Sepiase rumo, ahe mbia oñenopicha voi oso sovai oñehe pírata chupe:

—¡Eyepepi che sui, Jesús, Tūpa seco ivate catu vahe Rahir! ¡Che mombaraisui rene eve! —ehi. Esepia, Jesús ope oyocuai caruguar sereco ‘tosē ichui’ oyapave.

³⁰ —¿Mara vo nde rer? —ehi chupe.

—Che rer Legión —ehi.

Aipo ehi, esepia niha, setá etepri caruguar yuviroique yavíterve. ³¹⁻³² Oimese rumo cuchi setá ocaru vahe ivitru ruambesave, caruguar evocoiyase oporandu chupe aipo ehi: “Toroiqueñomi tēi co cuchi avíterve” ehi yuvireco chupe ‘tayande mundo eme cañi tēisa apirēhi vahe pipe’ oyapave viña. “Peiqueño sese” ehi caruguar upe. ³³ Ahese ope yuvinose mbia sui yuviroique cuchi avíterve cute. Aheseve voi cuchi ope yuvinoña yuviraso ivivate sui ipa pipe. Aheve ipive ope tēi eté ocañi yuvireco.

³⁴Cuchi rārosar osepiase ahe mbahe yuvireco, opa yuvinoña yuviraso co mbahe mombehu tecua pipe ava upe, cove rupi avei no. ³⁵Ipare setá ava yugüeru aipo mbahe oime vahecuer repia. Oyepotase rumo secosave yuviraso, aheve osephia ahe mbia caruguar rerecosarer oguapi oñipiimi, oyemonde tupri, yaracua tupri avei oico. Ahese oyembosiquiye tēi yuvireco. ³⁶Acoi ava osephia vahecuer, ahe opa mbahe omombehu yuvireco co mbia caruguar rerecosar cuera agüer. ³⁷Ahese opacatu ava Geresa pendar, yivirindar avei Jesús upe, “Esiri cohabe sui” ehi yuvireco. Esephia niha, osiquiyé iteanga yuvireco ichui. Evocoiyase oha carite pipe. Ipare osoño. ³⁸Yipindar rumo evocoi mbia caruguar vireco vahecuer, “Tasomi tēi nde rupi” ehi viña. Ahe rumo, “Epitaño” ehi.

³⁹—Eyevi nde rētave, emombehupa opacatu mbahe Tūpa oyapo vahecuer nde rese —ehi.

Ahe mbia evocoiyase oso opacatu tecua rupi, Jesús oyeupe mbahe apo agüer mombehu.

Jesús ombogüera Jairo rayri iyavei cuña iturucuar rese opoco vahe

⁴⁰Oyevise Jesús ipa rovai oso, aheve ava rehii oviharetesa pipe oipisi tupri yuvireco. Esephia niha, ava opacatu ité osāro yuvireco. ⁴¹Ahese Jairo serer vahe oyepota oso Jesús upe, evocoi judío tūparo rese yangarecuar secoi vahe. Ahe mbia oñenopiha sovai oso, oporandu chupe ‘tosomi tēi che rētave che rayri mbogüera’ oyapave. ⁴²Esephia niha, vireco guayri ñepeimi vahe ité, doce araviter vireco vahe. Ahe omano potami eté ou.

Osose Jairo rētave, aheve peri rupi ava rehii yuvirasoño supi; oyemboti tupri ité yuvireco. ⁴³Ahe ipāhu rupi oime cuña doce araviter rupi suvi yepiyere-yere vahe. Opa-opa tēi omondo ombahe ocuera água repirā yepi; ndocuerai eté rumo. ⁴⁴Ahe cuña evocoiyase oyemboya oso saquicuei coti opoco iturucuar popi rese. Ipare ahe pipeve voi opituhu suvi ichui. ⁴⁵Evocoiyase Jesús oporandu:

—¿Ava vo opoco che turucuar rese? —ehi.

Opacatu ava aipo ehi yuvireco: “Aní eté” ehi. Pedro evocoiyase aipo ehi chupe:

—Porombohesar, ava rehii mo oyemboya nde rese iyavei nde moañi-añi yuvireco opacatu rupi —ehi.

⁴⁶—Che rumo aicua oime ava opoco vahe che turucuar rese. Esephia, ayandu che pīratasa osēse che sui —ehi Pedro upe.

⁴⁷Ahe cuña ndoicatui oñemi. Sese orírii oñenopiha sovai. Oyemombehu chupe opacatu ava rovaque: “Che apoco nde turucuar rese. Esephia, ‘Acuera tuprira apocese iturucuar rese’ ahe ndeu” ehi. ⁴⁸Ahese aipo ehi cuña upe:

—Che rayri, erecuera tupri ité. Esepi niha, che rese ereyeroya ité. Sese eso tupriño —ehi cuña upe.

⁴⁹ Jesús ñehe viteseve, ahese oyepota aheve mbia Jairo rëta sui aipo ehi Jairo upe oso:

—Omano nde rayri cute. Eremañeco tēi iri rene Porombo-hesar —ehiño Jairo upe.

⁵⁰ Evocoiyase iñehe renduse aipo ehi Jairo upe:

—Aní eresiquiye; nde che rese yeroyasa pipe ité nde rayri ocuerayevira —ehi.

⁵¹ Oyepotase Jairo rëtave oso, aheve ndomoingue uca potai eté ava oyeupi. Pedro, Santiago, Juan iyavei cuñatai yesupa upeño oipota seique ãgua. ⁵² Aheseve opacatu ava oyaseho ati, ndoyembovhai tēi sese yuvireco. Jesús rumo aipo ehi chupe:

—Peyaseho eme. Co cuñatai nomanoi, oque tēi ou —ehi.

⁵³ Ava rumo opuca ete-eteño seroyaëhisave yuvireco. Esepi niha, ahe oicua ité imanose yuvireco viña. ⁵⁴ Evocoiyase oipopisi cuñatai. Ipare aipo ehi chupe:

—¡Cuñatai, eñarapuha! —ehi.

⁵⁵ Ahe evocoiyase oñarapuha voi eté ocuerayevi. Ipare Jesús, “Pembocaru” ehi iyesupa upe. ⁵⁶ Iyesupa evocoiyase, “¿Mara ehi rutei pīha co?” ehi tēi yuvireco chupe. Jesús rumo omombehu chupe: “Ndapemombehui chietera que ñepei ava upe” ehi.

9

Jesús doce güemimbohe omundo Vu Tūpa mbororecuasa resendar mombehu ãgua

¹ Jesús opa omonuha güemimbohe doce vahe oyeupe. Ipare omundo opíratasa opacatu upe caruguar ambuae-ae tēi vahe imboyepepi ãgua ava sui iyavei ava mbogüera ãgua imba-herasisa sui. ² Opa omundo Vu Tūpa mbororecuasa resendar mombehu ãgua, ava imbaheasi vahe mbogüera ãgua avei. ³ Yipindar rumo aipo ehi chupe:

—Ndaperasoi chira mbahe pe guatasa rupi: que mbococa, mbahe riru, tembihu, que guarePOCHI avei no. Perasora rumo ñepei güeraño pe turucuar; ndahei chira ñuvirío peraso.

⁴ Pepitami ranera ñepei oí pipe güeraño tecua yacatu peico.

⁵ Acoi ava ndape moingue uca potaise güëta pipe yuvireco, peyepepiñora ichui iyavei peipipetera pe pi sui ivi cuhi ‘to-icua Tūpa ñemoirosa oyeupendar yuvireco’ pe hesave —ehi güemimbohe eta mondo.

⁶ Evocoiyase opa yuvinose yuviraso, iyavei oñemosai opacatu tecua rupi omombehu Tūpa Ñehengagüer písirosa resendar yuvireco iyavei ombogüera-güera ité ava imbaherasisa sui opacatu oguatasa rupi yuvireco.

Herodes, “¿Mara ehi pīha?” ehi Jesús upe

⁷ Co mborerecuar guasu Herodes oyandu opacatu mbahe Jesús rembiapo. Evocoiyase, “¿Mara ahera pīha?” ehi tēi. Esepia niha, aipo, “Juan ocuerayevi” ehi yuvireco chupe. ⁸ Ambuae aipo ehi: “Tūpa ñehe mombehusar Elías, ahe tēi oñemoporēhí iri” ehi yuvireco. Ambuae aipo ehi: “Que ñepei Tūpa ñehe mombehusar aracahendar revo, ahe tēi ocuerayevi” ehi yuvireco viña. ⁹ Herodes rumo aipo ehi:

—Che niha ayasia uca Juan ãca —ehi—. ¿Uma rerācua pīha evocoiyase ayandu? —ehi tēi.

Sese Herodes osepia pota ité Jesús.

Jesús oyopoi cinco mil cuimbahe

¹⁰ Apóstol oyevipase Jesús upe, ahese opa tupri mbahe güembiapogüer omombehu yuvireco. Ahese opa viroyepepi ava rehii sui, viraso ivi iporupirēhisave tecua Betsaida cotive. ¹¹ Ahe ava rehii rumo oyanduse yuvireco, yuvirasoño saquicuei. Evocoiyase, “Períoño” ehi chupe. Ipare oñeho Vu Tūpa mborerecuasa rese ava upe iyavei ombogüerapa ava imbaherasisa sui.

¹² Caharuse co doce semimbohe oyemboya yuvireco sese aipo ehi chupe:

—¿Ndiyai vo eremondopa ava, topituhu yuvireco iyavei toseca mbahe güemihura tecua-tecuami cōi vahesa rupi? Esepio niha, cohabe ndipoi eté mbahe —ehi yuvireco chupe.

¹³ Ahe rumo aipo ehi güemimbohe eta upe:

—Pe pemondora mbahe semihura yuvireco —ehi.

Semimbohe aipo ehi yuvireco chupe:

—Poyandepomi tēi rumo pan orovireco, ñuviriomi tēi avei pira, toroso ayase co ava opacatu remihura rerocua —ehi yuvireco chupe.

¹⁴ Esepia niha, cuimbahe retacuer cinco mil tupri. Jesús rumo aipo ehi güemimbohe eta upe:

—Pemboyaho cincuenta rupi-rupi imboguapi —ehiño.

¹⁵ Ëgue ehi semimbohe yuvireco chupe. Ipare oguapi opacatu ava yuvireco. ¹⁶ Evocoiyase oipisi poyandepo pan iyavei ñuvirío pira. Ipare omahe iva rese, “Aviye ndeu, che Ru” ehi. Imbohi-mbohi pare, opa omondo güemimbohe upe ava rehii upe imondo água yuvireco. ¹⁷ Evocoiyase opacatu ava ocaru vahe ihitaropa tēi yuvireco. Ipare semimbohe omboapi popa doce tupri iruova sembihu rumbirer yuvireco.

Pedro, “Jesús, Tūpa Rembiporavo Poropīsirosar secoi” ehi

¹⁸ Ñepei ari piye Jesús oyeroqui ahe ae güemimbohe pāhuve. Ahese oporandu güemimbohe upe:

—¿Mara ehi vo ava oñeho yuvireco che rese? —ehi.

¹⁹ —Amove ava, “Juan Oporoāpiramo vahe” ehi yuvireco ndeu; ambuae, “Elías” ehi yuvireco ndeu, iyavei ambuae, “Aviyeteramo que ambuae Tūpa ñehe mombehusar aracahendar ocuerayeví” ehi yuvireco ndeu —ehi.

²⁰ Evocoiyase oporandu güemimbohe upe:

—Pe no, ¿“Ava co secoi” peye ru pe cheu no? —ehi.

—Nde niha Tūpa Rembiporavo Poropísírosar ereico —ehi Pedro imboyeví chupe.

Jesús omombehu omano água

²¹ Ahe rumo aipo ehi güemimbohe eta upe: “Pemombehui rene Tūpa Rembiporavo che recosa ava upe” ehi. ²² Iyavei aipo ehi chupe:

—Che, Ava Riquehir, che paraisu itera, iyavei opacatu judío rerecuareta, pahi rerecuuar ívate catu vahe iyavei Moisés porocuaita rese oporombohe vahe remiamotaréhi aicora. Ahe avei che yuca ucara yuvireco; mbosapi ari rupi rumo acuerayevira —ehi.

²³ Ipare aipo ehi opacatu upe:

—Acoi oguata pota vahe che rupi, topoi mbahe güemimbotar tēi apoa sui iyavei inungar-ra curusu rese ovosiira viña, toyemoingatu voi che recocuer rese oparaisu água ari yacatu rupi iyavei toguata tupri che rupi. ²⁴ Esepia, acoi ava güetecuer tēi raisupar ocañi tēi itera; acoi ava omocañi tēi vahe rumo güetecuer che recocuer rese, ahe oñepisirora. ²⁵ Esepia, ¿aviye ai angahu pīha ava upe opacatu mbahe co ivi pipendar pisi água tēi, ahe ae tēi omocañise güecocuer yuvireco viña? ²⁶ Esepia, acoi ava yuvinochi ai vahe che sui iyavei che ñehengagüer sui avei no, che avei, Ava Riquehir, ëgue ahera ichui acoi ayevise che reco pīratasa pipe, che Ru reco pīrata porañetesha pipe avei sembiguai rehii iva pendar maranehi reseve curi. ²⁷ Supi eté, oimera amove cohabe ava nomano vitei chivaherá, osepia rane itera ouse Tūpa mborerecuasa yuvireco curi —ehi.

Jesús ñecuñaro agüer

²⁸ Ocho ari pare Jesús oyeupi ivitri rese oso oyerure água. Pedro, Santiago iyavei Juan ahe viraso oyeupi. ²⁹ Oyerure viteseve, oñecuñaro sepiaca. Iturucuar evocoiyase sendi, morochí eteanga. ³⁰ Ahese ñuvirío ava oyemboynecua yívii imoñeta yuvinoha. Evocoi ava yuvirecoi vahe ahe Moisés, Elías avei. ³¹ Oyere tupri sendigüer iporañetesha yuvireco sese, iyavei co ñuvirío mbia oñehe imano água rese yuvireco chupe: “Nde niha ereyemomborarara nde mano água Jerusalén pipe eico” ehi yuvireco chupe. ³² Yepe Pedro, ondugüer reseve sopesí eteanga yuvireco viña. Aviyeteramo tēi opa sopesí

yuvireco ichui. Ahese osepia Jesús porañetes a yuvireco iyavei co ñuvirío mbia yuvinoha vahe yívii no. ³³ Evocoí mbia oyepepise ichui yuvireco, ahese Pedro aipo ehi chupe:

—Ore mbohesar, ¡avíye ai eté coháve yaico! Toroyapo mbosapi teyupami: ñepei ndeu nara, ambuae Moisés upe, ambuae evocoiyase Elías upe nara —ehi.

Pedro rumo ndoicuai eté aipo ohesa. ³⁴ Iyavei iñehe viteseve, aviyeteramo tēi iporéhí iva quiha, oyopipa tupri ité. Evocoiyase osiquiye tēi yuvireco. ³⁵ Ipáhuve oyeendu ñehesa aipo ehi vahe: “Co che Rahír, che Rembiporavo ité; peyapisaca catu iñehe rese” ehi.

³⁶ Opase osendu co ñehesa yuvireco, ahese osepia Jesús, ahe ae iháise yuvireco. Semimbohe rumo oyeupe tēi ovireco yuvireco; ndomombelu vitéi eté ava upe mbahe osepia vahecuer yuvireco.

Jesús ombogüera chihivahé caruguar rerecosar

³⁷ Ahere ayihive, ogüeyise ivitri sui yuvireco, setá ava oyugüeru Jesús rovaíchi yuvireco. ³⁸ Ahese mbia ava pahuve aipo ehi pírata voi eté:

—Porombohesar, ereyapomira mbahe icatupri vahe cheu viña. Esepia, che rahír ñepeimí vahe ité; ³⁹ caruguar rumo opoco sese, omoase pucu-pucu uca yepi iyavei omoeõha-õha sereco iyavei iyuru rupi tiyui yusu-yusu. Mara-mara tēi vireco iyavei ndopoi potai eté ichui. ⁴⁰ Amombelu tēi niha nde remimbohe upe ‘tomboyepépimi tēi caruguar ichui’ che yapave viña; nomboyepépii eté rumo ichui yuvireco —ehi.

⁴¹ Ahe omboyevi:

—¡Too, ndapeyeroya tupri vitéi eté che rese, co cotí tēi vité pe pihañemoñetasal! ¿Mboví rupi rutei vo aico vitera pe pahuve che ñemosasa pipe? Eru nde rahír coháve cheu —ehi ahe mbia upe.

⁴² Chihivahé oyemboyase rumo sese, caruguar omboviapi voi imondo ivive, imoeõha iri. Jesús rumo oñehe pírata caruguar upe imose água chihivahé sui. Ahese chihivahé ocuera tupri ité. Ipare omboyevi tu upe. ⁴³ Ahese opacatu ava, “¡Mara ehi rutei!” ehi tēi yuvireco Túpa píratasa rembiapo avíye vahe repiase.

Jesús omombehu iri omano água

Opacatu ava ndoyembovhái viteseve yuvireco, ahese aipo ehi güemimbohe upe:

⁴⁴ —Pesendu tupri che ñehe; peresarai eme ichui: che, Ava Riquehir, imondopri aicora che amotaréhíbar povríve —ehi.

⁴⁵ Semimbohe rumo ndosenducuai eté oyeupe ñehesa yuvireco. Esepia niha, Túpa ndoiptai eté senducua água chupe; osiquiye chupe oporandu água yuvireco yepi.

¿Ava vo seco ivate catu vahe?

⁴⁶ Coiye semimbohe eta omboipi oyeecopi-copi yuvireco ‘¿ava ité pīha ivate catu vaherā curi?’ oyapave. ⁴⁷ Jesús rumo oicuaño ipihañemoñetaso yuvireco. Evocoiyase oipisi chīhivahemi seru oipive imoha. ⁴⁸ Ipare aipo ehi güemimbohe eta upe:

—Acoi ava oipisi vahe co chīhivahemi nungar che rer pipe sereco, che ité che pisi yuvireco; iyavei acoi ava che pisi vahe, oipisi aveira che mbousar. Esepiá, acoi ava seco mbegüemi catu vahe pe pāhu pendar, ahe aviye catu vahe —ehi.

Acoi yande mboyoyasar, ahe ndahei yande amotarēhisar

⁴⁹ Evocoiyase Juan aipo ehi chupe:

—Ore mbohesar, orosepiá niha mbia ombogüera vahe caruguar pīratasa sui ava nde rer pipe oico; ore rumo ndoroipotai chupe evocooya seco água. Esepiá niha, ndahei yande rupindar secoi —ehi.

⁵⁰ Jesús rumo,

—¡Aní ndapeipotai chupe! —ehi—. Esepiá niha, evoco nungar ava ndahei yande amotarēhisar; ahe rumo yande mboyoyasar —ehi güemimbohe eta upe.

Jesús oñehengata Santiago upe, Juan upe avei

⁵¹ Virovise rumo arí ivave Jesús so água, ahese ahe aipo ehi: “Yaso ru Jerusalén ve cūritei” ehi. ⁵² Evocoiyase omondo ava güenonera. Ahe yuviraso tecua Samaria ivi rupi ipituhu água moingatu viña; ⁵³ Samaria iguar rumo nomoingue potai eté güetave yuvireco. Esepiá, oicua Jerusalén ve ichose yuvireco. ⁵⁴ Co mbahe naporai vahe repiase rumo, semimbohe Santiago iyavei Juan oporandu yuvireco chupe:

—Ore Yar, toromboumi tata ivi sui co ava mocañi água —ehi yuvireco chupe viña.

⁵⁵ “¡Aní!” ehi oyemboyere chupe. ⁵⁶ Ipare yuviraso ambuae tecuave.

Oguata pota vahe Jesús rupi

⁵⁷ Yuvirasose peri rupi aipo ehi mbia Jesús upe:

—Che Yar, che nde rupi aso pota opacatu nde guatasa rupi —ehi.

⁵⁸ Ahe rumo aipo ehi:

—Aguara vireco güetara, vīrai avei vireco guaiti; che rumo, Ava Riquehir, ndarecoi que che rēta che pituhu água —ehi chupe.

⁵⁹ Ipare ambuae upe aipo ehi:

—Erio che rupi —ehi.

—Che Yar, che ru manose voi, ñoti pare aguatara nde rupi —ehi.

60 —Aní —ehi—. Acoi omano vahe nungar ahe ae toñeñetiño yuvireco; nde rumo eso, emombehuño ñehesa Tūpa mborerecuasa resendar ava upe —ehi.

61 Evocoiyase ambuae aipo ehi chupe no:

—Che Yar, che aguata pota nde rupi; yipindar rumo aso ranera che rētave mbahe moingatu che so água —ehi.

62 —¡Aní! —ehi ahe mbia upe—. Esephia, inungar acoi oipisi vahe ivi mboyeresa imohivi tupri água, omahese rumo guaquicuei coti, evoco nungar naporai Tūpa mborerecuasave yuviroique vaherā —ehi.

10

Jesús oyocuai setenta y dos tupri güemimbohe

¹ Ipare yande Yar oiporavo setenta y dos ava ñepei-peí tecua rupi ñuvirío-río güenonera.

² Yipindar rumo aipo ehi: “Supi eté mbahe imonuhapirā setá iteanga; sese oporaviqui vahe rumo movíromi tēi. Sese peporandu mbahe miti Yar upe, tombou ava imonuha água” ehi. ³ “Peso, opomondo ovesami nungar ava mbahe mimbá oñaro vahe nungar pāhuve. ⁴ Perasoi rene mbahe ríru iyavei guarePOCHI síru reseve. Ndapemondugüei chiaveira pe pitaqui; iyavei aní pepita ‘avirave’ apo ava upe peri rupi. ⁵ Acoi peiques que oí pipe, yipindar rumo peyapo ranera: ‘Avirave. Tūpa tape rovasa’ peyera. ⁶ Acoi aheve oimese ava aviye vahe, ahe oipisira Tūpa porovasasa; anise evocoiyase ndipoi chira porovasasa chupe nara. ⁷ Acoi pe pisise, aheve ité pepitañora; pecarura iyavei peihura ahe sembiereco. Esephia, ava poravíquise imboepisa chupe. Sese ndapeguatai chira ambuae ava rēta rupi-rupi tēi. Ñepei oí pipe güeraño pepitañora. ⁸ Acoi que tecuave peyepotase, ahe pendar pe repia potañoce yuvireco, acoi ahe ombose mbahe yuvireco tapehu, pehuñora ichui. ⁹ Ahe pendar imbaheasi vahe evocoiyase pembogüerara, iyavei aipo peyera chupe: ‘Tūpa mborerecuasa namombriimi pe sui’ peyera. ¹⁰ Acoi peyepotase rumo que tecuave, ahe tecua pendar ndape repia potaise yuvireco, peseñora ocar rupi aipo peyera: ¹¹ ‘¡Co pe recua piendar ivi chimborer oya vahe ore pi rese oroipi pete oreyesui, peicua catu, ore hesa pipe. Peicua tupri rumo Tūpa mborerecuasa namombriimi pe sui’ peyera chupe. ¹² Supi eté acoi ari cañi oyepotase, oimera Tūpa ñemoirosa ahe tecua pendar upe ivate catu vahe ava tecua Sodoma pendar sui” ehi güemimbohe eta upe.

Opacatu tecua ndiporeroysi vahe

13 “¡Peparaísu ava tecua Corazín pendar, pe avei peparaísu tecua Betsaida pendar! Esepiá, acoi poromondiisa pe pāhuve yapopri yaposara yipive tecua Tiro, Sidón ve viña, ahe tecua pendar aracaheve anga omondera turucuar viharéhisa resendar, tanimbu avei omondora oāca rese oangaipa mboasisa pipe yuvireco viña no. 14 Pe rumo peipísira ivate catu vahe Tūpa ñemorirosa ava Tiro, Sidón pendar sui ari cañi pipe coiye. 15 Pe avei no tecua Capernaum pendar, ¡pemoha co ivave pe reco água viña! ¡Pe mombosapara rumo ivicuar ipicucu catu valhesave!

16 “Acoi ava oyapisaca vahe pe ñehe rese yuvireco, ahe evocoiyase oyapisaca avei che ñehe rese. Iyavei acoi ava pe mboyepépiño vahe oyesui, ahe evocoiyase che avei che mboyepépi oyesui yuvireco. Acoi ava rumo che mboyepépiño vahe oyesui, ahe evocoiyase che mbousar avei omboyepépiño oyesui” ehi güemimbohe upe.

Oyevipa iri ava setenta y dos vahe

17 Oyevipase ava setenta y dos vahe, oviharetesave aipo ehi yuvireco chupe:

—¡Ore Yar, caruguar avei eté niha ore mboyeroya etepri yuvireco nde rer pipe! —ehi.

18 Evocoiyase aipo ehi güemimbohe eta upe:

—Taa, asepia ité niha caruguar rerecuar ovíapise iva sui overa vahe nungar. 19 Che niha amondo píratasa pēu peguata vaherā mboi iyavei mbahe rumbiquíape harí rupi opacatu pe amotaréhisar píratasa reroyi água, que mbahe pe momaraëhi água avei. 20 Peyembovharetei rene caruguarella pe mboyeroyase. Iya rumo peyembovha pe rer iva pendar icuachiapri rese —ehi güemimbohe eta upe.

Jesús oviharete

21 Ahe pipeve voi Jesús, Espíritu Santo rese, vorívetesa pipe aipo ehi: “Che Ru, che oromboetei. Nde niha iva Yar, ivi Yar avei no. Esepiá niha, ereñomi co mbahe ava oyesui tēi mbahe oicua vahe sui iyavei co ivi pipendar ava imbahecua vai vahe sui avei no. Eremboyecua rumo co mbahe ava ndoyembohe tuprii vahe upe nde rese oyeroyase. Ahe niha ereipota ité, che Ru” ehi.

22 “Opacatu mbahe che Ru ombou cheu. Iyavei ndipoi ava che cua vahe tahir che recose; che Ru güeraño ité rumo che cua. Ndipoi avei che Ru oicua tuprii vahe yuvireco no; che güeraño ité aicua. Iyavei acoi que ava upe aicua uca potase, aicua uca tuprii aveira” ehi ava eta upe.

23 Evocoiyase omahe güemimbohe eta rese, chupe güeraño aipo ehi: “Perorívete catu co mbahe pesepia vahe rese.

24 Esepiá niha, setá etepri ava Tūpa ñehe mombehusar

yuvirecoi vahe iyavei mborerecuar guasu eta aracahendar osepia pota tēi mbahe pe rembiepia; ndosepiai eté rumo yuvireco. Osendu pota tēi co pe remiendo yuvireco; ahe rumo ndosendui avei yuvireco” ehi güemimbohe upe.

Jesús porombohesa Samaria iguardocuer sui

²⁵ Iyavei no Tūpa porocuaita rese oporombohe vahe oso Jesús upe secoāha āgua, mbahe rese oporandu:

—Porombohesar, ¿mara ahera vo vichico teco apirēhi vahe rereco āgua? —ehi chupe.

²⁶ Ahe omboyevi:

—¿Mara ehi vo Moisés porocuaita icuachiapri pipe? ¿Mara ehi vo ereyeroquise ipipe? —ehi oporombohe vahe upe.

²⁷ Evocoiyase oporombohe vahe omboyevi:

—“Eresaisura nde Yar Tūpa opacatu nde pihá pipe, opacatu nde recocuer pipe, opacatu nde píratasa pipe, opacatu nde yapisacasa pipe avei; iyavei eresaisura ava nde cotindar nde yeaisu nungar” ehi Moisés porocuaita —ehi chupe.

²⁸ —Supi eté —ehi—. Eremboyevi tupri ndeyeupe porandusa cheu. Eremboaviyese evoco, ahese ererecora tecovesa apirēhi vahe —ehi co mbia upe.

²⁹ Co mbia rumo oyepi pota. Sese aipo ehi chupe:

—¿Ava vo aipo che cotindar secoi? —ehi.

³⁰ Evocoiyase omboyevi chupe:

—Oime mbia Jerusalén sui oso vahe Jericó ve. Ahe peri rupi yuvinose ava ndipihai vahe yuvireco chupe. Ahe virocupa imbahe yuvireco ichui, iturucuar opacatu reseve; iyavei yuvirocua-rocu yuvireco sese. Ipare oyuca seni seja peri rupi yuviraso. ³¹ Ahese judío pahi ou ahe peri rupi. Evoco mbia repiase rumo, co coti rupi oñacuasaño oso. ³² Ëgue ehi tupri avei ambuae mbia pahi pítivíasar levita, osepiase, oñacuasa tupriño avei oso no. ³³ Ipare rumo mbia sepia potapirēhi Samaria iguardocuer oso ahe peri rupi avei. Ahe os-epiase, oiparaísuereco. ³⁴ Evocoiyase ahe mbia oyemboya oso sese oiposano yapichasa mbahe quira pipe, uva ricuer sai vahe pipe, oicuhacua avei turucuar pipe chupe. Ipare osupi güeimba harive oaprive, viraso ava quesave. Aheve ihañeco sese. ³⁵ Ahere ayihive Samaria iguardocuer osose, omondo guareepochi ahe pendar oí yar upe. Ipare aipo ehi chupe: “Esáro tuprīmi tēi co ava cheu. Acoi ndehañeco catuse sese, amboepi catu irira che yevise ndeu” ehi sēta vahe upe. ³⁶ Indó, ¿uma vo co evocoiyase mbosapi yuvirecoi vahe oyemboava acoi ava ndipihai vahe remimombaraisu upe? —ehi.

³⁷ Evocoiyase ahe mbia aipo ehi:

—Acoi mbia oiparaísuereco vahe iparaísu vahecuer —ehi.

—Supi eté —ehi chupe—. Eyapo tupri avei nde co nungar eico —ehi Jesús co Moisés porocuaita rese oporombohe vahe upe.

Jesús oso Marta iyavei María rētave

³⁸ Ipare Jesús güemimbohe eta reseve oguata vité oyepota cuña recosave yuviraso, ahe cuña rer Marta. Ahe omoingue tupri güëta pipe. ³⁹ Icupihir evocoiyase María serer. Ahe oguapi Jesús pive iñehe rendu oí. ⁴⁰ Marta rumo oyembopihavíracua opacatu mbahe rese oico. Ipare oyemboya oso Jesús rese opihavíracuasa pipe aipo ehi chupe:

—Che Yar, ¿aviye ai vo evocoai che cupihir chini tēi nde píri che poravíqui viteseve? Emombehu chupe, tou, tache pítivii rane —ehi chupe.

⁴¹ Omboyeví rumo Marta upe aipo ehi:

—Marta, Marta, ¿mahera vo ereyemañeco etepri tēi setá mbahe apo água eico? ⁴² Iya rumo ñepei mbahe yaposa. Co nde cupihir oiporavo ahe mbahe aviye catu vahe oyeupe che ñehe renduse; ndipoi chietera que ava virocua vaherá ichui —ehi Jesús Marta upe.

11

Jesús ombohe güemimbohe eta yerure áqua rese

¹ Ñepei ari Jesús oyerure. Iyerure pare semimbohe aipo ehi chupe:

—Ore Yar, ore mbohemí tēi ore yerure áqua rese eve inungar Juan ombohe güemimbohe eta sereco yepi —ehi chupe.

² —Aviye —ehi—. Peyeroquise, aipo peyera:

‘Ore Ru Túpa, ivave ereico vahe, imboeteipri nde rer tasecoi. Tou nde mbororecuasa oreu.

Tayaposa nde remimbotar co íví pipe, íva pendar nungar.

³ Embou ore rembihu ari yacatundar oreu.

⁴ Iyavei ndeñero ore angaipa rese oreu.

Esepia niha, ore oreñero opacatu ore amotaréhimbar upe.

Ore mboangaipa ucai rene eve, ore renose catu mbahe tēi sui eve’ peyera —ehi

⁵ Iyavei aipo ehi no:

—Inungar co perecora pe mborípar viña. Ipare pesora ahe sétave pítu mbíter rupi aipo peyera chupe: ‘Che mborípar, emboumi tēi mbosapi pan cheu tamboyevire ndeu. ⁶ Esepia, ambuae che mborípar oyepota ou che rētave; ndarecoi eté rumo mbahe amondomi vaherá chupe’ peyera chupe. ⁷ Ipare ahe, ‘Che mañeco tēi rene eve. Esepia, opa ayoquenda, iyavei co che rahir opa aropituhu seru. Sese ndiyai apūha mbahe mondo ndeu’ ehiñora pēu viña. ⁸ Supi eté, yepe nopuhai chietera mbahe mundo pēu pe mborípar secose viña, opūhaño

itera rumo ‘tache mañeco iri eme’ oyapave. Ipare omondoño itera opacatu mbahe pe porandusa pēu. ⁹ Sese aipo ahe pēu: Peporandura mbahe rese Tūpa upe, ahese omboura pēu; peseca ahe mbahe, ahese peyosura; inungar pemota oquenda, ēgue peyera peyeroquisa pipe Tūpa upe, ahese imboisara mbahe mbou ãgua pēu. ¹⁰ Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeroquisa pipe omota vahe oquenda Tūpa upe, chupe imboisara.

¹¹ “Oimese tahi vahe pe pāhuve, tahir oporanduse pira rese vu upe, ¿omondora pīha mboi tēi guahir upe viña? ¹² anise, ¿omondora pīha oporanduse mbahe rupiha rese, mbahe rumbiquiāpe tēi chupe viña? ¹³ ¡Aní! Esepia, pe yepe ava ndaseco pōrai vahe peico viña, pe rahir upe rumo pemondoño ité mbahe aviye vahe. ¡Tahetru pe Ru iva pendar omondo catura Espíritu Santo acoi ava oyeupe porandusar upe!” ehi güemimbohe eta upe.

“Jesús vireco caruguar pīratasa oyece” ehi tupri tēi ava yuvireco

¹⁴ Ambuae ari pipe, Jesús osepia mbia caruguar nomoñehengatui vahe. Evocoiyase omose caruguar ichui. Aheseve voi iñehengatu. Ipare ava rehii sepiase, ndoyembovihai tēi yuvireco. ¹⁵ Amove rumo ava aipo ehi tēi yuvireco: “Beelzebú, caruguar rerecuar pīratasa pipe revo omboyepepi caruguar oico” ehi tēi yuvireco chupe.

¹⁶ Ambuae ava secoāhasa pipe oporandu yuvireco chupe: “Eyapo ru mbahe nde rembiapo iva pendar nde recocuer cua ãgua” ehi tēi. ¹⁷ Ahe rumo oicuaño ipihañemoñetasa. Evocoiyase aipo ehi chupe:

“Que mborerecuar guasu povri pendar ovava-vavase oyeupe oyeamotarēhisave yuvireco, ahese evoco mborerecuar pīratasa ocañi tēira. Iyavei ava omu rese ae oyeamotarēhi vahe, oyemocañi aveira yuvireco no. ¹⁸ Ēgue ehi avei niha caruguar. Esepia, serecuar omboyepepise opovri pendar, ovavara oyeupe yuvireco viña. Ahese oyemocañi tēira yuvireco. Co ñehesa aipo ahe pēu. Esepia pe, ‘Beelzebú pīratasa pipe tēi opa omose caruguar ava sui oico’ peye tēi cheu. ¹⁹ Ēgue ahese rumo viña, ¿ava pīratasa pipe ru evocoiyase pe voya omboyepepi caruguar ava sui? Pe voya ae omboye cuara pe ñehe pe rembiavi yuvireco pēu. ²⁰ Che rumo Tūpa pīratasa pipe caruguar amboyepepi ava sui. Sese cūritei Tūpa mborerecuasa oyepota ité pēu.

²¹ “Inungar oime ava ipīrata etepri vahe, iyavei vireco oyeroyasa. Ipīpe osāro güēta opacatu mbahe ipipendar avei icañiēhi ãgua. ²² Acoi ouse rumo ambuae ipīrata catu vahe

chupe, ahe osecoreroyise, opa virocua iyeroyasa ichui. Evcociyase güembierocua ahe opa viraso oyeupe.

²³ “Acoi ava ndache mboyoyai vahe, ahe che amotarēhimbar yuvirecoi; iyavei acoi ava ndosecai vahe ava cheu, ahe omosai tēi yuvireco che sui” ehi.

Caruguar oyevi iri güeco agüerve

²⁴ “Acoi osēse caruguar ava sui, oguata tēi ivi ipiru vahe rupi opituhu água reca. Ipare rumo ndoyosuisse, ipihañemoñeta oyeupe, ‘Ayevi irira che reco agüerve vicho’ ehi. ²⁵ Aheve oyevise, osepia iri secocuer inungar oi sahuvapri tupri. ²⁶ Sepiase, oso siete caruguar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui” ehi Jesús ava rehii upe.

Tūpa Ñehengagüer viroya vahe sovasapri secoira

²⁷ Oñeho viteseve aipo mbahe rese, cuña ava rehii pāhu pendar oñeho pīrata aipo ehi:

—¡Evocoí mbia sui ereha vahe iyavei nde mboacua vahe, ahe sovasapri tasecoi! —ehi chupe.

²⁸ Ahe rumo aipo ehi:

—¡Acoi osendu vahe ité che Ru Tūpa Ñehengagüer iyavei viroya vahe ité, ahe sovasapri secoira che Ru Tūpa rovaque! —ehi ahe cuña upe.

Ava eta ndaseco pōrai vahe oporandu poromondiisa rese yuvireco

²⁹ Ava rehii oyere ati vitese Jesús rese yuvireco, ahe aipo ehi: “Pe cūriteindar ava ndaseco pōrai vahe, peporandu tēi poromondiisa che recocuer cua água rese. Che rumo namboyecuai chira ambuae poromondiisa pēu. Jonás recocuer rese güeraño opomomahenduhara. ³⁰ Inungar Jonás poromondiisa secoi ava Nínive pendar upe, ēgue ehi aveira niha Ava Riquehir reco pipe oimera poromondiisa ava cūriteindar upe. ³¹ Acoi ari cañi pipe cuña mborerecuar guasu irohi coti secua vahe porandusave omombehura co ava cūriteindar cañipa água. Esepia, ahe ou amombri ivi sui Salomón mbahecuada rendu água; cūritei rumo oime ivate catu vahe cohabe Salomón sui. ³² Iyavei ari cañi pipe ava tecua Nínive pendar porandusave omombehura ava cūriteindar cañipa água. Esepia niha, omboasise oangaipa, oyevi Tūpa upe yuvireco Jonás omombehuse Tūpa Ñehengagüer chupe; cūritei rumo oime ivate catu vahe Jonás sui pe pāhuve” ehi.

Tesapesa yande retecuer resendar

³³ “Ndayañomi chira tataendi que imoendi imoi; ndayamondoi chiaveira que mbahevriye. Iyacatu rumo yamondora ivate tataendi rendave ‘tosesape opacatu ava oique vahe oi pipe’ yande yapave. ³⁴ Iyavei pe resa inungar tataendi pe retecuer upe. Esepio, aviyese pe resa, opacatu pe retecuer upe osesape. Acoi imarase rumo, pe retecuer pítumimbi vahe nungar tēi. ³⁵ Sese peicua catu co poroesapesa pereco vahe, tape rereco eme pítumimbi vahe nungar. ³⁶ Co supi eté vahe osesape tuprise opacatu pe pihave, ndipoise que pítumimbisa nungar mbahe ipipe, evocoiyase ahe inungar tataendi osesape vahe opacatu pe recocuer pipe. Ahese ndipoi que pítu vahe pēu” ehi.

Jesús omombehu fariseo iyavei Moisés porocuaita rese oporombohe vahe recocuerai

³⁷ Opase oñehe Jesús, fariseo viraso güetave imbocaru. Oiqueses sétave oso, oguapi mesave oī. ³⁸ Ocaru renondeve ndoyepoise rumo, ahese fariseo ndoyembovihai tēi nomboaviyeise judío porocuaita. ³⁹ Ahe rumo aipo ehi fariseo upe:

—Inungar igua riru iyavei tembihu riru icupe rupi tēi yoseipri, ipipe rumo iquiha opitaño ité, ēgue ehi tupri avei pe recocuer pe monda raisave mbahe-mbahe tēi pe reco pipe. ⁴⁰ ¡Pe ndayaracuai vahe peico! ¿Ndapeicuai vo pe rete aposar, pe piha aposar avei? ⁴¹ Sese pemondo porerecosa ava iparaísu vahe upe pe recatéhiéhisa pipe. Evocoiyase ipipe sui opacatu imoatirombri peicora.

⁴² “¡Peparaísu pe fariseo! Esepio, yepe pe remiti sui pemundo peyacatu ñepei-peí diez vahe sui Tūpa upe viña, pe rumo ndaperoyai teco ñvisa iyavei peseyaño tēi Tūpa poroaisusa. Iyacatu rumo peyapora evocoi mbahe pe porerecosa sui pe poiéhisa pipe viña.

⁴³ “¡Peparaísu pe fariseo! Esepio, peipota pe renda porañete catu vahe pe guapi água tūparo pipe, iyavei peipota pēu opacatu ‘avirave’ oyapora ava pe mboeteisave ocar rupi yuvireco.

⁴⁴ “¡Peparaísu! Esepio, pe recocuerai inungar tehögür ruvípa icuaéhise ava oguata ihari rupi yuvireco” ehi chupe.

⁴⁵ Evocoiyase Moisés porocuaita rese oporombohe vahe,

—Porombohesar —ehi—, aipo eremombehu vahe pipe niha ava ore amotaréhiño yuvireco —ehi.

⁴⁶ Ahe rumo aipo ehi:

—¡Peparaísu avei pe Moisés porocuaita rese oporombohe vahe! Esepio, pemondo porocuaita yavai vahe ava upe; pe rumo evocoiyase ndapeipítivíimi eté ahe ava imboaviye água rese yuvireco.

⁴⁷ “¡Peparaīsu! Esepiā, pemoingatu Tūpa ñehe mombehusar ruvípagüer peico Tūpa mboeteisa angahu pipe tēi. Pe ramoi teiteté rumo oyuca yuvireco. ⁴⁸ Evocoiyase pemboyecua co pe ramoi eta pihañemoñeta agüer secocuer moña pipe peico. Esepiā, ahe oyuca Tūpa ñehe mombehusar yuvireco. Pe evocoiyase cūritei pemoingatu vite suvípagüer peico.

⁴⁹ “Sese Tūpa ombahecuasa pipe aipo ehi: ‘Amondora che ñehe mombehusar, apóstol avei ndiporeroyai vahe upe. Ahe ipāhu pendar oyucara yuvireco. Iyavei ambuae marama tēi virecora yuvireco’ ehi. ⁵⁰ Esepiā, ava ndiporeroyai vahe cūriteindar upe ité omondora oñemoirosa opacatu oñehe mombehusar yucagüer rese aracahe suive, cūriteindar avei oyucase yuvireco. ⁵¹ Abel yuca agüer suive oyepotara Zacarías yuca agüerve oso. Ahe oyuca tūparo maranehi rocar mbahe reropovēhesa rovai. Supi eté aipo ahe pēu: Tūpa opara omondo oñemoirosa ahe yuca agüer rese ava ndiporeroyai vahe cūriteindar upe curi.

⁵² “¡Peparaīsu pe Moisés porocuaita rese oporombohe tēi vahe! Esepiā, pe mbahecuasa avíye soquendapri pereco ava sui. Pe niha ndaperoyai, iyavei ambuae ava upe ndapeipotai seroya ãgua” ehi chupe.

⁵³ Ipare Jesús osē oso ichui. Ahese Moisés porocuaita rese oporombohe vahe iyavei fariseo eta oñemoiró iteanga yuvireco sese. Ahe omañeco tēi, oporandu-randu mbahe rese yuvireco chupe, ⁵⁴ osecoãha-ãha tēi mbahe pipe ‘toyavi angahu oñehe yandeu’ ohesa pipe yuvireco.

12

Fariseo recocuer rese Jesús oñeho

¹ Ahe pipeve avei ava oñemonuha atí iteanga oyemboti tupri oyemombo guasu-guasu yuvireco. Yipindar Jesús güemimbohe upe rane omboipi oñehe: “Peñearo tupri fariseo pan mboapeposa nungar sui. Esepiā, ahe ndoyavii supi tupri vahe viña; ndahei eté rumo. ² Esepiā, yaposa vahe imombe-hupiréhi cūritei icuasaño itera curi. Iyavei mbahe ñomipri icuasaño aveira no. ³ Supi eté opacatu mbahe pemombehu vahe pítumimbisave, ahe sendusa tupira ari pipe coiye; iyavei acoi mbahe pemombehu vahe peyeupeñomi ‘tosendu eme ambuae ava’ pe hesa pipe, serosapucaisara oí haríve opacatú ava rovaque” ehi.

¿Uma sui pīha siquyesara?

⁴ “Iyavei aipo ahe pēu, che mboripareta: ndapesiquiyei chira acoi ava pe yuca potasar sui. Esepiā, ipare ndoicatu iri ambuae mbahe apo ãgua pēu. ⁵ Che rumo amombehura pēu

uma sui pesiquiyera: acoi oicatu vahe ombororecuasa pipe pe yuca pare pemondo tata guasuve. Ahe ichui eté pesiquiyera.

⁶ “Pe pemondo poyandepo vīrai ñuvirío guarepochi rupivemi tēi yepi. Tūpa rumo ndasesarai eté que ñepei sui. ⁷ Tūpa niha oicua ñepei-pei yande ha retacuer. Sese, pesiquiye eme; pe niha ivate catu vahe ité peico opacatu vīrai sui” ehi.

“Che aroya ité Jesucristo” ehi vahe opacatu ava rovaque

⁸ “Acoi ava ‘che aroya Jesús’ ehi vahe opacatu ava rovaque, che avei, Ava Riquehir, ‘Co che reroyasar secoi’ aipo ahera che Ru upe sembiguai rovaque. ⁹ Acoi ava ‘che ndaroyai Jesús’ ehi vahe rumo cheu opacatu ava rovaque, che avei evocoiyase, ‘Co ndahei che reroyasar secoi’ ahe aveira che Ru Tūpa upe sembiguai rovaque” ehi.

¹⁰ “Iyavei opacatu oñehe-ñehe tēi vahe che, Ava Riquehir, rese, ahe chupe oimeño ñeroisa. Acoi que ava iñehe-ñehe tēi vahe rumo Espíritu Santo amotarēhisave, ahe chupe ndipoi chietera ñeroisa” ehi.

¹¹ “Acoi pe amotarēhisar che recocuer sui tēi pe rerasose porandusave pe recoāha água yuvireco, anise mbororecuar mbahe moingatusar rovai, que ambuae mbororecuarea upe avei no, ‘¿Mbahe pīha amombehura?’ ndapeyei chira. ¹² Esepiá niha, ahe pipeve voi Espíritu Santo pe mbohera aviyeteramo tēi mbahe mombehú água rese” ehi güemimbohe eta upe.

Ñearosa mbahe pota raisa sui

¹³ Ñepei mbia ava rehii pāhu pendar aipo ehi Jesús upe:

—Porombohesar, emombehumi che riquehir upe, tomboy-ahomi tēi mbahe che mombahesa cheu —ehi.

¹⁴ Ahe rumo omboyeví chupe:

—Che mboripar, che ndachecuaitai mbahe moingatu água, mbahe mboyaho-yaho água avei —ehi ahe mbia upe.

¹⁵ Ipare aipo ehi:

—Peñearo tupri opacatu mbahe pota raisa sui. Esepiá niha, ndahei mbahe rereco atí água pe recocuer —ehi.

¹⁶ Ipare omboyoaya ambuae mbahe rese imbohe: “Oime mbia mbahe yar, iha tupri ai eté semiti. ¹⁷ Ahese ipihañemoñeta oico oyeupe: ‘¿Mara ahera pīha che rembipoho rereco?’ ehi tēi. ‘Ndareco iri eté yapocatu água’ ehi. ¹⁸ Ipare ipihañemoñeta cute: ‘Aicua mbahe che rembiaporá. Opara aroyi tembihu rēta. Ichui ayapo irira ambuae tuvichá catu vahe. Aheve ayapocatura che remiti rāhii opacatu mbahe areco vahe avei no. ¹⁹ Evocoiyase aipo ahera cheyeupe: Che mboripar, oime setá mbahe cheu aravíter momba-momba água; sese cūritei apituhura vichico, acarura, acahura iyavei

ayemboviharetera no, ahera' ehi. ²⁰ Tūpa rumo aipo ehira chupe: 'Mbia, nandearacuai eté eico, co pītu pipeve voi eté eremanora. Co mbahe nde rembiapocatu, ¿ava mahera pīha evocoiyase?' ehira chupe. ²¹ Ëgüe ehi eté niha que ava oyeupeñomi tēi mbahe omonuha ati vahe, iparaisu rumo Tūpa rovaque" ehi ahe mbia upe.

Tūpa osāro opacatu guahir

²² Ipare aipo ehi Jesús güemimbohe upe: "Co amombehura pēu: Ndapeyemomahenduha guasu ai chira pe remihura rese pe recove água, pe turucuarā rese tēi avei no. ²³ Yande recovesa rumo avíye catu vahe tembihu sui; yande retecuer avei avíye catu turucuar sui no. ²⁴ Pesepia vīrai: nomahetii vahe, nomonuhai vahe avei, ndovirecoi vahe avei mbahe rāhii rēta yuvireco. Tūpa rumo omoime mbahe itohu. ¡Pe rumo ivate catu vahe ité peico vīrai sui! ²⁵ Ndipoi eté que ñepei pe pāhu pendar oicatu vahe opíhañemoñetá iteangasa pipe tēi güecocuer mbosassaviño água. ²⁶ Supi eté ndapeicatuise yapo, ndiyai peyemomahenduha guasu ai mbahe rese.

²⁷ "Pemahecua ru mbahe potri caha pipendar rese: ndoporaviqui eté iyavei ndoipiai oturucuarā. Iyavei no yepe mborerecuar guasu Salomón vireco setá mbahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. ²⁸ Tūpa niha omboporañete raimi tēi mbahe potri caha pipendar. Ichui sapisapaño horno pipe. ¡Ahe rumo omundo catura turucuar pēu, pe ava nimbahe reroya tupri vahe! ²⁹ Sese, '¿Mbahe pīha yahura, mbahe pīha yamondera?' ndapeyei chira pe yemomahenduha guasu aisa pipe. ³⁰ Esepia, ava Tūpa reroyasarēhi co ivi pipendar aipo nungar mbahe reseño tēi ipíhañemoñeta yuvireco yepi. Pe Ru Tūpa rumo oicua ité pēu mbahe ipane vahe. ³¹ Avíye catu rumo pesecara pe Yar Tūpa povrīve pe reco água, ahese omboura que mbahe ipane vahe pēu" ehi.

Ivave mbahe eta oime vahe yandeu

³² "Aní pesiquiye, che ovesa nungar, yepe pe moviromi tēi peico viña, pe Ru rumo oporoaisusa pipe oipota opovrīve pe rereco água. ³³ Pemondopa mbahe pereco vahe ava oipota vahe upe. Ipare pemondo sepri avei iparaisu vahe upe. Ahe yapocatusa ivave mbahe rīru ndituyui vahe nungar pipe. Aheve ava imonda rai vahe ndoiquei chira ñomi água pe sui iyavei mbahe rasoi nomomarai chiaveira. ³⁴ Esepia, pe mbahe pe rembiereco setá catu vahesa rupi-rupi pe pīhañemoñeta yepi" ehi.

Peyemoingatu Tūpa Rahir yevi água

³⁵ “Peyemoingatu tupri che yevi ãgua. Inungar tataendi ndogüei vahe, pemboynecua tupriño ité che recocuer pe recocuer pípe ava upe. ³⁶ Peico imboacuapri güerecuar osäro vahe nungar mendasa sui iyevise, oquenda imotase, omboi voi vahe yuvireco chupe. ³⁷ Aviye itera serecuar upe osepiase iyemoingatu voi; evocoiyase serecuar ae niha ihañecora sese, omboguapira mesave imbocaru. ³⁸ Yepe serecuar oyepotara pítu mbiter ou viña, anise añihiveive, ahe rumo osäroño itera chupe imboi ãgua yuvireco. Evocoiyase serecuar aviye ai etera chupe. ³⁹ Peyapisaca tupri co rese: acoi oí yar oicuase mbahe hora imonda vahe yepota ãgua, ahese opitara imonda vahe räro güëta pipe sui mbahe renoseëhi ãgua. ⁴⁰ Ëgüe peye aveira peyemoingatu che yevi ãgua. Esephia niha, che, Ava Riquehír, aporoesapiha tēira vitu curi” ehi Jesús viroyasareta upe.

Mbiguai omboavíye vahe ocuaita iyavei nomboavíyei vahe

⁴¹ Evocoiyase Pedro oporandu Jesús upe aipo ehi:

—Che Yar, ¿oreuñomi píha eremombehu co porombohesa eremboyoya vahe ambuae mbahe rese, opacatu upe tie? —ehi.

⁴² Evocoiyase omboyevi Pedro upe aipo ehi: “Acoi ava mbahe rese ñangarecuar omboavíye tupri vahe ocuaita, yaracua vahe avei, ahe chupe serecuar oseya icuaitarã güëta pipendar rese hañeco ãgua ‘tembihu tomondo che rëta pipendar upe che porocuaita rupi’ ohesave. ⁴³ Acoi omboavíye ocuaita, ahese oviharetera güerecuar yevise. ⁴⁴ Supi eté niha, serecuar oyocuaira opacatu ombahe rese hañeco ãgua. ⁴⁵ Ahe mbiguai rumo ‘ndoyepota vîtei chira revo che rerecuar’ oya omboetasa cuimbahe iyavei cuña omboipi mara-mara têi sereco iyavei ocaru, oihu têi osavaipo-ipoño avei oico. ⁴⁶ Ipare rumo serecuar oyepotara imahemohaëhiseve; ahese omombaraisu catura inupa sereco, inungar acoi ndiporeroyai vahe rerecosa yepi” ehi.

⁴⁷ “Acoi mbiguai oicua têise mbahe güerecuar remimbotar, noyemoingatuse rumo iyavei ndoviroaise oico, ahe evocoiyase serecuar oinupara. ⁴⁸ Acoi mbiguai nomboavíyei vahe ocuaita icua tupriëhisa pípe, nañemoirosa rutei chira chupe. Esephia niha, acoi imondosa catu vahe icuaitarã, porandusa catura chupe. Acoi oyeroaya catu vahe, oporandu catu aveira sese” ehi.

Jesús reroyasa pípe sui oimera yeamotarëhisa

⁴⁹ “Che ayu tata nungar yavai vahe reru ãgua co ivi pipendar upe ‘joyandu tarahu yuvireco cute viña!’ viya. ⁵⁰ Aique ranera rumo mbahe têi che recoähasa pípe, jëgüe ahera che paraísú itera imboavíye ãgua! ⁵¹ ‘Mbahe tupri ai revo

güeru co ivi pipe' ndapeyei chira cheu. Ëgüe ehi rumo che ayu che sui ava yeamotarëhi äqua. ⁵² Esepiá niha, co pipe suive ité que poyandepo tupri revo oñemu yuvirecoi vahe amove oyeamotarëhira yuvireco che recocuer sui: mbosapi oyamotarëhira ñuvirio vahe, ñuvirio vahe evocoiyase oyamotarëhira mbosapi vahe yuvireco. ⁵³ Que ava oyamotarëhira guahir, anise tahir evocoiyase oyamotarëhira vu; cuña oyamotarëhira omembri, imembri evocoiyase oyamotarëhira osi; sovayar oyamotarëhira vovayar" ehi güemimbohe upe.

Iva pendar poromondiisa mboyecuasa

⁵⁴ Ipare Jesús aipo ehi ava rehii upe: "Pe pesepiase mbahe pítu ari sosa coti sui opühase, ahese, 'Oquira' peye. Ëgüe ehi eté oqui. ⁵⁵ Iyavei acoi ivitú oipeyuse irohi coti sui, ahese, 'Sacú iteangara' peye. Ipare ëgüe ehi eté. ⁵⁶ ¡Pe Tüpa reroyasar angahu tēi peico vahe! Pe niha peicua mbahe iva rese oyecua vahe tēi iyavei ivi rese mbahe oyecua vahe tēi mombehu, ¡mahera ru ndapeicuai peyeupe mbahe cüritei oime vaherä mombehu peico!" ehi.

Peñero pe amotarëhimbar upe

⁵⁷ "¿Mahera napesäha ranei pe ae ité co mbahe supi eté vahe? ⁵⁸ Acoi que ava nde amotarëhisar nde soho ucase nde mundo äqua mborerecuar rovai, emoingatu tupri voi mbahe eico chupe tenondeve nde rerasoëhi äqua sovai; anise, mborerecuar nde mondora ava naporai vahe rarösar upe. Ahe evocoiyase nde roquendara. ⁵⁹ Supi eté nderesëi chietera acoi eremboepipase voi eté eresëa ichui" ehi ava rehii upe.

13

Aviye catu ité yañecuñaro

¹ Ahe pipeve avei yuviraso ava Jesús repia. Ahese omombehu Pilato mbia Galilea pendar yuca uca agüer: Ahe mbia viropovëhese mbahe mimba yucapri yuvireco chupe. Ahe suvi oyeseha mbahe mimba ruví rese.

² Ipare Jesús aipo ehi chupe: "Pemoha co pe: Mbahe tēi oime vahe evocoí mbia Galilea pendar upe, yangaipa guasu catu rese ambuae güecua pendar sui ëgüe ehi mbahe chupe viña. ³ ¡Aní rumo! Acoi ndapemboasiise pe angaipa Tüpa upe pe yevi äqua, pe avei opara pecañi tēi. ⁴ Peroya avei acoi ava dieciocho tupri yuvirecoi vahe omanopase Siloé torre oviapise iharive, 'Ahe yangaipa catu yuvireco ambuae ava Jerusalén pipendar sui' peye viña no. ⁵ Aní rumo; acoi ndapemboasiise pe angaipa Tüpa upe peyevi äqua, pe avei opara pecañi tēi" ehi.

Yembohesa ivira higuera ndihai vahe resendar

⁶ Evocoiyase Jesús omombehu mbahe omboyoya oporombohe ambuae mbahe rese aipo ehi: “Oime mbia vireco vahe ivira higuera oco pipe. Setá ari ahe oso sepia ‘¿iha pīha?’ oyapave. Ndosecai eté rumo iha sese. ⁷ Ahese aipo ehi mbia oco rārosar upe: ‘Esendu, che ayu pīhi tēi higuera ha reca mbosapi aravíter rupi. Ndasepiai eté rumo que ñepei iha sese yepi’ ehi. ‘Eyasiapa; ndiyai ihāi tupri tēi cohaye’ ehi. ⁸ Ico rarōsar rumo omboyevi chupe aipo ehi: ‘Che rerecuar, ēgue tehiño vite tēi rane co aravíter; amonguhira ivi chupe. Ipare amondora ivi sū vahe mbahe repochi resendar sese. ⁹ Ahese revo ambuae aravíter ihara cute; anise ité rumo, ereyasia ucaño itera’ ehi ico rārosar güerecuar upe” ehi Jesús ava mbohe.

Jesús ombogüera cuña oyecuhapami vahe mbituhusa arí pipe

¹⁰ Ñepei mbituhusa arí pipe Jesús oporombohe judío tūparo pipe. ¹¹ Aheve oime cuña imbaheasi vahe, dieciocho aravíter rupi ahe mbaherasisa vireco, caruguar tēi omboyeapami uca sereco. Sese ndoicatui opūha tupri oguata. ¹² Osepiase rumo Jesús, “Erio” ehi chupe.

—Cuña, cūritei nanembaheasi iri eico cute —ehi.

¹³ Evocoiyase omondose opo sese, aheseve voi cuña oymohivi. Ipare omboetei Tūpa oico. ¹⁴ Judío tūparo rerecuar rumo oñemoiro ahe cuña mbogüerasa rese mbituhusa arí pipe. Sese aipo ehi ava eta upe:

—Oime niha seis arí mboraviqui água; ahe arí pipe peyura peposano água, ndahei chira mbituhusa arí pipe —ehi.

¹⁵ Evocoiyase ahe mbia upe omboyevi aipo ehi:

—Pe Tūpa reroyasar angahu tēi peico vahe, ¿nomboihui vo pe pāhu pendar acoi güeimba tivi iyavei guaricu mbituhusa arí pipe yuvireco yepi no? ¹⁶ Co rumo cuña, Abraham suindar Caruguar omombaheasi vahe dieciocho aravíter suive sereco, ¿ndiyai eté pīha evocoiyase imbogüerasa mbituhusa arí pipe? —ehi tūparo pendar rerecuar upe.

¹⁷ Aipo ehise, opacatu yamotarēhisar yuvinochi tēi yuvireco ichui. Ambuae ava rumo oyembovīhaño opacatu Jesús rembiapo osepiase yuvireco.

Yembohesa mostaza rāhii suindar

¹⁸ Evocoiyase Jesús aipo ehi avei: “¿Mbahe nungar pīha Tūpa povri pendar, iyavei mbahe rese vo amboyoyara? ¹⁹ Oyoya tupri ité mostaza rāhii rese, inungar acoi mbia oñoti vahe oco pipe. Ichui ocuacua, tuvichá iteanga. Ahe sāca rese vīrai rehī oyapo guaitirā” ehi oporombohe.

Yembohesa pan mboapeposa sui

²⁰ Evocoiyase Jesús aipo ehi iri: “¿Mbahe rese pīha amboyoyara Tūpa povri pendar? ²¹ Oyoya tupri co pan mboapeposa

rese, acoi cuña omboyeseha tupri vahe mbosapi sāhambri trigo cuhi rese opacatu imboapepo ãgua yepi" ehi oporombohe.

Jesús perí icāhimi vahe nungar

²² Ipare Jesús osoño Jerusalén ve, opita-pita tecua yacatu rupi oporombohe oico. ²³ Ahe supi ichose, ñepei mbia oporandu chupe aipo ehi:

—Che Yar, ¿supi eté pīha moviromi tēi ava oñepisirora yuvireco? —ehi.

Ahe evocoiyase omboyevi chupe:

²⁴—Peyemoviracua tupri catu peique ãgua oquendipí cāhimi rupi. Esepia niha, supi eté setá ava osāha tēira yuviroique vaherā ahe oquenda rupi yuvireco viña, ndoyuviroique catui chira rumo yuvireco. ²⁵ Supi eté ahe inungar oi yar ouse oquenda mboya viña. Amove ava evocoiyase ocarve yuvirecoi vite vahe omota tēira oquenda, ‘Ore yar, emboimi tēi oreu’ ehi tēira yuvireco. Ahe rumo aipo ehiñora chupe: ‘Aní, ndopocuai vahe rumo pe’ ehiñora chupe. ²⁶ Evocoiyase ahe aipo ehi tēira yuvireco: ‘Ore niha orocaru vahe, oroihu vahe nde piri, iyavei ore mbohe ore rocar rupi eve yepi’ ehi tēira yuvireco chupe. ²⁷ Ahe rumo aipo ehira: ‘Ñepei reseve niha acoi, Ndopocuai vahe, ahe pēu. ¡Pesiri che sui, pe opacatu mbahe-mbahe tēi aposar!’ ehiñora chupe. ²⁸ Pe rumo imomboprira pe recocuer Tūpa povri sui, sese peyaseho tēira, peyemoaitere tēira peico pesepiase Abraham, Isaac, Jacob iyavei opacatu Tūpa ñehe mombehusareta yuvirecoise Tūpa povrīve ivave. ²⁹ Iyavei ava yugüerura añihivei coti sui, caharu coti sui, norte coti sui iyavei irohi coti sui, ahe evocoiyase yuviroguapira ocaru Tūpa mborerecuasave ipiri yuvireco. ³⁰ Supi eté amove ava ndoyavii ipa tēi vahe seique ãgua ivave Tūpa piri viña, ahe ranengatu rumo yuviroiqueño itera piipe iyavei amove ava tenonde catu vahe ndoyavii ahe rane oique vaherā ivave viña. Ahe rumo ipa tēi yuviroiquera —ehi Jesús ava rehii upe.

Jesús oyaseho Jerusalén pendar rese

³¹ Ahe ari piipe oyepota moviro fariseo aipo ehi tēi Jesús upe yuvireco:

—Eyepepiño ave sui. Esepia, Herodes niha nde yuca pota oico —ehi tēi yuvireco chupe.

³² Ahe rumo,

—Peso, tapemombehu aipo mbia aguara nungar tēi upe: ‘Esepia, co piipe iyavei ayihive amboyepepiñora ava sui caruguarella vichico, ambogüerañora ava imbaherasisa sui, curi ayihive evocoiyase amombara che cuaita’ peyera. ³³ Che rumo aporavíquiño itera co piipe, ayihive iyavei curi ayihive

vichico. Ipare asora Jerusalén ve. Esepio niha, ndiyai Tūpa ñehe mombehusar omano co coti tēi Jerusalén sui yuvireco — ehi.

³⁴ “¡Too rutei pe Jerusalén pendar, peyuca vahe Tūpa ñehe mombehusar, iyavei ita pipe peyapi-yapi ava Tūpa remimbou yepi! ¡Setá rupi che opomonuha pota tēi pe rereco, inungar tacura omonuha vahe omembri opepovrīve, ëgüe ahe pota tēi pe rereco viña, pe rumo ndapeipotai eté! ³⁵ Sese seyapirā tēi peicora. Iyavei ndache repiai chiaveira peye acoi, ‘Imboeteipri Yar remimbou tasecoi’ peyese voi che repia irira peye” ehi Jerusalén pendar upe.

14

Jesús ombogüera mbia iruru sui

¹ Ñepei mbituhusa ari pipe Jesús oso ocaru mborerecuar fariseo rētave. Aheve ambuae fariseo eta oiviro yuvireco.

² Aheve avei mbia iruru vahe secoi. ³ Evocoiyase Jesús oportandu Moisés porocuaita rese oporombohe vahe upe iyavei fariseo eta upe avei aipo ehi:

—¿Ipotasa vo mbituhusa ari pipe imbaheasi vahe mbogüera ãgua; aní tie? —ehi.

⁴ Ahe rumo noñeheiño yuvireco chupe. Ahese ahe opoco imbaheasi vahe rese, ombogüera. Ipare, “Eso tupriño” ehi chupe. ⁵ Fariseo eta upe evocoiyase aipo ehi:

—¿Ava pīha pe pāhu pendar novinose voi chira güeimba guaricu, anise tīvi oviapise ivicuar pipe mbituhusa ari pipe viña? —ehi.

⁶ Ahese nomboyevi catui eté iñehe yuvireco chupe.

Jesús ombohe mendasave ichohopri yuvireco

⁷ Ava ichohopri oiporavo-ravo güenara imbooyeroyapri catu vahe mesave oyeupe nara yuvireco. Ahe sepiase aipo ehi Jesús imboaracua:

⁸ —Acoi que yande soho ucase mendasa pietasave yuvireco, ndayaguapii chira ava imboeteipri catu vahe renda harive. Esepio, aviyeteramo que ambuae ava ichohopri oyepotara yande sui imboeteipri catu vahe yuvireco. ⁹ Ipare yande soho ucasar aipo ehira yandeu: ‘Epūha evocoí sui, co mbia toguapi eipeve’ ehira yandeu. Evocoiyase yande yachī tēira yaso ipami tēi yaguapi. ¹⁰ Yande soho ucase rumo yuvireco, yaguapira evocoiyase ipa; yande soho ucasar ouse, aipo ehira yandeu: ‘Mbori, erio cohabe tenda imboeteipri catu vahesave ore piri’ ehira. Ëgüe yahera imboeteipri yaico acoi ava yuviroguapi vahe rovaque yande piri. ¹¹ Esepio niha, acoi ava oyemboivate ai vahe opara seco reroysiá; acoi ava seco mbegüe vahe rumo, ahe seco mboivate catusara curi —ehi.

¹² Ipare aipo ehi avei ichohosar upe:

—Ereyapo potase pieta, ndereichoho ucai chira nde mboripar, que nde rivri, que nde mu iyavei que nde rēta cotindar imbahe eta vahe. Esepi niha, ahe omboyevira ndeu, nde soho ucara oyepiri yuvireco; ēgue ehira evocoiyase mbahe imboyevipa yuvireco ndeu. ¹³ Ereyapose rumo pieta, ereichoho ucara ava iparaisu vahe, ava ipo chutu vahe, anise ipi chutu vahe, ipāri-pāri vahe, ndasesapiso vahe avei. ¹⁴ Esepi niha, ahe ndoicatui mbahe mboyevi yuvireco ndeu. Opase rumo ocuerayevi ava seco catupri vahe yuvireco, ahese erekiharetera eico. Esepi, ereipisira mbahe aviye vahe Tūpa suindar —ehi.

Jesús oporombohe carusa rese

¹⁵ Iñehe renduse rumo, ñepei mbia yuviroguapi vahe mesave, ahe aipo ehi Jesús upe:

—¡Sovasaprí catu ava Tūpa píri ocaru vahe imborerecuassave! —ehi.

¹⁶ Evocoiyase aipo ehi ahe mbia upe:

—Oime mbia oyapo vahe carusa guasu, oichoho uca ava setá oyepiri. ¹⁷ Ipare oyepotase ari caru água, ahese aipo ehi güembigui mondo: ‘Toyugüerupa che píri ichohopri. Esepi niha, mbahe opa oingatu cute’ ehi. ¹⁸ Opacatu rumo ava, ‘Eñemosaañomi tēi cheu’ ehi pāve yuvireco. Yipindar mbia aipo ehi: ‘Che rumo arocua ivi; iya ité aso sepi. Sese eñemosaañ cheu’ ehi chupe. ¹⁹ Ambuae mbia aipo ehi: ‘Che arocua ramo diez tupri tivi, ahe asāha ranera. Sese eñemosaañ cheu’ ehi chupe. ²⁰ Ambuae aipo ehi no: ‘Che amenda ramomi vichico. Sese tēi ndasoi chira’ ehi. ²¹ Oyevise mbiguai, opa tupri omombehu mbahe güerecuar upe. Ahese serecuar aipo ehi oñemoirosa pipe güembigui upe: ‘Eso voi evocoiyase opacatu ocar rupi. Supi sui eru ava iparaísumi vahe, que ava ipo chutu vahe, anise ipi chutu vahe, que ndasesapiso vahe, anise que ava ipāri-pāri vahe avei no’ ehi. ²² Coiye ava reru pare aipo ehi mbiguai güerecuar upe: ‘Che rerecuar, aroya ité nde che cuaita; ipane vite rumo ava’ ehi. ²³ Evocoiyase aipo ehi güembigui upe: ‘Eguata iri ambuae peri tecua ívirindar rupi avei toyugüerumi che rētave yuvireco che píri, tomboapipopa ité che rēta yuvireco’ ehi. ²⁴ ‘Esepi niha, acoi yipindar ava aichoho uca vahe ndipoi chietera que ñepei ocaru vaherā che píri’ ehi güembigui upe —ehi Jesús ahe mbia mbohe.

Yavai Cristo rupi guata água

²⁵ Ava rehii Jesús raquicuei oguata yuvireco. Sese ahe oyemboyere aipo ehi ava upe: ²⁶ “Acoi oimese que ava oipota vahe che rupi oguata água, tache raisu catu que ambuae

ava sui, que oyesupa, osi, güembireco, guahireta, vivireta iyavei güeindireta sui, oyesui avei. Êgüe ndehise, evocoiyase ndiyai chupe che remimbohe seco água. ²⁷ Iyavei que ava noñemosaoñoi vahe mbahe-mbahe tēi upe oiporarase ari yacatu rupi inungar-ra ocurusu rese ovosii vahe viña che rupi oguata água, ahe chupe ndiyai che remimbohe seco água” ehi. ²⁸ “Que ava pe pāhu pendar omopuha potase oi, ¿ndoy-apisaca ranei chira ‘¿amomba angara pīha?’ oyapave? ²⁹ Esepi niha, omondose oi renara yipindar. Ipare rumo nomboaviye catuisse, ahese opacatu ava sepiase viroírora ³⁰ aipo ehira yuvireco: ‘Aye evocoí mbia omopuha pota tēi oi viña, ndoicatu eté rumo imboaviye’ ehira yuvireco chupe. ³¹ Iyavei que mborerecuar guasu diez mil sundao vireco vahe oyeipi potase ambuae mborerecuar veinte mil ava vireco vahe sui, oyapisaca ranera yipindar icua tupri água ‘¿yaicatura pīha setá catu vahe rese yavava?’ ohesave. ³² Esepi, ndoicatuise, evocoiyase ambuae mborerecuar guasu amombri vite secoise, omondora mbahe mombehusar mbahe tupri rese porandu água chupe. ³³ Êgüe ehi avei pe recocuer ndapeseya potaise pe mbahe opacatu, êgüe ehi vahe ndahei eté che remimbohe” ehi.

Yande recocuer inungar yucrī

³⁴ “Yucrī aviye vahe ité yandeu; nasehe irise rumo, ndayaicatu chietera imoehe iri água. ³⁵ Naporai eté ivi upe nara; ndiyai avei ivi mbahe repochi resendar rese oyeisha vaherā. Evocoiyase ahe imombopri tēi vaherā. Sese aipo ahe acoi ava oyapisaca pota vahe, toyapisacaño” ehi.

15

Porombohesa ovesa ocañi tēi vahe resendar

¹ Opacatu ava sui guarepochi rerocuasar yuvirecoi vahe iyavei ava eta yangaipa guasu vahe, oyemboya Jesús rese iñehe rendu água yuvireco. ² Sese fariseo yuvirecoi vahe iyavei Moisés porocuaita rese oporombohe vahe yuvireco, ahe oviroíro tēi yuvireco aipo ehi:

—Co mbia ombori pota rai ava yangaipa guasu vahe tēi oico yepi, ocaru avei ipāhuve no —ehi.

³ Evocoiyase Jesús omombehu ovesa resendar yembohesa: ⁴ “Que ñepei pe pāhuve virecose cien ovesa güeimba, ipare co ocañira ñepei ichui viña, oseyá ranera evocoiyase evocoí noventa y nueve tēi aviye vahesave seco água. Ipare oyevira ocañi vahe reca oso, oyosu rane itera viña. ⁵ Oyosuse, osupira oachihive vorivetesapipe. ⁶ Ipare oyepotase güetave, omonuhara omboripareta, ocotindareta avei no. Ipare aipo ehira chupe: ‘Yayembovihara che piri. Esepi niha, ayosu

ité ovesa ocañi vahecuer cute' ehira. ⁷ Supi eté ñgue ehi aveira oime torivetes guasu catu ivave acoi ñepei ava yangaipa guasu vahe oñecuñarose güecocuerai sui noventa y nueve yuvirecoi tupri vahe sui yuvireco" ehi.

Yembohesa guarePOCHI ocañi vahe resendar

⁸ "Acoi que cuña omocañise ñepei guarePOCHI diez tupri vireco vahe sui, omoendira tataendi. Ipare osahuvara oi, oseca mbegüera, oyosu rane itera. ⁹ Evocoiyase oyosuse, omonuhara omboripareta, ocotindareta avei no chupe aipo ehira: 'Yayembovhara che piri. Esepia niha, ayosu guarePOCHI che sui ocañi vahecuer cute' ehira. ¹⁰ Supi eté ñgue ehi aveira oime torivetes Túpa rembiguai iva pendar rehii upe que ñepei ava yangaipa guasu vahe oñecuñarose güecocuerai sui" ehi.

Yembohesa mbia rahír ocañi vahe resendar

¹¹ Aipo ehi avei oporombohe: "Oime mbia vireco vahe ñuvirío guahir. ¹² Chihivahe catu vahe aipo ehi oyesupa upe: 'Che ru, embou mbahe che mombahesa cheu' ehi. Iyesupa evocoiyase omboyaho ombahe imondo chupe. ¹³ Ipare coiye catumi, omonuhapa opacatu ombahe. Ichui oso amombri ambuae tecuave. Aheve oguarePOCHI oiporupa tēi ombahe pota raisa pipe. ¹⁴ Acoi oiporupa tēise rumo opacatu ombahe, ahese oime tiavor ahe ivi rupi. Ahe evocoiyase ndasiepoi tēi oico. ¹⁵ Evocoiyase oso mboravíqui reca mbia piri aheve. Ahe mbia evocoiyase omundo ocove güeimba cuchi rāro água. ¹⁶ Aheve oyemohitaro pota tēi cuchi rembihu pipe oico viña. Ndipoi eté rumo omundo vahe chupe. ¹⁷ Evocoiyase oye-momahenduha tēi güeta pendar oporavíqui vahe rese: '¡Che ru rētave oporavíqui vahe rumo co omoumbire guasu-guasu tēi güembihu yuvireco! ¡Che rumo che yuca pota tēi che rieporéhi che rereco cohabe! ¹⁸ Sese ayevira che ru rētave. Aipo ahera chupe: Ayemboangaipa Túpa rese, nde rese avei no. ¹⁹ Ahese che ndahe iri chira nde rahír nungar aico; iyacatu revo ndeu, oporavíqui vahe nungar tēi che rerecoñora eve, ahera' ehi. ²⁰ Evocoiyase oyevi iri oso vu rētave cute.

"Amombri vitemi tahir recose rumo iparaísu catu chupe, oña voi oso guahir rovaichi, oyaco osovaupite avei. ²¹ Ahese tahir aipo ehi chupe: 'Che ru, ayemboangaipa Túpa rese, nde rese avei; ndiya iri nde rahír che reco água' ehi. ²² Tu rumo aipo ehi güembiguai upe: 'Peso, taperumi aviye catu vahe turucuar pemboyemonde, pemonde avei cuã penda sese, pitaqui avei. ²³ Iyavei guaca iquira catu vahe peyuka. ¡Yayapora pieta guasu!' ehi. ²⁴ 'Esepia, co che rahír aviye

omano vahe secoi viña, cûritez rumo oyevi iri cheu' ehi. Êgüe ehi opacatu sorivete yuvireco pieta apo.

²⁵ "Tahir cuacua catu vahe rumo obove vîte secoi. Oyevise ou güëta rerovicave, osendu voi ipieta guasu vahe yuvireco. ²⁶ Evocoiyase oporandu mbiguai upe mbahe oime vahe rese. ²⁷ 'Nde rivri mo co oyevi tupri iri ou. Sese nde ru oyaca uca guaca iquira vahe iyevisa resendar' ehiño. ²⁸ Evocoiyase tiuehir oñemoirosa pipe, ndoque potai oyesupa uve oí pipe; tu rumo oseno ité ocarve 'eique' oya chupe. ²⁹ Evocoiyase tahir omboyevi chupe aipo ehi: 'Che niha setá araviter rupi oropitvii vichico nde mboyeroyasave viña, nderemboumi eté rumo que mbahe cheu, que mbahe mimba angara viña che mboripar rese ore pieta água' ehi vu upe. ³⁰ 'Indó, cûritez oyepota ndeu nde rahir, omocañi têi vahe nde guarepochi cuña ndipihai vahe rese têi. Ahe eremboetei catú che sui; ereyuca uca rutei guaca iquira vahe chupe' ehi.

³¹ "Evocoiyase tu: 'Eyapisacaño, che rahir, nde niha nderesirii vahe che sui. Opacatu che areco vahe rumo nde mbahe ité yepi. ³² Cûritez rumo iyacatu ité yande rorivetesave yayapora pieta. Esepia, co nde rivri ocañi têi vahecuer rese yamahe iri' ehi guahir upe" ehi Jesús ava eta mbohe.

16

Mbahe yar mbahe rese ñangarecuar ndoyemboaracuai vahe resendar yembohesa

¹ Jesús aipo ehi avei güemimbohe eta upe: "Oime mbia imbahe eta vahe. Ahe vireco mbia ombahe eta rese ñangarecuar. Ahe chupe ava yugüeru mbahe moçañi têi agüer mombehu.

² Evocoiyase serecuar ñepei opitivisar omundo seca, ahe güeruse, '¿Mbahe vo aipo ereyapo eico; ayandu cûritez nde rerâcua? Emoingatupa tupri voiño nde poraviquisa resendar cheu' ehi, 'Nandehañeco iri chira cohabe mbahe rese cheu' ehi, 'Nandehañeco iri chira cohabe mbahe rese cheu' ehi chupe. ³ Evocoiyase mbahe rese ñangarecuar: '¿Mara ahera pîha co evocoiyase vichico imombopri che recose che poraviquisa sui? Ndareco iri rumo pîratasa cheyese ivi rese che poraviqui água. Achî eteanga aveira rumo mbahe rese che porandu água' ehi têi. ⁴ 'Aicua rumo cute mara ahera vichico: che poraviquisa sui opa che momboise, oimera che pisí tupri vaherá oyepiri' ehi. ⁵ Evocoiyase oñeho ñepei-peí güerecuar sui mbahe vinose têi vahe rese chupe. Yipindar vahe upe oporandu: '¿Mbovi mbahe erenose têi yande rerecuar sui?' ehi. ⁶ 'Cien tupri chereve aceite sîru tuvichagüe vahe rese' ehi. Evocoiyase, 'Eguapi ru, co oime cuachiar sesendar nde yecuachía agüer. Emondoro, eyapo iri ambuae

cincuenta rupindar año' ehi chupe. ⁷ Ichui ambuae mbahe vinose tēi vahe upe oporandu no: '¿Mbovi mbahe vo erenose tēi yande rerecuar sui?' 'Cuatro ciento quintar rupindar' ehi. Evocoiyase, 'Co oime cuachiar sesendar. Yaicuachiara rumo trescientos veinte quintar rupindar' ehi. ⁸ Evocoiyase serecuar oyanduse, 'Too, oicua ité mbahe apo' ehi ombopasa rese ombahe rese ñangarecuarer ndipihai vahe upe. Esepia, ahe oyemoingatu voi oyeupe mbahe moingatu ãgua. Supi eté ava ndoicuai vahe Tūpa oicua catu mbahe moingatu ãgua oyeupe Tūpa reroyasar sui.

⁹ "Sese che aipo ahe pēu: peiporu pe guarePOCHI pereco vahe co ivi pipe pe mboripar reime ãgua. Ichui opa tēise pe guarePOCHI, oimera pe pisí vaherā teco apirēhisave.

¹⁰ "Acoi ava mbahe tupri chīhi oyapo vahe, ahe oyapo tupri catura mbahe tuvichá vahe. Iyavei acoi ēgue ndehi vahe chīhi vahe rese, ēgue ndehi chiaveira mbahe tuvichá vahe rese. ¹¹ Evocoiyase ndapemboavíyeise co ivi pipendar pe cuaita guarePOCHI rese, ahese ndaperecoi chira ivave mbahe rese hañeco ãgua. ¹² Iyavei acoi ndapemboavíye tupriise pe cuaita ambuae ava mbahe rāro pipe, ¿ava pīha evocoiyase omondora pe mbahe ité pēu viña?

¹³ "Iyavei ndipoi chietera ñepei mbiguai imboyerovala vahe ñuvirío güerecuar. Esepia, ñepei osaísu catura imboyerovala pipe, ambuae evocoiyase ndoyambotai chira imboyerovala potaëhisa pipe. Ëgue peye avei ndapeicatui Tūpa mboyerovala guarePOCHI pota raisa pipe" ehi güemimbohe eta upe.

¹⁴ Aipo ñehesa renduse, fariseo yuvirecoi vahe oguarePOCHI raisusa pipe oviroiro yuvireco. ¹⁵ Evocoiyase aipo ehi fariseo eta upe: "Pe co ava rembiepiave pe recocuer aviye angahu pe reco viña. Tūpa rumo oicua opacatu pe pīhañemoñetas. Esepia, yepe ava rovaque ndoyavíi aviye ai vahe pe recocuer viña, Tūpa uve rumo mbahe tēi eté" ehi.

Mborocuaita iyavei Tūpa mbororecuasa rese ñehesa

¹⁶ "Yípisuve Moisés porocuaita iyavei Tūpa ñehe mombehusar porombohesa Juan recosa rupive opa. Ichuive tupri ité rumo imombehusa ñehesa aviye vahe Tūpa mbororecuasa resendar, sese ava iqueréhi catu cūritei aheve yuviroique vaherā.

¹⁷ "Yavai catura que ñepei Tūpa porocuaita mboavíyeëhi ãgua co iva, ivi opa vaherā sui" ehi.

Jesús oporombohe mendasa sui poiëhi ãgua

¹⁸ "Acoi opoi vahe güembireco sui, omendase ambuae cuña rese, ahe oyemboaguasa tēi vahe. Iyavei acoi omendase cuña

omenda vahecuer rese tēi, oyemboaguasa tēi vahe avei” ehi Jesús.

Ava mbahe yar iyavei Lázaro

¹⁹ “Iyavei oime mbia mbahe yar, ahe oyemonde turucuar aviyé vahe pipe oyemboetei eteanga, iyavei arí yacatu oyapo pieta opacatu mbahe rese oyemboetei aisa pipe. ²⁰ Oime avei mbia iparaisu ité vahe Lázaro serer vahe. Ahe mbia icaracha atí vahe imboguapisa ivive imoi mbahe yar roquendipive. ²¹ Co mbia iparaisu catu vahe aipo ehi oyeupe, ‘Tomboumi tēi que güembihu rahicuer ovíapi vahe mesa sui’ ehi mbahe yar upe viña. Aheve mbahe yar reimba cave oyemboya sese, icaracha osere yuvíreco. ²² Omanose co mbia iparaisu vahe, ahese Tüpa rembiguai eta ovíraso yuvíreco Abraham píri ivave. Mbahe yar avei omano, opa oñoti yuvíreco.

²³ “Ahese oso Tüpa ñemoirosave. Aheve oparaisuse, omahe ivate coti, osepia amombri aracahendar Abraham Lázaro reseve. ²⁴ Evocoiyase osapucai pírata: ‘¡Che ramoi Abraham, che paraisuerecomi tēi eve! Emboumi tēi Lázaro che ápecu morohisa água íve ocuā pipe. Esepia, che paraisu etepri co tata píratagüer pipe vitu’ ehi. ²⁵ Evocoiyase Abraham omnboyevi aipo ehi chupe: ‘Che rumino, ndemahenduha eipeve nde reco agüer rese nípaneise mbahe ndeu nde recove pipe. Lázaro rumo iparaísumi tēi oico’ ehi. ‘Cúritei rumo Lázaro oviharete oico coháve, nde evocoiyase nde paraisu eipeve eico. ²⁶ Iyavei oime co ivicuar ipicucu vahe rasaëhi água oreu iyavei pëu no’ ehi.

²⁷ “Ahe mbia aipo ehi: ‘Che ramoi Abraham, emondomi tēi Lázaro ²⁸ che rívrí poyandepo vahe upe, chupe iñehe água. Ahe tosecuñaro güecocuer yugüeruehi água co tecocuer mbahe tēisave’ ehi. ²⁹ Abraham rumo, ‘Vireco niha Moisés porocuaita iyavei Tüpa ñehe mombehusar rembicuachiagüer yuvíreco. ¡Ahe toviroya yuvíreco!’ ehiño chupe. ³⁰ Evocoiyase, ‘Taa, che ramoi Abraham, que omano vahecuer pähu pendar rumo yuvírasose chupe, ahe evocoiyase omoingatura güecocuer yuvíreco viña’ ehi. ³¹ Abraham rumo aipo ehi chupe: ‘Acoi ndoyapisaca potaise Moisés porocuaita rese iyavei ambuae Tüpa ñehe mombehusar remimombehu rese no, ndovíroyai chiaveira que ava omano vahecuer ocuerayevise yuvíreco’ ehi Abraham ava mbahe yar upe” ehi.

17

Iparaisu itera ava oporomboangaipa uca vahe

¹ Jesús aipo ehi güemimbohe eta upe: “Oimeño itera poroätoisa che reroyasar reiti água. ¡Ahe imboangaipa ucasar

rumo iparaisu itera! ² Iyacatu evoco nungar ava ñapichisa ita mbahe mbocuhisa iyesiho rese para guasu pipe imombo ãqua chihivahemi nungar mboangaipa uca rãguer sui. ³ ¡Sese peñearo tupri!

“Acoi nde mboetasa Tüpa reroyasar oyemboangaipase, pemboaracuara. Omboasi pare oyevise güecocuer tupri pipe, ahese peñerora chupe. ⁴ Supi eté acoi que ambuae ava pe amotarëhi vitese rumo siete yupaguer ñepei ari pipe, acoi ouse pëu siete yupaguer avei, ‘Égüe ndahe iri chira’ ehise, peñero chupe” ehi Jesús güemimbohe upe.

Yayeroyase Tüpa rese oime píratasa

⁵ Co doce tupri apóstol aipo ehi chupe:

—Emboumi oreu Tüpa rese ore yeroya catu ãqua —ehi yuvireco chupe.

⁶ Evocoiyase yande Yar omboyevi chupe:

—Supi eté, Tüpa rese pe yeroyasa, yepe ndoyavii chira mostaza rähii tahimi vahe viña, co ivira tuvicha vahe upe rumo, ‘Eyeapoho ave sui. Eso eñeñeti para guasu aviterve’ peyese Tüpa rese pe yeroyasa pipe, ahe evocoiyase pe mboyeroya itera —ehi.

Ambuae ava rese hañecosar cuaita

⁷ “Inungar que pe pâhu pendar virecora güembiguai oporaviquí vahe ivi mboyere cove, anise que guaca râro yuvi rupi viña; ichui iyevise, ¿‘Eique, eguapi terecaru’ ehira pîha serecuar chupe? ⁸ Aní eté, ahe rumo aipo ehiñora chupe: ‘Emoingatu voi mbahe che tohu, che toihurâ avei. Ipare nde erecarura, ereihura’ ehira chupe. ⁹ ‘Aviye ndeu’ ndehi chietera icuai pare chupe. ¹⁰ Égüe peye avei mbiguai nungar pe opacatu Tüpa pe cuaitarâ ombou vahe mboaviyere, ‘Yande niha mbiguai têi yaico. Esepia, yande cuaita mboavíyesar têi yaico’ peyeñora” ehi.

Jesús ombogüera diez tupri ava lepra pipe imbaheasi vahe

¹¹ Osose Jesús Jerusalén ve, oguata ivi Samaria iyavei ivi Galilea rupi. ¹² Oyepotase tecuamive oso, ahese yuvinose diez ava lepra pipe imbaheasi vahe yuvireco chupe. Amombrive rumo opitaño yuvireco ichui. ¹³ Osapucai yuvireco chupe aipo ehi:

—¡Jesús, Porombohesar, ore paraisuerecomi têi eve! —ehi.

¹⁴ Sepiase aipo ehi lepra vireco vahe upe:

—Peyevi, peso, tapeyemboyecua pahi eta yuvirecoi vahe upe —ehi.

Oyevise rumo yuviraso, opa ocuera tupri ombaherasisa sui yuvireco. ¹⁵⁻¹⁶ Evocoiyase ñepei ipâhu pendar, Samaria pendar, osepiase ocuerasa, oyevi chupe osapucai pírata Tüpa

upe imboeteisave. Oñenopīha oso sovai, oyaivi, “Aviye ndeu” ehi Jesús upe. ¹⁷ Evocoiyase ahe aipo ehi:

—¿Ndahei vo acoi diez tupri opa ocuera ombaherasisa sui yuvireco? ¿Aique que ru ambuae nueve yuvirecoi vahe? ¹⁸ ¡Co mbia ambuae ivi pendar güeraño rumo oyevi ‘aviye ndeu’ ohesave Tūpa uve! —ehi.

¹⁹ Evocoiyase aipo ehi ahe mbia upe:

—Eñarapuha, eso tupriño. Nde poreroyasa pipe niha ercuer aico —ehi Jesús chupe.

Tūpa mbororecuasa yande pāhuve secoi

²⁰ Ñepei ari pipe fariseo eta, “¿Marase vo aipo oura Tūpa mbororecuasa pipe mbahe moingatu água?” ehi Jesús upe yuvireco. Ahe omboyevi chupe:

—Tūpa mbororecuasa ndahei acoi yaselia vahe. ²¹ ‘Co secoi, aheve secoi’ ndapeyei chira chupe. Esebia, ahe oicove ité pe pāhuve —ehi fariseo eta upe.

²² Ipare aipo ehi güemimbohe eta upe:

—Oimera ari pe peipota tēira aico vaherā pe piri que ñepei ari rupi che, Ava Ríquehir, che recosa pipe; ndache repiai chira rumo peye. ²³ Iyavei ava, ‘Co secoi, aheve aipo secoi’ ehi tēira yuvireco cheu. Ndapesaquicue moñai chira rumo. ²⁴ Esebia, inungar acoi overa vahe osesape guasu ivá rese ocua yepi, égüe ahira che, Ava Ríquehir, vitu ari osupitise che yevi água curi. ²⁵ Yipindar rumo co ivi pipe che paraisu ranera ava cüriteindar mara-mara tēi che rerecose yuvireco che repia potaëhisave. ²⁶ Inungar ava Noé recose yuvirecoi aracahe, égüe ehi tupri aveira che, Ava Ríquehir, yevi água renonde. ²⁷ Esebia, ocaru, oihu, omendaño avei yuvireco. Oyepotase rumo ari ipapaprí amarusu viapi água, ahese Noé yuviroique arca pipe. Ambuae ava rumo opa ocañi tēi yuvireco. ²⁸ Égüe ehi avei aracahe Lot recose, ava ocaru tēi, oihu tēi, virocua tēi mbahe omahera yuvireco iyavei mbahe mondosar tēi, mbahe tísar tēi, oí aposar tēi avei yuvirecoi oyapisacaëhisa pipe. ²⁹ Osëse rumo Lot tecua Sodoma sui, aviyeteramo tēi ovíapi tata amar nungar ivá sui. Opa tupri oyuca ava rehii aracahe. ³⁰ Égüe ahe aveira aviyeteramo tēi che, Ava Ríquehir, ayemboye cuara curi.

³¹ “Ahe ari pipe acoi ava güëta harive secoi vahe, ahe toique iri eme güëta pipe ombahe renose. Iyavei ava que rupi tēi secoi vahe, toyevi iri eme güëtave. ³² Sese peyemomahenduha co aracahendar Lot rembireco rese. ³³ Opacatu güecocuer osaisu vahe, ahe ocañi tēira. Iyavei setecuer tēi ocañi vahe, ahe rumo oñepisirora” ehi.

³⁴ “Ahe p̄itu pipe oimera que ñuvirío ava vupave yuviroque vahe yugüeru: ñepei acoi che reroasar serasosara, ambuae rumo opitara. ³⁵ Ahese avei ñuvirío cuña ohichora yuvireco: ñepei serasosara, indugüer rumo opitara. ³⁶ Egüe ehi aveira ñuvirío ava amombri güecua sui yuvirecoi vahe: ñepei serasosara, indugüer rumo opitara” ehi.

³⁷ Aipo ñiehesa renduse, oporandu yuvireco chupe:

—Ore Yar, ¿que vo aipo egüe ehira mbahe curi? —ehi.

Ahe evocoiyase,

—Mbahe rehögüer reimesave uruvu oñemonuha atira yuvireco —ehi güemimbohe eta upe.

18

Jesús omboyoya yeruresa cuña imer mano vahecuer iyavei mborerecuar mbahe moingatusar recocuer rese

¹ Jesús omboyoya ambuae ava recocuer sui querēhisa pipe yerureño água ari yacatu rupi ² aipo ehi: “Ñepei tecuave oime mbia mborerecuar mbahe moingatusar ndasiquiyei vahe Tūpa sui, ambuae ava sui avei. ³ Ahe tecuave avei oime cuña imer mano vahecuer. Ahe oso co mborerecuar rētave, ‘Oime ava oyapo mbahe tēi eté cheu, tomboepi cheu’ ehi chupe. ⁴ Yipindar rumo noipitivii potai. Coiye catu rumo cuña ombopihavíracua tēise, ipihañemoñeta iri: ‘Yepe che ndasiquiyei vahe Tūpa sui, ava sui avei ndasiquiyei vahe ité, ⁵ amoingatuñora rumo mbahe co cuña che mañeco tēisar upe. Ayapoñora semimbotar cheu iyu p̄ihiehi água’ ehi opihañemoñetasave” ehi.

⁶ Ipare yande Yar aipo ehi: “Peyapisaca aipo mborerecuar naporai vahe ñehe rese. ⁷ Tūpa avei niha omoingatura mbahe güembiporavo oyeupe yeruresar ari, p̄itu rupindar upe yepi. Nosaro tēi chiranera opitivii água yuvireco. ⁸ Supi eté Tūpa omoingatu voira mbahe aviye vahe yande porandusa pipe yandeu. Co rumo che, Ava Riquehir, ayevise co ivi pipe vitu, oimera ava moviromi tēi oyeroya vite vahe che rese yuvireco” ehi Jesús.

Yembohesa fariseo sui iyavei guarepochi rerocuasar sui

⁹ Ichui Jesús oporombohe iri ambuae ava recocuer rese. Esepiá, oime amove ava aviye ai angahu secoi oyeupe viña, iharive rumo viroíro ambuae ava. ¹⁰ “Ñuvirío ava yuviraso tūparove oyeroqui. Ñepei ava fariseo, ambuae evocoiyase ava sui guarepochi rerocuasar. ¹¹ Evocoiyase fariseo oso tenonde ava rembiepiave oyeroqui aipo ehi: ‘Tūpa, aviye ndeu, che ndahei ambuae ava nungar che recocuer; ndachemondai vahe, ndachereco rai vahe, ndacheaguasa-guasa tēi vahe.

Iyavei ndahei eté che recocuer co mbia ava sui guarepochi rerocuasar nungar tēi aico no. ¹² Iyavei ñuvirío yupagüer ñepei semana pípe ayecuacu ité nde recocuer rese, iyavei ñepei-peí cien guarepochi che poraviquí reprí aipisi vahe sui amboyaho diez che porerecosa ndeu' ehi. ¹³ Ava sui guarepochi rerocuasar rumo opitaño amombri ichui. Aheve nomáhei iva rese oyeroqui água oangaipa mboasisa pipe. Oyepochihanupa-nupa aipo ehi: ‘¡Tūpa, che paraisuerecomi eve, che angaipa viyar aico!’ ehi oyeroqui” ehi. ¹⁴ “Sese aipo ahe pēu: co mbia ava sui guarepochi rerocuasar opa oipisi ñerosa Tūpa suindar güëtave oso. Fariseo rumo aní eté. Esepiá niha, opacatu acoi oyemboivate ai vahe, opara seco reroysa. Acoi ava seco mbegüe vahe rumo seco mboivate catusara curi” ehi.

Jesús osovasa chīhivahé eta

¹⁵ Iyavei chīhivahé güeru Jesús uve yuvireco sovasapirá. Evocoiyase semimbohe osepiase yuvireco, “¿Mahera vo perúno tēi chīhivahé?” ehi opihavíracuasa pipe serusar upe yuvireco. ¹⁶ Jesús rumo aipo ehi:

—¡Mahera ndapeipotai iyu água! Toyugüeruño chīhivahé cheu. Esepiá, co chīhivahé nungar ava yuviroiquerá che Ru Tūpa povrive. ¹⁷ Supi eté acoi ndoipisii vahe che Ru Tūpa mborerecuasa chīhivahé nungar yuvireco, ahe evocoiyase ndoyuviroiquei chietera ipipe —ehi.

Ñepei mbia mborerecuár imbahe eta vahe omoñeta Jesús

¹⁸ Ñepei mbia mborerecuár oporandu Jesús upe:

—Porombohesar aviyé vahe, ¿mbahe vo ayapora tecovesa apiréhi vahe rereco água? —ehi.

¹⁹ Jesús evocoiyase aipo ehi ahe mbia upe:

—¿Mahera vo, “Aviyé vahe” ere cheu? Oime rumo ñepei aviyé vahe ité, ahe Tūpa secoi. ²⁰ Ereicua niha co porocuaita aipo ehi vahe: ‘Nandeaguasai chira, ndereporoyucái chira, nandemondaí chira, nanderemirai chira ambuae ava rese, eremboyeroyara nde ru, nde si avei’ ehi vahe —ehi chupe.

²¹ Ahe mbia rumo,

—Che aipo nungar opacatu amboaviye ité che chīhivahemi suive —ehiño chupe

²² Aipo ihese rumo,

—Ipane vite mbahe ndeu —ehi—. Emondopa rane nde mbahe, ahe seprí evocoiyase eremondora ava iparaisu vahe upe. Ichui ererecora mbahe aviyé vahe ivave cute. Ipare ereguatara che rupi —ehi chupe.

²³ Aipo oyeupe hese rumo, ahe mbia ndoyembóvihai tēi. Esepiá niha, mbahe yar ité secoi. ²⁴ Sese omahe aipo ehi:

—¡Yavai eté rumo ava mbahe yar reique ãgua che Ru Tūpa mborerecuasave! —ehi—. ²⁵ Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

²⁶ —¿Ava angahu pīha evocoiyase oñepisirora yuvireco viña? —ehi sendusar chupe.

²⁷ Evocoiyase ahe chupe aipo ehi:

—Ava tēi upe mbahe yavai eté, Tūpa upe rumo ndayavaimi eté —ehi.

²⁸ Evocoiyase Pedro aipo ehi:

—Che Yar, ore rumo opa oroseya ore mbahe nde rupi ore guata ãgua —ehi chupe.

²⁹ Evocoiyase aipo ehi güemimbohe upe:

—Supi eté acoi oseya vahe que güëta, güembireco, viquehir, vivri, oyesupa, que guahir Tūpa mborerecuasa rese, ³⁰ ahe setá iteanga catu oipisira mbahe aviye catu vahe co ivi pipe oseya vahe sui. Ipare rumo tecua ambuaeve oipisi aveira tecovesa apirēhi vahe curi —ehi.

Jesús omombehu iri omano ãgua

³¹ Evocoiyase yande Yar opa viraso co cotimi doce güemimbohe. Aheve aipo ehi: “Cûritei yasora tecua Jerusalén ve yaico, aheve omboaviyera co Tūpa ñehe mombehusar rembicuachiagüer co che, Ava Riquehir, resendar ñehesa. ³² Che imondopri aicora ndahei vahe yande mu upe mara-mara tēi che rereco ãgua. Che reroíro-írora iyavei ondívindívira yuvireco che rese” ehi. ³³ “Iyavei che nupa-nupara. Ipare che yucara yuvireco. Imombosapisa ari pipe rumo acuerayevira omano vahe pāhu sui” ehi.

³⁴ Semimbohe rumo ndosenducuai eté iñehe yuvireco. Es-epia niha, yavai eté senducua ãgua yuvireco chupe.

Jesús ombogüera ñepei mbia ndasesapisoí vahe

³⁵ Evocoiyase Jesús ovirovise tecua Jericó oso, aheve mbia ndasesapisoí vahe oguapi oí peri popive porerecosa oyeupe mundo ãgua rese. ³⁶ Osenduse ahe ndasesapisoí vahe ava rehii piambu, ahese, “¿Mbahe vo pēu?” ehi ava upe. ³⁷ Ahe evocoiyase, “Jesús, Nazaret pendar, ocuara co rupi” ehi yuvireco chupe. ³⁸ Evocoiyase ahe güendapeve oñehe pírata:

—¡Jesús, David suindar, che paraisuerecomi tēi eve! —ehi chupe.

³⁹ Evocoiyase ava tenonde oguata vahe oyaca-yacaño, “Quiriri” ehi yuvireco chupe. Ahe rumo,

—¡David suindar, che paraisuerecomi tēi eve! —ehi pírataño ité chupe.

⁴⁰ Evocoiyase Jesús opítase aheve, oyocuai ava seru água. Ovirovise seru yuvireco, aipo ehi ndasesapisoí vahe upé:

—¿Mbahe vo ereipota ayapo vaherá ndeu? —ehi.

—Che Yar, che mbosarecomi tēira eve viña —ehi chupe.

⁴² —¡Esareco, erecuera niha! Esepiá, ereyeroya ité che rese —ehi chupe.

⁴³ Ahe ramoseve ndasesapisoí vahe, osareco tupríté; osoño ité Jesús rupi imboeteisave. Opacatu ava osepiá vahe avei omboetei Tūpa yuvireco.

19

Zaqueo osepiá pota Jesús

¹ Ichui Jesús oique tecua Jericó pipe oguata oico. ² Aheve mbia mbahe yar Zaqueo serer vahe secoi. Ahe ava sui guarepochi rerocuasar rerecuar. ³ Osepiá pota tēi Jesús ‘taicua ité’ oya viña. Ndoicatui rumo opucuēhise ava rehii pāhuve sepiá água. ⁴ Evocoiyase ahe oña tenonde oso ‘tasepiá ité’ oyapave, oyeupi ivira rese ivate oī senonera. ⁵ Evocoiyase oyepotase, omahe Zaqueo rese ivate chinise, aipo ehi chupe:

—Zaqueo, egüeyi poyava. Esepiá, asora nde rētave nde piri —ehi.

⁶ Aipo oyeupe he ramoseve, Zaqueo ogüeyi voi vorivetesá pipe oipisi. ⁷ Sepiase rumo opacatu ava, “Yangaipa guasu vahe rētave tēi oso” ehi yuvireco chupe. ⁸ Evocoiyase Zaqueo opūha aipo ehi chupe:

—Che Yar, esendu rane, amboyaho tuprira che mbahe eta ava iparaísu vahe upé; mbahe añomi vahecuer avei, ayapirasa catu-catura irungatu rupi imboyeví água —ehi chupe.

⁹ —Co pipe Tūpa oipísiro ité co mbia. Esepiá, ahe niha Abraham suindar avei secoi. ¹⁰ Esepiá, che, Ava Riquehír, ayu co ivi pipe ava ocañi tēi vahe písiro água —ehi Jesús Zaqueo upé.

Guarepochi sui yembohesa

¹¹ Aipo ñehesa rendu viteseve, Jesús oporombohe ambuae tecocuer resendar rese. Esepiá, viroví Jerusalén, “Oyepota voi etera revo Tūpa mborerecuasa” ehi ava yuvireco viña.

¹² Ahe rumo aipo ehi ava upé imbohe: “Oime mbia imboyeroyapri, ahe senoipri oso vaherá amombri oivi pendareta rerecuará oyevise. ¹³ Oso água renonde oichohopa uca diez tupri güembiguai. Ahese opa omondo ñepei-peí upé guarepochi sepirusu vahe, aipo ehi chupe: ‘Peporavíqui co guarepochi rese imboeta água che yevise nara’ ehi. Ipares oso. ¹⁴ Setá ava rumo secua pendar saquicuei tēi viroíro

yuvireco. Sese omondo moviro ava ‘tomombehu: Ore rumo ndoroipotai ore rerecuarā secoi āgua, tehi yuvireco’ oya viña.

¹⁵ “Ahe rumo mborerecuar guasu güecosa pípe oyevi ou cute. Opa uca oichoho oguarepochi písisarer ‘¿mbovi-mbovi píha oipisi oyacatu yuvireco?’ oya. ¹⁶ Evocoiyase yipindar mbia guarepochi oipisi vahe ou voi chupe, ‘Che rerecuar, nde guarepochi oyemboeta diez rupi cheu’ ehi. ¹⁷ Evocoiyase mborerecuar guasu omboyevi chupe: ‘Mbiguai avíye vahe ereico, nde cuaita co nde poravíquisa chihimi vahe eremboaviye ité. Sese ereicora diez tecua guasu pendar rese hañeco āgua’ ehi chupe. ¹⁸ Ipare voi ambuae ou chupe, ‘Che rerecuar, nde guarepochi oyemboeta cinco rupi cheu’ ehi chupe. ¹⁹ Aipo ehi tupri avei ahe chupe: ‘Nde evocoiyase ereicora cinco tecua pendar rese hañeco āgua’ ehi.

²⁰ “Ipare voi ambuae ou chupe, ‘Che rerecuar, ndo co nde guarepochi aipoqueño turucuarmi pípe sereco. ²¹ Esepiá, che asiquíye nde sui. Nderecatéhí mete ai vahe mbahe rese. Ambuae ava poravíqui sui tēi iyavei acoi ndahei vahe mbahe nde remiti, ichui tēi avei ereipisi mbahe ndeyeupe nara yepi’ ehi chupe. ²² Evocoiyase mborerecuar guasu aipo ehi chupe: ‘Nde mbiguai ndaseco pōrai vahe ereico. Nde ñehe sui aicuara nde recocuer. Ereicuase égüe che hesa viña, ²³ evocoiyase, ‘Mahera ru ndereyapocatui che guarepochi guarepochi apocatusave che yevise voi senose āgua cheu imboyevi catumi āgua viña?’ ehi. ²⁴ Evocoiyase, ‘Perocua guarepochi ichui. Pemondora acoi diez rupi guarepochi omboeta vahe upé’ ehi vupindar upé. ²⁵ Supindar rumo aipo ehi: ‘Ore rerecuar, ovireco rumo evocoí diez tupri avei iharive guarepochi’ ehi tēi yuvireco chupe. ²⁶ Evocoiyase mborerecuar, ‘Co rumo supi eté vahe: acoi ovireco vahe, imondosara setá catu chupe; acoi ndovirecoi vahe setá mbahe, ichui serocuasara’ ehi. ²⁷ ‘Acoi ava che amotaréhimbar, ndache potai vahe mborerecuarā yuvireco, ahe opara peru cohove che rovai yucapa āgua’ ehi” ehi Jesús ava eta upé.

Jesús oique Jerusalén pipe

²⁸ Jesús aipo ohe pare, oguata vite oso Jerusalén cotí.

²⁹ Evocoiyase coiye catu tecua Betfagé iyavei Betania rerovicave, ivitri Olivo ípiimi, aheve omondo ñuvirío güemimbohe ³⁰ aipo ehi chupe:

—Peso co tecuamive, yande rovaindarve. Peyepotase aheve, pesepiara guaricu ñapichimbrí imoha ava ndoyeupi vítei vahe yuvireco sese. Ahe peyorañora seru. ³¹ Acoi, ‘¿Mahera vo peyora?’ ehise que ava pēu, ‘Yar oiporu pota’ peyeñora chupe —ehi güemimbohe upé.

³² Evocoiyase semimbohe yuviraso, semimombehu rupi tupri ité osepia mbahe yuvireco. ³³ Evocoiyase oyorase guaricu,

—¿Mahera vo peyora ore reimba? —ehi iyar yuvireco.

³⁴ —Yar oiporu pota —ehiño yuvireco chupe.

³⁵ Ipare viraso Jesús upe yuvireco, oicupeao oyeaosa pipe guaricu yuvireco chupe. Ipare omboyeupi sese oso água.

³⁶ Oyeupise oso guaricu harive, oipipira ava oturucuar peri rupi senonera imboetei guasusave yuvireco. ³⁷ Ovirovise ivitri Olivo sui ogüeyi água oso, opacatu ava seroyasar supi oguata vahe omboipi osapucai yuvireco vorivetesave mbahe poromondiisa sembiapoguer rese Tūpa upe ³⁸ aipo ehi yuvireco:

—¡Sovasapri secoi mborerecuar guasu ou vahe yande Yar rer pipe! ¡Mbahe tupri toime ivave iyavei imboeteipri Tūpa tasecoi! —ehi.

³⁹ Evocoiyase amove fariseo yuvirecoi vahe supi aipo ehi chupe:

—Porombohesar, eñehe nde rupi oguata vahe upe imonguiriri água —ehi tēi yuvireco.

⁴⁰ Evocoiyase aipo ehi:

—Supi eté amombehu pēu: co ava iquiririse yuvireco, ita rumo evocoiyase osapucai pīratara che mboeteisave —ehi.

⁴¹ Oyepota senimise tecua Jerusalén ve, ahe tecua repiase, oyaseho sese ⁴² aipo ehi: “¡Pesenducuara tarahu co co ari pipe teco tuprisa amondo pota vahe pēu viña, cūritei rumo ocañi tupriño pe sui, ndapeicatui eté sepia!” ehi oyaseho.

⁴³ “Oimera rumo ari imombehupri naporai vahe pēu curi. Pe amotarēhimbar oñachi irira pe recua. Ipare oyere tuprira yuvireco pe rese pēu ovava água. ⁴⁴ Iyavei yuviroiquerá pe recua pipe, opara pe rēta omonduru yuvireco, pe yuca aveira yuvireco. Ndipoi chietera ita que ñepei oya vahe ambuae rese. Esepio, ndapeicuau eté Tūpa ouse pēu pe pīsiro água” ehi Jerusalén pendar rese oyaseho.

Jesús omombopa ava mbahe rerecosar tūparo pipe sui

⁴⁵ Ichui Jesús oique judío tūparo guasu pipe. Aheve omboipi ava mbahe mondoso mombopa tupri ocarve oico ⁴⁶ aipo ehi:

—Icuachiapri aracahendar pipe aipo ehi: ‘Che rēta yeruresa rētarā’ ehi. Pe rumo, imonda rai vahe rēta nungar tēi pereco —ehi.

⁴⁷ Ichui ahe tūparo guasu pipe ari yacatu oporombohe oico. Aheve avei rumo pahi eta rerecuar yuvirecoi vahe, Moisés porocuaita rese oporombohe vahe iyavei tecua rerecuar guasu yuvirecoi vahe, ‘¿Mara yahera pīha yuca uca água viña?’

ehi yuvireco chupe. ⁴⁸ Ndoicatui rumo yuvireco. Esepiá, ava rehii oyapisaca iporombohesa rese yuvireco.

20

Jesús mborerecuasa

¹ Ñepei ari Jesús judío tūparo guasu pipe güecose, ombohe ava eta, omombehu ñehesa písirosa resendar oico. Ahese yugüeru pahi eta rerecuar guasu yuvireco iyavei Moisés porocuaita rese oporombohe vahe, ava rerecuar guasu yuvirecoi vahe avei ² aipo ehi:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarā? —ehi ahe ava yuvireco chupe.

³ Ahe omboyevi chupe:

—Che avei aporandura mbahe rese pēu. Pemboyevira cheu —ehi—. ⁴ ¿Ava vo Juan ombou ava ãpiramo ãgua: Tūpa pīha, ava tēi tie? —ehi ahe ava yuvirecoi vahe upe.

⁵ Ahese, “¿Mara yahera pīha?” ehi-ehi tēi oyeupe yuvireco. “Tūpa’ yahese chupe, ‘¿Mahera ru ndaperoyai?’ ehira yandeu.

⁶ Anise, ‘Ava tēi remimbou’ yahese chupe, opacatu seroyasar evocoiyase yande api-apira ita pipe yuvireco. Esepiá, ava, ‘Juan omombehu vahe ñehesa Tūpa suindar’ ehi eté yuvireco chupe” ehi tēi oyeupe yuvireco. ⁷ Evocoiyase ahe ava, “Ndoroicuai rumo Juan mbousar, que sui oporoãpiramo oico” ehiño yuvireco chupe. ⁸ Sese aipo ehi ahe ava upe:

—Sese che avei, ‘Ahe iporocuaita pipe co mbahe ayapo’ ndahei chietera pēu —ehi mborerecuar guasu upe.

Ava mbahe tēi oporavíqui vahe recocuer sui yembohesa

⁹ Ipare Jesús oñeha ava eta upe ambuae ava recocuer rese aipo ehi: “Oime mbia oñoti vahe uva oívi pipe. Ipare oseya oívi ava oporavíqui vahe upe iporu ãgua. Ichui oso pucu que amombri vahesa rupi. ¹⁰ Evocoiyase oyepotase ari uva pohosa, ahese omondo ñepei güembiguai oporavíqui vahe upe imboporandu ‘tomboumi uva pohoprí cheundar cheu cute’ oyapave viña. Ahe rumo oinupa-nupaño imboyevi tupri tēi yuvireco serecuar upe. ¹¹ Ipare ambuae güembiguai omondo iri no. Ahe oinupa-nupaño, iñehe mara-mara tēi avei ipogüer tēi imboyevi imondo yuvireco. ¹² Ichui omondo iri tēi imombosapisa rese ambuae güembiguai no. Ahe oyapicha-pichaño imosē imondo yuvireco.

¹³ “Coiye miti yar aipo ehi: ‘¿Mara ahera pīha? Amondora revo che rahir, che rembiaisu. Ahe tie revo, osepiase, omboyeroyara yuvireco’ ehi. ¹⁴ Evocoiyase ahe ava tahir repiase, ‘Co aipo oipisira vu mbahe. Yayucaño. Yandeu nara pāve

topita co ivi' ehi oyeupe yuvireco. ¹⁵ Evocoiyase ovinose miti pāhu sui, oyuca ité yuvireco.

"¿Mbahe vo evocoiyase oyapora ivi yar ahe ava naporai vahe upe? ¹⁶ Oura evocoiyase ahe ava mochañipa ãgua, omondora ambuae ava upe oivi rese oporavíqui vaherá" ehi.

Aipo renduse,

—¡Egüe tehi eme! —ehi ava yuvireco chupe.

¹⁷ Omahese rumo ahe ava rese aipo ehi:

—¿Mara oya vo co aipo ehi icuachiapri aracahendar pipe?: 'Co ita oí aposar opaño omombo yuvireco, ahe ita rumo aviye catu vahe oí moviracua tupri ãgua' ehi.

¹⁸ Acoi que oviapi vahe evocoit harive, opa tēira ahe ae oyemomara. Iyavei oviapise que ava harive, opa tupri aveira omocañi —ehi Jesús judío rerecuareta upe.

¹⁹ Pahi eta rerecuar guasu iyavei oporombohe vahe Moisés porocuaita rese, iñehe viteseve, oipisi pota tēi Jesús yuvireco. Esepia, osenducua ité oyesendar iporombohesa yuvireco. Osiquiyeño rumo ava rehii sui yuvireco.

Judío rerecuar osecoña iri tēi Jesús guarePOCHI rese yuvireco

²⁰ Ahe judío rerecuar evocoiyase omondo ava ndaseco assimi angahu vahe iviro, chupe iñehe ãgua 'toyavi angahu oñehe' oya viraso vaherá mborerecuar Pilato rovai. ²¹ Ahe evocoiyase,

—Porombohesar, ore oroicua nde ñehe iyavei nde porombohesa supi eté vahe. Iyavei nderemboyoaviratii vahe nde ñehe yepi. Nde rumo ereporombohe mbahe supi tupri vahe Tūpa recocuer rese. ²² ¿Aviyera pīha yamondo guarePOCHI Roma pendar mborerecuar ivate catu vahe upe viña? ¿Aní tie? —ehi yuvireco chupe.

²³ Opa rumo oicua iñehe porombopasa tēi. Sese,

²⁴ —Pemboyecua ru ñepei guarePOCHI cheu. ¿Ava rahanga vo vireco; ava rer icuachiapri vo co sese? —ehi ahe ava upe.

—Roma pendar mborerecuar guasu —ehiño yuvireco chupe.

²⁵ —Taa, pemondo ru mborerecuar uve chupendar, iyavei Tūpa upendar pemondoño ité Tūpa upe —ehi ahe ava upe.

²⁶ Ndoyavi uca catui eté iñehe ava rovaque ipisi ãgua yuvireco. Ahe rumo oyeupe imboyevise, iquiriripa tupriño oyepihamondiisa pipe yuvireco.

Porandusa cuerayevisa rese

²⁷ Ipare saduceo, ahe "ndipoi eté cuerayevisa" ehi vahe, yugüeru Jesús upe. Oporandu tēi angahu yuvireco chupe:

²⁸ —Porombohesar, Moisés niha oseyá güembicuachiagüer yandeu aipo ehi: 'Que cuimbahe omenda vahe omanose

guahiēhiseve, tivrī evocoiyase omendara sembirecocuer rese. Ahe viquehir omano vahecuer upe nara tahira oico' ehi. ²⁹ Evocoiyase oime siete tuprī oyesuindar pāve yuvirecoi vahe. Yipindar vahe omenda. Ipare omanoño guahiēhiseve. ³⁰ Ichui tivrī omenda sese. Ahe omanoño avei guahiēhiseve. ³¹ Ipare imombosapisa tivrī omenda iri tēi sese. Ëgüe ehi tupriño avei chupe. Ambuae ichuindar ëgüe ehi tuprī avei omanopa yuvireco guahiēhiseve. ³² Coye cuña avei omano cute. ³³ Evocoiyase opase ocuerayevi yuvireco, ¿uma rembireco itera pīha omendase opacatu siete yuvirecoi vahe rese? –ehi saduceo yuvireco chupe.

³⁴ Ahe rumo omboyevi chupe:

—Co ivi pīpe cuimbahe iyavei cuña omenda vahe yuvireco yepi. ³⁵ Ocuerayevi pare oicatu vahe ivave yuviroique vaherā, chupe ndipo iri chira mendasa. ³⁶ Iyavei nomanoi chietera aheve. Esepia, yuvirecoira Tūpa rahir, Tūpa rembiguai eta iva pendar nungar yuvireco. ³⁷ Moisés rembicuachía agüer pīpe niha caha pāhu sendi vahe resendar oicua uca cuerayevisa yandeu. Aheve aipo ehi: “Ahe niha yande ramoi aracahendar Abraham, Isaac, Jacob Tūpa” ehi. ³⁸; Tūpa ndahei omano vahe Tūpa! ¡Ahe rumo oicove vahe ité Tūpa secoi! Esepia, chupe opacatu yuvirecove vahe –ehi saduceo upe.

³⁹ Evocoiyase moviro Moisés porocuaita rese oporombohe vahe aipo ehi:

—Supi eté aipo ere, Porombohesar –ehi yuvireco chupe.

⁴⁰ Sese niquerēhi iri eté mbahe rese oporandu água yuvireco chupe.

¿Ava suindar pīha Poropisirosar?

⁴¹ Evocoiyase Jesús aipo ehi ahe ava upe:

—¿Mahera ru, “Poropisirosar David suindar ité” ehi yuvireco? ⁴² David teieté niha aipo ehi güembicuachía pīpe: ‘Yar aipo ehi che Yar upe:

Eguapi che acato coti ⁴³ acoi che amondose voi eté nde amotarēhimbar ñenopiha água nde povrīve yuvireco’ ehi David aracahe.

⁴⁴ ¿Mahera ru, “Poropisirosar David suindar secoira” peye? David teieté, “Che Yar” ehise chupe –ehi Jesús ahe ava upe.

Jesús oicua uca Moisés porocuaita rese oporombohe vahe recocuerai

⁴⁵ Opacatu ava oñehe rendu viteseve, Jesús aipo ehi güemimbohe upe: ⁴⁶ “Peicua catu co Moisés porocuaita rese oporombohe vahe sui. Esepia, ahe oturucuar ipucu vahe rese oguata pota rai yuvireco yepi, iyavei oipota oyeupe ‘avirave’ apo água ocar rupi omboeteisa pīpe yuvireco. Oseca avei

tenda porañete catu vahe güenara otūparo pipe, carusave avei oseca tenda aviyé catu vahe yuvireco.⁴⁷ Iyavei virocuarocuaño tēi cuña imer mano vahecuer rēta ichui. Oarondaguā tēi avei oyeroqui pucu-pucu yuvireco. Ahe rumo oipisira Tūpa ñemoirosa ipírata catu vahe yuvireco curi” ehi güemimbohe eta upe.

21

Cuña imer mano vahecuer iparaisu vahe porerecosa

¹ Ipare Jesús osepia ava imbahe eta vahe omondose oporerecosa guarepochi ríru pipe yuvireco. ² Aheve avei cuña imer mano vahecuer iparaisu vahe, omondo ñuviriomi guarepochi oporerecosa. ³ Evocoiyase Jesús aipo ehi:

—Supi eté co cuña iparaisu vahe omondo catu oporerecosa opacatu mbahe yar sui. ⁴ Esepia, ava imbahe eta vahe, oguarepochi rumbirer tēi omondo oporerecosa Tūpa upe yuvireco. Co cuña rumo oparaísusa pipe virecomi vahe guarepochi oyeupe, opacatu ité omondo oporereco água Tūpa upe —ehi.

Jesús omombehu tūparo guasu monduru água

⁵ Evocoiyase amove semimbohe oñeho yuvireco tūparo guasu recocuer rese: “Co tūparo niha icatupri vahe, ita mopuhapri, porerecosa sui opacatu mbahe icatupri ipipe” ehi yuvireco. Jesús rumo aipo ehi:

⁶ —Oimera ari opacatu co mbahe cüritei pesepia vahe pipe ndipoi chietera que ñepei ita oyeha vite vahe; opacatu ité imondurusara curi —ehi güemimbohe eta upe.

Cañi renonde sepiasara setá mbahe poromondiisa iva rese

⁷ Evocoiyase semimbohe eta oporandu yuvireco chupe:

—Ore mbohesar, ¿mbahese vo aipo mbahe yaviyera? ¿Mbahe poromondiisa rese rane vo icuasara curi? —ehi yuvireco.

⁸ Evocoiyase aipo ehi güemimbohe eta upe: “Peicua catu, peyembopa ucai rene catu. Esepia, setá ava yugüerura, ‘Che niha Poropisirosar aico, cüritei osupiti ari imombehupri yande’ ehi tēira yuvireco. Ndaperoyai chira rumo ava aipo ehi vahe. ⁹ Acoi peyanduse vavasa iyavei tecua pipendar oyeupe vavase, ndapeyembosiquiyei chira rumo serācua anduse ichui. Evoco nungar rane ité niha oimera. Ndehi vitei chira rumo ari cañi” ehi.

¹⁰ “Ñepei ivi pipendar ovavara ambuae ivi pipendar rese oyeupe yuvireco. ¹¹ Ahese avei oimera ivi rírii tuvichá vahe, tiavor, mbaherasisa opacatu-catu tēi tecua rupi. Iyavei pesepiara iva rese mbahe pe mbosiquiye vahe, poromondiisa tuvichá vahe avei curi.

12 "Co mbahe-mbahe tēi reime renondeve rumo pe pisira yuvireco che recocuer sui mara-mara tēi pe rereco āgua. Pe reraso aveira pēu porandu āgua tūparove, pe roquenda aveira, iyavei pe rerasora mborerecuar rovai, mborerecuar ivate catu vahe rovai avei yuvireco che recocuer sui tēi. 13 Ipīpe pemombehura che recocuer chupe yuvireco. 14 'Aipo ahera añehe' ndapeyei chira pepihañemoñeta rereco pe yeipi āgua. 15 Esepio, che amondora che mbahecuasa pe ñehe āgua. Ndoicatui chietera evocoiyase pe amotarēhimbar imboyevi yuvireco pēu. 16 Pe amotarēhira rumo pe yesupa, pe mu, pe rivri, pe riquehir, pe mboripar avei. Iyavei oyucara amove pe pāhu pendar yuvireco. 17 Opacatu ava ndape ambotai chira che recocuer sui tēi yuvireco. 18 Nocañii chietera rumo que ñepei pe ha pe ãca sui. 19 ¡Peyemoviracua evoco nungar mbahe upe pe ñepisiro āgua!

20 "Iyavei pesepiase ava Jerusalén rese sundao oyere tuprise, peicuara evocoiyase mbahe-mbahe tēi reime āgua yuvireco chupe. 21 Evocoiyase Judea ve yuvirecoi vahe toñemipa poyava voi ivitri rese yuvireco ichui; tecua Jerusalén pīpe yuvirecoi vahe, ahe toyuvinose poyava avei ichui. Iyavei acoi que rupi yuvirecoi vahe, ahe toyevi iri eme yuvireco. 22 Esepio, ahe ari oimera Tūpa ñemoirosa. Ahe omboaviyera icuachiapri aracahendar pīpe imombehupri. 23 ¡Iparaisu itera ahe ari pīpe cuña ipuruha vahe, imembí pītani vahe avei! Esepio, oimera tecosasisa co ivi pipendar upe, ñemoirosa tuvichá vahe ahe ava recocuer rese. 24 Iyavei quise pucu pīpe setá ava omanora yuvireco iyavei ambuae setá ava ipisipri serasosara ambuae ivi rese amombrisave. Iyavei ambuae ivi pipendar ava ndahei vahe judío yuvirecoi vahe oiporu itera tecua Jerusalén acoi osupitise voi eté ari imombehupri yuvireco chupe" ehi.

Ava Riquehir yevisa

25 "Iva rese iporēhira poromondiisa, ari rese, yasi rese, yasitata rese; iyavei ivi pīpe, opacatu tecua rupi ava ndayaracua iri chira yuvireco. Oyembosiñiye guasu-guasu tēi aveira yuvireco para guasu riapugüer renduse. 26 Ahese ava setá yaracua cañi tēira osiquiyepave yuvireco opihañemoñeta guasu aise co ivi pīpe mbahe oime vaherā sui. Ahese avei iwa resendar opacatu mbahe oririira. 27 Ahese ramo opacatu ava che, Ava Riquehir, che repiara yuvireco, agüeyise iwa quiha rese che pīratasa rendigüer porañetesa pīpe. 28 Omboipise evo-coi nungar mbahe, peyemonguerēhi catura, peyemopoase pe querēhisa pīpe. Esepio, pe renosesa pihaivira mbahe tēi sui" ehi.

²⁹ Iyavei oporombohe ambuae mbahe rese: “Peicua tupri higuera ivira recocuer, anise que ambuae ivira avei. ³⁰ Co ivira soqui ramos, yaicua cōimi ari sacu vahe yepota āgua yandeu yepi. ³¹ Na ehi aveira pēu che ūnehe rupi tupri mbahe pesepiase. Sese peicuara Tūpa mbororecuasa cōimi eté secōise.

³² “Supi eté yuvirecove vitera ava osepia vahe co mbahe opase yaviye. ³³ Iva, ivi opara ocañi, che ūnehengagüer rumo imboaviyesa rane itera” ehi güemimbohe upe.

³⁴ “Peicua catu, aní pemboavai etepri pe mbahe reroya āgua mbahe tēi aposa pipe, pe caguar tēisa pipe, co ivi pipendar tecocuer rese pe pihañemoñeta tēisa pipe avei. Evocoiyase topoesapiha eme ³⁵ inungar ivonde oviapi vahe ahe ari pipe. Esepia, opacatu ava eta upe oimera evocoii nungar mbahe. ³⁶ Sese peyemoingatu, peyeroqui ari rupi co mbahe tēi sui pe yepepi āgua, pe yemboyecua tupri āgua che, Ava Riquehir, rovai” ehi güemimbohe eta upe.

³⁷ Êgue ehi Jesús oporombohe ari rupi tūparo guasu pipe. Pitu pipe evocoiyase opita ivitri Olivo rese. ³⁸ Iyavei opacatu ava yuviraso añihiveive tūparo guasu pipe iñehe rendu āgua yepi.

22

Yemomborandusa Jesús yuca āgua

¹ Ovírovise Pascua pieta pan ndayapepoi vahe hu āgua, ² ahese pahi rerecuareta, Moisés porocuaita rese oporombohe vahe avei ava sui osiquiyepave, oseca-seca tēi Jesús yuca āgua yuvireco.

³ Evocoiyase Caruguar oique Judas piha pipe, ahe acoi doce tupri semimbohe pāhu pendar Iscariote serer vahe. ⁴ Ahe oso pahi eta rerecuar yuvirecoi vahe upe, tūparo rārosar yuvirecoi vahe upe avei imoñeta āgua, “Tamondo Jesús pe povrīve” ehi. ⁵ Ahe evocoiyase oyembovharete yuvireco. “Yamondo guarepochi chupe” ehi voi eté yuvireco. ⁶ Judas evocoiyase, “Aviye” ehi. Oseca voi ava porēhiseve Jesús mundo āgua yamotarēhimbar upe.

Yande Yar caru agüer ipa vahe

⁷ Oyepota ari yipindar vahe pan ndayapepoi vahe hu āgua. Ahe pipeve avei ovesa Pascua pieta resendar yucapri seropovēhesa yepi. ⁸ Evocoiyase Jesús omundo güemimbohe Pedro, Juan reseve aipo ehi:

—Peso, tapemoingatu yande caru āgua Pascua pieta resendar —ehi.

⁹ Semimbohe rumo,

—¿Que vo ereipota oromoingatura? —ehi yuvireco chupe.

10 Evocoiyase aipo ehi:

—Peyepotase tecua pípe, aheve pesepiara mbia vireco vahe cambuchi pípe i. Pesora sétave supi. **11** Aipo peyera peñehe oi yar upe: “Ore mbohesar oporandu: ‘¿Uma oi pípe vo Pascua pieta resendar orohura che remimbohe rese?’ ehi” peyera. **12** Evocoiyase ahe omboyecuara oi guasu, ivatendar pěu. Aheve pemoingatura yande caru água —ehi güemimbohe upe.

13 Ipare ahe yuviraso, semimombehu rupi tupri ité osepia mbahe. Aheve omoingatu carusa Pascua pieta resendar yuvireco.

14 Osupitise icaru água apóstol reseve yuviroguapi mesave.

15 Evocoiyase aipo ehi:

—¡Cueseve tēi eté niha aipota acaru vaherā pe píri Pascua pieta resendar rese che mano água renonde! **16** Esepiá niha, ndayapo iri chira pieta Pascua resendar acoi yaviyese voi eté Tūpa mborerecuasa pípe —ehi.

17 Evocoiyase oipisi ígua ríru, “Aviye ndeu” ehi Vu upe, iyavei aipo ehi:

—Co amondora pěu, perova-rova peyacatu. **18** Esepiá, co pípe suive ndaihu iri chira uva ricuer acoi ouse voi Tūpa mborerecuasa —ehi.

19 Ipare oipisi pan, “Aviye ndeu” ehi Vu upe. Aipo ohe pare ombohi-mbohi imondo güemimbohe upe.

—Co che rete, omboyecua imondopirā pe recocuer rese. Na peyera pe mahenduhasa pípe che rese yepi —ehi.

20 Êgue ehi avei carusa pare yapo ígua ríru rese aipo ehi:

—Co ígua ríru pipendar omboyecua che Ru remimbotar ipiasu vahe pěu nara, ahe che ruví ipiyerepírā pe recocuer rese nara. **21** Cüritei rumo oime mbia mesave yande píri che mundo vaherā che amotaréhimbar upe. **22** Supi eté imboaviyesa itera che, Ava Riquehir, rese ñehesa yípive imombe-hupri. ¡Iparaisu catura rumo acoi mbia che mondosal! —ehi.

23 Evocoiyase aipo ehise, semimbohe oporandu-randu tēi oyewe: “¿Ava píha ëgue ehi?” ehi tēi yuvireco.

¿Ava vo ivate catu vahe?

24 Ipare voi semimbohe oñemoñeta guasu yuvireco oyese, ipihañemoñeta ‘aviyeteramo che imboeteipri catu vahe aicora oporocuaise Jesús’ ohesave yuvireco. **25** Evocoiyase Jesús aipo ehi: “Ava mborerecuár co ívi pipendar oyocuai pírata ava yuvireco yepi. Ahe chupe rumo, ‘Mbahe tupri aposar’ ehi yuvireco. **26** Pe rumo ëgue ndapeyei chira. Acoi oyemboívate pota vahe, toyemochihivahéño güeco mbegüesa pípe. Acoi ava cuaisar, tihañeco catu ambuae ava rese. **27** ¿Uma píha ivate catu vahe: co mesave oguapi vahe ocaru yuvireco? ¿Sese

ihañeco vahe tie? Acoi mesave oguapi vahe niha. Che rumo co aico pe pāhuve inungar pe rese ihañeco vahe.

²⁸ “Pe rumo peico vahe che rupi yepi opacatú che recoāhasa pipe. ²⁹ Sese che amondo pēu pe mborerecuasa inungar che Ru ombou cheu che mborerecua ãgua. ³⁰ Esepi, pecarura iyavei peihura che mborerecuasave che piri. Iyavei peguapira opacatu judío recocuer rese porandu ãgua” ehi güemimbohe upe.

Jesús, “‘Ndaicuai vahe evocoī mbia’ erera cheu” ehi Pedro upe

³¹ Aipo ehi avei yande Yar:

—Simón, Simón, esendu: Caruguar oporandu pe recoāha ãgua rese. ³² Che rumo ayeroqui nde rese nde yeroysa paneēhi ãgua. Ereyevise cheu, emonguerēhi catu ambuae nde rivireta imovíracua uca ãgua yuvíreco oyese —ehi Pedro upe.

³³ —Che Yar, che rumo ayemoingatu voi eté nde rupi che so ãgua nde roquendasave iyavei che mano ãgua nde rupi —ehi Pedro chupe.

³⁴ —Pedro, supi eté amombehu ndeu: co pipe, tacura ñehe renondeve, nde, “Ndaicuai eté evocoī mbia” erera mbosapi oyupagüer rupi cheu —ehi.

Virovi ité Jesús recoāha ãgua

³⁵ Evocoiyase Jesús oporandu güemimbohe eta upe:

—Opomondose acoi mbahe ríru porēhi, guarepochi ríru porēhi, ambuae pe pitaqui ndugüer rerasoēhise, ¿ipane vo acoi mbahe ahese pēu? —ehi.

—Aní eté —ehi yuvíreco chupe.

³⁶ Evocoiyase,

—Cûritei, acoi mbahe ríru vireco vahe, tovirecoveño, guarepochi ríru vireco vahe, tovirecoveño avei; acoi ndovirecoi vahe quise pucu, tomondo oyeosa quise repirã. ³⁷ Supi eté amombehu pēu: iyacatu ité imboavíye tupri ãgua co che rese ñehesa imombehupri aipo ehi vahe: ‘Ava vireco ndaseco pôrai vahe nungar yuvíreco’ ehi vahe. Supi eté yaviyera co icuachiapirer che resendar —ehi.

³⁸ Evocoiyase semimbohe aipo ehi yuvíreco:

—Ore Yar, cohabe oime ñuvirío quise pucu —ehi.

—Ahe güeraño ité aviye —ehi güemimbohe eta upe.

Jesús oyeroqui Getsemaní ve

³⁹ Ipare Jesús osẽ oso ivitri Olivo ve. Ahe ivitrive oso yepi, aheve semimbohe yuvíraso yuvíreco supi. ⁴⁰ Oyepotase aheve yuvíreco, Jesús aipo ehi güemimbohe upe:

—Peyeroqui angaipa pe yapoēhi ãgua —ehi.

⁴¹ Ipare oyepepi güemimbohe sui, inungar ita imombosa vahe amombrimi, aheve oñenopiha, oyeroqui ⁴² aipo ehi: "Che Ru, ereipotase, che renose eve co mbahe tēi sui; tayapo eme che remimbotar tēi, nde remimbotar rupira rumo" ehi.

⁴³ Evocoiyase oyemboyecua Tūpa rembiguai chupe, seco momirata ãgua. ⁴⁴ Mbahe-mbahe tēi porarasa pipe oyeroqui catu. Ahese sacuvor inungar tuví osé ichui otiqui ivive.

⁴⁵ Oñarapuhase oyeroquisa sui, oyeví oso güemimbohe uve. Ahe rumo opaño yuviroque yuvirocua oviharéhisa pipe. ⁴⁶ Evocoiyase,

—¡Mahera opaño peque! Peñarapuha, peyeroqui catu pe viapiëhi ãgua mbahe tēi pipe —ehi güemimbohe upe.

Jesús oipisi yuvireco

⁴⁷ Jesúś ñehe viteseve, oyepota atí ava yuvireco chupe. Judas doce semimbohe pâhu pendar tenonde secoi. Ahe oyemboa oso sese sovaupite ãgua. ⁴⁸ Evocoiyase aipo ehi Judas upe:

—Judas, ¿mahera vo che, Ava Riquehir, rovaupitesa pipe che mondo eve che amotaréhimbar upe? —ehi.

⁴⁹ Semimbohe eta rumo, mbahe-mbahe tēi repiase, operandu yuvireco:

—Ore Yar, ¿yavavara yande quise pucu pipe? —ehi yuvireco chupe.

⁵⁰ Ñepei rumo supindar, pahi rerecuar ivate catu vahe rembiguai nambi yasu cotindar oyasia. ⁵¹ Ahe rumo,

—Teheni, evocoi rupive —ehi güemimbohe eta upe.

Ipare opoco inambi rese ombogüera voi. ⁵² Ichui aipo ehi güecasar opacatu pahi eta rerecuar upe, tūparo rārosar upe, tecua pipendar rerecuar upe avei:

—¿Quise pucu, ivira reseve-seve rutei co peyu che ropeña, imonda rai vahe nungar che rereco peye? ⁵³ Aicose tūparo pipe pe pâhuve ari yacatu rupi, na ndapeyapoi eté co nungar cheu. Aviyeño rumo, oyepota ité niha pêu imombehupri Caruguar píratasa pipe mbahe-mbahe tēi apo ãgua —ehi.

Pedro, "Ndaicuai vahe evocoi mbia" ehi Jesúś upe

⁵⁴ Evocoiyase Jesúś oipisi yuvireco, oviraso pahi eta rerecuar ivate catu vahe rētave yuvireco. Pedro rumo amombri rupive tēi osaquicue moñaño oso. ⁵⁵ Aheve ñachimbrí pipe oyatapi yuvireco, oyere tupri tata rese oyepehe yuvinoi. Aheve avei Pedro ipâhuve chini. ⁵⁶ Evocoiyase cuña mbiguai, osepiase Pedro, omahe tupri iri sese aipo ehi:

—Co ava avei niha acoi Jesúś rupindar —ehi.

⁵⁷ Ahe rumo aipo ehiño:

—Cuña, ndaicuai vahe ité ahe mbia —ehi.

⁵⁸ Iparemi tēi ambuae osepiase aipo ehi chupe no:

—Nde ité niha acoi supindar ereico —ehi.

—Aní mbia, aipo ere tēi, ndahei eté rumo che supindar aico —ehi.

⁵⁹ Ñepei hora paremi tēi, ambuae aipo ehi chupe:

—Supi eté rumo co ité supi secoi vahe. Esepio, Galilea iquier ité niha —ehi.

⁶⁰ Sese aipo ehi:

—¿Mbahe vo catu aipo nde ñehesa? Ndasenducuai eté —ehi.

Aipo ihe viteseve, oñehe tacura. ⁶¹ Evocoiyase yande Yar oyemboyere sese. Ahe ramoseve oyemomahenduha: “Co piye tacura ñehe renondeve, ‘Ndaicuai vahe’ erera mbosapi oyupagüer rupi cheu” ihe agüer rese. ⁶² Ahese osē, oyasehó iteanga oso.

Sārosar mara-mara tēi Jesús vireco yuvireco

⁶³ Evocoiyase ava Jesús rārosar iguayi tēi yuvirocua-rocu yuvireco sese. ⁶⁴ Osesacua yuvireco. Ipare oporandu yuvireco chupe:

—¡Eicua ité ru, ava evocoi ocua nde rese! —ehi yuvireco chupe.

⁶⁵ Iyavei setá mbahe rese oñehe-ñehe tēi yuvireco chupe.

Jesús serasosa ava ñemonuhasa ivate catu vahesave

⁶⁶ Ahe ari piye, cōhese, oñemonuha ava judío rerecuar, pahi eta rerecuar iyavei opacatu Moisés porocuaita rese oporombohe vahe yuvireco Jesús reraso uca água ava ñemonuhasa ivate catu vahesave, oporandu mbahe rese yuvireco chupe:

⁶⁷ —¿Supi eté vo nde Poropísiosar ereico? Emombehu ru oreu —ehi yuvireco chupe.

—Amombehuse rumo pēu, ndache reroyai chietera peye —ehi judío rerecuar upé—. ⁶⁸ Inungar che aporanduse mbahe rese pēu, pe avei ndapembuyevi chietera cheu viña no. ⁶⁹ Co piye suive rumo che, Ava Riquehir, aguapira Tūpa mbahe mboavaisaréhi acato coti —ehi.

⁷⁰ Ichui opacatu ava oporandu yuvireco chupe:

—Evocoiyase, ¿nde ité ereico Tūpa Rahir? —ehi.

—Supi eté niha aipo aipo peye cheu —ehi mborerecuareta upé.

⁷¹ Evocoiyase ahe aipo ehi yuvireco:

—¡Indó! ¿Ava iri vo evocoiyase mbahe omombehura yandeu? Yasendu niha iñehe ité cute —ehi mborerecuar oyeupe yuvireco.

23

Jesús serasosa mborerecuar Pilato rovai

¹ Evocoiyase opacatu ava opūha yuvireco Jesús reraso ãgua mborerecuar Pilato rovai. ² Aheve oiñehengapo aipo ehi yuvireco:

—Orosepia co mbia oipihāñemoñeta rerova ati uca ava yande recua rupindar aipo ehi: “Pemondoi rene Roma pendar mborerecuar ivate catu vahe upe guarepochi” ehi. Iyavei, “Che Poropísiosar mborerecuar ivate catu vahe aico” ehi oico —ehi yuvireco Pilato upe.

³ Evocoiyase Pilato oporandu chupe:

—¿Nde ité vo judío rerecuar ivate catu vahe? —ehi.

—Nde niha aipo, “Ahe ereico” ere cheu —ehi imboyevi Pilato upe.

⁴ Evocoiyase Pilato aipo ehi pahi eta rerecuar upe opacatu ava upe avei:

—Che rumo namohai eté co mbia que mbahe oyapo vaherā —ehi

⁵ Ahe ava eta rumo,

—Supi eté opacatu ava oipihāñemoñeta mboyeaviratí uca opacatu tecua rupindar. Yipindar omboípi Galilea rupi oico. Cüritei co Judea ve ñgue ehiño ité —ehi ava eta Pilato upe yuvireco.

Jesús imondosa mborerecuar Herodes rovai

⁶ Pilato osenduse aipo ñhesa oporandu, “¿Supi eté pīha co mbia Galilea iguar?” ehi. ⁷ “Ahe pendar ité” ehise yuvireco chupe, ahese omundo Herodes upe, ahe acoi mborerecuar Galilea rupindar. Ahese avei secoi Jerusalén ve. ⁸ Herodes sorivete Jesús repiase. Esephia, setá ari osephia pota tēi serācua anduse yepi. Evocoiyase oipota ité poromondiisa oyapo vaherā oyeovaque viña. ⁹ Sese oporandu ati mbahe rese chupe. Nomboyevi eté rumo Herodes upe. ¹⁰ Aheve opacatú pahi eta rerecuar iyavei Moisés porocuaita rese oporombohe vahe eta seroírosave oñemoñeta-ñeta tēi sese Herodes rovaque yuvireco. ¹¹ Evocoiyase Herodes osundao eta reseve iñeha mara-mara tēi Jesús upe sese oguayi tēisa pīpe yuvireco. Omboyemonde avei turucuar iporañete vahe pīpe yuvireco. Ñgue ehi imboyevi Herodes Pilato upe. ¹² Ahe ari pīpe suive oyembori Pilato Herodes rese. Ndoyeambotai vahe tie yipindar yuvireco viña.

“¡Tayaticasa!” ehi Jesús upe yuvireco

¹³ Evocoiyase Pilato opa uca omonuha opacatu pahi eta rerecuar, judío rerecuareta, opacatu ava eta avei. ¹⁴ Ipare aipo ehi chupe:

—Pe niha Peru co mbia cohabe cheu, ‘Omañeco tēi ava secua rupi’ peye. Che rumo aporandu tēi pe rovaque mbahe rese chupe. Ndipoi eté rumo mbahe sembiapo naporai vahe pe

remimombelu rupi. ¹⁵ Herodes avei, ‘Ndipoi mbahe sembiapo naporai vahe imano ãgua’ ehi. Sese omboyeviño Jesús imbou cheu. ¹⁶ Ainupa ucara rumo. Ipare amoseñora –ehi Pilato.

¹⁷ Pascua pieta pípe iya ité Pilato ava upe ñepei soquendapri mose ãgua.

¹⁸ Opacatú guasu rumo ava oñehe pírata yuvireco aipo ehi:

—¡Co topitaño oreu! ¡Barrabás emoseño! —ehi ava eta Pilato upe.

¹⁹ Co mbia Barrabás tecua pípe mbahe tēi mopuhasa sui iyavei oporapichisa sui oyequenda uca vahe. ²⁰ Pilato rumo omose pota Jesús viña. Sese oporandu iri ava upe imose ãgua.

²¹ Ahe rumo osapucai pírata catu yuvireco:

—¡Aní, tayaticasa! ¡Tayaticasa curusu rese! —ehi ati-atíño yuvireco.

²² Imombosapisa rese Pilato oñehe iri:

—¿Mbahe ité vo oyapo naporai vahe? Ndipoi eté niha que mbahe sembiapo yuca ãgua, ainupa uca tēira rumo. Ipare amoseñora —ehi.

²³⁻²⁴ Ava rehii rumo osapucai píratá catu yuvireco, “Tayaticasa ité” ehi-ehiño yuvireco. Sese chupe, “Tayaposa evocoiyase semimbotar yuvireco” ehiño Pilato ava eta upe. ²⁵ Ëgüe ehi imose co mbia Barrabás, acoi soquendapri mbahe-mbahe tēi mopuhasa sui, iporapichisa sui avei ava remimbotar rupi. Ipare omondo Jesús sārosar upe ava remimbotar apo ãgua sese.

Jesús yaticasa curusu rese

²⁶ Oime mbia Simón serer vahe Cirene iguar ou vahe que co coti rupi sui. Ovirasose Jesús yuvireco yatica ãguave, ahe mbia upe, “Nde terevosii curusu rese Jesús raquicuei” ehi voiño tēi yuvireco.

²⁷ Ava rehii yuviraso saquicuei. Cuña avei setá oyaseho oviharëhisave yuvireco sese. ²⁸ Omahese rumo cuña rese aipo ehiño chupe:

—Cuña Jerusalén iguar, peyasehoi rene che rese. Peyese ae peyaseho, pe membri rese avei. ²⁹ Esepia, oura ari naporai vahe. Ahese aipo peye tēira: ‘Aviye catu acoi cuña nimembii vahe iyavei ndoicuai vahe imocambu omembrí’ peye tēira. ³⁰ Ahese avei ava ivitri uve aipo ehira yuvireco: ‘¡Toviapi ore harive!’ ehira osiquiyepave. Iyavei ivivate vahe upe: ‘¡Tore mi!’ ehi tēira yuvireco. ³¹ Esepia, ëgüe ehise ivira yivive vitese, ¿mara ehira vo catu oipise? —ehi cuña eta upe.

³² Iyavei viraso ñuvirío mbia ndaseco pōrai vahe supive yaticapirā yuvireco. ³³ Oyepotase Ava Åca Cangüer serer vahesave, aheve oyatica curusu rese yuvireco. Iyavei oyatica

ñuvirío mbia, ñepei mbahe rese ipocosa coti, ambuae evocoiyase mbahe rese ipocoēhisa coti.³⁴ Ahese Jesús aipo ehi:

—Che Ru, ndeñero co ava upe sembiapo rai rese. Esepi, ndoicuai co mbahe güembiapo yuvireco —ehi.

Sundao evocoiyase iguayiño Jesús turucuar rese oyeupe imboyaho-yaho áqua yuvireco.³⁵ Ava rehii osepia yuvireco; mborerecuareta avei seroīrosave aipo ehi yuvireco chupe:

—Oip̄isiro ambuae ava, toñepisiro ru ahe ae ité cute Tūpa Rembiporavo Porop̄isirosar güecosa pipe —ehi yuvireco.

³⁶ Iyavei sundao seroīropare omondo vinagre itoihu yuvireco,³⁷ iyavei aipo ehi yuvireco chupe:

—¡Nde niha aipo ava judío eta rerecuar guasu ereico! ¡Eñepisiro ru nde ae ité! —ehi sundao eta yuvireco chupe.

³⁸ Curusu rese ñaca harive icuachiapri aipo ehi oñi: “Co judío rerecuar guasu” ehi.

³⁹ Evocoiyase ndaseco pōrai vahe yaticapri iñehe mara tēi chupe aipo ehi:

—¡Nde Porop̄isirosar ereicose, eñepisiro ru nde ae, ore avei ru ore p̄isiro eve! —ehi chupe.

⁴⁰ Ambuae evocoiyase aipo ehi voi ondugüer uve:

—¿Nderesiquiyeimi rutei vo Tūpa sui? Nde avei niha ocañi tēi vaherā.⁴¹ Yande rumo co yande rembiapo sui tēi mara-mara tēi yande rereco yuvireco; co mbia rumo mbahe sembiapoēhi pipe sui tēi na ehi serecosa —ehi ondugüer upe.

⁴² Evocoiyase aipo ehi iri:

—Jesús, che paraisuerecomi tēi eve nde eremboipise nde mborerecuasa —ehi.

⁴³ Evocoiyase omboyeví chupe:

—Supi eté co pipe ereicora tecua apirēhi vahesave che rupi —ehi Jesús ahe mbia upe.

Jesús mano agüer

⁴⁴ Osupitise rumo mbiter ari, opa tupri p̄itu ivi rupi; las tres pipe rumo opa icatu.⁴⁵ Ari avei ogüe tupri, turucuar guasu tūparo asiasa avei mbiter rupi tupri ovo.⁴⁶ Evocoiyase Jesús oñehe p̄irata:

—Che Ru, amondo che espíritu ndeu! —ehi.

Aipo ohe pare voi omano.

⁴⁷ Evocoiyase Roma iguar sundao rerecuar osepiase co mbahe poromondiisa Tūpa mboeteisa pipe aipo ehi:

—Supi eté co mbia ndaseco marai vahe —ehi.

⁴⁸ Iyavei opacatu ava supindar yuvirecoi vahe osepiase co nungar mbahe, oyepochiha nupa-nupa tēi oyepihamondiisa pipe yuvireco.⁴⁹ Opacatu avei ava oicua vahe Jesús, ipāhuve

cuña Galilea sui yugüeru vahe, osepião tēi amombrive co nungar mbahe yuvireco.

Jesús apocatu agüer tuvipa pipe

50-51 Oime mbia aviyé etepri vahe, ahe serer José, tecua Arimatea pendar. Ahe tecua ivi Judea pipendar, judío rerecuar ñemonuhasa ivate catu vahe pendar secoi. Ahe mbia viroya vahe ité Tüpa ombou vaherā omborerecuasa pipe mbahe moingatu água. Sese ndahei ipihañemoñeta rupi co mborerecuar oyapo vahe mbahe Jesús upe yuvireco. ⁵² Evocoiyase ahe oso Pilato rētave oporandu água Jesús rehögür rese. ⁵³ Curusu sui seroyi pare voi, oimama turucuar secose vahe pipe, ipoyava imondo tuvipa pipe ita guasu yohopri ndiporusa vitei vaheve yuvireco. ⁵⁴ Esepiá, ahe ari omoingatu mbahe mbítuhusa ari upe nara, ahe mbítuhusa rumo osupiti pota ité.

55 Cuña yugüeru vahe Jesús rupi Galilea sui, yuvirasoño ité suvipave, osepiá sehögür apocatuse yuvireco. ⁵⁶ Oyevisé güetave yuvireco omoingatu mbahe sīacua vahe tehögür resendar ipichi água.

24

Jesús ocuerayevi

Ahe cuña opituhu mbítuhusa ari pipe judío porocuaita reroyasave yuvireco. ¹ Cõhe ramomise domingu pipe, oyevi yuviraso tuvipave mbahe sīacua vahe reseve. ² Oyepotase yuvireco tuvipave, osepiá soquendasá ita guasu ndipo irise güendagüerve. ³ Evocoiyase yuviroique voi tuvipa pipe. Ndoyosui rumo yande Yar rehögür yuvireco. ⁴ Ndoyemboviñai tēi; ndoicatu iri. Ahese aviyeteramo tēi osepiá ñuvirío mbia iturucuar sendi vahe oipive yuvireco. ⁵ Opaño ñaca iviso ivi coti yuvireco osiquiyepave. Evocoiyase co mbia aipo ehi yuvireco chupe:

—¡Mahera peseca tuvípa pāhu rupi ava oicove vahe! ⁶ Ndipoi mo cohaye; ocuerayevi mo ahe. Peyemomahenduha iñehengagüer ivi Galilea rupi omombehu vahecuer rese, ⁷ “Che, Ava Ríquehir, imondoprira ava angaipa viyar povriva, iyavei che aticara curusu rese yuvireco. Mbosapi ari pare rumo acuerayevira” ehi acoi —ehi cuña upe yuvireco.

⁸ Evocoiyase cuña oyemomahenduha voi Jesús ñehengagüer rese yuvireco. ⁹ Oyevisé tuvípa sui yuvireco, omombehu opacatu co once apóstol yuvirecoi vahe upe, opacatu ambuae upe avei. ¹⁰ Co omombehu vahe Jesús resendar ñehesa yuvireco apóstol eta uve, ahe: María Magdalena, Juana, Santiago si María iyavei ambuae cuña eta no. ¹¹ Apóstol upe rumo

oyeupe mombehuse avíye aipo ehi tēi vahe; ndovíroyai eté yuvíreco.

¹² Pedro rumo yandu ramoseve voi, osē, oña oso tuvípave. Omahese tuvípa pípe, turucuar güeraño osepia co cotími tuise. Evocoiyase oyepíhamondii tēi ‘¿mara ehi rutei píha?’ oya oyeví oíve oso.

Jesús oyemboyecua ñuvirío güemimbohe upe tecua Emaúspiar rupi

¹³ Ahe ari pipeve caharuse, ñuvirío semimbohe yuvíraso tecua Emaús ve. Ahe once kilómetro tecua Jerusalén sui.

¹⁴ Ahe peri rupi oñemoñeta yuvíraso opacatu co mbahe oime vahecuer rese. ¹⁵ Oñemoñeta viteseve, Jesús teieté oyemboya sese, oguata supi. ¹⁶ Yepe osepia tēi, ahe rumo ndoyepiacua ucai eté chupe. ¹⁷ Evocoiyase Jesús oporandu chupe:

—¿Mbahe rese vo pe ñehe etepri pe guatasa rupi peico? —ehi.

Aipo hese, opita, ndovihai yuvínoha. ¹⁸ Ipáhu pendar Cleofas serer vahe omboyevi chupe:

—Nde güeraño revo Jerusalén ve ereico vahe ndereicuai mbahe oime vahe tecua pípe —ehi.

¹⁹ Evocoiyase,

—¿Mbahe vo oime yandeu? —ehi.

—Jesús mo Nazaret pendar, ahe Túpa ñehe mombehusar seco pírata vahe opacatu mbahe apo água, mbahe mombehu água avei Túpa rovaque iyavei opacatu ava rovaque.

²⁰ Omondo pahi rerecuar iyavei yande rerecuareta yamotaréhisave yuca uca água curusu rese yuvíreco. ²¹ Ore rumo oroyeroya ité sese. “Ahe yande písirora yande amotaréhimbar sui” orohe chupe viña. Cûritei rumo opa mbosapi ari yucare. ²² Ore pâhu pendar cuña ndore mbovihai eté oyevise suvípa sui yuvíreco. Esepia, yipindar yuvírasose añihiveive tuvípave, ²³ ndoyosui eté sehögüer yuvíreco. Ahese aipo osepia Túpa rembiguai aipo ehi vahe yuvíreco chupe: “Jesús mo oicove cûritei” ehi. Ahe evocoiyase yugüeru imombehu oreu. ²⁴ Iyavei ambuae ore ndugüer yuvírasose tuvípave cuña remimombehu rupi tupri avei. Ndosepiai eté rumo Jesús yuvíreco —ehi Cleofas chupe tupri ité.

²⁵ Evocoiyase aipo ehi ahe ñuvirío mbia upe:

—¡Ndapeicuai eté rumo pe píha pipe seroya tupri água opacatu Túpa ñehe mombehusar remimombehugüer!

²⁶ ¿Ndapeicuai vo Poropísiosar iparaisu rane itera mbahe-mbahe tēi virecosa pípe güecua porañetesave güeique água renondeve? —ehi.

²⁷ Ipare opa omombehu icuachiapri Moisés cuachiar pipendar iyavei opacatu Túpa ñehe mombehusar cuachiar pipendar oyese ñehe agüer.

²⁸ Oyepotase ahe tecuave yuviraso, Jesús rumo avíye oguataño vite vaherā senonde. ²⁹ Co mbia rumo oñehes yuvireco chupe:

—Epitaño ore piri, caharu etepri. Pitura moco ndeu —ehi yuvireco chupe.

Evocoiyase oique, opitaño ipiri yuvireco. ³⁰ Oguapise yuvínoi mesave, oipisi pan, “Aviye ndeu” ehi Tüpa upe. Ipare ombohi co ñuvirío mbia upe imondo. ³¹ Ahese voi semimbohe omahecua ramo yuvireco sese, ahe rumo cüriteimi ndoyemboyecua iri sovai chupe. ³² Evocoiyase aipo ehi oyeyupe yuvireco:

—Yande mbopihañemoñeta píratami eté peri rupi oñehese yandeu co tecocuer icuachiapri rese —ehi yuvireco.

³³ Ipare ndopita pucu iri; oyeviño voi yuviraso tecua Jerusalén ve. Aheve osepia once tupri vahe apóstol, omboetasa avei. ³⁴ Ahese oñemonuha vahe aipo ehi yuvireco:

—Supi eté rumo yande Yar ocuerayevi. Esepia, oyemboye-cua ité Simón upe —ehi.

³⁵ Evocoiyase ahe avei omombehu, “Oreu avei oyemboye-cua oroguatase peri rupi. Ombohise pan ore piri, ahese ramo oroicua” ehi yuvireco omboetasa upe.

Jesús oyemboye-cua güemimbohe eta upe

³⁶ Ahe oñehes viteseve yuvireco co tecocuer rese, ahese Jesús oyemboye-cua chupe aipo ehi:

—Avirave, mbahe tupri pipe tapeico —ehi güemimbohe eta upe.

³⁷ Ahe rumo oyembosiquiye guasu yuvireco ‘hágüer revo’ oyapave.

³⁸ —¡Mahera pesiquiye! ¡Mahera pereco vite pe poreroyaëhisa pe piha pipe! ³⁹ Pemahe che po rese, che pi rese avei. Che ité niha co aico. Pepoco ru che rese. Tache reroya ru peye. Esepia, ava hā ndovirecoi voho iyavei ocangüer; che rumo areco ité —ehi güemimbohe eta upe.

⁴⁰ Aipo ohe viteseve omboye-cua opo, opí avei chupe.

⁴¹ Ahe rumo vorivetesapiye iyavei oyepihambosiquiye vitesa sui ndoviroya tupri vitei eté yuvireco. Evocoiyase aipo ehi:

—¿Perecomi vo mbahe yande caru água? —ehi güemimbohe upe.

⁴² Evocoiyase omundo pira apiremi oyí vahe yuvireco chupe. ⁴³ Ipare oipisi, ohu opacatu güemimbohe rovaque.

⁴⁴ Ipare aipo ehi:

—Co rese acoi añahe vichico cuece pe rese aico vitese che mano renondeve. Yaviye ranera opacatu ñehesa che resendar

Moisés porocuaita cuachiapri pipe, iyavei Tūpa ñehe mombehusar yuvirecoi vahe rembicuachiagüer pipe, Salmo pipe avei –ehi.

⁴⁵ Egüe ehi evocoiyase opacatu osenducua uca aracahendar icuachiapirer güemimbohe upe ⁴⁶ aipo ehi:

—Co icuachiasa Poropísiosar iparaísura omano ãgua. Ipare mbosapi ari pare ocuerayevira. ⁴⁷ Jerusalén sui tupri opacatu ivi yacatu rupi imombehusara serer pipe, “Pemboasi pe angaipa, peyevi Tūpa upe pēu ñeroi ãgua” hesara. ⁴⁸ Pe niha peico opacatu co nungar mbahe repiasar imombehu ãgua. ⁴⁹ Che amboura che Ru remimombehu pe harive. Pepitañora rumo coháve tecua Jerusalén ve acoi peipisise voi píratasa iva suindar –ehi güemimbohe eta upe.

Ivave Jesús so agüer

⁵⁰ Evocoiyase Jesús yuvínose tecua sui yuviraso tecua Betania popíve. Aheve ñuvirío opo omopuha, osovasa mbahe tupri reime ãgua chupe. ⁵¹ Ipare oyepépi güemimbohe sui. Ahe ramoseve serasosa ivave. ⁵² Semimbohe evocoiyase osapucai imboeteisave. Ipare oyevi Jerusalén ve vorívetesa pipe yuvireco. ⁵³ Iyavei ahe ari yacatu rupi yuviraso tūparo guasu pipe osapucai Tūpa mboeteisave yuvireco yepi. Aipo rupive.

JUAN REMBICUACHIA JESUS RECOCUER RESENDAR SAN JUAN

Tūpa Ñehe oyeapo ava

¹⁻² Jesúz yipisuive ité Tūpa Ñehe secoi. Ahe oicove mbahe apoëhi viteseve Tūpa rese. Esepio, ahe niha Tūpa secoi. ³ Ipípe avei Tūpa opacatu mbahe oime vahe oyapo; ndipoi eté mbahe sembiapoëhi. ⁴ Jesúz niha vireco tecovesa apirëhi vahe oyese. Ahe tecovesa tesapesa nungar secoi opacatu ava upe. ⁵ Ahe tesapesa omboycua tecocuer supi eté vahe pítmimbi nungar mbahe naporai vahe aposar pähuve. Ahe mbahe tēi aposar rumo ndoicatui eté secopi yuvireco.

⁶ Oime mbia Tūpa remimbou. Ahe Juan serer vahe. ⁷ Ahe rumo ou co tesapesa cua uca äqua ‘toviroya opacatu ava yuvireco’ ohesave. ⁸ Ahe rumo ndahei eté tesapesa; imombe-husar tēi rumo secoi. ⁹ Co tesapesa supi eté vahe osesape opacatu ava. Ahe ou ité co ivi pipe.

¹⁰ Yepe tie ipípe yapopri opacatu ava viña, sembiapo rumo ndoicuai co ivi pipe secoise yuvireco. ¹¹ Supi eté ouse güecuave, secua pendar ae rumo ndoipisi yuvireco. ¹² Opacatu rumo acoi oipisi vahe seroyasave yuvireco, ahe chupe omondo ñecuñarosa Tūpa rahir seco äqua yuvireco. ¹³ Ndahei rumo co ivi pipendar rahir nungar que oha vahe ambuae ava remimbotar pipe tēi. Ahe rumo Tūpa rahir ité yuvirecoi.

¹⁴ Ipare ahe Tūpa Ñehe, oyeapo ava, oicove yande pähuve co ivi pipe oporoaisusave mbahe supi eté vahe aposa pipe. Iyavei orosepio ité seco porañetes. Co seco porañetes oipisi vahe Vu sui Tahir ñepei vahe güeco pipe. ¹⁵ Juan niha oñehe sese ava upe aipo ehi: “Co uve niha acoi aipo ahe vahe cuese: ‘Acoi ou vaherä che raquicuei, ahe ivate catu vahe che sui. Esepio, yipive ité secoi che yesuëhi viteseve’ ahe” ehi.

¹⁶ Esepio, opacatu ité yaipisiño iporovasasa tuvichá vahe ombouño vahe ité yandeu ari yacatu rupi yepi. ¹⁷ Mborocuaita yaipisi Moisés sui; porovasasa rumo iyavei mbahe supi eté vahe, ahe güeru Jesucristo yandeu. ¹⁸ Ndipoi eté ava osepio vahe Tūpa; Tahir ñepei vahe, secoi vahe ité ipiri, ahe oicua uca yandeu.

Juan Oporoäpiramo vahe oñehe Jesucristo rese

¹⁹ Judío rerecuar guasu tecua Jerusalén pendar oyocuai pahi eta iyavei ipitivüsareta imondo Juan uve ‘¿Ava vo nde?

tehi yuvireco chupe' oyapave icua ãgua. ²⁰ Ahe rumo oye-mombehu ité aipo ehi:

—Che ndahei eté Poropísiosar aico —ehi.

²¹ Evocoiyase oporandu iri yuvireco:

—¿Ava ité vo nde? ¿Nde tie Elías ereico? —ehi.

—Ndahei eté che ahe aico —ehi.

Evocoiyase,

—¿Nde tie acoi Tūpa ñehe mombehusar ou vaherā? —ehi
yuvireco chupe.

—Aní eté —ehi.

²² —¿Ava rutei vo evocoiyase nde? ¡Emombehu oreu ore oromombehu vaherā ore mbousar uve! ¿Mbahe ité vo eremombehura ndeyesuindar oreu? —ehi yuvireco chupe.

²³ —Che aico oñehe vahe ivi iporupiréhisa rupi aipo ahe: 'Pemoingatu pe recocuer yande Yar yepotase nara' ahe pēu. Ahe inungar acoi Tūpa ñehe mombehusar Isaías aipo ehi vahe aracahe —ehi.

²⁴ Ahe yuviraso vahe chupe, fariseo remimondo yuvirecoi,
²⁵ oporandu yuvireco chupe:

—Evocoiyase ndahei niha aipo nde Poropísiosar, ndahei avei Elías, ndahei eté Tūpa ñehe mombehusar imombehupri ereico. ¿Mahera ru evocoiyase ereporoäpiramo? —ehi yuvireco chupe.

²⁶ Evocoiyase fariseo upe aipo ehi:

—Che rumo i pipe aporoäpiramo; oime rumo mbia pe pâhuve ndapeicuai vahe. ²⁷ Ahe co ivi pipe ou vaherā che raquicuei. Che rumo ndahei eté seco catupri vahe aico ipitaquisã yora ãgua —ehi.

²⁸ Co opacatu mbahe yaposa tecua Betania ve, iai Jordán rovai añihivei coti. Aheve Juan oporoäpiramo yepi.

Tūpa remimbou Ovesa nungar opacatu ava angaipa repirā

²⁹ Ahere ayihive Juan osepia Jesús oyemboyase oyese aipo ehi: “¡Pesepia, co Tūpa remimbou Ovesa nungar seropovéhepirā opacatu ava angaipa mocañi ãgua! ³⁰ Añehese sese aipo ahe: ‘Che raquicuei oura mbia ivate catu vahe che sui. Esepia, yipive vahe ité che sui’ ahe acoi cuese. ³¹ Che rumo yipindar ndaicuai ahe yande remiaro ou vaherā. Sese niha aporoäpiramo i pipe vichico imboyecua ãgua che mu judío yuvirecoi vahe upe” ehi.

³² “Che asepia Espíritu Santo ogüeyise i va sui inungar apicasu, opita tupri iharive” ehi. ³³ “Yipindar rumo ndaicuai eté. Tūpa che cuai vahe rumo che poroäpiramo ãgua i pipe, aipo ehi cheu: ‘Acoi eresepiase Espíritu Santo ogüeyise, opitase mbia harive, ahe mbia oporoäpiramora Espíritu Santo pipe’ ehi.

³⁴ Che niha asepia ité. Sese, ‘Co Tūpa Rahir ité secoi’ ahe pēu” ehi.

Yipindar vahe Jesús remimbohe

³⁵ Ahere ayihive Juan secoi aheve avei ore ñuvirío mbia oroico vahe reseve. ³⁶ Jesús ore cuāse, Juan aipo ehi oreu:

—¡Pesepia, ndo co mbia Tūpa remimbou Ovesa nungar seropovēhepirā! —ehi oreu.

³⁷ Aipo ihe ramoseve, oroguata voi eté supi. ³⁸ Evocoiyase omahe guaquiuei coti. Ore repiase, oporandu oreu:

—¿Mbahe vo pesecami peico? —ehi oreu.

Ore evocoiyase,

—Porombohesar, ¿que vo nde recosa? —orohe chupe.

³⁹ —Yaso, tapesepia ru —ehi oreu.

Evocoiyase oroso, oroyepota las cuatro pipe secosave. Aheve ore pītu ité ipiri.

⁴⁰ Simón Pedro rivri, Andrés, ahe che ndugüer ahese. ⁴¹ Ahe rane aipo oseca viquehir Simón aipo ehi chupe:

—Orosepia ité Poropisirosar —ehi ('Cristo' oyapave).

⁴² Ipare voi, víraso Simón Jesús uve. Osepiase, Jesús aipo ehi chupe:

—Nde Simón, Juan rahir, ndererguā rumo Cefas —ehi ('Pedro' oyapave).

Jesús oñeho Felipe upe, Natanael upe avei oyeupi iguata ãgua

⁴³ Ahere ayihive voi Jesús ipihañemoñeta oso ãgua ivi Galilea rupi. Aheve osepias Felipe, aipo ehi chupe:

—Erio che rupi —ehi.

⁴⁴ “Aviye” ehi Felipe, ahe Pedro iyavei Andrés recua Bet-saida pendar secoi. ⁴⁵ Ipare oso Natanael reca, aipo ehi chupe:

—Orosepia Poropisirosar, sesendar acoi Moisés oicuachía cuachiar porocuaita resendar pipe aracahe, oicuachía avei sesendar Tūpa ñehe mombehusareta yuvireco. Ahe Jesús, José rahir, tecua Nazaret pendar —ehi.

⁴⁶ Natanael rumo aipo ehi:

—¿Oime pīha yuvinose vahe ava aviye vahe Nazaret pendar? —ehi.

—Yaso, teresepia ru —ehi Natanael upe.

⁴⁷ Acoi oyepota senise Natanael ou, Jesús sepiase, aipo ehi voi chupe:

—Co mbia secoi judío ete ité, ndoporombopai vahe —ehi.

⁴⁸ —¿Mara ere che cua eve? —ehi Natanael chupe.

—Che oroepia yipive Felipe nde reca renondeve ivira higueravrive ereicose —ehi Natanael upe.

⁴⁹ —Porombohesar, jnde niha Tūpa Rahir ereico, Israel iquier rerecuar guasu! —ehi Natanael chupe.

⁵⁰ —¡Che reroya voi eté acoi, “Oroepia iviravrive” che he sui tēi eve! Eresepiara rumo co mbahe sui aviyé catu vahe —ehi.

⁵¹ Iyavei aipo ehi opacatu upe:

—Supi eté pesepiara iva oyemboi tuprise iyavei Tūpa rembiguai eta igüeyise che, Ava Riquehir, upe, iyevise avei ivave yuvireco —ehi.

2

Mendasa tecua Caná ve

¹ Ipare imombosapisa ari pipe, oime mendasa tecua Caná ve, Galilea ivi rupi. Jesús si avei secoi aheve, ² iyavei Jesús ore semimbohe oroico vahe reseve ore soho avei yuvireco aheve.

³ Ëgue ehi rumo opa tēi uva ricuer. Evocoiyase Jesús si,

—Ndipo iri uva ricuer —ehi chupe.

⁴ —Cuña, ¿mahera vo aipo ere cheu? Che remimbotar rumo ari ndoyepota vitei cheu —ehi osi upe.

—Ichi rumo aipo ehi ava igua rese ihañeco vahe upe:

—Peyapo opacatu semimbotar pe cuaise —ehi.

⁶ Aheve oime seis cambuchi guasu ita cuhi apopri, ñepei-pepi cambuchi pipe oique cincuenta litro, amove oique setenta litro i pipe. Ahe judío oiporu pietase oyepoi água yuvireco Tūpa porocuaita mboaviye água yepi. ⁷ Evocoiyase ahe ava igua rese ihañeco vahe upe aipo ehi:

—Pemboapipapa co cambuchi i pipe —ehi.

Omboapipapa tupri yuvireco. ⁸ Evocoiyase aipo ehi ava ihañeco vahe upe:

—Penosemi chíhi, peraso pieta rese hañecosar uve —ehi.

Ëgue ehi eté yuvireco. ⁹ Ihañeco vahe pieta rese osāha i oyeapo vahe uva ricuer. Ndoicuai eté que sui osē ahe uva ricuer; igua rese ihañeco vahe güeraño tupri oicua yuvireco. Evocoiyase pieta rese hañecosar oñeho cuimbahe omenda vahe upe ¹⁰ aipo ehi chupe:

—Opacatu ava omondo uva ricuer aviyé catu vahe yipindar. Ipare acoi ava hitaropase yuvireco, omondo ndasepi vahe. Nde rumo ereyapocatupaño aviyé catu vahe, ahe cüritei ramo erenose —ehi.

¹¹ Co yipindar vahe poromondiisa Jesús oyapo vahe aheve. Ipipe omboyecua güeco píratasa. Sese semimbohe viroya ité yuvireco.

¹² Ipare oso tecua Capernaum ve, ichi avei, tivri reseve supive, iyavei ore semimbohe eta oroso supi. Aheve oroico moviro ari tēi.

Jesús omombopa ava mbahe rerecosar tūparo pipe sui

¹³ Ipare judío upendar Pascua pieta yepota senise, Jesús oso Jerusalén ve. ¹⁴ Aheve osepias tūparo guasu pipe corero ivipí rupi guarepochi rese mbahe mimbá eta mondosal; guaca, ovesa iyavei apicasu. Aheve avei mbia guarepochi recuñarosar yuvinoi. ¹⁵ Co mbahe repiase rumo, Jesús oyapo tucumbo omombopa tupri tūparo sui opacatu ava imbahe reseve-seve, seimba ovesa, seimba guaca avei. Guarepochi recuñarosar sui otíapi-apis iiguarepochi ivi rupi, iyavei imesa opa omombo. ¹⁶ Apicasu mondosareta uve aipo ehi:

—¡Penosepa co mbahe cūritei ave sui! —ehi—. ¡Aní che Ru rēta mbahe mondosa tēi pereco! —ehi.

¹⁷ Aipo hese, ore oroyemomahenduha ñehesa icuachiapí aracahendar aipo ehi vahe rese: “Nde rēta rese che recatéhisa sui che mocañira” ehi vahe.

¹⁸ Evocoiyase judío mborerecuar yuvirecoi vahe oporandu yuvireco chupe:

—¿Mbahe vo ereyapora nde mborerecuasa moporéhi água oreu cūritei? —ehi yuvireco chupe.

¹⁹ Evocoiyase,

—Pemondurupa co tūparo, che evocoiyase mbosapi ari rupive amopuha irira —ehi judío eta upe.

²⁰ Aipo hese, mborerecuar aipo ehi yuvireco chupe:

—Co tūparo rumo imopuhasa cuarenta y seis aravíter rupi, ¿ereicatura píha aipo nde imopuha iri mbosapi ari rupive? —ehi yuvireco chupe.

²¹ Oñehese Jesús tūparo rese, güete upe tēi rumo aipo ehi.

²² Ocuerayevise rumo manosa sui, ore oroyemomahenduha iñeha agüer rese. Sese oroviroya sesendar ñehesa icuachiapí pipe iyavei semimombehugüer.

Jesús oicua opacatu ava recocuer

²³ Jesús secoi vitese Jerusalén ve Pascua pieta pipe, setá ité ava viroya osepiase poromondiisa sembiapo yuvireco.

²⁴ Ndoyeroyai eté rumo ahe ava eta rese. Esepias, opacatu ité ava recocuer oicua. ²⁵ Ndipoi eté que ambuae ava pihañemoñeta mombehu água chupe. Esepias, ahe ité opa oicua.

3

Nicodemo omoñeta Jesús

¹ Oime mbia fariseo, Nicodemo serer vahe, ahe mbia mborerecuar judío pähuve secoi vahe. ² Ahe oso Jesús piri pítu pipe, aipo ehi chupe:

—Porombohesar, oroicua ité Tūpa nde mbose ore mbohe água —ehi—. Esepias, ndipoi eté que ava oicatu vahe evocoi nungar poromondiisa apo Tūpa oyese secoëhise —ehi.

³ Evocoiyase,

—Supi eté aipo ahe ndeu: acoi ava ndoyesu piasu iri vahe, ndoiquei chietera Tūpa mborerecuasave —ehi Jesús chupe.

⁴ Oporandu rumo aipo ehi:

—¿Mara ehira vo aipo ava oyesu piasu iri ocuacua pipe viña?

—ehi—. ¿Oicatu irira pīha osi avíterve oique oyesu iri ãgua? —ehi Jesús upe.

⁵ Jesús omboyevi chupe:

—Supi eté aipo ahe ndeu: acoi ava i pipe iyavei Espíritu pipe ndoyesui vahe, evoco nungar ndoyuviroiquei chira Tūpa mborerecuasave. ⁶ Acoi oyesu vahe co ivi pipendar oyesupa sui, inungar tupri avei ahe; Espíritu pipe oyesu vahe rumo, ahe espíritu. ⁷ Ereyepihamondii rene, ‘Peyesu piasu irira’ ahese ndeu. ⁸ Co rumo inungar ivitu oipeyu vahe güemimbotar rupi. Yepe sendusa siapu, ndicuasai rumo que sui turi, que oso no. Ëgüe ehi avei ava oyesu vahe Espíritu pipe —ehi Jesús chupe.

⁹ —¿Mara ehi pīha aipo evocoiyase? —ehi Jesús upe.

¹⁰ —¡Nde niha porombohesar ivate vahe Israel pendar ereico, nderesenducuai eté rumo co nungar mbahe! —ehi chupe—. ¹¹ Supi eté aipo ahe ndeu: ore oromombehu mbahe oroicua vahe, orosepia vahe ité. Pe rumo ndaperoyai eté ore remimombehu. ¹² Añehe tēi niha mbahe co ivi pipendar rese pēu; ndache reroyai eté rumo peye. Tahetru revo mbahe ivá pendar amombehuse pēu ndaperoyai chietera viña —ehi.

¹³ “Esepia, ndipoi eté ambuae ava ivave oyeupi vahe; che güeraño, Ava Ríquehir, ivá sui agüeyi vahe pēu. ¹⁴ Inungar Moisés osupi ivate mboi rahanga ivi iporupirēhisa rupi arac-ahe. Ëgüe ehi aveira che, Ava Ríquehir, rerecosa ivate che rupira yuvireco ¹⁵ opacatu ava che reroyasar tecovesa apirēhi rereco ãgua yuvireco” ehi Jesús Nicodemo upe.

Tūpa poroaisusa ava upe nara

¹⁶ “Supi eté Tūpa osaisú iteanga opacatu ava. Sese ombou Guahir ñepei vahe ‘tocañi tēi eme che Rahir reroyasar yuvireco’ oya, ‘tovireco tecovesa apirēhi vahe’ ohesave. ¹⁷ Esepia, nomboui Tūpa Guahir co ivi pipe ava mocañi tēi ãgua; ahe rumo ombou ava pīsiro ãgua.

¹⁸ “Ava viroya vahe Tūpa Rahir, ndahei eté ocañi tēi vaherā; acoi ava ndoviroyai vahe rumo, oipisi itera cañisa yuvireco Tūpa Rahir ñepei vahe reroyaëhisa pipe. ¹⁹ Ëgüe ehi etera chupe yuvireco. Esepia, tesapesa supi eté vahe ou co ivi pipe, ahe ava rumo oipota catu mbahe Caruguar suindar pītumimbi vahesave güeco ãgua yuvireco. ²⁰ Supi eté acoi opacatu ava oyapo vahe angaipa, ndosepia potai tesapesa,

iyavei ndoyemboyai tesapesa rese yuvireco oangaipa mboye-cua potaēhisave. ²¹ Acoi ava yuvirecoi vahe rumo mbahe supi eté vahe aposa pipe, oyemboyai tesapesa rese yuvireco mbahe Tūpa remimbotar oyapo vahe cua uca āqua opacatu ambuae ava upe –ehi.

Juan Oporoāpiramo vahe oñeho iri Jesús rese

²² Ipare Jesús oso güemimbohe eta rese ambuae tecua rupi-rupi ivi Judea ve. Aheve secoi pucu raimi oporoāpiramo. ²³ Iyavei Juan oporoāpiramo vite Enón ve, Salim rerovicave. Esepia, aheve tuvichá i oime. Aheve ava yugüeru oñieapiramo uca āqua. ²⁴ Co rumo mbahe yaposa Juan roquendaēhi viteseve.

²⁵ Evocoiyase Juan remimbohe omboipi ambuae omu judío rese oyecopi-copi vaherā i pipe ñeapiramosa resendar sui tēi yuvireco. ²⁶ Sese yuviraso Juan uve aipo ehi:

—Ore mbohesar, acoi secoi vahe nde rese iai Jordán rovai, sese acoi ereñehe oreu, cūritei ahe oporoāpiramoño tēi iyavei opacatu yuviraso supi –ehi semimbohe yuvireco chupe.

²⁷ Evocoiyase aipo ehi güemimbohe upe:

—Ava ndoicatui mbahe apo Tūpa nombouise chupe. ²⁸ Pesendu tupri ité che ñehe cuese: “Che ndahei Poropísiosar aico, che rumo senonde imboupri tēi aico” ahese pēu. ²⁹ Esepia, acoi mendasa oimese, vireco vahe güembirecoví ahe imevi, osenduse rumo imboripar iñehe yivii ohā, oyembovharete sese. Ëgue ahe avei che cūritei, ayembovharete Jesús rese. ³⁰ Ahe niha seco iñate catucatuño itera ari rupi oico; che rumo ivi coti catu aicora ichui –ehi Juan güemimbohe upe.

Iva suindar ou vahe

³¹ Iva suindar ou vahe iñate catu ité opacatu sui. Co ivi pipe oyesu vahe rumo co ivi pipendar ité. Sese niha mbahe ivi pipendar rese tēi oñeho. Acoi ou vahe rumo iva sui, iñate catu ité opacatu sui. ³² Iyavei mbahe güembiepia osendu vahe reseño ité oñeho. Ndipoi eté rumo semimombehu viroya vahe yuvireco. ³³ Acoi ava viroya vahe rumo iñehe, “Supi tupri ité Tūpa omombehu mbahe” ehi. ³⁴ Co Tūpa remimbou niha omombehu Tūpa ñehe. Esepia, Tūpa omondo ité oEspíritu sese. ³⁵ Tūpa osaīsu Guahir iyavei opacatu mbahe omondo ipove. ³⁶ Opacatu ava viroya vahe Tūpa Rahir, vireco ité tecovesa apirēhi; acoi ndoviroyai vahe rumo, ndovirecoi chietera co tecovesa. Ahe rumo oipisira Tūpa ñemoirosa ipirata vahe ité yuvireco.

4

Jesús oñeho Samaria pendar cuña upe

¹ Fariseo eta oyandu yuvireco Jesús vireco catuse ava oyeupi oguata vahe iyavei oporoāpiramo catuse avei Juan sui² (ndahei eté rumo Jesús oporoāpiramo; semimbohe tēi rumo ēgue ehi yuvireco). ³⁻⁴ Jesús oicuase aipo nungar, osē Judea sui, oyevi iri ivi Samaria rupi, Galilea ve yuviraso.

⁵ Aheve Samaria ivi rese oyepota tecua Sicar serer vaheve yuvireco. Ahe tecua rerovicave oime ivi Jacob omondo vahecuer guahir José upe aracahe. ⁶ Aheve oime ivicuar, chupe, “Jacob igaugüer” ehi yuvireco. Ahe igua rembe rese Jesús oguapi mbiter ari potase ocueraise oī. ⁷⁻⁸ Semimbohe eta rumo opacatu yuviraso tecuave mbahe tembihu rerocua. Aheseve cuña, Samaria pendar, oyepota iguave i renose. Ahese Jesús aipo ehi chupe:

—Emboumi chīhi nde i taihu —ehi.

⁹ Cuña, Samaria pendar, rumo omboyevi chupe:

—¿Mahera vo, “Embou i taihu” ere cheu? Nde rumo judío; che cuña coha pendar aico —ehi chupe. (Esepia, judío noñehi vahe ité ava Samaria pendar upe yuvireco yepi.)

¹⁰ Evocoiyase omboyevi cuña upe:

—Ereicuase Tūpa porerecosa ndeundar viña iyavei ereicuase ahe ava ndeu i rese oporandu vahe, nde evocoiyase ereporandura sese chupe. Ahe evocoiyase omondora i ndopai vahe ndeu viña —ehi cuña upe.

¹¹ —Ndererecoi rumo i renose água. Esepia, co igua ipicucú ité. ¿Que sui vo aipo evocoiyase eremboura i ndopai vahe cheu viña? —ehi cuña chupe—. ¹² Esepia, co igua ore ramoi Jacob oseya oreu. Cohave suiño ité niha ahe oihu, tahir avei oihu yuvireco ichui iyavei opacatu seimba. ¿Nde pīha ivate catu ereico ichui? —ehi cuña chupe.

¹³ —Opacatu ava oihu vahe co i, ihuseiño itera yepi, —ehi cuña upe—. ¹⁴ Acói ava oihu vahe rumo i che remimondo, ndihusei iri chietera. Esepia, che amondo vahe i ndopai vaherā ité. Ahe omboura tecovesa ndopai vahe ava upe —ehi cuña upe.

¹⁵ —Nde ava, emboumi ahe i taihu che husei iriēhi água, tanose iri eme i cohabe sui —ehi.

¹⁶ —Eso rane nde mer reca, seseve peyu cohabe —ehi cuña upe.

¹⁷ —Ndarecoi rumo che mer —ehiño cuña chupe.

—Supi eté aipo ere, ndererecoi eté nde mer. ¹⁸ Esepia, cinco tupri erereco nde mer iyavei cūritei erereco vahe nde resendar tēi. Supi eté aipo ere: “Ndarecoi che mer” ere cheu —ehi cuña upe.

¹⁹ —Nde ava aviye moco Tūpa ñehe mombehusar ereico cheu —ehi—. ²⁰ Ore ramoi eta omboetei Tūpa co ivitri rese

yuvireco. Pe rumo, judío peico vahe, “Jerusalén ve yamboeteira Tūpa yepi” peye –ehi.

²¹ —Che reroya eve cuña, viroví ari pēu peso iriēhi ãgua Tūpa mboetei co ivitri rese iyavei Jerusalén ve. ²² Pe Samaria pendar peico vahe pemboetei tēi pe rembiguaēhi. Ore rumo oroicua oromboetei vahe. Esepia, ñepisirosa ou judío sui. ²³ Oyepota rumo ari cute, ahe ité co cūritei co pipe suive supi eté Tūpa omboetei vahe, Tūpa Espíritu pipe omboeteira yuvireco. Supi eté Tūpa, “Ēgue tehi che mboetei yuvireco” ehi. ²⁴ Esepia, Tūpa niha Espíritu secoi. Sese acoi omboetei vahe oyapora Espíritu pipe supi tupri vahe ité yuvireco –ehi cuña upe.

²⁵ Cuña evocoiyase aipo ehi chupe:

—Che aicua Porop̄isirosar yu ãgua (ahe ‘Cristo’). Acoi ahe ouse, omombehu tuprira opacatu mbahe yandeu –ehi cuña chupe.

²⁶ —Che niha ahe aico añahe vahe ndeu –ehi cuña upe.

²⁷ Aheseve semimbohe eta oyeví yuvireco, nombovíhaipri güemimbohe cuña rese oñemoñetase. Ndipoi eté rumo que “¿mbahe rese vo peñemoñeta?” ehi vahe, que “¿mahera vo ereñehe co cuña upe?” ehi vahe yuvireco chupe. ²⁸ Ahese cuña oseya tupriño ocambuchi, oso güecuave aipo ehi ava eta upe:

²⁹ —Perio, tapesepia pe ava omombehupa tupri vahe che recocuer cheu. ¿Ndahei pīha ahe Porop̄isirosar? —ehi omu eta upe.

³⁰ Evocoiyase ava rehii yuvinose tecua sui, yuviraso Jesús recosave sepia. ³¹ Ava yepotaēhi viteseve, semimbohe eta,

—Ore mbohesar, ecarumi –ehi tēi yuvireco chupe.

³² —Oimera rumo ambuae mbahe cheu che moviracua ãgua. Ahe ndapeicuai vahe –ehi güemimbohe eta upe.

³³ Semimbohe aipo hese oporandu-randu tēi oyeupe yuvireco:

—¿Oime pīha que ava güeru vahe mbahe semihura? —ehi tēi yuvireco.

³⁴ Güemimbohe upe rumo aipo ehi:

—Che moviracuasa rumo che mbousar porocuaita, ahe aya-pora iyavei amboaviye rane itera iporaviqui –ehi—. ³⁵ Esepia, pe aipo peye: ‘Ipane vite irungatu yasi mbahe miti ha monuha ãgua’ peye yepi; che rumo aipo ahe pēu: pemahe pe ivirindar ava eta rese. Opa ité opīha omoingatu yuvireco, ahe inungar mbahe miti ha yaviye vahe. ³⁶ Acoi oporaviqui vahe Tūpa upe ava hā pisi ãgua rese, ahe oipisira sepri yuvireco iyavei semimonuha tecovesa ndopai vaheve nara ité yuvirecoira. Evocoiyase ava upe oñehe vahe iyavei oipisi vahe ava hā ivave nara, oyoya guasu oviharetera ipisipri rese yuvireco.

³⁷ Supi eté co ñehesa aipo ehi vahe: ‘Ñepei eté omaheti vahe; imonuhasar rumo ambuae ité’ ehi. ³⁸ Che opocuai ava hā pisi ãgua ambuae ava poravíquisave; yipindar rumo ambuae oporavíqui ité yuvireco sese. Pe evocoiyase peique iporavíqui agüer rupi –ehi güemimbohe eta upe.

³⁹ Setá ava tecua Sicar pendar Samaria pipe viroya cuña ñehe sui yuvireco, “Opacatu mbahe che rembiapo omombehu cheu” ihesa sui. ⁴⁰ Evocoiyase ava rehii Samaria pendar yuviraso chupe ‘epitami ore piri’ oya. Evocoiyase opita ipiri ñuvirío ari rupi. ⁴¹ Setá catu iri ava viroya yuvireco iñehe ité renduse. ⁴² Evocoiyase ava eta aipo ehi cuña upe yuvireco:

—Cûritei oroviroya ité cute, ndahei nde ñehe suiño oroviroya. Esepia, ore ité orosendu iñehe cute, orocuia avei ahe supi eté opacatu ava pisirosar ou vahe –ehi ava eta cuña upe yuvireco.

Jesús ombogüera mborerecuar rahír

⁴³ Ñuvirío ari pare, Jesús osẽ ivi Samaria sui, osoño ivi Galilea ve. ⁴⁴ Ahe ae ité aipo ehi: “Túpa ñehe mombehusar ndasaisusai ivi rese yuvireco yepi” ehi. ⁴⁵ Oyepotase oivi Galilea ve, ahe pendar ava oipisi tupri yuvireco. Esepia, setá osepia opacatu mbahe sembiapo Pascua pietase Jerusalén ve.

⁴⁶ Evocoiyase oyevi iri tecua Caná ve Galilea ivi rese, aheve acoi i tēi oyapo uva ricuer. Tecua Capernaum ve oime mbia mborerecuar guasu ivirindar. Ahe vireco guahir imbaheasi vahe. ⁴⁷ Oyanduse co mbia mborerecuar Jesús yepota Judea sui ivi Galilea ve, ahe ramoseve oso voi seca ‘toso che rêtave, tombogüerami che rahír omano pota vahe cheu’ oya. ⁴⁸ Evocoiyase aipo ehi ahe mborerecuar upe:

—Pe ndache reroyai eté peye ndapesepiaise mbahe poromondiisa che rembiapo –ehi.

⁴⁹ —Che Yar, eyu poyavañomi tēi che rahír mano vitéñhiseve –ehi mborerecuar chupe.

⁵⁰ —Eyevi nde rêtave; nde rahír oicove –ehi mborerecuar upe.

Ahese viroya voi oyeupe ñehesa. Sese oyevi voi eté güëtave. ⁵¹ Amombri seco viteseve, yuvinoña voi sovaichi sembiguai imombehu:

—¡Nde rahír oicove! —ehi yuvireco chupe.

⁵² Evocoiyase oporandu: “¿Mbahe hora pipe tupri ocuera?” ehi.

—Irapipe caharuse, la una pipe, ndasohi iri —ehi yuvireco chupe.

⁵³ Ahese mborerecuar ipihañemoñeta: “Ahe hora pipe tupri niha Jesús aipo ehi cheu: ‘Nde rahír oicove’ ehi” ehi. Evocoiyase ahe iyavei opacatu imu eta viroya Jesús yuvireco.

⁵⁴ Co imoñuviriosa poromondiisa oyapo Jesús güecocuer cua uca ãgua ivi Judea sui oyevise Galilea ve.

5

Jesús ombogüera ava ndoguatai vahe tecua Betzata pendar

¹ Ipare oime judío pieta guasu Jerusalén ve, aheve Jesús oso. ² Ahe tecua roquendipi, Ovesa serer vahe coti, oime ivicuar i vireco vahe, serer hebreo ñehe pipe Betzata. Ahe sese oyere tupri poyandepo oquendipi yapayere vahe pâve. ³ Aheve ava eta imbaheasi vahe oñeno yugüeru ivi rupi: ndasesapisoí vahe, ndoguatai vahe, ndipindugüei vahe avei i ñemomiisa osäro yuvireco yepi. ⁴ Esepiá, amove tēi Tūpa rembiguai ogüeyi ahe ivicuarve i momii ãgua, “Acoi ahe rane ocui vahe i ñemomiiseve ive, ocuera voi eté ombaherasisa sui” ehi yuvireco chupe. ⁵ Aheve oime mbia ombaherasisa vireco vahe treinta y ocho araviter rupi. ⁶ Osepiase Jesús, oicua voi eté vireco pucuse ombaherasisa. Evocoiyase oporandu chupe:

—¿Ereipota vo nde cuera ãgua? —ehi chupe.

⁷ Imbaheasi vahe omboyevi:

—Nde mbia, ndipoí eté que ava che mongui vaherā i pipe i ñemomiise. Asäha tēi ‘tacui’ viya. Ambuae rane-raneño rumo yuvirocui che sui yepi —ehi.

⁸ Evocoiyase,

—Epúha, esupi nde rupa, eguata —ehi imbaheasi vahe upe.

⁹ Ahe ramoseve ahe mbia ocuera tupri, osupi vupa, oguata voi oico. Mbituhusa ari pipe tupri rumo ëgue ehi.

¹⁰ Evocoiyase judío aipo ehi ocuera vahecuer upe yuvireco:

—Co pipe rumo mbituhusa ari, nande cuaitai nde rupa rese ndevoisi ãgua —ehi yuvireco chupe.

¹¹ Ahe mbia evocoiyase,

—Che mbogüerasar rumo aipo ehi cheu: ‘Esupi nde rupa, eguata’ ehi cheu —ehi judío eta upe.

¹² —¿Uma vo aipo ehi ndeu? —ehi judío yuvireco chupe.

¹³ Ahe mbia rumo ndoicua iri ombogüerasar. Sese ndoicatui imboyevi ãgua. Esepiá, Jesús aviyeteramo tēi ndoyecua iri ava rehii pâhuve. ¹⁴ Coiye rumo Jesús osepiá iri tūparove ahe mbia, aipo ehi chupe:

—Ereicua co nde cuerasa cûritei, aní ereyemboangaipa iri mbahe tēi catu reime iri ãgua ndeu —ehi chupe.

¹⁵ Ahe mbia evocoiyase oso voi eté judío eta rerecuar upe ‘Jesús che mbogüera’ oya. ¹⁶ Sese judío osaquicue moña iyavei oyuca pota yuvireco mbituhusa ari pipe iporombogüera rese tēi. ¹⁷ Ahe rumo aipo ehi:

—Che Ru niha oporavíquiño ité co arí rupi iyavei che aporavíquiño avei —ehiño judío upe.

¹⁸ Aipo hese, judío, “Yayuca ité” ehi. “Esepiá, ndahei mbituhusa arí güeraño nomboyeroysi, ahe rumo oyeapo Túpa nungar, Túpa uve ‘che Ru’ ohe angahu tēisa pipe” ehi yuvireco chupe.

Túpa Rahir mbororecuasa

¹⁹ Evocoiyase Jesús aipo ehi judío upe: “Supi eté aipo ahe: Túpa Rahir ndoicatui eté mbahe apo oyesui tēi, Vu rembi-apo mbahe oicua; aheño tupri avei oyapo yepi. ²⁰ Esepiá, Tu Guahir rai-supave omboycua opacatu mbahe güembia apo chupe iyavei omboycuaño vite itera mbahe poromondiisa tuvicha catu vahe sembiaporā, ‘¡Mara ehi rutei co!’ pehe tēi áqua chupe. ²¹ Esepiá, che Ru ombogüerayevi omano vahe iyavei omundo tecovesa chupe. Ëgüe ehi avei Tahir omundo tecovesa ava upe güemimbotar rupi. ²² Iyavei Tu nomondo iri ava upe sembiapo repri. Esepiá, ombou Guahir upe opacatu píratasa ava upe sembiapo repri mundo áqua. ²³ Ëgüe ehi Guahir upe opacatu ava imboetei áqua yuvireco inungar Tu imboeteipri. Acoi ava Tahir nomboetei vahe, Tu imbousar avei nomboetei yuvireco.

²⁴ “Supi eté aipo ahe pēu: acoi oyapisaca vahe che ñehe rese, viroya vahe avei che mbousar, ahe virecora tecovesa apiréhi vahe; ndahei chietera imocañipri. Esepiá, osē manosa sui oipisi tecovesa. ²⁵ Supi eté aicua uca pēu: oura arí imombehupri, cūritei eté co arí oyepota, ava eta omano vahecuer osendura Túpa Rahir ñehe. Acoi osendu vahe, oicoveño itera. ²⁶ Esepiá, Tu vireco tecovesa oyese. Ëgüe ehi avei Guahir upe imondo tecovesa rereco áqua. ²⁷ Ombou avei imbororecuasa áqua chupe ava recocuer rese iporandu áqua. Esepiá, ahe Ava Riquehir secoi. ²⁸ Peyepihamondii rene aipo che hesa sui. Esepiá, oyepotara arí imombehupri, ahese opacatu ava omano vahecuer osendura iñehe. ²⁹ Ahese yuvinosera vuvipa sui. Oyapo vahe mbahe tupri, ocuerayevira yuvireco tecovesa apiréhi rereco áqua; acoi oyapo vahe rumo mbahe naporai vahe, ocuerayevira yuvireco Túpa ñemoirosa pisi áqua” ehi Jesús judío rerecuar upe.

Jesús omboycua tupri ombororecuasa

³⁰ “Che ndaicatui mbahe apo cheyesui tēi. Che, ‘Pe peyavi vahe mbahe, peipisira che Ru ñemoirosa’ ahe ava ndaseco pōrai vahe upe che cuaita rupi iyavei che amombehu vahe supi tupri ité. Esepiá, che ndaipotai che remimbotar tēi mbahe apo áqua. Che Ru, che mbousar remimbotar rumo ayapo. ³¹ Que cheyese ae tēi añehese, ahese ndache reroyai

chira peye viña. ³² Oime rumo ambuae che mombehusar. Ahe supi eté che mombehu pe seroya ãgua; ahe Juan. ³³ Pe niha, pemondo ava chupe imboporandu mbahe rese. Ahe semimombihu niha supi tupri vahe ité. ³⁴ Yepe ahe supi eté viña, che rumo ndayeroyai ava tēi che mombehusa rese. Che rumo aipota peñepisiro ãgua. Sese aipo ahe pēu. ³⁵ Juan niha inungar tataendi, ēgue ehi omboyecua mbahe supi eté vahe. Sese pe peyemboviha raimi tēi iporombohesa tesapesa nungar pipe peico. ³⁶ Che rumo areco che yecua ucasar aviyé catu vahe Juan sui. Ahe niha co mbahe ayapo vahe yepi. Ahe sese che Ru che cuai yapo ãgua. Co mbahe ayapo vahe, ahe ité omboyecua che Ru Tūpa che mbousar. ³⁷ Iyavei che Ru avei eté che cuia ucasar. Ahe iñehe rumo ndapesendui vahe ité, iyavei ahe ndapesepiai eté. ³⁸ Iñehengagüer icuachiapri avei ndoquei eté pe rese. Ipípe niha ndache reroyai eté peye che Ru che mbouse. ³⁹ Pe peicua tupri pota icuachiapri ‘icuapa tupri pipe revo tecovesa apirëhi yarecora’ peye viña. Co rumo cuachiar che mombehu vahe: ⁴⁰ pe rumo ndapeyu potai eté cheu co tecovesa apirëhi rereco ãgua.

⁴¹ “Ndaipisii eté ava che mboeteisa tēi. ⁴² Iyavei opocua Tūpa ndapesaisuisse. ⁴³ Che niha ayu che Ru rer pipe. Pe rumo ndache reroyai eté peye. Ouse rumo que ambuae ava oyesui tēi oñehe vahe, evoco nungar tēi peroyara. ⁴⁴ Ndapeicatui eté che reroya ãgua peye. Esepia, pe ae tēi peyemboetei; ndapesecai eté Tūpa ñepei vahe suindar yemboeteisa. ⁴⁵ Ndapepihañemoñetai chira che pe recocuer mombehu ãgua rese che Ru rovai. Moisés peroya vahe ité niha oicuachía pe Tūpa reroyaëhisa chupe imombehu ãgua. ⁴⁶ Peroyase rumo Moisés ñehe viña, che avei che reroyara peye viña. Esepia, Moisés niha oicuachía che resendar ñehesa. ⁴⁷ Ndaperoyaise ahe sembicuachía, evocoiyase ndapeicatui chietera che remimombehu reroya ãgua” ehi Jesús oamatarëhimbar upe.

6

Jesús oyopoi cinco mil ava

¹⁻⁴ Ipare Pascua pieta ípiimi aipo Jesús osasa ipa Galilea serer vahe oso, ahe serer avei Tiberias. Ava rehii avei yuviraso saquicuei. Esepia, osepia ité yuvireco oyapose mbahe poromondiisa guasu imbaheasi vahe mbogüerase. Oyepotase ivi rese yuviraso, evocoiyase oyeupi ivitri rese. Aheve oguapi opacatu güemimbohe eta reseve yuvinoi. ⁵⁻⁶ Omahese ava rehii oyeupindar rese, ahese aipo ehi Felipe upe:

—¿Que vo yarocuara mbahe tembihu co opacatu ava upe nara? —ehi secoāhasave.

Ahe rumo oicua ité mbahe güembiaporā. ⁷ Evocoiyase Felipe omboyevi chupe:

—Dosciento denario pan ndosupiti chietera que chīchīhimi ava retacuer viña —ehi.

⁸ Aipo hese, ñepei semimbohe pāhu pendar, Simón Pedro rívrī, Andrés aipo ehi chupe:

—Co chīhivahe vireco cinco pan, iyavei ñuvirío pira, ¿iyacatura vo co ava retacuer? —ehi.

¹⁰ Evocoiyase aipo ehi:

—Pemombehu opacatu upe toguapi yuvireco —ehi güemimbohe upe.

Capihi reimesave opa omboguapi yuvireco cinco mil ava.

¹¹ Evocoiyase oipisi cinco vahe pan, “Aviye ndeu” ohe pare Vu Tūpa upe, opa ombohi-mbohi imondo ava rehī upe. Ëgüe ehi avei pira upe, imondopa semimbotar rupi-rupi yuvireco.

¹² Opase ava ihītaro,

—Pemonuhapa sumbirer iyemombucaēhi água —ehi güemimbohe upe.

¹³ Evocoiyase omonuha doce iruova sumbirer yuvireco pan cincomi vahe sui. ¹⁴ Evocoiyase ava eta co poromondiisa guasu Jesús rembiapo repiase, aipo ehi yuvireco:

—Supi eté co uve revo acoi: “Ouria Tūpa ñehe mombehusar ivi pipe” ehi icuachiapri aracahendar pipe —ehi yuvireco.

¹⁵ Jesús rumo oicuase ava opíratasa pipe tēi güeraso pota água mborerecuar guasu vireco água oyeupe nara yuvireco, ahese oyeupi iri oso ivate catu. Aheve ahe ae güeco água.

Jesús oguata i harī rupi

¹⁶ Pítu ramose ogüeyi yuviraso Jesús remimbohe ipave,

¹⁷ yuviroha carite pipe sasa água yuvireco tecua Capernaum ve yuviraso. Ahese pítu ité. Jesús rumo ndoyevi vitéi eté.

¹⁸ Ahese oipeyu pírata ivitú, i avei ohitu pírata. ¹⁹ Yuviraso pucumi tēi cinco, anise seis kilómetro rupi. Ahese osepia Jesús yuvireco osupiti senise carite. Ahe i harī rupi oguata oso chupe. Evocoiyase osiquiye ité yuvireco ichui. ²⁰ Ahe rumo aipo ehi güemimbohe upe:

—¡Che Jesús aico, pesiquiyei rene! —ehi.

²¹ Evocoiyase sorivete yuvireco carite pipe seroha. Iparemi tēi oyepota yuviraso oyuvirasosave.

Ava eta oseca Jesús

²² Ahere ayihive ava rehī opita vahe sovai yuvireco, “Semimbohe año rumo yuviraso ñepei vahe carite pipe.

Jesús rumo ndosoi eté güemimbohe rupi” ehi tēi yuvireco.

²³ Aheseve rumo ambuae carite viroyepota seru yuvireco

tecua Tiberias pendar, acoi Jesús ava remihura pan reroyeriquí agüer rerovicave.²⁴ Evocoiyase ava rehii oicuase Jesús semimbohe reseve iporéhise yuvireco, yuviroha yuviraso água co ambuae carite pipe tecua Capernaum ve seca.

Jesús, pan nungar, tecovesa apiréhi vahe secoi

²⁵ Oyepotase ava rehii iipa rovai, aheve osepia Jesús yuvireco.

—Ore mbohesar, ¿marase vo ereyepota cohabe? —ehi yuvireco chupe.

²⁶ Evocoiyase aipo ehi chupe:

—Supi eté aipo ahe pēu. Pe rumo che reca peye che pe mbocarusa rese tēi,, ndahei co che poromondiisa reroyasave ité peico pota che rupi. ²⁷ Peporavíqui eme catu tembihu ndasecosei vahe rese; iyacatu rumo peporavíqui tembihu secose vahe rese omondo vahe tecovesa apiréhi. Co tembihu che, Ava Riquehir, amondora pēu. Esepia, che Ru Tūpa omboyecua ité che ichuindar aicose —ehi.

²⁸ Aipo hese,

—¿Mbahe mboravíqui vo oroyapora Tūpa upe? —ehi yuvireco.

²⁹ —Tūpa oipota pe che reroya reye che semimbou che recose —ehi ava eta upe.

³⁰ Evocoiyase,

—¿Mbahe poromondiisa vo eremboyecua irimira oreu orosepia vaherā nde reroya tupri catu água? ³¹ Esepia, aracahe ore ramoi eta yuvirohu ivi iporupiréhisa rupi. Icuachiapri aracahendar pipe omombehu: ‘Omondo pan iva pendar semihura’ ehi —ehi ava eta yuvireco chupe.

³² —Supi eté amombehu pēu: ndahei Moisés omondo pan iva pendar chupe, che Ru rumo omondo chupe. Cüritei che Ru ombou pēu pan supi eté vahe iva sui. ³³ Esepia, co pan ombou vahe Tūpa iva suindar ité. Ahe omondora tecovesa ivi pipendar upe —ehi ava eta upe.

³⁴ Evocoiyase,

—Ore mbohesar, embouño catu co pipe suive aipo pan oreu —ehi yuvireco chupe.

³⁵ —Che ité ahe pan aico tecovesa mundo água. Acoi ou vahe cheu ndiyumbiasi iri chietera iyavei acoi che reroya vahe ndihusei chiaveira. ³⁶ Aipo ahe niha acoi pēu. Yepe pe che repia peye viña, pe rumo ndache reroyai eté peye. ³⁷ Opacatu ombou vahe ava che Ru cheu, cheu ité yugüerura; acoi yugüeru vahe cheu, aipisira; ndamomboi chietera cheyesui. ³⁸ Esepia, ndayui iva sui mbahe che remimbotar apo água tēi; ayu rumo che mbousar porocuaita apo água. ³⁹ Che Ru che mbousar

ndoipotai que ñepei ava ombou vahe cheu amocañira. Ahe semimbotar rumo che ambogüerayevira ahe arí ipa vahe pipe. ⁴⁰ Che Ru oipota avei opacatu ava oyeroya vaherā che, Tūpa Rahir, che recosa rese. Ipipe vireco aveira tecovesa apirēhi vahe yuvireco. Supi eté ambogüerayevira arí ipa vahe pipe curi –ehi ava eta upe.

⁴¹ Evocoiyase judío eta oñehe-ñehe tēi sese yuvireco, “Che pan aico, agüeyi vahe iva sui” ihesa rese ⁴² aipo ehi:

—Co niha acoi Jesús, José rahir. Yande yaicua ité tu, ichi avei. ¿Mahera ru, “Che agüeyi vahe iva sui” ehi no? —ehi yuvireco chupe.

⁴³ Evocoiyase judío eta upe aipo ehi:

—Pepoiño che reroírosa sui. ⁴⁴ Ndipoi chietera que oicatu vahe ou cheu, nomongueréhīise che Ru che mbousar; omongueréhī vahe rumo oicatu yugüeru cheu. Ahe ambogüerayevira arí ipa vahe pipe. ⁴⁵ Tūpa ñehe mombehusar cuachiar pipe aipo ehi: ‘Tūpa pe mbohera opacatu’ ehi. Sese acoi osendu vahe che Ru ñehe, oyembohe vahe avei sese, evocoi nungar yugüerura cheu.

⁴⁶ “Ndipoi eté que ñepei ava osepia vahe che Ru; acoi ichui ou vaheño ité, ahe güeraño tupri ité osepia. ⁴⁷ Supi eté aipo ahe pēu: acoi che reroya vahe vireco tecovesa apirēhi. ⁴⁸ Che pan nungar aico amondo vahe tecovesa. ⁴⁹ Aracahe pe ramoi eta niha yuvirohu ité tembihu maná serer vahe ivi iporupirēhisa rupi. Ahe rumo opa iriño ité omano yuvireco. ⁵⁰ Che rumo añahe pan iva sui ogüeyi vahe rese, acoi ava ohu vahe, nomanoi chietera. ⁵¹ Ahe pan oicove vahe niha che aico iva sui ogüeyi vahe; acoi ohu vahe co pan, oicovera apirēhi vaherā ité. Co pan amondo vaherā, ahe che rete ité. Ahe amondora ava recocuer rese” ehi judío eta upe.

⁵² Aipo hese, judío rerecuar oyecopi-copi yuvireco aipo ehi:

—¿Mara ehira vo aipo co imbou tēi güete yande tohu viña?
—ehi yuvireco.

⁵³ —Supi eté aipo ahe pēu: ndapehuise Ava Riquehir rete, ndapeihuise avei suvi, ndaperecoi chietera tecovesa. ⁵⁴ Acoi ohu vahe che rete, oihu vahe avei che ruvi, vireco tecovesa apirēhi iyavei che ambogüerayevira arí ipa vahe pipe. ⁵⁵ Esepia, che rete supi eté vahe tembihu; che ruvi supi eté vahe avei igua. ⁵⁶ Acoi ohu vahe che rete, oihu vahe avei che ruvi, secoi che rese, che avei aico sese. ⁵⁷ Che Ru, che mbousar, vireco tecovesa. Ichui che aicove; ëgüe ehi aveira che husar che sui yuvirecovera. ⁵⁸ Añahe pan iva sui ogüeyi vahe rese. Co pan ndahei maná pe ramoi eta yuvirohu vahe nungar. Esepia, yande ramoi opaño ité omano yuvireco. Acoi

ohu vahe rumo co che rete, oicovera apirēhi vaherā ité —ehi ava eta upe.

⁵⁹ Jesúsporombohe co mbahe rese judío ñemonuhasave tecua Capernaum ve.

Ñehesa tecove apirēhisa resendar

⁶⁰ Osenduse co yembohesa, setá Jesúspuri oguata vahe aipo ehi oyeyupe yuvireco:

—Aipo semimombehu yavai eté seroya ãgua; ¿ava vo viroya tēira viña? —ehi yuvireco.

⁶¹ Jesúspumo oicua voi eté iñehe-ñehe tēise co mbahe rese yuvireco, evocoiyase oporandu:

—¿Pemboasiño tie che ñehe? ⁶² ¿Mara peyera pīha che repiase peye che, Ava Riquehir, ayeupise che reco agüerve vicho viña?

⁶³ Espíritu ité niha omundo tecovesa; yande retecuer rumo ēgue ehi tēi vahe. Co amombehu vahe pēu ahe espíritu iyavei tecovesa. ⁶⁴ Oime viñe rumo amove pe pāhuve ndache reroyai vahe —ehi ava rehii upe.

Esepia, Jesúspumo oicua ité yipisuive uma ndovíroyai chira, oicua avei uma ava omondora yamotarēhimbar upe ⁶⁵ aipo ehi:

—Sese niha acoi aipo ahe pēu: “Ndipoi chietera que ava ou vaherā cheu che Ru nomonguerēhiise imbou” ahe —ehi.

⁶⁶ Ichuive tupri Jesúspuri oguata vahe setá oseya yuvireco; ndoguata iri eté yuvireco supi. ⁶⁷ Evocoiyase oporandu doce tupri vahe güemimbohe upe:

—¿Pe avei vo che reyapa pota peye? —ehi.

⁶⁸ Simón Pedro rumo omboyeví chupe:

—Che Yar, ¿ava upe vo oroso irira? Nde güeraño ité niha erereco ñehesa tecovesa apirēhi vahe. ⁶⁹ Ore nde reroyasar ité oroico iyavei oroicua nde ndaseco marai vahe, Tūpa supi eté vahe remimbou ereico —ehi Pedro chupe.

⁷⁰ —Che niha opoporavo doce peico vahe, ñepei rumo pe pāhu pendar caruguar ité —ehi Simón upe.

⁷¹ Jesúsponehe Simón Iscariote rahir, Judas, rese. Yepe doce semimbohe pāhu pendar viña, ahe rumo omondora ava yamotarēhimbar upe.

7

Jesúspumo ndovíroyai tivri yuvireco

¹ Ipare Jesúspuri oguata ivi Galilea rupi. Ndoico potai eté ivi Judea rese. Esepia, aheve ava judío eta oseca ité ‘yayuca’ oya yuvireco. ²⁻³ Virovise judío pieta guasu teyupa apo ãgua yuvireco, ahese tivri aipo ehi yuvireco chupe:

—Erepita eme cohabe. Eso ivi Judea ve; ahe pendar nde rupi oguata vahe avei tosepia poromondiisa nde rembiapo

yuvireco. ⁴ Esepiá, acoi oyapo pota vahe mbahe, noñomi eté mbahe güembiapo. Nde ereyapo ité mbahe poromondiisa. Sese iya eremboyecua opacatu ava upe —ehi tivrí yuvireco chupe.

⁵ Seroyaëhisave tēi avei tivrí aipo ehi yuvireco chupe.
⁶ Evocoiyase vivri upe aipo ehi:

—Ndehi vitéi rumo ari che so áqua. Pe guata áqua rumo opacatu ariño tēi aviyé. ⁷ Esepiá, pe ndape amotarëhi eté ava co ivi pipendar; che rumo che amotarëhi ité yuvireco. Esepiá, che amboyecua ité mbahe sembiapo naporai vahe chupe. ⁸ Pesoño pe pietá repia; che rumo ndaso vitéi chira. Esepiá, ndosupiti vitéi ari cheundar —ehi vivri upe.

⁹ Evocoiyase Jesús opitaño Galilea ve.

Jesús oso omu judío eta pietasave

¹⁰ Vivireta so pare, Jesús avei oso pietasave. Ndoyemboyecuai eté rumo ava upe. ¹¹ Judío eta oseca tēi yuvireco pietasave aipo ehi:

—¿Que pña acoi mbia? —ehi tēi yuvireco.

¹² Ava rehii pähuve setá iteanga oñehe yuvireco sese. Amove aipo ehi yuvireco: “Ahe mbia aviyé vahe”; ambuae rumo aipo ehi: “Ndahei aviyé vahe; ahe rumo ombopa tēi vahe ava” ehi yuvireco.

¹³ Nomboyecuai eté rumo oñehe yuvireco sese güerecuar sui osiquiyepave.

¹⁴ Pieta mbiterse, Jesús aviyeteramo tēi oique ava pähuve tūparo pipe ava mbohe. ¹⁵ Judío eta rerecuar evocoiyase,

—¡Too, mara ehi rutei! —ehi tēi—. ¿Mara ehi vo co mbahecua iteanga? ¡Ndoyembohei vahe niha yande yeroquisave! —ehi tēi yuvireco.

¹⁶ Judío rerecuar upe rumo aipo ehi:

—Che porombohesa ndahei cheyesuindar tēi, ahe rumo che mbousar suindar —ehi—. ¹⁷ Que ñepei pe pähu pendar oyapo potase Túpa remimbotar, oicuara che porombohesa ndahei vahe che suindar, ahe Túpa suindar ité. ¹⁸ Esepiá, acoi ava oñehe vahe oyesui tēi, ahe ‘tache mboetei ava yuvireco’ ohesave tēi ëgue ehi. Co ava rumo “tomboetei che mbousar” ehi vahe, ahe supi eté vahe; ndipoi eté porombopasa iporombohesa pipe.

¹⁹ “Moisés niha omondo tēi mborocuaita pēu. Que ñepei pe pähu pendar rumo ndipoi eté ombooyeroya vahe. ¿Mahera ru che yuca pota peye?” ehi.

²⁰ —¡Nde erereco caruguar ndeyese! ¿Ava vo nde yuca pota? —ehiño ava eta yuvireco chupe.

²¹ Aipo ehi ava upe:

—Cuese acoi ayapose mbahe mbituhusa ari pipe, ahese, “¡Too, mahera ēgue ehi!” peyeño acoi cheu. ²² Pe avei rumo amove peporavíqui mbituhusa ari pipe peporombocircuncidase porocuaita Moisés omondo vahe reroyasave. (Ahe circuncisión rumo ndahei Moisés suindar, ahe rumo yipive vahe pe ramoi suindar ité.) ²³ Oyepotase rumo chihivahe mbocircuncida água mbituhusa ari pipe tupri pēu, peyapoño rane ité mborocuaita mboaviye água. ¿Mahera ru cheuño pemboasi ñepei mbia mbituhusa ari pipe ambogüera tupri vahe rese? ²⁴ “Oyavi evoco” peye voi rene catu ava upe; peicua tupri rane ‘¿supi eté pīha?’ pe yapave —ehi Jesús ava eta upe.

Jesús oñeho güecocuer Tūpa suindar rese

²⁵ Evocoiyase amove Jerusalén pendar mbia aipo ehi oyeyupe yuvireco:

—¿Ndahei vo acoi co oseca tēi yuca água yuvireco? —ehi— ²⁶ Ahe ité co niha co ava pāhuve oñeho oico, ndipoi eté que mara ehi vahe yuvireco chupe. ¿Omoha pīha mbororecuar co mbia Poropísiosar seco água yuvireco? ²⁷ Yande rumo yaicua que sui turi. Acoi ouse rumo Poropísiosar ité coiye, ndipoi chietera que ava oicua vahe iyusa —ehi yuvireco.

²⁸ Evocoiyase aipo renduse oporombohe viteseve tūparove, oñeho pīrata aipo ehi:

—¡Pe niha aipo, “Oroicua vahe” peye; “Oroicua avei iyusa” peye cheu! Ndayui rumo che remimbotar sui tēi. Oime rumo che mbousar, ahe seroyapri ité. Ahe pe ndapeicuai vahe. ²⁹ Che rumo aicua ité. Esepia, che ichui ayu iyavei ahe ité che mbou pēu —ehi.

³⁰ Aipo ihese, oipisi pota yuvireco soquenda água viña. Aní eté rumo. Esepia, ndoyepota vitei ihari chupe. ³¹ Setá iteanga rumo ava viroya iyavei aipo ehi yuvireco:

—Ouse Poropísiosar, ¿oyapo catura pīha mbahe poromondiisa co mbia sui? —ehi yuvireco.

Fariseo oyocuai sundao tūparo rārosareta Jesús pisi água

³² Fariseo eta osendu ava ñehesa Jesús resendar yuvireco. Ahe ité iyavei pahi eta rerecuar omondo sundao tūparo rārosar Jesús pisi água yuvireco. ³³ Jesús rumo aipo ehi:

—Aicove vitemira pe rese chihirupive. Ipare voi ayevira che mbousar piri vicho —ehi—. ³⁴ Che reca tēira peye, ndapeicatui chietera rumo che reca. Esepia, ndapeicatui chiaveira peso vaherā che recosave —ehi ava eta upe.

³⁵ Evocoiyase judío oporandu-randu oyeupe yuvireco:

—¿Que pīha aipo osora yande sui seca iriēhi água? ¿Osora tie que amombri yande mu oñemosai vahe pāhu rupi ambuae

ava ndahei vahe yande mu mbohe ãgua? ³⁶ ¿Mara oya pïha evocoiyase aipo, ‘Che reca tẽira peye, ndapeicatui chietera rumo che reca. Esepio, ndapeicatui chiaveira peso vaherã che recosave’ ehi yandeu? —ehi-ehi tẽi oyeupe yuvireco.

Espíritu iai ndopai vahe nungar

³⁷ Pieta ipa, ahe imboeteisa catu vahe, ahe arí pipe Jesús oñehe pírata ohã aipo ehi:

—Acoi que ava ihusei vahe, toyugüeru cheu. Che evocoiyase tamboihu —ehi—. ³⁸ Esepio, inungar aipo ehi vahe icuachiapri pipe, che reroyasar piha sui osëra iai ndopai vahe nungar —ehi.

³⁹ ‘Che reroyasar oipisira Espíritu curi’ ohesave aipo ehi. Espíritu rumo ndou vîtei ahese. Esepio, Jesús ahese ndoyevi vitei avei güecosa porañetesave.

Ava rehii oyemboyaho Jesús recocuer sui yuvireco

⁴⁰ Osenduse ava rehii aipo nungar, amove aipo ehi:

—Supi eté co mbia Tûpa ñehe mombehusar imombehupri ou vahe —ehi yuvireco chupe.

⁴¹ Ambuae aipo ehi:

—Co Poropísiosar ité —ehi yuvireco.

Ambuae rumo aipo ehi yuvireco:

—¿Mahera aipo Galilea sui tẽi oura Poropísiosar viña? —ehi—. ⁴² Icuachiapri pipe rumo aipo ehi Poropísiosar oyesura mborerecuar guasu David sui iyavei ahera Belén pendar, David recua pendar itera —ehi.

⁴³ Evocoiyase ava oyemboyaho-yaho yuvireco Jesús recocuer sui tẽi. ⁴⁴ Amove ava viraso pota tẽi yuvireco soquenda; ndipoi eté rumo ëgue ehi vahe yuvireco chupe.

Judío rerecuar ndoviroyai Jesús yuvireco

⁴⁵ Sundao tûparo rârosar oyevi yuvireco Jesús recosa sui. Fariseo eta iyavei pahi eta rerecuar evocoiyase oporandu yuvireco chupe aipo ehi:

—¿Mahera vo ndaperui! —ehi yuvireco chupe.

⁴⁶ Sundao tûparo rârosar evocoiyase aipo ehi:

—¡Ndipoi eté que ava oñehe vahe ahe mbia nungar! —ehiño yuvireco.

⁴⁷ Fariseo eta iyavei mborerecuareta evocoiyase aipo ehi yuvireco:

—¿Pe avei eté rumo peyembopa uca chupe? —ehi—.

⁴⁸ Ndipoi eté niha ore mboetasa mborerecuar iyavei fariseo viroya vahe yuvireco. ⁴⁹ Co ava rehii tẽi ëgue ehi yuvireco. Ahe rumo ndoicuai vahe Tûpa porocuaita yuvireco, sese iñemoirosavrive ité yuvirecoi —ehi sundao tûparo rârosar upe yuvireco.

⁵⁰ Evocoiyase Nicodemo, acoi oso vahe pītu pipe Jesús pīri, ahe avei eté fariseo pāhuve secoi, ahe aipo ehi:

⁵¹ —Yandeundar porocuaita mboaviye ãgua ndiyai, “Ereyavi mbahe” yahe voiño tēi que ava mbahe sembiapocuaēhi vīteseve —ehi.

⁵² Evocoiyase omboyevi yuvireco:

—¿Nde avei tie ereico Galilea pendar? Eyembohe tupri icuachiapri pipe. Ipīpe eresepiara ndipoi eté que ñepei ou vahe Galilea sui Tūpa ñehe mombehusar —ehi mborerecuareta Nicodemo upe yuvireco.

Cuña oyemboaguasa tēi vahe resendar

⁵³ Ipare opa yuviraso ñepei-peí güëta rupi.

8

¹ Jesús rumo oso ivitri Olivo ve. ² Ahere ayihive cōhese, oyevi tūparove. Ahese opacatu ava oyemboya yuvireco sese. Ahe evocoiyase oguapi oñ oporombohe.

³ Evocoiyase Moisés porocuaita rese oporombohe vahe, fariseo eta avei güeru Jesús upe cuña oyemboaguasa tēi vahe yuvireco ava rehii rovai, ⁴ aipo ehi yuvireco chupe:

—Porombohesar, co cuña iyemboaguasase cuimbahe rese osesapiha ñepei ava. ⁵ Moisés porocuaita rumo ore cuai co nungar cuña yuca ãgua ita pipe. ¿Mara ere vo catu nde co nungar upe? —ehi fariseo eta yuvireco chupe.

⁶ Ahe rumo secoâhasave tēi aipo ehi yuvireco ‘toyaví angahu oñehe yandeu’ oya tēi. Ahe rumo oyaívi, ombahecuachía ocuã pipe ivi rese. ⁷ Evocoiyase oporandu vītese ava yuvireco, opúha aipo ehi:

—Que ñepei pe pāhu pendar ndoyemboangaipai vahe, ahe rane toyapi ita pipe —ehi.

⁸ Oyaívi iri, ombahecuachía ivi rese. ⁹ Osenduse rumo judío rerecuareta, omboipi ñepei-peí yuvinose yuvireco, cuacula catu vahe sui rane yuvinose. Opacatu yuvinosepase, Jesús güerañomi cuña rese opita yuvireco. ¹⁰ Evocoiyase opúhase, ahese aipo ehi chupe:

—Cuña, ¿que que ru ava? ¿Ndipoi eté que ñepei opita vahe nde mocañi ãgua? —ehi

¹¹ —Aní eté, che Yar, ndipoi eté —ehi.

Evocoiyase aipo ehi chupe:

—Che avei ndoromocañi tēi potai. Sese cūritei eso, ereyapo iri eme angaipa —ehi cuña upe.

Jesús tesapesa ava upe secoi

¹² Jesús oñehe iri ava eta upe aipo ehi:

—Che aico tesapesa ava eta upe. Acoi che rupi secoi vahe virecora tesapesa omondo vahe tecovesa apirēhi vahe iyavei

ndaseco iri chietera pítumimbisa nungar mbahe-mbahe tēi vahe pipe –ehi.

¹³ Evocoiyase fariseo eta aipo ehi yuvireco:

—Nde ereñehe ndeyese ae tēi. Sese nde ñehesa ndaseroy-aprii eté –ehi yuvireco chupe.

¹⁴ —Che ñehe rumo supi vahe ité. Yepe cheyese ae añahe viña, che rumo aicua que sui ayu, que asora no. Pe rumo ndapeicuai eté. ¹⁵ Pe peseca ava rembiapo cua tupri ãgua ava tēi pihañemoñeta rupi. Che rumo ndayui evoco nungar mbahe apo. ¹⁶ Asecase ava rembiapo cua tupri ãgua, ahe supi tupri vahe ité. Esepia, ndahei che ae tēi ëgue ahe, che Ru, che mbousar rumo secoi che rese. ¹⁷ Porocuaita pēu icuachiapri pipe aipo ehi: “Que oimese ñuvirío ava oyoya tupri omombehu vahe mbahe, ahese voi seroyasara” ehi. ¹⁸ Supi eté che ae ité niha añahe cheyese viña, che Ru, che mbousar, reseve rumo oyoya tupri oroñeho –ehi.

¹⁹ Aipo ihese, oporandu yuvireco chupe:

—¿Que vo aipo nde Ru? –ehi yuvireco.

—Pe ndache cuai eté peye, che Ru avei ndapeicuai. Che cuase rumo peye viña, che Ru avei peicuara viña –ehi fariseo eta upe.

²⁰ Jesús aipo ehi tūparo pipe, guarepochi monuhapri ríru ipive oporombohe ohā. Ndipoi eté rumo ahese osoquenda vaherā. Esepia, ndoyepota vitei eté ahese ihari chupe.

Jesús, “Che sosave pe ndapeicatui chira peso” ehi

²¹ Jesús aipo ehi iri:

—Che asose, che reca tēira peye. Pe rumo opara pemano pe angaipa reseve. Che sosave ndapeicatui chietera peso vaherā –ehi.

²² Aipo ihese, judío eta aipo ehi yuvireco:

—¿Oyeyucara pīha ahe ae; ayeve pīha aipo ehi yandeu? —ehiño yuvireco chupe.

²³ —Pe rumo ivi pendar peico; che rumo ivatendar ité aico. Iyavei pe co ivi pipendar tēi avei peico; che rumo ndahei eté co ivi pipendar aico. ²⁴ Sese niha acoi aipo ahe pēu: “Pemanopaoño itera pe angaipa reseve” ahe. Esepia, ndache reroyaise peye, pe angaipa reseve ité pemanoñora –ehi fariseo eta upe.

²⁵ Aipo ihese,

—¿Ava ité vo nde ereico? —ehiño yuvireco chupe.

—Yipisuive niha acoi amombehu vichico pēu. ²⁶ Setá iteanga areco che ñehe ãgua pēu mbahe pe rembiavi rese. Che mbousar niha supi eté vahe. Ahe iñehe asendu vahe, amombehu opacatu ava upe –ehi fariseo eta upe.

²⁷ Ahe rumo ndosenducuai eté Vu rese iñehese yuvireco.
²⁸ Sese aipo ehi fariseo upe:

—Pesupise rumo Ava Riquehir ivira rese, ahese voi peicuara che recocuer, ahese avei peicuara cheyesui tēi mbahe ndayapoise; che rumo amombehu che Ru che mbohesa güeraño. ²⁹ Che mbousar niha che rupive ité secoi; ndache reyai eté. Esepia, ayapoño ité mbahe semimbotar yepi —ehi ava eta upe.

³⁰ Aipo ihese, setá iteanga ava viroya yuvireco.

Ava Tūpa rahir ité yuvirecoi vahe iyavei ava angaipa pipe tēi yuvirecoi vahe

³¹ Evocoiyase Jesús aipo ehi judío eta viroyasar upe:

—Peico tuprise che ñehe rupi, peicora che remimbohe supi eté vahe. ³² Peicua aveira mbahe supi eté vahe. Ahe evocoiyase pe renosera mbiguai nungar pe recosa sui —ehi.

³³ Judío evocoiyase aipo ehi:

—Ore rumo Abraham suindar ité oroico, ndoroicoi vahe ité que ava rembiguai tēi. ¿Mahera ru aipo nde, “Pesēra mbiguai nungar pe recosa sui” ere oreu? —ehiño judío eta yuvireco chupe.

³⁴ Evocoiyase aipo ehi:

—Supi eté aipo ahe pēu: acoi opacatu ava oyemboangaipa vahe, inungar mbiguai tēi, ëgue ehi oangaipa rereco yuvireco.

³⁵ Mbiguai tēi ndahei güerecuar rēta pipe nara ité; tahir rumo opitaño itera güëta pipe nara. ³⁶ Sese Tahir pe renosese mbiguai tēi pe recosa sui, supi eté ndapeico iri mbiguai nungar. ³⁷ Aicua niha Abraham suindar pe recosa. Pe rumo che yuca potaño peye. Esepia, ndaperoyai eté che ñehe. ³⁸ Che niha amombehu che Ru mbahe omboyecua vahe cheu, pe avei peyapo mbahe pe yesupa remimombehu —ehi judío eta upe.

³⁹ —¡Ore yesupa rumo Abraham! —ehi judío eta yuvireco chupe.

—Abraham suindar ité peicose, peyapora mbahe sembiapo nungar viña. ⁴⁰ Che rumo, “Tūpa che mbohe mbahe supi eté vahe rese” ahe tēi pēu. Pe evocoiyase che yuca potaño ité peye. ¡Abraham rumo ndoyapoi eté co nungar mbahe! ⁴¹ Esepia, pe peyapo mbahe peyesupa rembiapo tēi eté —ehi.

Evocoiyase ava aipo ehi yuvireco:

—¡Ndahei rumo ore oyesu tēi vahe oroico; ore rumo orovireco ñepeiño ité ore yesupa, ahe Tūpa! —ehiño yuvireco.

⁴² Evocoiyase aipo ehi co judío eta upe:

—Tūpa ité pe yesupase rumo, che raisura peye viña. Esepia, che ayu Tūpa sui. Sese cûritei cohabe aico. Ndahei cheyesui tēi ayu, Tūpa rumo che mbou. ⁴³ ¿Mahera pīha ndapesenducua

catui eté mbahe che remimombehu? Esepio, ndapeyapisaca potai eté che ñehe rese. ⁴⁴ Peyesupa niha Caruguar ité, sese niha pe ahe tupri avei peico. Peyapo pota mbahe semimbotar tēi. Esepio, Caruguar yipisuive ité oporoyuca serai vahe. Ndoyapoi vahe ité mbahe supi tupri vahe, noñehei avei mbahe supi eté vahe rese. Semirasa iñehe ité. Esepio, semirañete ai vahe ité; ahe ité niha yipindar semira tēi vahe. ⁴⁵ Che rumo añehese mbahe supi tupri vahe rese, ndache reroyai eté peye. ⁴⁶ ¿Ava pīha pe pāhu pendar oicua mbahe che rembiavi? ¡Aní eté! Che añeha mbahe supi eté vahe rese pēu, ¿mahera ru evocoiyase ndache reroyai eté peye? ⁴⁷ Acoi ava Tūpa suindar, ahe osendu pota rai iñehe; pe rumo ndahei eté Tūpa suindar peico. Sese ndapesendu potai eté iñehe —ehi Jesús judío eta upe.

Porop̄isirosar yipive catu vahe Abraham sui

⁴⁸ Evocoiyase judío eta aipo ehi Jesús upe yuvireco:

—Supi eté, ore oroicua nde Samaria iguar tēi ereico, caruguar ité erereco ndeyese —ehi yuvireco chupe.

⁴⁹ —Che ndarecoi eté caruguar cheyese. Che rumo che Ru amboetei; pe rumo ndache mboetei eté peye. ⁵⁰ Iyavei che ndasecai ava che mboetei água. Oime rumo ñepei oipota vahe. Ahe niha omondora ava rembiapo reprí chupe. ⁵¹ Supi eté aipo ahe pēu: acoi omboyeroya vahe che ñehe, nomanoi chietera yuvireco —ehi judío eta upe.

⁵² Evocoiyase judío omboyevi yuvireco chupe aipo ehi:

—Cûritei oroicua ité cute nde ererecose caruguar ndeyese. Esepio, Abraham iyavei opacatu Tūpa ñehe mombehusar omanopa ité yuvireco. ¿Mahera ru aipo nde, ‘Acoi che ñehe reroyasar nomanoi chietera’ ere? ⁵³ ¿Nde tie ivate catu ereico ore ramoi Abraham sui? Esepio, ahe omano ité iyavei ambuae Tūpa ñehe mombehusar omanopa ité yuvireco. ¡Mbahe angahu vo co evocoiyase eremoha ndeyese! —ehi yuvireco chupe.

⁵⁴ —Che ae tēi ayemboeteise mbahe che rembiapo pipe, ahese ndahei chira supi vahe viña. Che Ru rumo che mboetei, chupe ité: “Ore Tūpa” peye. ⁵⁵ Pe rumo ndapeicuai eté. Che rumo aicua. “Ndaicuai” ahese, evocoiyase semirañete ai vahe aicora viña inungar pe peico. Che rumo supi eté aicua. Sese niha amboyeroya iñehe. ⁵⁶ Esepio, pe ramoi Abraham oyemboviha ‘asepiara ihari oyepotase’ oya cheu. Osepia ité niha. Sese oviharete ité —ehi judío eta upe.

⁵⁷ Evocoiyase judío eta:

—¿Mara erera vo aipo Abraham repia ndererecomi viteise cincuenta aravíter? —ehiño yuvireco chupe.

⁵⁸ —Supi eté aipo ahe pēu: che aicove vahe Abraham yesuēhi viteseve —ehi.

⁵⁹ Aipo ihese, oipisipa ita yuvireco yapi āgua. Ahe rumo ahe ramoseve oñemi ava eta pāhuve, osēño ité oso tūparo sui.

9

Jesús ombogüera mbia ohasa suive ndasesapisoī vahe

¹ Jesúś oguatase ocar rupi, osepia mbia ohasa suive ndasesapisoī vahe. ² Ore semimbohe oroico vahe, oroporandu chupe:

—Ore mbohesar, ¿mahera pīha co mbia ndasesapisoī eté oha? ¿Oyesupa angaipa sui pīha? ¿Oangaipa sui ae tie? —orohe chupe.

³ —Ndahei eté oangaipa sui, ndahei avei oyesupa angaipa sui; co rumo ēgue ehi Tūpa mbahe sese mboyecua āgua. ⁴ Sese oime vitese ari yandeu che mbousar poravíquisa apo āgua, iya ité ahe yayapo. Esepio, pītura, ahese ndayaicatui chietera mbahe apo. ⁵ Co ivi pipe che recove vitese rumo, che aico ava upe tesapesa nungar —ehi oreu.

⁶ Aipo ohe pare, ondīvi ivive, güendi pipe omoaquī vahe ivi omundo ndasesapisoī vahe resa rese. ⁷ Ipare aipo ehi chupe:

—Eso, tereyovai igua Siloé serer vahe pipe —ehi (ahe serer ‘imondopri’ oya aipo ehi).

Ndasesapisoī vahe evocoiyase oso, oyovai. Oyevise ichui, omahe tuprī ité. ⁸ Evocoiyase sēta ivirindar iyavei ava oicua vahe sesapisoēhise oporanduse guareepochi rese aipo ehi yuvireco:

—¿Ndahei vo acoi co oguapi oī guareepochi rese oporandu yepi? —ehi yuvireco.

⁹ Amove ambuae ava aipo ehi:

—Taa, ahe ité —ehi.

Ambuae rumo aipo ehi yuvireco:

—Ndahei ahe. Avīye tuprī ité rumo ahe —ehi.

Ahe mbia rumo aipo ehi:

—Taa, che ité niha ahe aico —ehi.

¹⁰ Evocoiyase oporandu yuvireco chupe:

—¿Mara ere vo co esareco? —ehi.

¹¹ —Acoi mbia, Jesúś serer vahe, ahe omoaquīmi güendi pipe ivi, oipichi che resa rese aipo ehi cheu: ‘Eso igua Siloé ve, eyovai’ ehi. Evocoiyase aso, ayovaise, ahese amahe tuprī ité —ehi.

¹² —¿Que vo ahe mbia? —ehi yuvireco chupe.

—Ndaicuai, ¿que vo catu? —ehiño ava güēta cotindar uve.

Fariseo oporandu ndasesapisoī vahe cuera agüer rese yuvireco

¹³⁻¹⁴ Mbituhusa ari pipe aipo Jesús omoaquimi güendi pipe ivi ndasesapiso vahe mbogüera água. Sese vîraso ndasesapiso vahecuer fariseo eta rovai yuvireco. ¹⁵ Fariseo oporandu iri yuvireco co mbia upe: “¿Mara ere ité vo co esareco?” ehi. Ahe mbia aipo ehi:

—Omondo ivi güendi pipe omoaqi vahe che resa rese. Ichui ayovai. Ipare voi asareco —ehi.

¹⁶ Evocoiyase ambuae aipo ehi yuvireco chupe:

—Aipo mbia ndahei eté revo Tûpa suindar. Esepia niha, nomboetei eté mbituhusa ari —ehi yuvireco.

Ambuae evocoiyase aipo ehi yuvireco:

—¿Mara ehira aipo poromondisa apo ava yangaipa vahe viña? —ehiño yuvireco.

Oyeavirati tēi ipihañemoñetasa. ¹⁷ Sese oporandu iri ndasesapiso vahecuer upe yuvireco aipo ehi:

—Nde no, ¿mara ehi nde pihañemoñeta co mbia rese? —ehi.

Ahe evocoiyase aipo ehi:

—Che amoha ité Tûpa ñehe mombehusar secose —ehi.

¹⁸ Ahe fariseo rumo ndoviroyai eté icuerasa yuvireco, oichocho uca rane ité iyesupa yuvireco. ¹⁹ Chupe oporandu aipo ehi:

—¿Pe rahir ité vo co? ¿Ndasesapiso oha? ¿Mara ehi vo co cûritei osareco no? —ehi iyesupa upe yuvireco.

²⁰ —Ore rahir ité niha co, ndasesapiso oha. ²¹ ¿Mara ehi vo catu co cûritei osareco? iyavei ¿ava vo catu ombogüera? ¡Ndoroicuai eté! Peoporandu chupe. Ocuacua niha; ahe ae oicua ucara pêu —ehiño iyesupa yuvireco fariseo upe.

²² Iyesupa rumo osiquiyepave tēi aipo ehiño yuvireco. Esepia, fariseo opa ité oyemoingatu yuvireco ava “Jesús Poropísírosar secoi” ehi vahe oñemonuhasa sui ñepei reseve imombo água. ²³ Sese niha iyesupa aipo ehiño yuvireco: “Peoporandu chupe. Ocuacua niha” ehiño.

²⁴ Evocoiyase fariseo güeru uca iri acoi mbia imbogüerapri yuvireco, aipo ehi yuvireco chupe:

—Emombehuño oreu Tûpa rovaque mbahe supi tupri vahe. Esepia, ore oroicua ité evocoi mbia angaipa viyar seco rese —ehi.

²⁵ Ahe evocoiyase omboyevi chupe:

—Che ndaicuai eté angaipa viyar tie revo. Co güeraño catu che aicua: che ndacheresapiso vahecuer aico; cûritei rumo asareco —ehi.

²⁶ Evocoiyase oporandu iri yuvireco chupe:

—¿Mbahe vo oyapo ndeu? ¿Mara ehi vo nde mbosareco? —ehi yuvireco chupe.

²⁷ —Amombehu niha acoi pēu. Pe rumo ndache reroyai eté peye. ¿Mahera vo peipota amombehu vīte vaherā pēu? ¿Pe avei tie peguata pota supi? —ehi fariseo eta upe.

²⁸ Ahese oñeho rai tēi yuvireco chupe:

—Nde ahe mbia rupindar tēi ereico. Ore rumo yande ramoi aracahendar Moisés rupi oroguata vahe. ²⁹ Esepia, oroicua ité Tūpa oñehese Moisés upe. Aipo mbia rumo ndoroicuai eté que sui osē —ehi yuvireco chupe.

³⁰ —¡Mara peye rutei pe ndapeicuai que suindar ahe! Che rumo che mbosareco. ³¹ Supi eté, yaicua Tūpa ndosendui eté ava angaipa viyar ñehe; ava omboeteisar iyavei viroyasar ñehe güeraño ité niha osendu. ³² Esepia, ndipoi eté que avaño tēi ava oyesu sui ndasesapisoí vahe ombogüera vahe. ³³ Ahe rumo ndaheise Tūpa suindar ou vahe viña, ndoicatui chietera revo mbahe apo viña —ehi fariseo eta upe.

³⁴ Evocoiyase fariseo eta aipo ehi yuvireco chupe:

—¿Nde co oangaipa reseve oha vahe tēi, ore mbohe pota mbahe rese eve? —ehi.

Ipare omose ñepei reseve oñemonuhasa sui yuvireco.

Jesús reroyasarēhi ndasesapisoí vahe nungar tēi

³⁵ Jesú oicua ndasesapisoí vahecuer mombosa. Vupitise aipo ehi chupe:

—¿Ereyeroya nde Ava Riquehir rese? —ehi.

³⁶ Mbia evocoiyase aipo ehi chupe:

—Che mbohesar, emombehumi cheu; tayeroya catu ru sese —ehi.

³⁷ —Eremahe niha co sese; che ité ahe aico —ehi ndasesapisoí vahecuer upe.

³⁸ Evocoiyase mbia oñenopīha sovai:

—Oroviroya, che Yar —ehi chupe.

³⁹ Ichui aipo ehi:

—Che ayu co ivi pipe mbahe supi tupri vahe apo água; ava ndasesapisoí vahe nungar upe mbahe supi eté vahe che Ru suindar mboyecua água iyavei ava oicua tēi vahe mbahe Tūpa suindar mboesapisoéhi iri água —ehi.

⁴⁰ Evocoiyase ambuae fariseo eta yuvirecoi vahe cōimi ichui osenduse aipo ñehesa, oporandu yuvireco chupe:

—¿Ore avei tie ndasesapisoí vahe nungar oroico? —ehi.

⁴¹ Evocoiyase mboyeví ahe fariseo upe:

—Peicose ndasesapisoí vahe nungar viña, “Peyavi mbahe” ndehi chietera Tūpa pe angaipa rese pēu viña. Pe rumo, “Ore oroicua tupri Tūpa suindar mbahe” peye tēi. Sese Tūpa, “Peyavi mbahe” ehi eté pēu —ehi Jesú fariseo eta upe.

10

Jesús ovesa rārosar nungar

¹ “Supi eté aipo ahe pēu: acoi ava co coti rupi tēi yuviroique vahe ovesa rēta pīpe, ahe imonda rai vahe tēi yuvirecoi. ² Oique vahe rumo oquendipi rupi eté, ahe sārosar ité secoi. ³ Oquendipi rārosar omboi chupe. Evocoiyase ovesa rārosar oñehé serer rupi güeimba ovesa upe senose ãgua sēta sui. Ahe evocoiyase oicua iñehe yuvireco. ⁴ Güeimba ovesa renose pare oguata senonde; seimba ovesa evocoiyase oguata saquicuerive. Esepio, oicua ité iñehe yuvireco. ⁵ Ndoguatai eté rumo oyarëhi rupi yuvireco; yuvinoña-noñaño ichui. Esepio, ndoicuai eté iñehe” ehi ⁶ omboyoya güecocuer ovesa rārosar rese. Ava rumo ndosenducuai eté yuvireco.

Jesús ava rārosar avíye vahe

⁷ Evocoiyase Jesús aipo ehi iri: “Supi eté, aipo ahe pēu: che año ité oquendipi nungar aico ovesa upe. ⁸ Opacatu ava yugüeru vahe che renonde, imonda rai vahe nungar tēi yuvirecoi. Ava cheundar rumo ndoviroyai eté yuvireco. ⁹ Che rumo oquenda nungar aico. Acoi oique vahe che rupi, ahera ipísíropirā yuvirecoi. Iyavei inungar acoi ovesa oique vahe güëta pīpe, ichui osë capihi reca ãgua igua yepi, eëgue ehira che reroyasar yuvireco.

¹⁰ “Imonda rai vahe rumo omonda ãgua tēi ou, oporoyuca ãgua, mbahe moçañi ãgua tēi avei. Che rumo ayu ‘tovíreco ava tecovesa ndopai vaherā ité yuvíreco’ viya. ¹¹ Che ité ava rārosar avíye vahe aico. Sese ayemoingatu tupri che recocuer mondo ãgua ava cheundar repirā; ¹² acoi guarepochi repirā tēi oporavíqui vahe rumo, osepiase mahembiar oñaro ai vahe, oseyapaño güemiaro, oña oso. Esepio niha, ovesa ndahei eté seimba, ndahei avei eté ahe sārosar ité secoi. Evocoiyase mahembiar oñaro ai vahe omondi-mondii eté ipisi ãgua. ¹³ Evocoimbia oñaño. Esepio, guarepochi repirā tēi oporavíqui. Sese niha ndosasísui eté güemiaro ovesa.

¹⁴⁻¹⁵ “Che rumo ava rārosar avíye vahe ité aico; che Ru che cua ité. Che evocoiyase aicua avei che Ru. Sese che avei aicua che reimba ovesa eta. Ahe avei che cua yuvíreco. Che niha amondo che recocuer sepírā yuvíreco. ¹⁶ Areco avei ambuae ité che reimba ovesa. Ahe avei aru pota che mboyeroya vaherā yuvíreco. Ahese ñepei reseve guasu che remiaro yuvírecoira.

¹⁷ “Che Ru niha che raiṣu ité. Esepio, amondo itera che recocuer manosave. Ipare rumo acuerayevira. ¹⁸ Ndoicatui chira ava ahe ae tēi che yuca ãgua; che teiteté rumo amondora che récocuer che remimbotar rupi eté. Che areco ité píratasa

imondo ãgua, che cuerayevi iri ãgua avei. Sese ité niha che Ru che cuai" ehi güemimbohe eta upe.

¹⁹ Osenduse judío eta aipo nungar ñehesa, opa ipihañemoñeta yoavirati yuvireco. ²⁰ Setá iteanga ipāhu pendar aipo ehi:

—¿Mahera vo co pemboyeroya? Vireco ité caruguar oyese, ndayaracuai eté —ehi yuvireco chupe.

²¹ Ambuae rumo aipo ehi yuvireco:

—Ndipoi eté rumo que ava na ehi vahe oñehe caruguar rerecosar. ¿Omboesapiso tie caruguar rerecosar ava? —ehi amove judío yuvireco Jesús upe.

Judío rerecuar ndoyambotai Jesús yuvireco

²² Ari sôhisa vahe pipe tecua Jerusalén ve tûparo rovasagüer pieta oyepota. ²³ Ahese Jesús oguata oico tûparo Salomón oyapo vahecuer rocupe ivii rupi. ²⁴ Evocoiyase judío rerecuarea oyere tupri yuvireco sese aipo ehi yuvireco chupe:

—¿Marase rutei vo eremombehu tuprira Poropísiosar nde recosa oreu? Emombehu tupri catu ñepei reseve oreu —ehi yuvireco chupe.

²⁵ —Amombehu niha acoi pëu, ndache reroyai eté rumo peye. Mbahe ayapo vahe che Ru mborerecuasa pipe omboyecua ité Poropísiosar che recosa; ²⁶ pe rumo ndache reroyai eté peye. Esepia, pe ndahei eté che remiaro ovesa peico. ²⁷ Che remiaro ovesa rumo oicua che ñehe. Che avei aicua ahe yuvireco. Ahe evocoiyase che rupi oguata yuvireco. ²⁸ Amondo avei tecovesa apiréhi yuvireco chupe icañíehi ãgua; ndipoi chietera que ava virocua iri vaherä che sui. ²⁹ Che Ru niha ombou cheu. Esepia, ahe ipírata catu opacatu ava sui. Ndipoi chietera que ñepei ava oicatu vahe serocua che Ru sui. ³⁰ Che Ru iyavei che oroico ñepeiño ité —ehi judío rerecuarea upe.

³¹ Aipo ihese, judío rerecuarea osupipa iri ita yuvireco yapi ãgua. ³² Ahe chupe rumo aipo ehi:

—Setá mbahe poromondiisa aviye vahe pe rovaque ayapo che Ru píratasa pipe. ¿Uma che rembiapo aviye vahe sui che api-api pota peye ita pipe? —ehi judío rerecuarea upe.

³³ Judío rerecuarea omboyevi yuvireco chupe:

—Nande api-apisai chira ita pipe que mbahe nde rembiapo aviye vahe rese. Co rese rumo êgue orohera ndeu. Esepia, nde ereñeha rai têi Tûpa rese. Nde moco ava têi ereico. Nde rumo ereyeapo Tûpa ndeyeupe ae —ehi yuvireco chupe.

³⁴ Evocoiyase aipo ehi ahe ava upe:

—Pëundar mborocuaita icuachiapri pipe niha aipo ehi: 'Che aipo ahe pëu: pe tûpa pâve ité peico' ehi. ³⁵ Yaicua niha icuachiapri pipendar ndiyai yayamotaréhi. Esepia, Tûpa aipo

ehi: 'Pe tūpa pāve ité peico' ehi evocoai ava oñeho pisisar upe. ³⁶ Che niha che Ru Rembiporavo aico. Ahe che mbou co ivi pipe. ¿Mahera ru evocoiyase, 'Nde ereñehe rai tēi Tūpa rese' peye cheu, 'Che Tūpa Rahir aico' ahese pēu? ³⁷ Esepia, acoi ndayapoise mbahe che Ru remimbotar, ahese ndache reroyai chietera peye viña. ³⁸ Yepe ndache reroyai chira che recocuer rese peye viña, mbahe ayapose rumo ahe tēi peroyara. Sese tapeicua ñepei reseve che Ru secoise che rese iyavei che sese che recosa —ehi oamotarëhimbareta upe.

³⁹ Osoquenda pota iri yuvireco viña; Jesús rumo osoño ipāhu sui.

⁴⁰ Oyevi iai Jordán rovai. Aheve acoi Juan yipindar oporoäpiramo. Aheve opita. ⁴¹ Ava rehii yuviraso sepia, aipo ehi yuvireco:

—Yepe Juan ndoyapoi mbahe poromondiisa viña. Opacatu mbahe omombehu vahe rumo co mbia resendar supi eté —ehi yuvireco.

⁴² Setá iteanga ava Jesús viroya yuvireco aheve.

11

Lázaro mano agüer

¹ Oime ava imbaheasi vahe serer Lázaro, tecua Betania pendar. Güeindri Marta iyavei María reseve yuvirecoi aheve. ² Ahe María, oipiyere vahe mbahe siacua vahe yande Yar pi rese. Ipare oiquiti oha pipe. ³ Ahe seindri omundo oñeho Jesús upe yuvireco aipo ehi:

—Ore Yar, nde mboripar, nde rembiaisu, imbaheasi ou —ehi.

⁴ Ahe osenduse aipo ehi:

—Co mbaherasisa rumo ndahei ahe imano ägua ité. Ëgüe ehi rumo Tūpa reco porañetesa mboyecua ägua iyavei Tahir reco porañetesa mboyecua ägua avei —ehi.

⁵ Yepe osaisú iteanga Marta icupihir reseve iyavei iquivri Lázaro viña, ⁶ oyanduse rumo Lázaro mbaherasisa, opita viteño ité ñuvirío ari güecosave. ⁷ Ipare omombehu ore supi oroico vahe upe:

—Yayevi iri ivi Judea rupi —ehi.

⁸ Ore rumo aipo orohe chupe:

—Ore mbohesar, cuesemi tēi acoi judío rerecuareta ahe pendar nde yuca pota ita pipe yuvireco; ¿cüritei co ereso pota iri aheve? —orohe chupe.

⁹ Oreu rumo aipo ehi:

—Ñepei ari niha vireco doce hora. Supi eté acoi oguata vahe ari pipe ndoyepiapi eté. Esepia, osepia ité co ivi resapesa; ¹⁰ acoi oguata vahe rumo pítu pipe, oyepiapi eté. Esepia, ipane tesapesa chupe —ehi oreu.

¹¹ Ipare aipo ehi:

—Yande mboripar Lázaro oque tēi. Che rumo amomahera —ehi.

¹² Evocoiyase ore aipo orohe chupe:

—Ore Yar, oque tēise, ocuerara —orohe.

¹³ ‘Omano ité’ oyapave tēi aipo ehi. Ore rumo orepihañemoñeta: “Oque tēi revo” orohe chupe viña. ¹⁴ Ipare rumo omombehu tupri ité aipo ehi oreu:

—Lázaro omano ité. ¹⁵ Aviharete che ndaicoise aheve. Esenia, ēgüe ehise ité aviye catura pēu pe che reroya ãgua. Yaso ru catu sepia —ehi oreu.

¹⁶ Evocoiyase Tomás, Gemelo serosa vahe, aipo ehi ore imboetasora oroico vahe upe:

—Yaso avei ru yande yamano vaherā supi —ehi.

Jesús cuerayevisa secoi iyavei tecovesa

¹⁷⁻¹⁸ Betania namombriimi Jerusalén sui, tres kilómetro tupri. Evocoiyase ore oroyepota senise ahe tecuave, orosendu “cūritei irungatu ari opa Lázaro tīre” ehi vahe. ¹⁹ Setá judío yuviraso Marta iyavei María piri iquívri mano agüer sui imbovihā ãgua. ²⁰ Oicuase Marta Jesús yepota seni, oso voi eté sapeve; María rumo opitaño oí pipe. ²¹ Evocoiyase Marta aipo ehi voi chupe:

—Che Yar, ehi cohabe ereicose, nomanoi chietera revo ore quívri viña. ²² Che rumo aicua Tūpa omboura opacatu nde porandusa ndeu —ehi Marta chupe.

²³ —Nde quívri rumo ocuerayevi irira —ehi Marta upe.

²⁴ —Supi eté aicua niha ocuerayevira opacatu omano vahecuer reseve ari ipa vahe pipe —ehi Marta.

²⁵ —Che niha cuerayevisa aico iyavei tecovesa. Acoi ava che reroya vahe, yepe omano tēira viña, oicoveño itera rumo. ²⁶ Acoi che reroya vahe güecoveseve, nomanoi chietera. ¿Ereroya aipo che hesa? —ehi Marta upe.

²⁷ —Oroviroya ité, che Yar. Nde niha Poropísírosar ereico Tūpa Rahir, ore remiaro ereyu vaherā co ivi pipe oreu nara —ehi Marta Jesús upe.

Jesús oyaseho Lázaro ruvípa rovai

²⁸ Aipo ohe pare, Marta oso ocupiñir María reca, chupeñomi aipo ehi:

—Porombohesar oicove cohabe, “Tou” ehi ndeu —ehi chupe.

²⁹ Evocoiyase María oso voi eté sepia. ³⁰ Jesús rumo ndoique vitei eté tecua pipe; Marta rese oyoepiasave viteño ité secoi.

³¹ Osepiasse María sē poyava, judío eta sētave yuvirecoi vahe imbovihasar yuviraso voi saquicuerive, “Oquívri ruvípave revo osora oyaseho” ehi yuvireco viña.

³² Evocoiyase María oyepotase chupe, oñenopīha sovai aipo ehi:

—Che Yar, ehi revo ereicoveño itese cohave, che quivri mananoi chietera viña —ehi María chupe.

³³ Osepiase María yaseho iyavei judío eta yuviraso vahe supi, opīha pīpe oyandu ité oviharēhisa. ³⁴ Evocoiyase oportandu:

—¿Que vo peñotí? —ehi chupe.

Ahe aipo ehi yuvireco chupe:

—Ore Yar, erio, teresepia —ehi.

³⁵ Ahese Jesús oyaseho. ³⁶ Judío evocoiyase aipo ehi yuvireco:

—¡Esepias, osaisu ité! —ehi oyeupe yuvireco.

³⁷ Ambuae rumo ipāhu pendar aipo ehi yuvireco:

—Co mbia omomahe vahe acoi mbia ndasesapīsoi vahe, ¿ndoicatui chira pīha Lázaro manoēhi água mbahe apo cuese rahe viña? —ehi yuvireco.

Lázaro mbogüerayevi agüer

³⁸ Jesús oyemboya suvīpave oviharēhisa pīpe; ahe suvīpa ita hopri, sovapisa ita avei.

³⁹ —Perocua sovapisa ita ichui —ehi.

Marta, omano vahe reindri, rumo aipo ehi:

—Che Yar, iné ité revo. Esepias, opa niha irungatu ari imanore —ehi.

⁴⁰ —¿“Che reroyase eve, Tūpa pīratasa eresepiara” ndahei vo acoi ndeu? —ehi Marta upe.

⁴¹ Aipo ihe pare, virocua ita yuvireco ichui. Evocoiyase omahe iva rese aipo ehi:

—Che Ru, “Aviye ndeu” ahe ndeu. Esepias, eresendu che ñehe. ⁴² Che aicua nde eresenduño ité che ñehe yepi, che rumo aipo ahe co ava eta rembiepiave ‘toviroya avei nde che mbousa co ivi pipe yuvireco’ che yapave —ehi.

⁴³ Aipo ohe pare, oñehe pīrata aipo ehi:

—¡Lázaro, esē ei peve sui! —ehi.

⁴⁴ Omano vahe evocoiyase osē voi opacatu turucuar oma-masa reseve. Jesús evocoiyase aipo ehi ava upe:

—Peyorapa imamasa ichui, toguata —ehi.

Judío rerecuareta oyemomborandu Jesús pīsi água yuvireco

⁴⁵ Osepiase co poromondiisa, judío eta yuviraso vahe María rupi setá ité Jesús viroya yuvireco. ⁴⁶ Ipāhu pendar rumo moviro yuviraso voi ava fariseo rerecuareta uve sembiapo mombehú água. ⁴⁷ Evocoiyase fariseo rerecuareta iyavei pahi rerecuareta oñemonuha guasu yuvireco aipo ehi:

—¿Mara yahera vo sereco? Co mbia setá ité oyapo poromondiisa oico. ⁴⁸ Ndayayapoise mbahe chupe, opacatu

tiête ava viroyara yuvireco viña iyavei aviyeteramo mborerecuar Roma iguar yanduse, yugüerura yande tūparo mondurupa iyavei omocañi tēi uca aveira yande recua yande sui –ehi oyeupe yuvireco.

⁴⁹ Ñepei rumo mbia ipāhu pendar Caifás serer vahe, ahe ité pahi eta rerecuar ivate catu vahe ahe araviter pipe, aipo ehi ava upe:

—Pe ndapeicuai eté mbahe, ⁵⁰ ndapesenducuai avei co tecocuer; aviyé catura ñepei mbia omanose yande recocuer rese, ndahei que opacatu yande mocañi tēi água —ehi omboetasa eta upe.

⁵¹ Ahe rumo ndahei oyesui tēi aipo ehi; Tūpa ité aipo ombohe uca. Esepia, ahe ité mborerecuar guasu chini ahese. Sese aipo ehi: “Jesús omanora yande recocuer rese” ehi. ⁵² Iyavei ndahei chira ahe ava reseño, omanora opacatu ava Tūpa Rahir oñemosai tēi vahe ñepei reseve imonuha água. ⁵³ Égüe ehi ahe ari pipeve judío eta rerecuar oyemoingatupa voi yuca água yuvireco.

⁵⁴ Sese ndoguata iri ava judío eta pāhu rupi. Ahe rumo osē ivi Judea sui, oso ivi iporupirēhi vahe rerovicave, tecua Efraín ve. Aheve opacatu oropita supi.

⁵⁵ Virovise judío Pascua pieta apo água, setá iteanga ava ambuae tecua rupindar yuviraso tecua Jerusalén ve oyecocuer moatiro ahe pieta mboetei água renondeve. ⁵⁶ Oseca tēi Jesús yuvireco. Ipare tūparove yuviroiqueso, oporandu-randu oyeupe yuvireco:

—¿Mara peye pe, oura pīha pieta repia, aní chira tie? —ehi-ehi oyeupe yuvireco.

⁵⁷ Yipive rumo fariseo rerecuar iyavei pahi rerecuar oyocuai ava, “Pesepiase Jesús, pemombehu voi oreu ipisi água” ehi yuvireco chupe.

12

Ñepei cuña omondo Jesús rese mbahe sīacua vahe

¹ Seis ari ipane vitese Pascua pieta água, Jesús oso tecua Betania ve, aheve acoi Lázaro ombogüerayevi. ² Eipeve ocaru yuvireco Jesús mboeteisave. Marta ihañeco sese; Lázaro evocoiyase ocaru yuvínoi mesave ipiri. ³ Evocoiyase María güeru medio litro mbahe sīacua vahe nardo, sepí iteanga vahe. Omondo ipi rese. Ipare oiquití ohavaprí pipe ichui. Sīacuá iteanga evocoiyase opacatu oi pipe. ⁴ Evocoiyase ore mboetasa Judas Iscariote, ahe acoi omondo vaherā ava yamotarēhimbar uve, aipo ehi:

⁵ —¿Mahera vo ndimondosai co mbahe sīacua vahe tresciento denario rupi ava iparaísu vahe pītivii água? —ehi.

⁶ Judas rumo ndahei ava iparaisu vahe raisupave aipo ehi. Ahe rumo imonda rai vahe tēi. Setá rupi guarepochi virocua güembiporuguā tēi. ⁷ Evocoiyase Jesús aipo ehi:

—Toyapoño cheu. Esepiá, ahe che mano água renonde ëgüe ehi cheu. ⁸ Yuvirecoveño itera ava iparaisu vahe pe pāhuve yepi; che rumo ndaico pucu iri chira pe pāhuve —ehi Judas upe.

Pahi rerecuar oyamotaréhi Lázaro yuvireco

⁹ Setá iteanga ava judío oyandu yuvireco Jesús reracua Betania ve secoise. Sese yuviraso aheve; ndahei Jesús repia güeraño yuviraso, ëgüe ehi rumo imbogüerayevipri Lázaro repia avei. ¹⁰ Evocoiyase pahi rerecuar, “Yayuca avei Lázaro” ehi yuvireco oyeupe. ¹¹ Esepiá, ahe ichui tēi niha setá iteanga judío oyepepi pahi rerecuar sui Jesús reroya água yuvireco.

Jesús oique Jerusalén pipe

¹² Ava rehii yuviraso tecua Jerusalén ve Pascua pieta repia yuvireco. Ahere ayihive voi oicua Jesús yepota água ahe tecuave yuvireco. ¹³ Ahese oyasia pindo yuvireco. Oyacatu viraso Jesús rovaichi água, osapucai yuvireco chupe:

—¡Imboeteipri, sovasapri secoi ou vahe yande Yar Tūpa rer pipe! ¡Tūpa tosovasa Israel rerecuar guasu! —ehi yuvireco.

¹⁴ Yipindar rumo opa Jesús oseca uca guaricumi. Ipare oyeupi sese icuachiapri aracahendar rupi tupri ité aipo ehi vahe:

¹⁵ “Pesiquiyei rene, Sión pendar; pesepia, pe rerecuar guasu guaricumi haríve ou pēu” ehi.

¹⁶ Yipindar, ore semimbohe eta, ndorosenducuai eté co aracahendar imombehupri. Ipare rumo oyevise güecosa porañetesave, ahese oremahenduha aracahendar sesendar icuachiapri rese, “Supi eté omombehu” orohe tēi sepiase.

¹⁷ Acoi ava yuvirecoi vahe Jesús rupi, Lázaro mbogüerayvisa osepiá vahecuer, ahe opa omombehu-mbehu ambuae ava upe yuvireco. ¹⁸ Sese ava eta yuvinose voi sovaichi ipisi água. Esepiá, oicua ité ahe mbahe poromondiisa guasu yapose yuvireco. ¹⁹ Evocoiyase fariseo rerecuareta aipo ehi oyeupe yuvireco:

—Indó, peicua niha ndayaicatu iri eté mbahe apo chupe cute. Pesepia ru, ¡opacatu guasu ité ava oguata cüritei yuvireco supi! —ehi yuvireco.

Oime griego oseca vahe Jesús yuvireco

²⁰ Griego oime ava rehii pāhuve yuviraso vahe pieta repia Tūpa mboetei água tecua Jerusalén ve. ²¹ Ahe oyemboya Felipe, Betsaida pendar rese, ahe tecua Galilea pipendar. Ipare aipo ehi yuvireco chupe:

—Nde mbia, orosepia potami aipo Jesús —ehi.

²² Felipe evocoiyase oso imombehu Andrés upe; ichui yuviraso ñuvirío voi Jesús upe imombehu. ²³ Evocoiyase chupe aipo ehi:

—Oyepota ari cheundar che, Ava Riquehir, che yevi iri ãgua che recua porañetesave. ²⁴ Supi eté aipo ahe pēu: inungar acoi trigo rāhii nañotisaise, ahese ndihai chietera; ñotise rumo, ahese iha vaira. ²⁵ Acoi ava osaisuse rumo güecocuer tēi, ocañi tēira; acoi ndosaisui vahe rumo güecocuer co ivi pipendar tēi che recocuer rese, evoco nungar virecora tecovesa apirēhi. ²⁶ Acoi ava che mboyeroya pota vahe, toguata che rupi yuvireco. Esepia, acoi che mboyeroyasar yuvirecoi vahe, ahe avei yuvirecoira che piri ivave. Che Ru Tūpa evocoiyase omboeteira ahe sereco —ehi chupe.

Jesús omombehu omano ãgua

²⁷ “¡Cūritei ayandu ité mbahe-mbahe tēi oime vaherā cheu! ¿Mara ahera pīha?” ahe tēi. ¿Aipo ahera: ‘Che Ru, che pīsiro eve cūritei cheu oime vaherā mbahe tēi sui’ ahera viña? ¡Che rumo aicua evoco nungarā ité ayu! ²⁸ Che Ru, emboyecua nde pīratasa nde rer porañeteseta mboetei ãgua” ehi oyeroqui.

Ichui oyeendu ivá sui ñehesa aipo ehi vahe: “Égüe ahe niha amboyecua che pīratasa vichico, égüe ahe iri aveira” ehi.

²⁹ Aheva ava yuvirecoi vahe, “Osunu revo” ehi yuvireco viña; ambuae ava,

—Tūpa rembiguai revo oñehe Jesús upe —ehi yuvireco.

³⁰ Evocoiyase aipo ehi ava eta upe:

—Ndahei cheundar ñehesa pesendu, ahe rumo pēundar. ³¹ Cūritei oimera ñemoirosa co ivi pipendar ndache reroyai vahe upe, cūritei avei imombosara Caruguar co ivi pipendar imbororecuasa sui. ³² Acoi che rupise ivate, opacatu ava arura cheyeupi —ehi.

³³ Aipo ñehesa piye omboyecua tupri ité mara ehira omano.

³⁴ Aipo ihese ava eta aipo ehi:

—Ore rumo orosendu mborocuaita icuachiapri piye aipo ehi vahe: “Poropīsrosar apirēhi vaherā ité” ehi. ¿Mahera ru aipo nde: “Ava Riquehir osupira ivate yuvireco” ere no? ¿Uma ru aipo Ava Riquehir, ambuae tie? —ehi ava eta yuvireco chupe.

³⁵ Evocoiyase aipo ehi ava upe:

—Pe pereco vitemira chīhi rupive tesapesa pe pāhuve. Peguata catu supi seime viteseve. Aviyeteramo pe resapiha téira pītumimbi vahe. Esepia, acoi oguata vahe pītumimbisa rupi, ndoicuai que güecosa. ³⁶ Peroya co tesapesa cūritei pereco viteseve, ipiye ité pe reco ãgua —ehi.

Aipo ohe pare, Jesús osẽ ava rehii pāhu sui; ndoyemboycua iri chupe.

Setá judío rerecuar ndoviroya vitei eté Jesús yuvireco

³⁷ Yepe Jesús setá iteanga oyapo mbahe poromondiisa judío rerecuar rovaque viña, ahe rumo ndoviroyai eté yuvireco. ³⁸ Esepia, imboaviyesa rane itera Tūpa ñehe mombehusar Isaías rembicuachiagüer aipo ehi vahe:

“Che Yar, ava ndoviroyai yande ñehe yuvireco iyavei ndoviroyai nde píratasa eremboycuase chupe” ehi.

³⁹ Co rese avei ava ndoicatui eté senducua yuvireco. Inungar oicuachía Isaías aipo ehi:

⁴⁰ “Tūpa nomboesapisoí ava iyavei nombopihañemoñeta tupri iri mbahe rese yuvireco.

Sese ndosepiacuai eté mbahe, ndosenducuai avei mbahe, ndoyevi catui yuvireco chupe ombogüera água” ehi.

⁴¹ Isaías aipo ehi. Esepia, osepia ité Jesús reco porañetesa. Evocoiyase ahe oñehe sese.

⁴² Setá ité rumo judío viroya yuvireco, seco ivate vahe avei. Ahe rumo nomboyecuai eté seroyasa yuvireco fariseo rerecuar sui osiquiyepave ‘aviyeteramo yande mombora ñemonuhasa sui ñepei reseve yuvireco’ oya. ⁴³ Esepia, ahe oipota catu ava tēi suindar yemboeteisa Tūpa suindar yemboeteisa sui yuvireco.

Jesús ñehe reroya rese porandusara

⁴⁴ Yipindar rumo, Jesús oñehe vitese ava rehii upé, oñehe pírata aipo ehi: “Acoi che reroya vahe ava, ndahei che güeraño che reroya, ahe rumo che Ru avei, che mbousar, viroya yuvireco. ⁴⁵ Iyavei acoi che repia vahe, che mbousar avei osepia. ⁴⁶ Che tesapesa aico. Ayu co ivi pipe ava che reroyasar píatumimbisave yuvirecoíehi água. ⁴⁷ Acoi osendu vahe che ñehe, nomoinguei vahe rumo oyese, ndahei che amocañira. Esepia, ndayui ava co ivi pipendar mocañi água, che rumo ayu ipísiro água. ⁴⁸ Acoi ava che reroíro vahe, ndoviroyai vahe avei che ñehe, oime rumo imocañi água: Co che ñehesa supi eté vahe reroyaéhisa pipe oyemocañi ucara ari ipa vahe pipe. ⁴⁹ Esepia, che nañehei eté cheyesui tēi; che Ru, che mbousar rumo che cuai che ñehe água, che porombohe água avei. ⁵⁰ Che aicua co cheundar porocuaita güeru tecovesa apiréhí ava upé. Sese niha amombehu che Ru che cuaisa” ehi Jesús ava rehii upé.

¹ Pascua pieta renonde Jesús oicua ité ohari yepota co ivi reya água oso vaherā Vu piri. Ahe osaisu vahe ité ava oyeupendar co ivi pipe yepi. Ëgüe ehi saisu ari ipa vahe rupi.

²⁻⁴ Caruguar oique ité Simón rahir, Judas Iscariote, piha pipe imondo água yamotarëhimbar uve. Jesús rumo oicua ité Vu Tüpa sui ousa, oicua avei oyevi iri água Vu Tüpa piri iyavei Tu omondo opacatu omborerecuasa chupe. Sese ocaruse güemimbohe eta reseve, mesa sui opūha, osequii oturucuar yohasa. Ipare omonde ambuae turucuar vumbícuasa rese.
⁵ Evocoiyase omondo i yepoisa riru pipe, oyosei güemimbohe pi, omombiru turucuar vumbícuasa rese vireco vahe pipe oico.

⁶ Ichui Simón Pedro pi oyosei potase, ahe aipo ehi chupe:

—Che Yar, ¿nde co ereyoseira che pi? —ehi chupe.

⁷ —Nde rumo nderesenducuai mbahe che rembiapo cüritei. Ipare rumo eresenducuara —ehi Pedro upe.

⁸ Pedro rumo aipo ehi chupe:

—¡Che pi rumo ndereyosei chietera! —ehi.

—Ndayoseise rumo nde pi, ndahei chietera evocoiyase che rupindar ereico —ehi Pedro upe.

⁹ Pedro evocoiyase aipo ehi:

—¡Che Yar, aní catu che pi año ereyosei; eyosei che po, che rova avei! —ehi chupe.

¹⁰ —Acoi oyasupa ramo vahe rumo, ahe ndiquihai eté. Sese ndiyai oyasu iri. Ipi güeraño rumo iya yoseisa. Ëgüe peye ndipoi eté mbahe pe rese; ndaopacatui rumo ëgüe peye —ehi.

¹¹ Ahe aipo ehi: “Ndaopacatui rumo ëgüe peye” ehi. Esepia, oicua ité uma omondora yamotarëhimbar upe.

¹² Güemimbohe pi sei pare, omonde iri oturucuar yohasa, oguapi mesave aipo ehi:

—¿Peicua vo co mbahe ayapo vahe pēu? —ehi—. ¹³ Pe niha, “Ore mbohesar, ore Yar” peye cheu. Supi eté niha. Esepia, ahe ité che aico. ¹⁴ Yepe supi eté, che pe mbohesar, pe Yar avei aico viña, ayosei rumo pe pi. Sese pe avei ñepei-pei peyacatu peyosei aveira pe pi. ¹⁵ Che niha ‘na tehi avei yuvireco’ viya opombohe pe rereco, ëgüe ahe pēu. ¹⁶ Supi eté aipo ahe pēu: ava mbiguai tēi, ahe ndahei ivate catu güerecuar sui; ëgüe ehi avei imboupri ndahei ivate catu secoi ombousar sui. ¹⁷ Pesenducuase co nungar mbahe, peyapo tuprise, ahese pevharete catura peico —ehi.

¹⁸ “Che nañehei opacatu pe rese, che rumo aicua uma yuvirecoi vahe che rembiporavo. Icuachiapri rumo yaviyera: ‘Acoi ocaru vahe che piri, oyemboyere che amotarëhi’ ehi vahe. ¹⁹ Senondeve amombehu pēu. Evocoiyase ëgüe ehise ité cheu, che reroyara peye che ité niha aipo ahe vahe vichico.

²⁰Supi eté aipo ahe pēu: acoi che remimondo oipisi tupri vahe, ahe che pisí tupri avei; acoi ava che pisí vahe, oipisi tupri avei che Ru yuvireco” ehi.

Jesús omombehu: “Ñepei pe pāhu pendar che mondora che amotarēhimbar upe” ehi

²¹Aipo ohe pare, Jesús ndoyembovihai eté iyavei mbahe oime vaherā omboyecua tupri ité,

—Supi eté aipo ahe pēu: ñepei pe pāhu pendar che mondora che amotarēhimbar upe —ehi.

²²Evocoiyase ore oromahe-mahe tēi oreyese, “¿Ava upe pīha aipo ehi?” orohe tēi oreyeupe. ²³Che sembiaisu catu yípive acaru vīte. ²⁴Ipare Pedro oyaiti-ití ‘¿Ava upe vo aipo ere? tehi chupe’ oyapave cheu. ²⁵Evocoiyase che asiri catu irimi yípive, aporandu chupe:

—Che Yar, ¿ava ité vo? —ahe.

²⁶Ahe aipo ehi cheu:

—Cūritei amoaquira pan rahicuer imondo tohu, ahe ité che mondora —ehi cheu.

Aipo ohe pare omoaqui pan rahicuer imondo Simón Iscar-iote rahir, Judas, upe. ²⁷Judas oipisise pan, oguapi voi eté Caruguar sese. Evocoiyase aipo ehi Judas upe:

—Evocoi ereyapo pota vahe, eyapo voiñó ité ru —ehi chupe.

²⁸Que ñepei rumo mesave orocaru vahe, ndorosenducuai eté aipo ihesa. ²⁹Esepia, Judas guarepoche ríru rārosar secoi yepi. Sese amove ore pāhu pendar ipihañemoñeta: “‘Tererocua mbahe pietase nara’ anise, ‘emondo mbahe ava iparaísu vahe upe nara’ aipo oya revo omose imondo” ehi yuvireco chupe viña.

³⁰Pan pisí pare, Judas osē voi eté oso pītuse.

Porocuaita ipiasu vahe

³¹Judas sē pare, Jesús aipo ehi:

—Cūritei oyecuara che, Ava Riquehir, reco porañetesa. Che Ru Tūpa reco porañetesa avei oyecuara che rese. ³²Acoi amboyecuase che Ru Tūpa reco porañetesa, ahe avei omboyecuara che reco porañetesa, ēgue ehira imboyecua pihaivi. ³³Che rahireta, che rembiaisu, ndaico pucu iri chira pe rese. Che reca tēira peye; inungar acoi judío rerecuar upe aipo ahe: “Ndiyai chietera peso che sosave” ahe. ³⁴Sese co amondo porocuaita ipiasu vahe pēu ñepei-peí peyeaisu áqua inungar che opoaisu. ³⁵Peyeaísuse ñepei-peí, opacatu tupri ité ava oicuara yuvireco che remimbohe supi eté pe recosa —ehi.

Jesús, “‘Ndaicuai eté co mbia’ erera cheu” ehi Pedro upe

³⁶Pedro oporandu Jesús upe:

—Che Yar, ¿que vo aipo eresora? —ehi chupe.

Ahese omboyeví Pedro upe:

—Cûrитеi ndiyai peso vaherã che sosave che rupi; pesorera rumo che rupi curi —ehi.

³⁷ —Che Yar, ¿mahera ru cûrитеi voi ndiyai nde rupi che so água? ¡Ayemoingatu ité amano vaherã nde rese! —ehi Pedro chupe.

³⁸ —¿Supi eté pîha ereyemoingatu ité che rese nde mano água? Nde rumo cõhe potase tacura ñehe renondeve, mbosapi oyupagüer rupi, “Ndaicuai eté co mbia” erera cheu —ehi Pedro upe.

14

Jesús, Tûpa raper yandeu

¹ Ipare Jesús aipo ehi opacatu oreu: “Pepihañemoñeta atii rene; peyeroya Tûpa rese, che rese avei peyeroya. ² Esepiá, che Ru rêtave setá oime pe reco água; égue ndehise rumo, namombehui chira aipo pêu viña. Sese che asora pe recuarã moingatu. ³ Imoingatu pare ayevíra pe reca che recosave pe reraso água cheyepíri. ⁴ Pe peicua que vo asora iyavei peicua mara peyera pe yepota água che recosave” ehi oreu.

⁵ Tomás rumo aipo ehi chupe:

—Che Yar, ndoroicuai rumo que vo eresora. ¿Mara orohera vo aipo icua ore so água? —ehi.

⁶ —Che niha peri aico supi eté vahe iyavei tecovesa. Che rupi güeraño ité peyepotara che Ru upe —ehi—. ⁷ Pe peicua tuprise ité che recocuer viña, peicua aveira che Ru viña no. Cûrитеi suive rumo peicua, pesepia avei cute —ehi oreu.

⁸ Evocoiyase Felipe aipo ehi chupe:

—Che Yar, torosepia ité ru aipo nde Ru. Ahese aviyera oreu —ehi.

⁹ —Felipe, setá ari aico pe rese, ¿ndapeicua vítei eté vo che recocuer? Acoi ava che repia vahe, ahe osepia ité che Ru; ¿mahera ru evocoiyase, “Torosepia rane ité nde Ru” ere vite cheu no? ¹⁰ ¿Ndache reroyai vo peye che Ru rese ité aicose, che rese avei che Ru secoise? Opacatu mbahe amombehu vahe pêu, ndahei cheyesui têi amombehu. Che Ru secoi vahe che rese, ahe ité oyapo güemimbotar che recocuer rese —ehi—.

¹¹ Che reroya peye che Ru rese che recose, ahe avei secoise che rese. Anise, che reroyañomi têi catu peye mbahe che rembiapo rese —ehi—. ¹² Supi eté aipo ahe pêu: acoi ava che reroya vahe, ahe avei oyapora mbahe che rembiapo nungar, tuvicha catura rumo. Esepiá, che asora che Ru piri —ehi—.

¹³ Acoi peporanduse que mbahe rese che rer pipe, che amondoño itera pêu. Ipípe che amboyecuara che Ru reco

píratasa. ¹⁴Che ayapora que mbahe che rer pipe pe porandusa –ehi oreu.

Jesús, “Che amboura Espíritu Santo pēu” ehi viroyasar upe

¹⁵“Che raisuse ité peye, pemboyeroya catu che porocuaita. ¹⁶Che aporandura che Ru upe ombou vaherā Espíritu supi eté vahe pe pítivii água, ahe secoi vaherā ité pe rese. ¹⁷Ava Tūpa ndoicuai vahe rumo, ndoicatui chietera ipisi. Esepia, ndosepiai, ndoicuai avei yuvireco. Pe rumo peicua ité. Esepio, ahe ité secoi pe rese. Ipare oique itera pe piha pipe.

¹⁸“Ndopoeyai chira pe güeraño tēi; ayevira niha pe rese aico vaherā. ¹⁹Chīhi tēi oime vité ari che reroyasaréhi che repia vité vaherā yuvireco. Ipare rumo ndache repia iri chira yuvireco. Pe rumo che repiaño itera peye iyavei peicoveño itera. Esepia, che aicoveño avei. ²⁰Ahe ari pipe peicuara che Ru rese che recosa, che rese pe recosa avei iyavei che aicose pe rese. ²¹Acoi oicua vahe che porocuaita, omboyeroya vahe avei, ahe omboynecua ité che raisusa yuvireco. Che Ru osaisura che raisusar; che avei asaisura, ayemboynecua aveira chupe” ehi.

²²Judas (ndahei vahe rumo Iscariote) aipo ehi:

—Che Yar, ¿mahera oreuño ereyemboycuara; mahera ru ndereyemboycuara iri chira ava nde reroyasaréhi upe? —ehi chupe.

²³Evocoiyase aipo ehi Judas upe:

—Acoi che raisu vahe, omboyeroya vahe che ñehe yuvireco, che Ru evocoiyase osaisura iyavei che Ru reseve oroyura oroico vaherā sese. ²⁴Acoi ndache raisui vahe, ahe ndoviroyai avei che ñehe yuvireco. Co ñehesa pesendu vahe ndahei cheyesui tēi; ahe rumo che Ru, che mbousar suindar —ehi.

²⁵“Pe rese che reco vitese, opa co mbahe amombehu vichico pēu. ²⁶Espíritu Santo rumo, Poropítiviisar, che Ru ombou vahe che rer pipe, ahe pe mbohera opacatu mbahe avíye vahe rese. Pe momahenduha aveira opacatu pēu che ñehe agüer rese.

²⁷“Aseyá teco tuprisa pēu, ahe che reco tuprisa; ndahei rumo avaño tēi rembiapo nungar amondo pēu. Aní, ‘¿Mara yahera pīha?’ peyera; aní chiaveira pesiquíye. ²⁸Pesendupa niha acoi, ‘Asora, ipare ayevi irira pe rese aico vaherā’ che hesa. Supi eté che raisuse peye, pevharetera peicuase che Ru pīri che cosa. Esepia, ahe ivate catu vahe ité che sui. ²⁹Sese amombehupa voi co mbahe tenondeve pēu, égue ehise ité, ahese peroyara.

³⁰“Namombehu pucu iri chira mbahe pēu. Esepia, ou ité co ivi pipe oporocuai tēi vahe. Ahe rumo ndahei ivate catu

vahe che sui³¹ ‘toicua ava che reroyasarëhi che Ru räisusa yuvireco’ che hesa pipe. Ayapoño ité che Ru che cuaita.

“Pepüha. Yaso cohavé sui” ehi güemimbohe eta upé.

15

Jesús uva hi nungar

¹ Ipare Jesús oñehé iri oreu aipo ehi: “Che aico inungar uva hi supi eté vahe; che Ru evocoiyase inungar sese ihañeco vahe secoi. ² Ahe oyasia sáca ndihai vahe ichui yepi; iha vahe rumo omoatiro tupri iha catu água. ³ Pe pe recocuer imoatíroprí ité che pe mbohesa pipe. ⁴ Peicoño ité catu che rese inungar che aicoño ité avei pe rese. Uva räca oise ohi sui, ndiha iri ahe ae têi; pe avei ëgue peyera peyepepise che sui” ehi oreu.

⁵ “Che niha uva hi nungar aico; pe evocoiyase sáca nungar peico. Acoi secoi vahe che rese, che avei aico sese. Inungar mbahe miti iha ati vahe, ëgue ehira ahe. Supi eté ndapeicatui chietera che porëhi mbahe apo. ⁶ Acoi ndasecoi vahe che rese, ahe imombosara inungar acoi uva räca yípi vahe. Ipare imonuhasa sapi água” ehi oreu.

⁷ “Pe peicoño ité che rese ndaperesaraise avei che porombohesa sui, peporanduño mbahe pe remimbotar rese, ahese imondosara pëu” ehi. ⁸ “Che Ru oipisira omboeteisa pe sui acoi peyapo tuprise opacatu che remimbotar. Pemboyecua evocoiyase che remimbohe supi tupri vahe pe recosa. ⁹ Che opoaisu ité, inungar che Ru che raisu. Sese peicoño ité catu che poroaisusa pipe. ¹⁰ Esepia, pemboyeroyase che porocuaita, peicoveño itera co che poroaisusa pipe. Inungar che che Ru amboyeroya che cuaisa iyavei aicoveño ité che Ru poroaisusa pipe vichico.

¹¹ “Che aipo ahe pëu ‘tovireco che vihasa oyese yuvireco’ viya; ‘toyembovharete catu yuvireco’ che hesa pipe. ¹² Co che porocuaita: Peyeaisu ñepei-peí, inungar che opoaisu. ¹³ Ndipoi eté que poroaisusa ívate catu vahe co sui omondose que ava güecocuer omboripar rese nara. ¹⁴ Pe che mboyeroyase peye, ahese che mboripar peico. ¹⁵ ‘Pe mbiguai peico’ ndahe iri pëu. Esepia, mbiguai ndoicuai eté mbahe güerecuar pihañemoñetasa. Sese, ‘Che mboripar’ ahe pëu. Esepia, aicua ucupa ñehesa che Ru cheu omombehu vahe pëu. ¹⁶ Pe niha ndache poravoi peye. Che rumo opoporavo iyavei opocuai peporavíqui vaherã ava reru água cheu ‘che rese ité toyuvirecoí’ che yapave. Evocoiyase che Ru omboura mbahe pe porandusa che rer pipe pëu. ¹⁷ Co rese opocuai: Peyeaisu catu ñepei-peí peyacatu” ehi Jesús güemimbohe upé.

Jesús amotarëhimbar, supindar amotarëhimbar avei

¹⁸ “Acoi ava ndoicuai vahe Tūpa pe amotarēhise, peicuaño che rane che amotarēhi yuvireco yipindar. ¹⁹ Pe peico vitese ava Tūpa ndoicuai vahe pāhuve, evocoiyase pe raisu aira yuvireco viña. Che rumo opoporavo ipāhu sui yuvireco. Sese tēi ndape ambota iri yuvireco. Esepia, pe ndahe iri ipāhu pendar peico. ²⁰ Peyemomahenduha pēu aipo che hesa rese: ‘Ndipoi eté que mbiguai ivate catu vahe güerecuar sui’ ahe. Che niha yipindar yamotarēhimbri aico, pe avei pe amotarēhira yuvireco. Acoi omboyeroya vahe rumo che porombohesa, pe porombohesa avei omboyeroyara yuvireco. ²¹ Co opacatu mbahe che recocuer sui tēi ēgüe ehira pēu. Esepia, ndoicuai niha che mbousar yuvireco.

²²⁻²⁴ “Che ndayuise ahe ava upe mbahe sembiaví mombehu viña, evocoiyase, ‘Peyaví mbahe’ ndehi chira Tūpa chupe yuvireco viña. Che rumo ayu ité, amombehu mbahe sembiaví yuvireco chupe, ayapo avei mbahe ava ndoyapoi vahe yuvireco ipāhuve; ahe rumo yepe osepia co mbahe yuvireco viña, che amotarēhiñó, che Ru avei oyamotarēhi yuvireco. Sese, ‘Pereco ité mbahe pe rembiaví peyese’ ehi Tūpa chupe. Esepia, acoi che amotarēhi vahe, che Ru avei oyamotarēhi yuvireco. ²⁵ Co rumo ēgüe ehi. Esepia, imboavíyesa rane itera ñehesa sesendar icuachiapri pipe aipo ehi vahe: ‘Mbahe apoëhi pipe sui tēi che amotarēhi yuvireco’ ehi vahe.

²⁶ “Acoi ambouse rumo Poropítiviisar, Espíritu supi eté vahe che Ru sui pēu, ahe omombehura che recocuer. ²⁷ Pe avei pemombehura che recocuer. Esepia, yipisuve ité peico che rupi” ehi.

16

¹⁻² “Pe mocañiehi água che rese pe yeroysa aipo ahe opacatu co mbahe imombehu pēu: pe mombora judío rerecuar oñemonuhasa sui yuvireco, pe yuca aveira yuvireco. Ahe rumo omohara, ‘Tūpa uve nara revo na yahe’ ehira yuvireco viña. ³ Evoco rumo ēgüe ehira yuvireco che Ru cuaëhi pipe iyavei che cuaëhi pipe yuvireco. ⁴ Amombehu aipo pēu acoi ēgüe ehise, peyemomahenduhara che remimombehugüer rese.

Espíritu Santo rembiapo

“Yipisuve rumo namombehui co mbahe pēu. Esepia, aicoveño ité pe rese. ⁵ Cûritei rumo asora che mbousar piri iyavei ndipoi que ñepei pe pāhu pendar ‘¿que vo aipo eresora?’ ehi vahe cûritei cheu. ⁶ Pe rumo ndapeyembovihaiñó aipo mbahe amombehuse pēu. ⁷ Supi eté rumo aipo ahe pēu: avíye catura pēu che asose. Esepia, ndasoise viña, ndoui chietera pe rese Poropítiviisar. Asose rumo, che amboura pēu.

⁸Ouse ahe, oicua ucara ava che cuaēhisar upe yangaipa, oicua uca aveira tecocuer īvisa iyavei cañisa ndaseco pōrai vahe upendar. ⁹Oicua ucara yangaipa chupe ndache reroyaise yuvireco; ¹⁰oicuara rumo che reco ihīvi tupri vahe yuvireco. Esepiā, asora che Ru recosave, ahese pe ndache repia iri chietera peye; ¹¹iyavei oicuara Tūpa poromocañisa. Esepiā niha, Caruguar, ahe co īvī pipendar rerecuar oipisira che Ru Tūpa ñemoirosa.

¹²“Setá iteanga mbahe oime amombehu vaherā pēu. Pe rumo ndapeicatui chira cūritei senducua. ¹³Ouse rumo Espíritu supi eté vahe, ahe pe mbohera mbahe supi eté vahe rese. Esepiā, noñehei chira oyesui tēi, ahe rumo omombehura mbahe osendu vahe güeraño, oicua uca aveira mbahe coiye oime vaherā. ¹⁴Ahe che mboeteira. Esepiā, oicua ucara opacatu mbahe cheundar pēu. ¹⁵Opacatu mbahe che Ru vireco vahe, che mbahe. Sese niha, ‘Espíritu oipisira opacatu mbahe cheundar, oicua uca aveira pēu’ ahe.

¹⁶“Aviyeteramo tēi ndache repia iri chira peye. Ipare rumo coiye catumi che repia irira peye” ehi oreu.

Yepe semimbohe ndovihai chira viña, coiye catu rumo oviharetera yuvireco

¹⁷Evocoiyase ore oroporandu-randu tēi oreyeupe aipo orohe:

—¿Mara oya pīha: ‘Aviyeteramo tēi ndache repia iri chira peye’ ehi yandeu; ipare rumo aipo coiye catumi yasepi-ara iyavei aipo osora Vu piri no? ¹⁸¿Mara oya vo aipo: ‘Aviyeteramo tēi’ ehi? Ndayasenducuai mo aipo iñehesa —orohe oreyeupe.

¹⁹Ipare rumo ‘oporandura co mbahe rese yuvireco cheu’ oya aipo ehi voi oreu:

—¿Ipare rumo coiye catumi che repia irira peye’ che he agüer rese co pe porandu vīte peyeupe? —ehi—. ²⁰Supi eté aipo ahe pēu: peyasehora pe viharēhisa pipe, ava angaipa viyar rumo ovihareteñora yuvireco. Yepe pe, ndapevhīhai chira viña, coiye catu rumo pevharetera. ²¹Inungar acoi que cuña imembira potase, tasi chupe oyepotase arī imembira água; pītani oha pare rumo, nimahenduha iri tasícuer rese; soriveteño omembri rese. ²²Ēgue peye avei; pe cūritei tasi avei pēu, ayevi irira rumo pe repia água, ahese pevharetera. Ahe viharetesa ndipoi chietera que ava vīrocua vaherā pe sui.

²³“Ahe arī pipe, ndapeporandu iri chietera mbahe rese cheu. Supi eté aipo ahe pēu: che Ru omboura opacatu mbahe pēu che rer pipe peporanduse. ²⁴Cūritei rumo ndapeporandu vitei mbahe rese che rer pipe. Peporandu catu sese, ahese peipisira. Ipīpe sui perorivete catura.

Jesucristo mbahe-mbahe tēi recopisar

²⁵ “Opacatu mbahe rese niha amboyoya tecocuer pēu. Oimera rumo ari namboyoya iri chira ambuae mbahe rese tecocuer; ipa voi amombehu itera mbahe pēu che Ru recocuer resendar. ²⁶ Ahe ari pipe pe peporandura mbahe rese che rer pipe; che rumo, ‘Ayeroquira pe rese che Ru upe’ ndahei pēu. ²⁷ Esepia, che Ru ae ité pe raisu. Pe raisu ité niha. Esepia, pe che raisu peye, che reroya avei che Ru Tūpa sui che yuse peye. ²⁸ Asē che Ru sui co ivi pipe vitu; cūritei rumo aseyara co ivi, ayevira che Ru upe” ehi oreu.

²⁹ Evocoiyase ore aipo orohe chupe:

—Indó, aipo rupi ereñehe tupri catu ité; nderemboyoya iri ambuae mbahe rese imombehu oreu. ³⁰ Supi eté ereicua opacatu mbahe, ereicua avei ore porandusa. Evocoiyase ndiya iri ore porandu água mbahe rese ndeu. Sese oroviroya Tūpa sui nde yusa —orohe chupe.

³¹ —¿Evocoiyase che reroya ité peye? —ehi—. ³² Supi eté oyepota ari cute, co pipe ité peyemosai para che sui; che reyara che aemi peye. Ndahei rumo che ae aico. Esepia, che Ru secoi che rese. ³³ Amombehu co opacatu pēu che rese mbahe tupri pipe pe reco água. Peparaísu itera co ivi pipe; peyemongueréhi catura rumo. Esepia, che opa ité asecopi co ivi pipendar mbahe tēi —ehi.

17

Jesús oyeroqui güemimbohe rese

¹ Aipo ohe pare, Jesús omahe ivá rese aipo ehi: “Che Ru, oyepota ari cute. Che mboetei eve, ipipe sui avei che nde Rahir toromboetei. ² Supi eté niha, nde erembou che mborerecua água opacatu ava ivi pipendar haríve iyavei tecovesa apiréhi mundo água opacatu ava nde cheu erembou vahe upe. ³ Co niha tecovesa apiréhi, tandem cua nde Tūpa ñepei supi eté vahe nde recose yuvireco, tache cua avei nde che mbouse yuvireco.

⁴ “Che niha oromboetei co ivi pipe, iyavei ayapo nde che cuaisa. ⁵ Sese che Ru, embou irimi cūritei che reco porañete água, inungar acoi yipindar areco vahe nde rese ivi apoéhiseve.

⁶ “Co nde rembiporavo ava co ivi pipendar pāhu sui erembou vahe cheu; orocua ucapa chupe. Yipindar ndeundar yuvirecoi. Ipare nde erembou cheu. Ahe viroya ité nde ñehe yuvireco. ⁷ Cūritei oicuapa opacatu mbahe nde suindar cheu erembou vahe yuvireco. ⁸ Esepia, amombehu ité nde ñehe erembou vahe cheu; ahe viroya ité yuvireco, viroya avei nde che mbousa yuvireco.

9 "Che ayeroqui cheu nde remimbou rese ndeu. Esepio, ndeundar ité yuvireco; ndayeroquii rumo ambuae ava che reroyasarëhi rese. 10 Opacatu ava cheundar, ndeundar avei; ndeundar evocoiyase cheundar. Ahe sese che reco porañetesa oyecua.

11 "Che ndapitai chira co ivi pipe; ahe rumo opitara cohaye yuvireco. Che evocoiyase asora nde piri. Che Ru, seco maranehi vahe, esäro nde píratasa pipe nde remimbou cheu oyese yuvireco tupri äqua inungar yande yaico. 12 Aicose co ivi pipe, asäro tupri nde rer píratasa cheu erembou vahe pipe; chemahemoha yuvireco sese mbahe tēi sui. Ndipoi eté que ñepei ocañi tēi vahe; acoi yipive ocañi vaheño ité rumo ocañi tēi; nde ñehe rupi tupri ité ëgue ehi.

13 "Cûritei asora nde recosave. Co ivi pipe che reco vitese rumo, amombehu co mbahe chupe 'tovireco che viharetesa yuvireco' che yapave. 14 Che niha amombehu nde ñehe yuvireco chupe. Ava che reroyasarëhi rumo oyamotarëhiño yuvireco. Esepio niha, ndahe iri Caruguar povri pendar yuvireco inungar che ndahei ipovri pendar aico. 15 'Enose ava Caruguar povri pendar pâhu sui' ndahei ndeu, che rumo aipota eresepira Caruguar sui. 16 Inungar che ndahei Caruguar povri pendar aico, ëgue ehi avei ahe yuvireco. 17 Eipeha tupri angaipa sui ndeyeupe nara yuvireco ñehesa supi eté vahe reroyase. Nde ñehesa niha supi tupri vahe ité. 18 Inungar nde che mbou eve ava co ivi pipendar pâhuve, ëgue ahe avei che imondo ava pâhuve yuvireco. 19 Amondo ité che recocuer ndeu nara 'toyemondo catu yuvireco chupe co ñehesa supi tupri vahe reroya pipe' viya.

20 "Ndayeroquii co che remimbohe reseño ndeu, ayeroqui avei rumo ambuae ava che reroyasar ñehesa sui che reroya vaherä rese. 21 Aporandu avei ndeu toyuvirecoi tupri ité yuvireco oyese inungar ñepei vahe, ëgue tehi avei yuvireco yande rese, che Ru, inungar nde ereico che rese, che avei aico nde rese. Toyuvirecoi tupri ité catu yuvireco oyese. Ipipe sui ava co ivi pipendar toviroya nde che mbousa yuvireco. 22 Che reco porañetesa nde erembou vahe cheu, ahe tupri avei amondo yuvireco chupe ñepei vahe nungar yuvirecoi äqua, inungar yande ñepei vahe yaico. 23 Che aico yuvireco sese, nde evocoiyase ereico che rese ahe yuvirecoi tupri äqua inungar ñepei vahe. Ipipe sui ava co ivi pipendar toicua nde che mbousar ereico iyavei eresaisu che remimbohe yuvireco inungar nde che raisu eve.

24 "Che Ru, nde niha erembou co che remimbohe cheu. Aipota rumo ahe yuvirecoi che piri che recosave osepia vaherä teco porañetesa cheu erembou vahe yuvireco. Nde niha

yipive ité che raisu eve ivi apoēhiseve. ²⁵ Che Ru, seco catupri vahe, ava co ivi pipendar tēi nande cuai yuvireco; che rumo orocua ité, co avei oicua nde che mbousa yuvireco. ²⁶ Orocua uca chupe, orocua ucaño vite itera rumo. Evocoiyase nde che raisusa tovireco avei yuvireco, che avei taico yuvireco sese” ehi Jesús oyeroqui güemimbohe recocuer rese.

18

Jesús oipisi yuvireco

¹ Aipo ohe pare, Jesús ore renose ore reraso iembí Cedrón rovai. Aheve oime mbahe miti rēta, ipipe Jesús ore reroique ore reraso. ² Iyavei Judas omundo vaherā yamotarēhimbar upe oicua avei aheve secosa. Esepia, setá rupi Jesús rese oroñemonuha aheve yepi. ³ Sese Judas oyepotaño ité aheve sundao rehii reseve iyavei sundao tūparo rārosar pahi rerecuar iyavei fariseo eta remimondo opacatu oyoepisa reseve yuvirecoi, guataendi reseve-seve avei yuviraso. ⁴ Yipive ité rumo oicua oyeupe mbahe oime vaherā. Sese osē voi eté yuvireco chupe oporandu:

—¿Ava vo peseca? —ehi.

⁵ Ahe ava rehii omboyevi yuvireco chupe:

—Jesús, Nazaret pendar, oroseca —ehi.

—Che niha ahe aico —ehi ava rehii upe.

Judas ipāhuve secoi imondo āgua yamotarēhimbar upe. ⁶ “Che niha ahe aico” ehise ava upe; guaquituei coti pāve opa ovíapi yuvireco. ⁷ Evocoiyase oporandu iri ava upe:

—¿Ava vo peseca? —ehi.

Ahe aipo ehi yuvireco:

—Jesús, Nazaret pendar —ehi.

⁸ Aipo ihese,

—“Che niha ahe aico” ahe pēu —ehi—. Che che recase peye, pepocoi rene catu co ambuae rese, toyuvirasopaño —ehi.

⁹ Co rumo iñehe mboaviye āgua ēgue ehi: “Acoi che Ru ombou vahe cheu, nocañii eté que ñepei che sui” ehi.

¹⁰ Evocoiyase Simón Pedro vireco vahe quise, vinose, oyasia Malco serer vahe nambi yasu cotindar; ahe pahi rerecuar ivate catu vahe rembiguai. ¹¹ Pedro upe rumo aipo ehi:

—Emondo iri quise siru pipe —ehi—. Che Ru niha co mbahe yavai vahe ombou cheu. Añemosayo itera chupe —ehi.

Jesús serasosa mborerecuar Anás rovai

¹² Evocoiyase sundao rerecuar, osundao eta reseve iyavei judío tūparo rārosar oipisi Jesús yuvireco, oipocua. ¹³ Yipindar viraso Anás rētave yuvireco. Esepia, ahe Caifás rovayar. Ahe aravíter pipe aipo Caifás pahi eta rerecuar ivate catu vahe

secoi. ¹⁴ Caifás ité aipo ehi omboetas upe: “Yandeu avíye catu itera que ñepei mbia omanose yande rese” ehi.

Pedro, “Ndaicuai co mbia” ehi Jesús upe

¹⁵ Ore Pedro rese orosoño ité Jesús raquicuei. Che rumo pahi eta rerecuar rēta pipendar opa ité che cua yuvireco. Sese aiqueño ité Jesús raquicuei mborerecuar rētave vicho. ¹⁶ Pedro rumo opitaño oquendipive ocarve. Che rumo pahi eta rerecuar che cua ité yuvireco. Evocoiyase asẽ, aporandu oquendipi rārosar uve Pedro reique água rese. ¹⁷ Evocoiyase oquendipi rārosar oporandu Pedro upe:

—¿Ndahei vo nde avei co ava rupindar? —ehi chupe.

—Aní, ndahei che ahe —ehi oquendipi rārosar upe.

¹⁸ Sōhisá iteanga ahe pītu pipe. Evocoiyase mborerecuar rembiguai iyavei sundao eta oyatapi yuvireco oyepehe água. Pedro avei aheve ipāhuve oyepehe tata ipive ohā.

Pahi eta rerecuar ivate catu vahe oporandu Jesús upe secocuer rese

¹⁹ Pahi eta rerecuar ivate catu vahe, “¿Uma-uma vo nde remimbohe yuvirecoi iyavei mbahe rese vo erembohe?” ehi oporandu Jesús upe. ²⁰ Jesús rumo aipo ehi chupe:

—Che niha añehe opacatu rupi, opacatu ava eta rovaque avei. Esepia, aporomboheño ité niha ava ñemonuhasa rupi, tūparo guasu pipe avei. Indó, che nañemi eté añahe vaherā. ²¹ ¿Mahera vo evocoiyase cheu tēi ereporandu? Eporandu catu che ñehe rendusar upe. Ahe tomombehu che oyeupe ñehesa yuvireco ndeu. Ahe niha oicua che ñehe agüer yuvireco —ehi.

²² Aipo ihese, ñepei mbia sundao osovapete aipo ehi chupe:

—¿Aipo ere rutei pahi rerecuar ivate catu vahe upe imboyevi? —ehi chupe.

²³ Evocoiyase omboyevi ahe mbia upe:

—Añehese mbahe tēi rese, emombehu che ñehe raisa; che rumo añehe tupri ité, ¿mahera vo evocoiyase che rovapete eve? —ehi.

²⁴ Evocoiyase Anás omondo pahi eta rerecuar ivate catu vahe Caifás upe ipocuasa reseve.

Pedro, “Ndaicuai co mbia” ehi vite Jesús upe

²⁵ Ahese Pedro oyepeheño vite ohā tata ipive. Aheve aipo ehi yuvireco chupe:

—¿Ndahei vo nde ité evocoí ava rupindar ereico? —ehi.

Pedro rumo,

—Aní, ndahei che ahe aico —ehiño.

²⁶ Ipare mbia pahi rerecuar ivate catu vahe rembiguai, inambi asiapri mu aipo ehi chupe:

—¡Avíye acoi nde ité oroepia vahe mbahe miti rēta pipe supi!

—ehi chupe.

²⁷ Pedro rumo, “Aní, ndahei eté che” ehi iriño. Aipo iheseve, tacura oñehe.

Jesús serasosa Pilato rovai

²⁸ Evocoiyase víraso Jesús Caifás rëta sui Roma pendar mborerecuar guasu recosave yuvireco. Cõhe potase ëgue ehi. Judío rumo ndoyuviroiquei eté mborerecuar recosave oyemboangaipaëhi äqua. Esepio, ahe icuaita yuviroiquese, ndiyai chietera Pascua resendar ovesa roho hu äqua yuvireco chupe viña. ²⁹ Sese Pilato osë ava upe aipo ehi:

—¿Mbahe vo sembiapo naporai vahe? —ehi.

³⁰ Ahe omboyevi yuvireco chupe:

—Seco catuprise, ndorogüerui chietera ndeu viña —ehi yuvireco chupe.

³¹ Evocoiyase aipo ehi ava upe:

—Peraso, pe ae peyapo mbahe pëundar ité porocuaita rupi sese —ehi.

Judío rerecuar evocoiyase omboyevi yuvireco:

—Ore judío oroico vahe upe rumo ndipotasai oroyuca vaherä que ava —ehi.

³² Ëgue ehi Jesús ñehe imano äqua resendar yaviye. ³³ Ahese Pilato oique iri oi pipe, güeru uca Jesús oyeupe oporandu chupe:

—¿Nde ité vo judío rerecuar ivate catu vahe ereico? —ehi.

³⁴ —¿Ndeyesui eté aipo ereporandu cheu, anise, oime tie que ambuae ava che mombehu vahe ndeu? —ehi Pilato upe.

³⁵ —¡Che ndahei eté judío aico! Nde recua pendar ae niha pahi eta rerecuar nde reru yuvireco cheu. ¿Mbahe vo evocoiyase ereyapo? —ehi Pilato chupe.

³⁶ —Che mborerecuasa rumo ndahei co ivi pipendar. Co ivi pipendarse viña, che rupindareta ovavara che amotarëhimbar upe che repisave yuvireco viña. Che mborerecuasa rumo ndahei eté coha pendar —ehi.

³⁷ Ahese Pilato aipo ehi chupe:

—Evocoiyase nde mborerecuar guasu ité ereico —ehi.

—Nde niha aipo, “Mborerecuar guasu ereico” ere cheu. Aherä niha che aha co ivi pipe mbahe supi eté vahe mombehu äqua. Opacatu ava viroya vahe mbahe supi eté vahe, osenduño ité che ñehesa yuvireco —ehi Pilato upe.

³⁸ Pilato rumo,

—¿Mbahe vo aipo supi eté vahe? —ehi chupe.

“¡Tayaticasa!” ehi ava eta Jesús uve yuvireco

Aipo ohe pare, Pilato osë iri judío eta upe oñehe aipo ehi:

—Che ndayosui eté co mbia rese mbahe sembiavi. ³⁹ Pe rumo peicua amose ñepei ava soquendapri Pascua pieta pipe yepi; ¿peipota amose vaherä judío rerecuar? —ehi.

⁴⁰ Aipo ihese, opacatu osapucái píratá yuvíreco aipo ehi:
—¡Evocoi aní! ¡Barrabás catu emose! —ehiño yuvíreco.
Barrabás rumo imonda rai vahe secoi.

19

¹ Evocoiyase Pilato oporocuái Jesús nupa água. ² Sundao eta omonde ñaca rese yu piapri iyavei omboyemonde turucuar píraumbi vahe pipe yuvíreco. ³ Ipare oyemboya sese aipo ehi:
—¡Imboeteipri judío Rerecuar tasecoi! —ehi angahu sovapete-pefe yuvíreco.

⁴ Pilato evocoiyase osé iri ava upe aipo ehi:
—Pesepia, anose pëu pe icua água che ndayosui eté mbahe sembiavi —ehi.

⁵ Evocoiyase vinose yu piapri oáca rese turucuar píraumbi vahe reseve senoha ava upe. Ahese Pilato aipo ehi:

—¡Ndo co aipo mbia cute! —ehi.

⁶ Osepiase pahi eta rerecuar, sundao rerecuar avei, omboipi osapucái:

—¡Tayaticasa! ¡Tayaticasa! —ehi pâve voi yuvíreco chupe.

Pilato evocoiyase aipo ehi ava upe:

—Peraso, peyatíca pe ae. Esepiá, che ndayosui eté mbahe sembiavi —ehi.

⁷ Judío rerecuar rumo omboyevi yuvíreco:

—Ore rumo orovireco mborocuaita. Ipipe omanoño itera. Esepiá, oyeapo tēi Tüpa Rahír —ehi yuvíreco.

⁸ Aipo ñehesa renduse, Pilato oyembosiquiyé catu.

⁹ Viroique iri oí pipe seraso. Aheve oporandu chupe:

—¿Que pendar ité vo nde ereico? —ehi.

Ahe rumo nomboyevi iri eté iñehé chupe. ¹⁰ Evocoiyase Pilato aipo ehi chupe:

—¡Mahera ndereñehei eté cheu! ¿Ndereicuái vo che mborerecuar aico nde atica uca água, mbahe tēi sui nde renose água avei? —ehi Pilato chupe.

¹¹ —¡Aní! Nderererecoi chietera nde mborerecuasa che haríve Tüpa nombouise ndeu viña. Sese niha ava che mondoso ndeu oyemboangaipa catu nde sui yuvíreco —ehi Pilato upe.

¹² Ahe ramoseve, Pilato osáha iri tēi Jesús renose água; judío rerecuar rumo osapucái voiño yuvíreco chupe:

—¡Acoi eremosese co mbia, ndahei chietera nde mborerecuar ivate catu vahe mborípar ereico! ¡Opacatu oyemomborerecua tēi vahe, ahe evocoiyase mborerecuar ivate catu vahe amotaréhimbar tēi yuvírecoi! —ehiño yuvíreco chupe.

¹³ Evocoiyase Pilato osenduse aipo ihesa, vinose uca Jesús ocarve, oguapi mborerecuar guasu renda haríve. Ahe mbahe rese porandusa rer hebreo ñehe pipe Gabata ‘ita apopri’ oya.

¹⁴ Mbíter arí Pascua pieta água Pilato aipo ehi judío eta upe:

—¡Ndo co pe rerecuar cute! —ehi.

¹⁵ Ahe rumo osapucai píratá aipo ehi yuvireco:

—¡Tomano! ¡Tomano ité! ¡Tayaticasa! —ehi yuvireco chupe.
Pilato rumo aipo ehi chupe:

—¿Evocoiyase oyatica ucara pe rerecuar? —ehi.

Pahi eta rerecuar rumo omboyeví yuvireco chupe:

—¡Ore ndorovireco iri ambuae mborerecuar, Roma pendar
mborerecuar ívate catu vahe güeraño ité orovireco! —ehi
yuvireco.

¹⁶ Ipare Pilato omondo sundao upe yatica uca água. Ichui
viraso yuvireco.

Jesús yaticasa curusu rese

¹⁷ Evocoiyase Jesús vinoce curusu seraso “Ava Ācagüer”
serer vahesave (ahe serer hebreo ñehe pipe Gólgota). ¹⁸ Aheve
oyatica yuvireco. Seseve avei oyatica ñuvirío ava yuvireco,
ñepei-peí yíque ívii. ¹⁹ Pilato oicuachía uca omondo curusu
rese aipo ehi vahe: “Co Jesús, Nazaret pendar, judío Rerecuar
guasu” ehi. ²⁰ Setá iteanga ava oyeroqui co icuachiapri rese
yuvireco. Esepiá, icuachiasa hebreo, latín iyavei griego ñehe
pipe. Iyavei yaticasa namombriimi eté tecua sui. ²¹ Sese pahi
eta rerecuar aipo ehi Pilato upe yuvireco:

—Aní, ‘Judío Rerecuar guasu’ ere icuachía; iyacatu rumo,
‘Oyeapo pota tēi vahe judío Rerecuar guasu’ erera icuachía
imoi —ehi yuvireco chupe.

²² Pilato rumo omboyeví:

—Co aicuachía vahe, ñgue ehiño itera oí —ehi.

²³ Jesús atica pare evocoirungatu sundao, omonuha ituru-
cuar oyeupe imboyaho água yuvireco. Oipisi avei iturucuar
ívrí pendar nimbovívisai vahe, ñepei reseve pucuño tēi vahe.
²⁴ Sundao eta aipo ehi oyeupe yuvireco:

—Yamondoro eme; avíye catu yandeguayíño sese, ¿ava ité
píha oipisira? —ehi yuvireco.

Ñgue ehi icuachiapirer imboaviye yuvireco aipo ehi vahe:
“Omboyaho-yaho ava che turucuar iyavei iguayí yuvireco
sese” ehi vahe. Supi tuprí ité ñgue ehi sundao yuvireco.

²⁵ Curusu ívípive yuvirecoi ichí, ichí cupíhir, María Cleofas
rembireco, María Magdalena avei. ²⁶ Osepiase osí iyavei che
repiase yípive, che güembiaísu, aipo ehi osí upe:

—Che si, evoco nde membíra ererecora —ehi chupe.

²⁷ Ipare voi aipo ehi cheu:

—Evoco nde si —ehi.

Ichuive tuprí amoingue ichí che rëtave asäro vaherá.

Jesús mano agüer

²⁸ Ipare Jesús oicua ité Vu remimbotar yaviyepa iyavei icuachiapirer mboaviye ãgua aipo ehi:

—Che husei —ehi.

²⁹ Aheve oime mbahe ríru. Ipipe savapi po vinagre oĩ. Co vinagre pipe omoaqüi mbahe saviyu vahe yuvireco omondo ivira rese, osupi, imondo iyuruve yuvireco. ³⁰ Osupite pare aipo ehi:

—Opa yaviye cute —ehi.

Ipare voi ñaca iviso omano.

Sundao oñaruca cutu lanza pipe Jesús

³¹ Ñepei ari Pascua pieta uve ipane vahe pipe aipo ēgue ehi. Sese judío ndoipotai ava retecuer pita curusu rese mbituhusa ari pipe. Esepia, ahe mbituhusa ari imboeteipri guasu ité. Sese Pilato upe oporandu yuvireco ahe oyocuai vaherã sundao curusu rese yaticapri rētima mope ãgua ‘tomano’ oyapave curusu sui setecuer reroyipa ãgua yuvireco. ³² Evocoiyase sundao yuvirasopa ñuvirío mbia Jesús rese yaticasa vahe yuvireco. Ahe sētima rane opa omope yuvireco. ³³ Oyemboyase rumo Jesús rese, “Omano ité” ehiño yuvireco chupe. Sese nomopei sētima yuvireco.

³⁴ Ñepei sundao rumo oicutu yiøeve lanza pipe. Ahe ramoseve voi osē suvi, i reseve. ³⁵ Che asepia vahe ité; supi eté aipo ahe. Evocoiyase amombehu pēu pe seroya ãgua. ³⁶ Esepia, co mbahe ēgue ehi icuachiapirer mboaviye ãgua aipo ehi vahe: “Ndimopesai chietera que ñepei icangüer” ehi vahe aracahe. ³⁷ Iyavei ambuae icuachiapri aipo ehi: “Osepiara ava eta icutupri yuvireco” ehi.

Jesús yapocatusa ita hopri pipe

³⁸ Ipare José, tecua Arimatea pendar, oporandu Pilato upe Jesús rehögür reraso ãgua rese. José aipo Jesús rupindar. Ndoyecua ucai rumo omboetaso judío eta upe pahi rerecuar sui osiquiyepave. Pilato evocoiyase, “Aviye, eraso” ehi chupe. Evocoiyase José oso viraso sehögür. ³⁹ Nicodemo avei oipitivii, acoi oso vahe Jesús upe pituse. Ahe güeru mbahe siacua vahe mirra, áloe rese oyeseha vahe, treinta kilo, sehögür rese nara. ⁴⁰ Ëgue ehi José, Nicodemo reseve viraso sehögür yuvireco iyavei oimama tupri turucuar secose vahe imoiacuapri pipe yuvireco. Ëgue ehi judío oyapo ava omano vahe tĩ ãgua yuvireco yepi. ⁴¹ Namombrii Jesús aticasa sui oime mbia remiti rēta. Aheve ité oime tuvípa ita hopri, ipiasu vahe iporupiréhi. ⁴² Ipipe omoingue Jesús rehögür yuvireco. Esepia, ahe tuvípa cōimi eté ichui iyavei viroví ité judío pituhusa ari.

20*Jesús cuerayevisa*

¹ Domingu pipe María Magdalena oso tuvipave p̄itu vitemiseve. Ahe osepia ita tuvipa rovapisa ndahe irise güendave ihāi. ² Evocoiyase ahe cuña oña oso Simón Pedro upe, cheu avei aipo ehi:

—¡Viraso tuvipa sui yande Yar yuvireco! ¡Ndoroicuai que vo catu omondo yuvireco! —ehi.

³ Evocoiyase Pedro rese oroña oroso tuvipave. ⁴ Che rumo aña catu Pedro sui. Che rane evocoiyase ayepota tuvipave. ⁵ Aiviro tēi, turucuar güeraño rumo asepia aheve. Ndaiquei rumo ipipe. ⁶ Ipare Pedro oyepota che raquicuei, oique voi tuvipa pipe. Ahe avei osepia turucuar imama agüer tēi. ⁷ Iyavei osepia turucuar ñaca mamasa. Ndahei eté setecuer mamasa rese tui; ahe rumo co coti ité ipoquesa tupri ou. ⁸ Evocoiyase che avei aique; asepia ēgue ehi vahe. Ahese aroya voi eté. ⁹ Ore rumo ndorosenducua v̄itei eté icuachi-apri: “Ocuerayevira omano vahe pāhu sui” ehi vahe. ¹⁰ Ipare oroyevipa oroso ore r̄etave.

Jesús oyemboyecua María Magdalena upe

¹¹ María rumo, ore raquicuei ou vahe, opitaño ité tuvipa ipive, oyaseho. Oyasehoseve oiviro iri tuvipa pipe, ¹² ahese osepia ñuvirío Tūpa rembiguai iturucuar morochí vahe oguapi yuvínoi sehögür rupagüerve. Ñepei oguapi oñaca rupagüer coti, ambuae ipi rupagüer coti. ¹³ Ahe Tūpa rembiguai oportandu yuvireco chupe:

—Cuña, ¿mahera vo ereyaseho? —ehi.

Ahe aipo ehi:

—Esepia, che Yar rehögür viraso yuvireco iyavei ndaicuai que vo catu omondo yuvireco —ehi.

¹⁴ Aipo oheseve, oyemboyere, osepia Jesús aheve secoise; “Jesús co secoi” ndehi eté rumo chupe. ¹⁵ Evocoiyase oportandu María upe:

—Cuña, ¿mahera vo ereyaseho? ¿Ava vo ereseca? —ehi chupe.

Ahe omoha ‘co mbahe miti r̄eta r̄erosar revo’ oya viña, aipo ehi chupe:

—Nde ererasose sehögür, emombehuñomi tēi cheu que vo eremondo. Aheve taso seca —ehi chupe.

¹⁶ Evocoiyase,

—¡María! —ehi chupe.

Ahe aipo hese, oyemboyere, aipo ehi hebreo ñehe pipe chupe:

—¡Rabuni! —ehi (‘Porombohesar’ ohesave).

¹⁷ Evocoiyase María upe,

—Erepocoi rene che rese. Esepia, ndayeupi vitei che Ru recosave. Esoño, emombehu che reroyasar upe: “Jesús oyepira Vu Tūpa recosave” erera chupe. Che Ru, pe Ru avei; che Tūpa, pe Tūpa avei —ehi.

¹⁸ Evocoiyase María Magdalena ou imombehu: “Asepia yande Yar” ehi iyavei opa omombehu mbahe semimombehu oreu.

Jesús oyemboycua güemimbohe upe

¹⁹ Ahe arí pipeve, domingu pipe, pítuse, ore ore ñemonuhasave oroyeoquenda tupri judío rerecuareta sui ore siquiyepave. Ahese Jesús oique ore pāhuve. Ore mboavirave.

—¡Peico tupri! —ehi oreu.

²⁰ Aipo ohe pare, omboycua opo, oique avei oreu. Ahese orerorivete yande Yar repiase oroico. ²¹ Ipare aipo ehi iri:

—¡Peico tupri! Inungar che Ru che mbou, ēgue ahe aveira co che pēu —ehi oreu.

²² Ichui ore peyu:

—Peipisi Espíritu Santo —ehi—. ²³ Peñeroise que ava upe, ahese ahe oipisira ñeroisa; napeñeroise rumo que ava upe, ahe evocoiyase ndoipisi chira ñeroisa —ehi oreu.

Tomás osepia yande Yar icuerayevise

²⁴ Nepei ore mboetasa rumo Tomás icōi vahe, ndipoi eté ore pāhuve Jesús oyemboycuase oreu. ²⁵ Ipare ore aipo orohe chupe:

—Orosepia yande Yar —orohe.

Tomás rumo aipo ehi:

—¡Too! Acoi asepiase voi eté quiravo cuarer ipo rese iyavei amoinguese che cuā quiravo cuarer pipe iyavei amoinguese che po yique cutu agüerve, ahese ramo aroyara —ehiño oreu.

²⁶ Ocho arí pare, ore oroñemonuha iri oí pipe oroico. Aheve ramo Tomás secoi ore pāhuve. Yepe oroyeoquenda tupri ité viña, Jesús rumo oiqueño ité ou ore pāhuve, ore mboavirave aipo ehi:

—¡Peico tupri! —ehi oreu.

²⁷ Ipare aipo ehi Tomás upe:

—Esepia che po, emoingue nde cuā quiravo cuarerve; embou ave nde po, emoingue avei che ique cutu agüerve. “Tachequeréhi eme seroya água” nderei chira cheu; ¡che reroya eve! —ehi.

²⁸ Evocoiyase Tomás aipo ehi:

—¡Che Yar Tūpa! —ehi chupe.

²⁹ Ahese aipo ehi Tomás upe:

—¿Cûritei che reroya che repiase eve cute? ¡Aviye catu ava che repiaéhi pipe che reroya vahe! —ehi chupe.

Co icuachiapri Jesús reroya água

³⁰ Jesús oyapo setá ambuae poromondiisa ore rovaque. Ahe rumo ndaicuachiai co cuachiar pipe. ³¹ Co rumo aicuachía ‘tovíroya Jesús, Poropísírosar, Túpa Rahír secosa; ipipe tovireco tecovesa yuvireco’ che yapave.

21

Jesús oyemboyecua siete güemimbohe upe

¹ Ore sore ivi Galilea ve, Jesús oyemboyecua iri oreu ipa Tiberia ve. ² Ahese oyeseve Simón Pedro yuvirecoi, Tomás ahe acoi icōi vahe, Natanael, ahe aipo tecua Caná pendar ivi Galilea rese, ñuvirío ore Zebedeo rahír oroico vahe iyavei ambuae ñuvirío Jesús remimbohe. ³ Simón Pedro aipo ehi:

—Asora pira mboha —ehi.

Ore avei aipo orohe:

—Toroso nde rupi —orohe chupe.

Orosoño, oroha carite pipe. Ahe pítu pipe rumo ndorombohai eté pira. ⁴ Cõhe potase rumo, Jesús oyemboyecua imbehi ivii. Ore rumo ndoroicuai eté Jesús secose. ⁵ Evocoiyase aipo ehi oreu:

—Mbía chihivahe, ¿ndapembohaimi eté pira? —ehi.

—Aní eté —orohe chupe.

⁶ Evocoiyase aipo ehi:

—Pemondo pira mbohasa ive peasu coti. Ahese pembohara —ehi.

Égüe orohe, ipare voi, “¡Too!” orohe, ndorovinose catui eté ipi sui pira mbohasa oroico. Esepia, savapi pipe tupri ité pira pipe. ⁷ Evocoiyase che, sembiaisu, aipo ahe Pedro upe:

—¡Yande Yar niha evoco! —ahe.

Pedro che ñehe rendu ramoseve voi, omonde oturucuar. Esepia, yipindar nani secoi; opo ive oso chupe. ⁸ Ore evocoiyase orovíroyepota ité carite ndatipiimisave, oroichoho pira rehii imbohasa pipe seraso, cien metro tēi oroico imbehi sui. ⁹ Orovinoñese ivi ãtasave, orosepia tâtapii harive pira, pan reseve.

¹⁰ —Peru moviro evoco pira penose ramo vahe —ehi oreu.

¹¹ Evocoiyase Simón Pedro oha carite pipe, oichoho ndatipiisave pira guasu rehii imbohasa pipe, ciento cincuenta y tres tupri; yepe setá viña, imbohasa rumo ndosoroi eté. ¹² Evocoiyase aipo ehi:

—Perio, tapecarumi rane —ehi oreu.

Ndipoi eté que ñepei ore pâhuve “¿ava vo nde ereico?” ehi vahe chupe. Esepia, oroicuaño ité yande Yar secose. ¹³ Chupe ore sore, oipisi pan, ombou oreu, égüe ehi avei pira imbou oreu.

¹⁴ Co rese Jesús oyemboyecua mbosapi rupi oreu ocuer-ayevire.

Jesús osecoāha Pedro

¹⁵ Ore caru pare, Jesús oporandu Simón Pedro upe:

—Simón, Juan rahir, ¿che raisu catu ité eve co mbahe sui? —ehi.

—Taa, che Yar, ereicua niha che nde raisusa —ehi Pedro chupe.

—Ndehañeco tupri ru catu che reroya ramomi vahe rese yuvireco —ehi.

¹⁶ Imoñuviriosa rupi oporandu iri chupe:

—Simón, Juan rahir, ¿che raisu catu ité eve? —ehi.

—Taa, che Yar, nde ereicua che nde raisusa —ehi Pedro chupe.

—Evocoiyase esāro tupri che reroyasar yuvireco —ehi.

¹⁷ Imombosapisa rupi oporandu iri chupe:

—Simón, Juan rahir, ¿che raisu vo eve? —ehi.

Aipo oyeupe hese, Pedro ndoyembovihai eté aipo ehi:

—Che Yar, nde niha opacatu ereicua, nde avei ereicua che nde raisusa —ehi.

—Evocoiyase ndehañeco tupri catu che reroyasar rese —ehi—. ¹⁸ Supi eté aipo ahe ndeu: nde chihivahe catu vitese, ereyemonde vite nde ae, ereduata vite avei nde remimbotar rupi; nde cuacua catuse rumo, ereyeyivamoatara, ambuae evocoiyase nde mboyemondera, nde reraso aveira nde so potaēhisave —ehi.

¹⁹ Jesús rumo omboyecua aipo ohe piipe mara ehira Pedro omano Tūpa mboeteisave curi. Ipare,

—¡Erio che rupi! —ehi Pedro upe.

Jesús remimbohe saisupri

²⁰ Che Jesús rembiaisu ité aico, che ité acoi carusa ipa vaheve yipive aí acoi aporandu chupe: “Che Yar, ¿ava vo nde mondora nde amotarēhimbar upe?” ahe acoi chupe. Aguatase Pedro raquicuei, oyemboyere che repia. ²¹ Ahese oporandu chupe:

—Che Yar, evoco no, ¿mbahe oimera chupe? —ehi cheu.

²² Evocoiyase omboyevi Pedro upe:

—Che aipotase secove vite água che yevise nara, ¿mara vo nde ererecora viña? Nde catu, eguataño che rupi —ehi.

²³ Sese ambuae Jesús reroyasar ipihañemoñeta tēi aipo che namanoi chivaherá ité yuvireco viña. Jesús rumo ndahei ‘nomanoi chietera’ ohesave aipo ehi cheu; ahe rumo, “Aipotase secove vite água che yevise nara, ¿mara vo nde ererecora viña?” ehi.

24 Che ité amombehu co mbahe, che avei aicuachía iyavei yaicua supi tupri vahe ité che remimombehu.

25 Oime avei ambuae mbahe setá Jesús rembiapo, que opacatú icuachiasase viña, ndiyai chietera revo ivi viña. Aipo rupive.

APOSTOL REMBIAPO LOS HECHOS

Tūpa omboura Espíritu Santo viroyasar upe

¹ Imboeteipri Teófilo, cuese amondo evocoí che rembicuachía Jesús recocuer resendar ndeu. Opa yipindar sembiapocuer amombehu ndeu iyavei yipisui iporombohe agüer. ²Ocuerayevire, ivave oso renondeve, Jesús omombehu oporocuaita Espíritu Santo píratasa pipe güembiporavo apóstol upe sembiaporã. ³Oyemboyecua güembiporavo upe omanore. Setá rupi omboyecua tupri ocuerayevisa chupe. Semimbohe osepio yuvireco imanore cuarenta ari rupi. Ahese omombehu Tūpa mborerecuasa resendar güemimbohe upe.

⁴⁻⁵ Oicove vitese yuvireco sese, aipo ehi chupe:

—Pesēi rene Jerusalén sui. Tomboaviye rane che Ru Tūpa güemimombehu, ahe acoi amombehu pēu. Juan niha pe ãpiramo i pipe tēi; Tūpa rumo Espíritu Santo pipe pe ãpiramora. Movíromi tēi ari ipane vîte imondo ãgua pēu —ehi güemimbohe upe.

Jesús oso ivave

⁶ Oñemonuhase apóstol yuvireco sese, oporandu yuvireco chupe:

—Ore Yar, ¿erembou irira vo cûritei Israel iguar upe píratasa iyeyecuai ãgua? —ehi semimbohe yuvireco chupe.

⁷ Ahe rumo aipo ehi chupe:

—Ndiyai ahe ari cua ãgua pēu. Esepio, Tūpa año ité vireco omborerecuasa ahe mbahe apo ãgua. ⁸ Peipisira rumo Tūpa píratasa oiquesse Espíritu Santo pe piha pipe. Ahese pemombehu tuprira che recocuer Jerusalén pendar upe, Judea pendar, Samaria pendar iyavei opacatu co ivi pipendar upe avei no —ehi chupe.

⁹ Aipo ihe pare, omahe apóstol yuvireco sese, aheseve Tūpa viraso ivave. Ichui Jesús oique iva quiha pâhuve. Evocoiyase ndosepio iri eté yuvireco cute. ¹⁰ Omahe viteseve yuvinoha ivave ichosa rese, aviyeteramo tēi ñuvirío mbia, iturucuar morochí vahe, oyemboyecua apóstol ipive yuvinoha ¹¹ aipo ehi yuvireco chupe:

—Galilea iguar, ¿mahera vo pemahe vîte iva rese pehā? Evocoí Jesú, inungar Tūpa viraso ivave pe sui, ëgue ehi aveira niha ogüeyi ou co ivi pipe coiye —ehi yuvireco chupe.

Jesús remimbohe oiporavo Matías, Judas recuñara yuvireco

¹² Evocoiyase apóstol oyevi yuviraso Jerusalén ve ivitri Olivo sui, ahe ihamombriguer ñepei kilómetro tēi. Supivemi

imombehusa judío guata ãgua mbítuhusa ari pípe yepi. ¹³ Yuvíroiquese Jerusalén ve, oyeupipa oquesa oi ivateve yuvireco. Aheve Pedro, Juan, Santiago, Andrés, Felipe, Tomás, Bartolomé, Mateo, Santiago ahe Alfeo rahír, Simón ahe Zelote iyavei Judas, Santiago rahír yuvirecoi. ¹⁴ Co opacatu ari yacatu rupi oñemonuha oyoya guasu oyeroqui ãgua yuvireco yepi Jesús rívri, ichi, ambuae cuña reseve avei.

¹⁵ Evocoiyase ñepei ari pípe oñemonuha guasu ciento veinte ava yuvireco. Ipáhuve Pedro opúha aipo ehi ava upe: ¹⁶ “Che mu eta Jesucristo reroyasar, iya ité co imboavíyesa Túpa Ñehengagüer Judas recocuer resendar. Ahe imombehupri David upe Espíritu Santo pípe aracahe. Evocoí Judas víraso vahe Jesús amotarëhimbar ipisi uca ãgua. ¹⁷ Ahe acoi secoi yande pähuve co mboravíquisa rese yande pítvii ãgua avei viña. ¹⁸ Evocoí güembiapo ai reprí pípe omboepi ívi. Ipare ñaca iviso ovíapi oso ivive, oyetiapiipa. ¹⁹ Opacatu ava Jerusalén pendar oicua Judas recocuer yuvireco. Sese co íví upe, ‘Acéldama’ ehi yuvireco oñehé pípe ‘Íví Tuvi resendar’ oyapave. ²⁰ Esepia, icuachiapri Salmo pípe aipo ehi:

‘Taseyasa sëta yuvireco.

Tipo iri eme ava ipípe’ ehi.

Iyavei ambuae aipo ehi:

‘Toime ambuae secoyer iporavíqui rägüer pisi ãgua’ ehi vahe.

²¹ “Evocoiyase coháve oime ava yande Yar Jesús secoi vitese yande pähuve ²² ñapiramosa suive yuvirecoiño vahe ité yande rupi iyavei ivave ichosa osepia vahe avei yuvireco. Ahe tiporavosa ñepei ipáhu pendar yande rupi icuerayevi agüer mombehu ãgua” ehi omboetasa upe.

²³ Evocoiyase oiporavo ñuvirío mbía yuvireco: ahe José Barsabás, serosa Justo; ambuae rer Matías. ²⁴ Ipare oyeroqui yuvireco aipo ehi: “Nde, ore Yar, opacatu ava piha ereicua. Emboyecua coháve nde rembiporavo oreu; ¿uma vo ereipota ²⁵ eremondo vaherã icuaitarã apóstol seco ãgua Judas recuñara? Ahe oangaipa pípe oyemocañi uca tẽi vahe oico” ehi Túpa upe yuvireco.

²⁶ Evocoiyase osâha oiporavo yuvireco. Matías ité vinose iporavopri sui yuvireco. Ichui tupri ité oique once apóstol pähuve.

2

Espíritu Santo güeyi agüer

¹ Oyeptase Pentecostés pieta, opacatu Jesús reroyasar oñemonuha oi guasu pípe yuvireco. ² Aheve oi pípe aviyeteramo tẽi ívitu ipírrata vahe nungar siapu guasu ou iva sui. Ahe siapugüer oyendupa tupri oi pípe. ³ Ahese oyecua

tata rendigüer nungar opacatu aheve yuvirecoi vahe haríe.
⁴ Ahese avei Tūpa omoingue evocoí ava piha pipe oEspíritu Santo. Ichui ahe Espíritu omoñehe uca ambuae ñehesa pipe yuvireco.

⁵ Ahe ari pipe setá iteanga judío yuvirecoi Jerusalén veomboaviye vahe ocuaita Tūpa mboeteisa, ahe oñemonuha vahe opacatu ivi rupindar yuvireco. ⁶ Mbahe siapu guasu vahe renduse, oñemonuha ati tēi yuvireco oyese. Ndoyemboaracuaitēi yuvireco ambuae ava oñehe pipe ñehese. ⁷ “¡Too!” ehi tēi oyepihamondiisa pipe yuvireco. Sese aipo ehi oyeupe:

—¿Ndahei vo acoi co ava Galilea ñiguar oñehe vahe yuvireco?
⁸ ¿Mahera pīha co ñepei-peí oñehe yande ñehe pipe yuvireco? —ehi tēi oyeupe yuvireco—. ⁹ Esepiá, coháve yuvirecoi vahe: Partias pendar, Media pendar, Elam pendar, Mesopotamia pendar, Judea pendar, Capadocia pendar, Ponto pendar, Asia pendar, ¹⁰ Frigia pendar, Panfilia pendar, Egípto pendar, Libia cotindar, ahe Cirene cōquivotindar. Iyavei Roma pendar, ¹¹ judío yuvirecoi vahe, ambuae judío aracuasa reroyasar avei, Creta pendar, Arabia pendar. ¡Yande yasendu opacatu yandeu ñehe yuvireco yande ñehe pipe Tūpa rembiapo icatuprī vahe! —ehi.

¹² Opacatu oyepihamondií, ndoicuai opíhañemoñeta ãgua yuvireco.

—¿Mara ehi pīha co na oya yuvireco? —ehi-ehi tēi yuvireco oyeupe.

¹³ Ambuae ava rumo seroñrosa pipe aipo ehiño yuvireco:

—¡Osavaipo mo evocoí yuvireco! —ehi.

Pedro oñehe ava upé

¹⁴ Evocoiyase Pedro opūha opacatu once vahe apóstol pāhuve, oñehe pírata aipo ehi: “Che mu judío eta, opacatu Jerusalén pendar avei, peicua co mbahe amombehu vaherā pēn; peyapisaca tuprī che ñehe rese: ¹⁵ ndosavaipoi moco co mbia yuvireco. ¿Ndapesepiai vo añihivei vité cüritei? ¹⁶ Co niha Tūpa ñehe mombehusar Joel oicuachía vahe aracahe:

¹⁷ ‘Tūpa aipo ehi:

Coiyé, ari cañi renonde, amondora che Espíritu Santo opacatu ava upé.

Ipíratasa pipe pe rahír, pe rayrí oñehera yuvireco.

Mbia chihivahe osepiara oquer pendar nungar mbahe yuvireco.

Oime aveira queraisa supi eté vahe cuacua vahe upé.

¹⁸ Supi eté ahe ari pipe amondora che Espíritu che rembiguai cuimbahe upé, che rembiguai cuña upé avei.

Ipare oñehera yuvireco che rese ipíratasa pipe.

¹⁹ Amboyecuara poromondiisa íva rese.

Êgüe ahe aveira poromondiisa mboyecua ivi pipe:
tuvi, tata iyavei tātachi.

²⁰ Yande Yar ari tuvichá vahe imboeteipri renonde ohara pítu,
yasi oyeapora tuvi nungar.

²¹ Opacatu ava, che Yar che pítiyii eve, ehi vahe, ahe
oñepisirora yuvireco' ehi Joel icuachía aracahe.

²² "Pe Israel suindar, pesendu che ñehe: Jesús, Nazaret
pendar, oyapo poromondiisa tuvichá vahe, mbahe yavai
vahe Tūpa píratasa pipe pe pāhuve güeco maranehi mboyecua
água. Ahe niha peicua opacatu. ²³ Ipare rumo evoco Jesús
imondosa pēu yuca água. Ahe rumo Tūpa remimbotar rupi.
Esepiá, yipive ité Tūpa oicua pe peipisira yuca uca água curusu
rese ava naporai vahe upe. ²⁴ Tūpa rumo ombogüerayevi
manosa sui. Esepiá, manosa ndoicatui sereco água. ²⁵ Supi eté
mborerecuar guasu David oñehe Jesús recocuer rese aracahe
aipo ehi:

'Che aicua che Yar che rese secoi che acato coti mbahe tēi pipe
che viapiéhi água yepi.

²⁶ Sese aviháño ité vichico, asapucái avei che rorivetesá pipe.
Iyavei che yeroya tuprisave asárora mbahe avíye vahe che
recove iri água.

²⁷ Esepiá, nde ndereseyai chira che hā omano vahe pāhuve,
nderemonduyu ucai chiaveira nde rembiguai seco
maranehi vahe retecuer.

²⁸ Co tecovesa ereicua uca cheu.

Che mbovhara eve nde rese che recose' ehi David aracahe.

²⁹ "Che mu eta, supi eté yande ramoi David omano, ñotisa
ita hopri pipe aracahe. Ahe suvípa ouve vite coháve yande
pāhuve. ³⁰ David rumo Tūpa ñehe mombehusar, oicua Tūpa
oyeupe aipo ehi vahe: 'Supi eté aipo ahe ndeu: nde suindar
oimera mborerecuar guasu nde recuñara' ehi vahe. ³¹ Ahe
ndoyavii osepiá vahe ité Poropísírosar cuerayevisa. Evo-
coiyase aipo ehi oñehe sese: 'Ihā ndopitai chira omano
vahe pāhuve iyavei setecuer ndituyui chira' ehi aracahe.
³² Evoco Jesús, Tūpa remimbogüerayevi secoi. Ahe imombe-
husar opacatu ore oroico. ³³ Ipare Tūpa viraso oacato coti
imboguapi. Ahe oipisi imombehupri Espíritu Santo Vu sui.
Evocoiyase ahe opa omondo co ava yuvirecoi vahe upe. Ahe
pesepia, pesendu avei cürítei peico. ³⁴ Esepiá, evoco oso vahe
ivave ndahei David. Ahe ae rumo aipo ehi aracahe:

'Yar aipo ehi che Yar upe:

Eguapi coháve che acato coti che píri.

³⁵ Asecopipa uca ranera nde amotaréhimbar ndeu, ehi Yar
che Yar upe' ehi David aracahe.

³⁶ "Pe tapecuasapa, ticuasapa avei opacatu Israel recua
rupi, supi eté evoco Jesús curusu rese peyatíca vahecuer, ahe

Tūpa omoingo opacatu yande Yarā iyavei yande písiro ãgua" ehi Pedro ava rehii upe.

³⁷ Aipo renduse, tasí iteanga ipiha pipe yuvireco. Evocoiyase oporandu chupe, ambuae imboetasa upe avei yuvireco:

—Ore mu, ¿mbahe vo oroyapora evocoiyase? —ehi.

³⁸ Evocoiyase aipo ehi ahe ava upe:

—Pemboasi pe angaipa; peyevi Tūpa upe. Iyavei peñeapiro opacatu Jesucristo rer pipe. Evocoiyase Tūpa iñerora pe angaipa rese. Iyavei omondora Espíritu Santo pēu.

³⁹ Esepia, co ñehesa imombehupri, ahe pēu nara, pe suindar upe nara iyavei opacatu amombri Tūpa sui yuvirecoi vahe upe nara avei, ahe acoi opacatu yande Yar Tūpa oyeupe nara güeru pota vahe —ehi.

⁴⁰ Ëgüe ehi oñehé vite ava mboaracua aipo ehi:

—¡Peyepépi co ava secocuer co coti tēi vahe sui! —ehi chupe.

⁴¹ Acoi ava viroya vahe co ñehesa, oñeapiro uca yuvireco. Ahe ari pipe oyemboeta iri tres mil ava yuvireco Jesús viroya vahe rese. ⁴² Opacatu viroya tupri ité apóstol porombohesa. Opacatu guasu avei oyeaísu tupri yuvireco, oyeroqui iyavei oñemonuha oyeupe pan mboyaho-yaho ãgua yuvireco yepi.

Yipindar vahe Jesús reroyasar recocuer

⁴³ Opacatu oyembosiñuiye imboeteisa pipe yuvireco. Esenia, apóstol oyapo setá poromondiisa 'toicua Tūpa suindar yande porombohesa yuvireco' oyapave. ⁴⁴ Opacatu Jesús reroyasar ipihañemoñeta tupri ité ombahe rese yuvireco güecocuer upe nara. ⁴⁵ Omondo ambuae ava upe oivi iyavei ombahe eta yuvireco. Sepri omondo oyeupe mbahe panesa rupi-rupi. ⁴⁶ Ari yacatu rupi judío tūparove oñemonuha yuvireco. Iyavei oi yacatu rupi avei oñemonuha oyoya guasu pan mboyaho ãgua. Ipare oyoya guasu ocaru yuvireco oyembóvihasa pipe, opihañemoñeta tuprisa pipe avei. ⁴⁷ Osapucai yuvireco Tūpa upe yepi iyavei opacatu ava osaisu Jesús reroyasar yuvireco. Yande Yar evocoiyase ari rupi omboeta catu ava iñepisiro ãgua Jesucristo viroya vahe pâhuve.

3

Ndoguatai vahe cuerasa

¹ Ñepei ari aipo, caharuse las tres pipe, Pedro, Juan reseve oyoya yuviraso judío tūparove. Ahe hora pipe judío oyeroqui yuvireco yepi. ² Ahe tūparo roquendipi rer Porañete. Aheve ari yacatu rupi viraso ñepei ava oyesu suive ndoguatai vahe 'tomondo guarepochi ava tūparove yuviroique vahe yuvireco chupe' oyapave. ³ Ahe ndoguatai vahe omahe Pedro, Juan

rese tūparove seique potase, oporandu guarepochi rese chupe.
⁴ Pedro, Juan avei rumo omahengatu yuvireco sese. Pedro aipo ehi chupe:

—Emahe ore rese —ehi.

⁵ Evocoiyase ahe mbia omahengatu sese ‘omboura revo que mbahe cheu’ oya viña. ⁶ Aipo ehi rumo ndoguatai vahe upe:

—Che ndarecoi guarepochi, oro avei. Co areco vahe rumo amondora ndeu: Jesucristo, Nazaret pendar, rer pi-pe epūha, eguata —ehi chupe.

⁷ Evocoiyase oipisi ipo yasu cotindar imopuha. Ahe ramoseve opa tupri ipi, ipiñuha avei ovíracua. ⁸ Evocoiyase opūha, opo, oguata; oique oso tūparove supi. Opo-opo vorivetesave iyavei osapucai Tūpa upe. ⁹ Opacatu ava osepia yuvireco iguatase iyavei Tūpa upe isapucaise. ¹⁰ Omahecuse sese, “¡Too!” ehi tēi yuvireco. Iyavei ndoyembovihai aviyeteramo tēi icuerase yuvireco. Esepia, evocoi ava oicuapa tūparo roquendipi Porañete serer vahesave chinise mbahe rese iporanduse yuvireco yepi.

Pedro oñehe ava rehīi upe tūparo Corero Salomón serer vahevriye

¹¹ Ndoguatai vahecuer ndoyepepi potai Pedro, Juan sui. Yuvinoña ati, oyepihamondii ava sepia tūparo Corero Salomón serer vaheve yuvirecoise. ¹² Pedro evocoiyase aipo ehi ava upe: “Che mu, ¿mahera vo peyemondii? ¿Mahera vo ore repia ati peye? Ndoyavii co ore pīratasa pi-pe tēi iyavei Tūpa rese ore pihañemoñeta tuprisa pi-pe tēi orombogüera vahe co mbia pēu viña. ¹³ Tūpa, ahe acoi Abraham, Isaac iyavei Jacob viroya yuvireco aracahe iyavei opacatu yande ramoi eta avei no, ahe niha omondo güeco pīratasa tuvicha catu vahe Guahir Jesús upe. Pe rumo acoi pemondoño mborerecuar Pilato povrige. Acoi omose potase, pe evocoiyase ndapeipotaiño imose água chupe. ¹⁴ Ahe seco maranehi vahe, seco iví vahe renose rāgüler pi-pe, peporandu: ‘Tosē oporapichi vahe’ peye. ¹⁵ Ëgüe peye acoi tecovesa ombou vahe yuca. Tūpa rumo ombogüerayevi omano vahe pāhu sui. Ahe niha ore oromombehu oroico pēu. ¹⁶ Co Jesús rer rese yeroya pi-pe ité niha oipisi pīratasa co mbia ndoguatai vahecuer opacatu pe pesepia vahe iyavei peicua vahe. Jesús rese yeroyasa pi-pe ité niha co pe rembiepiave ocuera tupri” ehi ava upe.

¹⁷ “Che mu eta, che aicua acoi pe peipítivi vahe pe rerecuar Jesús yuca uca áqua pe icua tupriëhi pi-pe cuese. ¹⁸ Ëgüe ehi Tūpa imboaviye aracahendar opacatu oñehe mombehusar upe güemimombehugüer: ‘Che Rembiporavo Poropísrosar oiporarara mbahe-mbahe tēi rasicuer omano’ ehi vahe.

19 Sese pemboasi pe angaipa; peyevi Tūpa upe. Ipípe sui tomocañi pe angaipa pe sui. Aviyeteramo co sui omboura yande Yar pe reco morohisa água, ²⁰ ombou aveira Jesús, ahe yipisuive iporavopri pe písiro água. ²¹ Cûritei rumo Jesucristo ívave vite secoi acoi Tūpa opase voi omoingatu opacatu mbahe iyevi água. Aipo ehi acoi imoñehe uca aracaheendar oñehe mombehusar ndaseco marai vahe. ²² Moisés yande ramoi yuvirecoi vahe upe aipo ehi imombehu aracahe: ‘Yande Yar Tūpa omopuhara ñepei oñehe mombehusar pe pâhuve che nungar. Ahe iñehe pesendura, pemboyeroya catu aveira. ²³ Opacatu ndovíroyai vahe iñehe Tūpa omocañira güembiporavo pâhu sui’ ehi.

²⁴ “Egüe ehi opacatu Tūpa ñehe mombehusar Samuel suive aracahe omombehu avei co ari cûritei yasepia vahe yuvireco. ²⁵ Pêu nara niha Tūpa ñehe mombehusar remimombehugüer aracahendar. Pêu nara avei acoi Tūpa omombehu vahe güemimbotar yande ramoi eta upe. Esepia, aipo ehi Abraham upe aracahe: ‘Opacatu ava co íví pipendar ahe sovas-apri yuvirecoira nde suindar sui’ ehi. ²⁶ Acoi Tūpa Guahir ombogüerayevise, pêu rane ombou pe rovasa água ‘toseyapa ñepei-peí güecocuerai yuvireco’ oya” ehi Pedro ava rehii upe.

4

Pedro, Juan serasosa mborerecuar rovai

¹⁻² Pedro, Juan reseve oñehe viteseve ava rehii upe, ahese oñemoirosa pipe pahi eta, tûparo rârosar sundao rerecuar, saduceo avei oyugüeru yuvireco chupe. Esepia, Pedro iyavei Juan ombohe ava yuvireco aipo ehi: “Jesús ocuerayevi; sese oime cuerayevisa omano vahe pâhu sui” ehi. ³ Ichui oipisi seraso soquenda yuvireco ‘ayihive voi yanosera mbahe rese porandu água’ ohesa pipe. Esepia, caharuse têi osoquenda yuvireco. ⁴ Setá rumo ava iñehesa osendu vahe viroya yuvireco. Ahe cuimbahe seroyasar retacuer güeraño seni cinco mil.

⁵ Ahere ayihive mborerecuareta oñemonuha yuvireco Jerusalén ve: judío rerecuar, pahi eta rerecuar, Moisés porocuaita rese oporombohe vahe, ⁶ pahi rerecuar ívate catu vahe Anás, Caifás, Juan, Alejandro, opacatu omu reseve. ⁷ Evocoiyase güeru ucase Pedro iyavei Juan opâhuve yuvireco, oporandu yuvireco chupe:

—¿Ava pe cuaita pipe vo, ava rer pipe avei vo co mbahe peyapo? —ehi.

⁸ Evocoiyase Pedro, Espíritu Santo pîratasa pipe, aipo ehi chupe:

—Pe, mborerecuareta co tecua pipendar, pe avei pahi rerecuar: ⁹ peporandu niha co ava imbaheasi vahe ndoguata catui vahe mbogüera agüer rese oreu —ehi chupe—. ¹⁰ Evocoiyase tapeicuapa opacatu pe Israel suindar peico vahe ocuera co ava ndoguata catui vahecuer Jesucristo, Nazaret pendar, rer pipe. Ahe niha peyatica uca vahecuer curusu rese. Tüpa rumo ombogüerayevi iri omano vahe pāhu sui. ¹¹ Co Jesús pe remieroiro, ahe rumo yande vīracuasa. Pe evocoiyase inungar oi mopuhasar omomboño vahe ita aviyé catu vahe oi moviracuasa rāgüer yepi. ¹² Ndipoi que ambuae ava sui poropísirosa, Jesús güeraño ité oicatu oporopísiro. Esepia, Tüpa nomboui ambuae ava tēi co ivi pipe yande písiro água —ehi.

¹³ Mborerecuar osepiase iyembosiquiyeēhisa yuvireco, “¿Mara ehi pīha co mbīa? ¡Ava tēi, ndoyembohei vahe niha!” ehi tēi yuvireco chupe. Ichui oicua Jesús remimbohegüer secose yuvireco. ¹⁴ Iyavei acoi ava semimbogüeragüer supive ité secoise, sese ndoicatui chupe oñeha mara água yuvireco. ¹⁵ Ipare, “Pesē ocarve” ehi mborerecuareta yuvireco chupe. Ahe güeraño evocoiyase opita oi pipe oñemoñeta yuvireco sese ¹⁶ aipo ehi:

—¿Mara yahera vo co ava rereco? Esepia, opacatu ava Jerusalén pendar oicua co mbahe poromondiisa oyapose yuvireco. Ndiyai eté, “Egüe ndehi” yahe chupe. ¹⁷ Yambosiquiye ava upe Jesús rer rese iñeha iriēhi água yuvireco. Ipipe sui ava tosendu iri eme Jesús resendar ñehesa yuvireco —ehi.

¹⁸ Aipo ohe pare, “Perio” ehi yuvireco chupe. “Pesendu, co pipe suive peñeha iri eme tupri iyavei pembohe iri eme avei ava Jesús rer pipe” ehi yuvireco chupe. ¹⁹ Omboyeviño rumo oñeha yuvireco chupe:

—¿Mara ehi pe pihave? ¿Uma pīha aviyé catu Tüpa rovai? ¡Pe porocuaita tie oroviroya catura Tüpa ore cuaisa sui! ²⁰ Ndiyai rumo mbahe ore rembiepia, mbahe orosendu vahe avei mombehuehi água oreu —ehi.

²¹ Aipo ihese, mborerecuar ombosiquiye catu tēi yuvireco. Ichui rumo omose tupriño. Esepia, ava omboetei guasu Tüpa yuvireco co imbaheasi vahe mbogüera repiase. Sese ndoicatui eté mbahe apo yuvireco chupe. ²² Evocoí ava oipisi vahe Tüpa poromondiisa ocuera água, ahe otíaro catu cuarenta aravíter vireco vahe sui.

Jesús reroyasar oporandu Tüpa upe siquiyeehisa rese yuvireco

23 Yuvínoses Pedro, Juan avei, oyeví yuvíraso omboetaso piri. Aheve oñemonuhasave opa omombehu pahi rerecuar oyeupe ñehe mara-mara tēisa yuvireco. ²⁴Aipo rendu pare, oyoya guasu oyeroqui yuvireco Tūpa upe aipo ehi: “Ore Yar, nde niha Tūpa opacatu íva, íví, para guasu, opacatu ipor reseve aposar ereico. ²⁵Nde Espíritu Santo pípe aipo eremombehu uca nde rembiguai mborerecuar David upe aracahe:

‘¿Mahera vo co ava ndahei vahe judío oyamotaréhi yuvireco?
¿Mahera vo ipihañemoñeta rai tēi yuvireco?’

26 Mborerecuar guasu eta, ambuae mborerecuar reseve co íví pipendar oñemonuha yuvireco yande Yar Tūpa iyavei sembiporavo amotaréhi água’ ehi aracahe.

27 “Égüe ehi eté oñemonuhase Herodes, Poncio Pilato avei, ava ndahei vahe judío, judío eta reseve yuvireco co tecua Jerusalén ve. Esepia, oñemonuha yuvireco nde rembiguai aracaheve nde Rembiporavo Poropísrosar Jesús, seco maranehi vahe, amotaréhi água. ²⁸Égüe ehi yapo opacatu nde pihañemoñeta aracahendar rupi tupri ité yuvireco. ²⁹Iyavei cüritei, ore Yar, emahe ore amotaréhisar rese. Embou nde píratasa nde rembiguai oroico vahe upe siquiyéehisa pípe nde ñehengagüer mombehu vite água. ³⁰Ipare, nde píratasa pípe, embogüera imbaheasi vahe iyavei eyapo mbahe poromondiisa yavai vahe nde rembiguai Jesús rer maranehi pípe” ehi yuvireco oyeroqui.

³¹ Iyeroqui pare, Tūpa omborírii opacatu mbahe iñemonuhasave yuvireco chupe. Ahese Espíritu Santo opa oique yuvireco sese. Sese osiquiyéehisa pípe omombehu tupri Tūpa Ñehengagüer yuvireco.

Jesús reroyasar ombahe opacatu oyeupe nara vireco yuvireco

32 Setá iteanga Jesús reroyasar yuvireco. Opacatu oyoya tupri ipihañemoñeta yuvireco. Ndipoi eté “co güeraño co che mbahe” ehi vahe; opacatu seroyasar mbahe rumo opacatu mbahe. ³³Jesucristo apóstol omombehu vite ipíratasa pípe icuerayeví agüer yuvireco. Ipípe Tūpa osovasa catu vite opacatu yuvireco. ³⁴Ndipoi eté ipáhu pendar mbahe ndovirecoi vahe. Esepia, opacatu íví vireco vahe iyavei oíomondo, ³⁵ahe seprí oimondo apóstol upe yuvireco yepi. Ahe evocoiyase omboyaho-yaho opacatu upe mbahe ipane vahe rupi-rupi yuvireco. ³⁶Égüe ehi ava judío ramoi Leví suindar, Chipre pendar, José serer vahe, apóstol osero, “Bernabé” ehi yuvireco chupe (‘porombovihasar’ oya aipo ehi), ³⁷ahe mbia oimondo oíví, güeru seprí apóstol upe.

5

Ananías iyavei Safira yemboangaipa agüer

¹ Ambuae ava rumo, Ananías serer vahe, güembireco Safira reseve omondo ivi yuvireco. ² Ahe mbia rumo omboyaho sepri, ñepei iyahocuer vireco oyeupe nara, ambuae iyahocuer viraso apóstol upe, sembireco avei oicua tēi opacatu. ³ Evocoiyase Pedro aipo ehi chupe:

—Ananías, ¡mahera ereroya Caruguar nde piha pipe Espíritu Santo mbopa água, eremboyahoño tēi nde ivi reprí guarepochi ndeyeupe nara! ⁴ ¿Ndahei vo nde mbahe ité ivi viña? Eremondo ité niha, evocoiyase nde mbahe ité guarepochi. ¡Mahera ereyapo co nungar! Ndahei ava upe nde remira, Tūpa upe ité rumo nde remira —ehi chupe.

⁵ Osenduse Pedro ñehesa, oviapi sehögür oso sovai. Ahese opacatu oyandu vahe osiquiye tēi yuvireco. ⁶ Ipare mbia chihivahe yugüeru, osupi sehögür, oipoque seraso yuvireco ñotí água.

⁷ Mbosapi hora pare, sembireco Safira serer vahe oique oi pipe. Ndoicua vitei rumo omer mano. ⁸ Ahese Pedro oporandu chupe:

—Emombehu cheu: ¿Co guarepochi retacuer rupi eté vo pemondo pe ivi? —ehi chupe.

—Evocoí rupive ité niha oromondo —ehiño avei cuña chupe.

⁹ Evocoiyase aipo ehi ahe cuña upe:

—¡Mahera peyemboyoya pe pihañemoñetasa rese pe secoáha água yande Yar Espíritu! Coi yugüeru nde mer tísarer. Nde avei nde reraso água yuvireco eipeve —ehi chupe.

¹⁰ Ahe ramoseve avei oviapi sehögür Pedro rovai. Mbia chihivahe yuviroquese, oipoque voiño ité sehögür seraso imer ivi ñotí água yuvireco. ¹¹ Opacatu Jesús reroyasar, ambuae ava avei oyembosiquiye guasu yuvireco yanduse.

Setá poromondiisa yaposa

¹² Evocoiyase apóstol pipe Tūpa omboynecua uca setá poromondiisa ava pāhuve yuvireco. Opacatu Jesús reroyasar oñemonuha judío tūparo ique, Salomón serer vahesave yuvireco. ¹³ Opacatu ambuae ndoyemboyai yuvireco sese osiquiye pave. Ava rehii rumo, omboetei eteanga apóstol yuvirecoi vahe yuvireco. ¹⁴ Oyemboeta catu yande Yar reroyasar setá cuimbahe, setá avei cuña. ¹⁵ Iyavei ava rehii vinose yuvireco imbaheasi vahe supa reseve-seve Pedro renonera, “Oñocuase Pedro, aviyeteramo omohara ihägür. Ahese revo ombogüerara” ehi yuvireco oyeupe. ¹⁶ Ava Jerusalén ivirindar avei güeru omonuha setá imbaheasi vahe,

caruguar rese yuvirecoi vahe apóstol upe imbogüerapirā. Ahe evocoiyase opacatu ombogüera yuvireco.

Apóstol yamotarēhipri yuvirecoi

¹⁷ Ichui tēi pahi rerecuar ivate catu vahe, saduceo yuvirecoi vahe oñemoiro yuvireco apóstol upe ava rese güecatēhisave. ¹⁸ Sese oipisi osoquendapa uca yuvireco. ¹⁹ Ipare rumo, pītu pipe, Tūpa rembiguai iva pendar ou omboi oquenda, vinose ichui, aipo ehi chupe: ²⁰ “Peso tūparo guasuve, pemombehu avei ava upe co ñehesa tecocuer piasu resendar” ehi chupe. ²¹ Co mbahe rendu pare, supi tupri ité oyapo yuvireco. Cōhe ramoseve yuviraso judío tūparo guasuve ava mbohe ãgua.

Aheseve pahi rerecuar ivate catu vahe, supindar avei osenoi opacatu tecua pipendar mborerecuar ñemonuha ãgua ivate catu vahesave; omundo yuvireco güembiguai apóstol reru ãgua soquendasa sui aheve nara viña. ²² Oyepotase rumo sembiguai yuvireco, oseca tēi soquendapri. Ichui oyevi tēi yuvireco imombehu ²³ aipo ehi:

—Oroyepotase ava roquendasave, orosepia opacatu oquenda imboyapri tupri iyavei orosepia opacatu oquendapi rupi sārosar osāro tupri ité viña. Oromboise rumo oquenda, ndipoi eté ava soquendapri ipipe —ehi tēi yuvireco.

²⁴ Osenduse, pahi rerecuar ivate catu vahe, tūparo rārosar rerecuar, pahi rerecuareta avei yuvireco, ipihañemoñeta tēi: “¿Que rupi vo opoira co mbahe sui yuvireco?” ehi tēi yuvireco oyeupe. ²⁵ Aheseve ñepei mbia oyepota imombehu:

—Evocoi pesoquenda vahecuer, ahe mbia cūritei oporombohe tūparove yuvireco —ehi chupe.

²⁶ Evocoiyase tūparo rārosar rerecuar, sembiguai avei yuviraso seru ãgua mbahe tupri pipe, “Aviyeteramo yande api-api tiétera ava yuvireco yaru raise” ehi yuvireco. ²⁷ Viroyepotase yuvireco ñemonuhasa ivate catu vahesave, ahese evocoi pahi rerecuar ivate catu vahe aipo ehi chupe:

²⁸ —Ore mborerecuar tecua pipendar, ndoroipotai peporombohe evocoi mbia recocuer rese. Pe rumo pembohe opacatu Jerusalén pendar secocuer rese serer pipe. Pemombehu avei ava rehii upe ore mborerecuar oroyuca uca evocoi mbia —ehi pahi rerecuar chupe.

²⁹ Pedro, omboetaso reseve, omboyerovi pahi rerecuar ivate catu vahe upe yuvireco:

—Ore cuaita ité Tūpa mbooyeroya, ndahei chira rumo ava tēi rane orombooyeroya —ehi yuvireco chupe—. ³⁰ Yepe peyatíca, peyuca uca Jesús curusu rese viña, yande Ru Tūpa rumo acoi yande ramoi eta viroya vahe, ahe ité ombogüerayevi. ³¹ Ipare osecomboivate ivave oacato coti imboaguapi imoi. Ahe niha Mborerecuar guasu, Poropísírosar

avei ‘tomboasi oangaipa, toyevi cheu, toipisi angaipa resendar ñeroisa yuvireco’ oya Tūpa Israel suindar upe.³² Ore Tūpa rembiapo repiasarer imombehu água orico, Espíritu Santo avei oñehe ore ñehe rupi ava upe, ahe acoi Tūpa ombou vahe viroyasar upe –ehi.

³³ Osenduse mborerecuar aipo ñehesa, oñemoiró iteanga yuvireco. Oyucapa pota opacatu apóstol yuvireco viña. ³⁴ Mborerecuar pāhu pendar rumo oime mbia fariseo, Gamaliel serer vahe, ahe Moisés porocuaita rese oporombohe vahe iyavei imboeteipri catu vahe. Ahe opūha oporocuai, “Toyuvinose raimi ocarve apóstol” ehi. ³⁵ Ipare aipo ehi ambuae mborerecuareta upe:

—Che mu, judío, peicua catu, yandepihañemoñeta tupri rane mbahe apo água renondeve co mbia upe yuvireco —ehi—. ³⁶ Peyemomahenduha Teudas recocuer rese. Esepiá niha, acoi oyemboivate aisa pipe viroguata cuatrocientos ava oyeupi aracaco. Ipare acoi oyuca yuvireco. Ahese supindar opa oñemosai tēi yuvireco. Ahe peve secocuer opa. ³⁷ Coiyé catu, omombehuse mborerecuar Roma pendar ava retacuer cua água, ahese Judas, Galilea pendar, oyemomborerecua. Setá avei ava oguata yuvireco supi. Ahe avei rumo oyuca yuvireco, opa tupriño avei supindar oñemosai tēi yuvireco —ehi—. ³⁸ Sese cûritez peyapoi rene mbahe co ava upe. Yaseyaño. Esepiá, evocoí mbahe sembiapo ndipocopii chira oyapose opíratasa pipe tēi yuvireco. ³⁹ Tūpa suindarse rumo ndapemombituhu catui chietera. Peicua catu, aní chira yayamotaréhi Tūpa ipipe —ehi omboetasa upe.

Aipo ihese, opacatu imboetasa viroya yuvireco.⁴⁰ Ichui rumo güeru iri apóstol inupa uca água iñehe iriéhi água Jesucristo rese yuvireco. Inupa pare opa omose yuvireco.⁴¹ Ipipe apóstol ovihareté iteanga yuvireco. Esepiá, Tūpa ombou chupe iparaisu água yuvireco Jesús rer rese iyeroyasa sui tēi. ⁴² Ipare ndopoi eté ari yacatu Poropísírosar Jesús recocuer mombehusa sui yuvireco. Omombehuño ité tūparo pipe iyavei opacatu ava rēta rupi yuvireco.

6

Siete iporavosa iparaisu vahe pítivií água yuvireco

¹ Ahe araviter pipe aipo oyemboetase Jesús reroyasar yuvireco, griego pipe oñehe vahe oñehe rai oyeupe hebreo pipe oñehe vahe rese yuvireco: “Nihañeco tupri ore mu imer mano vahecuer rese ari yacatu mbahe poropítiviisa imondosase chupe” ehi oñehe yuvireco. ² Evocoiyase doce apóstol omonuhapa uca opacatu Jesús reroyasar. Aheve aipo ehi yuvireco chupe:

—Ndiyai rumo ore oropoi tēi Tūpa Ñehengagüer mombehusa sui mbahe poropítiviisa mundo água rese tēi —ehi yuvireco—. ³ Sese ore rīvireta, peiporavo siete mbia seco aviyé vahe pe pāhu sui, yaracua vahe iyavei Espíritu Santo viroya vahe ité opíha pipe. Ahe mbia tihañeco co mboravíquisa rese yuvireco. ⁴ Ore evocoiyase, oroyerureñora iyavei oroporomboheño itera Tūpa Ñehengagüer rese —ehi yuvireco.

⁵ Opacatu oipotaño yuvireco ñehesa oyeupendar. Ichui osenoi Esteban yuvireco, ahe oyeroya ité Tūpa rese iyavei viroya ité Espíritu Santo opíha pipe. Ichui oiporavo Felipe, Prócoro, Nicanor, Timón, Parmenas iyavei Nicolás evocoí mbia Antioquía pendar, ahe viroya vahecuer judío aracuasa. ⁶ Ichui virasopa apóstol upe yuvireco. Ahe omondo opo iharive oyeroqui yuvireco sese.

⁷ Ahese Tūpa Ñehengagüer oyemosai catu tecua pipe. Ichui oyemboeta catu iri avei Jesús reroyasar yuvireco Jerusalén ve. Setá avei judío pahi viroya iñehengagüer yuvireco.

Esteban pisisa

⁸ Co mbia, Esteban, vireco ité Tūpa píratasa iyavei Tūpa porovasasa oyese. Oyapo avei mbahe poromondiisa, yavai vahe opacatu ava pāhuve. ⁹ Evocoiyase Jerusalén ve oime judío tūparo Mbiguaigüer serer vahe. Ahe pendar tecua Cirene iguar, Alejandría iguar, Cilicia iguar iyavei Asia ivirindar yuvirecoi vahe reseve oiñehopoepi-epi Esteban yuvireco. ¹⁰ Ndoicatui rumo iñehe recopi água yuvireco. Esepia, ahe oñehe mbahecusa Espíritu Santo omondo vahe pipe. ¹¹ Evocoiyase yamotaréhímbar omboepi ambuae ava upe semira tēi água sese yuvireco. “Ore orosendu co mbia oñehese mbahe naporai vahe rese Moisés amotaréhisave, Tūpa amotaréhisave avei’ aipo peñeho” ehi yuvireco chupe. ¹² Evocoiyase ahe ava oyamotaréhi uca opacatu ava mborerecuar reseve iyavei judío porocuaita rese oporombohe vahe upe avei yuvireco. Ichui oipisi yesapiha Esteban seraso mborerecuar uve porandusa ivate catu vahesave yuvireco. ¹³ Iyavei oseca mbia semira tēi vahe oñehe vaherā sese yuvireco. Ahe aipo ehi:

—Co mbia oñehe-ñeho tēi yande tūparo guasu imaranehi vahe amotaréhisave, Moisés porocuaita amotaréhisave avei. ¹⁴ Ore orosendu iñehe: “Jesús Nazaret pendar omocañira tūparo guasu iyavei Moisés yande mbohesa avei aipo osecuñarora” ehi —ehi yuvireco chupe.

¹⁵ Ahese opacatu mborerecuar oñemonuha vahe yuvínoi aheve omahe Esteban rese yuvireco. Omahese aipo yuvireco sese, ndoyavii sepiaca Tūpa rembiguai íva pendar rova.

Esteban oñeho oyepisa pípe

¹ Evocoiyase pahi rerecuar ivate catu vahe oporandu chupe: “¿Supi eté vo aipo nde ñehe mara eico?” ehi chupe. ² Ahese omboyeví chupe: “Che mu eta, peyapisaca che ñehe rese: Tūpa imboeteiprí oyemboyecua yande ramoi Abraham upe aracahe. Mesopotamia ve seco ãgua, ³ aipo ehi chupe: ‘Eso nde recua sui; eseyapa nde mu; eso evocoi tecuave che amboyecuara ndeu’ ehi Tūpa chupe. ⁴ Evocoiyase osë Caldea ivi sui oso tecua Harán ve güeco ãgua. Omano pare tu Harán ve, Tūpa ombou coháve yande recosave. ⁵ Yepe oyepota tēi coháve aracahe, Tūpa rumo nomondoimi eté que chīhi ivi chupendar chupe. ‘Co ivi amondora ndeu nde mano pare nde suindar upe nara’ ehi Tūpa chupe (ahe rumo ndatahi vitei ahese). ⁶ Tūpa aipo ehi avei chupe: ‘Nde suindar yuvirecoira ambuae ava recua rupi, ahe pendar ava secua vahe rembiguairã semi-mombaraisuguã tēi avei yuvirecoira cuatrociento araviter rupi’ ehi. ⁷ Tūpa rumo aipo ehi avei Abraham upe: ‘Che rumo, aicuara evocoi ava nde suindar mombaraisusar upe yuvireco. Ipare yuvinosera ipovri sui che mboetei iri ãgua coháve yuvireco’ ehi Tūpa chupe aracahe. ⁸ Tūpa oyocuai güemimbotar pípe Abraham guahir mbocircuncida ãgua rese. Sese Abraham ombocircuncida guahir Isaac iha pare ocho ari pípe. Isaac ēgue ehi avei guahir Jacob upe. Jacob ēgue ehi avei guahireta upe, ahe doce vahe Israel suindar” ehi.

⁹ “Ipare yuvirecoi vahe yande ramoi Jacob rahir omondo vivri guarepoche repirã yamotaréhisa pípe yuvireco. Ahe tivri rer José omondo vahe Egipto pendar upe yuvireco. Tūpa rumo secoño ité sese. ¹⁰ Ichui vinose opacatu iparaísusa sui. Omondo ombahécuasa chupe iyavei seco avíye tupri ãgua Egipto pendar mborerecuar guasu faraón upe. Evocoiyase faraón ipotasa pípe omoingue mborerecuar seco ãgua opacatu ava ivi Egipto pendar cuai ãgua iyavei güeta pípendar cuai ãgua avei.

¹¹ “Ipare ou tiavor opacatu Egipto ivi rupi, Canaán ivi rupi avei. Iparaisu yuvireco. Ahese yande ramoi ndoyosui mbahe güemihura yuvireco. ¹² Oyanduse rumo Jacob Egipto ve oime vitese trigo, ahese omondo guahir aheve seca, ahe yande ramoi yuvirecoi vahe. Ahe yipindar ichosa Egipto ve yuvireco. ¹³ Ichui yuviraso yupagüe irise Egipto ve, ahese José oyecua uca viquehir upe. Ēgue ehi faraón upe oicua uca uma sui oyesu. ¹⁴ Evocoiyase José güeru uca oyesupa Jacob iyavei opacatu omu, ahe imu retacuer setenta y cinco tupri. ¹⁵ Ēgue ehi Jacob yuviraso Egipto ve yuvirecoi ãgua

opacatu guahir reseve. Aheve omano iyavei opacatu yande ramoi eta omano yuvireco aracahe. ¹⁶ Imano pare rumo, suminogüer víraso icangüer yuvireco tecua Siquem ve. Aheve oñoti yuvireco. Aheve accoi Abraham virocua tuvípa Hamor rahir sui aracahe” ehi mborerecuar upe.

¹⁷ “Ipare, virovise ari ipapaprí Túpa Ñehengagüer Abraham upendar, ahese yande ramoi setá catu-catu irí oyesu Egipto ve yuvireco aracahe. ¹⁸ Ipare oporocuai ambuae mborerecuar guasu Egipto ve. Ahe ndoicuai vahe ité yande ramoi José. ¹⁹ Evocoí mborerecuar guasu ombopa yande ramoi eta aracahe. Omombaraisu avei oyucapa uca israelita rahir cuimbahe pítani. Ahe oyocuai iyesupa aipo ehi: ‘Peseya pe rahir oha ramomi vahe, tomanoño’ ehi yande ramoi upe aracahe. ²⁰ Aheseve avei aipo Moisés oha. Ahe pítani aviye ité Túpa uve. Ihare, iyesupa mbosapi yasimi rupive vireco oyece güetave yuvireco. ²¹ Oseyase rumo iyesupa íve yuvireco, ahese faraón rayrí oseca ahe i rupi sui. Ichui vínose seraso güetave, omboacua omembri nungar ité sereco. ²² Ichui Egipto pendar yaracua vahe opacatu omabahecusa reseombohe tuprí Moisés sereco yuvireco. Evocoiyase Moisés ipírata ité oñehese iyavei oyapose mbahe.

²³ “Virecose rumo Moisés cuarenta aravíter, ipihañemoñeta: ‘Tasepia rane che mu israelita cohabe yuvirecoi vahe’ ehi. ²⁴ Ipare aheve osepia Egipto pendar oinupa-nupa imu sereco yuvireco. Ahese oyuca Egipto pendar omu repicave. ²⁵ Ahe rumo, ‘Oicua revo che mu Túpa vínose uca água Egipto sui yuvireco cheu’ ehi viña. Imu rumo nomohai eté Moisés vínose água yuvireco evocoí ava po sui. ²⁶ Ahere ayihive oso omu pâhuve. Aheve osepia ñuvirío mbia ovavase oyeupe yuvireco. Ahe rumo oipota tēi iñero água oyeupe yuvireco viña, aipo ehi chupe: ‘Che mu, oñemu mo peico, ¿mahera vo pevava peyese ae?’ ehi tēi chupe. ²⁷ Oyemovíracua catu vahe rumo omombo oyesui. Ichui ahe aipo ehi chupe: ‘¿Ava vo nde moingue ore pâhuve ore rerecuarã ore recocuer moingatu água?’ ehi chupe. ²⁸ ‘¡Che yuca pota avei tie eve inungar ereyuca evocoí Egipto pendar irapipe!’ ehi chupe. ²⁹ Osenduse rumo co iñehe, oñemi voi eté oso Egipto sui ambuae ivi Madián ve. Aheve opita pucu. Ahe ivi rumo ndahei secua ité. Aheve oyesu ñuvirío tahir.

³⁰ “Omboaviyese cuarenta aravíter Madián ve, Túpa rembiguai oyemboyecua ivitri Sinaí rerovicave ivi iporupiréhisave caha rese tata rendigüer pâhuve chupe. ³¹ Osepiase mbahe sendi vahe oyepihamondii, oyemboya catu sese sepia tuprí água viña. Ahese osendu Yar ñehe aipo ehi vahe: ³² ‘Che nde ramoi Túpa aico. Nde ramoi

Abraham, Isaac iyavei Jacob che reroya vahecuer yuvireco' ehi. Evocoiyase Moisés oríri osiquíyesa pipe nomahe pota iri sese.³³ Evocoiyase Yar aipo ehi chupe: 'Esequi nde pitaqui. Esephia, ivi nimarai vahesave ereico' ehi chupe.³⁴ 'Che asepia tupri ité Egipto ve nde mu che rembiporavo paraisuse; asendu avei ipoāse tēisa yuvireco yepi. Sese agüeyi ndeu nde oromondora aheve senosepa água' ehi Tūpa Moisés upe aracahe.

³⁵ "Yepe yande ramoi ndoviroya potaiño ité yuvireco, '¿Ava vo nde moingue ore rerecuarã ore recocuer moingatu água?' ehiño yuvireco chupe, Tūpa ité rumo oyocuai güembiguai im-bogüeyi tata rendigüer pâhuve imoñehe Moisés upe iporocuai água, ava renosepa água avei ivi Egipto pendar mbororecuar povrì sui. ³⁶ Ipare ahe ité vînose yande ramoi eta Egipto sui, oyapo avei mbahe poromondiisa aheve 'toicua Tūpa yuvireco' oya, para guasu Pîra vaheve avei oyapo poromondiisa iyavei ivi iporupirêhisa rupi avei cuarenta aravíter rupi. ³⁷ Ahe avei aipo ehi israelita upe: 'Tūpa vînosera pe pâhu sui ñepei oñehe mombehusar che nungar' ehi. ³⁸ Ahe avei acoi ivi iporupirêhisa rupi ava pâhu rupi secoi. Chupe avei oñehe Tūpa rembiguai ivitri Sinaí ve yande ramoi rese; ahe avei oipisi ñehesa tecovesa resendar yandeu imbou água.

³⁹ "Yande ramoi eta rumo nomboyeroya potai eté Moisés yuvireco. Ipihañemoñetaño ité Egipto ve oyevi água rese yuvireco. ⁴⁰ Evocoiyase aipo ehi Aarón upe yuvireco: 'Eyapomi catu ava tûpa rahanga oreu ore reroguata água' ehi yuvireco chupe. '¿Que vo catu Moisés, ore renosesarer Egipto sui, secoi? Omano tie revo' ehi tēi israelita yuvireco aracahe. ⁴¹ Ipare oyapo uca mbahe rahanga guaca repiaca nungar oyeupe yuvireco. Oyuca mbahe mimba ahe mbahe rahanga upe viropovëhe vaherã yuvireco iyavei oyembovíha pieta apo yuvireco güembiaipo ucagüer rese tēi. ⁴² Sese Tūpa opoïño ahe ava sui, 'Toyerure evocoiyase yasi, yasitata upe yuvireco' ehiño chupe. Aipo ehi niha oñehe mombehusar icuachiapri pipe:

'Pe peico vahe israelita, ndahei cheu peyuca mbahe mimba seropovëhe água cuarenta aravíter pipe ivi iporupirêhisa rupi.'

⁴³ Pe rumo che mboeteiêhisa pipe peraso tûpa rahanga Moloc rëta iyavei yasitata rahanga Refán pe ae tēi peyapo vahe pe tûpaguã.

Sese che opovînosera pe recua sui pe mundo Babilonia cupe coi cotí' ehi Tûpa chupe aracahe.

⁴⁴ "Ivi iporupirêhisa rupi yande ramoi eta vireco Tûpa porocuaita rëta oyeupive yuvireco aracahe mbahe mimba

pirer apopri. ‘Na peyera yapo’ ehi Moisés upe. Evocoiyase iñehe rupi tupri oyapo uca. ⁴⁵ Ahese coiye catu yande ramoi eta vireco co oí Tūpa rēta mbahe pirer apopri yuvireco iyavei Josué rupi yugüeru vahe güeruño ité avei yuvireco, omosepase Tūpa ambuae ava co yande recuavi sui. Ëgüe ehiño vite ité ahe sereco yuvireco mborerecuar guasu, David, secoise aracahe. ⁴⁶ Ahe David aviyé ité Tūpa upe, oyapo pota setarã ‘toime tūparoguã yande ramoi Jacob rembieroya upe’ oya. ⁴⁷ Tahir Salomón rumo omopuha ité ahe tūparo. ⁴⁸ Tūpa rumo, seco ivate vahe, ndasecoi vahe tūparo ava tẽi rembiapo pipe. Inungar acoi omombehu vahe Tūpa ñehe mombehusar aracahe aipo ehi:

⁴⁹ Iva che renda iyavei ivi che pirunga.

¿Mbahe nungar oí vo peyapora cheu? ehi yande Yar.

¿Que vo evocoiyase che pituhu água?

⁵⁰ Che niha opacatu co mbahe aposar aico’ ehi Tūpa icuachi-apri pipe” ehi mborerecuar upe Esteban.

⁵¹ Ichui aipo ehi chupe: “Pe rumo ndapeyapisaca potai vahe ité peico. Oime tẽi pe nambi, pe piha avei, ipipe rumo ndapeicuai eté Tūpa. Peico Espíritu Santo amotarëhimbar tẽi inungar pe ramoi aracahe yuvirecoi. ⁵² ¡Uma profeta revo ndovireco meguai pe ramoi yuvireco! Ahe avei oyucapa yipindar omombehu vahe ndaseco marai vahe yusa resendar yuvireco. Cûritei ou ndaseco marai vahe cute. Pe avei evocoiyase ahe yuca uca água peporocuai. ⁵³ Pe pereco tẽi Tūpa porocuaita acoi Tūpa rembiguai güeru vahe yuvireco; ahe rumo ndaperoyaiño ité peico” ehi Esteban opacatu mborerecuar upe.

Esteban mano agüer

⁵⁴ Osendupase mborerecuar iñehe, omboasí iteanga yuvireco; oñeaimboterepri ité yamotarëhisave yuvireco.

⁵⁵ Esteban rumo vireco ité Espíritu Santo oyese. Evocoiyase iva rese omahese, osepia Tūpa porañetesa. Osepia avei Jesús opúha ohã Tūpa acato coti. ⁵⁶ Evocoiyase aipo ehi:

—¡Pesezia! Asepia inungar iva imboipri. Aheve asepia Ava Riquehir Vu acato coti ihäi —ehi.

⁵⁷ Mborerecuareta rumo osapucai pírata, oyopiño oapisacuar yuvireco ichui. Ahese yuvinoña guasu yuvireco chupe. ⁵⁸ Viraso güecua ivii yuvireco. Aheve oseyá oyeaosá Saúlo pive ‘tosáro’ oya yuvireco chupe. Ipare oyapi-yapi ita pipe yuca yuvireco.

⁵⁹ Oapi-apiseve, Esteban oyerure Tūpa upe: “Che Yar Jesús, eipisi che hâ” ehi. ⁶⁰ Ipare oñenopíha, oñehe pírata Tūpa upe: “¡Che Yar, ndeñero co ava che amotarëhisar angaipa upe!” ehi.

Aipo ohe pare, omano.

8

¹ Iyavei Saulo, “Peyuca ité” ehi catu-catu aheve ohã.

Saulo oseca Jesúseroyasar moocañipa água oico

Ahe ari pipeve omboipi Jesús amotaréhimbar seroyasar reca mara-mara tēi catu sereco água yuvireco Jerusalén ve. Evocoiyase opacatu seroyasar oñemosai yuviraso Judea ivi rupi, Samaria rupi avei. Apóstol güeraño opita Jerusalén ve yuvireco. ² Oime ava Tūpa mboeteisar yuvirecoi vahe, ahe víraso Esteban rehōgüer ñoti yuvireco. Ití pare, oyasehó iteanga yuvireco sese. ³ Ahe pipeve avei aipo Saulo omombaraisu ava Jesús reroyasar yuvirecoi vahe seroya ucaëhi água viña. Yuviroique-iueño tēi aipo sēta rupi cuimbahe, cuña mbotiriri senose soquenda água yuvireco.

Samaria pendar osendu ñehesa Jesucristo recocuer resendar yuvireco

⁴ Ava oñemosai vahecuer rumo Jerusalén sui omombehuño ité ñehesa písirosa resendar que yuvirasosa rupi yuvireco.

⁵ Felipe oso Samaria rupi. Aheve omombehu ava upe: “Evo-coi Jesús Tūpa Rembiporavo ava písiró água” ehi. ⁶ Ahese ava rehii oñemonuha Felipe ñehe rendu água yuvireco. Oyapisaca tupri iñehe rese yuvireco. Esepia, osepia mbahe sembiapo poromondiisa. ⁷ Iyavei setá ava caruguar rerecosar sui omose caruguar. Osẽse ava sui, sãse yuvireco. Iyavei setá ava nomii vahe, ndoguatai vahe avei ombogüera. ⁸ Evocoiyase oviharete ahe tecua pípendar yuvireco.

⁹ Aheve rumo mbia, Simón serer vahe, yipive ipaye ai oico, ombosiquíye-quiyé ava Samaria pendar. “Che seco ivate vahe aico” ehi angahu ava mbopa. ¹⁰ Evocoiyase opacatu ava, cuacua vahe iyavei chihivahé catu vahe oyapisaca tupri iñehe rese, aipo ehi yuvireco: “Co niha Tūpa píratasa tuvicha vahe” ehi oyeupe yuvireco.

¹¹ Ombooyeroya pucu ité yuvireco. Esepia, opayesa pipe ava ombosiquíye etepri oico yepi. ¹² Oyepotase rumo Felipe Samaria ve omombehu ñehesa aviyé vahe Tūpa mborerecuasa resendar, Jesucristo recocuer resendar avei. Ahese ava rehii viroya yuvireco. Ipare oñeapiramo ité yuvireco cuimbahe, cuña avei. ¹³ Ahe Simón avei viroya. Oñeapiramo pare, oso Felipe rupi. Co mbahe poromondiisa iyavei Tūpa suindar ndayasepiai vahe rese oyepihamondii.

¹⁴ Jerusalén ve apóstol yuvirecoi vahe oyandu Samaria ve setá ava oipisise Tūpa Ñehengagüer yuvireco. Evocoiyase omondo aheve omboetaso Pedro iyavei Juan yuvireco. ¹⁵ Oyepotase aheve yuvireco, oyerure opacatu ava Jesús reroyasar rese ‘Espíritu Santo toipisi yuvireco’ oya. ¹⁶ Esepia,

Espíritu Santo ndogüeyi vîtei yuvireco sese; oñeapiramoño têi vite yande Yar Jesús rer pipe yuvireco. ¹⁷ Pedro iyavei Juan oyerurese, omundo opo iharîve yuvireco. Ahese Espíritu Santo ogüeyi yuvireco sese.

¹⁸ Ahe osepiase, Simón omundo pota guarepochi chupe,
¹⁹ aipo ehi:

—Cheu avei pemboumi têi evocoipiratas, amondose che po que ava harive, togüeyi avei Espíritu Santo sese yuvireco —ehi Simón.

²⁰ Omboyevi rumo Simón upe:

—¡Tocañipa nde guarepochi nde reseve! Esepi, ndepihañemoñeta co Tûpa ombou vahe oreu, ererocua vaherâ nde guarepochi pipe viña —ehi chupe—. ²¹ Ndeu ndiyai co nungar mbahe apo água. Esepi, nde pihañemoñetasa ndahei ihîvi vahe Tûpa rovaque. ²² Sese epoi nde pihañemoñeta raisa sui, eyerure Tûpa upe. Aviyeteramo iñerora ndeu —ehi—. ²³ Aicua nde piha naporai vîte iyavei nde pihañemoñeta raisa pipe vite ereico —ehi chupe.

²⁴ Evocoiyase Simón omboyevi chupe:

—Peyeruremi catu yande Yar upe che rese; tipo eme acoi mbahe pe remimombehu cheu —ehi chupe.

²⁵ Yande Yar ñehesa mombehu pare ahe tecua pendar upe, apóstol omombehu-mbehu co ñehesa písirosa resendar Samaria pipendar tecua rupi yuvireco. Êgüe ehi oyepota yuviroyevi Jerusalén ve Yugüeru.

Felipe omombehu Jesucristo recocuer Etiopía pendar upe

²⁶ Ipare Tûpa rembiguai oyemboyecua Felipe upe aipo ehi chupe: “Epûha, eso irohi coti nde yepota água evocoipiri ogüeyi vahe oso Jerusalén sui, Gaza ve” ehi. Evocoipiri Gaza piar osasa ivi iporupiréhi rupi oso. ²⁷ Evocoiyase opûha oso peri rupi. Aheve osovaichi ñepei ava, ahe seco ivate vahe guarepochi apocatusar Etiopía pendar cuña mborerecuar upe nara yepi, ahe mbia oso vahe Jerusalén ve Tûpa mboetei água. ²⁸ Oyevise ocâreto pipe, oyeroqui Tûpa ñehe mombehusar Isaías rembicuachiagüer rese ou.

²⁹ Evocoiyase Espíritu aipo ehi Felipe upe: “Eyemboya cäretomi rese” ehi. ³⁰ Evocoiyase virovise ahe ava, osendu iyeroqui Isaías rembicuachiagüer pipe oí. Ahese oporandu chupe:

—¿Eresenducua aipo Tûpa Ñehengagüer nde yeroquisa eí? —ehi chupe.

³¹ Etiopía pendar mbia omboyevi chupe:

—¿Mara ahera vo che senducua viña ndipoise imombehu tuprisar cheu? —ehi chupe.

Ipare, “Erio, eyeupi, tereguapi cohabe che piri” ehi Etiopía pendar chupe.³² Ahe Isaías rembicuachía oyeroqui vahe pípe aipo ehi:

“Inungar ava vîraso ovesa yuca ãgua, êgue ehi avei ahe mbia seraso yuca ãgua yuvireco.

Iyavei inungar ovesa nasasei eté guagüer rerocuase, êgue ehi avei ahe mbia noñehet eté.

³³ Osecomomini yuvireco, ndipoi ava sepisar.

Ndipoi ichuindar.

Esepia, omocañi co iyi sui yuvireco” ehi Isaías rembicuachía pípe.

³⁴ Oyeroqui pare ahe Etiopía pendar oporandu chupe:

—Emombehumi cheu: ¿Ava rese pîha aipo Isaías oñehet: oyese ae pîha, ambuae ava rese tie? —ehi.

³⁵ Evocoiyase co ñehesa sui omombehu ñehesa aviye vahe Jesús recocuer resendar Etiopía pendar upe. ³⁶ Ipare oguata catuse yuvireco, Etiopía pendar osepia i. Aheve ahe aipo ehi chupe:

—Esepia co i tui. ¿Ndiyai vo cohabe che ãpiramomi têi eve viña? —ehi.

³⁷ Ahese omboyevi chupe:

—Ereroya itese opacatu nde pîha pípe, iya ité ndeu —ehi.

—Aroya ité niha Jesucristo ahe Tûpa Rahîr secoi —ehi.

³⁸ Evocoiyase omombita uca ocâreto, ichui ogüeyi ve yuviraso. Aheve Etiopía pendar Felipe oñapiramo.

³⁹ Yuvinosesi i sui, yande Yar Espíritu vîraso ahe Etiopía pendar sui. Ahese ndosepia iri; êgue ehiño vorivete oso peri rupi. ⁴⁰ Felipe rumo oyemboyebla Azoto ve. Ichui oso co tecua Cesarea piar rupi, omombehu Jesús recocuer opacatu tecua rupi. Êgue ehi oyepota Cesarea ve oso.

9

Saulo ñecuñaro agüer

¹ Jerusalén ve rumo Saulo oñemoiró iteanga vite yande Yar reroyasar upe oico. Oyucapa potaño ité. Sese oso pahi rerecuar ivate catu vahe upe, ² oporandu chupe: “Ereyapomira mbahe icatupri vahe cheu” ehi. “Taso Damasco ve, taseca co Tecocuer Piasu rupi cuimbahe, cuña yuvirecoi vahe” ehi. “Taipisipa seru cohabe nde rer pípe” ehi, “evocoiyase eremombehura cuachiar pípe Damasco pendar tûparo rerecuar upe” ehi pahi rerecuar ivate catu vahe upe. ³ Êgue ehi yuvinose Jerusalén sui, yuviraso Damasco ve ambuae ava reseve. Virovi potase rumo Damasco yuviraso, aviyeteramo têi osesape guasu iva sui chupe. ⁴ Evocoiyase oviapi oso

ivive. Osendu iva pendar ñehesa aipo ehi vahe: "Saulo, Saulo, ¿mahera vo che moña-moña eve?" ehi chupe.

⁵ Evocoiyase oporandu chupe: "¿Ava vo nde ereico, nde mbia?" ehi. "Che Jesús, che niha co che moña che rereco eve" ehi chupe. ⁶ "Epūha, eique Damasco ve. Aheve amombehu ucara mbahe nde rembiapoguā ndeu" ehi chupe.

⁷ Ava rumo, yuviraso vahe supi, osiquiyé iteanga osenduse ñehesa iva suindar yuvireco. Esepiá, ndosepiai eté ivate oñeha vahe yuvireco. ⁸ Ipare Saulo opūha, omahe tēi; ndoicatui rumo mbahe repia. Ichui supindar oipisi iyiva rese seraso Damasco ve yuvireco. ⁹ Aheve mbosapi ari ndasesapisoí, ndocarui, ndoihui avei oico.

¹⁰ Aheve mbia Jesucristo reroyasar Ananías serer vahe secoi. Ahe iquer nungarve oyemboyecua yande Yar aipo ehi chupe: "¡Ananías!" ehi. "Co aico, che Yar" ehi imboyeví chupe.

¹¹ Evocoiyase yande Yar aipo ehi chupe: "Epūha, eso calle Ihívi serer vahe rupi. Eporandu Judas rētave Saulo, tecua Tarso pendar, rese. Ahe oyeroqui cūritei. ¹² Oquerve angahu osepiá mbia Ananías serer vahe omondose opo iharíve omboesapiso iri" ehi.

¹³ Evocoiyase omboyeví chupe: "¡Too! Che Yar, setá rumo evocoí mbia recocuer omombehu yuvireco cheu. Mbahe tēi oyapo vahe nde reroyasar reco maranehi upe Jerusalén ve. ¹⁴ Cūritei ou rutei ahe mbia pahi rerecuar porocuaita rupi opacatu nde rer rese oyeroya vahe roquendapa água" ehi.

¹⁵ Yande Yar rumo aipo ehi chupe: "Eso. Esepiá, aiporavo evocoí mbia che recocuer rese oñeha vaherā ava ndahei vahe judío upe iyavei serecuar guasu yuvirecoi vahe upe, judío upe avei. ¹⁶ Che ae amboyecuara setá mbahe tēi chupe oiporara vaherā che remimbotar mboaviye água" ehi yande Yar chupe.

¹⁷ Evocoiyase oso secosave. Oiquesa ahe oí pipe, oso, omundo opo Saulo rese aipo ehi chupe:

—Che rívrí, Saulo, yande Yar Jesús oyemboyecua vahe ndeu peri rupi nde yuse, ahe che mbou ndeu nde mboesapiso iri água. Toique avei catu Espíritu Santo nde rese —ehi Saulo upe.

¹⁸ Ahese voi eté pira pirer nungar mbahe ovíapipa sesa sui. Ahese voi sesapiso iri. Ichui opūha. Ipare voi Ananías oñapiramo. ¹⁹ Ipare Saulo ocaruse, ipírata catu iri. Moviro ari tēi opita iri Jesús reroyasar píri Damasco ve.

Saulo omombehu Jesús recocuer Damasco ve

²⁰ Ipare voi oso oñeha judío tūparo yacatu rupi Damasco ve aipo ehi: "Jesús Tūpa Rahir ité secoi" ehi ahe pendar ava upe.

²¹ Ava opacatu osendu vahe iñeha,

—¿Mara ehi pīha co? —ehi tēi yuvireco—. ¿Ndahei vo acoi co mbia Jerusalén ve Jesús reroyasar mara-mara tēi vireco

vahe? ¿Ndahei vo acoi co avei ou cohave ava Jesús reroyasar ha pendar pisi ãgua serasopa ãgua avei Jerusalén ve pahi rerecuar upe viña? —ehi yuvireco chupe.

²² Saulo rumo omombehu tupri catu Jesús recocuer. Osecopi opacatu omu Damasco pendar. Omboyecua catu chupe Jesús Tüpa Rembiporavo ava písiru ãgua secosa. Sese ndoicatu judío iñehe mboyevi yuvireco.

Saulo oñemi omu sui oamotaréhise

²³ Setá ari pare judío ahe pendar omboguai yuca ãgua Saulo yuvireco viña. ²⁴ Ahe rumo oyandu omboguaise judío osârose tecua ãchisa roquendipive ari, pítu momba yuvireco yuca ãgua viña. ²⁵ Jesús reroyasar rumo pítu pipe tecua tapia ãchisa oyere tupri vahe tecua rese, icupe rupi ombogüeyi iruova guasu pipe imoñemi imondo yuvireco.

Saulo Jerusalén ve secoi

²⁶ Coiye Saulo oyepota Jerusalén ve. Aheve oyemboya pota tẽi Jesucristo reroyasar rese. Osiquiye rumo yuvireco ichui. “Aviyeteramo co Saulo, ‘Aroya Jesucristo cute’ ehi tupri tẽira yandeu” ehiño oyeupe yuvireco. ²⁷ Ipare rumo Bernabé víraso Saulo apóstol yuvirecoi vahe upe. Aheve Bernabé omombehupa chupe aipo ehi: “Combia Saulo osepia yande Yar peri rupi iyavei yande Yar oñehe chupe. Ichui co oñehe osiquiyeéhisa pipe Damasco ve Jesús recocuer rese” ehi. ²⁸ Evocoiyase Saulo opita aheve ipiri. Ari yacatu rupi apóstol rupi oguata yepi, iyavei omombehu yande Yar recocuer osiquiyeéhisave. ²⁹ Oiñehopoepi avei secocuer rese judío griego pipe oñehe vahe yuvireco. Ichui rumo oyuca potaño yuvireco. ³⁰ Oicuase rumo Jesucristo reroyasar yuvireco, víraso voi eté Saulo Cesarea ve. Ichui omundo Tarso ve yuvireco.

³¹ Evocoiyase opacatu Jesús reroyasar yuvirecoi vahe Judea rupindar, Galilea rupindar iyavei Samaria rupindar, chupe oime mbahe tupri. Iyavei oyemovíracua tupri catu yuvireco yande Yar mboeteisa pipe, Espíritu Santo oipítivii iyemboeta catu ãgua yuvireco.

Eneas mbogüera agüer

³² Pedro oguata opacatu rupi oso Jesucristo reroyasar repia. Ahe oso, osepia avei tecua Lida pendar Jesús reroyasar.

³³ Aheve osepia mbia Eneas serer vahe, ahe ndoguatai vahe. Vupave tẽi tui vahe ocho aravíter rupi. ³⁴ Pedro aipo ehi chupe:

—Eneas, Jesucristo nde mbogüera —ehi—. Eñarapuha, emoin-gatu nde rupa —ehi chupe.

Eneas evocoiyase oñarapuha voi. ³⁵ Osepiase opacatu Lida pendar, Sarón pendar co ndoguatai vahecuer guatase, viroyapa voi eté yande Yar yuvireco.

Dorcias cuerayevi agüer

³⁶ Ahe araviter pipe Jope ve cuña Tabita serer vahe secoi, griego ñehe pipe rumo Dorcas serer. Ahe Jesucristo reroyasar secoi. Ahe secocuer avíye vahe oporopítivii yepi. ³⁷ Imbaheasi guasu rumo. Coiye omano. Ipare ava sehögüer oyosei yuvireco. Ichui viroyeupi oi ivate vahesave seraso yuvireco. ³⁸ Jope namombriimi Lida sui. Evocoiyase oyanduse Jesús reroyasar Jope pendar Pedro Lida ve secoise, ahese omondo ñuvirío mbia seru poyava água Jope ve yuvireco.

³⁹ Evocoiyase Pedro oso supi yuvireco oyepota yuviraso Jope ve. Aheve viroyeupi oi ivateve seraso tehögüersave yuvireco. Opacatu cuña imer mano vahecuer oyere ati voi, oyaseho Pedro ivii yuvireco. Omboycua avei oturucuar ihari pendar reseve Dorcas rembiapogüer yuvireco chupe. ⁴⁰ Ipare Pedro omosepa rane opacatu ava ocarve. Ahese ahe ae oñenopiha, oyerure Tüpa upe. Ichui omahe ahe cuña omano vahe rese aipo ehi chupe:

—¡Tabita, eñarapuha! —ehi sehögüer upe.

Aipo oyeupe hese, Tabita omboi güesa. Pedro repiase, oñarapuha oí. ⁴¹ Ahese oipisi Tabita po rese imoñarapuha. Ipare, “Perio” ehi opacatu Jesús reroyasar, cuña imer mano vahecuer upe avei, “Pesepia ocuerayevi” ehi chupe. ⁴² Seräcua oyanduse opacatu Jope rupi yuvireco, setá ava yande Yar viroya yuvireco. ⁴³ Evocoiyase Pedro opita setá ari ahewe, mbia mbahe pirer mopitasar, Simón serer vahe, piri.

10

Pedro iyavei Cornelio

¹ Tecua Cesarea ve mbia Cornelio serer vahe secoi, ahe cuartel Italiano serer vahe pendar cien sundao rerecuar. ² Ahe mbia omboetei Tüpa opacatu guahir, güembireco reseve yepi. Iyavei omondoño ité judío pítivii água guareepochi, oyeroqui avei Tüpa upe yepi. ³ Ñepei ari, caharuse las tres rupi, osepia oquer nungar pipe Tüpa rembiguai güecosave aipo ehi chupe: “¡Cornelio!” ehi. ⁴ Omahengatuse sese, “¿Mbahe, che Yar?” ehi osiquiyepave. Tüpa rembiguai rumo omboyevi chupe: “Tüpa oipisi nde yeruresa; osepia avei nde poroparaisuerecosa” ehi chupe. ⁵ “Emondo mbia Jope ve Simón reca. Ahe serer avei acoi Pedro. ⁶ Ahe secoi ambuae Simón, mbahe pirer mopitasar piri. Ahe sëta para guasu popive chini” ehi chupe.

⁷ Osose Tūpa rembiguai ichui, Cornelio oñeho ñuvirío güembiguai upe iyavei ñepei sundao Tūpa mboeteisar upe, sese acoi oyeroya vahe yepi. ⁸ Opacatu Tūpa rembiguai ñehe mombehu pare, omondo Jope ve.

⁹ Ahere ayihive virovise Jope yuviraso, Pedro oyeupi oi ipe vahe haríve mbiter ari senise oyeroqui ãgua. ¹⁰ Vieporéhise ocaru pota viña. Omoingatu viteseve rumo semihura yuvireco, aviyeteramo tēi osepia mbahe quer pendar nungar: ¹¹ ahese osepia iva oyemboise, ahe ichui turucuar tuvicha vahe pipe ogüeyi mbahe, ñapichimbrí ipopí yacatu ou chupe. ¹² Ahe turucuar pipe, osepia opacatu mahembiar vai, mboi, vĩrai vai tēi avei. ¹³ Ahese osendu ñehesa aipo ehi vahe: “Pedro, epüha, eyuca, ichui ehu” ehi chupe.

¹⁴ Pedro rumo omboyevi chupe: “Aní, che Yar, che rumo ndahui vahe ité co mbahe roho ava remimbotaréhí ndihuasai vahe yepi” ehi chupe. ¹⁵ Osendu iri ñehesa aipo ehi vahe chupe: “Tūpa remimbocatupri upe, ‘Ava remimbotaréhí, ndihuasai vahe’ nderei chira” ehi.

¹⁶ Ëgue ehi mbosapi oyupagüer rupi chupe. Ipare turucuar oyevi ivave oso. ¹⁷ Pedro ipihañemoñeta vitese mbahe osepia vahecuer rese quer nungar pipe: “¿Mbahe rese píha co oyemboyecua cheu?” ehi vite oico. Aheseve Cornelio remimondo oporandu-randu pare yuvireco, oyepota Simón rēta roquendipive yuvireco. ¹⁸ Oñeho pucu oi pipendar upe yuvinoha: “¿Ave vo Simón, ahe Pedro serer vahe, secoi?” ehi yuvireco.

¹⁹ Ipihañemoñeta vitese Pedro mbahe oyemboyecua vahecuer rese, Espíritu Santo aipo ehi chupe: “Pedro, esendu rane, pe mbosapi mbia nde reca yuvireco. ²⁰ Eyemoingatu, egüeyi chupe, eso supi. ¿Asora píha?” erei rene. Esepia, che ambou evocoímbia nde reca” ehi Espíritu Santo Pedro upe.

²¹ Evocoiyase ogüeyi oso chupe.

—Che, che reca vahe peye. ¿Mbahe rese vo peyu cheu? —ehi chupe.

²² Ahe evocoiyase omboyevi iñeho yuvireco chupe:

—Ore oroyu sundao rerecuar Cornelio ore cuaisa pipe, ahe mbia seco ñivi vahe, Tūpa mboeteisar opacatu judío osaisu, oipota rai yuvireco. Tūpa rembiguai oyocuai nde rese ereso vaherā sétave, ahe osendu vaherā nde ñehesa —ehi yuvireco Pedro upe.

²³ Evocoiyase omoinguepa, omombitapa oyepiri ñepei pítu. Ahere ayihive oso supi, moviro Jesús reroyasar Jope pendar yuviraso avei supi Cesarea ve yuvireco.

²⁴ Ahere ayihive oyepotase Cesarea ve, yuviraso sétave. Cornelio rumo osáro opacatu omu eta rese yuvireco iyavei

omboriparete güembisoho reseve avei. ²⁵ Oyepotase sétave oso, Cornelio rane osẽ voi, osovaichi, oñenopiha sovai imboeteisa pipe. ²⁶ Pedro rumo aipo ehi chupe:

—Epüha, che niha nde nungar avei aico —ehi chupe.

²⁷ Evocoiyase ahe omoñeta seroique seraso oi pipe. Aheve ava oñemonuha vahe setá osepia yuvireco. ²⁸ Ahe ava upe aipo ehi:

—Pe peicua judío porocuaita aipo ehi vahe: “Peiquei rene ndahei vahe judío piri. Aní chiaveira pemberi evocoí ava peico” ehi acoi —ehi Cornelio rēta pipendar upe—. Tūpa rumo omombehu cheu che quer nungar pipe: “‘Ava remimbotaréhi peico’ erei rene ambuae ava upe” ehi cheu. ²⁹ Pe pemondo ava che reca. Che evocoiyase nacheatéhii che yu áqua pěu. Sese che aicua pota, ¿mahera vo che reru uca peye? —ehi.

³⁰ Evocoiyase Cornelio aipo ehi chupe:

—Opa co irungatu ari, caharuse co hora rupi tupri avei, che cohavé che rētave aicose, ndacarui eté che yerure áqua Tūpa upe. Aheseve oyemboyecua mbia Tūpa rembiguai iturucuar rendí iteanga vahe cheu. ³¹ Ahe aipo ehi cheu: “Cornelio, Tūpa osendu nde yeruresa iyavei oicua avei nde poroparaísuerescosa. ³² Emondo nde rembiguai Jope ve Simón Pedro serer vahe reca. Ahe oicove ambuae Simón rētave, ahe mbahe pirer mopitasar. Ahe sēta para guasu popive chini” ehi cheu. ³³ Sese amondo voi eté nde reca áqua. Aviye nde ereyu cohavé. Cūritei co opacatu yaico cohavé Tūpa rovaque. Orosendu pota opacatu nde ñehe yande Yar nde cuai vahe nde ñehe áqua oreu —ehi Cornelio chupe.

Pedro oñehe Cornelio rētave

³⁴ Evocoiyase Pedro aipo ehi chupe:

—Aicua cute, supi eté Tūpa nomboyahoi yande raisu. ³⁵ Sese ambuae ivi pipendar omboetei vahe Tūpa, oyapo vahe avei mbahe tupri yuvireco, ahe oipisira Tūpa. ³⁶ Aracahe Tūpa oñehe avei Israel suindar upe, omombehu ñehesa tupri yeamotaréhīhisa resendar Jesucristo rembiaporā sui, ahe opacatu ava co ivi pipendar yuvirecoi vahe Yar. ³⁷ Pe peicua tupri ité co mbahe oime vahe opacatu judío ivi rupi. Ahe omboipi Galilea ve Juan ñeapiramosa mombehu pare. ³⁸ Peicua revo Tūpa omundo Jesús Nazaret pendar upe opíratasa, oEspíritu Santo avei. Ipare Jesús oguata opacatu rupi mbahe tupri apo oico. Ombogüera avei opacatu ava iparaisu vahe caruguar povrīve yuvirecoi vahe. Esepio, Tūpa secoi sese. ³⁹ Ore orosepio opacatu Jesús rembiapogüer Judea ivi rupi, tecua Jerusalén pipe avei. Aheve imu oyatica uca curusu rese yuca yuvireco. ⁴⁰ Tūpa rumo ombogüerayevi imombosapisa ari pipe. Ipare omboyecua iri oreu. ⁴¹ Nomboyecuai

rumo opacatu ava upe, omboyecka ore sembiporavo oroico vahe upeñomi. Ore piri niha ocaru, oihu avei ocuerayevi pare. ⁴² Iyavei ahe ore cuai: “Pemombehu ava upe. Co che Jesucristo, Tūpa Rembiporavo, aico opacatu ava recocuer rese porandu ãgua oicove vite vahe, omano vahe avei” ehi oreu. ⁴³ Ahe secocuer avei opacatu Tūpa ñehe mombehusar omombehu yuvireco aracahe aipo ehi: “Opacatu acoi seroyasar, ahe virecora Tūpa ñeroisa serer pipe angaipa rese yuvireco” ehi –ehi Pedro Cornelio rēta pipe yuvinoi vahe upe.

Espíritu Santo oique ava ndahei vahe judío piha pipe

⁴⁴ Pedro oñehe viteseve, Espíritu Santo ogüeyi opacatu ava osendu vahe rese. ⁴⁵ “¡Too! Evocoiyase ndahei vahe judío upe avei Tūpa omondo Espíritu Santo inungar ombou yandeu” ehi Jesús reroyasar judío yuvirecoi vahe Pedro rupi yugüeru vahe yuvireco. ⁴⁶ Esepia, osendu ahe oñehese ñehesa ndicuasai vahe pipe yuvireco Tūpa upe. ⁴⁷ Evocoiyase aipo ehi vupindar upe:

—¿Oime pīha ndoipotai vahe co ava ñeapiramo ãgua yande pāhu pendar? Esepia, co oipisi Espíritu Santo yuvireco inungar yande –ehi vupindar upe.

⁴⁸ Sese,

—Yañapiramopa Jesucristo rer pipe yuvireco –ehi.

Ipare Cornelio rēta pipe yuvinoi vahe aipo ehi: “Epita vitemi moviro ari ore piri” ehi yuvireco chupe.

11

Pedro remimombehu Jerusalén pendar Jesús reroyasar upe

¹ Evocoiyase ambuae apóstol iyavei Jesús reroyasar Judea ve yuvirecoi vahe oyandu yuvireco ava ndahei vahe judío viroya avei Tūpa Ñehengagüer yuvireco. ² Oyevise rumo Pedro Jerusalén ve oso, ahese setá judío Jesucristo reroyasar viroño sovai eté yuvireco, ³ aipo ehi:

—¡Mahera eresoño tēi eté ndahei vahe judío piri! Iyavei nde erecaruño tēi eté ipāhuve yuvireco no –ehi yuvireco chupe.

⁴ Pedro rumo omombehu tupri yipisui opacatu mbahe güembiepia yuvireco chupe aipo ehi:

⁵ —Che, tecua Jope ve aicose, ayerure. Ahese che quer nungarve asepia turucuar tuvicha vahe nungar ipopí yacatu ñapichisa vahe ogüeyi ou che rovai iva sui. ⁶ Asepia ipipe opacatu mahembiar ihupiréhi, mbahe mimba, mboi, vīrai vai tēi avei –ehi–. ⁷ Iyavei ahese asendu ñehesa aipo ehi cheu: “Pedro, epūha, eyuca, ehu” ehi cheu. ⁸ Che rumo aipo ahe chupe: “Aní, che Yar, che rumo ndahui vahe ité co mbahe roho ava remimbotaréhi yepi” ahe chupe. ⁹ Ichui asendu iri ñehesa: “Tūpa remimbocatupri upe, ‘Ava remimbotaréhi’ erei

rene" ehi cheu. ¹⁰ Êgüe ehi mbosapi oyupagüer rupi cheu. Ipare opacatu oyevi iri ivave oso. ¹¹ Aheseve avei mbosapi mbia imbourpri Cesarea sui oyepota yuvireco che recosave che reca. ¹² Espíritu Santo che cuai che so água che atéhiéhisa pipe supi yuvireco. Co seis mbia Túpa reroyasar, yande mu, yuviraso avei che rupi. Ipare aheve oroyepotase oroso, oroique Cornelio rëtave. ¹³ Ahe omombehu oreu osepia vahecuer güétave Túpa rembiguai oyemboyecua vahe sovai iyavei aipo ehi vahe chupe: "Emondo mbia tecua Jope ve Simón Pedro reru água. ¹⁴ Ahe omombehura ndeu nde ñepisiro água iyavei opacatu nde rëta pendar ñepisiro água avei" ehi Túpa rembiguai Cornelio upe —ehi—. ¹⁵ Añehe ramoseve chupe, Espíritu Santo ou sese yuvireco inungar yande rese ou aracaco. ¹⁶ Evocoiyase che chemahenduha voi eté yande Yar ñehengagüer rese aipo ehi vahecuer: "Supi eté i pipe Juan oporoäpiramo, pe rumo Espíritu Santo pipe peñeapiramora" ehi vahe. ¹⁷ Túpa Espíritu Santo omondo chupe inungar ombou yandeu yayeroyase yande Yar Jesucristo rese. Sese ndaipotai eté Túpa ayamotarëhira —ehi Pedro omu upe.

¹⁸ Osenduse rumo co Pedro ñehe, imu noñehe iri sese yuvireco. Ahe rumo,

—¡Too, evocoiyase Túpa ombou avei ndahei vahe judío upe secocuer recuñaro água, tecovesa apirëhi vahe rereco água! —ehi Túpa mboeteisa pipe yuvireco.

Ava Jesús reroyasar Antioquía ve

¹⁹ Iyavei Esteban yucare, Jesús reroyasar oñemosai Jerusalén sui yuvireco. Esepia, Jesús amotarëhimbar oyamotarëhi catu yuvireco. Evocoiyase amove Jesús reroyasar yuviraso oñemi Fenicia ve, ambuae Chipre ve, ambuae Antioquía ve. Oguatasa rupi omombehuño ité judío upe güeraño Jesús recocuer yuvireco. ²⁰ Amove oñemosai vahe Chipre pendar iyavei Cirene pendar oyepota tecua Antioquía ve yuvireco. Omombehu rumo ndahei vahe judío upe avei ñehesa aviye vahe yande Yar Jesús recocuer resendar yuvireco. ²¹ Yande Yar píratasa vireco yuvireco. Evocoiyase setá ava viroya; oseyá ité yipindar güembieroya yuvireco yande Yar reroya água.

²² Seräcua oyepotase Jesús reroyasar upe Jerusalén ve, ahese omondo Bernabé yuvireco Antioquía ve. ²³ Oyepotase aheve, osepia Túpa sovasase. Ahese sorivete aipo ehi chupe: "Peyemoviracua catu yande Yar rese. Peyapo semimbotar opacatu pe piha pipe" ehi chupe yuvireco. ²⁴ Bernabé aviye etepri vahe, viroya ité Espíritu Santo iyavei oyeroya ité yande Yar rese. Evocoiyase setá ava oyemboya yande Yar rese yuvireco.

²⁵ Ipare oso Tarso ve Saulo reca. ²⁶ Oyosuse, güeru Antioquía ve. Aheve oyemboya yuvireco ambuae viroya vahe rese imbohe ägua ñepei aravíter rupi. Setá ava oyembohe ipíri yuvireco. Ahese Jesús reroyasar Antioquía pendar upe yipindar, "Cristo reroyasar" ehi yuvireco.

²⁷ Aheseve Tüpa ñehe mombehusar yugüeru Antioquía ve Jerusalén sui. ²⁸ Ñepei ipáhu pendar, Agabo serer vahe, opúha aipo ehi Espíritu Santo píratasa pipe chupe: "Oura tiavor guasu opacatu iví rupi" ehi, (ahe tiavor oyepota mborerecuar guasu Claudio recose). ²⁹ Evocoiyase Jesús reroyasar Antioquía pendar omondo pota voi guarepochi Jesús reroyasar Judea pendar pítivii ägua yuvireco ocatugüer rupi. ³⁰ Ëgüe ehi yande Yar reroyasar rärosar Judea pendar upe porerecosa mundo. Bernabé, Saulo ahe porerecosa viraso yuvireco.

12

Santiago mano agüer iyavei Pedro roquenda agüer

¹ Ahe aravíter pipe avei mborerecuar guasu Herodes omboipi Jesús reroyasar mombaraisu. ² Ahese oyuca uca quise pucu pipe Santiago, ahe Juan riñuehír. ³ Oyanduse mborerecuar guasu rembiapo, sorivete judío rerecuar yuvireco. Sese Herodes oipisi uca Pedro Pascua pieta pipe. Ahe ari rupi ohu judío pan ndayapepoi vahe yuvireco yepi. ⁴ Pedro roquenda pare omundo irungatu imar sui irungatungatu sundao omundo sáro ägua yuvireco. Mborerecuar ipiñañemoñeta: "Opase co Pascua pieta, amboyecua ucara ava rovaque" ehi viña. ⁵ Evocoiyase Pedro opita voquendasave sárombri tupri chini. Jesús reroyasar rumo oyeroqui pírata Tüpa upe yuvireco sese.

Tüpa omose uca Pedro soquendasa sui

⁶ Ahe ari vínose potase Herodes Pedro soquendasa sui, ahe pítu pipe Pedro oque ñuvirío sundao guárosar rese. Ñapichisa ñuvirío carena pipe ou, ñuvinohambe avei sárosar soquendasa roquendipive. ⁷ Aviyeteramo tēi Tüpa rembiguai oyemboyecua ique viteseve chupe. Ahese sendi guasú iteanga soquendasa pipe. Ahe oñatoi Pedro iqueve imomahe: "¡Epúha poyava!" ehi chupe. Ipúhase, opa voi oyera carena ipo sui. ⁸ Ahese Tüpa rembiguai aipo ehi chupe: "Eyemonde, emonde nde pitaqui" ehi. Evocoiyase Pedro omonde. Ipare aipo ehi iri: "Emonde avei nde yeaosa, eyu che raquicuei" ehi chupe.

⁹ Ëgüe ehi oso saquicuei. Ahe rumo ndoicuai Tüpa rembiguai oyeupe ëgüe ehise. Ndoyavii iquierve tēi ëgüe ehi vahe chupe. ¹⁰ Ichui yuvinose, oñocua yipindar guárosar yuvireco. Ipare yuviraso catumi ambuae imoñuviriossa guárosar oñocua

avei. Oyepota oquenda guasu guarepochi apoprive ocarve yuvínose água yuvireco. Ahe oquenda oyemboi ahe ae ité chupe yuvireco. Ipare yuvínose yuvíraso pucumi ocarusu rupi. Aviyeteramo tēi Tūpa rembiguai ndoyecua iri chupe.

¹¹ Evocoiyase Pedro aipo ehi oyeupe: “¡Too! Supi eté Tūpa ombou cheu güembigui che renose água Herodes povri sui. Tūpa che písiro judío rerecuar che yuca ráguer sui” ehi oyeupe.

¹² Oyese opichañemoñeta pare, oso, oyepota Juan Marcos si María rētave oso. Aheve setá ava oñemonuha oyeroqui yuvireco sese. ¹³ Oñehese Pedro oquenda ocar cotindarve, cuñatai, Rode serer vahe, osē imboi água chupe. ¹⁴ Osenduse rumo Pedro ñehe, oquenda omboi ráguer sui, oña oique oípipe vorívetesave, omombehu: “Pe Pedro ihāi oquendipive” ehi oípipear upe. ¹⁵ Ahe rumo,

—¿Nanderocoi vo eico? —ehiño yuvireco chupe. “¡Aní! Supi eté” ehiño Rode chupe.

—Ndahei ahe, Tūpa rembiguai mo aipo sārosar —ehiño yuvireco chupe.

¹⁶ Aheseve Pedro oñehe viteño ité oquendipive ohā. Ichui omboise oquenda yuvireco chupe cute, oyembosiquiye iriño tēi sepiase yuvireco. ¹⁷ Pedro rumo opo omopuha imonguiriri água. Ichui opa omombehu yande Yar opísiro agüer voquendasu chupe yuvireco. Ipare aipo ehi chupe:

—Pemombehupa Santiago upe iyavei ambuae Jesús reroyasar upe —ehi.

Ichui oseño, ambuae oso.

¹⁸ Cöhese sundao oyepihamondii eteanga yuvireco. “¿Que píha Pedro?” ehi tēi oyeupe yuvireco. ¹⁹ Ipare Herodes omondo sundao Pedro reca. Ndoyosui eté rumo yuvireco. Evocoiyase Herodes porocuaita rupi oporandu tupri sārosar upe: “¿Que vo secoi?” ehi tēi chupe. Sese oyocuai ambuae sundao opacatu ahe sārosar yucapa água. Ipare Herodes osē Judea sui oso Cesarea ve oyemboerecua.

Herodes mano agüer

²⁰ Yipindar rumo Herodes ndasori eté ava Tiro pendar upe, Sidón pendar upe avei. Evocoiyase ahe pendar oyoya ipichañemoñeta yuvíraso vaherā mborerecuar rovai. Ahe evocoiyase oyembori Blasto rese yuvireco, ahe mborerecuar Herodes mboyoyasar. Ahe oporandu Blasto upe Herodes moñero uca água rese yuvireco. Esepio, Herodes porocuaita sui oipisi mbahe güemihura yuvireco. ²¹ Herodes evocoiyase omombehu ari oñehe vaherā chupe. Osupitise ahe ari, omonde sese iturucuar mborerecuar secosa resendar yívirindar yuvireco. Ipare güenda imboeteipri haríve oguapi

oñ. Aheve oñehe ava rehii upe. ²² Evocoiyase ava rehii osapucái pírata yuvireco aipo ehi: “¡Co mbia oñehe vahe ndahei ava tēi, Tūpa ité!” ehi yuvireco Herodes upe imboeteisave. ²³ Ava aipo iheseve voi, ñepei Tūpa rembiguai oyapo mbaherasi guasu chupe. Ichui mbahe rasoi ocaru yavíter rupi yuvireco. Esepiá, nomboetei eté Tūpa. Sese omano.

²⁴ Tūpa Ñehengagüer rumo imombehusa catu opacatu rupi.

²⁵ Iyavei Bernabé, Saulo ocuaita mboaviye pare, vīroyevi Juan Marcos seraso yuvireco.

13

Tūpa oiporavo Bernabé, Saulo oyeupe mboraviqui apo ãgua

¹ Evocoiyase Jesús reroyasar Antioquía pendar pāhuve oime Tūpa Ñehengagüer mombehusar, sese oporombohe vahe avei. Ahe Bernabé, Simón (chupe, “Avaú” ehi yuvireco), Lucio evocoí Cirene pendar, Manaén (ahe mbia oyoya ocuacua mborerecuar Herodes, Galilea pendar reseve) iyavei Saulo. ² Ñepei ari opacatu Jesús reroyasar oñemonuhase yande Yar mboetei ãgua, oyecuacu avei, ahese Espíritu Santo aipo ehi chupe: “Peiporavo Bernabé iyavei Saulo. Evocoí mbia aiporavo cheyeupe mboraviqui apo ãgua” ehi Espíritu Santo yuvireco chupe.

³ Evocoiyase oyeroqui pare, omundo opo yuvireco iporavopri ãca harive sovasa ãgua. Ipare omundo yuvireco ambuae tecua rupi Jesús recocuer mombehu ãgua.

Apóstolyuvirecoi Chipre rupi

⁴ Evocoiyase Bernabé, Saulo Espíritu Santo remimondo yuviraso Seleucia ve. Ichui yuviraso carite pipe caha pāhu Chipre ve. ⁵ Oyepota yemboyasa Salamina ve yuviraso. Aheve omombehu Tūpa Ñehengagüer judío tūparo rupi yuvireco. Juan avei oso supi ipítivii ãgua.

⁶ Opase ité oguata caha pāhu Chipre pipe yuvireco, oyepota ambuae tecua Pafos serer vahesave yuviraso. Aheve judío ipaye vahe Barjesús serer vahe osepiá yuvireco. Ahe oporombohe tēi: “Che añahe Tūpa Ñehengagüer rese” ehi tupri tēi vahe. ⁷ Ahe ipaye vahe oicove Chipre pendar mborerecuar Sergio Paulo serer vahe piri, ahe mborerecuar yaracua vahe. Ahe güeru uca Bernabé, Saulo avei Tūpa Ñehengagüer rendu potasave oyeupe. ⁸ Ipaye vahe rer griego ñehe pipe Elimas. Ahe ndoviroya ucai güerecuar upe ñehesa supi eté vahe. ⁹ Evocoiyase Saulo, Pablo serer vahe, vīreco ité vahe Espíritu Santo opicha pipe, omahe tupri sese. ¹⁰ Ipare aipo ehi chupe:

—¡Nde iporombopa serai vahe ereico! ¡Ndipihai vahe, Caruguar rahir tēi ereico! Opacatu mbahe aviye vahe amotarēhisar tēi avei ereico no. ¡Mahera nderepoi potai yande Yar porombohesa supi eté vahe reroīrosa sui.¹¹ Eyapisaca, cûritei yande Yar nde mombaraisura. Nande mboesapisoí chira moviro ari rupi. Ichui ndereicatu iri chietera ari rendigüer repia água —ehi Pablo chupe.

Aipo ehi ramoseve voi, opacatu pítumimbi chupe. Oñehe tēi ava güeraso água upe.¹² Ahe mbahe repiase, mbororecuar viroya yande Yar. Oyepihamondii porombohesa yande Yar resendar renduse.

Pablo, Bernabé reseve yuvirecoi Antioquía ve Pisidia ivi pipe

¹³ Evocoiyase Pablo, supindar avei, yuviraso carite pipe Pafos sui Panfilia rupindar Perge ve. Juan rumo oseya oyevi Jerusalén ve oso. ¹⁴ Perge sui yuviraso Antioquía ve, ahe namombríi Pisidia sui. Aheve, mbituhusa ari pipe, yuviroique judío tūparove oguapi yuvinoi. ¹⁵ Oyeroqui pare Tūpa porocuaita resendar cuachiar pipe, Tūpa ñehe mombehusr cuachiar pipe avei, tūparo pendar rerecuar omondo oñeho Pablo upe:

—Ore mu, perecose mbahe pemombehu vaherā co ava mongueréhi água, pemombehumi yandeu cûritei —ehi.

¹⁶ Evocoiyase Pablo opūha ohā. Omopuha avei opo ‘toyapisaca che ñehe rese yuvireco’ oya aipo ehi:

—Che mu eta, Israel iguar, iyavei pe ndahei vahe judío Tūpa mboeteisar, pesendu che ñehe —ehi—. ¹⁷ Israel iguar Tūpa oiporavo yande ramoi oyeupe nara, ahe Egipto ivi pipe omboeta secua ambuae vahe secosa pipe. Ipare opíratasa pipe vinosepa ahe ivi sui aracahe. ¹⁸ Ipare Tūpa oñemosaño yande ramoi reco ai upe cuarenta aravíter rupi, oguatase yuvireco ivi iporupiréhisa rupi. ¹⁹ Ipare omocañi ava eta Canaán pipendar siete tupri yuvirecoi vahe serecuar reseve-seve. Ipare omondo Canaán ivi yande ramoi upe nara. ²⁰ Egüe ehi cuatrocientos cincuenta aravíter rupi yapo yuvireco —ehi.

“Ipare Tūpa ombou ava recocuer moingatusar oporocuai vaherā. Ipa vahe ipāhu pendar serer Samuel aracahe. Ahe Tūpa ñehe mombehusr avei. ²¹ Ahese yande ramoi eta oporandu yuvireco Tūpa upe mbororecuar guasu rese. Evocoiyase Tūpa omondo Saúl chupe, ahe Cis rahir, ahe yande ramoi Benjamín suindar secoi. Oporocuai cuarenta aravíter rupi oico. ²² Ipare Tūpa virocua imbororecuasa ichui; omondo David upe yande ramoi cuai água. Ahe secocuer rese aipo ehi: ‘Co David, Isaí rahir, oyapo che remimbotar yepi. Ahe omboaviyera che porocuaita’ ehi Tūpa. ²³ Ahe David suindar sui, Tūpa ombou Jesús Israel iguar písiro água.

Aracaheve Tūpa omombehu co yande ramoi upe. ²⁴ Yande Yar Yu renondeve, Juan omombehu opacatu Israel iguar upe: ‘Pemboasi pe angaipa, peyevi Tūpa upe pe ñeapiramo água’ ehi chupe. ²⁵ Juan omboaviye senimise ocuaita, aipo ehi ava upe imombehu: ‘Pepihañemoñeta revo: co ité yande písirora, peye cheu viña. Oura rumo ambuae che raquicuei. Ahe che sui ivate catu vahe sese cheu ndiyai ipitaquisā yora água ipi sui’ ehi Juan” ehi judío tūparo pendar upe imombehu.

²⁶ “Che mu eta, pe Abraham suindar iyavei ndahei vahe Abraham suindar Tūpa mboeteisar, opacatu yandeu nara ombou Tūpa co ñehesa písirosa resendar. ²⁷ Jerusalén pendar rerecuar avei ndoicuai evoco Jesús Tūpa remimbou secoise yuvireco. Iyavei ndosenducuai Tūpa ñehe mombehusar cuachiar pipe oyeroquise mbituhusa ari yacatu yuvireco. Ichui ahe ae oyuca uca yuvireco. Ëgüe ehi imboaviye Jesús rese Tūpa ñehe mombehusar rembicuachiagüer pipendar yuvireco. ²⁸ Yepe ndoyosui mbahe sembiapo rai yuca uca áqua yuvireco viña, ahe rumo oporanduño Pilato upe yuca uca áqua rese yuvireco” ehi. ²⁹ “Ichui omboaviye opacatu icuachiapri pipendar yuvireco, ovíroyi uca curusu sui ñoti áqua yuvireco. ³⁰ Tūpa rumo ombogüerayevi iri. ³¹ Setá ari rupi oyemboyecua oyeupi oguata vahe upe, evocoí ava yugüeru vahe supi Galilea sui, Jerusalén ve. Cúritei ahe ava ité omombehu Jesús recocuer ava upe yuvireco” ehi tūparo pendar upe.

³² “Sese che mu eta, cúritei oromombehu pēu evocoí ñehesa avíye vahe Tūpa omondo vahe yande ramoi upe aracahe. ³³ Tūpa omboaviye ramo güemimombehugüer yande Israel suindar yaico vahe upe, ombogüerayevise Jesús. Evocoí güemimombehu oicuachía uca Salmo moñuviriosa pipe aipo ehi: ‘Co pipe nde che Rahir ereico; che nde Ru aico’ ehi Tūpa chupe. ³⁴ Tūpa omombehu avei güemimbogüerayevi sete tuyuëhi áqua icuachiapri pipe aracahe aipo ehi: ‘Che niha oroovasara acoi David upe che ñehe maranehi supi tupri vahe mboaviye áqua’ ehi. ³⁵ Sese omombehu avei ambuae icuachiapri pipe: ‘Nde, Tūpa, ndereseyai chira nde rembiguai Ava seco maranehi vahe rete ituyupa áqua’ ehi. ³⁶ Supi eté, David omboaviye ocuaita ava rese ohañecosa pipe yepi. Ipare omano. Evocoiyase oyapocatu tuvipave imu pâhuve yuvireco. Ahe setecuer rumo opaño ité ituyu” ehi. ³⁷ “Acoi Tūpa ombogüerayevi vahe retecuer rumo ndituyui eté” ehi tūparo pendar upe imombehu. ³⁸ “Sese, che mu eta, peyapisaca, tapeicua evocoí Jesús recocuer sui oime ñeroisa angaipa rese yandeu. Ahe co amombeumi pēu. Moisés porocuaita sui ndipoi ñeroisa angaipa rese yande reco mohivi áqua. ³⁹ Jesús

recocuer sui rumo oime ñeroisa ñepeí-peí viroya vahe upe" ehi.
 40 "Peicua catu co mbahe sui, toviapi eme pe haríve acoi Tūpa
 ñehe mombehusar rembicuachiagüer piipe aipo ehi vahe:

41 'Esephia, pe seroírosar peico vahe. Peyepihamondii, ipare
 pecañi tēira. Esephia, che ayapora mbahe pe recoveseve.
 Yeve ambuae omombehu tupri itera pēu che rembia-
 porā viña, pe rumo ndaperoyai chietera' ehi Tūpa" ehi
 Pablo tūparo pendar upe.

42 Yuvinose potase tūparo sui, omombita Pablo yuvireco:
 "Teremombehu irimi eremombehu vahe ñehesa ambuae
 mbituhusa ari piipe oreu" ehi yuvireco chupe. 43 Yuvinosese
 ava rehii tūparo sui, setami judío iyavei ambuae oyembojudío
 vahe yuviraso Pablo, Bernabé rupi yuvireco. Ahese, "Peico
 tupri catu Tūpa pe rovasasa piipe" ehi ava upe yuvireco.

44 Ambuae mbituhusa ari piipe seni opacatu ava ahe
 pendar oñemonuha yuvireco Tūpa Ñehengagüer rendu água.
 45 Osepiasse ava rehii, judío rerecuar oñemoiró iteanga Pablo
 upe, supindar upe avei yuvireco. Viroyo Pablo ñehe ava
 upe yuvireco. 46 Evocoiyase Pablo, Bernabé reseve oñehe
 yuvireco judío upe osiquiyeëhisave:

—Tūpa ore cuai pēu rane ore ñehe água. Pe rumo
 ndapeyapisaca potai iñehengagüer rese. Ipípe sui ndiyai
 peipisi tecovesa apiréhi vahe. Evocoiyase orosora, oroñehe
 ava ndahei vahe judío upe. 47 Esephia, yande Yar ombou ore
 cuaitarā co ñehesa rese aracahendar aipo ehi vahe:
 'Che oroporavo tataendi nungar nde reco água ndahei vahe
 judío yuvirecoi vahe upe písirosa reroguata água
 opacatu ivi rupi' ehi.

48 Ava ndahei vahe judío osenduse co ñehesa, oviharete
 yuvireco, omboetei avei Tūpa Ñehengagüer. Opacatu ava ipo-
 ravopri tecovesa apiréhi vahe pisi água, ahe viroya yuvireco.

49 Evocoiyase Tūpa Ñehengagüer omombehu opacatu ahe ivi
 rupi yuvireco. 50 Judío rumo omongueréhi cuña imboyeroy-
 apri Tūpa mboeteisar iyavei mbia seco ivate vahe Pablo,
 Bernabé mose uca água güecua sui yuvireco yamotaréhisa.

51 Ahese Pablo, Bernabé oipipete opitaqui ivi sui yuvireco
 'Tūpa toicua mbahe sembiapo ai rese yuvireco chupe' oya.
 Ichui yuviraso Iconio ve. 52 Jesús reroyasar rumo oviharete
 yuvireco, vireco ité Espíritu Santo oyese yuvireco.

14

*Pablo, Bernabé reseve omombehu Tūpa Ñehengagüer Iconio
 ve yuvireco*

¹ Pablo, Bernabé oyepota Iconio ve yuviraso. Aheve
 yuviroique judío tūparo piipe, omombehu tupri yande Yar

recocuer yuvireco. Sese setá ava viroya iñehesa yuvireco judío, ndahei vahe avei judío. ² Judío ndovíroyai vahe rumo oipihañemoñeta rerova yuvireco ava ndahei vahe judío Pablo, Bernabé iyavei ambuae Jesúz reroyasar amotaréhi ãgua. ³ Ahe rumo opita pucu yuvireco Iconio ve, omombehuño yande Yar recocuer osiquiyeëhisave yuvireco. Aheve Tūpa ombou opíratasa mbahe yavai vahe apo ãgua chupe 'ichui toicua yuvireco Pablo, Bernabé che poroaisusa mombehuse' oypave. ⁴ Ahe tecua pendar rumo ipihañemoñeta yoiví yuvireco: ñepei judío pihañemoñetasa rupindar; ambuae evocoiyase apóstol pihañemoñetasa rupindar yuvireco. ⁵ Oime judío iyavei ndahei vahe judío oyemboyoya mborerecuar rese mara-mara tēi sereco ãgua yuvireco, "Ita pipe avei yayapi-yapi" ehi yuvireco chupe viña. ⁶ Oyanduse rumo yuvireco, oñemi voi yuviraso Licaonia rupi, Listra ve, Derbe ve, ipopi rupi avei. ⁷ Supi omombehu ñehesa avíye vahe Jesúz resendar yuvireco.

Pablo yapi-yapisa ita pipe Listra ve

⁸ Listra ve yuvirecoise, oime mbia oha ramomi suive ndoguatai vahe. Ahe mbia oguapi oí ⁹ oyapisaca Pablo ñehe rese. Ahese Pablo omahengatuse sese, oicua ndoguatai vahe oyeroya ité Tūpa rese ocuera ãgua. ¹⁰ Evocoiyase aipo ehi pírata chupe:

—¡Epúha! —ehi.

Ahese opo, opúha, oguata voi. ¹¹ Osepiasse ava rehii mbahe sembiapo yuvireco, osapucai pírata Licaonia ñehe pipe yuvireco:

—¡Tūpa ité ava nungar ogüeyi yuvireco yandeu! —ehi yuvireco Pablo, Bernabé upe viña.

¹² Ipihañemoñeta yuvireco Bernabé ahe tūpa Zeus iyavei Pablo ahe tūpa Hermes viña. Esepi, Pablo oñehe vahe. ¹³ Ahese co tūpa Zeus pahi güeru tivi, mbahe potri avei. Ahe tecua tapia roquendave, ahe Zeus tūparo tecua pipe ava reiquesa rupi chini. Oyuca pota tivi Pablo, Bernabé mboetei ãgua yuvireco viña. ¹⁴ Oicuase rumo Bernabé, Pablo, ahese omondoro oturucuar yuvirnoña ava pāhuve; oñehe pírata yuvireco:

¹⁵ —Mbía, ¿mahera ëgue peye oreu? —ehi—. Ore rumo ava tēi pe nungar avei oroico. Oromombehu: "Pepoi co mbahe ëgue ehi tēi vahe mboeteisa sui; peroya Tūpa supi eté vahe" orohé pēu. Ahe oyapo vahe iva, ivi, para guasu, opacatu ipor reseve. ¹⁶ Aracahe rumo Tūpa, "Ëgue tehi oguata ndahei vahe judío opihañemoñetasa rupi yuvireco" ehi viña. ¹⁷ Tūpa rumo ndasesarai ava upe mbahe tupri apo ãgua sui. Ahe ombou

amar pēu mbahe miti ha aviye āqua yepi. Ëgüe ehi mbahe tembihu imbou iyavei viharetesa pēu –ehi ava upe yuvireco.

¹⁸ Yepe aipo omombehu yuvireco chupe, ava rehii rumo seniño ité tivi oyuca yuvireco chupe imboetei āqua viña.

¹⁹ Ahese oyepota moviro judío Antioquía sui, Iconio sui avei. Oipihañemoñeta rerova ava rehii yuvireco. Ichui oyapiyapi ita pipe Pablo yuvireco. Ipare ombotiriri seraso yuvireco tecua ivii. Ipihañemoñeta: “Yayuca ité” ehi yuvireco chupe viña. ²⁰ Oyere tupri Pablo rese Jesús reroyasar yuvireco. Ahe rumo oñarapuha, oique iri oso tecua pipe. Ahere ayihive yuvinose oyevi yuviraso Bernabé reseve Derbe ve.

²¹ Omombehu tuprise co ñehesa icatupri vahe Derbe rupi, setá ava viroya yande Yar yuvireco. Ipare oyevi yugüeru Listra rupi, Iconio rupi avei, oyepota Antioquía ve yuvireco.

²² Ahe supi omongueréhi catu opacatu Jesús reroyasar yuvireco, aipo ehi imombehu: “Yepe ava yande mombaraisura yuvireco viña, yaroyaño itera rumo Jesucristo. Sese peseya eme ité seroyasa. Yandeu aviye catu ité mbahe-mbahe tēi pipe yande recose Tūpa mborerecuasave yande reique āqua” ehi yuvireco Jesús reroyasar upe. ²³ Ipare oiporavo ava Jesús reroyasar rāro āqua ñepei-peí ñemonuhasa rupi. Oyeroqui iyavei oyecuacu. Ipare viropovēhe yande Yar upe iporavíqui āqua yuvireco.

Pablo, Bernabé oyevi yuvireco Antioquía ve Siria ivi rese

²⁴ Ipare yuviraso Pisidia rupi, oyepota Panfilia ivi rese.

²⁵ Omombehu Tūpa Ñehengagüer yuvireco Perge ve. Ipare yuviraso Atalia ve. ²⁶ Ahe ichui yuviraso carite pipe Antioquía ve, ahe tecua pipe yipindar imondopri Tūpa upe sovasapri yuvirecoi mboraviqui apo āqua. Aheve tupri avei imboaviye pare oyevi yuvireco. ²⁷ Oyepotase Antioquía ve yugüeru, omonuha opacatu Jesús reroyasar yuvireco. Aheve omombehu opacatu Tūpa mbahe oyapo vahe oyese yuvireco iyavei aipo ehi: “Yande Yar ombou avei ava ndahei vahe judío upe Guahir reroya āqua yuvireco” ehi yuvireco omboetasá upe. ²⁸ Aheve Pablo, Bernabé opita pucu yuvireco ipiri.

15

Jesús reroyasar oñemonuha Jerusalén ve yuvireco

¹ Evocoiyase moviro mbia Jesús reroyasar judío yugüeru Judea sui Antioquía ve. Ahe ombohe Jesús reroyasar yuvireco aipo ehi: “Aracahe Tūpa oyocuai Moisés yande ramoi cuai āqua: ‘Pembocircuncida opacatu pe mu cuimbahe cheu nara’ ehi Tūpa aracahe” ehi yuvireco. “Cûritei acoi ëgüe ndapeyeise

Jesús reroyasar upe, noñepisiroi chietera yuvireco” ehi Antioquía pendar upe yuvireco. ² Pablo, Bernabé reseve rumo oñeho pírata yuvireco chupe. Nomoingatu catuisse rumo mbahe yuvireco, ahese Jesús reroyasar omundo Pablo, Bernabé iyavei ambuae omboetasera Jerusalén ve apóstol upe iyavei Jesús reroyasar rārosar upe aipo mbahe moingatu água yuvireco.

³ Ëgüe ehi Jesús reroyasar Antioquía pendar yocuai imondo yuvireco. Oñocuase Fenicia, Samaria avei yuviraso, oguatasa rupi omombehu-mbehu Jesús reroyasar upe ndahei vahe judío recocuer yuvireco aipo ehi: “Setá ava ndahei vahe judío opa oseya aracahendar aracuasa Tūpa rupi oguata água yuvireco” ehi. Ahese opacatu Jesús reroyasar oyembóvharete yuvireco senduse.

⁴ Yuviroyepotase Jerusalén ve, apóstol, Jesús reroyasar rārosar iyavei ambuae Jesús reroyasarea oipisi tupri yuvireco. Aheve omombehu Tūpa mbahe oyapo vahe oyese yuvireco. ⁵ Osenduse rumo, moviro Jesús reroyasar fariseo opūha voi aipo ehi yuvireco chupe:

—Aní —ehi—. Pembocircuncida rane ité catu opacatu Jesús reroyasar ndahei vahe judío —ehi yuvireco—. Peyocuai avei opacatu ambuae Moisés porocuaita mboaviye água yuvireco —ehiño ité yuvireco.

⁶ Ahese apóstol, Jesús reroyasar rārosar avei oñemonuha oyemomborandu água aipo mbahe rese yuvireco.

⁷ Yemomborandu viteseve, Pedro opūha ipāhuve aipo ehi:

—Che mu, peicua niha aracaco Tūpa che poravo pe pāhu sui co ñehesa poropísirosa resendar mombehu água ava ndahei vahe judío upe ‘toviroya yuvireco’ oyapave. ⁸ Tūpa oicua ité opacatu ava piñañemoñetasa. Chupe avei omundo Espíritu Santo inungar yandeu. Ipipe sui yaicua Tūpa oipisi avei ahe ava oyeupe nara —ehi—. ⁹ Evocoiyase, “Judío aviyé catu vahe ava ndahei vahe judío sui” ndehi Tūpa. Esepia, opacatu oyoya pāve Tūpa upe yaico. Sese omoatiro ipiñañemoñeta rai sui oyese yerojasa pipe. ¹⁰ ¡Pe tie pesecoña pota Tūpa! ¡Mahera peyocuai uca pota co Jesús reroyasar mbahe yavai rai vahe apo água! Aní rumo. Esepia, yande ramoi ndoicatui Tūpa porocuaita mboaviye água yuvireco, yande avei ëgüe yahe —ehi—. ¹¹ Co rumo, yaroyase yande Yar Jesucristo, yande písirora oporoaisusa pipe, inungar co ava ndahei vahe judío yuvirecoi —ehi Pedro.

¹² Evocoiyase opacatu oyemonguiriri yuvireco, osendu Bernabé, Pablo ñehesa, mbahe sembiapo avei yuvireco. Evocoiyase omombehu ndayasepiai vahe poromondiisa Tūpa

oyapo uca ava ndahei vahe judío pāhuve yuvireco chupe.
 13 Osendupase iñehe yuvireco, ahese Santiago aipo ehi:

—Che mu, Jesús reroyasar, peyapisacami che ñehe rese:
 14 Simón omombehu yandeu Tūpa osaisu avei ava ndahei
 vahe judío. Sese oiporavo ahe ava oyeupe nara —ehi—
 . 15 Oyoya tupri Tūpa ñehe mombehusar rembicuachiagüer
 rese. Ñepei ipāhu pendar oicuachía aracahe aipo ehi:

16 ‘Coiye catu ayevíra vitu. Ahese ayapo piasu irira che
 rēta David oyapo uca vahecuer, ahe oí imocañipirer.
 Ambopiasu irira oitipa vahecuer yuvireco.

17 Ëgüe ahera yapo opacatu ambuae ava, toseca oYar
 yuvireco, che yapave opacatu ava ndahei vahe
 israelita cheu nara ipehapri reseve.

18 Evocoí yande Yar rembiaporã icuapri aracahe suive’ ehi
 Tūpa ñehe mombehusar aracahe.

19 “Sese chepihañemoñeta iya ndayayocuai chira Moisés
 porocuaita rupi oñecuñaro vaherā ndahei vahe judío Tūpa
 rupi oguata ãgua yuvireco” ehi. 20 “Avíye rumo yaicuachi-
 ase chupe co mbahe resendar güeraño: Pehui rene mbahe
 mimba yucapri mbahe rahanga tēi upe seropovéhepri iyavei
 ndapeaguasai chira, pehui rene mbahe mimba yucapri suvi
 renosepírehí, mbahe ruví avei” ehi. 21 “Esepia, opacatu tecua
 rupi yuvirecoi ava omombehu vahe Moisés porocuaita ñepei-
 pei mbituhusa ari piye judío tūparo piye aracahe suive. Aipo
 rupive” ehi Santiago.

Icuachiapri ndahei vahe judío upe nara

22 Ahese apóstol, Jesús reroyasar rārosar, ambuae Jesús
 reroyasar avei omondo pota opāhu pendar Pablo, Bern-
 abé rupi Antioquía ve yuvireco. Oiporavo yuvireco ñuvirío
 mbia, ahe Judas Barsabás iyavei Silas. Ahe imboyeroyapri
 omboetasa pāhuve yuvireco. 23 Ahe supi aipo ehi icuachía
 imondo yuvireco:

“Ore apóstol, Jesús reroyasar rārosar, pe mboetasa oroico
 vahe. Pe mboaviravesa, ndapemarai revo pe ndahei vahe
 judío Antioquía pendar; Siria pendar; Cilicia pendar avei.
 24 Oroyandu amove ava ore pāhu pendar pe mañeco tēi aipo
 oporombohesa piye yuvireco. Ahe ava ndahei ore ocuaita
 piye yuviraso pēu pe pihañemoñeta rerova. 25 Sese oyoya
 orepihañemoñeta oroiporavo ñuvirío mbia ore rembiaisu ore
 rivri Bernabé, Pablo rupi imondo eiipeve pēu. 26 Ahe acoi
 oyemondo vahe mbahe-mbahe tēi povrīve yande Yar Jesu-
 cristo recocuer rese yuvireco. 27 Oromondo Judas, Silas avei
 pēu: ahe teieté omombehura opacatu cuachiar pipendar pēu
 yuvireco. 28 Avíye Espíritu Santo upe, oreu avei co porocuaita

güeraño oromondo vahe rese pēu. Ndape cuaisa pota iri rumo ambuae mborocuaita rese.²⁹ Pehui rene mbahe mimba yucapri seropovēhepri mbahe rahanga tēi upendar, ndapehui chiaveira mbahe ruví, mbahe mimba yucapri suvi renosepīrēhi vahe iyavei ndapeaguasai chira. Pepoise evoco mbahe naporai vahe sui, oimera mbahe tupri pēu. Aipo rupive. Peico tupri” ehi.

³⁰ “Aviye” ohe pare, yuviraso, oyepota Antioquía ve. Aheve opase omonuha Jesús reroyasar yuvirecoi vahe omundo cuachiar yuvireco chupe.³¹ Ahe cuachiar rese oyeroquise, oyembovharete yuvireco. ³² Judas, Silas Tūpa suindar ñehesa mombehusar avei yuvirecoi. Sese ombovharete catu iyavei omonguerēhi catu avei ahe ava yuvireco oñehe pipe.³³ Opitase moviro arí aheve, Jesús reroyasar Antioquía pendar aipo ehi: “Aviye. Peyevi tupri pe mbousar upe” ehi yuvireco chupe.³⁴ Silas rumo opita potaño ité aheve.³⁵ Pablo, Bernabé avei opita viteño ité aheve yuvireco, ahe setá ambuae Jesús reroyasar reseve imbohe vite ãgua yande Yar resendar ñehesa rese yuvireco.

Imoñuviriosa Pablo guata agüer Jesús recocuer mombehu ãgua

³⁶ Coiye Pablo aipo ehi Bernabé upe:

—Yaso, yasepia iri Jesús reroyasar opacatu yande Yar ñehengagüer yamombehu vahecuer rupi, ¿mara ehi pīha ahe yuvireco? —ehi.

³⁷ Ahese Bernabé viraso pota Juan Marcos oyeupi viña.³⁸ Nomboyoyai rumo Pablo ipihañemoñeta rese. Esepia, cuese Juan Marcos oseyaoño oyepotase yuvireco Panfilia ve. “Taipítiviiño iporavíquisa rese” ndehi chupe.³⁹ Nomoingatuisse mbahe oyeupe yuvireco, oyepepiño yuvireco oyesui. Ahese Bernabé viraso Marcos oyeupi carite pipe Chipre ve.⁴⁰ Pablo rumo oiporavo Silas oyeupi icho ãgua. Yuvinose ãgua Antioquía sui, Jesús reroyasar ahe pendar aipo ehi yuvireco chupe: “Tape rovasa Tūpa oporoaisusa pipe” ehi yuvireco imondo.⁴¹ Ipare yuviraso Siria, Cilicia rupi Jesús reroyasar monguerēhi catu ãgua yuvireco.

16

Timoteo oso Silas ndugüerā Pablo rupi

¹ Pablo ondugüer reseve yuviraso Derbe ve, Listra ve avei. Aheve osepia Jesús reroyasar, Timoteo serer vahe, judía, Jesús reroyasar membri. Iyesupa rumo griego.² “Evoco Timoteo aviye etepri” ehi Jesús reroyasar Listra pendar, Iconio pendar avei yuvireco chupe.³ Pablo viroguata potaño ité Timoteo oyeupi. Sese seroguata renondeve, ombocircuncida

uca serořořhi ãgua judío yuvirecoi vahe upe. Esepio, opacatu oicua Timoteo ru griego secose yuvireco. ⁴ Evocoiyase opacatu tecua iguatagüer rupi omombehu ahe mborocuaita apóstol, Jesús reroyasar rãrosar Jerusalén pendar ombou vahe yuvireco chupe. ⁵ Sese Jesús reroyasar ahe tecua rupindar oyemoviracua catu yuvireco Jesús reroyasa pipe iyavei oyemboeta catu yuvireco ari rupi.

Tüpa omundo uca Pablo Macedonia ve iquer nungar pipe

⁶ Espíritu Santo ndoipotai Asia rupi yuviraso vaherā Tüpa Ñehengagüer mombehu ãgua. Sese oyahuva yuviraso Frigia rupi, Galacia rupi avei. ⁷ Ëgue ehi oyepota Misia popive yuvireco. Ichui yuviraso pota tēi Bitinia ve. Jesús Espíritu rumo ndoipotai icho ãgua supi. ⁸ Ahese osasaviño yuviraso Misia sui carite guasu yemboyasa Troas ve oyepota ãgua yuvireco. ⁹ Oyepotase aheve, ahe p̄tu pipe Pablo oquer nungar pipe osepio mbia, Macedonia pendar, “Ereyumira Macedonia ve ore p̄tivii ãgua viña” ehi ohā chupe. ¹⁰ Ipare ore oroyemoingatu voi eté Macedonia ve ore so ãgua. Esepio, ore oroicua ité Tüpa aheve ore mondora ñehesa p̄sirosa resendar mombehu ãgua.

Pablo, Silas Filipo ve yuvirecoi

¹¹ Oroso carite pipe Troas sui oromohiviño voi oroso evocoí ivi para guasu Samotracia ve. Ahere ayihive oroyepota Neápolis ve. ¹² Ichui oroso ivi rupi Filipos ve, ahe tecua seroyaprí catu vahe ambuae tecua sui, ahe ivi Macedonia rupindar. Aheve Roma igañar oyeyecuai, oyocuai avei opacatu tecua ivirindar ava yuvireco. Aheve moviro ari tēi oroico. ¹³ Mbituhusa ari pipe orosē evocoí tecua sui iai popive. “Aheve oñemonuhara judío oyeroqui ãgua” orohe. Aheseve cuña oñemonuha yugüeru. Aheve oroyepota chupe, oroguapi ipāhuve. Ipare oromombehu co ñehesa p̄sirosa resendar yuvireco chupe. ¹⁴ Ñepei imboetasa, Lidia serer vahe, Tiatira pendar, oyapisaca ore ñehe rese oī. Ahe Tüpa mboeteisar secoi, turucuar suendi vahe mbovendesar avei secoi. Yande Yar omohivi ipihañemoñetasa iyapisaca ãgua Pablo remimombehu rese. ¹⁵ Sese ñapiramosa, opacatu sēta pendar reseve. Ipare ore mombita pota güetave.

—Che reroyase peye yande Yar reroyasar che recose, pepitara che rētave —ehi oreu.

Ëgue ehi ore monguerēhi. Sese oropita sētave ipiri.

¹⁶ Ipare ambuae ari oroso irise oroyerqui ãgua, cuñatai ore rovařchi, ahe cuñatai caruguar p̄ratasa pipe mbahe mombehusar. Oicatu ava upe mbahe oime vaherā mombehu.

Omombehuse mbahe, setá oipisi sepri guarepochi güerecuar yuvirecoi vahe upe nara yepi. ¹⁷ Ahe cuñatai ou ore raquicuei,

—¡Co ava Tūpa ivate catu vahe upendar oporaviquí yuvireco omombehu: “Na ehira Tūpa yande písir” ehi yuvireco! —ehi pucu-pucu ore mombehu ava upe.

¹⁸ Setá ari ëgue ehi oico oreu. Omañeco tēise rumo Pablo, oyemboyere chupe cute, aipo ehi icaruguar upe:

—Che orocuai Jesucristo rer pipe: esē co cuñatai sui —ehi. Aheseve voi caruguar osē ichui.

¹⁹ Evocoiyase cuñatai rerecuar oyanduse, “Ndoipisi uca iri chira guarepochi yandeu” ehi yuvireco. Imboasipave oipisi Pablo, Silas mborerecuar upe ocarusuve seraso yuvireco.

²⁰ Ipare mborerecuar yuvirecoi vahe upe aipo ehi yuvireco:

—Co ñuvirío mbia orogüeru vahe peu, judío tēi yuvirecoi. Ayeve omboaivu guasu tēi yuvireco yande recua pipe.

²¹ Oporombohe güecocuer rese yuvireco. Secocuer rumo naporai oreu. Ore Roma iguar oroico, sese ndoroicatui secocuer moña água —ehi yuvireco mborerecuar upe.

²² Evocoiyase ava eta oyamotaréhi Pablo iyavei Silas yuvireco iyavei mborerecuar, “Pesequií iturucuar ichui. Ipare peinupara ivira pipe” ehi. ²³ Inupá iteanga pare, osoquenda yuvireco. Oyocuai pírata soquendapri rārosar yuvireco, “Esāro tupri” ehi yuvireco chupe. ²⁴ Aipo oyeupe he ramoseve, soquendapri rārosar omoingue Pablo, Silas oí ava nose catui vahesa pipe. Aheve omopaha cepo pipe.

²⁵ Ahe pítu mbiter rupi rumo Pablo, Silas oyeroqui, osapucai Tūpa mboeteisave yuvireco. Ambuae ava soquendapri evocoiyase osenduño tēi yuvireco isapucai. ²⁶ Ahese aviyeteramo tēi ivi oririi eteanga. Opa omomara ava roquendas moviracuasa, opacatu oquenda oyemboi iyavei opacatu carena oyera soquendapri sui. ²⁷ Ahese soquendapri rārosar omahe yesapiha. Osepiase oquenda imboipri, ahese vinose oquise pucu siru sui oyeyuca água viña. Esepiá niha, “Opacatu ité revo soquendapri yuviraso” ehi viña. ²⁸ Pablo rumo,

—¡Ereyapoi rene mbahe tēi ndeyeupe! ¡Esepiá, opacatu oroicoveño cohabe! —ehi pucu soquendapri rārosar upe.

²⁹ Evocoiyase soquendapri rārosar, “Emboumi tataendi” ehi ondugüer upe. Ichui oña oique, oririi, osíquiyepave oñenopíha Pablo, Silas rovai oso. ³⁰ Vinose pare soquendasa sui operandu chupe:

—Mbía, ¿mara ahera vo che ñepisiro água vichico? —ehi chupe.

³¹ —Eroya yande Yar Jesucristo. Ichui ahe nde písirora, nde rēta pendar avei —ehi yuvireco chupe.

³² Ahese omombehu yuvireco Tūpa Ñehengagüer soquendapri rārosar upe, opacatu sēta pendar upe avei. ³³ Ahe pītu pipeve avei soquendapri rārosar viraso oyeupi, yapichasa oyoseipa chupe. Ahese Pablo, Silas oñapiramo guārosarer, sēta pendar avei yuvireco. ³⁴ Viraso pare sārosar güētave, ombocaru. Ahe sēta pendar avei oviharete ité yuvireco Tūpa reroyasa rese.

³⁵ Cōhese mborerecuareta omondo sundao ava rese icuaipri soquendasave yuvireco. Oyepotase yuvireco, aipo ehi: “Emosepa evocoí mbia judío” ehi. ³⁶ Ahese soquendapri rārosar omombehu co ñehesa Pablo upe:

—Mborerecuar ombou yuvireco ñehesa cheu pe mose água. Peso tupriño peico —ehi chupe.

³⁷ Omboyeví rumo chupe,

—Ore niha romano orico viña, ore nupasa rumo opacatu ava rovaque. Ndoporandu rane angai eté rumo mbahe rese oreu. Ore roquendapa voiño tēi yuvireco. Ipare aipo ava rembiepiaëhive tēi ore mosepa uca pota viña. ¡Aní eté rumo! Ahe teieté ru toyugüeru ore mose água —ehi soquendapri rārosar upe.

³⁸ Ipare sundao ava rese icuaipri omombehu güerecuareta upe Pablo ñehe. Oyanduse Pablo, Silas romano secose, osiquiyé iteanga yuvireco. ³⁹ Ahese ahe teieté yuviraso Pablo, Silas oyeupe ñero água rese yuvireco: “Peso tupriño ore recua sui” ehi yuvireco chupe. ⁴⁰ Pablo, Silas yuvinosese voquendasasui, yuviraso iri Lidia rētave. Oñemonuha irise ambuae Jesús reroyasar pāhuve, omonguerëhi catu yuvireco. Ipare yuviraso ichui.

17

Ava yaívu guasu tēi Tessalónica ve yuvireco

¹ Oguatase Pablo iyavei Silas, oñocua Anfípolis iyavei Apolonia rupi yuviraso. Ëgüe ehi oyepota tecua Tessalónica ve yuvireco. Aheve oime judío tūparo. ² Secocuer rupi eté mbītuhusa arí pipe Pablo oique judío tūparove, oñemoñeta ava eta upe mbosapi mbītuhusa arí rupi Tūpa Ñehengagüer rese. ³ Omboyeecua tupri imombehu Tūpa Rembiporavo ava písiro água iparaisu rane itera, omanora, ipare rumo ocuerayevi iriño itera. Ipare aipo ehi:

—Jesús, acoi amombehu vahe pēu, ahe ité niha Tūpa Rembiporavo ava písiro água —ehi.

⁴ Amove ipāhu pendar seroyasa pipe oyemboya sese yuvireco. Setá avei ava griego yuvirecoi vahe, Tūpa mboeteisar judío aracuasa reroyasar avei. Ipāhuve setá avei cuña oyemboetei vahe oyemboya sese yuvireco. ⁵ Judío

rumo ndovíroyai vahe oñemoírombave secatéhi ava rese yuvíreco. Sese omonuha ava yuvíreco tēi vahe, ndipihai vahe yuvíreco. Imonuha pare, ahe omboaívu guasu uca tēi ahe ava upe opacatu güecua pípe yuvíreco. Yuvíraso Jasón rētave Pablo, Silas reca, vínose pota ava rehii pāhuve yuvíreco viña. ⁶ Ndoyosuise rumo aheve yuvíreco, vírasoño Jasón, ambuae Jesús reroyasar avei güecua rerecuar rovai yuvíreco. Viroáse guasu seréco yuvíreco,

—¡Evocoi mbia Pablo iyavei Silas virova vahe ava recocuer opacatu tecua rupi yuvíreco, cūritei oyepotapa yuvíreco cohabe! ⁷ Co Jasón omombítuhu güëtave. ¡Opacatu co yuvírecoi vahe ndovíroyai Cesar porocuaita yuvíreco iyavei omombehu yuvíreco: “Oime ambuae mborerecuar guasu, ahe Jesús” ehi niha aipo yuvíreco! —ehi yuvíreco mborerecuar upe.

⁸ Aipo ñehesa renduse, oyepíhamondii guasu ava eta, mborerecuar avei tecua pípendar yuvíreco. ⁹ Mborerecuar rumo oipisipase guarePOCHI Jasón sui, ambuae Jesús reroyasar sui avei, ahese opa omose.

Pablo, Silas omombehu Túpa Ñehengagüer Berea ve yuvíreco

¹⁰ Ahe pítu pípeve voi ava Jesús reroyasar omondo Pablo, Silas tecua Berea ve yuvíreco. Oyepotase aheve, yuvíroique judío tūparo pípe. ¹¹ Berea pendar ava avíye catu ava Tesalónica pendar sui. Ëgüe ehi ipisi ohäpisiéhisa pípe ñehesa yuvíreco iyavei ari yacatu rupi oseca Túpa Ñehengagüer pípe ‘¿supi eté píha Pablo ñehesa?’ oyapave yuvíreco. ¹² Evocoiyase setá avei Pablo ñehe reroyasar iyavei setá griego viroya yuvíreco, ndahei cuimbahe güeraño, cuña oyemboetei vahe avei. ¹³ Judío Tesalónica pendar rumo oyandu yuvíreco Pablo porombohesa Túpa Ñehengagüer rese Berea ve. Sese yuvíraso aheve imboaívu guasu tēi uca áqua ava upe yuvíreco. ¹⁴ Evocoiyase Jesús reroyasar Berea pendar Pablo viroguata poyava voi tecua sui para guasu cotí yuvíreco. Silas iyavei Timoteo rumo opita vitéño aheve yuvíreco. ¹⁵ Evocoiyase Pablo rupi yuvíraso vahe viroyepota Atenas ve seraso. Ahe ichui viroyevi Pablo ñehe Silas upe iyavei Timoteo upe avei yuvíreco yuvíraso voi áqua Pablo píri ahe tecuave yuvíreco.

Pablo Atenas ve secoi

¹⁶ Pablo osáro viteseve Silas iyavei Timoteo Atenas ve oico, ndoyembovíhai osepiase opacatu rupi tūpa rahanga-anga tēi. ¹⁷ Sese judío tūparo pípe omombehu Jesús recocuer judío eta upe iyavei ambuae Túpa mboeteisar upe avei. Iyavei ari yacatu omoñeta ava osepio vahe ocarusu rupi ava ñemonuhasave ahe tecua pípe. ¹⁸ Evocoiyase amove mbia oyembohe vahe

epicúreo aracuasa rese iyavei mbia oyembohe vahe estoico aracuasa rese oñemoñeta Pablo rese yuvireco. Amove aipo ehi Pablo upe yuvireco seroñrosave:

—¿Mbahe rese angahu pīha co mbia iñehe papa rai ava upe oico? —ehi.

Ambuae aipo ehi yuvireco:

—Ndoyavii co mbia oñehe vahe ambuae ava Tūpa rese tēi — ehi yuvireco.

Esepia, omombehu Jesús recocuer iyavei cuerayevisa resendar.¹⁹ Evocoiyase ahe oyembohe vahe viroyeupi Pablo Areópago serer vahesave seraso yuvireco. Aheve ava oñemonuhasave aipo ehi yuvireco chupe:

—¿Ndiyai vo eresenducua uca tupri catumira co porombohesa piásu resendar oreu viña?²⁰ Supi eté niha eremombehu mbahe ndorosendu vītei vahe, ore oroicua tupri pota, ¿mara oyapave ité vo aipo ehi? —ehi yuvireco Pablo upe.

²¹ Atenas pendar iyavei yugüeru vahe Atenas ve, oyembohe pota serai vahe yuvireco. Ahe oñemoñetaño, omombehuño mbahe oyeupe yuvireco yepi iyavei osendu pota rai ñehesa ipiásu vahe. Aheño ité ipīhañemoñetasva yuvireco.

²²⁻²³ Evocoiyase Pablo opūha ahe ava pāhuve aipo ehi:

“Pesendu rane Atenas iguar. Aguatase ocar rupi asepia pe tūpa eta pemboetei vahe. Ahese asepia ñepei tūpa upe seropovēhepri renda. Sese asepia icuachiapri aipo ehi oí: ‘Tūpa ndicuasai vahe upendar’ ehi. Evoco Tūpa ndapeicua vītei vahe, ahe secocuer niha amombehu pēu” ehi.

²⁴ “Evoco Tūpa oyapo vahe co iví, opacatu mbahe ipor avei. Ahe niha iví, iva Yar secoi. Sese ndasecoi tūparo ava tēi rembiapo pipe.²⁵ Ndahei ava rembiapo pipe sui tēi oicove. Esepia, ndipoi mbahe ipane vahe chupe. Ahe ité niha opacatu upe ombou tecovesa, pītuhesa iyavei opacatu mbahe oime vahe iví, iwave” ehi.

²⁶ “Tūpa oyapo opacatu-catu tēi ava ñepei ava sui ava yesu áqua opacatu iví rupi. Omundo iví ava yemboerecua áqua ñepei-peí upe. Arí avei omondo co iví pipe iyemboerecua áqua yuvireco chupe.²⁷ Ëgüe ehi ava upe ‘tache reca yuvireco’ oya, ‘ipipe sui aviyeteramo che reroyara yuvireco’ oyapave. Ëgüe ehi rumo Tūpa yande resevemi eté.²⁸ Esepia niha, Tūpa sui yaicove, ipíratasa pipe yayembovava, ichui avei yareco yande recovesa, inungar oicuachía amove pe recua pendar yuvireco, aipo ehi: ‘Yaico ité Tūpa suindar’ ehi yuvireco.²⁹ Sese yande Tūpa suindar yaicose, ‘Co mbahe rahanga oro apopri iyavei guarePOCHI, ita apopri, ahe revo Tūpa’ ndayahei chira. Esepia, mbahe rahanga ava rembiapo tēi, ndahei Tūpa” ehi.³⁰ “Pe ramoi ndoicua tupriise yuvireco aracahe,

Tūpa oñemosaño mbahe sembiapo rese chupe. Cūritei rumo oyocuai opacatu ava co ivi pipendar ‘tomboasi oangaipa, toyevi yuvireco cheu’ oya.³¹ Esepia, ahe oiporavo ari opacatu ava recocuer rese porandu uca ãgua güecocuer ivi tuprisa pipe ñepei güembiporavo upe. Ahe ombogüerayevi güembiporavo omano vahe pâhu sui ‘toicua opacatu ava güecocuer rese iporandu ãgua’ oya” ehi Atenas pendar upe.

³² Osenduse yuvireco cuerayevisa resendar, ahese oime ava oyoyai catu yuvireco seroïrosave. Ambuae rumo aipo ehi yuvireco:

—Torosendu irimi aipo ñehesa curi —ehi yuvireco.

³³ Sese Pablo osẽ ipâhu sui oso. ³⁴ Moviro rumo mbia oyemboa sese, viroya ité vahe iñehesa yuvireco. Ahe ipâhuve secoi mbia Dionisio serer vahe, ahe Areópago pâhu pendar iyavei cuña Dámaris serer vahe. Ambuae oime vite yuvireco seroyasar.

18

Pablo Corinto ve secoi

¹ Coiye catu Pablo osẽ Atenas sui, oso Corinto ve. ² Aheve oyoepia mbia judío, Aquila serer vahe rese yuvireco. Ahe mbia aipo Ponto ve oha vahecuer. Yugüeru ramo rumo Italia sui güembireco Priscila reseve. Yuvinose ñepei tecua Italia rupindar Roma sui oyocuaise mborerecuar guasu Claudio: “Toyuvinose ité opacatu judío Roma sui” ehise. Pablo oso, ³ opita Aquila piri oporavíqui ãgua. Esepia, Pablo, Aquila avei ahe mbahe pirer mbovívísar pâve yuvirecoi. ⁴ Mbituhusa ari yacatu rupi Pablo omombehu Jesucristo recocuer ava upe judío tūparo pipe ‘toviroya Jesús judío iyavei ndahei vahe judío yuvireco’ oyapave.

⁵ Oyepotare rumo Silas, Timoteo Macedonia sui yuvireco, ahese Pablo oyemondo ité Jesús recocuer mombehu ãgua rese güeraño judío eta upe aipo ehi: “Jesús niha Tūpa Rembiporavo ava písiro ãgua secoi” ehi. ⁶ Iñehe-ñehe tēi rumo seroïrosave yuvireco chupe. Sese Pablo oipipete oturucuar sovaque ‘oimera mbahe tēi pēu’ oya, iyavei aipo ehi chupe yuvireco:

—Pe ae niha peseca Tūpa ñemoirosa peyeupe pe recocuerai sui. Ndahei rumo che resera mbahe. Esepia, che amboaviye tupri che cuaita pēu. Che rumo, co pipe suive, amombehu catuño itera co ñehesa ava ndahei vahe judío upe vichico —ehi Pablo judío upe.

⁷ Evocoiyase Pablo osẽ judío tūparo sui, oique mbia Ticio Justo serer vahe rētave, ahe Tūpa mboeteisar avei secoi. Ahe sēta judío tūparo iqueve. ⁸ Crispo, ahe judío tūparo rerecuar viroya avei yande Yar, opacatu sēta pendar avei viroya

yuvireco. Setá ambuae Corinto pendar avei viroya osenduse iñehesa yuvireco. Seroya pare, oñeapiramopa uca yuvireco. ⁹ Ñepei pítu pipe yande Yar oñehe Pablo upe iquer nungarve: “Eresiquiyei rene, ereñehe ava upe, che mombehuño eve, erepoi rene che mombehusa sui. ¹⁰ Esepi, che nde reseve aico. Sese ndiyai ava upe nde momara uca água. Supi eté che areco setá che rahirā co tecua pipe” ehi yande Yar chupe. ¹¹ Evocoiyase opita ñepei aravíter yemombitesa rupi Corinto ve oico. Aheve ombohe Tūpa Ñehengagüer rese ahe pendar ava.

¹² Galión mborerecuar secose opacatu Acaya rupi, judío oñemonuha Pablo amotarëhisave. Ichui viraso ahe mborerecuar upe porandusa ívate catusave yuvireco, ¹³ aipo ehi yuvireco chupe:

—Co mbia oipihañemoñeta rerova tēi ava oTūpa mboetei água. Ndahei rumo Roma pendar porocuaita rupi ẽgue ehi yuvireco —ehi yuvireco seroïrosave chupe.

¹⁴ Oñehe pota tēi viña, Galión rane rumo oñehe judío upe:

—Peyapisaca mbia judío. Pemombehuse cheu ava rembiapo naporai vahe, ahese ayemonguerëhira che yapisaca água pe remimombehu rese viña. ¹⁵ Pe rumo peporandu cheu mbahe pe yembohesa resendar, pe Tūpa rer resendar iyavei pe Tūpa porocuaita resendar rese tēi. Pemoingatu pe ae pe recocuer; ndaipotai aipo nungar mbahe moingatu água —ehi Galión ahe ava upe.

¹⁶ Ipare opa omboyepepi porandusa sui. ¹⁷ Ahese opacatu griego oipisi judío tūparo rerecuar Sóstenes yuvireco. Ipare yuvirocua-rocua Galión rovai ahe peve yuvireco sese. Galión rumo, “Mara etemo che areco viña” ehiño chupe.

Pablo yevi irisa Antioquía ve

¹⁸ Pablo secoi pucu vité pare Corinto ve, “Asora vichico cute” ehi Jesús reroyasar upe. Ipare yuviraso Aquila, Priscila reseve. Oyepotase Cencrea ve yuvireco para guasu popive, aheve Pablo oñeapipa tupri oñehe mboaviye água. Ipare yuviraso carite pipe Siria ve. ¹⁹ Siria piar rupi yuviraso Efeso ve. Aheve opita Aquila, Priscila yuvireco. Ichui Pablo oique judío tūparo pipe Jesús resendar ñehesa mombehu água chupe yuvireco. ²⁰ Ahe pendar omombita pota vité tēi yuvireco viña, Pablo rumo ndopita potai aheve. ²¹ Evocoiyase, “Aviye, taso rane” ehiño chupe yuvireco. “Tūpa oipotase cheu, ayevi irira vitu pe piri” ehi.

Ipare oso Efeso sui carite pipe. ²² Oyepotase Cesarea ve, oso Jerusalén ve “avirave” apo água Jesús reroyasar upe. Ipare oso Antioquía ve. ²³ Opita pucu pare aheve, osē, oguata iri

Galacia rupi, Frigia rupi opacatu Jesús reroyasar monguerēhi catu ãgua.

Apolos omombehu Jesús recocuer Efeso ve

²⁴ Aheseve avei judío Apolos serer vahe oso Efeso ve, ahe Apolos, Alejandría ñguar. Oñehe tupri ai vahe, oicua tupri avei Tūpa Ñehengagüer. ²⁵ Ahe oyembohe vahe avei yande Yar recocuer rese. Omombehu oquerēhisa pipe secocuer ava upe, oporombohe tupri ai avei sese. Ahe rumo oicua Juan oãpiramo agüer güeraño tēi. ²⁶ Ahe osiquiyeehisave judío tūparo pipe omombehu Tūpa Ñehengagüer. Osenduse Aquila, Priscila iñehesa, omombita yuvireco oyepiri. Ahese omombehu tupri catu Tūpa recocuer chupe yuvireco. ²⁷ Oso potase Apolos Acaya coti, ahese Jesús reroyasar Efeso pendar omonguerēhi catu. Oyapo cuachiar Acaya pendar upe imondo yuvireco sese hañeco tupri ãgua. Ipare oyepota oso Acaya ve. Aheve oime ava Tūpa guaisusa pipe sui víroya vahe Jesús yuvireco. Ahe ava Apolos oipítivii seroya tupri catu ãgua yuvireco. ²⁸ Omboyecua opacatu rovaque judío pihañemoñetas co coti tēi vahe. Ahese opa osecopi oñehe pipe ahe ava. Esepia, Tūpa Ñehengagüer pipe omboyecua ité: “Jesús Tūpa Rembiporavo ava písirō ãgua secoi” ehi eté judío eta upe.

19

Pablo omombehu Jesús recocuer Efeso ve

¹ Evocoiyase Apolos Corinto ve ipitaseve, ahe tecua Acaya rupindar, Pablo oñocua ñivitaté vahe oyepota Efeso ve oso. Aheve osepia setá Jesús reroyasar. ² Evocoiyase oporandu ahe ava upe:

—¿Peipisi vo Espíritu Santo pe piha pipe peroyase Jesús? —ehi chupe.

—Ore ndorosendui eté aipo Espíritu Santo resendar ñehesa —ehiño yuvireco chupe.

³ Ichui oporandu iri chupe:

—Evocoiyase, ¿mbahe nungar vo ãpiramosa peipisi? —ehi.

—Juan poroãpiramosa oroipisi —ehi ahe ava yuvireco chupe.

⁴ Evocoiyase aipo ehi ahe ava upe:

—Juan niha oñapiramo acoi omboasi vahe oangaipa oyevise Tūpa upe. Ipare rumo omombehu ava upe: “Peroya ahe eté vahe ou vaherā che raquicuei” ehi. Ahe ou vaherā, “Jesús upe” aipo ehi —ehi Pablo chupe.

⁵ Osenduse Pablo ñehe, opacatu oñeapiramo uca Jesucristo rer pipe yuvireco. ⁶ Omondose Pablo opo iharive yuvireco, ahese ogüeyi Espíritu Santo, oique ipiha pipe yuvireco. Ipare aviyeteramo tēi oñehe ambuae ñehesa pipe iyavei omombehu

Tūpa suindar ñehesa yuvireco. ⁷ Ëgüe ehi Tūpa ahe doce mbia yuvirecoi vahe upe.

⁸ Mbosapi yasi rupi Pablo oique omombehu Tūpa Ñehengagüer judío upe osiquiyeëhisave itúparo pípe ipihañemoñeta rerova ãgua Tūpa mborerecuasa resendar reroya ãgua rese. ⁹ Amove rumo judío ipihavíracua ité seroyaëhi ãgua yuvireco. Ipipe iñehe-ñehe tēiño co tecocuer ipiasu vahe mombehusa rese yuvireco ava rehii rovaque. Evocoiyase Pablo oyepepi ichui, vinosepa oyeupi Jesús reroyasar yeroquisa Tirano serer vahesave seraso. Aheve ari yacatu rupi oñehe yepi. ¹⁰ Ëgüe ehi ñuvirío aravíter rupi. Sese opacatu ava Asia rupindar judío, ava ndahei vahe judío avei osendu yuvireco yande Yar ñehengagüer. ¹¹ Tūpa omondo güeco píratasa Pablo upe poromondiisa apo ãgua. ¹² Sese pañueru iyavei turucuar Pablo rese imboyapri, ahe serasosa imbaheasi vahe upe imbogüera ãgua. Caruguar avei opa yuvinose yuvireco ichui.

¹³ Amove oime judío oguata vahe ocar rupi caruguar mose ãgua ava sui. Sese nara oiporu pota yande Yar Jesús rer yuvireco.

¹⁴ Evocoiyase aipo ehi caruguar upe: “Pablo Jesús recocuer omombehu vahe rer pípe, ‘Peyepepi co mbia sui’ ahe pẽu” ehi. Ëgüe ehi pota avei siete Esceva rahir mbahe apo yuvireco viña. Ahe iyesupa judío pahi rerecuar secoi. ¹⁵ Caruguar rumo omboyevíchupe: “Che aicua Jesús recocuer, aicua avei Pablo; pe rumo ndopocuai, ¿ava vo catu pe peico?” ehiño caruguar chupe.

¹⁶ Aheseve ahe cuimbahe caruguar víreco vahe opo ipáhuve oso. Opacatu opíratasa pípe opa ité osecopi siete mbia yuvirecoi vahe. Omomara-mara tēi oguayíëhisa pípe imonanipa tupri imondo. ¹⁷ Co mbahe sembiapo réracua opa oye-pota opacatu Efeso pendar upe, judío upe, ava ndahei vahe judío upe avei. Evocoiyase oyembosiñiye guasu yuvireco. Ipipe sui opacatu oicua yande Yar Jesús rer yuvireco.

¹⁸ Setá Jesús víroya ramo vahe yugüeru opacatu mbahe güembiapocuer naporai vahe mombehu yuvireco ¹⁹ iyavei setá ipaye vahe Jesucristo víroyase, omonuhapa ocuachiarombopayesa resendar sapi ãgua opacatu ava rovaque yuvireco. Sapí pare, opa ahe cuachiar reprí vinose yuvireco. Ahe sepri cincuenta mil tupri ari mboraviquí reprí. ²⁰ Ëgüe ehi Tūpa opíratasa pípe ombouvicha oñehengagüer iyavei iñehe píratasa oyecua catu ava rese.

²¹ Ipare Pablo ipihañemoñeta Jerusalén ve oso ãgua ivi Macedonia, Acaya rupi. “Coíye catu aheve che reco viteseve, ichuive che asora Roma ve” ehi. ²² Evocoiyase omundo

ñuvirío opitivíisar Timoteo, Erasto Macedonia ve güenorera. Ahe rumo opita vitemi Asia rupi oico.

Ava Efeso pendar yaívu guasu yuvireco

²³ Ahe ari pipe Efeso pendar yaívu guasu yuvireco co tecocuer ipiasu vahe rese. ²⁴ Aheve mbia Demetrio serer vahe secoi. Ahe oyapo Artemisa rëta rahanga guarePOCHI apopri guarePOCHI pisi ãgua. Ambuae ava mbahe rahanga aposar oipisi tupri avei oporavíqui reprí ipiri yuvireco. ²⁵ Sese Demetrio omonuha mbahe rahanga aposar, omonuha avei ambuae oporavíqui vahe Artemisa rahanga rese, ava mboaivu guasu uca ãgua. “Pe mbia, peicua yayapose mbahe Artemisa nungar, yaipisi tupri yande poravíqui reprí” ehi omboetasa upe. ²⁶ “Peicua avei Pablo opa ovirova ava eta piha Artemisa mboeteisa sui ‘ndahei Túpa ité’ ohesa pipe yande rembiapo uve. Ndahei rumo cohapeño ëgue ehi, opacatu Asia rupi ëgue ehi avei imombehu. ²⁷ Aviyeteramo mbahe tēi oimera yandeu yande poravíquisa mocañi tēi ãgua, túparo guasu Artemisa upendar aviyeteramo ocañi tēi aveira. Opacatu Asia pendar iyavei ava opacatu ivi rupindar omboetei acoi Artemisa rahanga guasu yuvireco viña. Aviyeteramo rumo ava nomboetei iri chira, iyavei viroírora yande rembiapo catuprisa yuvireco” ehi.

²⁸ Osenduse aipo ihe ava yuvireco, oñemoirosa pipe virosapucai aipo ehi yuvireco: “¡Imboeteipri catu Artemisa yande recua pendar tasecoi!” ehi yuvireco.

²⁹ Opacatu Efeso rupi ava yaívu guasu tēi. Osapucai vahe oipisi Gayo iyavei Aristarco, ahe ñuvirío Pablo rupindar yugüeru vahe Macedonia sui. Oipisise, omombo-mombo seraso yuvireco ava ñemonuha guasusave. ³⁰ Pablo oique pota tēi ava rehii pâhuve, ambuae Jesús reroyasar rumo nomoingue uca potai yuvireco. ³¹ Iyavei moviro mborerecuar imborípar Asia rupindar omondo oñehe chupe aipo ehi: “Ereiquei rene ava ñemonuhasa guasuve” ehi avei yuvireco chupe. ³² Ñemonuhasave amove ava osapucai pírata ñepei mbahe rese, amove osapucai ambuae mbahe rese. Esepio, yaívu tēi yuvireco. “¿Mahera vo evocoiyase yañemonuha?” ehi tēi setá ipâhu pendar yuvireco. ³³ Amove rumo ava rehii pâhuve yuvirecoi vahe judío, ahe ombohe-mbohe imoañi-ani imondo Alejandro mbahe mombehu ãgua ava rehii rovaque yuvireco. Alejandro evocoiyase omopuha tēi opo ava monguiriri ãgua viña. Osepi pota omu judío ava rehii rovaque viña. ³⁴ Ava rehii rumo oicuase Alejandro judío secose yuvireco. Opacatu guasu osapucai pírata yuvireco. “¡Imboeteipri catu Artemisa yande recua pendar tasecoi!” ehi

pucu-pucu yuvireco. Ëgüe ehi ahe osapucai ñuvirío hora rupi rutei yuvireco.

³⁵ Evocoiyase tecua pipendar mbahe cuachiasar oicatuse ava monguiriri água, aipo ehi chupe: “Peyapisaca mbia pe Efeso pendar, ndipoi ava ndoicuai vahe yande Artemisa tūparo rese yande hañecosa iyavei sahangas iwa sui ovíapi vahe rese avei hañecosa. ³⁶ Ndipoi niha ava, ‘Aní’ ehi vaherā che remimombehu rese. Sese peyemonguiriríño, peyapoi rene mbahe pe yapisacaëhisave. ³⁷ Peruño tēi eté co ñuvirío mbia coháve, ndoyapoi rumo mbahe tēi Artemisa upé yuvireco. Nimondai mbahe rese itúparove, ndoviroíroi avei serer yuvireco. ³⁸ Sese Demetrio iyavei oporavíqui vahe supi ahe oñemoirose que ava upé, toyuviraso rane ava recocuer moingatusar upé yuvireco; aheve tomoingatu güecocuer yuvireco. ³⁹ Pemoingatu potase que ambuae mbahe, peso ranera yemomborandusave imoingatu água. ⁴⁰ Mborerecuar revo oyandura yande rembiapo co pipe, ‘¿Ma-hera peaívü guasu tēi? ¿Che amotarëhimbave tie égüe peye?’ ehi tiétera yandeu. Oporanduse yandeu, ndayaicatui chitiétera imboyeví água iñehé chupe. Esepia niha, co yañemonuha yande remimbotar tēi coháve” ehi chupe. ⁴¹ Aipo ihe pare, omomba aheve oñemonuhasa yuvireco.

20

Pablo guata agüer Macedonia, Grecia rupi

¹ Ava aivu guasu pare, Pablo, “Toyugüeru” ehi ava Jesús reroyasar upé. Ahese omboaracua ahe ava. Chupe, “Aviye” ohe pare, oso Macedonia ve. ² Oguatase Macedonia rupi, omonguerëhi-rëhi avei ambuae Jesucristo reroyasar yuvirecoi vahe tecua-tecua rupi. Ipare oyepota Grecia ve oso. ³ Aheve opita mbosapi yasi. Oso potase Siria ve carite pipe, judío ipihañemoñeta mara sereco água rese yuvireco. Oyanduse, carite pipe oso rägürer sui, oyeví iri oso Macedonia ve ivi rupi. ⁴ Yuviraso moviro mbia supi, ipähuve ñepei Berea pendar, Pirro rahir Sópater; ñuvirío Tesalónica pendar, Aristarco, Segundo; ñepei Derbe pendar, Gayo; ñuvirío Asia pendar, Tíquico, Trófimo. Timoteo oso avei supi. ⁵ Evocoí mbia yuviraso Pablo renondeve sáro água Troas ve. ⁶ Pieta pan ndayapepoi vahe hu pare, orosé tecua Filipo sui carite pipe, cinco ari rupi oroyepota Troas ve. Ahe tecuave oropita siete ari rupi.

Pablo Troas ve secoi

⁷ Domingu pipe, ore oroñemonuha pan hu água. Ahese Pablo oporombohe oico pítu mbiter rupi. Esepia, ahe osé pota ahere ayihive voi ichui. ⁸ Ahe oí ivate vahesave ñemonuhasa pipe

setá tataendi. ⁹ Mbía chīhivahe, Eutico serer vahe, metanave oguapi oí. Pablo rumo oñehe pucú iteanga. Evocoiyase omboopesii ahe chīhivahe. Ipare oqué; aviyeteramo tēi ovíapi oí ivate vahe mbosapisa sui. Ahese ava ogüeyi sehōgür rupi ivi sui yuvireco. ¹⁰ Evocoiyase Pablo ogüeyi ou chupe, oñeno oso sese icuhaguā. Ipare aipo ehi Jesús reroyasar upe:

—Pesiquiyei rene; nomanoi moco —ehi.

¹¹ Ipare oyeupi iri oso ombohi pan igua. Ichui oñehe pucu vite. Omomba cōhe senise; ipare oso cute. ¹² Evocoiyase co mbía chīhivahe viroyevise secosave, opacatu oyemboviha guasu catu yuvireco. Esepiá, nomanoi eté.

Pablo yuviraso Troas sui Mileto ve

¹³ Pablo oso pota ivi rupi, ore ranengatu rumo oroso carite pipe Aso ve. Aheve oroyepota Pablo reraso água semimbotar rupi. ¹⁴ Oroyoepiase aheve, oha carite pipe ore piri. Ichui oroso cute Mitilene ve. ¹⁵ Ahere ayihive carite pipe oroñocua Quío oroso. Ambuae ari rese oroyepota Samos ve. Ichui oroso no oroyepota Mileto ve. ¹⁶ Pablo ipoyava. Esepiá, oipota Jerusalén ve Pentecostés pieta pipe tupri güeco água. Sese Efeso oroñacuasaño oroso.

Pablo ñehesa Jesús reroyasar rārosareta Efeso pendar upe

¹⁷ Mileto ve ore recose, Pablo omondo oñehe Efeso ve 'toyugüeru Jesús reroyasar rārosar cheu' oya. ¹⁸ Oyepotase yuvireco chupe, aipo ehi: "Peicua niha che recocuer avíye ité yipisuive ari che reique ramosa resendar co Asia ve. ¹⁹ Ari yacatu rupi aporavíqui yande Yar upe pe pâhuve vichico che reco asiëhisave che yasehosa pipe. Yepe judío che mboguai etepri che recoähasave pe recuave yuvireco viña, ²⁰ che rumo ndaicatui ñehesa avíye vahe mombehuëhi pēu mbahe avíye água yepi. Che opombohe ava rehii rovaque, opombohe avei ñepei-peí pe rēta rupi yepi" ehi. ²¹ "Amombehu ñehesa judío upe, ava ndahei vahe judío upe avei aipo ahe: 'Pemboasi pe angaipa; peyevi Tūpa upe, peroya avei yande Yar Jesús' ahe" ehi. ²² "Cûritei asora Jerusalén ve vichico. Aheve che so água Espíritu che cuai che piha pipe. '¿Mara ehira pîha yuvireco peve cheu?' aipo ahe. ²³ Co güeraño che aicua: opacatu tecua che cosa rupi Espíritu Santo aipo ehi cheu che roquenda água iyavei che mombaraisu água yuvireco yepi" ehi. ²⁴ "Ndacherecatëhi rumo cheyese che mano água. Che rumo amboaviye potaño ité che poravíquisa Tūpa upe, ahe yande Yar Jesucristo che cuai vahe co ñehesa icatupri vahe mombehu água. Co Tūpa oporoaisusa pipe ombou ñepei vahe Guahir ava písiro água" ehi.

²⁵ “Opa niha Tūpa mborerecuasa amombehu pēu. Che rumo aicua ndache repia iri chira peye. ²⁶ Sese tapeicua cūritei: ndayavii eté che cuaita mboaviye ãgua co tecocuer aviyé vahe mombehu pipe pēu. ²⁷ Esepiá, ndaicuacui eté Tūpa Ñehengagüer mombehu; che rumo amombehuño ité opacatu Tūpa recocuer pēu. ²⁸ Sese peñearo tupri, pesāro avei opacatu Jesús reroyasar Espíritu Santo porocuaita rupi. Inungar ovesa rārosar, ēgue peye tuprira sāro. Ahe Tūpa remimboepi yuvirecoi. Esepiá, Jesús oipiyere vuvi opacatu ava angaipa repirā. ²⁹ Aicua che opoeyare, oyugüerura ambuae ava mahembiar oñaro ai vahe nungar pe pāhuve opacatu Jesús reroyasar moçañipa pota ãgua. ³⁰ Oime aveira que ava pe pāhu pendar pe mbopa pota aveira yuvireco pe reraso ãgua oyeupi. ³¹ Sese pemahemoha tupri peyese. Pemahenduha acoi opomboaracua tuprise mbosapi araviter rupi, pītu, ari yacatu rupi avei che yasehosa pipe pe rereco” ehi.

³² “Sese, che rīvireta, opoeyara Tūpa povrīve iyavei iñehesa iporovasasa resendar pipe. Ahe pe moviracua catura pe rereco iyavei omboura opacatu mbahe güemimombehu pēu opacatu ambuae güembiporavo reseve. ³³ Ndahei pe guarepochi, que oro iyavei pe turucuar pota raisa pipe aso pe pāhuve. ³⁴ Peicua niha acoi che po pipe ité aporaviqui che recove ãgua, che rupindar recove ãgua avei. ³⁵ Ēgue ahe amboyecua che recocuer pēu. Supi avei ēgue peyera; yaporaviqui tupri iparaisu vahe rese hañeco ãgua. Pepihañemoñeta acoi yande Yar Jesús remimombehu rese: ‘Sorívete catu ava iporereco vahe, mbahe oipisi vahe sui’ ehi aracahe” ehi Efeso pendar Jesús reroyasar rārosar upe.

³⁶ Oñehe pare, oñenopihā oyerure ãgua opacatu omboripar reseve. ³⁷⁻³⁸ Ndoyembovhai eté, “Ndache repia iri chira peye” oyeupe ihese. Sese opacatu oyasehó iteanga yuvireco, oyaco-yaco, osovaupite-pite iri tēi avei yuvireco saisupave. Ipare yuvirasoño ité yuvireco supi carite yemboyasave.

21

Pablo so agüer Jerusalén ve

¹ Evocoiyase oroseyase ore rīvireta yuvireco, oromohivi voi oroso carite pipe Cos ve. Ahere ayihive oroyepota Rodas ve, ichui oroyepota Pátara ve oroso. ² Aheve orosepiá carite oso vaherā Fenicia ve, ahe ipipe oroha, oroso. ³ Orosasase para guasu oroso, orosepiá caha pāhu guasu Chipre serer vahe. Ahe oroñocua yande mbahe rese pocoëhisa coti, oroso ivi Siria ve, para guasu rovai. Carite rumo seroyemboyasa tecua Tiro ve ipipendar mbahe reya ãgua. ⁴ Aheve orosepiá Jesús reroyasar yuvirecoi vahe. Ahese oropita siete ari ipiri. Yepe

ahe Jesús reroyasar aipo ehi Pablo upe yuvireco: “Espíritu Santo oñehe oreu. Evocoiyase eresoi rene Jerusalén ve” ehi yuvireco chupe viña,⁵ siete ari pare rumo, orosoño ité para guasu popive. Opacatu Jesús reroyasar yugüeru, güembireco, guahir reseve-seve ore rupi. Aheve oroñenopihapa ore yerure áqua.⁶ “Avíye, toroso rane” ore he pare chupe yuvireco, oroha carite pipe. Ahe evocoiyase oyevi yuviraso güëtave.

⁷ Tiro sui oroso Tolemaida ve. Oroyepotase, oroso Jesús reroyasar repia áqua. Aheve oropita ñepei ari.⁸ Ahere ayihive oroso Cesarea ve. Aheve oroique, oropita Felipe rëta ve, ahe oguata vahe Jesús recocuer mombehu. Ahe mbia iporavopri secoi aracaco ambuae seis yuvirecoi vahe pähuve.⁹ Evoco Felipe vireco irungatu guayri ndomendai vahe. Tayri Tüpa ñehe mombehusar pâve yuvirecoi.¹⁰ Oropitase setá arimi ipiri, ahese oyepota Judea sui mbia Agabo serer vahe oreu. Ahe avei Tüpa ñehe mombehusar secoi.¹¹ Ouse ore pähuve, virocua Pablo rumbicuasa ichui. Ipipe oñapichi opí, opo avei. Ahese aipo ehi oreu:

—Espíritu Santo oicua uca cheu, na ehira judío Jerusalén pendar co tumbicuasa yar ãpichi yuvireco iyavei omondora ava ndahei vahe judío upe —ehi Agabo imombehu oreu.

¹² Orosenduse aipo ihe, ore, evoco Cesarea pendar avei, oromombehu Pablo upe: “Eresoi rene Jerusalén ve” orohe tëi chupe. ¹³ Omboyevi rumo oreu:

—¡Mahera peyaseho che rese, ndache mbovihai peye! Che rumo ayemoingatu voi che ãpichi uca áqua, che mano áqua rese avei Jerusalén ve yande Yar Jesús recocuer rese —ehi oreu.

¹⁴ Ndoroicatuise ipihañemoñetasa rerova áqua, oropoíño ichui aipo orohe:

—Tayaposa ayase yande Yar remimbotar —oroheño chupe.

¹⁵ Ipare cute oroyemoingatu ore so áqua Jerusalén ve.

¹⁶ Ichui yuviraso avei moviro ore rupi Jesús reroyasar Cesarea pendar. Ahe ore reraso Chipre pendarer Mnasón rëtave. Ahe oremoingue oyepiri. Ahe yipive ité víroya yande Yar oico.

Pablo ombori Santiago

¹⁷ Oroyepotase Jerusalén ve, ahe pendar Jesús reroyasar nihapisii ore pisí yuvireco. ¹⁸ Ahere ayihive Pablo, ore avei oroso Santiago repia. Aheve yuvirecove avei opacatu Jesús reroyasar rärosar Jerusalén pendar. ¹⁹ Pablo, “Avírave” ehi opacatu oñemonuha vahe upe. Ipare omombehu tupri yipisuive oyeupe Tüpa mbahe oyapo uca vahe ava ndahei vahe judío pâhu rupi. ²⁰ Osenduse, omboetei guasu Tüpa yuvireco. Omombehu Pablo upe yuvireco:

—Che mu, ereicua setá iteanga judío viroya Jesús yuvireco. Ahe setacuer setá catu mil vahe sui cute. Opacatu evocoí ava iqueréhi vahe Moisés porocuaita aracahendar mboavíye água yuvireco —ehi—. ²¹ Osendu tēi nde rembiapo yuvireco. Omombehu tēi avei aipo nde he yande mu ambuae tecua rupindar yuvirecoí vahe upe: “Peseya Moisés porocuaita. Pembocircuncida iri rene pe rahir. Peico iri rene yande recocuer aracahendar pipe' aipo ehi tēi oico” ehi nde mombehu yuvireco —ehi Pablo upe yuvireco—. ²² ¿Mara yahera vo? Esepiá, oyandura nde yepotasa coháve yuvireco. ²³ Avíye catu ereyapora ore porocuaita oromombehu vahe ndeu. Oime irungatu mbia ore pāhuve. Ahe mbia omboavíyera güemimombehu Tūpa upe yuvireco. ²⁴ Eraso co mbia ndeyeupi, eñemoatiro supi eso, emboepi avei mbahe Tūpa upe icuavéhepri. Ahese ahe mbia oicatura oñeapi yuvireco. Eremboavíyese evocoí mborocuaita, opacatu judío nde reroyara, oicuara ava semira tēise mbahe nde rembiapo rese yuvireco. Oicua aveira, nde ereroya vié Moisés suindar mborocuaita —ehi yuvireco chupe—. ²⁵ Ndoroyocuai rumo ava Jesús reroyasar ndahei vahe judío evocoí nungar mbahe rese. Esepiá, opa icuachiasa chupe: “Pehui rene mbahe mimbá yucapri mbahe rahanga tēi upendar seropovéhepri, pehui rene mbahe ruvi, pehui rene mbahe mimbá yucapri suvi renosepiréhi vahe iyavei peaguasai rene” orohe chupe —ehi yuvireco.

Judío oipisi Pablo tūparo guasu pipe yuvireco

²⁶ Evocoiyase Pablo víraso ahe irungatu mbia yuvirecoí vahe oyeupi. Ahere ayihive oyoya oñemoatiro yuvireco. Ipare yuviroique judío tūparo guasu pipe, omombehu yuvireco pahi upe: “Oroñemoatiro ramo. Sese oroyevira siete ari pipe oromombase ore ñemoatirosa. Ahese oromondo pota ndeu porerecosa Tūpa porocuaita rupi icuavéhepirá” ehi yuvireco pahi upe.

²⁷ Opa potase evocoí siete ari, judío Asia pendar osepiá Pablo tūparo pipe yuvireco. Ahese omoñemoiro uca opacatu ava rehii tūparo pendar. Ipare ipisise, ²⁸ sâse yuvireco: “¡Ore mu, ore pítivi peye co mbia oroipisi vahe rese! Esepiá, oguata opacatu rupi. Oñehe tēi yande rese, Moisés porocuaita rese, yande tūparo rese avei iyavei viroique ava ndahei vahe judío yande tūparo pipe. Sese omonguiha tēi yande tūparo maranehi” ehi yuvireco chupe.

²⁹ Co rese aipo ehi. Esepiá, cuese osepiá Pablo viroguatase Trófimo oyeupi, ahe mbia Efeso pendar ndahei vahe judío. Sese ipihañemoñeta ‘Pablo viroguata ava ndahei vahe judío yande tūparo pipe’ oya yuvireco viña.

³⁰ Opacatu Jerusalén pendar ndasorii yuvireco. Cūriteimi ava yuvinoña guasu tūparove. Oipisi Pablo ombotiriri senose tūparo pipe sui yuvireco. Ahese omboya voi guaquicuei tūparo roquenda yuvireco. ³¹ Oyuca potase yuvireco, ahese yaivu rēracua oyepota sundao rerecuar guasu upe. ³² Cūriteimi serecuar viraso sundao, yuvinoña yaivu vahe upe yuviraso. Osepiase ava sundao rerecuar guasu, isundao avei yuvireco, ndoyuvirocua iri Pablo rese yuvireco. ³³ Ahese ahe sundao rerecuar guasu oyemboya oso Pablo rese, oipisi uca. Ipare oyocuai osundao, “Tapeicuhacua ñuvirío carena pipe” ehi. Evocoiyase oporandu ava upe: “¿Ava vo co mbia? ¿Mbahe vo oyapo pēu?” ehi judío eta upe. ³⁴ Ahese amove ava ñepei mbahe rese oñehe, ambuae, ambuae mbahe rese tēi yuvireco. Evocoiyase sundao rerecuar ndoicatui supi eté vahe mbahe rendu água yaivu guasu vahe pāhuve. Sese, “Peraso cuartelive” ehi. ³⁵ Viroyepotase yeupisave, ichui osupi sundao oachihive seraso yuvireco ava rehii ñemoiró iteangasa sui. ³⁶ Ava rehii rumo yuvirasoño ité saquicuei, “¡Tomano!” ehi pucu-pucu yuvireco chupe.

Pablo oyoepi ava rehii rovaque

³⁷ Omoingue potase Pablo cuartel pipe yuvireco, aipo ehi sundao rerecuar guasu upe:

—¿Iyacatu vo yañemoñeta raimi? —ehi.

Evocoiyase, omboyeví mborerecuar chupe:

—¿Ereicua vo griego ñehe? —ehi—. ³⁸ ¿Ndahei vo nde Egipto pendar, vavasa oyapo vahecuer ereico? Nde revo acoi ereraso oporoyuca vahe pāve cuatro mil tupri ivi iporupirēhisa rupi —ehi sundao rerecuar chupe.

³⁹ Evocoiyase,

—Che judío, tecua Tarso pendar aico. Ahe tecua Cilicia pipendar imboeteipri vahe secoi. Eyapomi mbahe icatupri vahe cheu, tañehemi rane catu ava upe —ehi.

⁴⁰ Evocoiyase mborerecuar, “Aviye” ehi chupe. Ipare opūha yeupisa harive, omopuha opo ava eta monguiriri água. Ahese oyapisaca tupri ava rehii yuvireco. Ahe ava upe oñehe hebreo ñehe pipe aipo ehi:

22

¹ “Che mu eta, peyapisaca, che añehemira che yoepi água pēu cūritei” ehi.

² Oñehe hebreo ñehe pipe. Sese osenduse, oyapisaca tupri catu yuvireco.

³ “Che judío aico. Aha Cilicia ivi pipe Tarso ve. Cohave rumo acuacula, Jerusalén pipe, Gamaliel che mbohe oyeroquisave. Aheve ayembohe tupri yande ramoi porocuaita rese. Ahe

che mbohesa pipe avei ayembohe Tūpa mboetei ãgua rese vichico inungar pe peico cûritei. ⁴ Che yipindar aseca-seca catu ava co Tecocuer Piasu rupi oguata vahe yamotarëhisave. Supitisave, añapichi-pichi yuvireco yepi, asoquenda-quenda cuimbahe, cuña avei. Ayuca uca pota rai ahe ava yuvireco. ⁵ Pahi rerecuar ivate catu vahe iyavei opacatu tecua pendar rerecuar oicua che reco yuvireco. Ichui niha aipisi cuachiar aru vaherã yande mu tûparo rerecuar Damasco pendar upe, ‘Taso Damasco ve pahi rerecuar rer pipe ava Jesús reroyasar pisi ãgua. Ichui tarupa cohabe imombaraisu ãgua’ ahe viña.

Pablo omombehu oñecuñaro agüer

⁶ “Evocoiyase aso Damasco ve. Ahe ipiar rupi arovise vicho mbiter ari rupi, aviyeteramo têi osesape guasu iva sui oreu. ⁷ Ahese aviapi ivive. Asendu avei ñehesa: ‘Saulo, Saulo, ¿mahera vo che amotarëhi etepri eve?’ ehi vahe cheu. ⁸ Ahese aporandu: ‘¿Ava vo nde ereico, Mbia?’ ahe chupe. ‘Che Jesús, Nazaret pendar aico. Che niha che amotarëhi etepri che rereco eve’ ehi cheu. ⁹ Che rupindar osepia sendigüer, osiquiye avei yuvireco ichui. Ndosendui rumo ñehesa cheundar yuvireco. ¹⁰ Aipo ahe chupe no: ‘¿Che Yar, mara ahera vo vichico?’ Ahese ahe aipo ehi cheu: ‘Epûha, eso Damasco ve. Aheve ava opara omombehu mbahe nde rembiaporã’ ehi cheu. ¹¹ Sendí iteanga vahe, ndache mboesapisoise, ahese che rupindar che po pisi che reraso Damasco ve yuvireco” ehi.

¹² “Aheve mbia, Ananías serer vahe, ou cheu. Ahe Tūpa mboyeroyasar ité, viroya tupri vahe avei iporocuaita; sese opacatu judío secua pendar: ‘Co mbia aviye vahe ité’ ehi yuvireco chupe. ¹³ Oyepotase, aipo ehi: ‘Che rivri, Saulo, esareco iri’ ehi. Aheseve iporëhi iri mbahe cheu. ¹⁴ Ipare aipo ehi: ‘Yande ramoi rembieroya, yande Ru Tūpa, nde poravo güemimbotar cua ãgua. Oipota avei eresepia vaherã ichuindar ava seco ñvi vahe, eresendu aveira iñehe’ ehi. ¹⁵ ‘Nde evocoiyase eremombehura secocuer opacatu ava upe; eremombehura nde rembiepia, eresendu vahe avei’ ehi cheu. ¹⁶ ‘Evocoiyase, cûritei ndiya iri eresäro’ ehi. ‘Epûha, toroäpiramo. Eporandu yande Yar upe nde reco moatiro ãgua nde angaipa sui’ ehi Ananías cheu.

“Tūpa che mondo ava ndahei vahe judío upe” ehi Pablo

¹⁷ “Coye catu, ayevi irise Jerusalén ve, ayerure tûparo guasu pipe. Ahese che quer nungarve asepia mbahe. ¹⁸ Asepia yande Yar. Ahe aipo ehi cheu: ‘Nde poyava, eso voi Jerusalén sui. Esepia, Jerusalén pendar ndoyapisaca potai chira eremombehuse ñehesa che resendar’ ehi Jesús cheu. ¹⁹ Che aipo ahe chupe: ‘Che Yar, opacatu che cua nde reroyasar

roquenda-quendase, ainupa-nupa ucase avei aguatase judío tūparo yacatu rupi' ahe. ²⁰ Aipo ahe avei chupe: 'Oyucase Esteban yuvireco, ahe nde recocuer mombehusar, che ahese asepia. Chepihañemoñeta rupi aviyéño oyucase yuvireco. Sese asāro yucasar yeaosa vihā' ahe chupe. ²¹ Che Yar rumo omboyevi cheu: 'Eso, oromondora coi rupi ava ndahei vahe judío pāhuve' ehi che Yar cheu" ehi Pablo ava rehii upe.

Pablo sundao rerecuar guasu povrīve secoi

²² Aipo rupi osendu iñehe yuvireco. Ahese rumo osapucai pírata yuvireco chupe: "¡Tomano co mbia! ¡Toicove vité irí eme co ivi pipe!" ehi yuvireco chupe. ²³ Osapuca-pucai, osequipa oyeaosa oñemoirombave yuvireco iyavei omombo-mombo ivi cuhi ivate coti yuvireco yamotaréhimbave. ²⁴ Ahese sundao rerecuar guasu omoingue uca cuartelве, aipo ehi osundao upe: "Peinupa, ahese revo omombehura mbahe sui vo sāse ati yamotaréhimbave ava yuvireco chupe" ehi osundao upe. ²⁵ Oñapichise rumo inupa ãgua yuvireco, Pablo omombehu ñepei sundao rerecuar upe:

—Yepe che judío, che rumo romano avei aico. ¿Iyacatu pīha peinupara romano chupe mbahe rese poranduēhiseve? —ehi mborerecuar upe.

²⁶ Osenduse iñehe, oso voi omombehu güerecuar upe.

—Eicua catu, aipo mbia romano secoi —ehi.

²⁷ Evocoiyase sundao rerecuar guasu ou chupe:

—¿Supi eté vo aipo nde romano ereico? —ehi.

—Taa, ahe ité niña aico —ehi.

²⁸ Ahese sundao rerecuar guasu aipo ehi chupe:

—Che rumo setá guarepochi amondo romano che reco ãgua —ehi.

—Che rumo che ha ramo suive, romano aico —ehiño sundao rerecuar upe.

²⁹ Ahese oinupa pota vahe osiquiyepave oyepepi yuvireco ichui; sundao rerecuar guasu avei oicuase Pablo romano secosa rese, osiquiye ñapichi ucase.

Pablo oyoepi judío porandusa ivate catu vahesave

³⁰ Ahere ayihive sundao rerecuar guasu oicua tupri pota: ¿Mbahe sui pīha judío oyamotaréhi Pablo yuvireco? Evocoiyase oyora. Ahese oyocuai porandusa pendar ivate catu vahé ahe opacatu judío pahi rerecuar, opacatu ambuae judío rerecuar iñemonuha ãgua yuvireco. Ahese oviraso uca Pablo yuvireco chupe.

23

¹ Aheve Pablo omahengatu ava oñemonuha vahé rese ohā aipo ehi chupe:

—Che mu, che rembiapo mbahe tupri Tūpa rovaque areco yepi che pihañemoñeta tuprisa pipe —ehi.

² Ahese Ananías, ahe pahi rerecuar ivate catu vahe, yipi pendar uve, “Peiyurupete” ehi. ³ Ahese Pablo omboyeví chupe:

—¡Tūpa nde nupara, nde aviye tupri tēi angahu vahe eréico! Nde mbahe rese porandu água cheu porocuaita rupi ereí. Evocoiyase, ¿mahera ereporocuai che yurupete água mborocuaita mboyeroyaéhisa pipe? —ehi chupe.

⁴ Yivirindar aipo ehi yuvireco chupe:

—¡Ereñehe rai rutei seroírosa pipe co Tūpa rembiporavo, co yande pahi rerecuar ivate catu vahe upe! —ehi yuvireco.

⁵ Ahese omboyeví chupe:

—Che mu, ndaicuai co oñeho vahe pahi rerecuar ivate catu vahe secose. Esepia, icuachiapri pipe aipo ehi yandeu: ‘Peñehe rai eme pe rerecuar upe’ ehi —ehi.

⁶ Ahese oicuase oñemonuha vahe pâhuve amove oime saduceo, amove fariseo. Ahese oñeho pírata chupe:

—Che mu, che fariseo aico iyavei fariseo che yesupa yuvirecoi. Oroviroya avei ava ocuerayevi vaherā curi. Sese revo co imboasipave oporandu mbahe rese yuvireco cheu —ehi.

⁷ Aipo he ramoseve voi, fariseo, saduceo oñehopoepi-epi yuvireco. Sese oyemboyaho yuvireco. ⁸ Esepia, saduceo ndoviroyai vahe cuerayevisa iyavei “ndipoi Tūpa rembiguai, que espíritu” ehi vahe yuvireco. Fariseo rumo viroyaño ité opacatu aipo mbahe yuvireco. ⁹ Sese sâse guasu yuvireco. Ahese oime amove opûha vahe Moisés porocuaita rese oporombohe vahe fariseo Pablo repisave yuvireco aipo ehi:

—Co mbia ndoyapoi eté mbahe tēi. Aviyeteramo espíritu que Tūpa rembiguai revo oyemboyecua mbahe mombehu água chupe —ehi yuvireco.

¹⁰ Yaivu guasu catu-catu irise yuvireco, ahese sundao rerecuar guasu aipo ehi: “Aviyeteramo ombohi-mbohira Pablo yuvireco” ehi. Ahese oyocuai osundao, “Penose ava pâhu sui, pemoingue iri cuartel pipe” ehi.

¹¹ Ahe pítu pipe, yande Yar oyemboyecua chupe aipo ehi: “Eyemongueréhi catu, Pablo, inungar che mombehu nde siquyeéhisa pipe cohavé Jerusalén ve, égue ere aveira che mombehu Roma ve” ehi.

Omboguai Pablo yuca água yuvireco

¹² Ahere ayihive setá judío oñemonuha, omboguai Pablo yuca água yuvireco: “Tūpa rovaque ndayayucaise Pablo, ndayacarui chira, ndayaíhui chiaveira; yayucase voi, yacarura, yaíhura” ehi yuvireco. ¹³ Ahe ava aipo ehi vahe

retacuer setá catu cuarenta sui. ¹⁴ Ichui yuviraso pahi rerecuar upe, tecua pendar rerecuar upe avei aipo ehi:

—Oromboguai Tūpa rovaque Pablo; ndorocarui chira ndoroyuaise —ehi yuvireco chupe—. ¹⁵ Sese pe, ambuae porandusa ivate catu vahe pendar avei peporandu ahe sundao rerecuar guasu upe aipo peyera imombehu chupe: “Ayihive emose uca irimi Pablo oreu; oroicua uca pota iri mbahe sembiapo chupe” peyera —ehi yuvireco—. Osēse, oroquētirora sese. Oyepotase ou, oroyucara —ehi yuvireco.

¹⁶ Pablo rihir rumo oyanduse sēracua, oso cuartelве chupe imombehu. ¹⁷ Ahese Pablo oñehe sundao rerecuar upe aipo ehi imombehu chupe:

—Erasomi tēi co mbia chīhivahe sundao rerecuar guasu upe. Omombehu pota mbahe chupe —ehi.

¹⁸ Evocoiyase mborerecuar vīraso ahe chīhivahe güerecuar upe aipo ehi:

—Pablo soquendapri oñehe cheu aipo ehi: “Eraso co mbia chīhivahe sundao rerecuar guasu upe” ehi. Co chīhivahe omombehu pota mbahe ndeu —ehi.

¹⁹ Ahese mborerecuar guasu oipisi ipo rese, viroyepepi ambuae sui, oporandu chupe:

—¿Mbahe vo eremombehu pota cheu? —ehi.

²⁰ Evocoiyase ahe aipo ehi:

—Judío rerecuar oyemboyoya yuvireco. Oporandu angahu tēira Pablo rese seraso iri água ñemonuhasa ivate catu vahesave ayihive yuvireco. “Oroporandu pota iri Pablo upe sembiapo rese” aipo ehi tēira yuvireco ndeu —ehi—. ²¹ Ndereroyai chira ahe iporandusa yuvireco. Esepia, cuarenta sui setá catu ava oquētiro vaherā yuvireco sese. Omboguai eté yuca água yuvireco. Ndocrui, ndoihui chira aipo ndoyuaise yuvireco. Cūritei oyemoingatu, osāro viteño nde porocuaita yuvireco —ehi mbia chīhivahe chupe.

²² Ipare sundao rerecuar guasu omboyeví imondo, aipo ehi chupe: “Eremombehui rene ambuae ava upe eremombehu vahe cheu” ehi.

Pablo imondosa mborerecuar guasu Félix rovai

²³ Sundao rerecuar guasu ñuvirío opovri pendar sundao rerecuar upe aipo ehi youuai: “Pemoingatu dosciento sundao Cesarea ve yuviraso vaherā opí rese, ambuae setenta sundao cavayu haríve iyavei doscientos tupri toguata lanza resendar yuvireco. Ipare pesopara pítuse las nueve pipe” ehi. ²⁴ “Pemoingatu uca avei cavayu Pablo yeupi água. Ëgüe peye pesāro tupríra seraso yande rerecuar Félix upe” ehi. ²⁵ Evocoiyase sundao rerecuar guasu oicuachía Félix upe imondo. Aipo ehi chupe:

²⁶ “Imboeteipri ore rerecuar Félix. Che, Claudio Lisias, amondo che mahenduhasa ndeu. ²⁷ Iyavei co amombehu pota ndeu: judío oipisi co mbia yuvireco yuca ãgua viña. Che rumo aicua romano seco rese, ahese araso sundao sepí ãgua judío eta sui ²⁸ ‘¿mbahe rese pîha ndoyambotai yuvireco?’ viya. Sese araso judío porandusa ivate catu vahe pendar upe iñemonuhasave yuvireco. ²⁹ Ahese aicua yamotarëhisa judío porocuaita sui têi iyavei ndoyapoi mbahe têi oreu. Sese ndiyai yuca ãgua oreu, soquenda ãgua avei. ³⁰ Ayanduse rumo judío oquëtiro sese yuvireco, amondo voi evocoí mbia ndeu. Ipare amombehu yamotarëhisar upe: ‘Peporandu potase Pablo recocuer rese, pesora Félix rovai’ ahe chupe yuvireco. Aipo rupive” ehi.

³¹ Evocoiyase ahe pîtu pipe sundao vîroguata Pablo ocuaita rupi yuvireco, viraso Antípatris ve yuvireco. ³² Ahere ayihive sundao yuviraso vahe opí rese oyevi yugüeru cuartelwe. Sundao cavayu ari pendar güeraño rumo yuvirasoño vite. ³³ Viroyepotase Cesarea ve, omondo cuachiar mborerecuar guasu upe yuvireco. Aheseve avei Pablo omondo yuvireco chupe. ³⁴ Oyeroqui pare mborerecuar cuachiar rese, oportandu Pablo upe: “¿Que pendar vo nde ereico?” ehi. “Che Cilicia cotindar aico” ehi.

³⁵ —Oyepotase nde amotarëhisar yuvireco, asendura nde yoepisa —ehi Félix chupe.

Evocoiyase oyocuai opítiviisar Pablo râro ãgua güëtave Herodes rembiapogüer pipe.

24

Pablo oyoepi mborerecuar Félix rovai

¹ Cinco ari pare, Ananías, ahe pahi rerecuar ivate catu vahe, tecua pipendar rerecuar avei yugüeru Cesarea ve. Ou avei mbia ava mbahe aposar pîtvíisar oñehe vaherã Pablo amotarëhi uca ãgua, ahe serer Tértulo. Ahe yugüeru Pablo recocuer mombehu ãgua mborerecuar Félix upe. ² Evocoiyase Félix güeru uca Pablo. Ahese Tértulo omboipi sese oñehe aipo ehi Félix upe:

—Nde imboyeroyapri ereico. Aviye ndeu nde porocuai tuprisa rese. Esepio, ndipoi vavasa ore recua rupi. Ereyapo uca avei ore recua pipe mbahe iporañete vahe nde poroaisusa pipe. ³ Opacatu rupi nde ereyapo tupri vahe oroipisi. Sese, “Aviye ndeu” orohe ndeu, imboyeroyapri Félix. ⁴ Ndoromombita pucu potai rumo che ñehe pipe. Sese eyapisaca raimi têi catu che ñehe rese —ehi—. ⁵ Oroyandu co mbia ava mañeco têisar oguata opacatu ivi rupi. Ore judío, ore mboyaho ore yeamotarëhi uca ãgua, ahe Jesús,

Nazaret pendar, reroyasar rerecuar —ehi—. ⁶ Viroique avei ava ndahei vahe judío ore tūparo pipe. Ëgüe ehi ore tūparo momara. Sese co oroipisi —ehi—. ⁷ Evoco sundao rerecuar guasu Lisias rumo oyepota ore pāhuve. Ahe opíratasa pipe vinose ore po sui, ⁸ aipo ehiño oreu: “Peso, tapemombehu co mbahe sembiapo Félix upe” ehi. Nde avei ereporandura sembiapo rese mbahe sui eté vo ëgüe orohe chupe —ehi Tértulo.

⁹ Aipo ehi tupri avei ambuae judío yugüeru vahe yuvireco supi. ¹⁰ Ipare Félix oyaiti Pablo upe ‘toñehé’ oyapave. Ahese oñehé:

—Aicua nde ereporocuai setá aravíter ore recua rupi. Sese ayoepira nde rovaque che rorívetesa pipe —ehi Félix upe—. ¹¹ Nde ereicua tupri potase, ereporandura supi eté co pipe doce ari ramo opa che yepotare Jerusalén ve Tūpa mboetei água. ¹² Co judío oicua yuvireco nañehengatai ava upe tūparo guasu pipe, namboaív ucai avei ava ambuae judío ñemonuhasa rupi iyavei que ambuae ava Jerusalén pendar —ehi—. ¹³ Co mbia ndoicatui eté mbahe che rembiavi mombehu seroya tupri água yuvireco ndeu. ¹⁴ Co rumo amombehu vahe ndeu: che amboetei Tūpa, ore ramoi rembieroya Tecocuer Píasu pihañemoñetasa rupi. Co judío upe rumo: “Co porombohesa co cotí tēi vahe” ehi. Che rumo aroya ité opacatu icuachiapri porocuaita pipendar iyavei Tūpa ñehe mombehusar rembicuachiagüer avei —ehi—. ¹⁵ Inungar co mbia, ëgüe ahe tupri avei aicua Tūpa ombogüerayevira ava omano vahecuer seco aviyé vahe, ndaseco pōrai vahe avei coiye. ¹⁶ Sese ayemoviracua tupri che pihañemoñetasa rereco tupri catu água yepi Tūpa rovaque, ava rovaque avei.

¹⁷ “Setá aravíter pare ayevi che recua Jerusalén ve ava iparaisu vahe upe porerecosa mundo água. Ahese avei mbahe mímiba ayuca uca Tūpa upe seropovëhe água. ¹⁸⁻¹⁹ Evocoiyase moviro judío Asia pendar che repia yuvireco Jerusalén ve tūparo pipe judío porocuaita rupi che ñemoatiro pare. Ndipoi ahese ava rehii che rupi, namboaív guasu ucai avei ava. Ahe che repia vahe rumo iya yugüeru ndeu che mombehu, que virecose che amotarëhisa yuvireco viña. ²⁰ Anise, aviyeteramo co oyepota vahe cohaye yugüeru, omombehura ndeu que mbahe che rembiavi yuvireco pahi rerecuar guasu ñemonuhasave che reiquesendar” ehi. ²¹ “Co rese revo oñemoiro yuvireco cheu aipo ahe píratase ipāhuve: ‘Che aroya ava ocuerayevira coiye. Sese che reraso pe rovai co pipe che recoâha água yuvireco’ ahese” ehi Félix upe.

²² Félix oicua tupri co Tecocuer Píasu. Sese osendu pare aipo ñehesa, ndoyapo pota vítei mbahe, aipo ehiño ava upe:

—Oyepotase Lisias, ahe sundao rerecuuar guasu, ahese voi aicua tupri catura aipo mbahe sembiapo —ehi Félix ava upe.

²³ Evocoiyase oyocuai sundao rerecuuar Pablo rārō ãgua: “Er-emondomira rumo que mbahe semimbotar apo ãgua chupe iyavei imboripar yugüeruse, tihañecoño yuvireco sese. Ëgue ere sāro” ehi Félix sārosar upe.

²⁴ Moviro ari pare Félix viroyepota güembireco Drusila, ahe judía avei. Ahese Félix güeru uca Pablo, osendu pota iñehe Jesucristo reroyasa resendar yuvireco. ²⁵ Pablo rumo omombehuse chupe teco ïvisa resendar, teco ñearosa resendar avei iyavei aipo ehise: “Tūpa oporandura mbahe yande rembiapogüer rese yandeu ari cañise coiye” ehise, ahese Félix osiquiyepave aipo ehi Pablo upe:

—Esoño rane. Arecose ari nde ñehe rendu iri ãgua, orogüeru uca irira —ehiño.

²⁶ Félix ipihañemoñeta yepi ‘Pablo revo omboura guarepoche cheu osē ãgua’ oya viña. Sese osāro pucu tēi. Iyavei setá oyupagüer güeru uca oyeupe oñemoñeta ãgua sese. ²⁷ Ñuvirío aravíter pare rumo, Porcio Festo oique Félix recuñara. Ahese Félix judío mboviha ãgua, oseya Pablo soquendasave.

25

Festo rovai Pablo imondosa

¹ Mbosapi ari oyepotare Festo osē Cesarea sui, oso Jerusalén ve. ² Aheve oyepotase, pahi rerecuarenta, judío rerecuarenta avei omombehu Pablo recocuer yuvireco chupe. ³ Ipare oporandu chupe: “Emboumi uca Pablo cohabe oreu” ehi yuvireco ‘yayuca peri rupive’ oyapave yuvireco viña. ⁴ Festo rumo aipo ehi chupe: “Aní. Esepia, Pablo Cesarea ve soquendas oico iyavei che ayevi piaivira vicho aheve” ehi.

⁵ —Sese pemondo pe rerecuuar che rupi. Naporaise co mbia rembiapo, aheve tomombehu yuvireco cheu sembiapocuerai sereco mara ãgua —ehi Festo chupe.

⁶ Evocoiyase Festo opita Jerusalén ve ocho ari rupi revo, anise diez ari. Ipare oyevi oso Cesarea ve. Ahere ayihive oguapi güendave ava reco moingatu ãgua oī. Ahese oyocuai Pablo reru ãgua. ⁷ Oyepotase Pablo oso, ahese judío yugüeru vahe Festo rupi, oyemboya yuvireco sese. Ahese omombehumbehu tēi Festo upe Pablo rembiapo yuvireco, ndoicatui eté rumo seroya uca ãgua yuvireco. ⁸ Esepia, Pablo aipo ehi oyoepisave:

—Ndayemboangaipai judío porocuaita rese, judío tūparo rese, yande rerecuuar guasu Roma pendar Cesar rese avei —ehi.

⁹ Festo rumo omboviha pota judío, sese oporandu Pablo upe:

—¿Ndequeréhi vo Jerusalén ve ereso vaherā? Aheve co mbahe nde rembiapo rese aporandura ndeu —ehi chupe.

¹⁰ Ahe rumo omboyeví chupe:

—Cüritei aico cohabe romano mborerecuar guasu porandusa rovai. Aheve ité iyacatu che rembiapo rese porandusara cheu. Nde niha ereicua ndipoi eté mbahe tēi ayapo judío amotaréhisave —ehi—. ¹¹ Ayapose que mbahe naporai vahe, avíyeño che yuca uca áqua eve; ndayapoise rumo co judío omombehu vahe yuvireco ndeu, ndiyai che mondo áqua evo-coi ava povrīve eve. Che rumo aso pota mborerecuar Cesar ivate catu vahe upe cheu mbahe rese porandu áqua —ehi.

¹² Ahese Festo oñemoñeta opítiviisar oporomboaracua vahe rese, ipare omombehu Pablo upe:

—Ereso pota Cesar upe. Aviye, eresora evocoiyase —ehi chupe.

Pablo mborerecuar Agripa rovai

¹³ Evocoiyase moviro ari pare, evocoí mborerecuar guasu Agripa, cuña Berenice rese, oyepota Cesarea ve “avirave” apo áqua Festo upe yuvireco. ¹⁴ Opítase yuvireco setá ari Cesarea ve, Festo omombehu Agripa upe Pablo recocuer. Aipo ehi chupe:

—Oime ñepei mbia soquendapri oseyá vahe Félix cheu —ehi—. ¹⁵ Asose Jerusalén ve, judío pahi rerecuareta, tecua pendar rerecuareta avei omombehu yuvireco cheu secocuerai, ‘Tayucasa, tehi chupe’ oya yuvireco viña —ehi—. ¹⁶ Ahese aipo ahe yuvireco chupe: “Ndiyai eté romano mborerecuar omondo vaherā que ava uve sese oñemoñeta vahe rese mbahe moingatuéhi renondeve. Toyoepi rane omombehusrar rovai, tomombehu tupri rane opacatu güecocuer” ahe judío upe —ehi—. ¹⁷ Sese yugüeruse cohabe yuvireco, aporandu voi pota secocuer rese chupe. Evocoiyase ñepei ari pare aguapi che rendave porandusave. Ahese ayocuai che pítiviisar evocoí mbia reru áqua —ehi—. ¹⁸ Evocoiyase opúha sese oñemoñeta vahe sembiapo ai mombehu áqua. Asendu renondeve che pihañemoñeta: “Oyapo revo mbahe naporai vahe” ahe viña. Ndipoi eté rumo mbahe sembiapo —ehi—. ¹⁹ Mbahe sembieroya tēi omombehu yuvireco. “Evocoí Jesús omano” ehi ava yuvireco. Pablo rumo aipo ehi imombehu: “Jesús oicoveño ité” ehi. ²⁰ “¿Mara ahera píha co sembiapo moin-gatú?” ahe tēi. Sese aporandu chupe: “¿Ndequeréhi vo Jerusalén ve mbahe nde rembiapo rese porandu áqua ndeu?” ahe chupe —ehi—. ²¹ Pablo rumo oporandu cheu Cesar upe oso áqua. Oipota mborerecuar ivate catu vahe oyeupe mbahe güembiapo rese porandu áqua. Sese asoquenda ucaño vite sereco imondo áqua Cesar upe —ehi Agripa upe.

²² Evocoiyase Agripa aipo ehi chupe:
—Asendu pota avei ahe mbia ñehe —ehi.
Ahe aipo ehi chupe:
—Ayihive voi teresendu —ehi.

²³ Ahere ayihive, Agripa oyepota, Berenice rese yugüeru chupe inungar opivondi vahe, ëgue ehi yuviroique mborerecuar ñemoñetasave sundao rerecuar iyavei opacatu tecua pipendar ava seco ivate catu vahe reseve. Ahese Festo oyocuai opitviisar Pablo reru água yuvireco, ²⁴ aipo ehi:

—Ore rerecuar guasu Agripa iyavei opacatu ambuae yuviroique vahe, peyapisaca: pesepia co mbia. Co mbia rese judío eta oñehe tēi yuvireco Jerusalén ve iyavei cohabe Cesarea ve. Osapucai pírata tēi yuvireco ‘¡tomano ité evocoil!’ oya yuvireco cheu —ehi—. ²⁵ Ndayosui rumo mbahe sembiapo yuca uca água iyavei oporandu oso água mborerecuar ivate catu vahe Cesar upe. Sese che ayemoingatu ité imondo água chupe. ²⁶ Ndarecoi rumo mbahe naporai vahe aicuachía vaherā imondo água chupe. Sese aru uca co mbia pe rovai —ehi ava upe—. Iyavei nde ore rerecuar guasu Agripa, ndeu ité aru uca. Nde chupe mbahe rese porandu pare, aviyeteramo oimera mbahe icuachiapirā sesendar Cesar upe nara —ehi—. ²⁷ Chepihañemoñeta amondose co mbia chupe, naporai cheu ndipoise mbahe sembiapo ai —ehi Festo Agripa upe.

26

Pablo omombehu güecocuer Agripa rovai

¹ Evocoiyase Agripa aipo ehi Pablo upe:
—Emombehuño nde yoepisa cheu —ehi.

Ahese Pablo omopuha opo oñehe água aipo ehi: ² “Ore rerecuar Agripa, ayoepira che rorivetesave judío che rese ñemoñeta-ñeta tēisa sui mbahe che rembiapoëhi rese nde rovai. ³ Esepia, ereicua tupri opacatu judío recocuer, ipihañemoñetasa avei. Sese eyapisacami nde reco mbegüesa pípe che ñehe rese” ehi.

Pablo omombehura güecocuer oñecuñaro viteëhisendar

⁴ “Opacatu judío che cua vahe yuvireco, oicua tupri che recocuer che chihivahe suive che recuave iyavei Jerusalén ve aicose yuvireco. ⁵ Omombehu potase che recocuer yuvireco viña, aipo ehira: ‘Pablo viroya tupri ité fariseo porombohesa. Ahe icuapri catu yande recua rupi’ ehira yuvireco viña. ⁶ Sese cūritei che reru nde rovai yuvireco che recocuer rese nde porandu água. Esepia, aroya Tüpa remimombehugüer ore ramoi uve omombehu vahe aracahe” ehi. ⁷ “Doce ore ramoi suindar opacatu judío yuvirecoi, osäro vite evocoi Tüpa

remimombehugüer aviye vahe yuvireco. Sese yuviroique tūparove ari, pītu pipe avei Tūpa mboetei ãgua yuvireco. Ore rerecuar Agripa, eyapisaca tupri che ñehe rese. Evocoí Tūpa remimombehugüer reroyasa sui judío eta semira-mira tēi che amotarēhisave che rese yuvireco” ehi. ⁸ “Iyavei opacatu pe, ¿mahera pe avei ndaperoyai Tūpa porombogüerayevisa?” ehi.

Pablo omombehu yipindar Jesús reroyasar amotarēhi agüer

⁹ “Yipindar che avei che pihañemoñeta rai aracaco mbahe tēi apo ãgua rese ava Jesús, Nazaret pendar, rer amotarēhisave. ¹⁰ Ëgüe ahe Jerusalén ve. Ombouse pahi rerecuar oporocuaita cheu, ahese serer pipe setá Jesús reroyasar asoquenda; iyavei ambuae ava oyucase Jesús reroyasar yuvireco, ‘Toyucaño yuvireco’ ahe voiño ité che” ehi. ¹¹ “Setá rupi amombaraísu Jesús reroyasar ‘tamomboipa ava seroyasa sui yuvireco’ che hesa pipe tēi. Ëgüe ahe aguata opacatu tūparo rupi, ambuae tecua rupi avei yamotarēhisa pipe” ehi.

Pablo omombehu güeco recuñaro agüer

¹² “Evocoiyase aso avei Damasco ve Jesús reroyasar mombaraísu ãgua, pahi rerecuar ombouse oporocuaita apo ãgua cheu” ehi. ¹³ “Mbiter ari rupi rumo, aguatase Damasco piar rupi, asepia mbahe sendí vahe iva sui. Ari sui osesape catu cheu, che rupindar upe avei. ¹⁴ Oroviapipase ivive, asendu ñehesa aipo ehi vahe hebreo ñehe pipe cheu: ‘Saulo, Saulo, ¿mahera vo ereyapo mbahe-mbahe tēi cheu? Ereyapose evocoí mbahe tēi, nde ae ereyemombaraisu’ ehi cheu. ¹⁵ Evocoiyase amboyevi: ‘¿Ava vo nde ereico, mbia?’ ahe chupe. Omboyevi cheu: ‘Che Jesús aico, che niha co che amotarēhi eve. ¹⁶ Epūha, co rese ayemboyecua ndeu, tasecoí che rembiguai, che yapave. Tomombehu avei co mbahe osepia vahe iyavei tomombehu avei co mbahe amboyecua vaherā chupe curi, viya ndeu’ ehi. ¹⁷ ‘Oropísirora judío sui iyavei oromondora ava ndahei vahe judío upe. Ereguatase ipāhuve, oropísiro aveira’ ehi cheu. ¹⁸ ‘Oromondora, tache cuá yuvireco, che yapave iyavei toguata iri eme píatumimbi vahe nungar rupi; toguata catu tesapesa rupi yuvireco. Ipipe sui toyuvireco iri eme caruguar povrîve yuvireco; toguata catu Tūpa rupi; ëgüe tehi che reroya yuvireco. Ahese oipisira ñeroisa oangaipa rese yuvireco iyavei oipisira Tūpa porerecosa oime vaherā opacatu che rembipeha rupive’ ehi Jesús cheu” ehi Agripa upe.

Pablo viroya mbahe güembiepia

¹⁹ “Evocoiyase, che rerecuar Agripa, che quer nungarve asepia vahe iva pendar, aroya ité. ²⁰ Aipo ahe ava upe:

'Pemboasi pe angaipa; peyevi Tūpa upe. Peicove tupri, ipipe sui toicua ava yuvireco pe ñecuñarosa' ahe. Aipo ahe Damasco pendar upe rane añahe, ipare Jerusalén pendar upe iyavei Judea rupindar upe, coiye catumi ava ndahei vahe judío upe. ²¹ Sese tēi judío che pisí tūparo pipe che yuca pota yuvireco" ehi. ²² "Tūpa che pītiviisa pipe rumo aicoveño ité supi, amombehu-mbehu vite Tūpa recocuer opacatu ava seco ívi cotí catu vahe upe, seco ívate catu vahe upe avei. Namombehui eté que mbahe co cotí tēi Tūpa ñehe mombehusar iyavei Moisés, 'Oimera mbahe aviye vahe' ihe agüer sui. ²³ Aracahe omombehu yuvireco: 'Tūpa Rembiporavo Poropísicosar omano ranera' ehi. Ahe rumo yipindar ocuerayevi vaherā omano vahe pāhu sui. Omombehu aveira tesapesa ñepisirosa resendar ore mu judío yuvirecoi vahe upe iyavei ava ndahei vahe judío upe avei" ehi Agripa upe.

Pablo osecuñaro pota tēi Agripa recocuer

²⁴ Aipo ehise Pablo oñeho oyoepisave, Festo oñehengataño chupe aipo ehi:

—¡Nande mboaracuai moco nde mbahecua vaisa! —ehiño chupe.

²⁵ Ahe rumo omboyevi chupe:

—Imboyeroyapri Festo, ¿mara ahe vo ndache aracuai? Amombehu rumo ndeu mbahe supi eté vahe, ndahei che aracuaëhisave —ehi Festo upe—. ²⁶ Co mborerecuar revo oicua tupri avei che remimombehu. Sese ndasiquieyi opacatu co mbahe mombehu água chupe. Esepiá, opacatu co mbahe yaposa vahe ndahei ñomipri tēi. ²⁷ Ore rerecuar Agripa, ¿ereroya vo evocoí Tūpa ñehe mombehusar rembicuachía? Che aicua ereroya ité —ehi Agripa upe.

²⁸ Ahese Agripa omboyevi chupe:

—Moviro tēi ñehesa ipane cheu Jesús reroya água —ehi chupe.

²⁹ Ahe omboyevi Agripa upe:

—Ipanese que moviro tēi, anise setá vité ñehesa ndeu iyavei opacatu osendu vahe che ñehe co pipe, ēgue ehi tarahu Tūpa pēu viña che nungar pe reco água. Ndahei chira rumo soquendapirā peico —ehi.

³⁰ Aipo ihe pare, mborerecuar guasu iyavei ambuae mborerecuar Berenice reseve iyavei opacatu sendusar opūha yuvireco. ³¹ Oyepepi pare, oñemoñeta co cotí aipo ehi yuvireco:

—Evocoí mbia ndoyapoi eté mbahe. Sese ndiyai yucapirā; ndiyai avei soquendapirā viña —ehi yuvireco oyeupe.

³² Ahese Agripa aipo ehi:

—Ahe ndoporanduise Cesar upe oso áqua rese, yamoseño itera niha viña —ehi Festo upe.

27

Pablo imondosa Roma ve

¹ Evocoiyase mborerecuar opihañemoñeta omboyoya yuvireco ore mundo áqua carite pipe Italia ve. Sese omondo Pablo iyavei ambuae ava soquendapri yuvireco mbia Julio serer vahe upe. Ahe mbia sundao rehii rerecuar secoi, ahe yuvirecoi vahe rer Mborerecuar upendar. ² Oroha carite pipe, ahe Adramitio sui yuviraso pota vahe Asia ve. Mbía Tesalónica pendar, Aristarco serer vahe, oha avei ore rupi, ahe secua Macedonia ivi rupi. ³ Ahere ayihive oroyepota yemboyasa Sidón serer vahesave, aheve Julio saisupave Pablo upe aipo ehi: “Eguita tupri nde mboripar rēta rupi nde rese ihañeco tupri áqua yuvireco” ehi chupe. ⁴ Sidón sui orosirise, oroso Chipre ivi rupi ivitu sui ore ñiemoha áqua. Orosa pota tēi ari sosa coti rupi, ndoroicatui rumo. Esepia, oipeyu pírata ivitu icoti sui. ⁵ Evocoiyase oroguata para guasu pipe Cilicia, Panfilia ivi rupi. Ipare oroyepota tecua Mira yemboyasave, ahe Mira, Licia ivi pipe.

⁶ Aheve sundao rerecuar oyosu carite ou vahe Alejandría sui, oso vaherá Italia ve. Evocoiyase ahe ipipe opa voi ore mboha. ⁷ Ichui oroguata mbegüe setá ari. Oroporavíqui iteanga oreypota áqua Gnido rovai. Ivitu oipeyu pírata vite. Sese oroyahuva Creta coti, oroñocua tecua Salmón rovai rupi. Egüe orohe oroso Creta cupe rupi. ⁸ Supi yavai rai ore guata áqua, ipare oroyepota yemboyasa Yemboyasa Aviye vahe serer vahesave. Ahe ichui namombrii tecua Lasea.

⁹ Ore yepota áqua aheve, setá ari oromocañi. Ahese ivitu naporai catu oreu cute. Esepia, viroví ari naporai catu vahe. Sese Pablo aipo ehi carite pipendar upe:

¹⁰ —Mbía, naporai iri chira revo yande guata vite áqua. Yaguata vitese, yamocañira carite, ivosiita reseve, yande avei eté aviyeteramo yacañi tēira —ehi.

¹¹ Sundao rerecuar rumo nomboyeroyai iñehe, ahe omboyeroya catu carite reroguatasar, carite yar avei. ¹² Ahe yemboyasa naporai ivitu ai rāro áqua aheve. Sese setá catu “yasoño” ehi vahe yuvireco, “Tayayepota catu Fenice ve, aheve tayasāro ivitu ai” ehi yuvireco viña. Ahe Fenice Creta ivirindar yemboyasa aviyete vahe. Aheve carite yuviroique norte ique rupi iyavei irohi ique rupi avei yepi.

Ivitu ai para guasu pipe

¹³ Oipeyu mbegümise ivitu irohi coti sui, ipihañemoñeta yuvireco, “Yaicatuño ité yande yepota áqua” ehi yuvireco viña.

Ahese orosirise ore yemboyasa sui, oroso Creta iví rupi. ¹⁴ Coiyemi tēi rumo oyepota ivitú ai oreu Creta cotí sui. Ahe ivitú ai ou norte ique cotí sui. ¹⁵ Oyepotase oreu, ndoroicatu iri eté sovañchi. Evocoiyase, “Tayande rerasoño” orohe chupe. ¹⁶ Oroñocua caha pähumi serer Cauda. Ahe oroñocuasave oroviroha sāi ore caritemi ore carite guasu pipe. ¹⁷ Orosupire, ahe oicuhacua carite guasu inicha pipe yuvireco. Ipare ipihañemoñeta yuvireco ‘carite oyeupi tietera ivi cuhi Sirte serer vahe harive’ oya. Sese opa viroyi imombitasa yuvireco. Ahese ivitú ore reroguataño. ¹⁸ Ivitú rumo ombohitú iteanga para guasu. Sese ahene ayihive oporavíqui vahe omboipi carite vosiita mombo yuvireco. ¹⁹ Imombosapisa ari pipe, omombo vité mbahe carite resendar yuvireco. ²⁰ Setá ari ndoyecuai ari, yasitata avei oreu. Ivitú ai ndopaiño ité avei. Opa ité ore pihañemoñeta mocañi, “Yacañi tēi etera para guasu pipe” orohe viña.

²¹ Setá ari ore caruëhi pare, Pablo opūha aipo ehi carite pipendar upe:

—Mbía, ehi acoi che reroya voira peye viña, nayasëise Creta sui, ahese ndipoi chira co mbahe yandeu cûritei viña —ehi—. ²² Cûritei, peyemonguerëhi catuño. Esepiá, ndipoi chira yande pâhu pendar omano vahe, carite güeraño rumo ocañi têira. ²³ Ayihi pisa oyemoporëhi cheu Tûpa rembiguai semimbou, chupendar che aico, chupe avei aporavíqui. ²⁴ Ahe aipo ehi cheu: “Pablo, eresiquiyei rene. Ereyepotaño itera Cesar upe. Tûpa oipísiro aveira opacatu nde rupindar carite pipendar” ehi cheu. ²⁵ Mbía, ayeroya Tûpa rese. Esepiá, ahe omboaviye itera oñehesa cheu. Sese peyemonguerëhiño —ehi—. ²⁶ Yande mohañira rumo imbehi cotí caha pähumi rese yande mondo —ehi.

²⁷ Ñuvirío semana ivitú ore reroguata pare ahe pítu mbiter pipe para guasu Adriático rupi oroicose, carite pipe oporavíqui vahe ipihañemoñeta yuvireco ‘yarovi revo ivi yaico’ oya. ²⁸ Sese osâha para guasu ripigüer yuvireco. Ahe tipigüer treinta y seis metros tupri. Ipare osiri irimi yuvireco. Aheve osâha iri, tipigüer veintisiete metros tēi. Ahese oicua, “Yarovi ivi” ehi yuvireco. ²⁹ Ipihañemoñeta yuvireco: “Aviyeteramo yayepotara itave” ehi. Sese yuviraso carite rupitave. Aheve osiquiye pave omombo irungatu carite mombitasa tuvicha vahe ipive yuvireco. “¡Omocohe voi tarahu Tûpa yandeu viñal!” orohe tēi. ³⁰ Oñemi potase oporavíqui vahe carite guasu sui yuvireco, viroyi caritemi mbahemohasa. Ombopa pota tēi ambuae carite pipendar yuvireco viña, “Oromombora carite renonendar imombitasa” ehi tupri tēi yuvireco. ³¹ Pablo

rumo aipo ehi sundao rerecuar upe, sundao eta upe avei imombehu:

—Ndopitaise carite pipe yuvireco co oñemi pota vahe, pe ndapeñepisiroi chietera —ehi.

³² Ahese sundao eta oyasia caritemi sā oiti ive imondo yuvireco.

³³ Cõhe ramose Pablo aipo ehi opacatu upe:

—Cûritei ñuvirío semana pemomba pecaruëhi peico ‘¿mara yahera pîha co yaico?’ pe hesa pipe. ³⁴ Evocoiyase pehuñomi mbahe cute pe ñepisiro ãgua. Acoi ocañise carite, yande rumo nayacañii chira iyavei que ñepei pe ha nocañii chietera —ehi Pablo.

³⁵ Aipo ehi pare, oipisi pan, “Aviye ndeu” ehi Tûpa upe ihu ãgua. Ahe imbohi pare, ohu. ³⁶ Evocoiyase opacatu ava oye-monguerëhi yuvireco ocaru ãgua. ³⁷ Ore retacuer doscientos setenta y seis tupri. ³⁸ Ore caru pare, oporavíqui vahe opa omombo trigo carite vosiita para guasu pipe iposiëhi ãgua yuvireco.

Carite ocañi

³⁹ Cõhese, osepiase ivi, “¿Que pîha yaico?” ehi t i yuvireco. Oyosuse rumo y cua vahe, ipipe oime ivi cuhi ipiru vahe. Aheve yuviroique pota t i yuvireco vi a. ⁴⁰ Oyasia ahe carite mombitasa cuasa carite sui yuvireco, omonguhi carite mboyahuvasa, osupi carite resendar turucuar imboguatasa yuvireco. Evocoiyase oroique oroso y cua vahe pipe. ⁴¹ Oroguatase rumo, oroyapi ivi cuhi. Aheve carite op ha it  sese. Ndoicatui et  seroyevi yuvireco iyavei carite rupita i ohitu vahe opa tupri oyoca.

⁴² Ahese sundao eta, “Aviyeteramo soquendapri ohita ti tera, oñemi yuvireco. Sese yayucapa” ehi yuvireco chupe vi a. ⁴³ Sundao rerecuar rumo ndoipotai Pablo mano ãgua, sese, “Teheni” ehi, “peyucai rene soquendapri” ehi. “Ohita oicua vahe rane toyuvirocui ive, toyuvinose ivi rese yuvireco” ehi. ⁴⁴ “Ambuae evocoiyase ivirape, carite yecacuer rese toyaseco o yuvinose ãgua ivi rese” ehi.  gue orohe oros pa ivi rese oroso.

28

Caha p hu Malta ve Pablo secoi

¹ Ore ñepisropare, ahese ramo oroicua caha p hu rer Malta revo rahe. ² Ahe pendar ava nihapisii ore repiase yuvireco. Oqu  iteanga, s his a avei. Ahese oyatapi guasu yuvireco, “Perio, tapeyepehemi” ehi yuvireco oreu. ³ Evocoiyase Pablo omonuha yepeha seru, omondo potase rumo tatave, ahese os  aviyeteramo t i sacucuer sui mboi ahe et  vahe chupe,

oipomama ichuhu. ⁴ Osepiase mboi ichuhuse ahe pendar yuvireco, ahese, “Co mbia revo oporapichi vahe ité. Yepe oñepisiro para guasu sui viña, Tūpa rumo oichuhu uca mboi upe ‘tomano’ oya” ehi yuvireco viña.

⁵ Ahe rumo omomboño mboi tatave imondo oyesui. Ipare nomomaraiño ité. ⁶ Ahe pendar opacatu osāro tēi yuvireco, “Irurura chupe, ahese oviapira, omanora revo” ehi yuvireco chupe viña. Osāro pucu tēi yuvireco, Pablo rumo nimaraiño ité. Ahese, “Ndahei vo co mbia tūpa ité co secoi” ehi tēi yuvireco chupe.

⁷ Evocoiyase mbia Publio serer vahe, ahe opacatu caha pāhu Malta pendar ava rerecuar secoi. Iíví namombriimi ichui. Ahe nihapisii ore repia güetave iyavei ihañeco tupri ai ore rese mbosapi ari rupi. ⁸ Aheve ore recoseve Publio yesupa sohí iteanga ou, sepochiuví avei. Evocoiyase Pablo oique chupe. Ahese oyeroqui Tūpa upe sese, omondo opo iharive. Êgue ehi imbogüera. ⁹ Oyanduse ahe icuera yuvireco, ahese ambuae imbaheasi vahe evocoi caha pāhu pendar yugüeru chupe, ahe ombogüerapa avei. ¹⁰ Ahe pendar oyemboava etepri yuvireco oreu. Ipare ore ha água ambuae carite pipe, opacatu mbahe ore guatasa rupi ipaneëhi água ogüeru yuvireco oreu.

Pablo oyepota Roma ve

¹¹ Co carite mbosapi yasi osāro vahe ari mbahe tēi vahe pituhu água. Ipípe oroso. Ahe carite yugüeru Alejandría sui. Ahe ichí rese ñuvirío itūpa rahanga yuvireco: ñepei rer Cástor, ambuae evocoiyase Pólux. ¹² Ahese oroso oroyepota yemboyasa Siracusa ve. Aheve oropita mbosapi ari. ¹³ Ichui orosë oroso oroyepota Regio ve. Ahere ayihive ivitu oipeyu irohi coti sui. Sese oroyepota Puteoli ve ambuae ari pipeve. ¹⁴ Aheve orosepia ambuae Jesús reroyasar. Ore mombita güetave yuvireco ñepei semana. Ipare oroso Roma ve íví rupi. ¹⁵ Jesús reroyasar Roma pendar yipive ore andu yuvireco. Sese moviro yugüeru Foro de Apio ve, ambuae yugüeru Tres Tabernas ve ore rape penda água yuvireco. Sepiase, Pablo, “Aviye ndeu” ehi Tūpa upe. ¹⁶ Oroyepotase Roma ve, sundao rerecuar co coti omondo Pablo ñepei sundao upe sāro uca água.

Pablo omombehu Roma ve Tūpa Ñehengagüer

¹⁷ Mbosapi ari pare Pablo omonuha opacatu judío rerecuar Roma pendar. Ahese oñeho chupe:

—Che mu eta, ndayapoi mbahe tēi judío Jerusalén pendar upe, naroíroi avei yande ramoi recocuer viña. Che roquendasa rumo iyavei imondopri aico Romano sundao rerecuar

povrîve. ¹⁸ Ahe mborerecuar oporandu che recocuer rese yuvireco. Oicuase che recocuer, opoi pota t i che sui yuvireco vi a. Esepia, ndoyosui et  mbahe che rembiapo che yuca  gua yuvireco. ¹⁹ Evocoj jud  rumo ndoipotai  it  chupe. Ahese ayu pota cohabe Cesar upe che yoepi  gua. Nayamotar hi uca potai rumo che mu Jerusal n pendar Cesar upe —ehi—. ²⁰ Che yoepi  gua oposoho uca. Opomo eta pota yande remiaro rese. Co T pa Rembiporavo ava p siro  gua resendar reroyasa rese carena pipe  apichimbr  aico —ehi.

²¹ Ahese ahe ava omboyevi yuvireco chupe:

—Ndoroipisii et  cuachiar Judea sui nde resendar. Iyavei yande mu oyepota vahe Judea sui nomombehui mbahe naporai vahe nde recocuer resendar yuvireco oreu —ehi—. ²² Opacatu rupi ava v iroiro pe rembieroya piasu yuvireco. Sese orosendu pota nde piha emo etasa —ehi yuvireco chupe.

²³ Oiporavo ari i ehe  gua yuvireco. Osupitise ari chupe, set  catu ava o emonuha yuvireco secosave. Ahese omombehu T pa mborerecuasa resendar iyavei Jes s recocuer Mois s porocuaita icuachiapri pipe sui iyavei T pa  nehe mombehusar rembicuach a pipe avei ‘toviroya yuvireco’ oyapave.  g ue ehi imombehu ari momba. ²⁴ Amove osendu vahe viroya yuvireco, ambuae rumo ndoviroyai et  yuvireco. ²⁵ Opiha emo etasa nomboyoyaise yuvireco, yuvinosepa pota. Ahese aipo ehi ahe ava upe:

—Supi et  Isa as omombehu Esp ritu remimombehu pe recocuer resendar pe ramoi upe aracahe aipo ehi:

²⁶ “Eso nde mu p ahuve.

Emombehu aipo ere:

‘Yepe pesendu t ira mbahe vi a,
ndapesenducuai chira rumo.

Iyavei pesepia t ira mbahe vi a,
ndapemahecuai chira rumo sese’ ere chupe.

²⁷ Esepia, co ava ipihar t  iteanga seroya hisave.

Ndoyemboapisai o yuvireco.

Iyavei osap vii tupri o mbahe sui, ndosepia potai mbahe aviye vahe yuvireco.

Ndosenducua catui et  avei  nehesa supi et  vahe.

Evocoiyase ndoyevi potai cheu g ecocuer moingatu yuvireco”
ehi Esp ritu Santo

remimombehu chupe aracahe —ehi—. ²⁸ Sese tapeicua co pipe suive T pa omboyeecua ucara oporop sirosa ava ndahei vahe jud  upe. Ahe niha oyapisacara imombehusa rese yuvireco —ehi chupe.

²⁹ Aipo ihe pare, jud  yuvinose i ehe rese oyecopi-copi yuviraso.

³⁰ Ipare Pablo opita ambuae ava r̄etave ñuvirío aravíter rupi omboepi oque âgua oico. Aheve nihapisií opacatu ava rese oyepiri oyepotase yepi. ³¹ Omombehu Tüpa mborerecuasa resendar iyavei oporombohe opacatu yande Yar Jesucristo recocuer resendar osiquiyeëhisa pipe. Ndipoi eté que ava omombituhu vahe Pablo ñehese.

PABLO REMBICUACHIA ROMA PENDAR UPE ROMANOS

Pablo mahenduhasa Roma pendar Jesú斯 reroyasar upe

¹ Che Pablo, Jesucristo rembiguai, aicuachía co che ñehe pēu. Tūpa che poravo apóstol che reco água ñehesa poropísirosa resendar mombehu água.

² Tūpa niha yipisuive omombehu uca co ñehesa ava oñehe mombehusar upe icuachiapri maranehi pipe aracahe. ³ Ahe ñehesa Tūpa Rahir Jesucristo resendar. Ahe ava güecosa pipe ité oyesu ou mbororecuar guasu David suindar sui; ⁴ ocuerayevise oespíritu maranehi pipe, ahese opíratasa pipe omboyecua tupri ité Tūpa Rahir güecosa. Ahe niha yande Yar Jesucristo.

⁵ Ahe ichui Tūpa ombou cheu oporopítiviisa apóstol che reco água, che cuai avei ava ndahei vahe judío upe Guahír recocuer mombehu água opacatu ivi rupi sese yeroya uca água ‘ipipe sui toviroya che Rahir yuvireco’ oya. ⁶⁻⁷ Pe Roma pendar peico vahe, pe avei senoipri ipáhuve peico Jesucristo rese peico vaherā. Pe niha Tūpa rembiaisu peico. Oipota avei pe reco catupri água oyeupe nara. Peipisi catu porovasasa, teco tuprisa yande Ru Tūpa suindar, yande Yar Jesucristo suindar avei.

Pablo oso pota Jesú斯 reroyasar repia Roma ve

⁸ Che yipindar yande Yar Jesucristo rer pipe, “Aviye ndeu” ahe Tūpa upe pe rese. Esepia, opacatu ivi rupi icuapri sese pe yeroyasa. ⁹ Iyavei Tūpa oicua pe rese ari rupi che yeroquisa. Chupe ité niha mbahe ayapo opacatu che piha pipe, amombehu Tahír resendar ñehesa aviye vahe vichico. ¹⁰ Aporanduño ité semimbotar rupi pe piri che so água rese chupe yepi. ¹¹ Esepia, che aso pota ité Espíritu suindar mbahecuasa mundo pēu pe pítivi água ‘toyemoviracua tupri catu Cristo rese yuvireco’ che yapave. ¹² Che aipota ité yande ñepei-peí yañepitivii catu água Cristo rese yande yeroyasa yareco vahe pipe.

¹³ Che rivireta, che aipota peicua setá rupi che so pota tēisa pe piri yepi. Cūritei rumo ndaicatuiño víte ité. Che rumo aipota, “Toime que che poravíqua sui Cristo rese oyemoviracua catu vahe yuvireco ipáhuve” ahe pēu, inungar opacatu ambuae ivi rupi égue ahe ava ndahei vahe judío upe vichico. ¹⁴ Che cuaita ité niha opacatu ava upe che ñehe água, tecua pipendar yuvirecoi vahe upe iyavei ndayaracua vítei

vahe upe, imbahecua vahe upe, nimbahecuai vahe upe avei no. ¹⁵ Sese pe Roma ve peico vahe upe avei ayemonguerēhi voi eté co ñehesa písirosa resendar mombehu água.

Ñehesa písirosa resendar píratasa

¹⁶ Che nachī eté co ñehesa písirosa resendar aviye vahe sui. Esepio, ahe Tūpa píratasa opacatu viroyasar písiro água, judío rane yipindar, ipare opacatu ambuae ava-ava tēi avei. ¹⁷ Supi eté co ñehesa omboyecua Tūpa ava reco mbocatuprisa. Oyese yande yeroysa pipeño ité égue ehi yandeu. Esepio, icuachiapri aracahendar aipo ehi: “Acoi ava seco catupri vahe Tūpa rese oyeroysa pipe sui oicoveño itera apirēhi” ehi.

Opacatu ava rembiavi resendar

¹⁸ Supi eté niha yande Aposar oñemoirosa ipírata vahe ombou itera iva sui opacatu ava viroyasaréhi upe, ndaseco pōrai vahe upe avei, mbahe güembiapo ai sui ndoicua uca potai vahe co ñehesa supi eté vahe ambuae ava upe yuvireco. ¹⁹ Ahe oicua tupri tēi mbahe Tūpa suindar yuvireco. Esepio, Tūpa ité niha omboyecua chupe. ²⁰ Égue ehi eté Tūpa recocuer ndoyecuai vahe oyecua rumo mbahe sembiapo pipe. Supi eté yamahe mbahe sembiapocuer ivi apo ramo suive oime vahe rese. Sese yaicua ahe Tūpa ité secoi iyavei ipíratasa apirēhi vahe. Sese ava angaipa viyar ndiyai, “Eñemosáno tēi rane oreu” ehi vaherā yuvireco chupe. ²¹ Esepio, yepe ahe oicua tēi Tūpa yuvireco viña, nomboetei rumo Tūpa secosa rese. “Aviye ndeu” ndehi avei yuvireco chupe. Iyavei ipihañemoñeta mbahe égue ehi tēi vahe rese. Ipipe sui mbahe ndosenducua catu iri eté yuvireco. ²² Yepe, “Ore mbahecua vai” ehi tēi viña, ndoicuai eté rumo mbahe ipipe yuvireco. ²³ Esepio, ahe Tūpa nomanoi vahe seco porañete vahe mboetei ráguer sui, omboetei ava ocañi tēi vaherā rahanga yuvireco iyavei vírai, opacatu mbahe mimba, mboi tēi avei omboetei yuvireco.

²⁴ Sese Tūpa, “Toyapoño ité mbahe güemimbotarai yuvireco” ehi chupe. Ichui oyapo ité mbahe poromochisa guasu oyeupe oyemboetei hisa pipe yuvireco. ²⁵ Esepio, mbahe supi vahe reroya ráguer sui temira tēi viroya catu yuvireco. Iyavei Tūpa ité mboyeroya ráguer sui omboetei catu mbahe sembiapocuer tēi yuvireco. Yaposar ité ru timboeteisa catu yepi.

²⁶ Sese Tūpa opoi eté ichui, “Toyapoño poromochisa mbahe tēi güemimbotarai pipe yuvireco” ehi chupe. Evocoiyase cuña avei cuimbahe rese güeco ráguer sui yuvirecoi oyese ae. ²⁷ Cuimbahe avei cuña rese güeco ráguer sui yuvirecoi oyeae ae iyavei oipota raiño ité evoco güeco raisa yuvireco. Evoco nungar aposa sui oyemomara ahe ae yuvireco.

²⁸ Iyavei, “Tūpa supi eté vahe” ndehise seroyaēhisa pipe yuvireco, Tūpa evocoiyase opoi eté ichui ‘toyapoño ayase mbahe ndipotasai vahe güeco raisa pipe yuvireco’ oya chupe. ²⁹ Ahe evocoiyase yuvirecoi opacatu mbahe-mbahe tēi pipe; oyemboaguasa-guasa tēi vahe cuimbahe, cuña avei, ambuae ava mbahe oipota rai iyavei oyapo mbahe-mbahe tēi ava upe. Ahe oñemoiro ambuae ava mbahe pota raisave tēi, oporapichi, ivava serai, iporombopa serai, ipihañemoñeta ava reco momara äqua tēi iyavei imahechiroi ai ipipe yuvireco. ³⁰ Iyavei ambuae ava cupe cotive mara ehi-ehi tēi vahe, ahe Tūpa amotarēhisar yuvirecoi, virořro avei ava, oyemboivate ai, oyeecomboivate ai tēi avei oñehe pipe yepi, oseca-seca tēi mbahe naporai vahe güembiaporā, nomboyeroyai avei oyesupa yuvireco, ³¹ ndoyapisaca potai eté Tūpa suindar ñehesa rese, nomboaviyei avei oñehe, ndosaisui avei que ava, niñeroi avei ava upe, ndoiparaisuerecoi eté ava yuvireco. ³² Oicua tēi Tūpa “oimera evocoi nungar aposar upe cañisa” ehi vahe, oyapo viteño rumo mbahe tēi yuvireco iyavei ambuae ava oyapose mbahe tēi, ovihareteño sepiase yuvireco.

2

Tūpa omondo ava upe sembiapogüer rupi tupri ité

¹ Oimese que pe pāhu pendar ‘co oyapo mbahe tēi; tocañi’ ohesave ambuae upe, ahese ahe ae oyemocañi tēi uca. Esepia, ahe inungar tupri avei. ² Yaicua rumo Tūpa omocañise evocoi nungar mbahe tēi aposar recocuer, ahe evocoiyase oyapo mbahe supi tupri vahe. ³ Pe opase ava recocuer pesenoi, pe avei rumo ēgue peye tupri peico. Pe avei eté evocoiyase ndapeñemi chietera Tūpa ñemoirosa sui. ⁴ ¿Perořro tie Tūpa oyapo vitese mbahe aviyé vahe oñemosase, seco mbegüe tupri ai vitese avei pēu? ‘Tosecuñaro güecocuer yuvireco’ oyapave rumo ēgue ehi pēu. ⁵ Pe rumo pepiharāta viteño ité Tūpa upe pe yevi potaëhi äqua. Sese pereco catu viteño ité Tūpa ñemoirosa peyese, acoi ari oyepotase Tūpa güeco tuprisa pipe yande renoipara yande moçañi äqua, anise yande písiro äqua curi. ⁶ Ahese opara omboepi ñepei-peí yande rembiapogüer rupi yandeu. ⁷ Omboura tecovesa apirëhi vahe yandeu yasecase teco ori, Tūpa suindar poromboeteisa iyavei mbahe apirëhi vahe yande mbahe tupri aposa pipe. ⁸ Ombou aveira oñemoirosa ava ndiporomboyeroyai vahe upe, ahe acoi co ñehesa supi eté vahe reroya rägüer sui viroya vahe mbahe tēi. ⁹ Judío opacatu mbahe-mbahe tēi aposar ranengatu oiprarara mbahe rasicuer yuvireco, iparera ndahei vahe avei judío. ¹⁰ Tūpa rumo opacatu seco catupri vahe upe omondora imboetei äqua ‘toipisi teco ori iyavei toyuvirecoi mbahe tupri

pípe' oya chupe. Yipindar rumo judío eta upe rane omondora, iparera ndahei vahe judío upe.

¹¹ Esephia, Tūpa ndayande mboyoavíratii yande rereco. ¹² Ëgue ehi eté, opacatu oyemboangaipa vahe Moisés porocuaita porëhi oyemocañi tēira yuvireco. Acoi oyemboangaipa vahe Moisés porocuaita rereco pípe yuvireco, ahe porocuaita pípe avei opara ocañi tēi porandusave yuvireco coiye. ¹³ Esephia, osenduño tēi vahe porocuaita ndahei seco catupri vahe yuvireco. Viroya vahe ité rumo porocuaita, ahe seco catupri vahe yuvirecoi. ¹⁴ Supi eté acoi ndahei vahe judío yuvirecoi vahe yepe ndovirecoi co porocuaita yuvireco viña, ahe rumo co porocuaita rupi tupri oyapose mbahe, ahe evocoiyase inungar porocuaita vireco vahe yuvireco. ¹⁵ Esephia, güembiapo catupri pípe omboyecua porocuaita virecose opiha pípe. Opihañemoñeta pípe avei oyandu porocuaita mboaviyesa. Ahe ipípe avei oyandu mbahe güembiavi, ichui avei oyemonguerëhi mbahe aviye vahe apose. ¹⁶ Ahe ari cañi pípe Tūpa oyocuai ucara opacatu ava rembiapo cuaëhisa reprí pisí água Jesucristo upe, co ñehesa písirosa resendar amombehu vahecuer rupi tupri ëgue ehira curi.

Ñehesa judío resendar; Moisés porocuaita resendar avei

¹⁷ Pe rumo, "Judío aico" peye vahe, peyeroya opacatu Moisés porocuaita mboaviyesa pípe pe reco catupri água Tūpa rovaque viña. Iyavei ipípe peyeecomboivate ai Tūpa rese peicose. ¹⁸ Peicua semimbotar. Ahe porocuaita pe mbohe avei mbahe aviye catu vahe poravo água. ¹⁹ Pe, "Aicatu ité ndasesapisoí vahe nungar ava ndayaracuai vahe mboaracua iyavei ava angaipa viyar pítumimbi vahe nungarsave tēi resape água" peye tēi. ²⁰ "Aicatu avei ava mbahe ndosenducuai vahe mboaracua iyavei ava chihivahemi nungar mbohe água. Esephia, areco co mborocuaita vireco vahe opacatu mbahecuasa iyavei mbahe supi tupri vahe ité" peye tēi avei. ²¹ Pe pembohe vahe ambuae ava, ¿mahera ru ndapeyembohei pe ae? Pe pemombehu vahe ambuae ava mondaëhi água, ¿mahera ru pe ae avei pemonda no? ²² Pe, "Ndiyai pe aguasa" peye; pe teieté avei rumo ëgue peye. Ndapesepia potai eté mbahe rahanga; pe avei rumo opa peñomi mbahe sepí vahe itúparo pipe sui. ²³ Peyeecomboivate ai co mborocuaita rericosa rese; ndapemboetei rumo Tūpa ipípe ahe mborocuaita mboaviyeehi pípe. ²⁴ Supi eté icuachiapri aracahendar pípe aipo ehi: "Pe sui tēi ava ndoicuai vahe Tūpa iñehe-ñehe tēi serer maranehi rese yuvireco" ehi.

²⁵ Supi eté co tecocuer cuacua circuncisión resendar ahe aviyere angara pēu, peroya tupri itese Moisés porocuaita viña. Ndaperoya tuprise rumo, pe evocoiyase inungar ndapeyembocircuncidai vahe peico. ²⁶ Acoi ava ndoyembocircuncidai vahe, ahe rumo viroyase porocuaita, ahe seroyapri inungar imbocircuncidapri yuvirecoi. ²⁷ Acoi ndoyembocircuncidai vahe, oyapose rumo mborocuaita yuvireco, ahe evocoiyase omombehura pe cañi ãgua yuvireco. Esephia, yepe pereco Tūpa porocuaita viña, pe rumo ndapemboaviyei eté. ²⁸ Judío supi eté vahe yaicose, ndahei yande yesupa judío recocuer rupi güeraño ëgue yahera. Iyavei circuncisión supi eté vahe ndahei yande retecuer rese güeraño tēi avei no. ²⁹ Judío ete ité rumo opihá pipe ité viroya Tūpa. Iyavei circuncisión supi eté vahe, Espíritu rembiapo yande piha pipe, ndahei porocuaita icuachiapri rembiapo tēi. Evocoiyase judío supi eté vahe oipisira omboeteisa Tūpa suindar ité, ndahei ava tēi suindar.

3

¹ Evocoiyase, ¿mbahe vo co aviye judío yande reco ãgua? ¿Yande yembocircuncidasa piha aviyera? ² Supi eté. Esephia, yipindar Tūpa omondo oñeho judío eta upe imboaviye ãgua. ³ Amove yepe ipáhu pendar nomboaviyeise ocuaita viña, ¿Tūpa avei tie ëgue ehira? ⁴ ¡Aní eté! Tūpa rumo supi tupri vahe ité secoi, yepe que ava opacatu semirañete ai tēi yuvireco. Esephia, icuachiapri aracahendar pipe aipo ehi:

“‘Supi tupri vahe Tūpa’ ehira nde ñehe rese yuvireco.

Sese ereiquese ava porandusave, eresē tupriñora eso ichui”
ehi.

⁵ Yande reco rai pipe tēi yamboycuase Tūpa reco tuprisa, ¿mara yahera vo evocoiyase? ¿“Tūpa ndahei supi tupri vahe yande reco raisa rese yande nupa” yahera tie? (Che rumo aipo ahe inungar-ra ava co ivi pipendar tēi viña.) ⁶ ¡Aní eté! Esephia, Tūpa ndaheise supi tupri vahe viña, ndiyai chietera yande recocuer rese porandupa tupri ãgua chupe viña.

⁷ Aviyeteramo oimera ava aipo ehi vahe: “Yande remira pipe sui tēi ava omboetei catuse Tūpa supi eté vahe, ¿mahera piha evocoiyase angaipa viyar nungar yande rerecora viña?” ehi. ⁸ “Yayapora ayase mbahe naporai vahe mbahe tupri reime ãgua” ehi. Amove ava, “Pablo ondugüer reseve aipo ehi eté oporombohe” ehi tupri tēi yuvireco oreu. Aipo ehi tēi vahe rumo. Iya ité oipisira cañisa yuvireco.

Opacatu yande angaipa viyar yaico

⁹ ¿Mara ehi ru evocoiyase? ¡Yande judío yaico vahe ndahei eté ivate catu yande recocuer opacatu ambuae ava-ava tēi sui! Esephia, opa amboyecua Tūpa rovaque opacatu angaipa

viyar yaico que judío, que ndahei vahe judío avei. ¹⁰ Supi eté icuachiapri aracahendar pipe aipo ehi:

“¡Ndipoi eté ava seco catupri vahe, que ñepei angara viña!

¹¹ Ndipoi avei que ava Tūpa recocuer osenducua tupri vahe. Ndipoi avei Tūpa oseca vahe yuvireco.

¹² Opacatu ava oguata mbahe tēi pipe yuvireco, co coti tēi avei secocuer yuvireco.

¡Ndipoi eté que ava mbahe tupri aposar, que ñepei angara viña!

¹³ Iñehesa mbahe tēi eté, inungar tuvípa ndasovapisai vahe.

Oñehesa pipe oporombopa yuvireco.

Ahe ñehesa evocoiyase inungar mboi naporai vahe oporomo-cañi tēi vahe.

¹⁴ Ipípe oñehe rai opihavíracuá iteangasa pipe yuvireco.

¹⁵ Ndayipitii oporapichi água yuvireco.

¹⁶ Setá ava omomara, omombaraísu avei oguatasa rupi yuvireco.

¹⁷ Iyavei ndoicuai eté güeco tupri água yuvireco.

¹⁸ Ndipihañemoñetai eté Tūpa sui osiquiye água yuvireco” ehi.

¹⁹ Yande niha opa yaicua opacatu co mbahe omombehu vahe mborocuaita aracahendar pipe, omombehu co porocuaita pipe yuvirecoi vahe upe ‘Che ndayapoi eté mbahe, tehi eme opacatu ava yuvireco’ oyapave, iyavei ‘toicua opacatu ívi rupindar ava Tūpa ñemoirosa pisi água yuvireco’ ohesave aipo ehi. ²⁰ Esepia, ndipoi chietera que ñepei seco aviyé vahe Tūpa rovaque co porocuaita mboaviye pipe. Ahe mborocuaita rumo oicua uca yande angaipa viyar yande reco.

Cristo rese yande yeroya pipe Tūpa yande písirora

²¹⁻²² Cúritei rumo Tūpa oicua uca yandeu ndahe iri mborocuaita mboaviye pipe seco catupri vahe nungar yande rerecora. Cristo rese yande yeroysa pipe sui niha seco catupri vahe nungar yande rereco. Ahe niha ndayande mboyoavii eté. Yipíve ité ahe imombehupri secoi porocuaita aracahendar pipe, iñehe mombehusareta rembicuachiagüer pipe avei. ²³ Supi eté yande opacatu yayapo angaipa, ndayasupitii eté Tūpa reco porañetesa. ²⁴ Ahe rumo oporoaisusa pipe, “Ereyaví mbahe che ñemoirosa pisi água” ndehi iri yandeu. Esepia, ahe yande písiro uca Guahir Jesucristo upe. Yande rumo ndayamboepii eté yande raisusa chupe. ²⁵⁻²⁶ Tūpa rumo ombou Guahir Cristo oipiyere vaherá vuví yande angaipa rese ñero água. Sese yande yeroya pipe oime ñeroisa yandeu. Ipípe omboyecua güeco ívi tuprisa. Yipisuive rumo güeco asiéhisa pipe oñemosáño aracahendar ava angaipa upe; cûritei rumo omboyecua ité güeco ívisa

yandeu, seco ūviño ité seco catupri vahe yande rerecose Tahir rese yande yeroya pipe.

²⁷ ¡Evocoiyase ndiyai eté yande yeecomboivate ai ãgua sovaque! Esepia, ndahei porocuaita mboaviye rese ëgue ehi, ahe rumo Cristo rese yande yeroya pipe ëgue ehi yandeu. ²⁸ Sese yaicua Tüpa, “Ereyaví mbahe che ñemoirosa pisi ãgua” ndehi iri Cristo rese yande yeroyase yandeu, ndahei mborocuaita mboaviyesa sui tēi.

²⁹ ¡Tüpa niha opacatu ité ava Tüpa, ndahei ore judío oroico vahe Tüpa güeraño! ³⁰ ¡Supi eté ñepeíño ité secoi: sese yayeroyase Cristo rese, oyoya guasuño ité, “Ereyaví mbahe che ñemoirosa pisi ãgua” ndehi chira yandeu, yepera imbo-circuncidapri viña, anise que ndahei vahe imbocircuncidapri viña no! ³¹ Ndahei rumo, “Ëgue ehi tēi vahe” yahe evoco mborocuaita upe Jesucristo reroyasa pipe. Ipipe rumo yamboyecua evoco mborocuaita ëgue ndehi tēi vahe.

4

Abraham recocuer sui yembohesa

¹ Iyavei, ¿mara ehi pīha yande ramoi Abraham recocuer aracahe? ² Acoi mbahe güembiapo pipe sui tēi oipisise güeco tupri ãgua Tüpa sui, oyemboivate aira oico ipipe viña. Ndiyai eté rumo ëgue ehi Tüpa rovaque. ³ Esepia, icuachiapri aracahendar pipe aipo ehi: “Abraham oyeroya ité Tüpa rese. Sese Tüpa, ‘Co seco catupri vahe’ ehi chupe” ehi. ⁴ Co rumo yande yayapose mboravíqui, ahe yaipisi vahe ndahei porerecosa tēi, ahe rumo mboravíqui reprí ité yaipisi. ⁵ Yande rumo, yayeroyase Tüpa rese, Tüpa evocoiyase yande pisira, ‘co seco catupri vahe’ ohesave. Esepia, ahe ëgue ehi vahe ité oyese oyeroya vahe upé, yepe ndoyapoi chira mbahe aviyé vahe chupe viña. ⁶ David mborerecuar aracahendar avei oñeha ava rorivetes rese Tüpa seco catupri vahe nungar pisisa rese. Ahe rumo ndahei mbahe sembiapoguer rese tēi oipisi. ⁷ Ahe aipo ehi aracahe:

“¡Sorivete acoi ava Tüpa iñeroise yangaipa rese, iyavei ndoyemomahenduha irise yangaipa rese chupe!

⁸ ¡Sorivete avei ava, ‘Nde angaipa viyar ereico’ ndehi irise Tüpa chupe!” ehi.

⁹ Co mbahe tupri rumo ndahei judío upéño, ahe rumo ava ndahei vahe judío upé avei. Supi eté Tüpa, “Co seco catupri vahe secoi” ehi Abraham upé oyese iyeroyasa rese. ¹⁰ ¿Marase pīha oipisi oyeupe nara sereco? ¿Oyembocircuncida renondeve pīha, anise ipare tie? Yipive ité. ¹¹ “Toicua ava co seco catupri vahe che rese iyeroyase yuvireco” ehi Tüpa chupe. Sese imbocircuncidapri secoi. Ëgue ehi Abraham opacatu ava

oyeroya vahe Tūpa rese, ndoyembocircuncidai vahe yesupa nungar secoi. Ëgüe ehi Tūpa, “Co seco catupri vahe yuvirecoi” ehi avei ahe ava upe. ¹² Supi eté yande ramoi Abraham opacatu ava oyembocircuncia vahe, Tūpa rese oyeroya vahe yesupa avei secoi. Abraham rumo oyeroya vahe Tūpa rese ndoyembocircuncia viteiseve.

Tūpa remimombehu imboavíyesara sese yeroyasa pipe

¹³ Esepia, aracahe Tūpa aipo ehi Abraham upe, ichuindar upe avei: “Peipísira opacatu co ivi pe mahera” ehi. Ndahei Moisés porocuaita mboyeroya pipe ëgüe ehi chupe, oyece yeroyasa pipe sui eté rumo ahe oipisi ‘co seco catupri vahe’ ohesave. ¹⁴ Supi etese co mborocuaita mboyeroyasar güeraño oipisise co mbahe oime vaherā chupe viña, evocoiyase yande yeroyasa Tūpa rese ëgüe ehi tēi etera, Tūpa remimombehugüer evocoiyase ëgüe ehi tēi vahe aveira viña no. ¹⁵ Esepia, co mborocuaita mboaviyeëhisa pipe ñemoirosa oime ava upe. Ndipoise rumo mborocuaita, ndipoi chietera ahe porocuaita mboyeroyaëhisa.

¹⁶ Sese mbahe Tūpa remimombehugüer porerecosa yaipísira sese yande yeroyasa pipe, ahe semimombehugüer supi tupri vahe opacatu yande Abraham suindar upe nara. Esepia, ndahei mborocuaita mboyeroyasar upe güeraño, ahe rumo opacatu yande Abraham nungar Tūpa rese oyeroya vahe upe nara. Evocoiyase ahe opacatu yande ramoi secoi. ¹⁷ Icuachiapri aracahendar pipe aipo ehi: “Orombou ava eta ivi rupindar ramoirā” ehi. Co Tūpa niha Abraham rembieroya, ahe avei omoingove vahe omano vahecuer iyavei oyapo vahe mbahe ndipoi vahe yipindar.

¹⁸ Yepe yavai eté seroya äqua viña, Abraham rumo oyeroya ité Tūpa oyeupe ñehesa rese; sese ava eta ivi rupindar ramoi eté secoi Tūpa ñehes: “Setá oimera ava nde suindar” ehi vahe rupi tupri ité. ¹⁹ Abraham evocoiyase ndasesarai eté oyeroya tuprisa sui, yepe vireco pota ité cien aravíter viña. Iyavei oyoya güembireco reseve nañaroi eté guahi äqua yuvireco viña. ²⁰ Ndopoi eté Tūpa oyeupe ñehesa reroyasa sui. Ahe rumo oyeroya catu ité sese iyavei omboetei eté. ²¹ “Supi eté Tūpa vireco opíratasa opacatu oñehengagüer mboaviye äqua” ehiño ité opihä pipe. ²² Sese Tūpa, “Co seco catupri vahe secoi” ehi iyeroyasa rese chupe.

²³ Co ñehesa ndahei Abraham upe güeraño. ²⁴ Yandeu avei niha. Esepia, “Co seco catupri vahe” ehi avei yandeu yayeroyase sese. Ahe niha acoi ombogüerayevi vahe yande Yar Jesú. ²⁵ Esepia, ahe imondopri secoi yande angaipa repírä. Ipare Tūpa ombogüerayevi yande pisí äqua seco catupri vahe nungar oyeupe.

5

Tūpa, “Peyaví mbahe” ndehi iri

¹ Sese yaico mbahe tupri pipe Tūpa, “Peyaví mbahe” ndehi irise yandeu yande Yar Jesucristo rembiapo sui sese yande yeroysa pipe. ² Esepiá, Jesucristo sui niha yareco co Tūpa suindar porovasasa yayeroyase sese. Ipípe avei yayemoviracuaño ité yaico, yayembovíha avei. Esepiá, yaicua Tūpa piri yande reco água imborerecuasave. ³ Ndahei rumo sese güeraño yayembovíha, yande yemombaraisusa rese avei niha yayembovíha yaico. Esepiá, yaicua ahe yande mbohe yande ñemosa água, ⁴ iyavei yañemosaño, yasë tuprira yande recoáhasa sui, ahese yaicua yaipisi vaherã mbahe aviye vahe Tūpa suindar yepi. ⁵ Iyavei ahe yande remiaro nayamoha tẽi chira sereco. Esepiá, Tūpa ombou ité oporoaisusa yandeu oEspíritu Santo yandeu ombou vahe pipe.

⁶ Yande ae ndayaicatu yande ñepisiro água yande recocuerai sui, Cristo rumo osupitise ari chupe, omano opacatu yande angaipa rese. ⁷ Aviyeteramo oimera que ñepei ava omano vaherã ambuae ava aviye vahe upe nara; yepe que ava recocuer supi eté aviye aira viña, seni rumo ndipoi eté que ava, “Che tamano sepirã” ehi vaherã chupe. ⁸ Yepe yande angaipa viyar yaico yipindar, Tūpa rumo omboyecua yande raisusa; ombou Cristo imano água yande angaipa repirã. ⁹ Ipípe sui cûritei, “Peyaví mbahe” ndehi iri chira. Sese nomboui chietera oñemoirosa yandeu. ¹⁰ Esepiá, yamotaréhimbarr yaico vîtese, ahe Guahir manosa pipe sui yande reroyevi iri oyeupe mbahe tupri pipe; ocuerayevisa pipe evocoiyase oicatu ité yande písiro. ¹¹ Ndahei co reseño ëgue yahera, yaviha catu aveira Tūpa rese, yande Yar Jesucristo rese avei. Ichui niha ndipo iri mbahe Tūpa rovaque yande rese.

Adán iyavei Cristo resendar ñehesa

¹² Supi eté Adán sui oime angaipa ivi pipe, ichui avei oime manosa opacatu ava upe. Esepiá, opacatu ité oyapo angaipa yuvireco. ¹³ Ndipo vîteise Moisés porocuaita, oime voi eté angaipa co ivi pipe. Yepe tie ndicuasa vîtei angaipa porocuaita ndipoise viña, ¹⁴ Adán reco sui tupri ité rumo ava omanoño ité oangaipa pipe yuvireco. Ëgue ehiño ité yuvireco Moisés recose, yepe ahe ava yuvirecoi vahe angaipa ndahoyoyai Adán angaipa mborocuaita mboaviyeëhisa resendar rese viña. Ahe Adán rese omboyecua mbia ou vaherã.

¹⁵ Tūpa porerecosa ombou vahe rumo yandeu ndahoyoyai eté Adán angaipa rese. Esepiá, Adán rembiaví sui setá ava

omano; Jesucristo rembiapo sui rumo Tūpa ombou oporerecosa poropīsirosa yandeu. Ahe rumo aviye catu vahe avei eta upe nara. ¹⁶ Ahe ñepei ava angaipa rumo ndoyoyai eté Tūpa poropīsirosa ombou vahe rese yandeu. Esepio, ñepei ava angaipa sui ou Tūpa ñemoirosa; oporerecosa rumo Tūpa ombouño ité ava eta mbahe oyaví atí vahe upe nara yangaipa mocafíi água. ¹⁷ Supi eté ñiepei ava angaipa sui oimeñi ité manosa opacatu yandeu. Yande rumo yaipisi mbahe ipírata catu vahe ichui, ahe Tūpa porovasasa tuvichá vahe ité iyavei iporerecosa, “Peyaví mbahe” iheéhisa resendar. Sese yareco ité tecovesa apiréhi vahe yandeyeupe nara ñepei ava sui, ahe Jesucristo.

¹⁸ Evocoiyase inungar Adán rembiapo ai güeru Tūpa ñemoirosa opacatu ava upe, Jesucristo rembiapo aviye vahe avei güeru opacatu ava upe Tūpa ñemoirosa pisiéhi água ‘tovireco tecovesa apiréhi yuvireco’ oya. ¹⁹ Esepio, ñepei ava Tūpa reroyaéhisa sui setá oime ava angaipa viyar; égue ehi aveira ñepei ava mboyeroyasa sui setá aveira ava vireco güeco catuprisa Tūpa rese yuvireco.

²⁰ Supi eté porocuaita ouse aracahe, ahese angaipa yaposa catu ité. Yepe égue ehi viña, Tūpa porovasasa rumo ivate catu ité ichui. ²¹ Evocoiyase inungar angaipa ipírata yandeu yande mano água viña, égue ehi avei rumo Tūpa oporovasasa ipírata vahe pipe yande pisi seco catupri vahe nungar yande rereco ‘toipisi tecovesa apiréhi vahe che Rahir Jesucristo rembiapo sui’ oya.

6

Angaipa upe omano vahe nungar yaico; Cristo rese yaicose rumo oicove vahe ité yaico

¹ Evocoiyase, ¿iya iri píha yayapo vite angaipa yaico Tūpa yandeu oporovasasa mboyecua catu água? ² ¡Aní chietera! Esepio, yande niha senosepri angaipa sui. Evocoiyase ndiya iri eté yayapo viteño angaipa yaico. ³ ¿Ndapeicuai vo pe yañeapiramose Jesucristo rer pipe, ndoyavii yamano vahe ité sese? ⁴ Yande ñeapiramose, aviye acoi ñotimbri yaico Cristo rupive yande mbogüerayeví iri água iyavei yande recocuer mopiasu água avei, inungar acoi Cristo ocuerayeví Vu reco píratasa pipe.

⁵ Yande omano vahe nungar yaicose supive, égue yahe aveira yande yacuerayeví supi. ⁶ Yaicua avei niha yípindar yande recocuerai yaticapri nungar curusu rese Cristo rupive, “Che recocuerai tocañipa che sui” yande hesa pipe, iyavei yande angaipa pipe mbiguai tēi nungar yande recoéhi água. ⁷ Esepio, acoi omano vahe ndoyapo iri angaipa yuvireco.

⁸ Yande avei niha omano vahe nungar Cristo rese yaico. Evocoiyase yayeroya avei yaicove vaherā sese. ⁹ Yande niha yaicua, Cristo ñepei reseve ocuerayevi, nomano iri chietera. Esepia, manosa ndoicatu iri eté chupe. ¹⁰ Supi eté omanose Cristo, omano ñepei reseve opacatu angaipa mocañi água; cûritei rumo oicove Tûpa upe nara. ¹¹ Ëgüe peye avei pe, “Che omano vahe nungar aico angaipa upe” peyera; “Che rumo Tûpa upeño ité aicovera yande Yar Jesucristo rese che recosa pipe” peye aveira.

¹² Sese aní peico vîte angaipa pîratasavrive pe cuai água pe remimbotarai mbooyeroyasa pipe. ¹³ Aní peyemondo angaipa upe mbahe tîi apo água. Peyemondo catu Tûpa upe. Esepia, pe inungar ava ocuerayevi iri vahe peico. Sese peyemondo tupri ité Tûpa upe mbahe tupri apo água. ¹⁴ Evocoiyase, pe angaipa ndape cuai iri chira pe rereco. Esepia, ndapeicoi Moisés porocuaita pipe; pe rumo Tûpa porovasasa pipe peico.

Yembohesa mbiguai tîi recocuer sui

¹⁵ Ndayaico iri mborocuaita pipe tîi, yaico rumo Tûpa porovasasa pipe. Evocoiyase, ¿“Tayapo vîte angaipa” yahera pîha? ¡Aní chietera! ¹⁶ Pe niha peicua que ava pembooyeroyase, ipovri pendar evocoiyase peico. Pembooyeroyase Caruguar angaipa apo água, ahe evocoiyase pe reco mocañi têira. Tûpa pembooyeroyase rumo, ahe evocoiyase pe reco mohivira. ¹⁷ Aviye Tûpa upe. Esepia, pe yipindar mbiguai tîi nungar peico angaipa pipe viña, cûritei rumo pembooyeroya pe pîhave ité porombohesa peipisi vahe. ¹⁸ Ñepei reseve pe angaipa sui Tûpa pe renoses, pe evocoiyase mbiguai nungar mbahe supi tupri vahe apo água peico. ¹⁹ (Che amboyoya tecocuer mbahe co iví pipendar rese imombehu pêu. Esepia, yavai vîte ité pêu co ñehesa renducua tupri água.) Yipindar pe retecuer pereco mbahe tîi pipe mbahe naporai vahe apo água. Ëgüe peye rumo pe cûritei pe reco mohiví água peico mbahe tupri pipe ñepei reseve Tûpa upe pe reco água.

²⁰ Pe peico vîtese mbiguai tîi nungar pe angaipa pipe, ahese ndapeyapo vîtei mbahe supi tupri vahe; ²¹ cûritei rumo pechí tîi ichui, ahe niha ndape pîtivii eté pe recocuer rese, iyavei pe reraso pota manosa apirêhi vahesave yepi. ²² Cûritei rumo angaipa sui senosepri peico Tûpa povrîve pe reco água. Ichui mbahe tupri oime pêu. Ahe niha ombou oyeupe nara ité pe reco tupri água. Ipipe sui peicora apirêhi vaherá. ²³ Angaipa niha ombou manosa tîi yandeu, Tûpa rumo oporerecosa ombou tecovesa apirêhi vahe yandeu yande Yar Jesucristo rese yande recose.

Mendasa sui yembohesa

¹ Che rivireta, pe niha peicua tupri mborocuaita, peicua avei ahe porocuaita povriveno ité opacatu yaico yaicove vitese co ivi pipe. ² Esephia, inungar cuña omenda vahe, imer oicove vitese, iporocuaitavrive viteño ité secoi yepi. Omanose rumo imer ichui, ahe cuña ndahe iri omer porocuaitavrive secoi. ³ Acoi cuña omer recove viteseve, virecose ambuae cuimbahe, oyemboaguasa tēi evocoiyase; acoi omanose rumo imer ichui, ndaseco iri ipovriveno. Ahe iyacatu ité omenda yupagüe iri; ahese ndahei yaguasa tēi cute.

⁴ Che rivireta, pe niha ēgüe peye avei Cristo rese peico vahe; Cristo manosa sui ndahe iri Moisés porocuaitavrive peico Cristo rese peico água. Ahe niha acoi ocuerayevi vahe. Sese yande recocuer ēgüe ndehi tēi vahe Tūpa upe. ⁵ Esephia, yande yaicove vitese yande reco ai pipe, ahe porocuaita renduse, yaipota catu mbahe tēi pipe yande reco água. Ipare rumo ahe manosave tēi yande reraso ucara viña. ⁶ Cūritei rumo yande omano vahe nungar yaico acoi porocuaita pipe yaico vahecuer sui. Ēgüe yahe, yasē ichui Tūpa upe mbahe apo água Espíritu sui yande reco piasu pipe. Ndahe iri mborocuaita icuachiapri yipindar vahe pipe yaico.

Angaipa oime vahe yande rese

⁷ ¿“Tūpa porocuaita angaipa” yahera pīha? ¡Aní eté; ndahei eté ahe angaipa! Co rumo ndaicuai chietera che angaipa Tūpa porocuaita ndipoise viña. Supi eté che ndaicuaise, “Ndapeipota rai chira ambuae ava mbahe” ehi vahe mborocuaita pipe, ahese ndaicuai chiaveira che mbahe pota raisa viña. ⁸ Aicuase mborocuaita, ahese angaipa ipirata catu cheu. Ahe mborocuaita apo potaëhisa pipe che querëhi catu opacatu che remimbotarai tēi apo água. Esephia, mborocuaita porëhi angaipa aviye ndipoi vahe viña. ⁹ Yipindar Tūpa porocuaita ndaicua vitese, ndoyavii aviye vahe ité che reco areco viña. Porocuaita aicuase rumo, aipota rai angaipa apo água. ¹⁰ Che evocoiyase acañi tēi vaherā aico ipipe viña. Ahe porocuaita che recove apirëhi água mbou rägür sui, che mondo ucaño itera manosa apirëhi vahe pipe tēi viña. ¹¹ Esephia, angaipa ahe porocuaita pipe che mbopa ité. Ahe ipipe avei che moçañi tēira viña.

¹² Evocoiyase co porocuaita ndaseco marai vahe ité, supi tupri vahe ité, aviye vahe avei. ¹³ ¿Co porocuaita aviye vahe pīha che rereco che mano água tēi? ¡Aní eté! Angaipa tēi rumo ēgüe ehi che rereco. Evocoiyase co porocuaita cuasa sui oipota catu uca mbahe tēi apo água cheu. Ipipe aicua angaipa

oime vahe che rese. Êgüe ehi avei ahe porocuaita omboyecua tupri ité angaipa mbahe tēi vahe yandeu.

¹⁴ Yaicua niha porocuaita Tūpa suindar, che tēi rumo imondopri aico angaipa mboyeroya ãgua. ¹⁵ Che rumo ahese ndaicuai mbahe oime vahe cheu. Esepia, che remimbotar ayapo pota vahe ndayapoi; mbahe che remimbotarēhi rumo ayapo. ¹⁶ Che rumo ayapose mbahe ndayapo potai vahe, ahese aicua co porocuaita aviye vahe. ¹⁷ Evocoiyase ndahei cheyesui eté ëgüe ahe, angaipa tēi rumo ëgüe ehi che mbohe uca. ¹⁸⁻¹⁹ Esepia, che aicua ndipoi eté mbahe aviye vahe che reco ai rese; sese yepe che ayapo pota ité mbahe aviye vahe viña, ndaicatui eté rumo yapo. Iyavei yepe ndayapo potai mbahe tēi viña, che rumo ayapoño ité. ²⁰ Sese ayapo vîteño itese mbahe ndayapo potai vahe, ndahei rumo che ité ayapo, che piha pipe angaipa oime vahe, ahe tēi rumo oyapo uca cheu.

²¹ Sese che aicua oime che cuaisar che rese. Esepia, ayapo potase mbahe aviye vahe yepi viña, ahe rumo oyapo uca pota voiño ité mbahe naporai vahe cheu yepi. ²² Che piha pipe rumo Tūpa porocuaita aipotá iteanga tēi, ²³ che rumo aicua che piha pipe oime ambuae mbahe, mbahe tupri apo potaëhisar cheu, ahe angaipa tēi oime vahe che rese. Ahe mbiguai nungar tēi che rereco.

²⁴ “¡Che paraisu ité!, ndaicatu iri eté, ¿uma pīha co mbahe tēi sui che renosera viña?” ahe cheyeupe vichico. ²⁵ Tūpaño ité oicatu Guahir Jesucristo rese. “Aviye” yande Ru Tūpa upe. Ëgüe ehi ahese mbahe cheu; Tūpa porocuaita amboaviye pota viña, che remimbotarai tēi rumo che rereco uca angaipa povrīve.

8

Yaico vaherā Tūpa Espíritu rese

¹ Cûritei rumo ndipo iri Tūpa ñemoirosa yandeu Jesucristo rese yaicose. ² Esepia niha, Jesucristo rese yaicose, yande cuaisar Espíritu tecovesa mondosar yande renose angaipa povrī sui, manosa sui avei. ³ Esepia, yande remimbotarai rese ndayaicatui Moisés porocuaita mboyeroya ãgua, ahe avei evocoiyase ndoicatui eté yande reco moingatu. Tūpa rumo oicatuño ité. Esepia, Guahir ombou yande nungar tupri ité ‘toyemondo ava angaipa repirā’ oya. Ëgüe ehi imocañi opacatu yande angaipa yande sui, yande remimbotarai avei. ⁴ Ahe ëgüe ehi yande yamboaviye vaherā mborocuaita. Esepia, ndayaico iri yande remimbotar tēi pipe. Yaico rumo Espíritu aviye vahe rese.

⁵ Esepio, acoi yuvirecoi vahe rumo güemimbotar tēi pipe, güecocuerai reseño tēi ipihañemoñeta yuvireco; Espíritu rese yuvirecoi vahe rumo semimbotar rese ipihañemoñeta catu yuvireco. ⁶ Iyavei acoi güemimbotarai rese tēi ipihañemoñeta vahe, ahe omano itera apirēhi yuvireco. Ipihañemoñeta vahe rumo Espíritu suindar mbahe rese, virecora tecovesa apirēhi vahe mbahe tupri pipe yuvireco. ⁷ Esepio, acoi güecocuerai reseño tēi ipihañemoñeta vahe, ahe Tūpa amotarēhimbar yuvirecoi. Ndoipotai eté iyavei ndoicatui Tūpa porocuaita mboyeroya ãgua yuvireco. ⁸ Ëgue ehi eté, acoi yuvirecoi vahe güemimbotarai pipe, ndoicatui eté Tūpa remimbotar apo ãgua yuvireco.

⁹ Pe rumo ndapeico iri pe remimbotarai pipe. Peico rumo Tūpa Espíritu rese, ahe perecose peyese. Acoi ndovirecoi vahe rumo Espíritu Cristo suindar, ndahei eté chupendar. ¹⁰ Cristo secoise rumo pe rese, yepe pe rete ocañi tēi vaherā angaipa sui viña, pe espíritu rumo oicoveño ité. Esepio, Tūpa, “Peyavi mbahe” ndehi iri pēu. ¹¹ Acoi Tūpa Espíritu secoise pe rese, Tūpa evocoiyase omondora tecovesa piasu pe retecuer upe oEspíritu pe rese secoi vahe pīratasa pipe. Esepio niha, ipipe ité ombogüerayevi Guahir Jesucristo.

¹² Ëgue ehi che rivireta, yareco yande cuaita, ndahei rumo yande remimbotarai pipe yande reco ãgua. ¹³ Esepio, pe peicoño itese pe remimbotarai pipe, ahese pecañi tēira; pemombopase rumo Espíritu pipe peyesui, ahese peicovera apirēhi vaherā.

¹⁴ Esepio, opacatu Tūpa Espíritu ombohe vahe, Tūpa rahir ité yuvirecoi. ¹⁵ Supi eté pe Espíritu peipisi vahe ndapembosiquiye uca iri pe rereco, ahe rumo pemoingo Tūpa rahir ité pe reco ãgua. Ahe avei, “¡Che Ru!” pe mbohe uca chupe. ¹⁶ Co Espíritu avei oicua uca yande espíritu upe Tūpa rahir yande recose. ¹⁷ Evocoiyase yaipisi aveira mbahe yande Ru Tūpa ombou vaherā yandeu; ahe oyoya Cristo reseve yaipisira, Cristo paraisu agüer pipe ité yaicose yareco vaherā teco porañetesa ipiri curi.

Teco porañetesa ou vaherā curi

¹⁸ Cûritei rumo yande paraísusa ndoyoyai eté teco porañetesa yande rese ou vaherā rese. ¹⁹ Opacatu Tūpa rembiapocuer osâro vite ité opacatu oquerêhisa pipe, osepia pota ité teco porañete vahe tahir yuvirecoi vahe rese. ²⁰ Esepio, Tūpa rembiapo ndahe iri eté yipindar nimarai vahe nungar. Ndahei rumo oyesui tēi ëgue ehi, Tūpa ité, “Ëgue tehi” ehi chupe, ombose angaipa reprí ava upe. Mbahe sembiapocuer rumo osâroño ité ²¹ güeco opa tēi vaherā sui ñepisiro ãgua teco porañete vahe Tūpa rahir vireco vahe rupití ãgua

curi. ²² Yande niha yaicua aracahe suive opacatu mbahe Tūpa rembiapo oiporara mbaherasicuer yuvireco cuña imembí rasi vahe nungar. ²³ Ndahei rumo ahe güeraño ēgue ehi yuvireco, yande avei ēgue yahe. Yande yareco ité Espíritu, ahe yipindar vahe yaipisi vaherā ichui curi. Yayemombaraisu, yasāro vite yande querēhisa pipe Tūpa guahir ité yande rereco água, yande retecuer recuñaro água avei. ²⁴ Esepio, yande niha yañepisiro ité yande remiaro reroya pipe; sese acoi yasepia vahe mbahe yande remiaro, nayasāro iri. Ndipoi ava osāro vite tēi vahe mbahe güembiepia. ²⁵ Acoi mbahe yande remiaro ndayasepia viteise rumo, yasāro vite yande ñemosasa pipe sereco.

²⁶ Ēgue ehi avei Espíritu yande pītvii ndayaicatu irise. Esepio, ndayaicuai eté mara yahera yayeroqui, co Espíritu Santo rumo oporandu ité Tūpa upe yande rese oyemopoasesa pipe. ²⁷ Iyavei Tūpa, ahe oicua vahe opacatu yande pihañemoñetasa, oicuaño ité Espíritu mbahe omombehu pota vahe oyeupe. Esepio, Espíritu oporandu chupe semimbotar rupi yande seroyasar yaico vahe rese.

Yasecipipa itera mbahe tēi

²⁸ Tūpa niha yande poravo güemimbotar rupi. Yepe yaicua mbahe tēi oime yandeu viña, Tūpa rumo opacatu mbahe oyapo yandeu mbahe tupri reime água yande raisusave. ²⁹ Esepio, yipive Tūpa yande cua, yande poravo Guahir Jesucristo nungar ité yande reco água ‘ahe che Rahir tenonde catu vahe tasecoi opacatu ambuae che rahir sui’ oya. ³⁰ Iyavei Tūpa yipisuive ahe yuvirecoi vahe oiporavo. Chupe oñehe oyeupe nara seco água. Ipare, “Co seco catupri vahe” ehi chupe; ahe chupe avei omondo teco porañetaseta.

³¹ ¿Mara yahe irira vo chupe? ¡Tūpa niha yande repisar secoi, sese ndoicatu iri eté yande amotarēhimbar yuvireco! ³² Tūpa niha ombou ité Guahir imano água opacatu yande rese. Sese yaicua ombou aveira opacatu mbahe yandeu yande pītvii água Tahir rese yande recose. ³³⁻³⁴ Sese ndiyai eté ava upe, “Pecañi tēira, peyavi pe recocuer” ihe água yande iporavopri yaico vahe upe yuvireco. Esepio, Tūpa opa omoçañi yande angaipa yande sui Cristo omanose sepírā, iyavei ocuerayevise. Cūritei Cristo Vu acato coti, “Co cheundar ité yuvirecoi” ehi yande rese oyerure yepi. ³⁵ ¿Mbahe pīha yande mboyepepira Cristo yande raisusa sui viña? ¿Que yande paraíusa, mbahe yavai vahe yandeu, yande momara-mara tēisa, que tieporēhi, anise que yande turucuarā ndipoise, que mbahe tēise yandeu, yande yuca potase tie yuvireco? ³⁶ Inungar icuachiapri aracahendar pipe aipo ehi:

“Oyemoingatu voi ari rupi yande yuca ãgua yuvireco ndeundar yaicose, ovesa yucapirã nungar tẽi yande rereco yuvireco” ehi
aracahe.

³⁷ Opacatu rumo co mbahe oimese yandeu, yasecopipa ité ahe yande raisusar recocuer pipe sui. ³⁸ Sese che aroya ité Tũpa yande raisu viteño itera yepi yepe que yamanora, anise que mbahe oime vahe yandeu yande recove vitese. Ndayande mboyepepi chiaveira ichui que Tũpa rembiguai, que seco ivate vahe, seco pírata vahe ndayasepiai vahe, que cûritei mbahe oime vahe yandeu, anise que mbahe oime vaherã curi. ³⁹ ¡Ndayande mboyepepi chiaveira que iva pendar mbahe, anise que mbahe ivi pipendar, que ambuae mbahe Tũpa rembiapo iporoaisusa sui omboyecua vahe opacatu yande Yar Jesucristo recocuer pipe yandeu!

9

Tũpa oiporavo Israel oyeupe nara arácahe

¹ Che Cristo reroyasar che reco pipe supi eté añahe, ndopombopai. Tũpa Espíritu oicua ité che pihañemoñetasu supi vahe. ² Ndavihai eté che piha pipe; oime mbahe tasi vahe cheu yepi. ³ Che aipota tẽi opacatu che mu judío ñepisiro ãgua yuvireco viña. “Tacañi tẽi Cristo porêhi icañi tẽiêhi ãgua yuvireco” ahera viña. ⁴ Ahe niha Israel suindar yuvirecoi, aracahe Tũpa oiporavo vahe guahirguã. Ahe ipâhuve avei secoi güendigüer porañetesu pipe, iyavei omondo ité oñehe güemimbotar, oporocuaita avei chupe nara viña ‘tache mboetei oyeruresa pipe che rêtave yuvireco’ oya, iyavei, “Amboaviye itera che ñehe pe rese” ehi yuvireco chupe. ⁵ Ahe avei niha yande ramoi yipindar vahe suindar yuvirecoi, Tũpa Rembiporavo Poropísiosar avei ahe ichuindar oyesu vahe. Ahe Poropísiosar niha Tũpa ité, ivate catu vahe secoi opacatu sui. Sese, ¡timboeteisa catu yepi! ¡Égüe tehi apirêhi!

⁶ “Tũpa nomboaviyei Israel upe oñehe imombehupri” ndapeyei chira. Esepio, ndahei opacatu Israel suindar supi tupri vahe. ⁷ Iyavei ndahei opacatu Abraham suindar tahir supi tupri vahe yuvireco. Esepio, Tũpa aipo ehi: “Nde rahir Isaac sui rumo oimera nde suindar sovasapri” ehi chupe. ⁸ Co rumo osenducua uca yandeu ndahei Abraham suindar yuvinose vaheño ité Tũpa rahir yuvirecoi, Tũpa remimbehu rupi yuviroha vahe güeraño rumo ichuindar ité yuvirecoi. ⁹ Esepio, Tũpa Abraham upe aipo ehi aracahe: “Co ari rupi avei ayevira curi, ahese oimera Sara membri ndeu” ehi.

¹⁰ Ndahei rumo co reseño, tahir Isaac rese avei. Esebia, ocuacuase sembireco Rebeca imembí cõi, ahe icõi vahe yesupa rumo ñepeiño ité. ¹¹⁻¹³ Ahe ndoyuviroha víteise, ndoyapo víteise mbahe que aviyé vahe, que naporai vahe yuvireco, Tüpa aipo ehi ichi Rebeca upe: “Yipindar oha vahe nde membrí ahe ombooyeroyara ipandar” ehi. Co oyoya ité icuachiapri rese acoi aipo ehi vahe: “Che asaisu ité Jacob, Esaú rumo ayamotaréhi” ehi. Sese yaicua iya ité Tüpa upe ava poravo güemimbotar rupi, ndahei seco aviyé vahe rese.

¹⁴ ¿Sese píha Tüpa upe, “Ndaseco tuprii vahe” yahera? ¡Aní eté! ¹⁵ Esebia, acoi Moisés upe aipo ehi: “Aiparaísuerecora ava, asaisu aveira che remimbotar rupi” ehi. ¹⁶ Supi eté ndahei yande remimbotar rupi tẽi, ndahei avei yande píratasa rupi Tüpa oyapo mbahe; ahe rumo oporoparaísuerecosa pípe mbahe oyapo yandeu. ¹⁷ Supi eté Tüpa aipo ehi mborerecuar guasu Egípto pendar upe aracahe: “Che oromoingue uca mborerecuar nde reco água che píratasa mboyecua água nde sui, che rer mboetei água avei opacatu ava upe co íví pípe” ehi. ¹⁸ Ëgüe ehi oporoparaísuereco güemimbotar rupi. Güemimbotar rupi avei omboavai viroya água ava upe.

¹⁹ Aviyeteramo oimera que amove pe pãhu pendar aipo ehi vahe, “Ndiyai evocoiyase Tüpa upe, ‘Pe peyavi mbahe’ he água yandeu. Esebia, ndipoi eté niha ava, ‘¡Aní!’ ehi vaherá Tüpa remimbotar upe” ehira. ²⁰ “Ndiyai eté rumo Tüpa poepi água ndeu” ahera aipo ehi vahe upe. Inungar ñaihu mbahemoinda ndiyai, “¿Mahera che apo rai tẽi eve?” ihe água oaposar upe. ²¹ Ñaihu rese oporavíquí vahe rumo güemimbotar rupi oyapora mbahe yuvireco sese. Oicatu ichui aviyé catu vahe apo, oicatu avei ambuae iporupirã tẽi apo água.

²² Tüpa rumo oñemosa pare iya ité oñemoirora, opíratasa mboyecua água ocañi tẽi vaherá upe. ²³ Ëgüe ehi avei yapo güemimbotar rupi güeco porañetesa ívate vahe mboyecua água yandeu. Esebia, yande paraísuereco iyavei yipisuive teco ori porañetesa omoingatu yandeu aheve yande reique água. ²⁴ Yande avei yande renoi oyeupe, que judío, anise que ndahei vahe judío yande recose. ²⁵ Esebia, Oseas rembicuachiagüer pípe aipo ehi:

“Acoi ava ndahei vahe cheundar, chupe,
‘Cheundar ité’ ahera, iyavei acoi ava ndahei vahe saísupri
yuvirecoi, chupe, ‘Che rembiaísu ité’ ahera” ehi.

²⁶ “Pe ndahei vahe cheundar peico’ ehi vahesave, ahe chupe,
‘Tüpa oicove vahe rahir ité’ hesara” ehi.

²⁷ Isaías rumo aipo ehi israelita upe: “Yepe Israel suindar setá iteangara viña inungar íví cuhi, moviro tẽi rumo oñepisirora

yuvireco. ²⁸ Esephia, yande Yar omboaviye voira oñehe ava viroyasarëhi mocañi ãgua co iví pipe” ehi. ²⁹ Oyoya avei ambuae Isaías remimombehugüer yipindar vahe rese: “Yande Yar seco pírata catu vahe noipísiroise que moviro yande ramoi yandeu, yacañipa tēira viña inungar tecua guasu Sodoma, Gomorra reseve yuvireco” ehi.

Judío yuvirecoi vahe iyavei ñehesa písirosa resendar

³⁰ ¿Mara yahera vo evocoiyase? Yaicua ava ndahei vahe judío, yepe ndahei osecá vahe güeco catupri ãgua yuvireco viña, Cristo rese oyeroysa pipe rumo vireco ité güeco catuprisa Tüpa rovaque. ³¹ Judío yuvirecoi vahe rumo oipota tēi güeco tupri ãgua ité Tüpa porocuaita mboyeroya pipe viña, ndoicatui eté rumo supiti yuvireco. ³² Esephia niha, ndahei oyeroysa pipe ité oseca oñepisiro ãgua, ahe rumo co mborocuaita mboyeroya sui tēi Tüpa rese yuvirecoi pota viña. Ahe evocoiyase ndoyaví oyepiapi vahe “ita yepiapisa” rese yuvireco. ³³ Aipo ehi tupri icuachiapri aracahendar pipe: “Che amondo Sión ve ñepei ita yepiapisa, ahe oporoeiti vahe. Acoi sese oyeroysá vahe rumo, nomochi ucai chietera oyesui” ehi Jesús recocuer upe.

10

¹ Che rivireta, che aipota che piha pipe ité iyavei ayerure Tüpa upe che mu judío recocuer rese ‘toñepisiro yuvireco’ che yapave. ² Supi eté iquerëhi ité Tüpa upe mboraviquí apo ãgua yuvireco viña. Oquerëhisa sui rumo oyaví senducuaëhisa pipe yuvireco. ³ Esephia, ndoicua potai mara ehi Tüpa ava pisi oyeupe. Sese oyesui tēi oseca güecocuer tuprisa pipe ‘tomoingatu Tüpa opicha yande pisi ãgua’ ohesave yuvireco viña. Ipipe sui nomboyeroyai eté Tüpa remimbotar güeco mbocatupri ãgua ité yuvireco. ⁴ Esephia, Cristo recocuer pipe imboaviyesa tupri Moisés porocuaita, “Peyaví mbahe che ñemoirosa pisi ãgua” ehiëhi ãgua Tüpa oyese oyeroysa vahe upe.

⁵ Co yande reco catupri ãgua porocuaita pipe sui, Moisés aipo ehi icuachía: “Acoi ava omboaviye tupri vahe opacatu co mborocuaita, ipipe sui yuvirecovera” ehi. ⁶ Tüpa, “Peyaví mbahe che ñemoirosa pisi ãgua” heëhi ãgua rumo yande yeroya pipe, “Ava vo oyeupira iwave Tüpa Rembiporavo reroi ãgua” ndapeyei chira. ⁷ Iyavei, “Ava vo ogüeyira omano vahe pähuve Tüpa Rembiporavo mboyeupi uca ãgua” ndapeyei chiaveira. ⁸ ¿Mara peyera evocoiyase pe piha pipe? “Co ñehesa namombriiveimi pe sui, pe yuru pipe ité, pe piha pipe avei secoi” peyera. ⁹ “Jesús, che Yar” peyese, pe piha pipe peyeroyase avei Tu imbogüerayevisa rese, ahese ipísiroprí peicora.

10 Esepiá, yande piha pipe yayeroya Jesús rese. Ahese Tūpa, "Co seco catupri vahe" ehira yandeu. Iyavei yamombehuse sese yande yeroyasa, ahese ipisiopri yaicora.

11 Esepiá, icuachiapri aracahendar pipe Tūpa aipo ehi: "Acoi sese oyeroyá vahe rumo, nomochi ucai chietera oyesui" ehi. 12 Sese oyoya tupri judío ndahei vahe judío recocuer rese. Esepiá, ñepeñio ité niha Yar opacatu ava upe nomopanei vahe oporovasasa tuvichá vahe oyeupe oporandusar upe. 13 Esepiá, icuachiapri aracahendar pipe aipo ehi: "Acoi opacatu osenoi vahe yande Yar rer, ipisiopri yuvirecoira" ehi. 14 Ava rumo ndoporandui chira písrosa rese Jesús upe, sese ndoyeroyaise yuvireco. Iyavei sese ndoyeroyai chira sesendar ñehesa ndosenduise yuvireco. Iyavei ndosendui chira ndipoise ñehesa mombehusras yuvireco chupe. 15 Iyavei mara ehira co ñehesa mombehu yuvireco ndipoise imondosar chupe. Aipo ehi avei niha acoi icuachiapri aracahendar pipe: "¡Aviye ai eté acoi ava güeru vahe ñehesa aviye vahe písrosa resendar!" ehi.

16 Ndahei rumo opacatu che mu judío viroya co ñehesa písrosa resendar yuvireco. Isaías niha aipo ehi avei aracahe: "Che Yar, ¿uma píha viroya ore ñehe yuvireco?" ehi. 17 Sese yayeroya Jesucristo rese co ñehesa písrosa rendusa pipe.

18 ¿Osenu píha judío co ñehesa yuvireco? ¡Osenu ité! Esepiá, aipo ehi avei acoi icuachiapri aracahendar pipe: "Sendusa niha opacatú ivi rupi iñehe" ehi.

19 Iyavei, ¿osenducua píha yuvireco? ¡Osenducuaño ité! Esepiá, yipindar Moisés omombehu icuachiapri pipe aipo ehi: "Perecatéhira che porovasasa rese oipisise ava ndahei vahe judío iyavei peñemoirora ayapose mbahe aviye vahe acoi ava, ndayaracuai vahe upe" ehi.

20 Ipare omombehu tupri ité Isaías osiquiyeëhisave Tūpa ñehe aipo ehi vahe:

"Acoi ava ndache recai vahe, ahe che pisi ité yuvireco. Iyavei ayemboycua acoi ava che rese ndoporandui vahe upe" ehi.

21 Judío recocuer rese avei rumo aipo ehi: "Arí rupi añahe tēi ava che reroyasaréhí ndiporeroyai vahe upe vichico" ehi aracahe.

11

Moviro tēi ava Israel pendar Tūpa oiporavo oyeupe nara

¹ Evocoiyase, ¿omombo píha Tūpa ava Israel güembiporavo eta oyesui? ¡Aní eté! Esepiá, che avei niha ichuindar aico. Abraham niha che ramoi eté, Benjamín suindar avei aico.

² Yipisuive ité niha Tūpa, "Co ava cheundar ité" ehi ore ramoi

israelita upe. Sese cūritei ndore momboi eté oyesui. Peicua niha acoi Elías resendar icuachiapri aracahendar oyeroqui tēise omu israelita rese aipo ehise Tūpa upe: ³ “Che Yar, nde ñehe mombehusareta opa oyuca yuvireco. Ndeu porerecosa reropovēhesa renda avei opa omombo yuvireco. Che güeraño aicove vitemi nde reroyasar. Che yuca potaño avei eté rumo yuvireco” ehi. ⁴ Tūpa rumo omboyevi chupe: “Aipeha rumo siete mil tupri ava che mboyeroyasar cheyeupe nara noñenopihai vahe Baal rahanga rovai yuvireco” ehi. ⁵ Ëgüe ehi avei cūritei opita vīteño moviro judío, ahe niha Tūpa oiporavo oporoaisusa pipe. ⁶ Ipipe ité niha ëgüe ehi, ndahei eté que ava rembiapo sui oiporavo. Ava rembiapo suise rumo, ahese ndahe iri chira poroaisusa pipe viña.

⁷ Evocoiyase judío eta ndosecai eté mbahe oipotá catu vahe Tūpa suindar yuvireco. Sembiporavo ete ité rumo oipisi yuvireco. Ambuae upe rumo Tūpa omboavai catu vīroya ãgua. ⁸ Icuachiapri pipe aipo ehi aracahe: “Tūpa nomboyecua uca iri mbahe secocuer pipe. Cūritei ëgüe ehiño vīte ité yuvireco. Omondo tēi sesarā; ipipe rumo ndosepia ucai mbahe chupe. Omondo tēi avei yapisaguā; ipipe ndosenducua ucai mbahe chupe” ehi. ⁹ Iyavei David aipo ehi aracahe:

“Ipietasá ivonde nungar iyavei pira mbohasa nungar tasecoi chupe.

Ipipe sui toyuviroha mbahe tēi pipe yuvireco, toyemombaraisu uca avei ipipe yuvireco.

¹⁰ Toicua eme mbahe inungar ndasesapisoí vahe yuvireco.

Icuhapapri nungar ayase toyuvirecoi apirēhi vaherā” ehi.

Ndahei vahe judío ñepisiro agüer

¹¹ Evocoiyase areco iri che porandusa pēu: ¿Apirēhi vaherā ité pīha judío eta ndoyeroyai Jesucristo rese oñepisiro ãgua yuvireco? ¡Aní eté! Ahe rumo ëgüe ehi ava ndahei vahe judío pīsirosa pisi ãgua yuvireco. Ipipe sui oyemonguerēhi catura judío ipisi ãgua yuvireco curi. ¹² Evocoiyase judío eta rembiavi sui tuvichá Tūpa poroparaísuecasa oime opacatu ava ndahei vahe judío upe. Coiye rumo tuvicha catu itera Tūpa poroparaísuecasa opacatu ava upe oyevise yuvireco chupe.

¹³ Che rumo areco che ñehesa pēu pe ndahei vahe judío. Tūpa niha che cuai oñehe mombehu ãgua ndahei vahe judío upe. Sese, “Aviye ai eté che poraviquisa” ahe che mu judío rovaque yepi. ¹⁴ Sendusa sui aviyeteramo oimera ipāhuve oyemonguerēhi vahe pīsirosa Tūpa suindar pisi ãgua oyeupe nara yuvireco. ¹⁵ Esepia, judío mombosa pipe sui Tūpa omoime ñerosa opacatu ava co ivi pipendar upe. ¿Mara ehira

pīha evocoiyase Tūpa ipisise? Ahese oipisira tecovesa apirēhi vahe yuvireco, evocoiyase ndoyuvireco iri chira omano vahe nungar Tūpa upe. ¹⁶ Esepio, yipindar panguā sui yapopri seropovēhese Tūpa upe, opacatu panvi evocoiyase sovasapri avei ichui. Iyavei inungar ivira rapo seropovēhese Tūpa upe viña, sāca avei evocoiyase opacatu ēgue ehi aveira viña.

¹⁷ Amove che mu judío inungar Olivo rāca yasiapri. Pe evocoiyase ndahei vahe judío ivira caha pipendar rāca nungar peico vahe, peso yasiapri rendagüerve, ipipe sui peipisi vīracuasa pe recove āgua. ¹⁸ Aní chira rumo, “Yande aviye catu vahe yaico ivira rāca nungar yipindar yuvirecoi vahe sui” peye pe yeecomboivate aisa pipe. Esepio, ndahei pe sui judío oipisi oyemoviracua āgua yuvireco, pe rumo yipindar ichui eté peipisi pe yemoviracua āgua.

¹⁹ Iyavei, “Co judío rumo imombosa ité ivira rāca asiapri nungar yande sendagüerve yapita vaherā” peye revo. ²⁰ Supi eté, co rumo Tūpa reroyaēhi pipe ahe imombosa ichui yuvireco, pe rumo seroya pipe suiño ité pepita sendagüerve. Sese peicua catu, aní chira peyemboivate ai ipipe. ²¹ Esepio, Tūpa oiporavo co judío oyeupe nara ité viña, ndoviroaise rumo, ndoipisi eté. Pēu avei ēgue ehira ndapemboyeroyaise. ²² Peyapisaca tupri, Tūpa niha aviye vahe ité. Seco pīrata vahe avei rumo ava viroyaēhisar upe. Pēu rumo aviye ité. Peicoño catu iporoaisusa pipe; aviyeteramo ndapeicoise supi, pe avei yasiapri nungar tēi peicora. ²³ Opoipase rumo judío eta Cristo reroyaēhisa sui, Tūpa evocoiyase viroyevi irira oyeupe nara. Esepio, chupe iya ité ipisi iri āgua. ²⁴ Pe ndahei vahe judío ivira caha pipendar rāca yasiapri nungar peico, Tūpa rumo pe mondo ivira aviye vahe nungar rese. ¡Evocoiyase judío ete ité inungar ahe ivira aviye vahe rāca yasiapri, ahe ivate catu oipisi irira oyeupe nara!

Ipa vahe judío ñepisiro agüer

²⁵ Che rivireta, che aipota, “Toicua Tūpa remimbotar icuapirēhi oyemboivate aiēhi āgua yuvireco” ahe pēu. Esepio, amove Tūpa judío upe omboavai viroya āgua. Ahe rumo, “Tache reroyapa rane ité ndahei vahe judío che rese yuvirecoi pota vahe” ehi vite pēu, ²⁶ ahese ramo opacatu ava judío yuvirecoi vahe Tūpa oipisirora. Esepio, icuachiapri aracahendar pipe aipo ehi:

“Oura ava Pīsirosar judío recua Sión pāhu sui, ahe oipehara mbahe naporai vahe opacatu judío sui.

²⁷ Evoco niha che remimbotar chupe nara, amocañise yan-gaipagüer yuvireco ichui” ehi.

²⁸ Ëgüe ehi cûritei judío eta ndosendu potai ñehesa písirosa resendar yuvireco. Sese Tûpa amotarëhisar yuvirecoi. P u mbahe tupr   gua rumo  gue ehi. Tûpa rumo osaisu v te. Esepio, yip ve it  oiporavo tamoi eta oyeupe. ²⁹ Supi et , Tûpa ndoviroyevi iri et  mbahe g emimondo iyavei ndovirovirova t i vahe opiha mo etasa g embiporavo sui. ³⁰ Yipindar niha pe ndapemboyeroyai et  Tûpa. Cûritei rumo jud o eta ndoviroyaise yuvireco, pe paraisuereco Tûpa. ³¹  gue ehi avei jud o eta cûritei ndoviroyai yuvireco. Tûpa pe paraisuereco uca  gua rumo  gue ehi yuvireco. Coiye inungar pe, jud o avei osupit ra Tûpa poroparaisuerecosa yuvireco. ³² Esepio, Tûpa it , “Opacat  oyavi mbahe che reroya hisa pipe” ehi ‘oicuase mbahe g embia i, tiquer hi opacat  che poroparaisuerecosa pisi  gua yuvireco’ oya.

³³ ¿Mara ehi rutei Tûpa aracuasa, imbahecuasa avei? Ndipoi chietera que ava yaracuasa mombehu tupr   gua. Ndayaictui avei secocuer cuapa tupr   gua. ³⁴ Ndipoi et  que ava oicua vahe yande Yar piha mo etasa iyavei ndipoi et  que ambuae ava t i ombohe vahe no. ³⁵ Ndipoi que ava mbahe omondo vahe yande Yar upe ‘tomboyevi cheu’ ohesave. ³⁶ Esepio, Tûpa su o it  niha opacatu mbahe oime, oyeupe nara avei mbahe oyapo op ratasa pipe. ¡Sese imboeteipr  it  Tûpa tasecoi yepi!  gue tehi ap r hi.

12

Yande recocuer imondopr  T pa upe nara

¹ Sese che r vireta, che T pa poroparaisuerecosa pipe aipota pe yemondo it  pe recoveseve chupe nara, inungar mbahe T pa upe seropov hepri it , ahe aviye itera chupe. Ahe niha pe cuaita pe piha pipe sui et  peyapo vaher  chupe. ² Peico iri eme co  vi pipendar piha mo etasa t i rupi. Iyacatu rumo pesecu laro pe piha mo etasa. Ip pe sui opacatu pe recocuer o necu larora.  gue peyese, peicuara T pa remimbotar ahe mbahe aviye vahe, semimbotar supi tupr  vahe it .

³ T pa niha oporovasasa pipe che cuai, sese aipo ahe p u: pepiha mo eta eme pe yembo vate ai  gua rese. Iyacatu rumo peicua tupr  pe piha mo etasa peyesendar T pa p u mbahe imbougu  rupi sese pe yeroyasa pipe. ⁴ Inungar yande rete  nepei o it , sesendar rumo set , iyavei ndahoyoyai mbahe sembiapo. ⁵  gue yahe avei yande, yepe que yande retara vi a, Cristo rese yayemboyase rumo,  nepei vahe nungar yaico. Evocoiyase yande  nepei-pei opacatu upendar yaico.

⁶ Tūpa niha omboyeaviratí mbahecusa imbou oporoaisusa pipe ñepei-pe iupe. Evocoiyase Tūpa ombouse oñeho mombehu água yandeu, yamombehura ñepei-pe iñeho sese yande yeroyagüer rupi. ⁷ Que ombouse mbahecusa ambuae ava pítivii água yandeu, yaipítivii tupri aveira. Ombouse yande porombohe água, yaporombohe tupriño itera. ⁸ Iyavei ombouse yandeu ambuae ava mongueréhi água, yaporomongueréhiño itera. Ombouse yande poropítivii água ava mbahe ndovírecoi vahe iupe, yamondoño itera mbahe chupe yande recatéhiéhisave. Acoi oporocuai vahe, toyapoño oqueréhisa pipe; iparaísu vahe pítivíisar, toipítivíiño avei vorívetesa pipe.

Cristo reroyasar cuaita

⁹ Iyavei peyeaisu tupri ité; aní pesepia potara mbahe tēi, iyacatu rumo peicoño itera mbahe avíye vahe pipe. ¹⁰ Peyeaisu catu ñepei-pe oyeivri nungar tupri pe recosa pipe. Pe ae peyemboetei rágüer sui pemboetei catura ambuae ava Jesús reroyasar.

¹¹ Peyemongueréhi, aní ndapequeréhíi chira iyavei peyapo yande Yar iupe mbahe opacatu pe recoete pipe.

¹² Peicoño pe viharetesave mbahe íva péndar rârosa pipe; peñemosano mbahe rasicuer peiporarase iyavei aní chira peseya pe yeruresa yepi.

¹³ Peipítivii ambuae ava Cristo reroyasar mbahe ipanese chupe, pemohapisira ava oyepota vahe pe piri.

¹⁴ Peyerure pe amotaréhimbar rese; peporandu Tūpa porovasasa rese ahe ava iupe nara; aní pe avei peñeho mara chupe.

¹⁵ Peyembovíha acoi ava oyembovíha vahe rupive; peyaseho avei ava oyaseho vahe rupive.

¹⁶ Peico tupri oyoya guasu ñepei-pe oyese pe yeaisusa pipe. Aní chira peyeecomboívate ai. Iyacatu rumo peyemoingatu ava seco mbegüemi vahe mbori água. Aní peñemoha imbahe-cua vai vahe nungar.

¹⁷ Aní pëu mbahe tēi aposar iupe pemboyevíra mbahe tēi avei. Peyapo catu mbahe tupri opacatu ava rembiepiave.

¹⁸ Peicatu vahe rupi peseca pe reco tupri água opacatu ava iupe. ¹⁹ Che rívireta, aní pe ae pemboyeví mbahe tēi pipe pe rereco momarasar iupe. Peseyáño Tūpa iupe. Ahe oicuara chupe. Esepia, icuachiapri pipe aipo ehi: "Che ité aicuara ava mbahe tēi aposar iupe. Che amboepira" ehi yande Yar.

²⁰ Iyavei aipo ehi: "Acoi nde amotaréhimbar ndasíepoise, emondo mbahe itohu, iyavei acoi ihuseise, eremondora itoihu. Esepia, ñgue peyese pe amotaréhimbar iupe, ochíra pe

sui" ehi. ²¹ Aní mbahe tēi upe peyee copi uca. Iyacatu rumo pesecopira mbahe-mbahe tēi mbahe tupri aposa pipe.

13

¹ Opacatu mborerecuar yuvirecoi vahe pembooyeroyara. Esepi, ndipoi mborerecuar ndovirecoi vahe ocuaita Tūpa suindar. Co oime vahe rumo semimbou ité. ² Sese acoi mborerecuar upe que mara ehi vahe, Tūpa porocuaita reroyaēhisar yuvirecoi. Ëgüe ehi vahe inupambri yuvirecoira. ³ Esepi, mborerecuar yuvirecoi vahe ndahei ava seco tupri vahe mbosi quiye äqua yuvirecoi, ahe rumo yuvirecoi ava mbahe tēi aposar mbosi quiye äqua. Ndayasi quiye potaise mborerecuar sui, iya yaicora mbahe tupri pipe. Mborerecuar evocoiyase, "Aviye" ehira yande reco catuprisa rese yandeu. ⁴ Esepi, ahe Tūpa rembiguai mbahe tupri apo äqua yandeu. Acoi mbahe tēi yayapose rumo, yasi quiyera ichui. Esepi, ahese mborerecuar yande nupaño itera yuvireco. Ahe niha Tūpa remimbotar rupi eté icuaita ava mbahe tēi aposar nupa äqua yuvireco. ⁵ Sese iya yambooyeroya ité mborerecuar; ndahei rumo ahe yande nupaëhi äqua reseño, yande pihañemoñetasa momaraëhi äqua rese avei. ⁶ Sese avei yamondora guareepochi mborerecuar upe yuvireco yandeu oporanduse. Esepi, ahe mborerecuar Tūpa rembiguai yuvirecoi. Evocoiyase aheño ité iporaviquisa yuvireco.

⁷ Yamondo ñepei-peí ava upe mbahe chupendar. Iya ité yamondo mborerecuar upe guareepochi oporanduse sese, yamboetei avei ava imbooyeroyapri.

⁸ Aní yandereve. Ahe yande cuaita. Yande cuaita avei yande yeaisu äqua, supi eté acoi ava osaisu vahe ambuae ava, omboaviye ité Tūpa porocuaita. ⁹ Aipo ehi acoi Tūpa porocuaita: "Ndapeyemboaguasai chira, ndapeporoyucu chira, ndapemondai chira, ndaperemirai chira, ndapeipota rai chiaveira ambuae ava mbahe" ehi. Co iyavei opacatu ambuae Tūpa porocuaita sendusa tupri ité co ambuae ñehesa rese: "Pesaïsu ava pe yeaisu nungar" ehi. ¹⁰ Acoi vireco vahe oporoaisusa, ahe ndoyapoi eté mbahe ava upe; sese poroaisusa pipe imboavíyesa tupri ité porocuaita.

¹¹ Iyavei peicua tupri co mbahe oime vahe yandeu. Cûritei ari osupiti ité yandeu yande yemopoase äqua. Esepi, yande Yar yevi äqua cõimi catu yandeu iñehengagüler yipindar seroyasa sui. ¹² Supi eté osupiti senimi ari yandeu; sese iyacatu yapoi pítumimbi vahe nungar mbahe-mbahe tēi aposa sui mbahe icatupri vahe pipe yande reco äqua. Evocoiyase tayaico sundao oyoepisa omonde vahe nungar. ¹³ Yande catu yaguata yande reco ïvi tuprisa pipe, inungar yaguatase ari

pípe. Aní catu yaico caguar pípe tēi iyavei pieta siapu tēi vahe rupi, ndayande poropota rai chiaveira, iyavei ndayayapoi chira mbahe tēi, ndayaicoi chiaveira yande pihañemoñeta ndahoyoyai vahe pípe, ambuae ava mbahe pota raisa pípe avei no. ¹⁴Iya rumo yarecora yande Yar Jesucristo recocuer yande yese, aní yande pihañemoñeta mbahe-mbahe tēi apo água yande remimbotarai pípe.

14

Aní peroíro ambuae Jesús reroyasar

¹Acoi ava ndoyeroya tupri vitéi vahe yande Yar rese que oiqueso pe piri, peipisi tuprira; aní peiñehopoepira ipihañemoñetasá ndahoyoyaise pe pihañemoñeta rese. ²Esepia, amove evoco nungar ava ihupri pāve tēi yuvirohu, oime rumo amove ava ipihañemoñeta opacatu mbahe hu áqua rese. ³Acoi ava opacatu mbahe ohu vahe, toviroíro eme amove ndohui vahe mbahe iyavei acoi amove ndohui vahe mbahe, toviroíro eme acoi ohu vahe opacatu mbahe. Esepia, evoco nungar ava Túpa oipisi ité. ⁴Supi eté pe ndiyai eté peroíro vaherá ambuae ava rembiguai. Esepia, ahe yande Yar povri pendar secoi. Yepe ndoyavíise mbahe ipípe, anise ichui ovíapise mbahe tēi pípe, serecuar ité oicuara chupe. Esepia, yande Yar opíratasa pípe osecomoingatuño itera.

⁵Oime avei amove ava ñepei ari omboetei catu yuvireco ambuae ari sui, iyavei ambuae oime aipo ehi: "Oyoya guasuño ité niha ari" ehi vahe. Ñepei-peí opihañemoñeta rupi, "Co supi tupri vahe" ehira opiha pípe yuvireco. ⁶Acoi que ñepei ari ava omboetei vahe, yande Yar mboeteisa pípe rumo ēgüe ehi. Iyavei ohu vahe opacatu mbahe, Yar mboeteisave avei ēgüe ehi. Esepia, ahe güembiapo rese, "Aviye ndeu" ehi Túpa upé; iyavei acoi amove ndohui vahe mbahe, Yar mboeteisave ēgüe ehi, iyavei, "Aviye ndeu" ehi avei Túpa upé.

⁷Esepia, yande ñepei-peí ndayaicoi yandeyeupe nara tēi, ndayamanoi avei yandeyeupe nara. ⁸Esepia, yaicove vitése, yaico yande Yar upé nara; yamanose, yamano yande Yar upé nara avei. Ēgüe yahe yande yaicove vitése, anise yamanose, opacatu chupe nara ité yaico. ⁹Sese niha Cristo omano, ipare ocuerayevi opacatu ava Yar güeco áqua que omano vahe, anise que oicove vité vahe upé avei.

¹⁰¿Mahera evocoiyase peroíro pe mboetasa Cristo reroyasar iyavei mahera ndapesepia potai? Esepia, supi eté niha yande opacatú yasora Túpa rovai. Ahe evocoiyase opara oporandu yande recocuer rese yandeu. ¹¹Esepia, icuachiapri aracahendar pípe omombehu:

“Supi eté che reco pipe aipo ahe, ehi yande Yar, opacatu ava oñenopihara che rovai yuvireco, iyavei che mboeteira yuvireco,
ehi” ehi.

¹² Evocoiyase yande ñepei-peí yamombehura yande recocuer Tūpa upe.

Aní pe rivireta mbahe tēi pipe pereco uca

¹³ Sese yande ndiyai yañeroiro. Iyacatu rumo ñepei reseve pereco tupri ambuae pe rivri, angaipa pipe sereco ucaëhi ägua, iyeroyasa momaraëhi ägua avei. ¹⁴ Che yande Yar reroyasar che reco pipe aicua ndipoi eté que tembihu yande reco momara vahe. Amove rumo ava, “Mbahe tēi co tembihu, ndiyai yahu” ehise, ahe chupe evocoiyase mbahe tēi, ndiyai eté ihu ägua. ¹⁵ Iyavei yande que mbahe yahuse, ipipe yamomara tēise yande rivri pihañemoñetasa Tūpa rese, ndahei evocoiyase yande poroaisusa pipe ité ëgue yahe. ¡Aní ahe yamocañi tēi uca Cristo sui evoco nungar mbahe yahu vahesa pipe! Esepia, secocuer rese Cristo omano. ¹⁶ Yepe que mbahe aviyera yandeu viña, ndayayapoi chira rumo evoco nungar yande rembiapo rese ava ñehe-ñehe tēiëhi ägua. ¹⁷ Esepia, ndahei ivate catu vahe Tūpa upe yande carusa, yande igua avei ipovriye yande recose. Ëgue ehi rumo co ivate catu vahe chupe yande recocuer mohivisa, yande reco tuprisa ambuae Tūpa reroyasar pähuve iyavei yande rorivetes yareco vahe Espíritu Santo sui. ¹⁸ Ëgue yahese Cristo mboeteisave, aviyeraira Tūpa upe iyavei opacatu ava rembiepiave avei no.

¹⁹ Sese opacatu yande recoeté pipe yasecara yaico tupri va-herä yandeyeupe. Ipipe sui yande yaicatura yañepitivii yande yemoviracua tupri ägua yande Yar rese. ²⁰ Aní pemocañi uca tēi ava recocuer Tūpa remipisiro tembihu sui tēi. Opacatu niha co tembihu aviyeraiño ité; ndiyai eté rumo yahu que tembihu ambuae ava Cristo reroyasar pihañemoñetasa momara ägua. ²¹ Aviyerai catu ndayahuise mbahe roho, que ndayaihuise uva ricuer iyavei que ambuae mbahe ndayayapoise, ambuae ava Cristo reroyasar angaipa pipe seití uca iriëhi ägua. ²² Yande pihañemoñetasa yareco vahe rumo yarecoño itera yandeyeupe ité Tūpa rovaque. ¡Aviyerai ai catuño ité ava acoi, “Aviyerai yayapose evoco nungar mbahe” he pare, “¿Mara ehi pīha?” ndehi irise opihañemoñetasa pipe! ²³ Acoi que ava, “¿Mara ehi pīha?” ehise tembihu upe. Ipare rumo ohuse, ahe evocoiyase oyemboangaipa ipipe. Esepia, ndohui Tūpa rese oyeroyasa pipe. Iyavei ava, “¿Mara ehi pīha?” ehi vitese que mbahe upe, ipare oyapose ité, ahe angaipa.

15

Yambovihara ava yande cotindar; ndahei chira yande ae tēi yayembovihara

¹ Yande yayemoviracua catu vahe Cristo rese yande yeroyasa pipe, iyacatu yande teieté yañemosañaora ava Tūpa rese ndipihañemoñeta tupri vītei vahe rese. Ndahei chira rumo yande ae tēi yayembovihara. ² Iyacatu rumo opacatu yande yambovihara ava yande cotindar, yayapo aveira mbahe aviye vahe seco aviye ãgua yuvireco chupe ‘toyeroya catu opihañemoñeta pipe Tūpa rese yuvireco’ yande yapave. ³ Esepia, Cristo ndahei ahe ae oyemohapisi, ahe rumo oyapo mbahe, icuachiapri mombehusa rupi tupri ité acoi omombehu vahe: “Nde rese ñehe-ñehe tēi opa aipisi” ehi. ⁴ Supi eté co opacatu omombehu vahe aracahe opa icuachiasa yande mbohe ãgua, yande yasāro vaherā Tūpa reco porañietesa yande ñemosasa pipe iyavei yande pihamonguerēhisa pipe avei ahe yareco vahe ichuindar. ⁵ Tūpa, acoi ombou vahe yande ñemosasa, yande pihamonguerēhisa avei yandeu, tape pītivii oyoya guasu pe reco tupri ãgua ñepei-peí peyese Jesucristo recocuer rupi. ⁶ Ipipe sui pe opacatu oyoya guasu ñepei pe pihanemoñetasa pipe, pe ñehe pipe avei tapemboetei Tūpa, yande Yar Jesucristo Ru.

Ñehesa pīsirosa resendar imombehusa ava eta ndahei vahe judío upe

⁷ Peyepisi tupri ñepei-peí, inungar Cristo pe pisi tupri oyeupe nara Vu mboetei ãgua. ⁸ Che rumo aipo ahe pēu: Jesucristo ou judío pītivii Tūpa remimombehugüer mboaviye ãgua judío ramoi aracahendar upe. Ëgüe ehi Tūpa oñehe mboavíyesa mboyecua ⁹ ‘tomboetei ava ndahei vahe judío yuvirecoi vahe che Ru Tūpa iporoparaisuerecosa rese yuvireco’ oyapave. Ahe ëgüe ehi icuachiapri rupi tupri ité aipo ehi vahe:

“Sese che oromboeteira opacatu ava ndahei vahe judío pāhu rupi, iyavei asapucaira ndeu nde rer mboeteisa pipe” ehi.

¹⁰ Iyavei acoi ambuae icuachiapri pipe omombehu avei no: “¡Peyembovihara catu pe opacatu ndahei vahe judío peico vahe judío Tūpa rembiporavo reseve!” ehi.

¹¹ Ambuae pipe avei aipo ehi no:

“Pe opacatu ivi pipendar ava, ¡pemboetei yande Yar!” ehi.

¹² Isaías avei aipo ehi icuachía:

“Oimera niha ava Isaí suindar, opacatu ava rerecuarā secoira. Ava ndahei vahe judío seseño ité oyeroyara yuvireco” ehi.

¹³ Tūpa acoi ombou vahe mbahe oyesuindar rāro āgua, tayande mboviharete catu iyavei mbahe tupri tayareco sese yeroyasa pipe. Ipípe sui tombou yasāro vaherā ahe mbahe aviyé vahe Espíritu Santo píratasa pipe.

¹⁴ Che rivireta, ayeroya ité pe reco aviyesa rese, opacatu mbahe peicuapa tupri, peicatu avei pe ñepei-peí peyeupe pe yemboaracua āgua. ¹⁵ Co tecocuer rese rumo aicuachía opacatu che siquiyehisa pipe pēu pe resaraiéhi āgua ichui. Esepiá, ayapo Tūpa che cuaita ombou vahe che raisusa pipe cheu ¹⁶ Jesucristo rese che poravíqui āgua ava ndahei vahe judío recocuer aviyé āgua. Evocoiyase judío pahi nungar che cuaisa pipe amombehu co ñehesa Tūpa ombou vahe písirosa resendar yuvireco chupe imoporehí āgua Tūpa rovai inungar mbahe seropovéhepri aviyé vahe Tūpa upe Espíritu Santo pipe yepi.

¹⁷ Supi eté che Jesucristo reroyasar che recosa pipe aviharete Tūpa che cuaita rese. ¹⁸ Esepiá, cheu ndiyai añahehe vaherā que ambuae mbahe rese: co mbahe Cristo oyapo uca vahe cheu ava ndahei vahe judío recocuer rese, seseño ité iyacatu cheu añahehe vaherā. Esepiá, amongueréhi Tūpa reroya āgua yuvireco che ñehe rese, che rembiapo sui avei. ¹⁹ Ëgüe ahe poromondiisa mbahe yavai vahe apo Tūpa píratasa pipe. Ahe ayapo Espíritu Tūpa suindar píratasa pipe. Ipípe che amboaviye ñehesa Cristo resendar mombehu vichico. Tecua Jerusalén sui tupri aguata opacatu rupi, ayepota ivi Iliria ve avei no. ²⁰ Chequeréhi avei co ñehesa písirosa resendar mombehu āgua ava Cristo recocuer ndosendui vahe upe yepi. Ndahei rumo ambuae ava imboaracua pare tēi, ²¹ che rumo ayapo inungar icuachiapri pipe omombehu vahe:

“Ava ndoicuai vahe ité, ahe osepiara yuvireco curi, acoi ndosendui vahecuer, osenducua tupri aveira secocuer yuvireco no” ehi.

Pablo ipihañemoñeta Roma ve oso āgua

²² Co rese tēi che ndaicatui aso pe piri, yepe setá rupi aso pota tēi viña. ²³ Cüritei rumo opa amboaviye che poravíqui co ivi rupi, iyavei opa tēi setá araviter pe piri che sosa rāgüer.

²⁴ España ve che soseve, apita pucumira vicho pe piri yande yemboviha āgua. Iyavei pe sui che sē potase, che pítivíimira peye aheve che so āgua. ²⁵ Cüritei rumo che asora Jerusalén ve. Arasora porerecosa ahe pendar yande mboetasa Jesús reroyasar pítivíi āgua. ²⁶ Esepiá, ivi Macedonia pendar iyavei Acaya pendar Jesús reroyasar, ahe omonuha guarepochi yuvireco Jerusalén ve yande rivri iparaisu vahe pítivíi āgua yuvireco.

²⁷ Ahe ēgüe ehi güemimbotar rupi yuvireco iyavei iya ité imboyevi ägua yuvireco chupe ahe mbahe tupri oyeupe apo agüer rese. Esepia, yipindar Jesús reroyasar judío yuvirecoi vahe oicua uca co tecocuer Tüpa suindar ahe ava ndahei vahe judío yuvirecoi vahe upe. Sese iya ité imboyevi ägua co ivi pipendar porerecosa chupe. ²⁸ Opase che co porerecosa amondo yuvireco chupe, España ve che sose, ahese apitara vicho pe píri. ²⁹ Che amoha voi eté asose eiurve, tuvichá omboura Cristo oporovasasa yandeu.

³⁰ Che rivireta, yande Yar Jesucristo rer pipe iyavei yeäusa Espíritu ombou vahe pipe avei aporandu pëu opacatu che rese peyeroqui pírata vaherä Tüpa upe che pítivii ägua co mboraviqui rese. ³¹ Peporandu Tüpa upe, tache repi ava Jesús reroyasarëhi sui ivi Judea ve, iyavei Jerusalén pendar yande rivireta co porerecosa pisi tupri ägua avei. ³² Ahese Tüpa oipotase, che aviharetera ayepotase pe repia, iyavei toime pituhusa yandeu che pe píri che sose. ³³ Egüe tehi Tüpa güeco tuprisa pipe tasecoi opacatu pe rese.

16

Pablo mahenduhasa ñepei-peí ava upe

¹ Co yande reindri Febe serer vahe, ahe oipítivii tecua Cencrea pendar Cristo reroyasar oico. ² Peipisi tupri catu yande Yar rer pipe; ahe niha yande cuaita Cristo reroyasar yande recose, iyavei peipítiviño que mbahe chupe ipane vahe rese. Esepia, ahe setá ité oporopítivii iyavei che avei eté che pítivii no.

³ Pemombehu che mahenduha Prisca upe, Aquila upe avei, ahe niha che pítivii mboraviqui Jesucristo recocuer resendar rese yuvireco. ⁴ Ahe avei niha mbahe tēi pipe omundo güecocuer che repicave yuvireco, sese, “Aviye” ahe chupe, iyavei ndahei che güeraño aipo ahe, opacatu yande rivri ndahei vahe judío aipo ehi avei yuvireco chupe. ⁵ Pemombehu avei che mahenduha sétave oñemonuha vahe upe yuvireco. Pemombehu avei che mahenduha che rembiaisu Epeneto upe. Ahe rane niha yipindar ivi Asia pendar Cristo reroyasar. ⁶ Pemombehu avei che mahenduha María upe. Ahe niha oporaviqui iteanga vahe pe recocuer rese. ⁷ Pemombehu avei che mahenduha che mu Andrónico iyavei Junias upe. Ahe niha che mboetasa yuvirecoi che roquendasave; ahe avei apóstol remimboyeroya yuvirecoi, ahe rane avei yipindar Cristo reroyasar yuvirecoi che sui.

⁸ Pemombehu avei che mahenduha che rembiaisu Ampliato upe yande Yar rese secosa pipe. ⁹ Pemombehu avei

che mahenduha Urbano upe. Ahe niha yande nduguer oporavíqui vahe Cristo recocuer rese, che mborípar Estaquis upe avei. ¹⁰ Pemombehu avei che mahenduha Apeles upe. Ahe niha güecoāhasa sui osē tupri vahe Cristo rese oyeroyasa pípe. Iyavei pemombehu che mahenduhasa ava Aristóbulo rēta pipendar yuvirecoi vahe upe avei. ¹¹ Pemombehu avei che mahenduha che mu Herodión upe, ava Narciso rēta pipendar yande Yar reroyasar upe avei. ¹² Pemombehu avei che mahenduha Trifena upe iyavei Trifosa upe. Ahe niha oporavíqui vahe yande Yar upe nara yuvireco, iyavei yande rembiaisu yande reindri Pérsida. Ahe avei niha oporavíqui ité yande Yar upe nara. ¹³ Pemombehu avei che mahenduha Rufo upe, ahe niha icuapri ité Jesús reroyasar seco rese. Iyavei ichi, ahe che si nungar ité secoi. ¹⁴ Pemombehu avei che mahenduha Asínrito upe, Flegonte upe, Hermes upe, Patrobas upe, Hermas upe iyavei opacatu ambuae yande rivireta supi yuvirecoi vahe upe avei. ¹⁵ Pemombehu avei che mahenduha Filólogo upe iyavei Julia upe, Nero upe iyavei seindri upe, Olimpas upe, opacatu yande rivri yande Yar rese yuvirecoi vahe ipirindar upe avei.

¹⁶ Peyeovaupite catu pe reco maranehisa pípe che mahenduha mombehuse peyeupe. Opacatu Cristo reroyasar cohabe omondo avei omahenduhasa yuvireco pēu.

¹⁷ Che rivireta, peicua catu pe pāhu pendar omboyaho pota serai vahe sui. Oime ava ēgue ehi vahe, oiti uca vahe ava mbahe tēi pípe. Esepia, ahe ndahei eté co ñehesa pe yembohesa rupi yuvirecoi. Sese evoco nungar ava sui peyepepiño itera. ¹⁸ Esepia, ahe ava ndahei yande Yar Jesucristo upe nara oyapo mbahe yuvireco. Ēgue ehi rumo ahe oyeupe nara tēi oipota rai mbahe yuvireco. Iyavei ombopa ava ndayaracua tupri vahe; oñeho tupri ai angahu oporomohapisi aisa pípe tēi yuvireco. ¹⁹ Opacatu ité icuasa pe poreroyasa. Sese che aviharete vichico. Che rumo aipota pemboyecua vaherā pe mbahecusa mbahe avíye vahe apo água, ndahei mbahe tēi apo água. ²⁰ Evocoiyase Tūpa güeco tuprisa pípe pihaivi Caruguar osecopipa tupri itera. Pe avei evocoiyase pesecoreroyira. Yande Yar Jesucristo tape rovasa.

²¹ Omondo avei omahenduhasa Timoteo pēu. Ahe che pītivii che poravíquisa rese yepi. Iyavei che mu Lucio, Jasón, Sosípater, ahe avei imahenduha yuvireco pe rese.

²² Che, Tercio, aicuachía vahe co ñehesa pēu, che avei che mahenduhasa amondo yande Yar reroyasa pípe pēu.

²³ Omondo avei omahenduhasa Gayo pēu. Ahe sētave ité niha aque yepi, ipiri avei ambuae Jesús reroyasar oñemonuha yuvireco yepi. Iyavei Erasto omondo omahenduhasa opacatu

pẽu, ahe tecua mbahe guarepochi apocatusar. Yande r̄ivri Cuarto avei omondo omahenduhasa pẽu.

²⁴ Aviye, yande Yar Jesucristo tape rovasa opacatu.

Pablo omboetei Tūpa

²⁵ ¡Yamboetei Tūpa! Ahe niha oicatu pe moviracua co ñehesa ñepisirosa resendar amombehu vahe rupi iyavei co porombohesa Jesucristo recocuer resendar rupi avei. Ahe oyoya tupri ité Tūpa omboyecua ramo vahe cheu co ivo apoëhi suive mbahe ndicuasai vahe rese. ²⁶ Cûritei rumo oyecua uca oñehe mombehusar rembicuachía pipe Tūpa apirëhi vahe porocuaita rupi cute. Ahe ñehesa ndicuasai vahe omboyecua uca opacatú ava upe ‘toviroya sese oyeroyasa pipe yuvireco’ oya.

²⁷ ¡Tūpa güeraño imbahecuá vahe yepi, ëgue tehi ahe yande Yar Jesucristo rer pipe imboeteipri tasecoi!

YIPINDAR PABLO REMBICUACHIA CORINTO PENDAR UPE CORINTIOS

Pablo mahenduhasa Jesús reroyasar Corinto pendar upe

¹ Che Pablo, yande rívri Sóstenes reseve, oromondo co ore mahenduhasa opacatu pēu. Tūpa niha, güemimbotar rupi, che poravo apóstol che reco água. ² Aicuachía co che ñehe pēu, pe Jesús reroyasar peñemonuha vahe Tūpa upe tecua Corinto ve. Peicua niha pe ipehapri peico Tūpa upe nara ité Jesucristo rese peicose. Peicua avei niha Tūpa pe poravose oyeupe nara pe reco catupri água, inungar opacatu ambuae seroyasar co ívi pipendar omboetei vahe yande Yar Jesucristo rer yuvireco. Supi eté niha Jesucristo, ahe opacatu ava Yar, yande Yar avei. ³ Yande Ru Tūpa, yande Yar Jesucristo tape rovasa pe reco tupri água.

Jesucristo suindar porovasasa seroyasar upe

⁴ Che, “Aviye ndeu” aheño ité Tūpa upe pe recocuer rese yepi. Esepia, Tūpa pe rovasa ité Jesucristo rese peicose. ⁵ Ëgüe ehi secocuer pipe sui Tūpa ombou opacatu pe reco tupri catu água, pemombehu tupri vaherā imbahecuada, opacatu mbahe supi eté vahe cua tupri água avei. ⁶ Esepia niha, ore co ñehesa Jesucristo resendar pēu imombehusa pipe sui pe recuñaro uca ité. ⁷ Sese ndipoi eté que porovasasa Tūpa Espíritu suindar ipane vahe pēu yande Yar Jesucristo yevi água pesārose. ⁸ Tūpa niha pe moviracuaño itera pe rereco ari cañisa pipe Jesucristo yevise voi curi ‘tipo eme que mbahe tēi secocuer rese yuvireco’ ohesave. ⁹ Ahe acoi omboaviye vahe ité oñehengagüer yande poravo Guahir yande Yar Jesucristo rese yande reco água.

Jesús reroyasar pihañemoñetasa ndahoyoyai vahe resendar

¹⁰⁻¹¹ Che rivireta, che amombehu potami mbahe pēu yande Yar Jesucristo rer pipe. Esepia, Cloé mu pe mombehu yuvireco cheu: “Oñemoiro-iro yuvireco oyeupe ae” ehi. Sese aipo ahe pēu: pemboyoya catu pe pihañemoñetasa, ndapeyem-boyaho chira peyesui. Peico catu pe yeaisusa pipe. Ichui tahoyoya pe pihañemoñetasa, tahoyoya avei mbahe pe remimbotar. ¹² Supi eté amove aipo, “Ore Pablo rupindar oroico” peye tēi; ambuae evocoiyase, “Aní, ore rumo Apolos rupindar oroico” ehi; ambuae, “Ore Pedro rupindar oroico” ehi; ambuae, “Ore Cristo rupindar oroico” aipo peye-peye tēi aipo peico. ¹³ ¡Cristo rumo vireco porombohesa ndoyaho-yaho

tēi vahe! ¿Che tie amano curusu rese pe angaipa repirā? anise, ¿che rer pipe tie peñeapiramo uca peico? ¹⁴ ¡Aviye Tūpa upe che ndopoāpiramoisel! Crispo iyavei Gayo, ahe güeraño rumo añapiramo yuvireco cuese. ¹⁵ Sese ndipoi chira “serer pipe ñapiramosa” ehi vahe yuvireco cheu. ¹⁶ Estéfanas rēta pendar avei añapiramo yuvireco, ipare ndipo iri revo ambuae ava añapiramo vahecuer. ¹⁷ Cristo niha nomombehui che poroāpiramo ãgua. Ëgüe ehi rumo che cuaita ñehesa ñepisirosa resendar mombehu ãgua tēi. Iyavei ndahei ñehesa yavai catu vahe aiporu. Esepia, nañomi potai eté que chīhi co ñehesa píratagüer Jesucristo curusu rese imano agüer resendar ava sui.

Cristo Tūpa píratasa, imbahecuasa avei

¹⁸ Esepia, acoi ava ocañi tēi vaherā upe co ñehesa curusu rese Cristo manosa resendar aviyé ëgüe ehi tēi vahe viña. Yande ipísiroprí yaico vaherā upe rumo co ñehesa vireco ité Tūpa píratasa, ¹⁹ inungar Isaías rembicuachiagüer pipe aipo ehi:

“Amocañira co ivi pipendar ava tēi mbahecuasa iyavei arocuara ava yaracua vai tēi vahe sui yaracuasa” ehi.

²⁰ ¿Mara ehi evocoiyase co ivi pipendar ava imbahecuva vai vahe, ava-ava tēi aracuasa cuapar avei, iyavei iñehe cua tupri ai vahe co ivi pipendar mbahe rese yuvireco? ¡Tūpa niha osecuñaro evocoi nungar mbahecuasa ëgüe ehi tēi vahe pipe! ²¹ Ëgüe ehi eté oaracuasa pipe ‘toicua eme che recocuer ava oaracuasa pipe tēi’ oya. Yepe, “Co ñehesa Cristo resendar ëgüe ehi tēi vahe” ehi tēi ava yuvireco chupe viña, Tūpa rumo co ñehesa mombehusa sui ‘toñepisiro che Rahir rese yeroyasa pipe yuvireco’ oyapave yandeu.

²² Che mu judío osepia pota tēi mbahe poromondiisa ipíratá vahe iva pendar yuvireco. Griego evocoiyase osendu pota tēi ñehesa aracuasa resendar yuvireco no. ²³ Yande rumo, “Cristo omano curusu rese” yahe ava upe yaico. Amove judío upe mbahe tēi co ñehesa. Iyavei amove ndahei vahe judío, co ñehesa osenduse, aviyé acoi ëgüe ehi tēi vahe yuvireco chupe. ²⁴ Yande rumo, Tūpa rembiporavo yaico vahe, que judío, anise que griego avei, yandeu co ñehesa Tūpa Rembiporavo Cristo resendar Tūpa píratasa ité, imbahecuasa avei. ²⁵ Esepia niha, ava upe, Tūpa suindar mbahe aviyé acoi ëgüe ehi tēi vahe viña. Co Tūpa suindar rumo mbahecuasa aviyé catu vahe ité ava tēi mbahecuasa sui iyavei acoi mbahe Tūpa suindar aviyé nípiratai vahe ava upe viña, ahe rumo ipírata catu ité opacatu ava tēi píratasa sui. ²⁶ Che rívireta, peyemomahenduha catu co rese: Tūpa pe poravo, yepe pe pāhu pendar ndasetaimi

imbahecua vai vahe ava rovaque yuvireco viña. Ndasetaimi avei pereco pe mu seco ivate vahe viña no. ²⁷ Evoco ava, “Ndoicuai vahe mbahe yuvireco” ehi yuvireco pēu viña. Tūpa rumo pe poravo evoco ava imbahecua vai vahe mochi äqua. Iyavei oiporavo ava pe pāhu pendar ndoicatu tuprii vahe yuvireco ava ipirata vahe Tūpa cuaparëhi mochi äqua. ²⁸ Oiporavo avei co ivi pipe ava remieroiro seco mbegüemi vahe, ava seco ivi coti catu vahe pe pāhu pendar co ava seco ivaté vahe reroyi äqua ²⁹ ‘toyemboivate ai eme que ava che rovaque yuvireco’ oya. ³⁰ Tūpa ité rumo yande mboyemboya Guahir Jesucristo rese, ahe avei ombou Guahir yande mboaracua äqua, yande reco mohivi äqua avei ‘toyuvirecoi cheu nara’ ohesave iyavei ‘ipisíropri toyuvirecoi’ oya yandeu. ³¹ Sese inungar aipo ehi ñehesa icuachiapri aracahendar pipe: “Acoi ava oyeecomboivate ai pota vahe, toyeecomboivate catu yande Yar rembiapo rese” ehi.

2

Pablo omombehu curusu rese Cristo mano agüer

¹ Iyavei, che rivireta, che asose cuese, añehese pēu Tūpa suindar ñehesa supi eté vahe yipindar ndicuasai vahe pipe, nañeheti co ivi pipendar tēi ava mbahecuada pipe, ñehesa ivate ai vahe pipe avei. ² Esepia, acoi aicose pe pāhuve cuese, ndachepihañemoñetai eté que ambuae mbahe rese; Jesucristo recocuer rese, yatica agüer rese catu ité che pihañemoñeta vichico. ³ Iyavei ndachepiratai, ariri avei che siquiyepave pēu che sose. ⁴ Iyavei acoi añehese ñehesa písírosa resendar rese pēu, ndaiporui eté rumo ñehesa ivate ai vahe pe pihañemoñetasa rerova äqua. Che rumo Tūpa Espíritu píratasa pipe añehé pēu ⁵ ‘toyeroya catu Tūpa píratasa rese yuvireco’ che yapave pe yeroyaehi äqua ava tēi mbahecuada rese.

Tūpa oEspíritu pipe oicua uca mbahe yandeu

⁶ Ore rumo oromombehuño ité aracuasa pēu, pe peymoviracua vahe Jesús rese pe yeroyasa pipe. Co aracuasa rumo aviyevahe ndahei ava suindar tēi, ndahei avei ava mborerecuar co ivi pipendar tēi aracuasa nungar. Esepia, ahe imborerecuasa ocañi tēi vaherä. ⁷ Oroñehetatu aracuasa Tūpa suindar ndicuasai vahe rese, ahe yipive vireco vahe ivi apoëhi viteseve, ahe co omboyecka ramo vahe yandeu yaico vaherä teco ori apirëhi vahesave. ⁸ Co ivi pipendar ava mborerecuareta rumo ndosenducuai eté co ñehesa. Osenducuase rumo mborerecuar Jerusalén pendar yuvireco viña, ndoyatica ucai chira yande Yar seco ivate, porañete vahe curusu rese yuvireco viña. ⁹ Icuachiapri aracahendar pipe aipo ehi:

“Tūpa omoingatu mbahe ava guaisupar upe. Ahe rumo mbahe ndosepiai vahe ité ava yuvireco yepi, ndosendui vahe ité, iyavei ndoyembopihāñemoñetaimí eté sese yuvireco no” ehi aracahe.

¹⁰ Tūpa rumo oicua uca Espíritu pipe yandeu cute. Esepio, Espíritu oicua tupri catu ité opacatú secocuer oico.

¹¹ Ëgüe ehi eté, inungar opacatu ava pähuve ndipoi eté que ñepei ava pihañemoñetaso oicua vahe, iespíritu güeraño ité oicua mbahe oime vahe ipiha pipe. Ëgüe ehi avei Tūpa Espíritu güeraño ité oicua Tūpa pihañemoñetaso. ¹² Yande evocoiyase ndahei co ivi pipendar tēi espíritu yaipisi, ëgüe ehi rumo Espíritu Tūpa suindar yaipisi yaicua vaherā iporecosa oporoaisusa pipe ombou vahe yandeu. ¹³ Ahe niha oromombahu Tūpa Espíritu ore mbohe vahe, ndahei ñehesa ava tēi aracuasa sui. Ëgüe orohe co supi eté vahe ñehesa Espíritu suindar oromombahu Espíritu rese yuvirecoi vahe upe yepi.

¹⁴ Acoi ava ndovirecoi vahe rumo Tūpa Espíritu opiha pipe, ndoipisii eté mbahe Tūpa Espíritu suindar yuvireco. Esepio, chupe evoco mbahe aviyé ëgüe ehi tēi vahe, iyavei ndosenducua catui eté yuvireco. Esepio, evoco nungar mbahe senducuasa Espíritu pipeño ité. ¹⁵ Acoi ava vireco vahe rumo Tūpa Espíritu opiha pipe oicatu opacatu mbahe cua água. Ndipoi chira rumo ambuae ava ndovirecoi vahe Espíritu opiha pipe ahe ava recocuer cua tupri água. ¹⁶ Esepio, icuachiapri aracahendar pipe aipo ehi: “¿Ava vo oicua tēira yande Yar pihañemoñetaso viña? ¿Ava vo ombohe tēira viña?” ehi. Yande rumo yareco yande Yar Cristo pihañemoñetaso.

3

Pablo iyavei Apolos Tūpa upe oporaviqui vahe yuvirecoi

¹ Che rivireta, ndapeguata tupri Espíritu reroyasa pipe; pe rumo peguataño vite ava tēi pihañemoñetaso rupi peico. Sese namombehu catui ñehesa yavai vahe Espíritu suindar pēu. Esepio, pe pītanimi nungar vite tēi pe pihañemoñetaso Cristo rese.

² Sese che opombohe mbahe ndayavaimi vahe rese. Esepio, pītanimi ndoicatu vitei ocaru. Sese ocambu viteño tēi. Cūritei rumo ëgüe peye vite ité. Esepio, pe ndapesenducua catu vitei eté Tūpa Ñehengagüer yavai vahe. ³ Peguata viteño co ivi pipendar pihañemoñetaso tēi rupi. Esepio, peyemoecatéhi-téhi oyeupe, iyavei peñemoiro peyeupe pe pihañemoñeta ndahoyoyai vahesa pipe. Pe evocoiyase peyapo ava ndoicuai vahe Tūpa rembiapo nungar. ⁴ Esepio, aipo peyeño tēi, “Ore Pablo rupindar oroico”; ambuae evocoiyase, “Ore Apolos rupindar oroico” peye-peye tēi pe yembohesa rese pe yeecopisa pipe.

Aipo ehi vahe pe pāhuve inungar ava Tūpa ndoicuai vahe pihañemoñetasa.

⁵ Pesendu che ñehe: ¡Che Pablo iyavei Apolos Tūpa rembiguai tēi oroico! Esepia, yande Yar niha ombou ñepei-peí mboravíqui yandeu chupe yayapo vaherā. Tūpa upe ore poravíquisa pipe sui niha peroya yande Yar peico: ⁶ che rane inungar añoti vahe mbahe rāhii pe piha pipe; Apolos evocoiyase inungar imboihusar; Tūpa rumo inungar omboori vahe pēu. ⁷ Evocoiyase ndiyai peyeroya mbahe tísar rese tēi, imboihusar rese tēi avei. Peyeroya catura rumo Tūpa rese. Ahe niha pe reco momirata catu pe rereco. ⁸ Ore rumo oyoya tuprī oroyapo mbahe pēu nara. Sese ñepei-peí Tūpa omboura porerecosa pe rese ore poravíquigüer rupi oreu. ⁹ Ore oroparavíqui vahe Tūpa upe. Pe evocoiyase ivi nungar peico Tūpa poravíqui água iyavei pe inungar Tūpa omopuha ramomi vahe oí peico. ¹⁰⁻¹² Che inungar oí apo cuapar oyapo rane vahe oí vīracua água, ñgüe ahe imombehu Cristo resendar ñehesa pēu seroya tuprī água. Ndiyai eté yaroya que ambuae ava tēi, Jesucristo güeraño ité yaroyara. Ambuae evocoiyase inungar oí aposar omopuha vahe ivíracuasa hariéve, ñgüe ehi ahe pe mongueréhi catu pe mbohe co ñehesa rese. Evocoiyase inungar oí aposar amove oiporu mbahe ipocopi vahe oí apo água yuvireco oro, guarepochi, anise ita aviyé vahe. Amove rumo oiporu avei ndipocopíi vahe mbahe que ivirape tēi, capihi, anise tacuar tēi oiguā yuvireco. Ñgüe ehi aveira pe mbohesar yuvireco. Ahe ñepei-peí rumo iya oicua tuprira pe mbohe água yuvireco. ¹³ Ahe iporavíqui agüer rumo ari cañise icuasa tuprira ñepei-peí yuvireco. Esepia, ahe ari pipe yande Yar oura tata reseve ñepei-peí pe mbohesar poravíqui agüer cua água. ¹⁴ Acoi ava oporombohe tuprī vahe inungar ava oyapo oí ndocai vahe, ahe oipisira oporavíqui repri; ¹⁵ ambuae oporombohe rai vahe rumo inungar oí oyapo ocai vahe tēi, iporombohe agüer opa tēi etera ocañi. Ahe güeraño evocoiyase oñepisiro sáira tata guasu sui.

¹⁶ ¿Ndapeicuai vo pe yande Jesús reroyasar Tūpa rēta nungar yaico? IEspíritu niha secoi eté yande piha pipe. ¹⁷ Oimese que ava yande pāhuve omomara vahe Tūpa rēta, Tūpa evocoiyase omboura oñemoirosa ahe ava upe. Esepia, Tūpa rēta nimarai vahe ité; yande teiteté niha Tūpa rēta yaico.

¹⁸ Peyembopa eme catu pe ae. Oimese que pe pāhu pendar oyeupe aipo “che yaracua tuprī vahe aico” ehi vahe co ivi pipendar pihañemoñetasa rupi tēi, toyecomombegüemi rane oaracua água. ¹⁹ Esepia, ava tēi aracuasa Tūpa upe ñgüe ehi tēi vahe. Inungar icuachiapri aracahendar pipe aipo ehi: “Ava oaracua raisa pipe oyeiti uca mbahe tēi pipe Tūpa

upe yuvireco” ehi. ²⁰ Iyavei aipo ehi no: “Yar rumo oicua ava tēi yaracua rai vahe pihañemoñetasa, ahe ēgue ehi tēi vahe” ehi. ²¹ Sese ndapeyeecomboivate ai chira que ava tēi porombohesa rupi peico. Esepi, opacatu mbahe pēundar ité: ²² Ēgue ehi eté che Pablo, iyavei Apolos, Pedro avei, opacatu ivi pipendar mbahe Tūpa omoime vahe yandeu, tecovesa, manosa avei, yasepia vahe, iyavei mbahe oime vaherā, ahe niha opacatu pēu nara, ²³ pe niha Cristo upendar, Cristo evocoiyase Tūpa upendar secoi.

4

Apóstol yuvirecoi vahe poravíqui agüer

¹ Iya aipo peye: “Co mbia Cristo povri pendar yuvirecoi, icuaita ité niha Tūpa suindar ñehesa oyecua ramo vahe rese iporombohe ãgua” peyera oreu viña. ² Acoi vireco vahe ocuaitarā, iya ité omboyecua ocuaita mboaviye tuprisa. ³ Mara etemo che areco pe che recocuer rese peporanduse viña. Iyavei cheu mbahemi tēi che reraso potase que ava tēi porandusave che recocuer rese porandu ãgua yuvireco. Che avei ndaicuai eté che recocuer cuapa tupri. ⁴ Yepe ndaicuai que mbahe che rembiavi che cuaita sui viña, ndiyai chira rumo, “Che amboaviye tupri che cuaita” ahe vaherā pēu. Yande Yar rumo oicua. ⁵ Sese pe, “Ahe ava recocuer aviye ai”; anise, “Ahe ava recocuer naporai vahe” ndapeye voi tēi chira. Pesāro ranera rumo yande Yar yevi ãgua. Ahe niha omboyecuara opacatu mbahe ndoyecuai vahe, iyavei omboyecuapara ñepei-pei yande pihañemoñetasa. Ipare aipo ehira yandeu: “Aviye, nde eremboaviye tupri nde cuaita” ehira; anise, “Nderemboaviyei nde cuaita” ehira ñepei-pei yandeu.

⁶ Che rivireta, che añahe cheyese ae, Apolos rese avei pēu mbahe tupri ãgua rese ‘ore recocuer sui toyembohe yuvireco Tūpa remimbotar icuachiapri rupi tupri yuvirecoi ãgua’ ore yapave pēu. Pe evocoiyase, “Co mbia seco ivate catu vahe co ambuae mbia sui” ndapeyei chira pe yemboivate aisa pipe oreu. ⁷ ¿Pe tie aviye catu vahe peico ambuae ava sui? Opacatu rumo mbahe pe rembiereco, ahe Tūpa suindar. ¡Sese ndiyai peyeecomboivate etepri co mbahe pereco vahe rese! ¡Aviye opacatu mbahe peyesui tēi pe reco vahe viña!

⁸ Ndoyavii pereco ité vahe opacatu mbahe pe remimbotar viña, ndoyavii avei nipanei vahe ité Tūpa suindar mbahe pēu. Peyeupe revo ndoyavii mborerecuar guasu peico ore sui viña. ¡Ēgue peye itera tarahu viña! Ahese, ore avei mborerecuar oroicora pe pāhuve viña. ⁹ Ore rumo apóstol oroico vahe ndoyavii cheu Tūpa ore renoi ipa tēi vahe ore mano tēi ãgua.

Sese serořombri oroico inungar ava imboguaipri yucapirã. Êgue orohe oroico opacatu ava rovaque, Tüpa rembiguai eta iva pendar rovaque avei. ¹⁰ Iyavei, “Co ndayaracuai vahe” ehi rutei ava yuvireco oreu Cristo rese ité ore recose; ahese avei rumo pe peyeapo imbahecua etepri vahe peico Cristo rese pe recosa pipe. Iyavei ore ndoyavii ndaseco píratai vahe oroico ava rembiepiave; aheseve avei rumo peyeeconomirata tēi peico. Ore serořombri tēi oroico, pe evocoiyase ava pe mboetei guasu pe rereco yuvireco. ¹¹ Cûritei ore oroicove vite ité ore rieporëhi pipe, ore husei tēi iyavei ndore turucuai eté. Ava rumo evocoiyase mara-mara tēi ore rereco yuvireco. Iyavei ndorovirecoi ore rëta ité. ¹² Ore oroporaviquiño ité, oroyembogüeraí tēi ipipe. Ava rumo iñehe mara-mara tēi eté yuvireco oreu; ore evocoiyase oromboyeviño iñehe mbahe tupri pipe chupe. Ore reca-reca catuño ité ore momara água yuvireco; ore rumo oroñemosaño ité yuvireco chupe. ¹³ Iñeheñe tēi ore rese yuvireco; ore rumo saisusa pipe oromboyevi iñehe yuvireco chupe. Ore rereco iti nungar tēi iyavei ore rereco inungar ava êgue ehi tēi vahe yuvireco. Cûritei êgue ehi viteño ité yuvireco oreu.

¹⁴ Ndahei pe mochi água aipo ahe icuachía pēu, êgue ehi rumo pe mboaracua água tēi. Inungar che rahir ité, che rembiaisu opovireco. ¹⁵ Esepia, yepe pereco ati pe pítiyiisar Cristo rese pe reco água viña, ndaperecoi rumo setá pe yesupa. Esepia, che amombehuse niha ñehesa písrosa resendar pēu, ahese ramo peroya Jesucristo. Seroyasa pipe evocoiyase che inungar pe yesupa ité aico pēu. ¹⁶ Sese che aipota ité che recocuer moña peye.

¹⁷ Sese che amondo che rembiaisu Timoteo pēu, che rahir nungar omboaviye vahe ocuaita yande Yar suindar. Ahe pe momahenduhara Cristo rupi che guatasa rese. Ahe oyoya che porombohe agüer rese che sose opacatu Jesús reroyasar ñemonuhasa rupi yepi. ¹⁸ Amove oime pe pähuve oyeecomboivate ai vahe. “Ndou iri chietera revo cohaye yande repia” ehi yuvireco cheu viña; ¹⁹ aso píhaiviño itera rumo pe repia yande Yar oipotase cheu. Ahese aicua tupriya oyemboivate ai vahe reco píratasa yuvireco. Ndahei chira iñehe güeraño tēi aicuara. ²⁰ Esepia, Tüpa omborerecuasave, ndahei oñeha pipe tēi oporocuai, opíratasa pipe rumo êgue ehi. ²¹ ¿Mbahe píha peipota peico? ¿Peipota píha che aso vaherā pēu che ñeha pírata pe mboaracua água mbahe pe rembiaví rese? Anise, pemoingatu rane pe recocuer, ahese asora mbahe tupri pipe pe píri.

5

Pablo oñeho ñepei Jesús reroyasar pāhu pendar oyemboaguasa vahe rese

¹ Ambuae mbahe, oroyandu ñepei mbahe tēi pe pāhu pendar rembiapo oroico: oime aipo osi recoyer rese secoi vahe. Ahe angaipa guasu oyapo oico. Tūpa reroyasarēhi ité ndoyapoi evoco nungar mbahe tēi yuvireco. ² ¡Pe rumo peyeecomboivate ai peico! ¡Iyacatu rumo ndapeyembovihai chira evoco nungar mbahe tēi repiase viña! Evoco nungar ava iyacatu ité pemboyepepira pe pāhu sui. ³ Yepe niha che teiteté ndaicoi pe pāhuve viña, pe rese che mahenduhasa pipe rumo aicove ité pe pāhuve iyavei aicua voi eté aipo oyapo vahe mbahe tēi recocuer inungar-ra aico vahe ité pe pāhuve viña. ⁴ Acoi peñemonuhase, che avei niha aicora pe pāhuve che mahenduhasa pipe, yande Yar Jesucristo píratasa avei secoira pe rese. ⁵ Evocoiyase ahe ava timondosa Caruguar povrīve secocuerai mocañi ãgua. Ipipe sui iespíritu oñepisirora yande Yar Jesucristo yevise curi.

⁶ Ndapeyeecomboivate ai chira peico co mbahe tēi oimese pe pāhuve. Esepia, peicua niha co ñehesa aipo ehi vahe: “Yepe chihimi imondosa pan mboapeposa panguā rese viña, ahe rumo oiquepa tupri panguā rese” ehi. ⁷ Evoco ava rembiapo ai inungar pan mboapeposa pe pāhuve. Sese pemombopa pe pāhu sui peicoëhi ãgua angaipa pipe peico vaherā inungar panguā ipiasu vahe ndovirecoi vahe omboapeposa oyese. Êgue peye ité niha. Esepia, yande Yar Jesucristo iparaisu omano yande repirā. Êgue ehi ahe inungar ovesa yucapri angaipa mocañi ãgua judío pieta Pascua pipe yepi. ⁸ Sese inungar judío omboetei vahe Pascua pieta yuvireco yepi omombopaño pan mboapeposa cuacula vahe oyesui pan ipiasu, ndayapepoi vahe rereco ãgua, êgue yahe aveira yaico yande reco piasu supi eté vahe pipe; yamombopara yande recocuerai yandeyesui, ahe ava reco momara-mara tēisa, mbahe naporai vahe avei.

⁹⁻¹⁰ Ambuae aicuachía vahe pipe aipo ahe pēu: “Ndapemborii chira ava oyemboaguasa-guasa tēi vahe, acoi ava oipota rai vahe ambuae ava mbahe, imonda rai vahe, iyavei ava mbahe rahanga upe tēi oyerure vahe” ahe. Co che ñehesa rumo ndahei Tūpa ndoicua vitei vahe upendar. Esepia niha, pe yepepi ãgua ñepei reseve evoco nungar ava sui, pesē itera co ivi pipe sui viña. ¹¹ Che niha aipo ahe icuachía pēu: ndapemborii chira que ava acoi “che Jesucristo reroyasar aico” ehi angahu tēi vahe, que oyemboaguasase, anise oipota raise que ambuae ava mbahe, oyeroqui tēi vahe que mbahe rahanga upe, iyavei imahechiroi ai vahe, caguar tēi vahe,

anise imonda rai vahe. Evoco nungar ava piri ñepei yepe ndapecarui chietera.¹²⁻¹³ Cheu ndiyai eté ava ndoyuvirecoi vahe Tūpa rese recocuer rese porandu ãgua. Tūpa ahe ava yuvirecoi vahe recocuer opara oicua coiye. Pe rumo pe cuaita ité Tūpa rese yuvirecoi vahe upe pe porandu ãgua secocuer rese. ¡Sese pemboyepepiño ité osi recoyar rese secoi vahe pe pāhu sui!

6

Ndiyai Jesús reroyasar serasosa ndahei vahe Jesús reroyasar mborerecuar rovai

¹ Ambuae mbahe no: Oime pe pāhu pendar “co mbia oyapo mbahe tēi cheu” ehi vahe ambuae Jesús reroyasar upe. ¡Mahera peraso mborerecuar Tūpa reroyasarēhi upe tēi evoco mbaia rembiapo ai rese porandu ãgua! Iyacatu rumo Tūpa reroyasareta upe perasora secocuer moingatu ãgua yuvireco viña. ² Peicua niha pe Tūpa reroyasar peporandura ava ndoicuai vahe Tūpa upe secocuer rese yuvireco curi. Evocoiyase, ¿ndapeicatui pīha co tecocuer mbahemí tēi moingatu peico? ³ ¿Ndapeicuai vo yande avei yaporandura Tūpa rembiguai recocuer rese curi? Evocoiyase, ¡peporandu catu itera co iví pipendar tecocuer rese peyeupe yepi! ⁴ Perecose evoco nungar mbahe tēi peyeupe, ¡mahera peiporu ava ēgue ehi tēi vahe tūparo pendar upe mbahe moingatu ãgua! ⁵ Che aipo ahe ité pēu pe chī ãgua: ¿Ndipoimi eté vo pe pāhuve que ñepei yaracua vahe oicatu vahe que mbahe tēi peyeupendar moingatu ãgua? ⁶ ¡Amove pevava peyeupe! ¡Ndahei co güeraño, oime avei pe pāhu pendar Tūpa reroyasar víraso ambuae omboetasa mborerecuar Tūpa reroyasarēhi upe tēi mbahe moingatu ãgua!

⁷ Supi eté evocoia pe reco pīpe peyaví guasu ité. Iya peñemosañora co mbahe tēi pe mboetasa suindar upe viña. Ēgue ehi eté, iya mbahe pe reco vahe, “Toñomiño yuvireco” peyera chupe pe raso rāgür sui Tūpa reroyasarēhi mborerecuar upe viña. ⁸ Amove rumo pe avei peyapo mbahe-mbahe tēi eté; peñomi avei pe mboetasa Tūpa reroyasar mbahe.

⁹⁻¹⁰ ¡Pe niha peicua acoi ava mbahe-mbahe tēi aposar ndoyuviroiquei chietera Tūpa mborerecuasa pīpe curi! Peyembopa ucai rene chupe. Esepio, acoi ava oyemboaguasa-guasa tēi vahe, mbahe rahanga upe tēi oyeroqui vahe, omendasa sui oyemboaguasa vahe, cuimbahe pāve oyapo vahe mbahe oyese ae yuvireco, imonda rai vahe, oipota rai vahe ambuae ava mbahe, osavaipo serai vahe, imahechiroi ai vahe, iyavei ava virocua yesapiñaño tēi vahe mbahe tēi pīpe ambuae ava mbahe, ahe opacatu

ndoyuvirasoi chira ivave Tūpa mborerecuasave curi. ¹¹ Oime avei niha acoi pe pāhu pendar yipindar ēgue ehi vahe yuvireco viña, cūritei rumo opa pe angaipa imocañisa pe sui iyavei pe ipehapri peico Tūpa upe nara ité. Ahe, “Peyavi mbahe” ndehi iri pēu yande Yar Jesucristo rer pipe iyavei yande Ru Tūpa Espíritu pīratasa pipe avei no.

Yande rete ipehapri Tūpa upe nara yaguasaēhi āgua

¹² Iyavei ambuae mbahe: Supi eté niha “avīye que mbahe che remimbotar ayapo vaherā” ehi vahe. Amove rumo co mbahe ndahei avīye vahe yandeu iyavei yandeu ndiyai evocoī nungar mbahe povrīve nara tēi yande reco āgua. ¹³ Supi eté niha aipo ehi vahe: “Yande rembihu yande avīter upe nara, yande avīter evocoīyase yande rembihu upe nara” ehi. Coiye rumo Tūpa opara omocañi evocoī nungar mbahe. Yande retecuer rumo ndicuaitai yaguasa tēi vaherā, ahe rumo yande Yar upe nara. Yande Yar evocoīyase yande retecuer upe nara secoi. ¹⁴ Inungar Tūpa ombogüerayevi yande Yar, ēgue ehi aveira yande mbogüerayevi opīratasa pipe coiye.

¹⁵ Peicua niha yande rete Jesucristo upendar ité. Ndiyai eté evocoīyase Jesucristo upendar yande rete mundo āgua cuña güetecuer omondo-mondo tēi vahe upe. ¹⁶ Peicua niha pe aipo nungar cuña ndipihai vahe rese peicose, pe retecuer evocoīyase ñepei vahe nungar ité pereco. Esepia, icuachi-apri aracahendar pipe aipo ehi yandeu: “Yepe ñuvirío ava yuvirecoi vahe viña, ñepei vahe nungar ité rumo secocuer yuvireco” ehi. ¹⁷ Acoi ava secoi vahe rumo yande Yar rese, ahe secocuer evocoīyase ñepeiño ité.

¹⁸ Peyepepi voiño catu ava yemboaguasa-guasa tēisa sui. Opacatu ambuae angaipa ndahei yande retecuer rese nara ité. Acoi ava rumo oyapo tēi vahe mbahe cuña rese, güetecuer ae evocoīyase omomara catu güembia po pipe sui tēi. ¹⁹ ¿Ndapeicua vo pe retecuer Espíritu Santo upendar ité secoi, iyavei ahe Espíritu Tūpa remimbou pe rese ité secoi? Sese pe retecuer ndahei pēundar ité. ²⁰ Esepia, Tūpa yande rerocua oyeupe nara. Yande rumo yande repi chupe. Sese peyapo mbahe avīye vahe pe retecuer pipe Tūpa mboetei āgua.

7

Poromboaracuasa mendasa resendar

¹ Cūritei amboyevira pēu acoi cuese pe porandusa mendasa resendar peicuachía vahe imbou cheu. Avīyeño ité niha que ava ndomendaise viña. ² Pe aguasa-guasa tēiēhi āgua rumo peyacatu perecora pe rembireco, cuña avei evocoīyase tovireco oyacatu omer yuvireco. ³ Cuimbahe tomboavīye omendasa güembireco rese iyavei cuña omenda

vahe, tomboaviye avei mendasa omer rese. Ahe niha yande cuaita yamendase. ⁴ Esepia, cuña omenda vahe güetecuer ndahe iri oyeupe nara vireco, omer upe nara ité rumo. Iyavei cuimbahe omenda vahe, ndahei avei güetecuer oyeupe nara vireco, ahe rumo güembireco upe nara ité vireco. ⁵ Ndiyai peatēhi oyeupe. Oyoya rumo, "Yayapo eme mbahe" peyese peyeupe pe yeroqui água Tüpa upe, ahe aviyéño. Ndiyai rumo peyoeya pucura, aviyeteramo ndapeñemosai chira, ipipe sui aviyeretamo Caruguar pe ãtoi tiëtera.

⁶ Ndahei che opocuai 'tomenda yuvireco' viya pẽu. ⁷ Che rumo aipota che nungar pe mendaëhi água viña. Tüpa rumo ombou yande yacatu yande recorã.

⁸ Iyavei ndomenda vîtei vahe upe, cuña imer mano vahecuer upe avei amombehu pota mbahe: iyacatu revo ndape-mendai peico che nungar. ⁹ Ndapeicatuise rumo pe ñemosa água, pemendaño. Esepia, aviyé catu itera pemenda poropota rai rãgürer sui.

¹⁰ Che rumo amombehu omenda vahe upe 'topoi eme cuña omer sui' viya. Ndahei cheyesui têi aipo ahe. Ahe rumo yande Yar porocuaita ité. ¹¹ Acoi opoise cuña omer sui, tomenda iri eme, anise toyevi iri omer upe. Iyavei cuimbahe omenda vahe, topoi eme avei güembireco sui.

¹² Ambuae ava opacatu upe rumo cheyesui eté aipo ahe. Esepia, ndipoi eté yande Yar ñehe sesendar: acoi Jesús reroyasar virecose güembireco ndahei vahe Jesús reroyasar, ahe cuña secoi potaño itese sese, evocoiyase ahe topoi eme ité güembireco sui. ¹³ Iyavei acoi cuña Jesús reroyasar, virecose omer ndahei vahe Jesús reroyasar, ahe cuimbahe secoi potaño itese sese, evocoiyase ahe cuña topoi eme ité ichui. ¹⁴ Esepia, co cuña Jesús reroyasar virecose omer ndahei vahe Jesús reroyasar, ndahei eté angaipa yuvireco Tüpa rovaque. Ëgüe ehi aveira cuimbahe Jesús reroyasar virecose güembireco Jesús reroyasarëhi. Ëgüe ndehise rumo, tahir avei ndoyavii chira ndahei vahe Jesús reroyasar rahir yuvireco viña. Ahe tahir rumo Tüpa upendar yuvirecoira. ¹⁵⁻¹⁶ Sese pe, pemenda vahe ndahei vahe Jesús reroyasar rese, pepoi eme catu ichui; aviyeteramo pe recocuer sui pe mer oñepisirora. Iyavei pe cuimbahe, aviyeteramo pe recocuer sui avei pe rembireco oñepisirora. Acoi cuña ndahei vahe Jesús reroyasar opoi potase omer Jesús reroyasar sui, topoño ichui. Iyavei cuimbahe ndahei vahe Jesús reroyasar opoi potase güembireco Jesús reroyasar sui, topoño avei ichui. Esepia, Tüpa oipota mbahe tupri pipe yande reco água.

¹⁷ Co rumo mbahe: peicoveño yipindar pẽu Tüpa ombou vahe rese seroyaëhi vitesendar pipe. Ahe aporocuai opacatu

Cristo upendar ñemonuhasa rupi yepi. ¹⁸ Acoi Tūpa osenoise ava judío oyeupe nara, ahe judioño ité secoira. Acoi osenoise rumo, ndahei vahe judío, ahe ndoyembocircuncida ucai chira judío güeco água. ¹⁹ Esepia, ndahei chira que judío, anise que ndahei vahe judío yaicose avíye catura yaico. Co rumo Tūpa oipota catu, "Tomboaviye opacatu che porocuaita amondo vahe chupe yuvireco" ehi yandeu. ²⁰ Sese peicoveño peyacatu pe recocuer pēu Tūpa ombou vahe rese pe renoiēhi viteseve. ²¹ Pe mbiguai tēi peico vahe pe renoise Tūpa, pepihañemoñeta eteprí eme evocoiya pe recosa sui pesē vaherā rese. Peicatuse rumo, peyepepiño itera ichui. ²² Esepia, yepe pe mbiguai tēi peico viña, peroyase rumo yande Yar, ahese inungar ndahe iri vahe mbiguai peico chupe. Iyavei pe no, ndahei vahe mbiguai tēi peico vahe, yepe égüe peye viña, peroyase rumo Cristo, ahese sembiguai peico. ²³ Tūpa upe rumo perepí iteanga, sese ndiyai eté ambuae ava povrīve tēi peico. ²⁴ Sese, che rivireta, peicoveño itera pe recocuer pipe inungar yipindar Tūpa pe renoise.

²⁵ Cuñataj ndomendā vitéi vahe resendar rese rumo ndarecoi Yar suindar che ñehe água. Che rumo amondora che piñañemoñetasa yuvireco chupe. Esepia, yande Yar che paraisuerecosa pipe imboyeroyapri aico. ²⁶ Cheu avíye catuño ité ndomendai vahe égüe ehiño tēise yuvireco viña. Esepia niha, tecocuer yavaí eteanga cüritei. ²⁷ Acoi pemendase, pepoi eme ité oyesui. Acoi ndapemendaise, ndapeseca iri chietera peyeupe. ²⁸ Pemendase rumo, ndahei angaipa iyavei cuñatai omendase, ndoyapoi avei angaipa. Acoi omenda vahe upe rumo yavai catura co ivi pipe yuvireco chupe. Sese che ndaipotai evocoi nungar mbahe pipe yuvireco vaherā.

²⁹ Che rivireta, aipo mbahe amombehu pota pēu: ndipucuei co ari naporai vahe yepota água yandeu. Sese co pipe suive tuprī omenda vahe toyuvirecoi ndomendai vahe nungar yande Yar rese opihañemoñetasa pipe. ³⁰ Acoi ndovihai vahe, toyuvirecoi eme oviharehisa pipe iyavei acoi oviharete vahe, ahe toyuvirecoi eme avei oviharetesa pipe, iyavei virocua vahe mbahe omahera, toyuvirecoi inungar mbahe ndovirocuai vahe omahera viña yande Yar rese opihañemoñetasa pipe. ³¹ Acoi ava ipihañemoñeta catu vahe co ivi pipendar mbahe poru água, tipihañemoñeta eme evocoi nungar mbahe tēi rese yuvireco. Esepia, co ivi pipendar mbahe yaselia vahe, ocañi tēira.

³² Che ndaipotai co ivi pipendar recocuer rese tēi pe pihañemoñeta eteprí peico. Acoi mbia ndomendai vahe rumo, ipihañemoñeta catuño ité yande Yar rese imboviha água; ³³ omenda vahe rumo ipihañemoñeta avei co ivi pipendar

recocuer rese tēi, güembireco mboviha ãgua rese avei. ³⁴ Evocoiyase ndahei ñepei opihañemoñetasa vireco. Ëgüe ehi avei cuña opihañemoñeta rereco; cuña ndomendai vahe, ipihañemoñeta yande Yar upendar mbahe rese, güetecuer iyavei oespíritu rereco tupri ãgua Tūpa upe. Cuña omenda vahe rumo ipihañemoñeta co ivi pipendar recocuer rese tēi omer mboviha ãgua oico.

³⁵ Che aipo ahe pēu 'mbahe tupri pipe toyuvirecoi' viya, ndahei mbahe yavai vahe pipe pe reco ãgua. Che aipota ité pe reco catuprisa pipe yande Yar upeño ité mbahe peyapo vaherā pe recoeté pipe peico.

³⁶ Acoi ava ipihañemoñeta vahe güembirecoví rese omenda ãgua, "Aviyeteramo ayavíra mbahe ichui iyavei niha osupiti ité imenda ãgua, sese aviye catu yamenda" ehise, toyapoño güemimbotar. Tomendaño ité güembirecoví rese. Esepia, mendasa niha ndahei angaipa. ³⁷ Acoi mbia rumo ndovirecoise que ocuaita omenda ãgua iyavei oicatu ité güemimbotar apo, ipihañemoñetase ñepei reseve güembirecoví rese omendaëhi ãgua, ahe aviyeño ité. ³⁸ Evocoiyase acoi omenda vahe aviyeño; acoi ndomendai vahe rumo, aviye catuño ité.

³⁹ Iyavei acoi cuña omenda vahe, ahe ndiyai eté iyepepi ãgua omer sui imanoëhi viteseve. Omanose rumo ichui, ahese ramo ahe cuña upe aviyeño imenda iri ãgua güemimbotar rupi. Yande Yar reroyasar rese avei rumo omendara. ⁴⁰ Ndomenda irise rumo, aviye catuño itera. Ahe che pihañemoñetasa, iyavei revo ahe che pihañemoñetasa Tūpa Espíritu suindar.

8

Pablo oñeho tembihu mbahe rahanga upe tēi seropovëhepri rese

¹ Cûritei ambuae mbahe amombehura pēu mbahe rahanga upe mbahe mimba yucapri seropovëhepri rese. Supi eté aipo ehi vahe: "Yande opacatu yareco yande mbahecuada" ehi. ¡Yande rumo, "Aicua tupri opacatu mbahe" yande hesa pipe yayeecomboivate ai tēi! Yayeaisuse rumo, ahese yañepitivii catu Cristo reroya tupri ãgua. ² Supi eté yande, "Che aicua ité co mbahe" yahe tēise que mbahe upe, ipane vite ité rumo icua tupri ãgua yandeu. ³ Yande rumo yasaisuse Tūpa, ahese Tūpa, "Co ava cheundar ité secoi" ehira yandeu.

⁴ Evocoiyase co mbahe rahanga upe tēi seropovëhepri mbahe mimba yucapri hu ãgua rese añahe. Yande niha yaicua co mbahe rahanga ëgüe ehi tēi vahe co ivi pipe, iyavei oime ñepei güeraño ité Tūpa. ⁵ Esepia, yepe ava upe setá tūpa ivave, ivive avei viña (setá iteanga niha oime tūpa angahu tēi, yar angahu tēi avei). ⁶ Yande rumo yaicua ñepeño ité Tūpa

oime, ahe niha yande Ru opacatu mbahe aposar. ¡Evocoiyase yande chupe nara ité yaico! Oime avei yande Yar ñepei vahe, ahe Jesucristo. Ahe ichui oime opacatu mbahe, ichui avei yaicove.

⁷ Ndahei rumo opacatu oicua aipo mbahe yuvireco. Amove Jesús reroyasar yipindar güecocuer vireco vahe sui ndasesarai viteño yuvireco; imahenduhaño vite mbahe rahanga rese oyeroya agüer rese yuvireco. Esepia, yuvirohuse mbahe roho seropovëhepri, ipihañemoñeta, “Co mbahe roho tupa rahanga upe seropovëhepri” ehi viteño yuvireco oyeupe. Ipipe sui omomara uca Tupa rese opihañemoñetasa yuvireco. ⁸ Supi eté tembihu ndayande pítivi Tupa rese yaico vaherä. Ndahei mbahe roho husa pipe sui tēi aviyete catura yaico iyavei ndayahuise, ndahei chira mbahe tēi catu yaico. ⁹ Pēu niha aviyeteño pehu viña; peicua catura rumo, aviyeteramo que Jesús reroyasar ndoicatu tupri vitei vahe pemboangaipa ucara. ¹⁰ Esepia, pe co mbahe peicua vahe, pehuse co tembihu mbahe rahanga upendar carusave ahe Jesús reroyasar rembiepiave, aviyeteramo pemonguerëhi aveira ihu uca água chupe. ¹¹ Evocoiyase co pe mbahecuasa pipe pemocañi uca yande rivri Tupa rese noviracua tupri vitei vahe peico. ¡Cristo rumo omano ipisiro água! ¹² Esepia, pemomarase Tupa rese ipihañemoñetasa, ahese pe ae peyemboangaipa uca Cristo amotarëhisa pipe peico. ¹³ Sese yande mbahe roho husa pipe sui yamboangaipa ucase yande rivri viña, ndayahu iri chietera evocoi mbahe roho yande rivri mboangaipa ucaëhi água.

9

Apóstol Pablo ndoporandu potai oyeupe nara apóstol upendar mbahe rese ava upe

¹ Supi eté che aicatu avei apóstol upendar mbahe pisi água viña. Esepia, che apóstol aico. Supi eté che asepia yande Yar Jesús iyavei che poraviquisa pipe sui niha peroya yande Yar peico. ² Yepe, “Pablo ndahei apóstol” ehi ambuae ava yuvireco cheu viña, pe rumo, “Ahe co secoi” peye voiño itera cheu. Esepia, che remimombehu pipe sui niha yande Yar peroya peico. Ipipe sui avei icuasa tupri apóstol che recosa pēu.

³ Ahe ñehesa amboyevi tupri ava che recoña potasar upe yuvireco yepi. ⁴ Iya ité che remihura pisi, che iguarä avei pe sui viña. ⁵ Iyavei inungar ambuae apóstol viraso ité güembireco oyeipi yuvireco yepi, Jesús rivireta avei ëgue ehi yuvireco, ëgue ehi avei Pedro, ëgue ahe aveira niha che viña. ⁶ ¿Ore güeraño tie Bernabé rese oroporaviquira ambuae mbahe rese ore recove água? ⁷ Esepia, sundao nomboepii sundao güeco

água, ahe rumo oporavíquisa reprí oipisiño. Iyavei ava uva tísar, ahe avei yaviyese, ohu güemitigüer. Iyavei ovesa rārosar, ahe avei omohe ovesa cambi ígua. ⁸ Che ndahei cheyesui tēi aipo ahe pēu. Esepiá niha, Moisés porocuaita pipe avei aipo ehi yandeu: ⁹ “Pemondo eme tivi yuru rese mbahe icaruéhisa mbahe rāhii oicambese yuvireco pēu” ehi. Supi eté co Tūpa aipo ehi vahe ndahei tivi upeño. ¹⁰ Yande reco tupri áqua rese niha aipo ehi yandeu. Esepiá, acoi ava omonguhi vahe ivi iyavei acoi oicambe vahe mbahe rāhii, oyoya osāro mbahe oipisi vaherā oporavíquisa sui oyeupe nara yuvireco yepi. ¹¹ Evocoiyase ore avei oroñoti Tūpa Ñehengagüer pe piha pipe ore pe mbohese. Sese avíyeño aveira oroipisise mbahe pe sui oreyeupe nara viña. ¹² Esepiá, ambuae oicatu mbahe pisi áqua oyeupe nara yuvireco pe sui. Evocoiyase ore avei niha oroicatu mbahe pisi áqua pe sui ore poravíquisa pipe viña.

Ore rumo ēgue ndorohei eté. Esepiá, ore oroñemosayo ité ‘tiñehe mara eme co ñehesa Cristo resendar rese yuvireco’ ore yapave. ¹³ Pe niha peicua ité acoi oporavíqui vahe judío tūparove, ichui ocaru yuvireco. Esepiá, yuvirohu mbahe roho Tūpa upe seropovéhepri tūparo rocarve yuvireco yepi. ¹⁴ Ēgue ehi avei yande Yar ore cuai ‘toipisi mbahe ipane vahe co ñehesa mombehusa pipe sui yuvireco oyeupe’ oyapave oreu. ¹⁵ Che rumo ndaporandui eté mbahe pe rembiereco rese vichico pēu yepi. Ndahei ‘tombou mbahe yuvireco cheu’ che yapave aipo aicuachía imondo pēu. Che rumo evocoí nungar mbahe rese ayembovihaño ité. ¡Yepe che yucapri tēira tieporéhi viña, ndaporandui chietera rumo mbahe rese pēu! Esepiá, namocañi potai eté co che yembovihasa cheyesui.

¹⁶ Che rumo amombehuse co ñehesa pisirosa resendar ava upe, ndiyai ayeecomboívate ai ipipe. Esepiá niha, che cuaita ité yapo áqua iyavei, ¡cheparaisu itera ndamombehuse ava upe co ñehesa viña! ¹⁷ Tūpa ndache cuaise oñeho mombehu áqua viña, che rumo che queréhisa pipe amombehuse, ahese aipisira Tūpa suindar porerecosa. Ēgue ndahei rumo. Esepiá, Tūpa che cuaisa pipe niha amombehu. ¹⁸ Ndaporanduisse mbahe rese pēu amombehuse co ñehesa pisirosa resendar, ipipe ayemboviha ahe che vihasa porerecosa nungar cheu. Yepe aicatu mbahe rese che porandu áqua viña, che rumo ēgue ndahei eté.

¹⁹ Yepe che ndahei ava povrīve tēi aico viña, che rumo che remimbotar rupi opacatu ava rembiguai nungar ayeereco ‘tasetá catu ava iqueréhi vahe Cristo reroya áqua’ che yapave. ²⁰ Esepiá, aicose judío pāhuve, secocuer rupi aicoveño Yar upe imongueréhi catu áqua yuvireco. Ēgue ahe ité, aicose ava Moisés porocuaita povrīve yuvirecoi vahe pāhuve, che

avei eté mborocuaitavrīve nungar aico. Ndahei rumo Moisés porocuaita povrīve ité aico imboaviye ãgua. ²¹ Iyavei ava ndoyuvirecoi vahe Moisés porocuaita povrīve, ipāhuve aicose, inungar ahe yuvirecoi, ēgue ahe tupri avei imonguerēhi ãgua yande Yar upe vichico. Ndahei rumo Tūpa porocuaita mboyeroyaēhisa pipe aico. Esepio, Cristo porocuaitavrīve che recocuer. ²² Iyavei no, aicose ava yande Yar ndoviroya tupri vitei vahe pāhuve, secocuer nungar tupri avei aico Yar upe imonguerēhi catu ãgua. Ēgue ahe opacatu ava upe ‘toñepisiro catu ahe avei yuvireco’ viya. ²³ Che ayapo co opacatu mbahe ‘tasetu catu co ñehesa písirosa reroyasar yuvireco’ che hesa pipe, ‘taipisi avei co porovasasa oime vahe co ñehesa reroyasa pipe’ che yapave avei.

²⁴ Peicua niha guayisa oimese, ava opacatu guasu yuvinoñase yuvireco, ivava catu vahe güeraño rumo oipisi porerecosa yepi. Evocoiyase inungar co ivava catu vahe, ēgue peye avei pe recocuer pipe Tūpa porerecosa pisi ãgua peico. ²⁵ Iyavei opacatu oyemoingatu vahe oguayi ãgua oñearo tupri opacatu mbahe tēi sui oyemomaraēhi ãgua yuvireco. Ahe ēgue ehi porerecosa ndipocopii vahe pisi ãgua tēi yuvireco. Yande rumo yayemomborarara porerecosa apirēhi vahe pisi ãgua yaico. ²⁶ Evocoiyase che avei, ndahei ava oyahuva-huva tēi vahe nungar aico Tūpa remimbotar apo ãgua iyavei che ndaicoi ava iguayi tēi vahe nungar. ²⁷ Che rumo mbiguai nungar che retecuer areco, amboyeroya uca pihañemoñeta tuprisa upe. Esepio, ndaiptai ambuae ava mbohe pare imombopri tēi nungar guayisa sui che yereco ãgua.

10

Ndiyai aracahendar ava recocuerai rupi yaguata

¹ Che rivireta, che aipota pe judío peico vahe peyemom-ahenduha vitera aracahe yande ramoi guatasa rupi mbahe pítu Tūpa imboguata agüer rese. Iyavei para guasu Píra vahe avei osasa opacatu yuvireco aracahe. ² Ēgue ehi eté opacatu oguatase mbahe pítvurí rupi iyavei para guasu osasase yuvireco, ndoyavíi ñapiramombri yuvirecoi Moisés recocuer rupi oguata ãgua aracahe. ³ Iyavei oyoya guasu yuvirohu tembihu Tūpa ombou vahe chupe nara yuvireco, ⁴ opacatu guasu avei oihu ita sui Tūpa ombou vahe ihiguarã yuvireco. Ahe ita rumo inungar Cristo secoi opacatu iguatasa rupi yuvireco. ⁵ Yepe ēgue ehi Tūpa opacatu yande ramoi judío upe viña, setá iteanga rumo ava ipāhu pendar ndahei aviyé vahe ipiha rupi yuvireco. Ipipe sui opa omano ivi iporupirēhisa rupi aracahe.

⁶ Co opacatu mbahe sembiapogüer yuvireco ahe yande mbohe ãgua ‘toipota rai eme mbahe-mbahe tēi inungar ahe ava yuvireco’ oyapave yandeu. ⁷ Sese yande ndayam-boetei chira mbahe rahanga tēi, inungar ahe ipāhu pendar yuvireco aracahe. Aipo ehi eté niha icuachiapri araca-hendar pipe: “Co ava ocaru vahe, yuviroihu avei yuvinoi. Ichui yuviroopūha, oyembovihaño pieta apo yuvireco” ehi. ⁸ Ndayayemboaguasa-guasa tēi chiaveira inungar ahe amove ëgue ehi yuvireco. Ipipe sui tēi ñepei ari pipe ahe opa omano veintitrés mil tupri yuvireco aracahe. ⁹ Ndayasecoäha-äha tēi chiaveira yande Yar, inungar ahe yuvireco. Ipipe sui oyeyu-capu uca mboi osuhusa pipe yuvireco. ¹⁰ Iyavei ndayande ñehe mara-mara tēi chira yande Aposar rese, inungar ahe ëgue ehi yuvireco. Ipipe sui Tūpa ombou güembiguai ava yucasar ïva sui ahe ava yucapa ãgua aracahe.

¹¹ Co opacatu yande ramoi upe mbahe oime vahe arac-ahe icuachiapri yande ipa yaico vahe upe nara: “¡Peicu catu aipo nungar mbahe sui!” he ãgua yandeu. ¹² Sese yande “che aico tupri ité Tūpa rese” yahe vahe, yaicua catura rumo. Aviyeteramo yaviapira mbahe tēi pipe. ¹³ Pe recoähasa rumo oyoya tupri ité ambuae ava recoähasa rese. Pe rumo peyeroyaño itera Tūpa rese, ahe niha oicua pe yemoviracuasa, noñocuai chira tecoähasa imbou pēu. Acoi mbahe tēi oimese pe recoähase, Tūpa ombou voiñora píratasa evocoí mbahe tēi sui pe sē ãgua, chupe pe ñemosa ãgua.

¹⁴ Sese che rivireta, che rembiaisu, peyepepi mbahe rahanga mboeteisa sui. ¹⁵ Ava niha peico pesenducua vaherā mbahe, evocoiyase peporandu co che remimombehugüer rese peyeupe icua tupri ãgua. ¹⁶ Yahuse uva ricuer sovasapri, “Aviye ndeu, che Yar” yande hesa pipe, ahese oyoya guasu Cristo rese yaico suví pipe sui. Yahuse co pan imboyaho-yahopri, ahese oyoya guasu yaipisi Cristo retecuer yandeye-upe nara. ¹⁷ Yepe yande reta yaico viña, opacatu rumo yahu ñepei pan sui. Sese yande ñepei vahe ité yaico.

¹⁸ Peyapisaca acoi ava aracahendar Israel recocuer rese. Esepia, acoi yuvirohu vahe Tūpa upendar mbahe seropovëhepri, ahe evocoiyase chupendar ité yuvirecoi. ¹⁹ Che rumo, “Mbahe rahanga aviye vahe ité” ndahei, iyavei, “Mbahe roho icuavëhepri mbahe rahanga upe, aviye catu ité” ndahei avei. ²⁰ Co rumo, acoi ava ndoicuau vahe Tūpa oicuavëhe mbahe caruguar upe tēi yuvireco yepi. Ndahei rumo Tūpa upe nara ité ëgue ehi yuvireco. Che evocoiyase ndaipotai eté caruguar upe nara tēi ëgue peye vaherā peico. ²¹ Peihuse rumo yande Yar upendar ïgua, ndiyai peihu avei

caruguar upendar īgua; iyavei pehuse yande Yar upendar mbahe, ndiyai avei pehu caruguar upendar mbahe.

²² ¿Yasecara pīha yande ae yande Yar ñemoiro āgua yandeyeupe? ¡Yande rumo ndahei chira ipīrata catu vahe yaico ichui!

Yande renosesa mbiguai tēi nungar yande recosa sui mbahe tupri apo āgua

²³ Amove ava, “Aviyeño opacatu mbahe yayapo yande remimbotar rupi” ehi yuvireco viña. Ēgue ehi eté niha, ndahei rumo opacatu aviye, ndahei avei co opacatu mbahe yande pītīvii catu Cristo rese yande reco āgua. ²⁴ Ndapesecai chira que mbahe aviye vahe peyeupe nara tēi, pesecara rumo ambuae ava upe nara.

²⁵ Pehuño mbahe tembihu opacatu mbahe mboepisa rupi sui perocua vahe. Ndapeporandui chira rumo sese Tūpa rese pe pihañemoñetasa momaraēhi āgua. ²⁶ Esepia, ivi opacatu ipor reseve, ahe yande Yar upendar.

²⁷ Acoi Tūpa reroyasarēhi pe soho ucase oyepiri pe mbo-caru āgua, peso potase ipiri, pehuñora mbahe imboupri pēu. Ndapeporandui chira rumo sese chupe Tūpa rese pe pihañemoñetasa momaraēhi āgua. ²⁸ Acoi ava, “Co mbahe roho icuavēhepri mbahe rahanga upe” ehise pēu, ndapehui chira ahe mbahe roho. Ēgue peyera pēu imombehusar rereco meguaēhi āgua, ava pihañemoñetasa momaraēhi āgua avei. ²⁹ Supi eté che añahe co ambuae ava pihañemoñetasa rese, ndahei pe pihañemoñetasa rese.

Oimera rumo oporandu vahe sese “¿mahera aipo ndiyai chira cheu mbahe apo, ndaheise ambuae ava piha rupi?” ehi vahe. ³⁰ Iyavei aipo ehira no: “‘Aviye ndeu’ ahese Tūpa upe mbahe ahu vahe rese, ¿mahera pīha che reroīrora yuvireco ahuse viña?” ehira. ³¹ Iyacatu rumo pehuse que mbahe, peihuse avei, anise que mbahe peyapose, peyapo ru opacatu Tūpa mboeteisa pipe. ³² Supi eté ndapemboyecuai chira pe recocuerai, que judío upe, que ndahei vahe judío yuvirecoi vahe upe, anise que Jesús reroyasar yuvirecoi vahe upe avei. ³³ Che opacatu che rembiapo pipe aipota ité mbahe tupri apo āgua opacatu ava upe nara. Ndahei cheyeupeño mbahe tupri aseca, ambuae ava upe avei mbahe tupri aipota iñepisiro āgua yuvireco.

11

¹ Che raquicue moñá catu peye inungar che asaquicue moña Cristo vichico.

Mara ehira cuña Jesús reroyasar ñemonuhasave yuvireco yepi

² Che rívireta, che, “Aviye ité yuvirecoi” ahe pēu yepi che rese pemahenduha vîtese iyavei peguataño vîtese che opombohe vahe agüer rupi. ³ Che rumo aicua uca tupri pota pēu, Cristo niha secoi ñepei-peí cuimbahe cuaisar, cuimbahe evocoiyase güembireco cuaisar secoi. Ëgüe ehi avei Tûpa Guahir Cristo upe. ⁴ Acoi cuimbahe Cristo upe ñemonuhasave oãca ndiru ndosequise oyerure água, anise Tûpa Ñehengagüer mombehu água, ahe ëgüe ehi güerecuar Cristo mboeteiëhisa pipe. ⁵ Iyavei acoi cuña ndoyopiise oãca oyeroqui água, anise Tûpa Ñehengagüer mombehu água, ahe ëgüe ehi omer mboyeroyaëhisa pipe. Ahe cuña evocoiyase ndoyavíi oñea pipa tupri vahe. ⁶ Acoi cuña ndoyopi potaise oãca, tayapecâraisa tupri. Ochise rumo oapecârai água, evocoiyase toyopíño oãca sereco. ⁷ Cuimbahe rumo ndoyopi chira oãca sereco. Esepia, ahe Tûpa rahanga ité secoi iyavei iporañetesa omboyecua ité oyese. Cuña rumo omboyecua omer recocuer oyese yuvireco. ⁸ Esepia, Tûpa oyapose cuimbahe, ndahei cuña sui vînose, cuimbahe sui niha cuña oyapo. ⁹ Iyavei ndahei cuña upe nara Tûpa oyapo cuimbahe, ahe rumo oyapo cuña cuimbahe upe nara. ¹⁰ Co rese cuña virecora oãcapisa omer mboyeroyasa mboyecua água omahese Tûpa rembiguai eta yuvireco sese. ¹¹ Yande, yande Yar reroyasar yaico vahe co tecocuer rese, yañepitivii oyoya yaico. Evocoiyase cuimbahe ndoicatui cuña porëhi; cuña avei ndoicatui cuimbahe porëhi yuvireco. ¹² Esepia, yepe supi eté cuimbahe sui yapoprí cuña. Ipare rumo cuña sui oha cuimbahe; opacatu rumo oyoya Tûpa suindar yuvirecoi.

¹³ Evocoiyase peyapisaca tupri co rese: ¿Iya pîha cuña noñeacapii vahe oyerure Tûpa upe? ¹⁴ Yande ité yaicua yemochisa cuimbahe oyemboha vucuse. ¹⁵ Cuña rumo oviharete oha vucu porañetesa rese. Esepia, chupe imondopri ité ñacapi água. ¹⁶ Acoi ava iñehe-ñehe têi pota vahe co tecocuer rese, toicua ore ndoroicoi ambuae reco pipe. Iyavei opacatu ambuae Jesús reroyasar ëgüe ehi avei yuvireco.

Yande Yar rese yemomahenduha raisa

¹⁷ Co ambuae mbahe rese rumo ndaicatui eté, “Aviye tupri yuvirecoi” che he água pēu. Esepia, aipo pe ñemonuhasave, mbahe têi eté aipo peyapo. ¹⁸ Esepia, yipindar che ayandu peñemonuhapse aipo oyese yande Yar mboetei água pe pîhañemoñetasa ndahoyoyai pipe peico. Amove ayanduse pe rerâcua, aroya ité. ¹⁹ ¡Iya ité revo pîhañemoñetasa ndahoyoyai vahe reime água pe pâhuve Jesús reroyasar supi tupri vahe cua tupri água! ²⁰ Peñemonuhase pe pîhañemoñetasa ndahoyoyai vahe pipe pe caru água, ndahei yande Yar rese

pe yemomahenduhasave ëgue peye. ²¹ Espia, aipo pecaruse, pe rane aipo pepoyava pecaru. Ambuae aipo evocoiyase ndasiepoi tēi yuvireco; ambuae rumo pe pāhu pendar aipo oyembosavaipoño yuvireco. ²² Pereco niha pe rēta aheve pe caru ãgua iyavei pe ihu ãgua. Pe rumo pe reco pīpe opa peroíro ambuae Jesús reroyasareta peico. Ipīpe avei pemochi ava ndovirecoi vahe mbahe. ¡Che evocoiyase, “Aviye yuvireco” ndahei chietera co mbahe pe rembiapo ai rese pēu!

Yande Yar rese yemomahenduhasa supi ité vahe resendar

²³ Co ñehesa aipisi vahe yande Yar suindar amombehu vahe pēu: ahe pītu pīpe acoi Jesús mboguaisar opisi ãgua renonde, ahe oipisi pan. ²⁴ “Aviye ndeu” ohe pare Vu upe, ombohimbohi, ahese aipo ehi güemimbohe eta upe: “Co che rete amondo vahe manosave mbahe tupri pe reco ãgua. Ëgue peyera che rese pe mahenduhasa pīpe peico” ehi. ²⁵ Ëgue ehi avei ocarure yuvireco, ahe oipisi igua riru aipo ehi: “Co uva ricuer omboyecua pēu Tūpa oyapora mbahe ipiasu vahe pe recorā. Che ruví pīpe rumo yaposara. Evocoiyase co ari pīpe suive peihuse co, peyemomahenduhara che rese yepi” ehi. ²⁶ Esepia, acoi pehuse co, peihuse avei, peyemomahenduhara, pemombehu aveira yande Yar mano agüer opacatu ava upe peico. Ëgue peyera iyevi rāro peico.

Mara yahera yande Yar rese yayemomahenduhase

²⁷ Evocoiyase acoi ava ocaruño tēi vahe, yuviroihuño tēi vahe avei Yar mboeteiñhisave, ahe evocoiyase nomboetei yuvireco yande Yar rembiapocuer omondose güetecuer, iyavei oipiyerese vuví. ²⁸ Sese tipihañemoñeta rane oyacatu güecocuer rese ava co pan hu ãgua renonde, oihu ãgua renonde avei co uva ricuer yuvireco. ²⁹ Esepia, acoi pe yemomahenduhäñhisave co setecuer rese pehuse iyavei peihuse, ahese mbahe naporai vahe peseca peyeupe nara peico. ³⁰ Ichui niha setá pombaheasi, oime setá nimirata iri vahe avei pe pāhuve, oime avei omano vahe pe pāhu pendar. ³¹ Yande pihañemoñeta tuprise rumo yande reco ãgua rese, yande Yar evocoiyase nomoimei chira mbahe tēi yandeu evocoiya yande recosa pīpe. ³² Yande Yar rumo oicua yande rembiapo ai. Sese omoime mbahe tēi yandeu. Yande reco mohivi tupri ãgua rumo ëgue ehi yandeu, ndahei yande cañi ãgua opacatu ava viroyasaréhi reseve.

³³ Sese, che riñireta, acoi peñemonuhase pe yemomahenduhá ãgua yande Yar rese, peñearo ranera oyoya guasu pe caru ãgua. ³⁴ Acoi ava ndasiepoise yuvireco, tocaru rane güetave. Ahese yuvirasose ñemonuhasave, ndipoi chira mbahe

chupe. Iyavei che asose eipeve pe repia, opara ambuae mbahe amoingatu vicho pēu.

12

Mbahecusa Tūpa Espíritu suindar

¹ Che rīvireta, che aicua uca pota pēu co mbahecusa resendar ñepei-peí pēu Espíritu omondo vahe.

² Pe niha cūritei peicua tuprī ité yipindar Tūpa rese peicoëhi vitese, peyembopa uca mbahe rahanga ēgue ehi tēi, noñehei vahe upe peico. ³ Sese, che aipota peicua acoi ava iñehe mara Jesús upe ndahei Tūpa Espíritu pīratasa pipe ēgue ehi. Iyavei ava ndoicatui chira, “¡Jesús che Yar secoi!” ohe ãqua opiha pipe Espíritu Santo ndovirecoise.

⁴ Oime setá ambuae-ae tēi mbahecusa Espíritu suindar yande Jesús reroyasar yaico vahe upe nara, ahe Espíritu rumo ñepeiño ité imondosar secoi. ⁵ Setá mbahe avei oime mbahe yayapo vaherā yande Yar upe. Ahe yande Yar rumo ñepeiño ité secoi. ⁶ Iyavei setá oime ambuae mbahe Tūpa oyapo vahe yande rese opīratasa pipe, Tūpa rumo ñepeiño ité secoi. Ahe oyapo opacatu co mbahe ñepei-peí yande rese. ⁷ Ahe omboyecua yande Espíritu rerecosa ñepei-peí yandeu opacatu yande reco tuprī ãqua. ⁸ Espíritu pīratasa pipe Tūpa omondo ñepei viroyasar upe iñehe ãqua aracuasa rese iyavei ambuae upe omondo iporombohe tuprī catu ãqua ombahecusa pipe. ⁹ Ambuae upe evocoiyase omondo oyese yeroya tuprī catu ãqua oEspíritu pipe sui avei. Iyavei ambuae upe omondo opīratasa imbaheasi vahe mbogüera ãqua. ¹⁰ Ambuae oipisi pīratasa mbahe poromondiisa oyapo vaherā yuvireco. Ahe ichui avei vireco ambuae ava omombehu vaherā ñehesa Tūpa suindar yuvireco. Ambuae upe Tūpa omondo mbahecusa espíritu naporai vahe iyavei Espíritu supi tuprī vahe cua tuprī ãqua. Ambuae evocoiyase ichui avei oicatu ñehesa ndicuasai vahe Tūpa suindar pipe oñehe ãqua. Ahe ichui avei ambuae oicatu ahe ñehesa ndicuasai vahe mombehu tuprī ãqua ava upe. ¹¹ Ëgue ehi Espíritu ñepeiño ité güemimbotar rupi omondo ñepei-peí yande Jesús reroyasar yaico vahe upe co mbahecusa.

Opacatu Cristo rese yaico vahe ñepeiño ité yande recocuer

¹² Inungar yande retecuer resendar setá mbahe oime viña, ahe rumo ñepeiño ité; ēgue ehi avei Cristo. ¹³ Ëgue yahe avei opacatu, yepe yande pāhuve oime: judío, ndahei vahe judío, mbiguai, ndahei vahe avei mbiguai, yande rumo opacatu ñapiramombri yaico ñepei vahe nungar yande reco ãqua Espíritu ñepei vahe pipe. Ahe ñepei Espíritu avei opa yaipisi.

¹⁴ Supi eté yande rete resendar ndahei ñepei mbahe, setá rumo mbahe. ¹⁵ Iyavei yepe que yande pi revo aipo ehira yandeu viña: “Che ndahei nde po aico, sese ndahei nde rete resendar” ehira viña; ndahei chira rumo ichui tēi ndaseco iri chira yande rete rese. ¹⁶ Iyavei yepe que yande nambi aipo ehira viña: “Che ndahei nde resa aico, sese ndahei nde rete resendar” ehira yandeu viña. ¡Ndahei chiaveira ichui tēi ndaseco iri chira yande rete rese! ¹⁷ Esepia, opacatu tupri yande rete sesa pāve tēise, ndayasendui chietera evocoiyase mbahe viña. Anise, yande rete yapisacuar pāve tēise, ndayasētui chietera evocoiyase mbahe viña. ¹⁸ Tūpa rumo ñepei-pei yande rese mbahe omondo senara rupi tupri güemimbotar rupi. ¹⁹ Yande opacatu ñepei ava rete resendar nungar pāve tēise, ndahei evocoiyase opacatu tupri ava rete nungar yaico. ²⁰ Supi eté yepe setá mbahe yande rete rese, ñepeiño ité rumo yande rete.

²¹ Iyavei que yande resa ndiyai aipo ehira yande po upe: “¡Nde ñgue ere tēi vahe eico!”; anise que yande ãca avei, “¡Nde ñgue ere tēi vahe eico!” ndehi chira yande pi upe. ²² Esepia, yande rete resendar mbahe avíye nimiratai vahe yandeu, ahe sese rumo yayeroya catu. ²³ Iyavei yande rete rese mbahe ndayasaísu tuprii vahe, ahe rumo yamboyemonde tupri ai sereco. Iyavei no yande rete resendar mbahe ndayamboye-cuai vahe ava rembiepiave, ahe yayopi tupri sereco. ²⁴ Oime rumo ambuae yande rete resendar ndayayopii vaherā. Ñgue ehi Tūpa yande rete resendar mbahe imoingatu tupri. Evocoiyase yande rete resendar mbahe ndayasaísu tuprii vahe imboeteipri catu secoi. ²⁵ Tipo eme pihañemoñetaso ndoyoyai vahe pe pāhuve. Oyoya pehañeco tupri ñepei-pei peyese peico. ²⁶ Evocoiyase que ñepei yande pāhu pendar upe mbahe tasise, opacatu ambuae upe avei tasi; anise que ñepei imboyeroyapri secoise, ambuae avei opacatu oyemboviha yuvireco sese.

²⁷ Supi eté pe inungar Cristo rete peico. Ñgue peye ité ñepei-pei chupendar ité peico. ²⁸ Ñgue ehi Tūpa iporavo viroyasar pāhuve, “Toime rane yipindar apóstol; ipare toime ava che ñehengagüer mombehu água, ichui ambuae upe iporombohe água, ipare ambuae mbahe ndayasepiae vahe apo água, iyavei ambuae ava imbaheasi vahe mbogüera água, ambuae ava pítiviisar tasecoi, ambuae ava recocuer reroguata tupri água tasecoi, ambuae ava evocoiyase toñehe ñehesa ndicuasai vahe pi” ehi. ²⁹ Ndahei rumo opacatu ava apóstol yuvirecoi, iyavei ndahei opacatu Tūpa ñehe mombehusr yuvirecoi, ndahei opacatu oporombohe yuvireco, ndaopacatui avei oyapo mbahe ndayasepiae vahe yuvireco, ³⁰ ndahei opacatu vireco píratasa oporombogüera água yuvireco, iyavei ndahei opacatu ndicuasai vahe ñehesa Espíritu suindar pi oñehe

yuvireco, ndaopacatui avei oicua evocoī ñehesa renducua uca ãgua ambuae ava upe yuvireco. ³¹ Peseca ru Espíritu suindar mbahecuada aviye catu vahe peyeupe nara.

*Yembohesa yande poroaisu ãgua resendar
Che rumo amombehura tecocuer aviye catu vahe pēu.*

13

¹ Yepe yande yañeheño tēise ambuae ava ñehe ndayaicuai vahe pipe, iyavei Tūpa rembiguai ñehe pipe avei viña, ndayasaísuse rumo ava ipipe, yande evocoiyase ëgue yahe tupri tēi inungar mbahe guarepochi apopri siapu iteanga vahe, iyavei inungar acoi platillo siapú rai tēi vahe, ëgue yahe tēi yaico. ² Iyavei yepe yamombehuño tēise Tūpa suindar ñehesa ou vahe yandeu viña, iyavei yepe yaicuase mbahe opacatu icuapirēhi Tūpa suindar yaico, yarecose avei yande aracuasa opacatu yandeyese, iyavei yepe yande Tūpa rese yeroya pipe yarosirira ïvitri guasu senda sui viña, ndayasaísuse rumo ava ipipe, yande evocoiyase ëgue yahe tupri tēira yaico. ³ Iyavei yande mbahe opacatu yareco vahe yamboyaho-yaho tupri tēise ava iparaísu vahe upe viña, iyavei yayoapi ucapa tupri tēise viña, ndayasaísuse rumo ava ipipe yaico, ndayande pítivii eté evocoiya yande reco agüer.

⁴ Acoi ava iporoaisu vahe, ahe seco mbegüe tupri, secocuer aviye ai eté iyavei ndoporoamotarēhi ambuae ava mbahe potasave; “Che aviye catu vahe aico” ndehi avei, ndoyecomboivate ai eté, ⁵ ahe ndovirecoi eté oporomboeteiēhisa, ndahei oyeupe güeraño mbahe oipota, niñemoiro serai vahe, ahe rumo iñero voiño ambuae ava upe. ⁶ Ndahei mbahe tēi rese oyemboviha; ahe rumo oyemboviha mbahe supi tupri vahe rese. ⁷ Oporoaisusa virecose oñemosao opacatu uve, oyeroya vite sese, osāro vite mbahe tupri ichui, iyavei seco mbegüe viteño chupe.

⁸ Poroaisusa niha ndopai vahe ité. Oyepotara ari ipapaprī coiye, ahese ndayamombehu iri chira Tūpa suindar ñehesa ou vahe, ndayañehe iri chira ambuae ñehesa ndayaicuai vahe pipe, ndayaiporu iri chiaveira yande mbahecuada. ⁹ Esepia niha, yaicua raimi tēi mbahe iyavei chihī raimi tēi yamombehu Tūpa Ñehengagüer. ¹⁰ Acoi ouse rumo oicuapa tupri vahe mbahe, ahese ndahe iri chira yaicua raimi tēi vahe yaiporura.

¹¹ Esepia niha, chihivahe vite yande recose, yañehe, yandepihañemoñeta, yasenducua mbahe chihivahe nungar; yacuacuase ité rumo cute, yaseyapa chihivahe yande reco agüer. ¹² Cûritei yande ndayasenducua tuprii Tūpa resendar mbahe, inungar acoi yepiasa pipe yasepia hâvomi tēi que

mbahe; oyeovai eté yaicose rumo, yasenducua tupri catu itera mbahe evocoiyase. Cūritei rumo yaicua raimi tēi mbahe Tūpa suindar yaico; coiye rumo yaicua tupri catu itera, inungar ahe oicua tupri ité yande recocuer.

¹³ Co oime mbosapi mbahe ndopai vaherā, ahe: Tūpa rese yande yeroyasa, mbahe yande remiaro ivave oime vahe iyavei yande yeaisusa; co imombosapisa rumo aviyē catú vahe ité ambuae sui yandeu, ahe yeaisusa.

14

Yaseca catura Tūpa suindar ñehesa mombehu ãgua

¹ Peseca catu pe yeaisu tupri ãgua peico; aheseve avei peipotara mbahecuasa Tūpa Espíritu remimbou. Ichuindar ñehesa mombehu ãgua rese catu ité rumo peicora. ² Esepia, acoi ava oñehe vahe ñehesa ndayaicuai vahe pipe, Tūpa upe ité evocoiyase oñehe; ndahei ava upe tēi oñehe. Esepia, ndipoi eté ava iñehe renducuapar. Ahe rumo oñehe mbahe ndicuasai vahe rese oespíritu pipe. ³ Acoi ava omombehu vahe rumo Tūpa suindar ñehesa yasenducua vahe pipe, ahe oipítivii ambuae ava Tūpa rese iyeroya ãgua, oporomongueréhi catu, oporomboviha catu avei. ⁴ Acoi ava oñehe vahe rumo ñehesa ndayaicuai vahe pipe, ahe ae tēi vireco catu Tūpa rese opihañemoñetasa. Acoi ava omombehu vahe rumo Tūpa suindar ñehesa icuapri ité, ahe ombopihañemoñetá catu Tūpa rese Cristo reroyasar yuvirecoi vahe.

⁵ Yepe aipotara opacatu pe ñehe ãgua ñehesa ndayaicuai vahe pipe pēu viña, aviye catu rumo pemombehura Tūpa suindar ñehesa icuapri vahe peico. Esepia, ahe aviye catu ñehesa ndayaicuai vahe sui. Oimese rumo ava ñehesa ndayaicuai vahe renducua uca tupri ãgua, ahese aviyeño oñehe Jesús reroyasar rovaque. Ipipe sui ipihañemoñeta catura Tūpa rese yuvireco. ⁶ Sese, che rivireta, asose pe repia, añehese co ñehesa ndayaicuai vahe pipe pēu, ndapesenducuai chira che ñehe viña. Amombehuse rumo Tūpa oicua uca vahe cheu que mbahecuasa supi tupri vahe resendar, anise que ñehesa Tūpa suindar, anise que ambuae porombohesa, ahese pesenducuara viña.

⁷ Mbahe yande remimombehu rumo inungar acoi mbahe porasei recasar imoñehepri viña, inungar mimbi, arpa avei. Esepia, ndoyoya tupriise iñehegüer yuvireco, ndayasenducuai eté evocoiyase mbahe-mbahe sapucaisa osáha yuvireco. ⁸ Anise co inungar mimbi nomoñehe tupriise vavasave nara yuvireco viña, ndipoi chietera que ava oyemoingatu voi vaherā ovava ãgua viña. ⁹ Ëgüe peye avei niha peico peñehese ava upe ñehesa ndayasenducuai vahe pipe, ahe evocoiyase

osenduño tēi, ndosenducuai eté rumo pe ñehe yuvireco. ¡Evo-coiyase peñeheno tēi eté! ¹⁰ Supi eté, setá iteanga co ivi pipe oime ambuae-ae tēi ava ñehesa. Oime avei rumo ava osenducua vahe aipo nungar ñehesa. ¹¹ Acoi ndayasenducuaise rumo ambuae ava ñehe, yande evocoiyase inungar ambuae tecua pendar tēi yaico vahe chupe; yandeu avei evocoiyase ahe ava inungar ambuae tecua pendar tēi yuvirecoi vahe. ¹² Pe niha peipota ité pereco vaherā mbahecusa Tūpa Espíritu suindar yepi. Sese peporandu catu mbahecusa Espíritu suindar rese opacatu Jesús reroyasar pītvii ãgua Tūpa rese yuvirecoi tupri catu vaherā.

¹³ Sese acoi ava oñehe vahe ñehesa ndayaicuai vahe pipe, toporandu rane Tūpa upe ambuae ava upe senducua uca tupri ãgua rese. ¹⁴ Esepia, acoi yayeroquiño tēise Tūpa upe ñehesa ndayasenducuai vahe pipe, yayeroqui yande espíritu pipe, ndayasenducuai rumo yande yeroqui. ¹⁵ ¿Mara yahera vo evocoiyase? Yayeroquira yande espíritu pipe, yande aracuasa pipe avei. Yasapucaira yande espíritu pipe, yande aracuasa pipe avei no. ¹⁶ Esepia, acoi Tūpa upe, “Aviye ndeu” yahese yande espíritu pipe güeraño, evocoiyase ava ndosenducuai vahe, oyemboyase yande rese iyavei osenduse yande yeroquisa, “Aviye ité” ndehi chietera yuvireco. Esepia niha, ahe ndosenducuai eté yande yeroqui yuvireco. ¹⁷ “Aviye ndeu” yande hesa, aviyeteramo aviyera Tūpa upe viña, ambuae ava rumo osenduse, noipitivii chietera Tūpa rese imbopihañemoñeta catu ãgua senducuaëhi pipe. ¹⁸ “Aviye ndeu” ahe Tūpa upe. Esepia, añehe catu ñehesa ndayaicuai vahe pipe opacatu pe sui. ¹⁹ Jesús reroyasar ñemonuhasave rumo aipota catu amombehu vaherā moviromi tēi ñehesa yasenducua vahe ava mbohe ãgua setá ñehesa ndicuasai vahe pipe che ñehe rägüler sui.

²⁰ Che rivreta, pepihañemoñeta eme chihivahemi pihañemoñeta nungar pipe. Iyacatu rumo peicora cuacua vahe pihañemoñeta nungar pipe. Peyemochihivahue catuñora rumo peico mbahe naporai vahe apoëhi ãgua. ²¹ Porocuaita resendar icuachiapri aracahendar pipe aipo ehi: “Añehera co ava yuvirecoi vahe upe ambuae ava ñehe pipe. Iyavei ava ambuae ivi pendar amoñehe ucara iñehe pipe yuvireco chupe. Ahe rumo ndache mboyeroyai chiño itera yuvireco, ehi yande Yar” ehi aracahe. ²² Evocoiyase co ñehesa ndayaicuai vahe pipe oñehese ava Tūpa pīratasa pipe, ahe Jesús reroyasarëhi yuvirecoi vahe upe nara: “¡Peicua catu, co supi tupri vahe!” he ãgua. Ndahei rumo ava Jesús reroyasar yuvirecoi vahe upendar. Ñehesa Tūpa suindar senducuapri yamombehuse rumo, ahe, “Co supi tupri vahe”

he äqua Jesùs reroyasar yuvirecoi vahe upe; ndahei ava seroyasarëhi yuvirecoi vahe upendar. ²³ Evocoiyase, acoi opacatu pe Jesùs reroyasar pe ñemonuhasave oyoya guasu peñehese ñehesa ndayaicuai vahe pipe tēi, ipare yuviroiquese pe pāhuve Jesùs reroyasarëhi ndosenducuai vahe Tūpa suindar mbahe yuvireco, “¡Opacatu co ndayaracuai vahe tēi yuvireco!” ehira yuvireco pēu. ²⁴ Opacatu rumo peñehese Tūpa suindar ñehesa yasenducua vahe pipe, yuviroiquese evocoii nungar ava yuviraso pe pāhuve, ahe ae evocoiyase, “Supi eté ayavi che recocuer Tūpa rovaque” ehira pe ñehe renduse yuvireco. ²⁵ Ëgüe ehira opihañemoñeta rai ndoyecuai vahe imboporëhipa uca oyeupe pe ñehe rendu ramose yuvireco. Ipipe sui omboeteira Tūpa yuvireco. Ahese, “Supi eté catu Tūpa ité pereco peyese” ehira yuvireco pēu.

Yayapora mbahe opacatu yande cuaita rupi ñemonuhasave

²⁶ Sese che rívireta, peñemonuhase, oime pe pāhu pendar osapucai pota vahe sapucaisa Tūpa upendar, ambuae evocoiyase oipota ité ava mbohe yuvireco, anise ambuae omombehu pota ava upe mbahe oyeupe omboynecua uca vahe Tūpa, ambuae oipota ité oñehe ñehesa ndicuasai vahe pipe, anise ambuae osenducua uca pota avei ambuae ava upe ñehesa ndicuasai vahe. Opacatu rumo co mbahe yayapora ambuae Jesùs reroyasarea seroya catu äqua yuvireco. ²⁷ Acoi ava oñehese ñehesa ndayaicuai vahe pipe, toñehe ñuvirío güeraño yuvireco, anise que mbosapi ñepei-peí rupi; ñepei evocoiyase osenducua ucara iñehe ava upe oico. ²⁸ Acoi ndipoise ité rumo ambuae ava ahe ñehesa ndayaicuai vahe renducua uca äqua, ndiyai ahe oñehera yuvireco pe ñemonuhasave; oyeupeñomi evocoiyase ahe oñehera ipipe yuvireco Tūpa upe. ²⁹ Ëgüe peye tupri aveira pemombehuse Tūpa suindar ñehesa ambuae ava upe, peñehera ñuviriomi, anise mbosapi. Ambuae evocoiyase pe pāhu pendar oyapisaca tuprira sese yuvireco ‘¿supi eté pīha?’ oħesave. ³⁰ Que ñepei oñeha vitese Tūpa oicua ucase mbahe ambuae ava upe, topituhuño yipindar oñeha vahe, ambuae evocoiyase toñehe pēu. ³¹ Evocoiyase ëgüe peyera peñeha ñepei-peí opacatu ambuae osendu vahe mbohe äqua iyavei imonguerëhi catu äqua. ³² Acoi omombehu vahe ñehesa Tūpa suindar, ahe oicatu oñeha mombituhu äqua. ³³⁻³⁴ Esepi, Tūpa secoi mbahe avíye vahe aposar, ndahei ndoyembohe catui vahe.

Ndiyai cuña upe iñehe äqua pe ñemonuhasave. Esepi, ëgüe ehi avei opacatu ambuae Jesùs reroyasar ñemonuhasa rupi yuvireco. Evocoiyase ndiyai eté aheve iñehe äqua yuvireco chupe. Iyacatu rumo ahe imboyeroyapri yuvirecoira omer

upe Tūpa porocuaita rupi. ³⁵ Oicua potase que mbahe, iya omer upe oporandura güëtave yuvireco. Esepio, cuña upe ndiyai eté iporandu äqua mbahe rese pe ñemonuhasave.

³⁶ Peyapisaca catu co ñehesa rese. Ndahei niha pe rane pemombehu Tūpa Ñehengagüer ava upe peico, ndahei avei pēñomi ou Tūpa suindar ñehesa. ³⁷ Acoi que pe pâhuve oimese “che Tūpa Ñehengagüer mombehusar aico” ehiño tēi vahe, anise que “aicua Espíritu suindar mbahe” ehi vahe, iya rumo oicua tupri co aicuachía vahe imondo pēu, ahe yande Yar porocuaita resendar. ³⁸ Ahe ndoyapisaca potaise rumo che ñehe rese, iñehe rese evocoiyase ndapeyapisacai chira.

³⁹ Sese, che rívireta, peyemonguerëhi catu Tūpa suindar ñehesa icuapri vahe mombehu äqua peico. Ndiyai rumo ndapeipotai ambuae ava upe ñehesa ndayaicuai vahe pipe iñehe äqua. ⁴⁰ Peyapora rumo opacatu mbahe ñepei-peí pe cuaita rupi mbahe tupri pipe.

15

Cristo cuerayevi agüer

¹ Che rívireta, che aipota peyemomahenduha acoi ñehesa písirosa resendar pēu mombehu vahecuer rese. Co ñehesa niha peipisi. Ipipe sui avei niha peyemoviracua peyese. ² Seroya pipe niha peñepisiro peico peyemoviracuase sese. Ëgüe ndapeyeise rumo, peroya tupri tēi.

³ Acoi ñehesa aipisi vahe, opa uca aicua pēu. Esepio, ahe aviyé catu vahe: Cristo omano yande angaipa repirä Tūpa Ñehengagüer icuachiapri rupi eté ⁴ iyavei oñoti sehögüer yuvireco. Ipare rumo, imombosapisa ari pipe, ocuerayevi iri icuachiapri rupi eté avei. ⁵ Ichui oyemboyecua Pedro upe. Ipare voi oyemboyecua apóstol yuvirecoi vahe upe. ⁶ Ichui oyemboyecua quiniento sui setá catu vahe viroyasar upe. Evocoiyase oyoya guasu osepio yuvireco. Setá vite rumo sepiasarer yuvirecove vite cûritei; amove rumo ambuae opa omano yuvireco. ⁷ Coiye oyemoporëhi Santiago upe. Ipare opacatu apóstol once yuvirecoi vahe upe.

⁸ Cheu avei ipa ité oyemboyecua cute, aviyé evocoiyase che ipá oha vahe aico seroya äqua. ⁹ Esepio, che seco ivi coti catu vahe opacatu ambuae apóstol sui aico. Iyavei ndacheäroi eté apóstol che reco äqua viña. Esepio, che yipindar seroyasar aseca-seca catu vahe mara-mara tēi sereco äqua. ¹⁰ Che rumo apóstol ité aico. Esepio, Tūpa oyapo mbahe aviyé vahe ité cheu; che rovasa oico. Evocoiyase che recocuer osecuñaro ité sereco. Ichui che aporaviqui catu ité opacatu ambuae apóstol sui. Ndahei rumo cheyesui tēi Ëgüe ahe vichico, Tūpa rumo

oporovasasa pipe secoi che rupi. ¹¹ Ndapepihañemoñetai chira rumo acoi oporavíqui catu vahe rese tēi. Co ñehesa Cristo recocuer resendar ore oromombehu vahe rese rumo pepihañemoñeta catura. Esephia niha, ahe peroya vahe ité peico.

Ava omano vahe cuerayevisa

¹² Oromombehu ité niha Cristo cuerayevi agüer resendar pēu. Oime rumo amove pe pāhu pendar, “¿Mahera aipo ocuerayevira omano vahe yuvireco viña?” ehiño yuvireco. ¹³ Ndocuerayeviise ité rumo ava omano vahe viña, Cristo avei evocoiyase ndocuerayevii chietera viña; ¹⁴ iyavei Cristo ndocuerayeviise viña, ore secocuer oromombehu vahe evocoiyase ëgüe ehi tēi etera viña. Iyavei pe yeroysa Cristo rese ëgüe ehi tēi aveira viña. ¹⁵ Acoi ëgüe ehise ité rumo viña, ore avei evocoiyase oroñeheño tēi etera Tūpa resendar ñehesa rese oroico viña. Esephia, “Tūpa Cristo ombogüerayevi” orohe ité imombehu ava upe oroico. Ndocuerayeviise ité rumo omano vahe yuvireco viña, ahese Tūpa nombogüerayevii chiaveira Cristo viña. ¹⁶ Ëgüe ehi eté, acoi omano vahe ndocuerayeviise yuvireco viña, Cristo avei evocoiyase ndocuerayevii chietera viña; ¹⁷ Tūpa rese pe yeroysa evocoiyase ëgüe ehi tēi vahe itera viña; angaipa pipe viteño tēi evocoiyase pe recocuer viña. ¹⁸ Iyavei acoi ëgüe ehise ité viña, evocoiyase omano vahe Cristo reroyasar, ahe avei ocañi tēira viña. ¹⁹ Ndipoise yasāro vaherā Cristo suindar mbahe yamanose, yande evocoiyase imbopaprí tēi catu itera yaico opacatu ambuae ava sui yuvireco viña.

²⁰ Cristo rumo supi eté ocuerayevi omano vahe pāhu sui; ahe rane yipindar ocuerayevi vahe. ²¹ Esephia, ñepei ava rembiapo sui oime manosa yandeu. Evocoiyase ñepei ava rembiapo sui avei yacuerayevira. ²² Esephia, inungar acoi Adán rembiapo ai sui ava opacatu omano yuvireco, ëgüe ehi aveira Cristo rembiapo sui opacatu ava sese yuvirecoi vahe virecora tecovesa yuvireco. ²³ Ñepei-peí yandeu imombehusa rupi; yipindar Cristo ocuerayevi, ichui yande seroyasar yaico vahe yacuerayevi aveira sese acoi ahe oyevise curi. ²⁴ Ahese oura arí ipa vahe cute. Yipindar rumo Cristo omocañipara opacatu seco pírata ëgüe ehi tēi vahe. Ipare omondora opovri pendar Vu Tūpa upe. ²⁵ Ahe rane ité rumo opacatu oporocuaira oico acoi Tu opase voi eté omondo opacatu yamotarëhimbar ipovrive. ²⁶ Ahese ipa manosa opa itera. ²⁷ Esephia, Tūpa osecopi opacatu mbahe imondo ipovrive, “Opacatu ité mbahe secopiprī” ehise. Ndahei rumo Tu Tūpa avei secoi ipovrive. Esephia, Tu ité opacatu mbahe osecopi imondo ipovrive. ²⁸ Evocoiyase, opase mbahe imondosa

ipovrīve, ahe ae evocoiyase oyemondora Vu Tūpa povrīve. Tu evocoiyase secoira ivate catu vahe opacatu mbahe sui.

²⁹ Ndipoise omano vahe cuerayevi âgua yuvireco viña, ¿mbahe rese pīha evocoiyase omanose ava, amove chupe nara tēi ambuae oñeapiramo uca yuvireco? Esepia, omano vahe ndocuerayevise yuvireco viña, ¿mahera ru evocoiyase ahe ava oñeapiramo uca chupe yuvireco? ³⁰ Iyavei ore no, ¿mahera ru evocoiyase oroyemondora mbahe tēi upe arī rupi viña? ³¹ Supi eté, che rivreta, arī yacatu aviye che amano vaherā opacatu co mbahe tēi sui. Ahe pīpeve avei rumo che areco ité che viharetesa pe rese yande Yar Jesucristo rese che recose. ³² Oime mbia Efeso pendar mbahe tēi eté oyapo yuvireco cheu. Aviye acoi mahembiar oñaro ai vahe rese avava vahe vichico. Acoi omano vahe ndocuerayevise rumo yuvireco viña, evocoiyase ichui ndipoi chietera mbahe aviye vahe cheu viña. Sese che ayapoño itera inungar ava aipo ehi vahe yuvireco viña “yacaruño, yaihuño avei. Esepia, ayihive yamanora” ehi vahe.

³³ Peyembopa uca eme evocoit nungar ava upe peico. Supi eté ñehesa aipo ehi vahe: “Ava naporai vahe pīri peicose, ahe evocoiyase vīrovara pe reco tuprisa” ehi vahe. ³⁴ Pepīhañemoñeta tupri iri, peyemboangaipa uca iri eme. Esepia, amove pe pāhu pendar oime ndociuai vahe ité Tūpa yuvireco. Che aipo ahe ité pēu ‘toyuvinochi che ñehe osenduse yuvireco’ viya.

Yande retecuer cuerayevisa resendar

³⁵ Aviyyeteramo pe pāhu pendar oimera oporandu vahe: “¿Mara ehira pīha omano vahe ocuerayevi irise yuvireco coiye? ¿Mara ehi angahura pīha setecuer ahese yuvireco?” ehira yuvireco oyeupe. ³⁶ ¡Pe aipo peye-peye tēi peico! Esepia, mbahe rāhii yañotise, ituyu rane ité sori âgua. ³⁷ Yañotise mbahe, sāhii rane ité yañoti; ndahei ihi opacatu reseve yañoti. ³⁸ Ipare rumo Tūpa omondo ahe mbahe rāhii upe ihiguā güemimbotar rupi, iyavei ambuae mbahe rāhii yacatu omondo ihiguā. ³⁹ Ndafoyoyai rumo que ñepei mbahe miti hi ambuae mbahe miti hi rese. Ëgüe yahe avei yande yaico vahe ambuae ité yande rete mbahe mīmba sui; vīrai rete ambuae ité iyavei pira rete ambuae tēi no. ⁴⁰ Ëgüe ehi avei niha, oime iwa pendar rete, ivive ava yuvirecoi vahe rete avei no. Iwa pendar rete catuprigüer rumo ndahoyoyai eté ivi pipendar rete rese. ⁴¹ Arī rendigüer avei ndahoyoyai yasi rendigüer rese, yasitata rendigüer rese avei. Ñepei yasitata ambuae yasitata rese ndahoyoyai avei sendigüer yuvireco.

⁴² Ëgüe ehi aveira niha omano vahe cuerayevisa; yañotise sehõgür, ahe ituyu vaherã. Ocuerayevise rumo ndituyu iri chietera; apirëhi vaherã ité secoira. ⁴³ Tehõgür ñotimbrí nimomburusai vahe; coiye ocuerayevise rumo, imboeteipri ité secoi. Acoi ava rehõgür oñoti vahe yuvireco, niperata iri eté oico, coiye ocuerayevise rumo, ipírata itera. ⁴⁴ Supi eté, acoi ava rehõgür ñotisa vahe, ahe co ivi pipendar tẽi setecuer. Ocuerayevise rumo, setecuer iva pendar secoira. Esepia, oime ité ivi pendar setecuer, oime avei iva pendar setecuer.

⁴⁵ Supi eté aipo ehi icuachiapri aracahendar pipe: "Yipindar ava Adán serer vahe. Ahe sete upe ombou Tüpa secove âgua co ivi pipe" ehi. Ichui rumo ambuae ité ipa Adán nungar ou vahe, ahe rumo vireco ité tecovesa iva pendar ava upe imbou âgua. ⁴⁶ Yipindar oime co ivi pipendar tecovesa. Ipare rumo oime co tecovesa iva pendar yandeu. ⁴⁷ Ëgüe ehi yipindar ava ivi sui yapopri, ivi rese nara ité icuaita oico; coiye catu ava ou vahe evocoiyase iva pendar. ⁴⁸ Inungar yipindar ava ivi suindar, ëgüe ehi avei opacatu ava ivi suindar tecovesa rereco yuvireco. Iyavei inungar Jesús iva suindar, ëgüe ehi aveira opacatu iva suindar tecovesa vireco vahe yuvireco.

⁴⁹ Iyavei inungar cûritei Adán nungar tupri yaico; ëgüe yahe aveira yande Jesucristo iva pendar nungar tupri yaico curi.

⁵⁰ Che rivireta, co mbahe amombehu potami pẽu: acoi ava upe güetecuer reseve, ndiyai eté seique âgua ivave Tüpa mborerecuasave. Esepia, co yande rete ocañi tẽi vaherã, ndoipisii chira tecocuer apirëhi vahe. ⁵¹ Iya, peicua co mbahe oyecua ramo vahe: ndahei chira opacatu yamano. Opacatu rumo yande rete aviyeteramo tẽi eté secuñarosapara. ⁵² Mimbi moñehese voi yande resapihara inungar yande resapiqui vahe, ëgüe ehira secuñarosapa yande rete. Aheseve avei omano vahe ocuerayevipara apirëhi vaherã ité yuvireco; yande evocoiyase nayamano vîtei vahe, opaño têira yande rete secuñarosa. ⁵³ Esepia, co yande rete ocañi tẽi vaherã, ahe yande rete niha opara oñecuñaro apirëhi vaherã yuvireco. ⁵⁴ Ëgüe ehise yandeu, ahese ramo osupitira Tüpa ñehe icuachiapri pipe imombehupri yandeu curi: "Manosa opara imocañisa" ehi vahe. ⁵⁵ Iyavei aipo ehi: "Ndayasiquiye iri chira yande mano âgua. Esepia, manosa ndovireco iri chira oyeroyasa oyese inungar acoi cau popiar opa vahe serocuasa ichui" ehi. ⁵⁶ Angaipa niha inungar mbahe popiar omoime vahe manosa yandeu. Moisés porocuaita aracahendar evocoiyase ombou píratasa angaipa upe angaipa aposar mocañi uca âgua. ⁵⁷ Che rumo, "¡Aviye ndeu!" ahe Tüpa upe. Esepia, ahe ombou

angaipa recopi ãgua yandeu yande Yar Jesucristo rembiapo sui.

⁵⁸ Sese, che rivireta, peico tupriño ité Cristo rese iyavei peyemoviracua opacatu mbahe tēi upe; peporaviqui catuño yande Yar upendar mbahe rese peico. Esepio, peicua niha yande Yar rese peicose, pe poraviquisa ndahei ēgue ehi tēi vahé.

16

Porerecosa Jesús reroyasar p̄tivii ãgua resendar

¹ Iyavei co guarepochi monuha ãgua iparaísu vahe Jesús reroyasar upe nara, pe avei catu peyapo mbahe inungar che amombehu Jesús reroyasar ivi Galacia rupindar upe. ² Domingu yacatu iya pe avei peipeha voimi guarepochi peico pe poraviqui reprí sui yapocatu ãgua. Eipeve che yepotase, ndapeyemañeco iri chira guarepochi monuha ãgua rese peico. ³ Evocoiyase acoi ayepotase eipeve vicho, amondora ava pe rembiporavo Jerusalén ve. Che ñehe icuachiapri avei amondora chupe guarepochi pe remimonuha reraso ãgua yuvireco ahe pendar yuvirecoi vahe upe. ⁴ Aviyeteramo, iyase cheu, che avei asora aheve. Evocoiyase ahe yuvirasora che rupi.

Pablo ipihañemoñeta oguata ãgua rese

⁵ Che sose, asora ivi Macedonia rupi, ipare asora pe repia Corinto ve. ⁶ Aviyeteramo apita pucumira pe piri, anise aviyeteramo pe pirive ité mbahe porañehi che mombitañora. Ipare pe che p̄tiviñomira peye eipeve sui ambuae tecuave che so ãgua rese. ⁷ Ndaipotai che opoepia raimi tēi eipeve vicho. Yande Yar rumo oipotase, aico pucu itera pe piri. ⁸ Che rumo cûritei apitaño vitera cohove Efeso ve, asepia ranera Pentecostés pieta. ⁹ Esepio, oime ité yande Yar upe che poraviquisa aviye vahe ité cohove, yepe setá iteanga ava che amotarëhimbar yuvirecoi viña.

¹⁰ Acoi Timoteo oyepotase oso pe piri, taseco tupriño ité pe pâhuve. Esepio, ahe avei oporaviqui yande Yar upe nara oico che nungar. ¹¹ Tipo eme ñepei yepe sepia potaëhisar yuvireco, iya rumo peip̄tivii catura che piri iyepota tupri ãgua rese. Esepio, che iyavei ambuae Jesús reroyasar rese orosâo ité iyepota ãgua oroico.

¹² Yande rivri Apolos upe, “Eso ambuae Jesús reroyasar piri Corinto ve” ahe tēi. Cûritei rumo niquerëhi oso pe repia; iyase chuse, ahese osora pe piri.

Pablo mahenduhasa ipa vahe

¹³ Pemahemoha peye; peyemoviracua avei Jesús rese pe yeroyasa pípe. Peñemosao catu pe cuaita upe. Peicoveño

itera Tūpa pīratasa pipe. ¹⁴ Opacatu mbahe peyapo pota vahe, peyapora pe poroaisusa pipe ité.

¹⁵ Che rivireta, pe peicua Estéfanas opacatu güëta pendar reseve, ahe ranei yipindar ivi Acaya rupi viroya vahe ñehesa yande Yar resendar yuvireco. Oyemondo avei ambuae Jesús reroyasar rese hañeco tupri água yuvireco no. ¹⁶ Evocoiyase che aipota peyemboyeroyara evocoi nungar ava rese iyavei opacatu ambuae yande Yar upe oporavíqui vahe rese avei.

¹⁷ Pe pāhu pendar Estéfanas, Fortunato iyavei Acaico coháve oyepotase che mboviha yuvireco. Esepia, ahe oyapo ité pe ndapeicatu tuprii vahe apo yuvireco. ¹⁸ Ahe che mongueréhi catu yuvireco, ëgue ehi avei revo pēu no. Pemboeteira evocoi nungar ava peico.

¹⁹ Jesús reroyasar Asia pendar opacatu ombou omahenduhasa yuvireco pēu. Aquila, Priscila avei imahenduhá iteanga yuvireco pe rese iyavei opacatu ambuae ava oñemonuha vahe ahe sétave yuvireco, ahe avei ombou omahenduhasa yande Yar rer pipe yuvireco pēu. ²⁰ Opacatu Jesús reroyasar coha pendar avei omondo omahenduhasa yuvireco pēu. Peyeovaupite catu pe reco maranehisa pipe ahe mahenduhasa mombehu peyeupe pe viharettesave.

²¹ Che Pablo, che po pipe ité aicuachía co che mahenduhasa imondo pēu.

²² Acoi ava ndosaisui vahe yande Yar Jesucristo, ahe tocañi mbahe tēi pipe. ¡Toyevi pihaivi voi yande Yar ou!

²³ Yande Yar Jesucristo tape rovasa ité yepi. ²⁴ Pēu opacatu amondo che poroaisusa opacatu Jesucristo rese yande recosa pipe. Aipo rupive che ñehesa pēu.

IMOÑUVIRIOSA PABLO REMBICUACHIA CORINTO PENDAR UPE CORINTIOS

Pablo mahenduhasa Jesús reroyasar Corinto pendar upe

¹ Avirave, opacatu Jesús reroyasareta Corinto pendar peico vahe, pe Tūpa reroyasar ivi Acaya rupindar avei. Che Pablo, Tūpa remimbotar rupi Jesucristo apóstol aico. Aicuachia che ñehe pēu. Co yande rivri Timoteo avei omundo omahenduhasa pēu. ² Tapeipisi catu yande Ru Tūpa, yande Yar Jesucristo porovasasa avei pe reco tupri äqua.

Pablo paraisu agüer resendar

³ Yamboeteiño itera yande Ru Tūpa. Ahe niha yande Yar Jesucristo Ru secoi, ahe yande paraisuereco vahe iyavei ombou vahe yande mboviha äqua yepi. ⁴ Ahe niha yande mbovihaño opacatu yande paraisusa pipe, yande avei evocoiyase yaicatura ava iparaisu vahe mboviha äqua yuvireco. Ëgüe ehi eté Tūpa imbou vihasa yandeu, ahe avei yande yamondora yuvireco chupe. ⁵ Esephia, inungar Cristo imombaraisupri secoi, ëgüe yahe aveira imombaraisupri yaico yaicose sese. Cristo sui avei rumo oime itera vihasa yandeu. ⁶ Ore paraisu pe mboviha äqua 'toñepisiro yuvireco' ore yapave. Iyavei Tūpa ore mboviha pe mboviha äqua avei. Supi evocoiyase pe peñemosañaora mbegüe rupi ore paraisu agüer nungar tupri pe recose. ⁷ Ore oroyeroya ité Tūpa pe pítiviä äqua rese. Esephia, oroicua ore paraisu agüer nungar tupri peico, ëgüe peye avei peipisi ore vihasa Tūpa suindar.

⁸ Che rivireta, opomomahenduha pota mara orohe oroico ivi Asia rupi. Ore recoähasa yavai vahe ité oime aheve oreu. Ndoroicatu iri eté oroñemosa ore pírataëhise chupe, seni orepihañemoñeta: "Yamanño itera co mbahe-mbahe tēi pipe" orohe viña. ⁹ Supi eté oromoha ore cañi tēi äqua viña, ëgüe ehi rumo oreu oroyeroya catu äqua Tūpa rese, ndahei oreyece tēi. Esephia, ahe oporombogüerayevi vahe secoi. ¹⁰ Ahe niha ore repi ore mano ráguer sui, ore repi aveira curi evocoi nungar mbahe tēi sui. Supi eté oroyeroya viteño ité sese. Ahe ité niha ore repi viteño itera mbahe-mbahe tēi sui, ¹¹ pe ore pítiviise peye pe yeroqui pipe. Ahese setá, "Aviye ndeu" ehira yuvireco Tūpa oporopítiviisa ombou vahe rese oreu setá yeroquisa sui.

Mbahe sui Pablo ndosoi Corinto ve

¹² Oime mbahe ore mboviharete vahe: ore piha pipe ité oroicua oroico tupri Tūpa suindar ore reco catuprisa pipe, ore pihañemoñeta tuprisa pipe avei co ivi pipendar ava rembiepiave, pe rembiepiave avei eté. Tūpa porovasasa pipe niha ēgue orohe, ndahei ava co ivi pipendar mbahecusa pipe tēi. ¹³⁻¹⁴ Esephia, che ñehe aicuachía vahe imondo pēu, aicuachiá ñepei reseve pe yeroqui tupri ãgua, pe senducua tupri ãgua avei no. Iyavei ore cua revo chīhi peye cute. Acoi yande Yar Jesús yevise curi, ahese peyembovhara ore rese, inungar ore oroyembovhara pe rese.

¹⁵⁻¹⁶ Sese yipindar supi eté che pihañemoñeta aso vaherā ñuvirío yupagüer pe repia, pe mbovihā catu ãgua viña. Ëgue ahe ité, che pihañemoñeta pe piri rane che so ãgua che guatasa rupi Macedonia ve. Ichui ayevi pota iri pe piri viña, ipare pe che pítiviimira peye ivi Judea rupi che so ãgua rese viña. ¹⁷ Ndache pihañemoñeta voiño tēi che so ãgua, ndahei iporombopa serai vahe aico “che co mbahe ayapora” ehi tēi vahe, ipare rumo nomboavíyei eté. ¹⁸ Tūpa rumo oicua ore ndahei, “Aviye” ore he voisa pēu, ahe pipeve avei, “Aní” ore hesa. ¹⁹ Esephia, Tūpa Rahir Jesucristo avei ñepei reseve vahe ité yayeroyá vahe sese. Ahe secocuer niha oromombahu oroico pēu, che, Silvano, Timoteo avei. ²⁰ Esephia, opacatu Tūpa remimombehugüer imboavíyesa sese. Sese niha serer pipe, “Ëgue tehi” yahe Tūpa upe imboeteisave. ²¹ Tūpa niha opacatu yande momirata seseño ité yande reco ãgua, yande poravo avei. ²² Güerer omundo yande rese ‘cheu nara’ oyapave. Ombou avei oEspíritu yande piha pipe ‘ipipe toicua che remimombehugüer rupi tupri ité mbahe amondora chupe yuvireco curi’ oyapave.

²³ Tūpa niha oicua acoi ndayeviise Corinto ve pe piri, ëgue ahe pēu mbahe aviye ãgua rese. ²⁴ Ndahei opocuai pota mbahe pe rembieroyarā rese. Esephia, pe Tūpa rese pe yeroysa pipe peyemoviracuaño ité Cristo rese. Ore rumo oroipota pe pítiviisa pe yembovihā ãgua.

2

¹⁻² Co rese ndaso catu iri pe piri. Esephia, che aso irise pe piri ndopombovihā catui chira viña, ¿ava vo evocoiyase che mbovihara viña? Pe ité niha che mbovihasar peico. ³ Sese che aicuachía ñehesa ipírata vahe pēu cuese. Esephia, ndaipotai eipeve che sose, che mbovihāëhi ãgua peye. Pe rumo iya ité che mbovihā catura peye viña. Che ayeroya ité opacatu pe rese aviharetese, pe avei evocoiyase opacatu pevharetera che rese. ⁴ Supi eté che aicuachiase che ñehe pēu, che ae ayepihamboasi ité, ayaseho avei. Esephia, aicuachía vahe pēu

ndahei pe mbovihāēhi ãgua, che rumo aicuachía ‘toicua che guaisu etepresa yuvireco’ che yapave pēu.

Oime ñerosa ava upe mbahe sembiavi rese

⁵ Acoi yande rīvrī omoime uca vahe viharēhisa co mbahe tēi apo pipe, ndahei che güeraño ndache mbovihai, pe avei rumo seni opacatu ēgue peye. Che, “Seni” aipo ahe ité pēu. Esepia, ndaipotai che ñehe rasi ãgua. ⁶ Co mbia upe setá mbahe peiporara uca ité, evoco rupive iya ēgue peye chupe. ⁷ Co suive ité rumo peñerora chupe, peipitivii aveira. Esepia, aviyeteramo oviharēhisa pipe oyemocañi tēira. ⁸ Sese cūritei opomonguerēhi ité pe mboyecua iri ãgua pe poroaisusa chupe. ⁹ Cuese ambuae che ñehe aicuachía co che pe mbohesa resendar pēu pe recoāha ãgua, “¿Oyapo itera pīha che remimombehu yuvireco?” ahe pēu. ¹⁰ Cūritei cheñero avei que ava upe peñero vahecuer upe. Esepia, oimese que mbahe rese che ñero ãgua, Cristo rovaque ēgue ahe pe raisusave ¹¹ Caruguar yande mbopaēhi ãgua. Esepia, yande yaicua tupri ité iporombopasa.

Tecua Troas ve Pablo nombohe catui opihañemoñetasa

¹² Ayepotase tecua Troas ve Cristo recocuer mombehu ãgua, oime ité yande Yar upe nara aheve che poraviqui ãgua viña. ¹³ Nambohe catui rumo che pihañemoñetasa. Esepia, ndasepiai eté yande rīvrī Tito. Sese, che, “Aviye” ahe pare ava Troas pendar upe, asoño ivi Macedonia rupi.

Cristo rese yaicose, yaicatu mbahe tēi recopi

¹⁴ Aviye yande Ru Tūpa upe. Esepia, yande Cristo rese yaico vahe yande renose oamotarēhimbar povrī sui opacatu ava rembiepiave iyavei yande recocuer sui opacatu ava upe oicua uca güecocuer inungar mbahe sīacua vahe yasētu vahe opacatu rupi. ¹⁵ Esepia, inungar itaīsi sīacua vahe opacatu rupi, ēgue yahe avei yande Tūpa upe Cristo yande reropovēhese yaico ava ipisiropirā upe, ava ocañi tēi vaherā upe avei. ¹⁶ Ahe ava ocañi tēi vaherā upe evoco ñehesa yaru vahe inungar cañi tēisa resendar; ava ipisiropirā yuvirecoi vahe upe rumo evoco ñehesa ombou tecovesa. Yande ae tēi rumo ndayaicatui evoco nungar mbahe apo. ¹⁷ Ore rumo ndahei setá ambuae ava nungar tēi oroico. Esepia, oromombehuse Tūpa Ñehengagüer, ndahei mbahe pisí ãgua tēi rese ēgue orohe, ore rumo ore pihañemoñeta tuprisa pipe oromombehu co ñehesa Tūpa rovaque Cristo rese ore recosa pipe. Esepia niha, ore semimondo oroico.

3

Ñehesa Tūpa remimbotar ipiasu vahe resendar

¹ Ore aipo orohese, aviyeteramo pēu ndoyavii oroyeecomboivate ai pota iri viña, ēgue ndorohei rumo iyavei ndorosecai icuachía ãgua ava ñehesa avíye vahe ore recocuer resendar oromondo vaherā pēu. Ndorosecai avei aipo nungar cuachiar pe suindar, inungar co ambuae oyapo vahe yuvireco yepi. ²Esephia, pe ité inungar ore rembicuachía ore recocuer resendar ore oroipta vahe, ēgue peye peico ore piha pipe. Esephia, opacatu ava pe reco tupri repiase, oicua ore poravíqui tuprisa pe pāhuve yuvireco. ³Pe niha pemboyecua pe reco tupri pipe ore rembiapo Cristo porocuaita pipe pe pāhuve. Sese pe inungar Cristo rembicuachía avíye vahe oromondo ava upe, ahe rumo ndahei tinta pipe ité icuachiapri itape rese, Espíritu Tūpa oicove vahe suindar pipe rumo yapopri ava piha pipe.

⁴Oroyeroya ité co rese Tūpa rese ore yeroyasa pipe. Cristo niha ēgue ehi oreu. ⁵Ndahei oreyesui tēi oroicatu co mbahe apo. Tūpa rumo ombou oreu opacatu co mbahe apo ãgua. ⁶Ahe niha ombou opíratasa oreu güemimbotar ipiasu vahe rese poravíqui ãgua, ndahei Moisés rembicuachiagüer rupi oroporavíqui. Esephia, ahe imboavíyeëhisa pipe yamano tēira viña. Ahe rumo Espíritu Tūpa suindar pipe oroporavíqui. Esephia, ahe ombou tecovesa yandeu.

⁷Co Moisés recosendar porocuaita icuachiasa ité itape rese, iyavei Tūpa reco porañetesa pipe ou. Israelita evocoiyase Moisés rova rese nomache catui eté yuvireco. Esephia, sendí iteanga, yepe sendigüer ogüe mbegüeño oso viña. Ahe Moisés recosendar porocuaita ava upe manosa tēi güeru vahe iporañete ai eté yipindar oico viña. ⁸¡Cúritei rumo iporañete catu ité ñehesa Tūpa remimbotar ipiasu vahe resendar Espíritu Santo ombou vahe yandeu! ⁹Supi eté yepe iporañete ai eté Moisés porocuaita acoi güeru vahe manosa yandeu viña, ¡co ñehesa ipiasu vahe rumo yande reco moingatu vahe iporañete catu ité ichui! ¹⁰Esephia, co yipindar porañete vahe ndahoyoyai ñehesa cûriteindar porañete catu vahe rese. ¹¹Acoi mborocuaita yipindar ndipocopiimi vahe virecose Tūpa reco porañetesa, co ñehesa piasu ipocopi vahe rumo iporañete catu itera ichui.

¹²Ore oroyeroya ité co ñehesa ipocopi vahe rese. Sese oroñehe ava upe ore siquíyeëhisa pipe ité. ¹³Ore rumo ndahei Moisés nungar oroico. Esephia, ahe oyovapi turucuar pipe omu israelita sui güepiaëhi ãgua ndogüe viteise sendigüer ichui aracahe. ¹⁴Ēgue ehi ahe ndosenducua ucái eté ndoyavii sovapisa vite vahe cûritei, ēgue ehi vite oyeroquise Moisés

porocuaita icuachiapri yipindar vahe pipe yuvireco. Ñomipri vahe nungar tēi chupe ahe senducuaēhi pipe. Esepio, Cristo güeraño ité oicatu sovapisa nungar rerocua ichui senducua uca água chupe. ¹⁵ Ëgüe ehi vité cûritei, senducuaēhi pipe Moisés porocuaita pipe oyeroqui vitéño tēi eté yuvireco inungar sovapisa vité vahe. ¹⁶ Supi eté que ava oyevise yande Yar upe, ahese ramo serocuasa sovapisa nungar ichui senducua tupri água. ¹⁷ Esepio niha, yande Yar Espíritu secoi. Ahe Espíritu ava rese secoise, ndahe iri mbiuai nungar yuvirecoi. ¹⁸ Sese opacatu yande ndahei Moisés oyeovapi vahe nungar yaico Tūpa porañetesa sendiyai vahe repiaēhi água. Yande rumo inungar yepiasa yamboyecua ité yande Yar porañetesa sendiyai vahe ava upe yaico. Yaico catuño ité yande Yar Cristo nungar ari yacatu rupi yepi. Esepio, ëgüe yahese, yareco catu-catu iri seco porañetesa yandeyese. Yande Yar rumo acoi Espíritu secoi vahe ëgüe ehi yandeu.

4

¹ Sese, “Ndorequerēhi iri” ndorohei eté. Esepio, Tūpa ore poravo ore paraisuerecosa pipe ore poraviqui água co ñehesa rese. ² Ore rumo oroseyapa opacatu mbahe tēi ore chī aisa, ndoromboyecuai vahe avei ore piha pipe sui; ndoroporombopa-mbopa tēi iyavei Tūpa Ñehengagüer ndorosecuñaro-ñaro tēi. Ore rumo oroñehe tupri mbahe supi tupri vahe rese güeraño. Ëgüe orohe opacatu ava upe Tūpa rovai ‘Supi eté, tehi yuvireco opicha pipe’ ore yapave. ³ Yavaise co ñehesa písrosa resendar ore remimombehu renducua água, ahe ëgüe ehi ava ocañi tēi vaherā upe. Ahe avíye oyeovapi vité vahe. ⁴ Esepio, supi eté caruguar rerecuar inungar nomboesapisoi vahe ahe ava yuvireco, sese ndosen-ducua ucai chupe ‘toviroya eme ñehesa Poropísrosar Cristo resendar porañete vahe’ oyapave. Ahe niha Tūpa recocuer mboyecuasar secoi. ⁵ Esepio, oromombehuse ñehesa pēu, ndahei oreyeze tēi. Ore rumo, “Jesucristo yande Yar secoi” orehe oroico. Ore evocoiyase mbiuai nungar tēi oroico pēu Jesús raisupave. ⁶ Esepio, Tūpa aipo ehi aracahe: “Toime tesapesa pítumimbi vahe resape água” ehi. Ahe avei osesape uca yande piha pipe ‘ipipe toicua che porañetesa che Rahir Cristo recocuer rese oime vahe yuvireco’ oya.

Yaicora Cristo rese yero yasa pipe ité

⁷ Co tesapesa nungar porañete vahe Tūpa suindar rumo yareco yande retecuer pipe, inungar-ra que mbahe sepirusu vahe yapocatupri ivi mbahemoinda ndipocopíi vahe pipe tēi

viña. Ipipe toicua opacatu ava yuvireco co píratasa Tūpa suindar, ndahei oreyesuindar tēi.⁸ Yepe mbahe-mbahe tēi oime opacatu rupi oreu viña, oimeño ité rumo ore sē āgua ichui. Yepe orepihañemoñeta-ñeta tēi mbahe rese, yande Yar rese ore pihañemoñetasu rumo ndoromocañii eté oreyesui.⁹ Yepe ore reca-reca catu tēi ore amotarēhimbar yuvireco viña, Tūpa rumo ndore reyai eté; iyavei yepe ore reiti ore recopi āgua yuvireco viña, aní eté rumo.¹⁰ Opacatu ore guatasa rupi rumo orovirecoño ité Jesús mara-mara tēi sereco agüer ore mano āgua oreyesese, “Toycua avei secocuer ore rese” ore hesave.¹¹ Esepia, ore recove viteseve imboguaipri oroico ore mano āgua Jesús rese. Ēgue orohe secocuer mboyecua āgua ore retecuer ndipocopii vahe rese.¹² Evocoiyase co ñehesa mombehu pípe ore manosa ore ropeña, ipipe sui rumo pesopeña tecovesa apirēhi vahe peico seroyasa pípe.

¹³ Icuachiapri aracahendar pipe niha aipo ehi: “Ayeroya ité Tūpa rese, ipipe sui añehe” ehi; ēgue orohe avei ore, sese oroyeroya ité, ichui oroñehe.¹⁴ Esepia, yaicua niha acoi Tūpa yande Yar Jesús ombogüerayevi vahe, yande mbogüerayevi aveira supive. Ipare oyoya guasu pe reseve oyeipive yande rerecora.¹⁵ Co opacatu mbahe tēi oime vahe oreu, pēu mbahe aviyē āgua rese niha ‘tovireco catu Tūpa porovasasa yuvireco; ipipe sui, Aviyē ndeu, tehi setá catu ava imboeteisave yuvireco chupe’ ore yapave.

¹⁶ Sese orequerēhiño ité mbahe apo oroico pēu. Yepe ore rete ocañi pota tēi viña, ore recocuer rumo Tūpa ombopiasuasuño ité ari yacatu rupi.¹⁷ Esepia, co mbahe oroiportara vahe co ivi pípe, ahe ēgue ehi raimi tēi vahe, ipare rumo opañora; ahe ichui rumo oimera mbahe tupri ivate catu vahe oreu ivave apirēhi orovireco vaherā.¹⁸ Sese ore ndorepihañemoñeta atii chira co ivi pipendar mbahe rese; ore rumo orepihañemoñeta mbahe iva pendar ndayasepiai vahe rese. Esepia, co mbahe yasepia vahe, ahe ēgue ehi raimi tēi vahe; co mbahe rumo ndayasepiai vahe, apirēhi vaherā ité.

5

¹ Yaicua niha yande retecuer ndipocopii vahe, inungar oíndipocopii vahe avei. Sese imocañisase, aviyēño. Esepia, Tūpa opa omoingatu ambuae yande rete ndopai vahe ivave yandeu. Ndahei ahe ava rembiapo tēi.² Supi eté yaicove vitese co yande rete ndipocopii vahe rese, yande poäsesa pipe yaipota ité yande rete iva pendar.³ Aheve yande rete ipiasu vahe yarecose, ahese ndahei chira yande hā nani tupri vahe nungar yuvirecoira.⁴ Ēgue ehi eté yande retecuer pipe vité yaicose, yande poäse yande viharēhisa pipe.

Esephia, ndayaipotai yande hā nani tupri vahe nungar seco āgua, yande rumo yaipota yande retecuer ipiasu vahe, ndopai vahe. Evocoiyase, “Tocañipa co mbahe ocañi tēi vaherā yande resendar tecovessa piasu, ndopai vahe rereco āgua” yahe. ⁵ Tūpa niha yande apo ‘na tehi yuvireco’ oyapave, ombou avei oEspíritu Santo yandeu ‘ipipe toicua opacatu yuvireco che amondo aveira co opacatu tecocuer ipiasu vahe chupe’ oya.

⁶ Sese niha yayeroyaño ité yepi; iyavei yaicuaño yande yaicove vitese yande rete rese, ndayaico vitei eté ivave yande Yar piri. ⁷ Esephia, cūritei yande Yar rese yeroysa pipe ité yaguata, ndahei mbahe yande rembiepia pipe. ⁸ Yande rumo yayeroyaño ité sese, iyavei yaipota ité yande retecuer reya āgua yande Yar piri yande so āgua ivave. ⁹ Sese yaseca yande Yar mboviha āgua yepi, que yaicove vitese yande rete rese, anise que yasēse ichui. ¹⁰ Esephia, yande opacatu yañecuavēhera Cristo rovai iporandusave yaipisi vaherā ñepeipei mbahe yande rembiapocuer rupi mbahe aviye vahe, anise que mbahe naporai vahe yande rete rese yaico vitese.

Ñehesa yande reco moingatusa resendar

¹¹ Ore niha oroicua yande Yar sui ore siquiyé āgua imboyeroyasave. Sese orosāha ava pihañemoñeta rerova Tūpa rese ipihañemoñeta āgua yuvireco. Tūpa niha ore cua tupri, tapeicua avei ru ore recocuer. ¹² Ndoroñeheti pēu ore yemboivate ai āgua tēi. Ore rumo oroñeheti pēu ‘toviharete catu ore rese yuvireco’ ore yapave. Ipipetra sui peicatura ava güembiepia rese tēi oyemboivate ai vahe upé iñehé mboyevi āgua. Esephia, ahe ndahei ava piha pipendar rese oyemboviha yuvireco. ¹³ Ndayaracuai vahe nungar ore rerecose amove pe pāhu pendar yuvireco. Tūpa upé rumo ēgüe orohe oroico. Yaracua vahe nungar rumo, ore rerecose peye, pēu mbahe aviye āgua rese ēgüe orohe. ¹⁴ Cristo poroaisusa, ahe ité ore reroguata catu. Esephia, supi eté ahe omano opacatu ava repirā, ipipe sui yaicua opacatu ava ocañi tēi vaherā yuvireco viña. ¹⁵ Cristo niha omano opacatu yande repirā. Yande yaicove vité vahe evocoiyase ndahe iri yandeyeupe nara tēi yaico; yande rumo yaico chupe nara ité. Esephia, ahe omano, ocuerayevi yande rese. ¹⁶ Sese, iya ité oreu ore pihañemoñetañehi iri āgua que ava rese, ava tēi pihañemoñetasava rupi. Yepe yipendar inungar ava ivi pipendar tēi ēgüe orohe ore Cristo rese ore pihañemoñeta oroico viña, cūritei rumo ēgüe ndorohe iri orepihañemoñeta sese. ¹⁷ Evocoiyase acoi ava Cristo rese ité secoi vahe, ahe secocuer ipiasu vahe ité; ndipo iri eté secocuerai yipendar vahe sese. Opacatu ité oyembopiasu iri.

¹⁸ Co mbahe opacatu Tūpa oyapo yandeu, ahe niha Cristo rembiapo sui yande recocuer moingatu oyeupe nara. Ipare oreu avei ombou co ñehesa mombehu ãgua ambuae ava upe secocuer moingatu ãgua avei. ¹⁹ Aipo oyapave aipo ehi: Tūpa ombou Guahir Cristo co ïví pipe ava recocuer moingatu ãgua ‘toyeví cheu’ oya; ipipe sui avei ahe ava angaipagüer omocañi yuvireco ichui. Ore evocoiyase ore cuai ahe ñehesa ava recocuer moingatusa resendar mombehu ãgua ava upe. ²⁰ Ore evocoiyase Cristo porocuaita rupi oroñehe vahe oroico, inungar Tūpa ité oñehera pēu viña. Sese, “Peyeví Tūpa upe, ahe pe recocuer moingatura oyeupe nara” orohe Cristo rer pipe pēu. ²¹ Yepe Cristo ndoyapoi eté angaipa, Tūpa rumo vireco uca angaipa viyar nungar yande repirā yande reco ïví ãgua Cristo rupi yande guatase.

6

¹ Ore pe mboetasa co Tūpa upendar mboravíqui resendar ore recosa pipe: “Peicua catu, pemocañi tēi rene Tūpa porovasasa peipisi vahe” orohe pēu. ² Esepia, Tūpa aipo ehi icuachiapri aracahendar pipe:

“Acoi ari aviye vahe pipe niha che asendu pe yeruresa; iyavei ahe ari poropísirosa pipe opopítivii” ehi.

¡Ahe ari oyepota cute! iyavei oime ité cûritei ñepisirosa.

³ Ore niha ndoromboyecuai ore reco ai ava pâhuve. Esephia, ndoroipotai que ava Tūpa upe ore poravíquisa rese iñeha rai ãgua yuvireco. ⁴ Ore rumo oromboyecua ité Tūpa rembiguai ore recosa. Esephia, ore reco mbegüesa pipe oroñemosaño mbahe-mbahe tēi upe yepe ipane mbahe oreu viña, iyavei mbahe yavaise; ⁵ ëgue orohe avei ore nupanupase, ore roquendase avei iyavei omonguerêhise ava rehii ore amotarêhi ãgua yuvireco. Oroyapo avei mboravíqui ipírata vahe; amove ndoroquei eté, setá rupi ndoreriepoi tēi avei. ⁶ Oromboyecua avei ore reco maranehisa, ore mbahecua supi eté vahe, ore reco mbegüe tuprisa, yeaíusa orovireco avei no. Ëgue orohe ité niha Espíritu Santo píratasa pipe, ore poroaisusa supi eté vahe pipe avei. ⁷ Ore remimombehu supi eté vahe pipe iyavei Tūpa píratasa pipe avei oroico. Ore niha ore reco tupri pipe orosecopi mbahe-mbahe tēi. Ipípate avei oroyoepi. ⁸ Amove ava ore mboetei ai, amove rumo oñemoiro yuvireco oreu; amove avei oñeha tupri ai ore rese yuvireco, ipare rumo iñeha-ñeha tēi ore rese yuvireco yepi no. Iyavei amove oporombopa tēi vahe nungar ore rereco yuvireco, yepe oromombehu tēi mbahe supi eté vahe viña. ⁹ Amove ndicuasai vahe nungar tēi ore rereco yuvireco, icuapri ité tie oroico viña; amove ore yuca seni yuvireco,

oroicoveño ité rumo; iyavei amove ore mombaraisusa catu tēi, ndore yucai eté rumo ipipe yuvireco. ¹⁰ Amove ndoyavii ndorovihai vahe yuvireco chupe, ore rumo orovihaño ité yepi; iyavei yepe ndoyavii iparaisu vahe oroico viña, ore rumo oromondo catuño ité mbahe aviye vahe ava eta upe. Yepe ndoyavii ndorovirecoi eté mbahe viña, opacatuño ité rumo mbahe aviye vahe Tūpa suindar oime oreu.

¹¹ Che rivireta Corinto pendar, ore ñehesa pipe opacatu mbahe oromboyecua pēu iyavei pe raisu água orovireco ore piha pipe tuvichá pe rese. ¹² Ndorehāpisii pe rese pe raisu água; pe rumo ēgüe ndapeyei ore rese. ¹³ Che niha opovireco che rahir nungar; pemboyevi avei catu ore pe raisusa oreu.

Tūpa oicove vahe rēta nungar ité yaico

¹⁴ Ndapeyovaichoi chira ava Tūpa ndoviroyai vahe rese. Espia, ndoyoyai eté pe pihañemoñetasa. Ëgüe ehi eté teco ïvisa ndoyoyai teco rai rese inungar tesapesa ndoyoyai pítmimbi vahe rese. ¹⁵ Ndafoyoyai eté niha Cristo pihañemoñetasa Caruguar pihañemoñetasa rese yuvireco. ¿Oyoya tie Tūpa reroyasar Tūpa reroyasarëhi rese yuvireco? ¡Aní eté! ¹⁶ ¿Oyoya tie mbahe rahanga tēi Tūpa rēta rese? Yande niha Tūpa oicove vahe rēta nungar ité yaico. Ahe ité niha aipo ehi icuachiapri pipe aracahe:

“Che aicovera seseve iyavei aguatara ipāhu rupi yuvireco; che avei aicora iTūpa ité; ahe evocoiyase cheundar yuvirecoira” ehi.

¹⁷ Iyavei aipo ehi:

“Sese peyepepi evocoi nungar ava naporai vahe sui; peyemboyai rene que mbahe naporai vahe rese.

Ahese che opopisira.

¹⁸ Che aicora pe yesupa; pe evocoiyase peicora che rahir, che rayri avei’ aipo ehi yande Yar güeco píratasa pipe” ehi.

7

1 Che rivireta, che rembiaisu, co Tūpa remimombehu imboaviyepirā yandeu. Sese yande yamoingatu tuprira yande recocuer chupe yarecoëhi água yande retecuer iyavei yande espíritu mbahe tēi pipe. Iyavei Tūpa mboeteisa pipe yasecara yande reco catupri água chupe nara güeraño ité.

Corinto pendar ava recocuer recuñarosa resendar

² ¡Che pisí peye pe piha pipe! Ndoroyapoi niha mbahe tēi que ava upe, ndoromomarai eté que ava recocuer, ndoroporombopai avei. ³ Ndahei pe recocuer rese che ñehe raisave aipo ahe pēu. Supi eté yipindar, “Che pihave ité opoisu, pēu nara avei aicove, amano aveira pēu” ahe acoi pēu cuese.

⁴ Ayeroya ité pe rese, pe rese avei aviharete. Che paraisu pāhuve ayemonguerēhi iyavei ayembovhareteño.

⁵ Ore yepotasa suive rumo Macedonia ve, ndopituhui eté mbahe tēi ore sui; oime viteño ité rumo mbahe-mbahe tēi oreu opacatu rupi: oime ore amotarēhimbar iyavei oime ore yepihamondiisa. ⁶ Tūpa rumo, ava ndoyemonguerēhi vahe, omonguerēhi iri yepi. Ahe ore monguerēhi catu iri Tito yepotase. ⁷ Ndahei rumo Tito yepotaseño oroviharete, ahe avei oyembovīha guasu pe rese. Ahe aipo ehi oreu pe aipo che repia pota ité peye yepi; omombehu avei che rese pe viharēhi agüer cheu, pemahenduhaño ité aipo che rese pe che raisusave yepi. Aipo nungar renduse ayembovīhá catu.

⁸ Yepe che ñehe aicuachía vahecuer imondo pēu ndape mbovīhai viña, cheu rumo aviyeño cūritei. Yipindar rumo ayepihamboasi aicuase che ñehe tasí iteanga vahe pēu; chīhi rupi tēi rumo ndapevīhai peyeroqui pare sese. ⁹ Cūritei che avihareté. Ndahei rumo pe viharēhisa rese ēgue ahe. Esepia, co pe viharēhisa sui pemboasi pe angaipa Tūpa upe pe yevi água, evoco nungar Tūpa oipota. Evocoiyase ore ñehe ndoy-apoi mbahe naporai vahe pēu. ¹⁰ Esepia, co nungar viharēhisa Tūpa oipota vahe yande angaipa mboasi uca, chupe yande yevi água. Ipipe sui niha yañepisiro yande pihañemoñeta rerovaēhisa pipe. Co ivi pipendar tēi viharēhisa rumo manosa tēi vireco yandeu. ¹¹ Pe rumo peñemosano pe viharēhisa upe; ahe aviye Tūpa upe. ¡Pesepia ru co mbahe aviye vahe pe recocuer pipe oime vahe evoco Tūpa remimbou pe viharēhisa sui cute! Supi eté rumo, peyapisaca iyavei pe querēhisa pipe peyoepi, pemboasi pe piha pipe ité co mbahe tēi oimese pe pāhuve, iyavei peyembosiquiye peico. Ichui che repia pota ité peye, iyavei pequerēhi ité mbahe moingatu água. Sese pemboyepepi ité evoco mbahe tēi aposar peyesui. Che aicua cute pēu ndahei pe piha rupi co nungar mbahe tēi oimese. ¹² Cuese aicuachiase evoco che ñehe imondo pēu, ndahei ava mbahe tēi aposar reseño, ndahei avei mbahe tēi oiporara vahe reseño, che rumo aipota catu peicua pe ore raisusa pereco vahe oreu nara Tūpa rovaque. ¹³ Co rese ore oroyembovharete.

Iyavei orovīha catu Tito yembovhaha repiase. Esepia, pe avei niha opacatu pembovīha catu ité pe recocuer pipe. ¹⁴ “Co Corinto pendar ava aviye ité” ahe Tito upe pe mombehu cuese. Che ñehe pe resendar aviye ité, ipipe nachi eté. Inungar oromombehu mbahe supi tupri vahe pēu yepi; inungar tupri avei supi eté mbahe oromombehu vahe pe rese yeroyasave Tito upe. ¹⁵ Iyavei cūritei ahe pe raisu catu ité pe rese oma-henduhase opacatu pe poreroyasa rese. Iyavei peipisi tupri

ité imboeteisave sereco. ¹⁶ ¡Ayeroya ité pe rese, sese avíha ité!

8

Ava querēhisa porerecosa mundo água Jerusalén pendar upe

¹ Che rivireta, cûritei che amombehu potami pêu mara ehi mbahe tupri apo Tûpa ava viroyasar upe ívi Macedonia rupi. ² Yepe ahe ava recocuer yavai eté yuvireco chupe secoâhasa pipe viña, ovihareteño rumo ipipe yuvireco; yepe iparaisu vahe pâve têi, iporerecoño ité rumo yuvireco. ³ Supi eté oquerēhisa pipe omundo ité ocatuguer rupi; amove oseca iri mbahe güemimbotar rupi yuvireco. ⁴ Ahe, “Ore avei catu toroipítivi ambuae Tûpa reroyasar” ehi yuvireco. ⁵ Ahe rumo oñocua iri ore pihañemoñetasa yuvireco. Yande Yar upe rane oyemondo. Ipare Tûpa remimbotar rupi ëgue ehi avei oreu yuvireco. ⁶ Evocoiyase ore aipo orohe Tito upe pêu: “Tomboyepi iri co porerecosa monuha água ava upe” orohe. Esepia, yipindar ahe osose pe pâhuve, ahe pe pítivi imboipi água. ⁷ Aicua peyapo tupri ité opacatu co ambuae mbahe: peyeroya tupri ité yande Yar rese, pemombehu tupri ai Tûpa ñehesa, pereco ité Tûpa suindar mbahecusa, pequerêhi ité Tûpa upe mbahe apo água iyavei ore raisu ité peye. Evocoiyase ëgue peye aveira co nungar poroaisusa apo.

⁸ Ndahei pe cuaisa pipe aipo ahe pêu, che rumo ‘toicua ambuae ava rembiapo oquerêhisa pipe oyapo vahe yuvireco’ che yapave. Sese niha peicuara, supi eté vahe pîha pe poroaisusa. ⁹ Peicua niha pe yande Yar Jesucristo poroaisusa. Yepe ahe mbahe yar secoi viña, opa rumo oseya ombahe pe recocuer rese; iparaisu pipe sui niha pe íva pendar mbahe pereco.

¹⁰ Pêu mbahe avíye água che añahe co nungar mbahe rese. Cuese ambuae araviter pe niha yipindar pemboipi co mbahe apo. Ahe niha pe querêhisa pipe peyapo. ¹¹ Cûritei pemboaviye catu pe porerecosa pe querêhisa yipindar pe reco vahe pipe; pemondoñora mbahe peicatuguer rupi. ¹² Esepia, acoi que ava omundo pota vahe mbahe, Tûpa oipisi ahe iporerecosa que mbahe virecomi vahe; ahe rumo ndoporandui mbahe ndayarecoi vahe rese yandeu.

¹³ “Toyemombaraisu ava pítiviisa pipe yuvireco” ndahei rumo pêu. ¹⁴ Cûritei mbahe pe rembiereco eta pipe peipítivi catu ambuae ava ipane vahe mbahe yuvireco chupe. Virecomise mbahe, ahe avei pe pítiviira yuvireco pêu mbahe ipanese. Evocoiyase pe recocuer oyoya tupri itera. ¹⁵ Inungar Tûpa ñehe mombehusar aipo ehi icuachiapri pipe aracahe: “Acoi omonuha ati vahe mbahe, ndasumbirei eté mbahe chupe; iyavei acoi moviromi têi mbahe omonuha vahe, nipanei mbahe chupe” ehi.

Pablo omondo Tito indugüer reseve Corinto ve

¹⁶ Aviye Tūpa upe ombopihañemoñeta Tito pe rese inungar che pihañemoñetasa pe rese yepi. ¹⁷ Ahe viroya ité che ñehe. Güemimbotar rupi eté rumo iquerēhi oso água pe repia.

¹⁸ Supi oromondo yande rivri, ahe opacatu ambuae Jesús reroyasar oicua iporavíqu tupri aise ñehesa písirosa rese yuvireco. ¹⁹ Sese opacatu oiporavo yuvireco ore rupi iguata água ore pítivii vaherā avei co porerecosa reraso água. Ore ñgue orohe oroico yande Yar mboetei água rese ‘toicua ore querēhisa pipe ité oroporopítivii yuvireco’ ore yapave. ²⁰ Ore ndoroipotai que ava oñeha tēira ore rese yuvireco co porerecosa monuhasa pipe sui. ²¹ Esepia, ore oroyapo pota mbahe aviye vahe, ndahei Tūpa rovaque güeraño, opacatu ava rembiepiave avei.

²² Supi avei oromondo ambuae yande rivri. Ahe omboycua ité oreu oquerēhisa opacatu mbahe güembiapo pipe. Ahe cüritei iquerēhi catu ité. Esepia, oyeroya ité pe rese. ²³ Acoi oporanduse que ava Tito rese yuvireco pēu, “Ahe oyoya Pablo rese oporavíqu vahe pe pítivii água” peyeñora. Acoi oporanduse avei ambuae yande rivri rese yuvireco pēu, “Ahe ambuae Jesús reroyasareta remimbou Cristo mboeteisar yuvirecoi” peyeño aveira chupe. ²⁴ Sese, pe recocuer cua água, pemboyecua catu pe poroaisusa supi eté vahe chupe yuvireco. Evocoiyase toviroya ité che ayeroyase iyavei ayembovihase pe recocuer rese yuvireco.

9

Porerecosa imonuhapri Jesús reroyasar upe

¹ Porerecosa imonuhapri Jesús reroyasar upe nara rese rumo nañeha iri pēu. ² Esepia, che aicua pequerēhi ité ipítivii água. Evocoiyase che viharetesa pipe Macedonia iguar Jesús reroyasar upe aipo ahe yepi: “Acaya iguar, ahe oyemoingatu voi eté ambuae Jesús reroyasareta pítivii água cuese ambuae araviter suive yuvireco” ahe yuvireco chupe. Evocoiyase pequerēhise ité ipítivii água, ahese setaño ité oyemonguerēhi yuvireco. ³ Che rumo amondo co yande rivri yuvireco pēu cüritei ‘ñgue tehi tēi eme che ñehesa aviye vahe sesendar yuvireco’ viya pēu. Pe yemoingatu tupri água ité aipo ahe pēu; ⁴ aní acoi arasose Macedonia pendar cheyeupi, sembiepiave ndapeyemoingatu vitei chira peico. Ñgue peyese ore mochi guasu uca tietera peye. Esepia, che ayeroya ité pe rese. Pe avei evocoiyase pechīra. ⁵ Sese che pihañemoñeta yipindar añahe co mbosapi yande rivri upe yuvireco, ahe ranei ore renonde yuviraso água pe piri pe pítivii água co porerecosa aviye

vahe monuha ãgua rese, acoi cuese pe remimombehugüer rupi. Evocoiyase ahe pe porerecosa pe remimonuha opara pemoingatu tupri ité pe avagüer mboyecua ãgua, ndahei chira rumo pe recatéhisa pipe.

⁶ Peyemomahenduha co rese: acoi noñoti atiimi vahe mbahe, chupe moviromi tēi avei iha; acoi oñoti ati vahe rumo mbahe, ahe setá catu avei iha chupe. ⁷ Ñepei-peí iya opíhañemoñetasa rupi omondora oporerecosa Tūpa upe yuvireco, ndahei chira opíha vĩracuasa pipe tēi iyavei ndahei chiaveira ambuae ava ocuai píratasa pipe tēi. Esepio, Tūpa osaisu ava oviharetesa pipe omondo vahe oporerecosa chupe. ⁸ Tūpa niha oicatu opacatu mbahe aviye vahe mondo ãgua pēu ari yacatu rupi pereco vaherā opacatu mbahe ipane vahe pēu iyavei sumbírer pipe opacatu ambuae mbahe aviye vahe rese pe poropítivii ãgua. ⁹ Inungar icuachiapri pipe aipo ehi:

“Ahe iporereco ai iparaísu vahe rese yepi. Ahe mbahe aviye vahe sembiapo nocañii chietera” ehi.

¹⁰ Tūpa niha ombou mbahe rähii ava remitíra, mbahe semi-hura avei. Sese ombou catura mbahe pēu iyavei ombouvicha catura pe rembiapo aviye vahe ava pítivii ãgua. ¹¹ Tūpa ombou catura opacatu mbahe pe rembierecorā ava upe imondo catu ãgua pe avasa pipe. Ore orovirasose porerecosa pe remimbou yande rivireta upe, ahe evocoiyase, “Aviye ndeu” ehira Tūpa upe yuvireco. ¹² Esepio, co pemondo vahe yande rivireta pítivii ãgua, ndahei peipítivii mbahe ipane vahe rese güeraño, ichui avei niha, “Aviye Tūpa upe” ehira yuvireco. ¹³ Ahe evocoiyase omboeteira Tūpa yuvireco. Esepio, co pe poropítiviisa pipe pembboyecua itera pe Cristo ñehe reroyasa peico. Ahe avei omboeteira Tūpa yuvireco. Esepio, pe pemondoño itera mbahe pe porerecosa chupe iyavei opacatu ambuae ava upe. ¹⁴ Evocoiyase ahe oyeroquira pe rese iyavei pe raisu etepríra yuvireco. Esepio, Tūpa pe pítivii eté oporovasasa pipe. ¹⁵ ¡Aviye Tūpa upe! ¡Esepio, ahe ombou mbahe tuvichá vahe aviye catu vahe yande, ndayaicatui vahe mombehu tupri ãgua!

10

Pablo cuaita apóstol seco ãgua

¹ Che Pablo añehe Cristo poroaisusa, seco asiéhisa pipe avei pēu. Amove ava pe pāhu pendar, “Seco mbegüemi tēi yande pāhuve oicose, amombri güecose rumo oñehe píratá iteanga” aipo ehi tēi yuvireco cheu viña. ² Che rumo asose pe repia, ndaipotai che píratasa mboyecua ãgua pe pāhu pendar upe. Amove rumo ava pe pāhu pendar ipíhañemoñeta: “Oyapo

mbahe co ivi pípendar pihañemoñetas rupi tēi" ehi yuvireco cheu. Sese che ayemoingatuño ité evoco nungar ava upe añahe pírata vaherā. ³ Supi eté, yepe co ivi pípe oroicove viña, ore rumo ndoroyapoi mbahe ava co ivi pípendar rembiapo nungar. ⁴ Esepio, ore yoepisa ndahei ava co ivi pípendar yoepisa nungar; orovireco rumo Tūpa píratasa mbahe tēi seco pírata vahe recopi água ava aracuasa tēi recopi água avei. ⁵ Ahe ipípe ore opa orosecopi yepoepi-episa iyavei opacatu semiramira tēi vahe güeco ivate aisa pípe ndoicua uca potai vahe Tūpa recocuer ava upe. Iyavei opacatu ava pihañemoñeta raisa orosecopi Cristo reroya tupri água yuvireco. ⁶ Iyavei ore oroyemoingatu ité opacatu ndiporeroyai vahe recocuer reroyi água. Pe rane rumo peroya tupri.

⁷ Pe rumo pemaheño tēi ahe ava recocuer rese. Acoi ava pe pāhu pendar oicua vahe Cristo rese güecosa, toicua tupri avei ore Cristo rese ore recosa yuvireco. ⁸ Yepe ayeecomboívate che mborerecuasa rese pēu viña, ipípe rumo nachi eté. Esepio, yande Yar ombou mborerecuasa cheu pe recocuer moviracua tupri água, ndahei rumo pe recocuer momara água. ⁹ Aníchira, "Pablo yande mbosiquiye pota güembicuachía pípe" peye cheu. ¹⁰ Esepio, amove ava pe pāhu pendar, "Oñehe oicuachía vahe ombou yandeu, ahe ipíratá, yavai avei yandeu; ahe ité rumo aní angai vahe secoi yande pāhuve iyavei iñehe ëgue ehi tēi vahe" ehi yuvireco cheu. ¹¹ Toicua catu ru yuvireco: eipeve oroso irise, inungar amombehu che rembicuachía pípe amombri che recose, ëgue ahe tupri aveira yapo pe pāhuve.

¹² Ndoromboyoyai eté ore recocuer ava oyese tēi oñehe vahe recocuer rese. Esepio, omboyoyase oyese, ndoyapisacai eté yuvireco. ¹³ Ore rumo ore remimombehu pípe ndoroyapirasai chietera ore cuaita ore yeecomboívatesa pípe. Tūpa rumo güemimbotar rupi ombou ore poraviqui água oreu, eipeve pe rese ore poraviqui água avei. ¹⁴ Ore rumo ndoroyapirasai ore cuaita mombehusa icuachía pēu. Esepio, supi eté ore ranei eté oroico pe pāhuve, ore ranei avei oroviraso Cristo resendar ñehesa imombehu pēu. ¹⁵ Ndoroyapirasai avei ore ñehe pípe ambuae ava poraviquisa sui tēi. Ore rumo, orosáro ore oroporaviqui catu vaherā pe pāhuve Tūpa rese pe yeroyasa rupi. Ndoroyapirasai avei rumo ore cuaita. ¹⁶ Iyavei orosáro ñehesa písirosa resendar mombehu ava amombri catu yuvirecoi vahe upe. Ndahei chira rumo ambuae ava poraviqui agüer rese tēi oroyeecomboívate oroico.

¹⁷ Acoi ava oyeecomboívate pota vahe, toyeecomboívate catu yande Yar rese. ¹⁸ Esepio, acoi ava "che aico tupri" ehi

vahe ndahei ahe osē tupri güecoāhasa sui yande Yar rovaque; “Aviye ité co mbia” ehise rumo yande Yar chupe, ahe osē tupri güecoāhasa sui.

11

Pablo iyavei apóstol angahu tēi yuvirecoi vahe

¹ ¡Peñemosa iriñomi tēira cheu co che ñehe ndayaracuai vahe nungar pipe che ñehese! ² Esepia, che cherecatēhi ité pe rese, ahe tecatēhisa ou cheu Tūpa sui. Che aipota Cristo upe opomondo vaherā pe reco maranehisa pipe, inungar cuñatai ndaseco marai vahe imondopri cuimbahe upe imenda água. ³ Che rumo asiquiye co mbahe sui, inungar mboi ombopa Eva oporombopasa pipe, aviyeteramo Caruguar pe mbopa aveira pe pihañemoñetasa rerova água Cristo mboeteisa supi eté vahe sui. ⁴ Esepia, peñemosaño ava oñehe vahe pēu ambuae Jesús rese ndoyoyai vahe ore remimombehu rese. Ichui peipisi pe querēhisa pipe ambuae espíritu peipisi vahecuer sui. Iyavei ambuae ñehesa písirosa resendar peipisi avei ndoyoyai vahe ore pēu oromombehu vahe rese. ⁵ Che rumo namohai eté ivi coti catu tēi aicora evocoi supi peguata vahe apóstol yemboivate ai tēi vahe sui. ⁶ Yepe ndayembohei che ñehe tupri água ité, che rumo areco che mbahecuada, ahe oromboyecuaño ité opacatu ore rembiapo pipe pe rembiepi-ave.

⁷ Ndamombehui eté niha ñehesa písirosa resendar pe cheu imboepi água; pe recocuer mboivate catu água rumo Tūpa rovaque ñgue ahe che reco yemominisa pipe. ¿Mbahe tēi pīha ayapo ñgue ahese pēu? ⁸ Aipisi ambuae ava Jesús reroyasar sui guarepochi, pe recocuer rese che poravíqui água. ⁹ Iyavei acoi aicose pe pāhuve, ipane avei mbahe cheu. Ndopomañecoi eté rumo; yande rīvri ivi Macedonia pendar yugüeru vahe ombou mbahe ipane vahe yuvireco cheu. Ñgue ahe che pepoisupave pe mañecoēhi vichico. Ndopomañecoi chietera niha mbahe ipanese cheu. ¹⁰ Supi eté aicua supi tupri vahe mbahe Cristo suindar. Evocoyase supi eté avei che aicua ndipoi chietera que ava ivi Acaya rupi virocua vaherā co che viharetesa che sui yuvireco. ¹¹ ¿Mbahe rese pīha aipo ahe pēu? ¿Pe raisuēhisave pīha? ¡Tūpa rumo oicua che pe raisusa!

¹² Ayapoño itera rumo co mboravíqui cheu imboepiēhisa pipe vichico co ambuae pe pāhu pendar ava pe mbopaēhi água yuvireco. Esepia, che nungar yuvirecoi pota tēi viña. ¹³ Ahe rumo ndahei apóstol supi tupri vahe yuvirecoi, ahe oporombopa tēi, “Ore apóstol oroico” ehi tupri tēi yuvireco. ¹⁴ Yaicua niha Caruguar rerecuar oporombopa. Esepia, oyeapo inungar Tūpa rembiguai amove. ¹⁵ Sese yaicua avei

Caruguar povri pendar oporombopasa pipe oyeapo inungar Tūpa ñehe mombehusar yuvireco. ¡Ahe chupe rumo oimera Tūpa ñemoirosa mbahe sembiapocuer rupi curi!

Pablo oiporara mbahe-mbahe tēi apóstol güecosa pipe

¹⁶ Aipo ahe iri pēu: tipo eme ava “ndayaracuai” ehi vahe cheu. Acoi, “Égüe ehi oico” peyese cheu, tañeheño ayase ndayaracuai vahe nungar, che avei evocoiyase tayeecomboivateño vichico. ¹⁷ Ndahei rumo yande Yar che cuaisa pipe aipo ahe, che aracuaëhisa nungar pipe rumo aipo ahe che yemboivate aisa pipe. ¹⁸ Esephia niha, setá iteanga ava ahe ae tēi oyemboivate ai güecocuer aviye angahu vahe tēi pipe. Sese che avei ayemboivatera. ¹⁹ Esephia, yepe pe imbahecua vai vahe nungar peico, pemboyoyá catu pe querëhisa pipe ava ndayaracuai vahe. ²⁰ Pe niha pemboyoyaño acoi que mbiguai tēi nungar pe rereco vahe, que mbahe pe rembierereco sui tēi oicove vahe, que pe mbopa tēisar, pe reroírosar, que pe rova pete-petesar avei. ²¹ Che chïsa pipe aipo ahe co imombehu, ¡ore reco mbegüe etepri evoco nungar apo ãgua pēu!

Acoi oñehese ambuae ava oyeupendar mbahe rese oyemboivate aisa pipe, che avei evocoiyase ëgüe ahera. Aipo ahese rumo aviye ndayaracuai vahe nungar aico. ²² Ahe, “Che hebreo aico” ehise yuvireco, che avei ahe aico; “Che israelita aico” ehise, che avei ahe aico; “Che Abraham suindar aico” ehise yuvireco, che avei ahe ichuindar aico. ²³ “Che Cristo rembiguai aico” ehi yuvireco, che rumo sembiguai catu aico ichui yuvireco, aipo añehese aviye che ndayaracuai vahe aico. Aporavíqui catu rumo ichui yuvireco, setá catu soquendapri tēi aico yuvireco ichui, inupambri catu aico ichui yuvireco, setá rupi avei seni-seni che yuca uca che mombaraisusa pipe yuvireco. ²⁴ Cinco yupagüer judío che nupá iteanga treinta y nueve tupri tucumbo pipe yuvireco. ²⁵ Mbosapi yupagüer che nupasa ívira pipe, ñepei rupi evocoiyase che api-apisa ita pipe. Mbosapi yupagüer avei oñepapivii iar ipive che guatasa rupi cheu, ñepei pítu, ñepei ari avei avevui tēi para guasu avíter rupi vichico. ²⁶ Setá aguata opacatu rupi, iyavei iai rupi mbahe-mbahe tēi oime cheu, aico avei imonda rai vahe pâhuve; che mu judío mbahe tēi vahe pâhuve avei aico iyavei ndahei vahe che mu pâhuve no. Aico avei tecua guasu pipe mbahe tēisave, amombrí vahesa rupi iyavei para guasu pipe, iyavei mbahe-mbahe tēisave Jesús reroyasar angahu tēi pâhuve aico. ²⁷ Aporavíqui ité iyavei ayapo mbahe cheu yavai vahe; iyavei setá yupagüer ndaquei eté; aiporara avei tieporéhi iyavei husei; setá rupi ndacarui; sôhisagüer avei aiporara, ndacheturucuai avei vichico.

²⁸ Ndahei co opacatu mbahe güeraño aiporara, ari yacatu rupi che mahenduhaño ité avei opacatu tecua rupindar Jesús reroyasar rese. ²⁹ Oimese que oiporara vahe mbaherasicuer, che avei ayandu co mbaherasisa. Acoi que oimese oyaví uca vahe mbahe, che moñemoiro uca. ³⁰ Iyase che yeecomboivate ai água cheu, co mbahe omboyecua vahe che pírataëhisa rese ayeecomboivate aïño itera. ³¹ Yande Yar Jesucristo Ru Tüpa, ahe imboeteipri apirëhi secoi vahe, ahe oicua aipo che hesa supi tupri vahe. ³² Tecua Damasco ve aicose, mbororecuar guasu Aretas povri pendar mbororecuar oyocuai osundao co tecua roquendipive che rese osareco vaherã che roquenda água yuvireco viña; ³³ oime rumo ava iruova guasu pipe che mogüeyi vahe tecua áchisa metana rupi yuvireco. Ëgüe ahe añemi ichui yuvireco.

12

Tüpa omboyecua Pablo upe mbahe queraisa nungar pipe

¹ Ndipoi eté que ava mbahe oipisi vahe ahe ae tēi oyemboeteisa pipe. Che rumo amombehuño itera mbahe asepia vahe che quer nungar pipe iyavei yande Yar remimboyecua che aipisi vahe ichui. ² Che aicua mbia Cristo reroyasar, omomba cûritei catorce araviter ahe imbosapisa ivave seraso agüer. Ndicuasai güetecuer rese tie revo oso, anise ihä güeraño tie revo. Tüpa rumo oicua. ³⁻⁴ Che rumo, “Ëgüe ehi tie revo oico” ahe aipo mbia upe, Tüpa güeraño oicua. Serasopri ivave teco orisave. Aheye osendu ñehesa ndicuasai vahe. Ahe niha que ava tēi upe ndipotasai imombehu água yuvireco. ⁵ Evoco nungar mbia rese ayeecomboivatera; cheyese ité rumo ndayeeecomboivate ai chira. Che recocuer nimiratai vahe reseño ëgüe ahera vichico. ⁶ Yepe che añahe tupri aira cheyese viña, che revo ndahei chira ndayaracuai vahe nungar aico. Esepia, mbahe supi eté vahe amombehura viña. Ahe rumo ndayapoi. Esepia, ‘tipihañemoñeta catu che rembiapo rese, che remimombehugüer rese avei yuvireco che querve nungar mbahe mombehu rágüer sui’ viya. ⁷ Sese che yemboivate aiëhi água che quer nungar mbahe che píhamondii vahe rembiepiagüer rese Tüpa ombou teco asisa cheu. Ahe aviye yu che cutu guasu vahe, ndoyavii avei Caruguuar mara-mara tēi che rereco vahe. ⁸ Mbosapi yupagüer yande Yar upe aporandu ité teco asisa che sui serocua água rese viña. ⁹ Ahe rumo aipo ehi cheu: “Che porovasasa ndeu ambou vahe iyara nde ñemosa água. Esepia, che píratasa oyecua catu ité ava nimiratai vahe recocuer rese” ehi. Evocoiyase che ayemboviha catuño itera che reco nimiratai vahe rese. Ëgüe ehira Jesucristo píratasa oyecua che rese. ¹⁰ Sese Cristo rese che recosa pipe aviyeño

ité ndache pírataise, que ambuae ava oñehe raise che rese, que mbahe ipanese cheu, ambuae che reca-reca tēise che reco momara ãgua yuvíreco iyavei que mbahe yavai vahe aiporarase Cristo sui. Esepio, ayanduse che pírataéhisa, ahese che pírata catu.

Pablo ipihañemoñeta ité Jesús reroyasareta Corinto pendar rese

¹¹ Che ndayaracuai vahe nungar aico pēu, pe rese tēi rumo ēgue ahe. Iya rumo peñehe tupira che rese viña. Esepio, yepe ndahei seco ivate vahe aico viña, co apóstol angahu tēi rumo pe supi peguata vahe ndahei ivate catu vahe che sui yuvíreco. ¹² Che ñemosa tupri pipe mboravíquí ayapo pe pāhuve. Ayapo mbahe poromondiisa mbahe pesepia yesapiha rai vahe imboyecua ãgua che supi eté vahe apóstol che recosa. ¹³ Co mbahe reseño pe ivi coti catu peico ambuae Jesús reroyasareta sui, che ndopomañecoise mbahe cheu pembou vaherā rese. ¿Ayaví tie che cuaita, ēgue ahese pēu? ¡Peñero sese cheu!

¹⁴ Cūritei che ayemoingatu imombosapisa rupi che so ãgua pe piri. Iyavei ndopomañecoi chira mbahe rese. Esepio, ndasecai mbahe pe rembiereco; pe recocuer ité rumo aipota. Esepio, iyesupa omonuha guarepochi guahir upe, ndahei tahir tēi ēgue ehi oyesupa upe yepi. ¹⁵ Evocoiyase che queréhisa pipe amondora opacatu che mbahe areco vahe pe pítivíi ãgua iyavei opacatu che recocuer rese ayemondo pēu pe reco tupri ãgua. Che rumo opoaisu ité, pe tie revo ndache raisu tuprii eté peye.

¹⁶ Cheu mbahe ipanese, ndaporandui eté mbahe pereco vahe rese pēu. Amove rumo ava, “Yande mbopa ãgua tēi ēgue ehi Pablo yandeu” ehi tēi yuvíreco. ¹⁷ ¿Opombopa uca tie ava pēu che remimondo pipe? ¹⁸ Che Tito upe, “Eresora ipiri yuvíreco” ahe. Supi avei ambuae yande rivri Tūpa reroyasar amondo. ¿Pembopa tie Tito? Oyoya tupri mbahe oroyapo Tūpa upe ñepei ore pihañemoñetasa pipe.

¹⁹ Che rivireta, che rembiaisu, pe revo pepihañemoñeta ore oroicuachía co pēu, ore yoepi ãgua tēi. Ēgue ndorohei eté rumo. Ore rumo Cristo rese ore reco pipe oroñehe Tūpa rovaque. Opacatu ité niha mbahe oroyapo pe recocuer moviracua catu ãgua. ²⁰ Che asiquiye asose eiipeve pe repia, aviyeteramo ndahei chira che piha rupi pe recocuer. Iyavei pe aviyeteramo ēgue peye aveira che repiase. Che asiquiye ité, oime revo pe pāhuve yepoepi-episa, pe pihañemoñeta raisa ava mbahe pota raisa pipe, pe ñemoirosa peyeupe. Iyavei aviyeteramo oimera pe pāhuve ava oyeupeño tēi mbahe oipota vahe, imahechiroi ai vahe iyavei oñehe-ñehe tēi vahe ambuae ava rese, seco ivate ai vahe iyavei ndiporovíroyai

vahe. ²¹ Asiquiye avei aso irise pe repia, omboura Tūpa pe sui che chī âgua, che mboyaseho uca tiëtera peye setá pe cueseve peyemboangaipa vahe rese iyavei ndapemboasií etese mbahe tēi, yemboaguasa-guasa tēisa iyavei que mbahe pe remimbotarai peyapo vahecuer.

13

Poromboaracuasa iyavei mahenduhasa

¹ Co niha imombosapisa yupagüer asora pe repia. Pemombehu potase que ava rembiapo ai cheu, toime que ñuvirío, anise mbosapi oicua vahe sembiapo ai. ² Co yipindar oyemboangaipa vahe upe opa aipo ahe: “Peicua catu” ahe che imoñuvirío yupagüesa pipe aicose pe piri. Cûritei amombri aico pe sui, amombehu irira rumo co pēu. Co yipindar vahe upe iyavei opacatu ambuae angaipa pipe yuvirecoi vahe upe aipo ahe: aso irise pe pâhuve, ndopoparaisuereco iri chira. ³ Esepia, pe peipota ité che recoâha âgua ‘¿Cristo ité pîha omoñehe uca?’ pe yapave cheu. Cristo ndaseco mbegüemi pēu mbahe apo oico. Ahe rumo omboyecua opíratasa pēu. ⁴ Supi eté niha ahe yaticasa, inungar ava nipiatai vahe. Cûritei rumo ahe oicove Tūpa píratasa pipe. Ëgüe orohe avei ore seco píratañhisa sereco. Oroicose rumo sese oroico Tūpa píratasa pipe pe rese hañeco âgua.

⁵ Pemahecua tupri catu pe recocuer rese: ¿peico ité pîha pe Cristo rese yeroyasa pipe? ¿Ndapeicuai vo Jesucristo sec-oise pe rese, pesëse pe recoâhaha sui? ⁶ Pe revo peicuara ore ndorocañi tēi vahe oroico ore recoâhaha pipe. ⁷ Iyavei oroyerure pe rese Tūpa upe ‘toyapo eme mbahe tēi yuvireco’ ore hesave. Ndahei rumo ore ivate catu vahe mbahe tēi rasa pare mboyecuasave ëgüe orohe; co catu ‘toyapo mbahe aviyé vahe yuvireco’ ore yapave, yepe pēu ndoyavii orocañi tēi vahe oroico viña. ⁸ Esepia, ndiyai mbahe supi tupri vahe amotarëhi âgua oreu; ëgüe ehi rumo sese catu ité oroñehe. ⁹ Sese orovîhaño ité norepírataise, ore rumo oroiporta ité pe momirata; iyavei ore oroyerure catuño itera pe recocuer catupri catu âgua rese. ¹⁰ Aicuachía co che ñehe imondo pēu pe piri che so âgua renonde. Acoi asose, namboyecua píratai chira che mborerecuasa eiþeve. Ahe niha yande Yar ombou vahe cheu pe reco momirata catu âgua, ndahei pe reco momara âgua.

¹¹ Imomba âgua, che rivireta, aipota pevharetera peico. Peseca avei pe reco tupri catu âgua peyeupe, peyemonguerëhi catu, oyoya guasu peico tupri avei peyese mbahe tupri pipe. Evocoiyase Tūpa oporoaisusa pipe, güeco tuprisa pipe avei secoira pe rese. ¹² Pemombehu che mahenduhasa ñepei-peí

peyeupe pe yeovaupitesa pipe. ¹³ Opacatu ambuae yande rivri, Tūpa reroyasar avei omondo omahenduhasa yuvireco pēu.

¹⁴ Peipisi yande Yar Jesucristo porovasasa, Tūpa poroaisusa iyavei Espíritu Santo tasecoi opacatu pe rese. Aipo rupive che ñehe pēu.

PABLO REMBICUACHIA GALACIA PENDAR UPE GALATAS

Pablo mahenduhasa Jesús reroyasar Galacia pendar upe

¹ Che, Pablo, imondopri aico apóstol che reco água. Ndahei ava tēi sui ayu pēu iyavei ndahei ava tēi che cuai; Jesucristo ité niha che cuai iyavei yande Ru Tūpa che mbou acoi ombogüerayevi vahecuer Guahir. ² Che, Pablo, iyavei opacatu Jesús reroyasar yuvirecoi vahe cohaye oroicuachía co ore ñehe pēu, pe opacatu Jesús reroyasar Galacia pipe peico vahe. ³ Tapeipisi yande Ru Tūpa, yande Yar Jesucristo porovasasa pe reco tupri água. ⁴ Ahe acoi oyemondo vahe omano água yande angaipá repirā. Ëgüe ehi cüritei yande renose co iví pipe mbahe-mbahe tēi sui yande Ru Tūpa remimbotar rupi. ⁵ ¡Imboeteipri apirēhi Tu tasecoi!

Ndipoi ambuae ñehesa poropísirosa resendar

⁶ Che pihamondii etepri peye. Esepiá, peyepepi poyava peico Tūpa sui. Ahe niha pe renoi Guahir Jesucristo pe raisusa pipe sui. Pe rumo, peroya pota ambuae tēi yembohesa pe ñepisiro água peico viña. ⁷ Supi eté ndipoi ambuae ñehesa písirosa resendar. Ëgüe ehi rumo, oime ava pe mañeco tēi vahe pe mbopa água ñehesa supi tupri vahe sui yuvireco. Iyavei virova pota co ñehesa Jesucristo resendar yuvireco. ⁸ Oimese rumo que ambuae ava oñehe vahe poropísirosa angahu tēi rese ndoyoyai vahe che ñehesa rese pesendu vahe yípisuve, evoco nungar ava upe “Toime Tūpa ñemoírosa” ahe yepe chera viña, anise que Tūpa rembiguai iva pendar avei no. ⁹ Amboyupagüe iri, “Evoco nungar ava upe toime ité Tūpa ñemoírosa” ahe.

¹⁰ Aipo che he pipe, ndasecai ava tēi, “Co mbia aviye vahe” he água cheu, Tūpa rumo aseca cheu aipo he água. Esepiá, java remimbotar rupi tēi mbahe ayapo vitese, evocoiyase ndahei chietera Cristo rembiguai aico viña!

Mara ehi Pablo apóstol güéco água

¹¹ Che rivireta, tapeicua co ñehesa poropísirosa resendar amombehu vahe ava upe ndahei ava tēi pihañemoñetasa. ¹² Ndahei avei ava tēi che mbohe; Jesucristo ité niha oicua uca cheu.

¹³ Pe niha pesendu yípindar che recocuer resendar, che mu judío yembohesa rupi aguata vitese aracaco. Che píratasa pipe tēi aseca opacatu Tūpa rembiporavo Jesús reroyasar momara

água. ¹⁴ Ëgüe ahe che ayemboívate ai catu che mboetasa eta sui judío yembohesa pípe. Ayapó catu opacatu che recocuer pípe yípindar che ramoi eta yembohe agüer rupi eté vichico. ¹⁵ Túpa rumo yípive che ha viteëhiseve che poravo oyeupe nara. Iyavei oporoaisusa pípe che renoi güemimbotar rupi. ¹⁶ Ëgüe ehi ahe oicua uca Guahir cheu, che imombehu água co ñehesa Tahir recocuer resendar ava ndahei vahe judío upe. Ndasoi rumo ava tēi upe icua água; ¹⁷ ndasoi avei Jerusalén ve yípive apóstol yuvirecoi vahe repia água. Che rumo aso voi eté ivi Arabia ve. Coiyé ayevi tecua Damasco ve vitu.

¹⁸ Ichui mbosapi aravíter che seroya pare, aso tecua guasu Jerusalén ve cute. Ahese ramo Pedro ambori quince ari rupi güerañomi tēi. ¹⁹ Ndasepiai eté rumo ambuae apóstol. Yande Yar rívrí Santiago güeraño asepia. ²⁰ Túpa oicua co mbahe aicuachía vahe pēu, supi tupri vahe ité.

²¹ Ipare aso ivi Siria ve, Cilicia ve avei no. ²² Yande Yar reroyasar rumo oñemonuha vahe ivi Judea ve ndache cuai eté yuvireco. ²³ Co oyanduño tēi yuvireco ambuae ava aipo ehi vahe: “Acoi aracaco yande reca-reca catu vahe yandeu mbahe tēi apo água, cûrитеi omombehu Jesucristo reroya água oico” ehi, “Ahe acoi yípindar yande moçañi pota rai vahe oico” ehi yuvireco cheu. ²⁴ Ahese, “Imboeteipri Túpa tasecoi” ehi yuvireco che recocuer rese.

2

Ambuae apóstol, “Aviye ité Pablo porombohesa” ehi yuvireco

¹⁻² Coiye catorce aravíter pare, Túpa omboynecua cheu Jerusalén ve che yevi água. Evocoiyase aso iri aheve. Ahese oroso Bernabé rese, Tito avei orovíraso oreyeupi. Aheve yípindar opacatu Jesús reroyasar rerecuar reseño rane oroñemonuha. Esepia, ndaiptai che rembiapo opítara ëgüe ehi tēi vaherã. Evocoiyase amombehu co ñehesa poropísirosa resendar chupe yuvireco acoi amombehu vahe ava eta ndahei vahe judío pâhuve. ³⁻⁴ Oime rumo amove yande rívrí angahu tēi, ahe yuviroique mbegüe vahe ore pâhuve ‘yasec-oepia rane, ¿supi eté ndovíroyai Moisés porocuaita Jesucristo reroyasa pípe yuvireco?’ oyapave. Oipota ahe ore reroyevi iri Moisés porocuaitavríve tēi yuvireco viña. Ahese che ndugüer Tito upe, “¡Eyembocircuncida Moisés porocuaita rupi!” ehi yuvireco. Esepia, ahe ndahei vahe judío secoi. ⁵ Ore rumo ndoroipotai eté semimbotar apo água yuvireco chupe. Esepia, ‘tovireco viteño oyese co ñehesa písirosa resendar supi tupri vahe yuvireco’ ore yapave pēu.

⁶ Co rumo acoi icuapri ité Jesús reroyasar rerecuar, nomombehui eté yembohesa ambuae vahe yuvireco cheu,

oyoyaño ité che porombohesa rese. (Yepe ocuaita virecora ivate yuvireco viña. Che rumo nañecuñaroi chietera che recocuer sui. Esepiá niha, Túpa ndahei ava rete tēi osepiá.) ⁷Ahe rumo oicua yuvireco Túpa che cuai oñehengagüer poropísirosa resendar mombehu ãgua ndahei vahe judío yuvirecoi vahe upe, inungar omondo Pedro oñehengagüer poropísirosa resendar mombehu ãgua judío upe. ⁸Esepiá, inungar Túpa omondo Pedro upe apóstol seco ãgua ava judío upe nara, ēgue ehi avei imbou apóstol che reco ãgua ava ndahei vahe judío upe nara.

⁹Sese Santiago, Pedro iyavei Juan, ahe chupe, “Oyemoviracua vahe Jesús reroyasar pâhuve” ehi yuvireco, ahe oicua yuvireco Túpa ombou vahe oporovasasa cheu. Ahese imboetasa ore recosa pipe che po pisi yuvireco, Bernabé upe avei ēgue ehi yuvireco. Iyavei ipiha rupi eté ore oroporavíqui vaherã ava ndahei vahe judío pâhuve oroico, inungar ahe oporavíqui judío pâhuve yuvireco. ¹⁰Co reseño oporandu yuvireco oreu: “Peyemomahenduhami ava iparaísu vahe pítivii ãgua rese” ehi. Yipive ité rumo che ēgue ahe pota vichico yepi.

Pablo oñeho pírata Pedro upe sembiavi rese Antioquía ve

¹¹Iyavei osose Pedro tecua Antioquía ve. Aheve oyaví güecocuer. Evocoiyase añahe pírata sovai eté chupe mbahe sembiavi rese. ¹²Esepiá, yipindar ahe ocaru ndahei vahe judío piri viña. Ipare rumo, oyepotase ambuae judío Jesús reroyasar Santiago mboetasa yuvireco, ahese Pedro osiriño ichui osiquiyepave. Iyavei ndocaru iri ipiri. Esepiá, ahe Jesús reroyasar judío yugüeru vahe “judío recocuer rupi yaguatara yande ñepisiro ãgua” ehi vahe ité yuvireco viña. ¹³Evocoiyase ambuae Jesús reroyasar judío avei osiriño tēi supive yuvireco. Bernabé avei eté supive ēgue ehiño tēi. ¹⁴Che asepiase rumo, ndahoyoyai secocuer yuvireco co ñehesa poropísirosa resendar supi tupri vahe rese. Ichui Pedro upe añahe opacatu Jesús reroyasar rovaque: “Nde niha judío, ereico rumo inungar ndahei vahe judío. Cûritei rumo erembohe tēi nde rembiapo pipe evocoí ava ndahei vahe judío Jesús reroyasar judío rereco uca ãgua” ahe chupe.

Judío, ndahei vahe judío oyoya oñepisiro yuvireco Cristo rese oyeroysa pipe

¹⁵Yande niha judío yande hasa suive yaico, ndahei ava ndahei vahe judío nungar yangaipa vahe yaico. ¹⁶Cûritei rumo yaicua, ndipoi eté que ava seco catupri vahe Túpa rovaque Moisés porocuaita mboavíyesa pipe. Jesucristo rese yeroyasa pipeño ité rumo yande reco catupri. Sese yande

yayeroya ité Jesucristo rese, “Co seco catupri vahe” Tūpa he áqua yandeu. Ëgüe ehi eté seroya pipe, ndahei acoi porocuaita tēi reroyasa pipe. Esepiá, ndipoi chietera que ñepei ava seco catupri vahe Tūpa rovaque evocoí porocuaita tēi aposa pipe.

¹⁷Yasecase yande reco catupri áqua Cristo rese yande yeroyasa pipe, ipipe yaicuase angaipa viyar yande reco, ¿Cristo pīha evocoiyase yande mboangaipa? ¡Aní eté! ¹⁸Che amocañise mbahe, ipare rumo amopuha irise, che evocoiyase ayemboangaipa ipipe. ¹⁹Esepiá, ndaicatuise Moisés porocuaita reroya tupri che ñepisiro áqua, ahese ocañi tēi vahe aico ipipe. Ichui rumo Jesucristo reroyasa pipe asupití Tūpa upe nara che recove áqua. Esepiá, che aviyé yaticapri aico Cristo rese. ²⁰Sese ndahe iri che ité aicove; Tūpa Rahír Cristo rumo che rese secoí. Sese ité ayeroya che retecuer pipe che recove áqua. Ahe niha oyemondo omano áqua che raisupave. ²¹Naroiroi eté co Tūpa porovasasa. Esepiá, ava seco catupríra Tūpa rovaque porocuaita tēi reroya pipe viña, evocoiyase Cristo mano agüer ëgüe ehi tēi etera viña.

3

Porocuaita iyavei yeroyasa

¹¡Ndapembahecuai eté pe Galacia pendar! Pe ndoyavii ipaye vahe remimbopa peico. Oromombehu tupri niha pe rovai eté acoi Jesucristo curusu rese yatica agüer pēu. ²¡Pemboyecua co che porandusa cheu! ¿Moisés porocuaita mboyeroya pipe pīha peipisi Espíritu Tūpa suindar, co ñehesa pesendu vahecuer reroya pipe tie? ³¡Ndapembahecuai eté! Yipindar Espíritu pipe pemboipi Cristo rupi pe guata áqua. ¿Ëgüe peye aveira pīha pe pīratasa pipe tēi pe guata tupri áqua Cristo rupi cūritei? ⁴¿Ndape pītivíimi eté vo acoi opacatu pe paraíusa Cristo recocuer rese? ¡Pe pītivíimira tarahu viña! ⁵Tūpa niha omundo oEspíritu pe rese iyavei oyapo poromondiisa pe pāhuve. ¿Mahera pīha oyapo? Esepiá, co ñehesa pesendu vahe peroya ité, sese ëgüe ehi pēu ndahei Moisés porocuaita tēi reroya pipe.

⁶Esepiá, aracahe Abraham oyeroja ité Tūpa rese, ipipe sui Tūpa oipisi seco catupri vahe nungar oyeupe nara. ⁷Sese iya ité peicuara opacatu acoi oyeroja vahe Tūpa rese yuvireco, ahe Abraham suindar supi tupri vahe. ⁸Iyavei Tūpa Ñehengagüer icuachiapri pipe omombehu ité senondeve Tūpa oipisi aveira opacatu oyese oyeroja vahe ndahei vahe judío co ivi pipendar oyeupe nara. Iyavei omombehu co ñehesa icatupri vahe Abraham upe: “Opacatu ava ivi pipendar sovasapríra yuvireco nde sui” ehi. ⁹Evocoiyase Tūpa osovásara cūriteindar oyese yeroyasareta inungar Abraham aracahe.

¹⁰ Acoi seco catupri pota vahe Moisés porocuaita pipe tēi yuvirecoi vahe, ahe Tūpa ñemoirosavrive tēi yuvirecoira. Esepio, icuachiapri aracahendar pipe aipo ehi: “Opacatu ava nomboaviyei vahe ité opacatu Tūpa porocuaita icuachiapri pipe yepi, ahe iñemoirosavrive tēi yuvirecoira” ehi. ¹¹ Sese, co omboyecua tupri yandeu ndahei Moisés porocuaita reroyasa pipe tēi Tūpa, “Co seco catupri vahe” ehi ava upe. Esepio, icuachiapri aracahendar pipe aipo ehi: “Acoi ava seco catupri vahe oicovera Tūpa rese oyeroyasa pipe sui” ehi. ¹² Moisés porocuaita ndahoyoyai Cristo rese yeroyasa rese. Esepio, ahe porocuaita aipo ehi: “Acoi ava oico pota vahe co porocuaita pipe, tomboaviye tupri ité opacatu porocuaita güecove âgua” ehi.

¹³ Moisés porocuaita mboaviyeëhisa pipe yacañi tēira viña. Cristo rumo yande renose yande cañi tēi rägür sui. Ahe ae opa oipisi ñemoirosa yande repirā. Esepio, icuachiapri aracahendar pipe aipo ehi: “Opacatu ava imboyasecopri ivira rese, oipisi Tūpa ñemoirosa yuvireco” ehi. ¹⁴ Ëgue ehi Cristo yandeu ‘toipisi ava ndahei vahe judío che Ru porovasasa che rembiapo sui’ oyapave. Ahe porovasasa Tūpa omombehu vahecuer Abraham upe aracahe. Ipipe sui yande opacatu yaipisi Espíritu imombehupri yayeroyase Cristo rese cûritei.

Porocuaita iyavei Tūpa güemimombehugüer omboaviye vaherā

¹⁵ Iyavei, che rivireta, amboyoya pota mbahe co ivi pipendar mbahe rese. Inungar acoi que ava ñepei reseve oicuachiase güemimbotar omombehu vahe, ahese ndipoi que ambuae ava omboyeaho vaherā iyavei ndipoi que ambuae ava omboyeapi iri vaherā. ¹⁶ Ëgue ehi avei Tūpa remimombehugüer Abraham upe aracahe. Esepio, oñehe ñepei reseve chupe iyavei ichuindar upe avei. Tūpa Ñehengagüer icuachiapri pipe: “Nde suindareta upe” ndehi, inungar-ra que ava rehii upe viña. Ëgue ehi rumo, “Nde suindar upe ité” ehi ‘ñepei ava’ ohesa pipe, ahe Tūpa Rembiporavo Jesucristo. ¹⁷ Co mbahe amombehu pota pēu: evoco porocuaita Tūpa ombou vahecuer cuatrocientos treinta aravíter pare, ndoicatui chittera Tūpa ñepei reseve Abraham upe omombehu vahecuer iyavei oñehe omboaviye vaherā mboyeho âgua. ¹⁸ Supi eté acoi Tūpa suindar ou vaherā porerecosa Moisés porocuaita mboaviyesa pipe suise viña, ahese ndahei chiaveira Tūpa remimombehugüer sui. Ahe rumo ñepei reseve Tūpa remimombehugüer rupi Abraham upendar porerecosa.

¹⁹ ¿Mahera pîha evocoiyase avkiye Moisés porocuaita? Esepio, ava poreroyaëhisa cua âgua Tūpa ombou oporocuaita Moisés upe aracahe. Co porocuaitavrive rumo ava yuvirecoi

acoi oyepotase voi Abraham suindar Jesús Tūpa remimombe-hugüer rupi. Yipindar rumo Tūpa oyocuai güembiguai iva pendar oporocuaita mombehu água Moisés upe aracahe ‘tomombehu evocoiyase Moisés che porocuaita opacatu ava upe’ oyapave. ²⁰ Ñepei ava rese oñemoñetase, ndipotasai ambuae imoingatu água. Tūpa niha ñepei vahe secoi.

Mbahe sui Tūpa ombou oporocuaita

21 “Moisés porocuaita co cotí tēi Tūpa remimombehugüer imboaviyepirā sui” aipo ndahei eté pēu. Esepia, acoi Tūpa omondere que porocuaita ombou vaherā tecovesa apirēhi ava upe imboaviyesa pipe, evocoiyase porocuaita reroya pipe yande reco catupira Tūpa rovaque viña. ²² Icuachiapri aracahendar pipe rumo omombehu ité co: opacatu ava inungar mbiguai tēi oangaipa pipe yuvirecoi. Evocoi ēgue ehi, Jesucristo rese yande yeroyasa pipe yasē vaherā ichui mbahe imombehupri pisi água.

²³ Yipindar rumo mbiguai nungar yaico Tūpa nomboyecua viteise Guahir rese yande yeroya água. ²⁴ Inungar chihivahemi tēi, ēgue yahe porocuaitavriye yaico yipindar. Ahe porocuaita rumo yande mbohe Cristo yu água ‘toyeroya Cristo rese güeco catupri água curi’ oya yandeu. ²⁵ Cūritei rumo oime Jesucristo rese yeroya água cute. Evocoiyase ndahe iri ahe porocuaitavriye yaico. ²⁶ Pe niha opacatu Tūpa rahir peico Jesucristo rese yeroya pipe. ²⁷ Opacatu pe ñapiramombri peico vahe Jesucristo rupi pe guata água, secocuer avei pereco. ²⁸ Iyavei ndipoi eté yemboyahosa Jesucristo rese yaicose, yepera que judío viña, ndahei vahe judío; anise mbiguai, ndahei vahe mbiguai; que cuimbahe, cuña avei. Esepia, opacatu ñepei vahe nungar ité yaico Cristo rese. ²⁹ Jesucristo rese peicose, pe evocoiyase Abraham suindar nungar tupri ité peico. Evocoiyase pe avei peipisira Tūpa remimombehu porerecosa yandeundar.

4

¹ Amboyoapi vitera co che ñehesa pēu: inungar que ava omanose, oseyá ombahe eta guahir upe chihivahemise. Yepe ahe tahir opacatu mbahe yar secoira viña, ahe rumo inungar tupri mbiguai tēi secoi vahe yepi. ² Esepia, ahe guārosar povrīve secoi imboyeroya água. Ocuacuase voi eté, opoira tu remimombehugüer rupi ichui. ³ Ēgue ehi avei yandeu. Yande chihivahemise, evocoiyase mbiguai nungar yipindar vahe co ivi pipendar porocuaitavriye yaico. ⁴ Oyepotase rumo ari imombehupri, Tūpa ombou Guahir, ahe oha cuña sui; evocoiyase ahe Moisés porocuaitavriye secoi. ⁵ Ēgue ehi ou opacatu yande renose água evocoi mborocuaitavri sui Tūpa

rahir ité yande reco ãgua. ⁶ Evocoiyase Tūpa omboyeucua Guahir yande recose ombouse Guahir Espíritu yande piha pipe, “¡Che Ru!” yande he ãgua chupe. ⁷ Sese yande Tūpa rahir ité yaico, ndahe iri cûritei mbiguai têi nungar. Tūpa rahir yande reco pipe ahe ombou aveira oporerecosa yande mahera.

Pablo ipihañemoñetaño ité Jesús reroyasar rese oico

⁸ Yipindar tūpa angahu rembiguai têi peico Tūpa ité cuaëhi pipe. ⁹ Cûritei rumo peicua Tūpa, ëgue ehi rumo Tūpa ité oicua pe recocuer. Sese niha aipo ahe cheyeupe: “¿Mara ehi pîha oyevi iri mborocuaita têi pipe mbiguai têi güeco iri ãgua yuvireco?” ahe pêu. ¹⁰ Esepia, pemboetei vite ari, yasi, araviter pieta eta têi peico. ¹¹ ¡Che ayembosiquiye pe rese, “Che porombohesa revo ëgue ehi têi vahe ipâhuve yuvireco chupe” ahe pêu!

¹² Iyavei che rivireta, aipota che recocuer moña peye. Esepia, cuese che asë Moisés porocuaita povrì sui inungar pe yipindar ëgue ahe vichico pe pâhuve. Ahese ndapeyapoi eté mbahe cheu. ¹³ Peicua niha che yipindar chombaheasise vichico, ahese amombehu co ñehesa pîsirosa resendar pêu. ¹⁴ Yepe co che mbaherassisaya yavai etepri pêu viña, pe rumo ndache reroïroi eté peye iyavei ndache momboi peye. Ëgue ehi rumo avïye acoi Tūpa rembiguai eté che rereco peye viña iyavei avïye Jesucristo itera aico pêu viña no. ¹⁵ ¡Mahera ru cûritei ndapeyembovharete vitei che rese peico eiurve! Esepia, supi eté, cuese acoi que pe resa teiteté revo pemboura cheu viña. ¹⁶ ¡Evocoiyase cûritei che amotarëhi tie peye acoi pêu mbahe supi tupri vahe mombehusa sui têi!

¹⁷ Evocoia ava iquerëhi ité pe rese, ndahei rumo mbahe avïye vahe apo ãgua yuvireco. Ahe rumo oipota pe mboyepepi ãgua têi ore sui yuvireco pe querëhi ãgua supi. ¹⁸ Avïye ité niha yande querëhise mbahe apo ambuae ava upe, mbahe avïye vahe apo ãgua rumo. Ndahei chira pe pâhuve che recoseño pereco pe querëhisa. Iyacatu rumo pequerëhiño itera yepi. ¹⁹ Che rahireta, che ayembopiharasi ité vichico pe rese. Inungar cuña imembirasí vahe; ëgue aheño itera ayemombaraisu vichico ‘toico rane ité Cristo sese yuvireco’ che yapave pêu. ²⁰ Cûritei rägüler opoepiara viña añahe tupri catu ãgua pe rese. Esepia, “¿Mara ahera revo sereco yuvireco?” ahe pêu.

Agar, Sara recocuer resendar yembohesa

²¹ Pe peroya pota vahe Moisés porocuaita pe reco catupri ãgua, pemombehumi cheu: ¿Ndapesenducuai tie co mborocuaita aipo ehi vahe? ²² Esepia, aipo ehi: Abraham

aipo vireco ñuvirío guahir, ñepei tahir aipo sembiguai Agar membrí, ambuae tahir evocoiyase sembireco Sara membrí. ²³ Evoco sembiguai membrí oha que ava tēi yesu nungar; sembireco membrí rumo oha Tūpa remimombehugüer rupi eté. ²⁴⁻²⁵ Co tecocuer mboyoyasa yaracua vahe ité. Co ñuvirío cuña sui yayembohe ñuvirío Tūpa remimbotar rese. Yipindar sembiguai Agar omboyecka evoco porocuaita imondopri Arabia pípendar ivitri Sinaí ve aracahe. Ahe cuña mbiguai tēi inungar Jerusalén upendar ava. Esepia, ahe Moisés porocuaitavrive yuvirecoi. Ëgüe ehi avei opacatu Moisés porocuaita pípendar, yuviroha mbiguai nungar güeco âgua, opacatu ichuindar ëgüe ehi vite yuvireco. ²⁶ Yande rumo inungar-ra que Jerusalén iva pendar suindar yaico viña ëgüe yahe yaico mbiguaiëhi. ²⁷ Esepia, icuachiapri aracahendar pipe aipo ehi:

“Eyemboviñareté, cuña nimembii vahe;
esapucai nde rorivetesapi pipe, nde ndereiporarai vahe nde
membrí rasicuer.
Esepia, acci cuña seyapri imembí ati catura cuña omer vireco
vahe sui” ehi.

²⁸ Che rivireta, inungar Sara membrí Isaac, ëgüe yahe avei tahir ité yaico Tūpa remimombehugüer rupi. ²⁹ Co rumo aracahae sembiguai membrí oha vahe ava tēi yesu nungar, ahe ndoyambotai sembireco membrí acci Espíritu píratasa pipe sui oha vahe; cüritei ëgüe ehi tupri avei. ³⁰ ¿Mara ehi icuachiapri aracahendar pipe? “Pemboyepepi pe rēta sui cuña mbiguai tēi imembri reseve. Esepia, cuña mbiguai tēi membrí ndiyai oyoya cuña ndahei vahe mbiguai membrí rese vu mbahe pisi âgua yuvireco” ehi. ³¹ Sese, che rivireta, yande ndahei sembiguai tēi membrí nungar yaico, yande rumo sembireco membrí nungar yaico. Esepia, ahe ndahei mbiguai.

5

Peyemoviracuaño ité Moisés porocuaita pipe pe recoëhi âgua

¹ Jesucristo niha ombou yandeu mbiguai tēi nungar sui yande sē âgua. Sese peyemoviracua mbiguai tēi pe reco iriëhi âgua.

² Pesendu che ñehe. Che, Pablo, aipo ahe pēu: acci peyembocircunda ucase, ahese ëgüe ehi tēi vahe Cristo pereco.

³ Che amombehu pota irimi pēu, que ava oyembocircunda uca vahe, vireco niha ocuaita opacatu Moisés porocuaita mboyeroya âgua. ⁴ Pe pereco catupri pota tēi vahe Tūpa rovaque evoco porocuaita tēi reroya pipe, peyepepi ité Cristo sui. Evocoiyase Tūpa porovasasa avei pemocañi tēi peyesui.

⁵ Yande rumo yande querëhisa pipe yayeroya yande reco

catupri ãgua rese. Êgue yahe Espíritu yande pítiviisa pipe iyavei Jesús rese yeroysa pipe avei. ⁶ Esepia, acoi yaicose Jesucristo rese, yepe yayembocircuncidase, anise ndayayembocircuncidaise, ahe ndayande pítivii eté yande reco catupri ãgua Tūpa rovaque. Co güeraño rumo yande pítivii Jesús rese yande yeroysa. Ahe niha yande mboyeaisu uca.

⁷ Peico tupri niha yipindar viña. ¡Ava ru ndoviroya uca iri mbahe supi tupri vahe pēu! ⁸ Ndahei eté rumo pe poravosar Tūpa êgue ehi pēu. ⁹ ¿Ndaapeicuai vo acoi aipo ehi vahe: “Chihimi pan mboapeposa oso panguā rese opacatu rupi oicahopa tupri yepi” ehi? ¹⁰ Che rumo ayeroya yande Yar rese pe pihañemoñeta ãgua che pihañemoñetas rupi. Tūpa rumo omboura oñemoirosa que ava pe mbopihañemoñeta yoavirati uca vahe upe.

¹¹ Che rumo, che rivireta, “Iya yayembocircuncida yande reco catupri ãgua” ahe vitese Jesús reroyasar upe viña, ahese revo ndipoi chira che amotarehisor judío pâhuve, ahese avei ndipoi chira ñehesa curusu rese Jesús manosa resendar amotarehimbar ipâhuve viña. ¹² Evocoí ava pe mbopihañemoñeta yoavirati uca vahe circuncisión rese yuvireco, ¡mahera ahe ae ndoyeasiapa voi ñepei reseve yuvireco!

¹³ Esepia, pe ore rivireta, Tūpa niha pe renoi mbiguai tēi nungar pe recosa sui pe renose ãgua. Ndahei chira rumo pe remimbotarai tēi apo ãgua, iyacatu rumo peñepitiviira pe yeaisusa pipe. ¹⁴ Esepia, opacatu evocoí mborocuaita imboaviyesa yamboaviyesa co ñehesa aipo ehi vahe: “Esaísu ambuae ava nde yeaisu nungar” ehi vahe. ¹⁵ Peyeño tetei rene catu; peicua catu, aviyeteramo êgue peyese, pe recocuer pemomarapa tiëtera.

Yaguatara Espíritu remimbotar rupi, ndahei yande remimbotar tēi rupi

¹⁶ Pesendu che ñehe: Espíritu píratasa pipe catu peico yepi. Iyavei peyapoi rene mbahe pe remimbotarai. ¹⁷ Esepia, co pe remimbotarai ndahoyoyai eté Tūpa Espíritu remimbotar rese. Ndoyembohe catui eté. Sese ndapeyapo ucai mbahe pe remimbotar aviyete vahe peyeupe. ¹⁸ Acoi Espíritu ité pe reroguatase, ahese ndahe iri chiaveira Moisés porocuaitavrive peico.

¹⁹ Yande remimbotarai suindar yande rembiapo ai icuasa tupri ité. Ahe: yemboaguasa tēisa, teco quihasa, mbahe tēi aposa; ²⁰ mbahe rahanga upe yerure tēisa, yembopayesa, ñeroirosa, ñehopoepi-episa iyavei ambuae ava mbahe pota raisa; ñemoiro seraiza, yemboyaho-yahosa, pihañemoñeta yoyaëhisa, ²¹ iyavei ambuae ava mbahe pota raisa rese

ñemoirosa, savaiposa, yembopieta tēisa iyavei ambuae mbahe co nungar tupri apoa. ¡Peicua catu! Esephia, evoco nungar mbahe aposar ndoyuviroiquei chietera Tūpa mborerecuasave yuvireco curi.

²² Yayapose rumo Espíritu remimbotar, yande evocoiyase yayeaisura, yande rorivetera, yaicora mbahe tupri pipe, yande reco mbegüera, yaporoaisura yande reco aviyesa pipe, yamboycuara yande cuaita mboaviyesa,²³ yayemominiñora iyavei yande recorā rese yañearo tuprira. Evoco nungar yayapose, ndipoi eté que mborocuaita pipe yande yeamotarēhi ãgua. ²⁴ Jesucristo rese ité yuvirecoi vahe rumo, opa ité omombo güecocuerai co ivi pipendar tēi oyesui yuvireco, güemimbotarai, opichañemoñeta raisa avei no. ²⁵ Yande yaicose Espíritu píratasa rese, ahese Espíritu rupi eté yaguatara.

²⁶ Ndayayemboivate ai chira. Esephia, ipipe sui yayeamotarēhi, yaipota rai avei yande mboetasa recocuer nungar yande reco ãgua.

6

Peñepitivii ñepei-peí

¹ Che rivireta, acoi que Jesús reroyasar pe pāhu pendar oyavise güecocuer, pe peico vahe Espíritu rese, peipítivii secocuer moingatu ãgua pe recocuer mbegüemisa pipe. Peicua catura rumo, aviyeteramo oyoya voi peyemboangaipa uca tiétera. ² Peñepitivii-tivii catu que mbahe yavai rai vahe rese. Ëgüe peyese, Jesucristo porocuaita pemboaviyera.

³ Amove ava, “Che ivate catu vahe aico” ehi tēi. Ëgüe ehi rumo ahe ae oyembopa aipo ohesa pipe oico. ⁴ Sese niha ñepei-peí eté yaicua tuprira yande recocuer. Aviyese, evocoiyase sese yaviharetera. Ndahei acoi ambuae ava recocuer rese tēi yamboyoyara yande recocuer. ⁵ Esephia, ñepei-peí eté yande yacatu yareco yande cuaita imboaviyera.

⁶ Acoi oyembohe vahe Tūpa ñehe písirosa resendar rese, tomondo ombohesar upe mbahe güembiereco ipítivii ãgua.

⁷ Peyembopa eme catu pe ae. Ndipoi chietera que ava viroïro vahe Tūpa ñemoirosa pisihisa pipe. Ëgüe ehi eté: yañotise mbahe, ichui avei mbahe yaipisira. ⁸ Acoi ava rumo oyapo vahe mbahe güemimbotarai pipe, ahe oipisira cañisa apiréhi vahe. Acoi oyapo vahe mbahe Espíritu remimbotar rupi, ahe oipisira tecovesa apiréhi vahe yuvireco. ⁹ Evocoiyase tayandecuerai eme mbahe tupri apoa pipe. Esephia, acoi ndayandecueraise, yaipisira mbahe tupri apo repri. ¹⁰ Sese yande catuguer rupi yayapo mbahe icatupri vahe opacatu upe; yande mboetasa Jesús reroyasar upe ité rumo yayapora.

Pablo, “Peicua catu pe mbocircuncida pota vahe sui” ehi iyavei ñehesa ipa vahe

¹¹ ¡Pesepia co ñehesa ipa vahe che pove ité aicuachía tuvicha vahe pẽu! ¹² Acoi judío Jesús reroyasar pe mbocircuncida uca potaño tẽi vahe ‘Co mbia avíye ité, tehi ndahei vahe Jesús reroyasar judío yuvireco yandeu’ ohesa pipe tẽi ēgue ehi yuvireco viña. Esepia, ndoipotai evocoj judío oamotaréhi co ñehesa Cristo atica agüer mombehu pipe yuvireco. ¹³ Acoi oyembocircuncida uca tẽi vahe avei rumo nomboavíyei eté opacatu mborocuaita yuvireco. Oipota rumo pe mbocircuncida ucara oyemboívate ai áqua pe cuaise evocoj nungar apo yuvireco. ¹⁴ Che rumo ndayemboívate potai eté. Curusu rese yande Yar Jesucristo mano agüer rese güeraño ité ayembovíha. Imano agüer sui co ívi pipendar mbahe pota raisa opa ité che sui. Che evocoiyase inungar omano vahe aico chupe. ¹⁵ Yepe que yayembocircundaise viña, ndayande pítivi eté Cristo rese yaico tupri áqua. Co rumo avíye vahe ité yandeu: Túpa yande recocuer mbopiasuse. ¹⁶ Opacatu yuvirecoi vahe co ñehesa che remimombehugüer rupi iyavei opacatu Túpa upendar supi eté vahe toipisi Túpa suindar teco tuprisa iyavei iporoparaísuerecosa yuvireco.

¹⁷ Avíye, co pipe suive ndaipota iri que ava che mañeco tẽi vaherã. Esepia, che areco che retecuer rese che apicha-picha agüer. Ahe omboyecua Jesús rembiguai che recosa.

¹⁸ Che rivireta, yande Yar Jesucristo tape rovasa opacatu. Aipo rupive.

PABLO REMBICUACHIA EFESO PENDAR UPE EFESIOS

Pablo mahenduhasa Jesús reroyasar Efeso pendar upe

¹ Che, Pablo, Jesucristo apóstol aico Tūpa remimbotar rupi. Che aicuachía co che ñehe pēu pe Efeso pendar, Tūpa upendar Jesucristo reroyasar peico vahe. ² Yande Ru Tūpa iyavei yande Yar Jesucristo tombou oporovasasa pe reco tupri ãgua pēu.

Cristo suindar porovasasa

³ Yande Yar Jesucristo Ru Tūpa imboeteipri tasecoi. Ahe ombou opacatu porovasasa iva sui yande Cristo rese yaico vahe upe. ⁴ Sese niha Tūpa yande poravo yipivé ité ivi apoëhi viteseve ‘toyuvirecoi cheu nara ité iyavei tasecomara eme yuvireco che rovaque’ oyapave oporoaisusa pipe. ⁵ Ipipe avei yipisuive yande pisi guahirguã Jesucristo yande pisirosa pipe güemimbotar rupi. ⁶ Sese yande yasapucai chupe iporoaisusa porañete vahe rese yepi. Ahe ipipe niha yande rovasa Guahir güembiaisu sui. ⁷ Tūpa yande raisu eteprisa pipe yande pisiros Guahir ruvi piyeresa pipe yande angaipa rese ñero ãgua. ⁸ Yande raisu pipe avei ombou opacatu yande aracua ãgua iyavei yande yapisaca ãgua avei yandeu, ⁹ iyavei oicua uca güemimbotar yipisuive ndicuasai vahe yandeu co güembiaporã mboaviye ãgua. ¹⁰ Oyepotase ahe ari imboaviye ãgua, Tūpa opacatu mbahe iva pendar, co ivi pipendar avei opara omoingue ñepei reseve Guahir Cristo povrîve.

¹¹ Cristo rese yaicose, Tūpa yande poravo yipisuive ichuindar mbahe yandeundar pisi ãgua. Opacatu rumo mbahe Tūpa remimbotar rupi. Ahe niha oicua ité güemimbotar apo ãgua ¹² ‘tomboetei che mborerecuasa ava yuvireco che Rahir rese yeroyasar yipindar yuvirecoi vahe recocuer repiase’ oya oreu. ¹³ Pe avei niha, pesenduse co ñehesa supi eté vahe pisirosa resendar, Cristo peroya pe piha pipe sese peico vaherâ. Tūpa ombou güemimombehuguer Espíritu Santo pe piha pipe ‘cheundar ité yuvirecoi’ oya. ¹⁴ Ipisisa pipe niha yaicua yande yaipisi vaherâ yandeundar mbahe imoingatupri, acoi Tūpa opase oipisiros ava oyeupendar ‘ipipe sui tomboetei che reco ivatesa ava yuvireco’ oya.

Pablo oporandu Tūpa upe mbahecuada Jesús reroyasareta upe mondo ãgua

¹⁵ Ayandu peyeroya tupri yande Yar Jesús rese iyavei pesaisu ité ava opacatu Tūpa upendar. ¹⁶ Sese ndapoi eté Tūpa upe, "Aviye ndeu" che hesa sui chemahenduhase pe rese che yeruresa pipe. ¹⁷ Che aporandu yande Yar Jesucristo Ru Tūpa seco porañete vahe upe, pe recocuer resape ãgua rese. Ipípe peicua tupri catura semimboyecua iyavei peicua tupri catura yande Yar. ¹⁸ Ëgüe ahe ité aporandu Tūpa upe pe piha resape ãgua rese. Ipípe peicua catura co pesáro vahe ivave pe reique ãgua; chupe nara ité Tūpa pe peha. Iyavei peicuara co mbahe imondopirã iva pendar iporañete vahe Tūpa upendar yuvirecoi vahe upe. ¹⁹⁻²⁰ Ipípe sui peicua tupri aveira Tūpa píratasa ndopai vahe yande seroyasar yaico vahe rese. Co píratasa ivaté vahe ité. Ahe píratasa Tūpa omboye-cua, ombogüerayevise Guahir Cristo omano vahe pāhu sui, iyavei omboguapise oacato coti ivave. ²¹ Osecomboivate catu opacatu iva pendar, ivi pendar seco ivate vahe mbororecuar recuar tēi píratasa sui iyavei opacatu cūriteindar sui, que oime vaherã sui avei. ²² Opacatu mbahe omondo Guahir Cristo povrîve, Tahir upe avei ombou mbororecuar ivate catu vahe seco ãgua opacatu viroyasar upe. ²³ Opacatu yande seroyasar yaico vahe recocuer rese Cristo secoi. Evocoiyase yande setecuer nungar yaico. Ahe opacatu rupi secoi.

2

Tūpa oporovasasa pipe yande písiro

¹ Pe rumo, yipindar angaipa pipe peicose, inungar omano vahe peico Tūpa upe. ² Co ivi pipendar pihañemoñetasa rupi tēi peico iyavei ivate rupindar caruguar rerecuar porocuaita tēi avei peroya, ahe Jesús reroyasaréhi ombohe vahe. ³ Yipindar opacatu yande avei yaguata yande remimbotar rupi tēi yande recocuerai pipe. Yande pihañemoñeta raisa rupi tēi avei yayapo mbahe. Sese Tūpa ñemoñrosa yaipisira opacatu ambuae ava rupive viña. ⁴ Tūpa rumo yande paraisuereco ité, yande raisu etepri avei. ⁵ Yepe angaipa pipe yaico omano vahe nungar viña, ahe rumo ombou Guahir yande recove ãgua. Ahe oporovasasa pipe yande písiro. ⁶ Yande mbogüerayevi iri avei niha sese. Ipare seseve yande moingue oyepiri ivave ⁷ 'tamboyecua opacatu iva pendar upe che porovasasa iyavei che poroaisusa tuvicha vahe che Rahir rembiapo pipe sui curi' oya. ⁸ Esepia, oporovasasa pipe pe písiro Jesús rese peyeroyase. Ndahei rumo pe recocuer sui tēi peñepisiro, ahe rumo ombou porerecosa pēu. ⁹ Ndahei avei ava rembiapo sui tēi ou vahe. Evocoiyase ndiyai chira yayemboivate ai ipipe. ¹⁰ Tūpa niha yande recocuer mohivi Jesucristo rese yande reco ãgua mbahe icatupri vahe apo

água. Ahe mbahe icatupri vahe yipisuive Tūpa omoime yande rembiaporā.

Cristo ombou yande reco tupri água

¹¹ Evocoiyase peyemomahenduha yipindar pe recocuer rese. Ndahei rumo judío suindar peico: “Co ndoicuai vahe Tūpa, ndoyembocircuncidai vahe tēi yuvirecoi” ehi judío yuvireco pēu, (ahe judío oyembocircuncida vahe güete rese oyeupe, “Yande Tūpa rembiporavo imbocircuncidapri yaico” ehi yuvireco). ¹² Peyemomahenduha yipindar Cristo ndaperecoi vahe rese. Ahese ndapeicoi Tūpa rembiporavo Israel recua pendar iyavei ndapecuai Tūpa remimbotar semi-mombehu avei ombou vahe judío upe ipitivii água; ndaperecoi Tūpa iyavei ndaperecoi sārosa pe ñepisiro água co ivi pipe viña. ¹³ Esepia, ahese amombri Tūpa sui peico. Cūritei rumo Jesucristo rese peico. Esepia, ahe vuví pipe pe reru Vu Tūpa upe. ¹⁴ Ahe avei niha teco tuprisa yandeu. Esepia, ahe yande mboyeseha judío, ndahei vahe judío ñepei vahe nungar yande yeamotaréhīehí iri água oyeupe. Yande ñemoirosa niha opa omocañi yande sui güetecuer mondosa pipe. ¹⁵ Cristo omomba opacatu Moisés porocuaita. Ahe oipota ñepei ava nungar teco piasu pipe yande reco água, judío iyavei ndahei vahe judío. Ëgue ehi imocañipa yande yeamotaréhisa yande sui yande reco tupri água. ¹⁶ Evocoiyase ahe ae omanose curusu rese, ombou yandeu yandeyeupe ñero água judío, ndahei vahe judío ñepei ava nungar Tūpa rupi yande reco água.

¹⁷ Ahe ou omombehu co tecocuer piasu pēu pe amombri Tūpa sui peico vahe, omombehu avei ore namombri vahe judío oroico vahe upe ‘tiñero yuvireco oyeupe’ oya. ¹⁸ Esepia, Cristo rembiapo pipe sui niha oyoya yande judío iyavei ndahei vahe judío yaico vahe yayemboa vaherā Tūpa rese Espíritu ñepei vahe pipe. ¹⁹ Sese pe ambuae ivi pendar peico vahe, ndahe iri amombri Tūpa sui peico cute. Cūritei rumo Tūpa upendar ité peico opacatu ambuae seroyasar reseve. Yande evocoiyase ñepei reseve oñemu guasu vahe nungar yaico. ²⁰ Pe inungar tūparo maranehí imopuhambri ihivípirā harí pendar peico; apóstol iyavei Tūpa ñehe mombehusar evocoiyase inungar ihivípi yuvirecoi tūparo moviracua água. Jesucristo rumo inungar ita yipindar vahe imohivisa yandeu. ²¹ Ichui Cristo opa yande mboyeseha oyese, inungar oí imopuhambri oyeupi catu-catu iri vahe tūparoguā, ëgue yahe ipehapri yaico yande Yar upe nara sese ité yande reco água. ²² Sese niha, Cristo rese peicose, pe ambuae viroyasar rese avei sétarā nungar peico. Ipipe Tūpa, oEspíritu pipe, secoira.

3

Pablo cuaita ñehesa písirosa resendar mombehu água ava ndahei vahe judío upe

¹ Sese, che Pablo, soquendapri aico coháve Jesucristo recocuer mombehusa sui tēi. Ndahei vahe judío peico vahe pe recocuer aviye água rese égüe ahe. ² Peicua tupri revo co che poravíquisa Tūpa ombou vahe cheu oporovasasa mombehu água pēu nara. ³ Co ñehesa yipindar ndicuasai vahe güemimbotar resendar Tūpa omboyeecua uca vahe cheu, ahe niha aicuachía chīhi pēu. ⁴ Co rese peyeroquise peicua tupri catura co che aracuasa Cristo recocuer resendar oyecua ramo vahe. ⁵ Co ñehesa icatupri vahe ndoicuai eté ava yuvireco aracahe. Cúritei rumo Tūpa oEspíritu pipe omboyeecua güembipeha yuvirecoi vahe upe. Ahe sembipeha apóstol, iñeha mombehusar avei yuvirecoi. ⁶ Evocoí oyecua ramo vahe, ahe co: pe ndahei vahe judío upe avei Tūpa omboura judío upendar nungar tupri porovasasa co ñehesa poropísirosa resendar reroyasa pipe. Pe avei oñemu nungar tupri peico, oyoya ore judío oroico vahe rese. Pēu nara avei Tūpa remimombehugér aracahendar peyeroyase Jesucristo rese.

⁷ Yepe ndiyai cheu viña, Tūpa rumo che moingo opíratasa pipe ñehesa písirosa resendar mombehu água. ⁸ Che recocuer niha ivi coti catu opacatu ambuae Tūpa reroyasar sui viña, ahe rumo ombou oporovasasa co mboravíquisa ñehesa aviyé vahe Cristo recocuer resendar mombehu água ava ndahei vahe judío upe nara cheu. ⁹ Iyavei ombou che cuaitarā amombehu tupri vaherā opacatu ava upe opacatu mbahe Aposar pihañemoñetasa yipindar ndicuasai vahe. ¹⁰ Égüe ehi cúritei oyesuindar aracuasa cua uca água viroyasareta recocuer rese opacatu mborerecuar guasu, seco pírata vahe iva pendar upe. ¹¹ Égüe ehi, Tūpa opihañemoñeta ndopai vahe mboaviye Guahir, yande Yar Jesucristo rese. ¹² Sese yande yeroyasa suiño ité yaicatu yande yemboya água Tūpa rese yande siquiyéehisa pipe. ¹³ Sese aní chira, ndapequeréhi iri Cristo rupi pe guata água, pe recocuer rese che yemombaraisusa sui. Iyacatu rumo che paraíusa pereco pe yemboviha água.

Cristo poroaisusa

¹⁴ Sese añenopiha yande Ru Tūpa rovaque. ¹⁵ Ichui serer pâve vireco yuvireco, opacatu seroyasareta iva pendar, ivi pendar avei ñepei oñemu yuvirecoi vahe nungar. ¹⁶ Che aporandu chupe ‘tombou güeco porañetesa sui opíratasa yuvireco chupe oEspíritu pipe imovíracua água’ viya pēu. ¹⁷ Égüe ahe

ayeroqui pe rese pe piha pipe Cristo rereco ãgua sese pe yeroysa pipe. Iyavei pe poroaisusa pipe pe yemoviracua catu ãgua peyese¹⁸ ‘toicatu opacatu ambuae Jesús reroyasareta reseve Cristo poroaisusa tuvichá vahe ité renducua tupri catu ãgua yuvireco’ viya pēu.¹⁹ Che ayeroqui ahe poroaisusa peicua tupri catu ãgua rese (yepe ndayaicatui icuapa tupri ãgua yaico viña). Ipípe sui Tūpa tasecoi pe rese.

²⁰ Cûritei yamboetei yande Ru Tūpa. Esepia niha, ahe opíratasa pipe ombouvicha catu itera mbahe yande porandusa sui, yande pihañemoñetasa sui avei yandeu. Esepia, opíratasa pipe oporavíqui yande rese.²¹ ¡Sese ēgue tehi imboeteipri Tūpa tasecoi seroyasareta recocuer sui, Jesucristo sui avei apiréhi vaherã!

4

Ava Espíritu rese oyoya guasu yuvirecoi vahe

¹ Sese Cristo recocuer mombehusa sui che roquendasa pipe, “Peico tuprira pe cuaita rupi Tūpa pe renoisa pipe” ahe pēu. ² Peyemominira peico pe reco avíyesa pipe, pe reco mbegüesa pipe aveira iyavei peñemosayo pe yeaisusa pipe peyeupe. ³ Peyapo opacatu pe recocuer pipe peico tupri vîte ãgua peyepâhuve Espíritu Santo pe pîtiviisa pipe, pe reco tuprisa pipe avei. ⁴ Yaico ñepei nungar Cristo rese iyavei yareco ñepei Espíritu. Ēgue ehi avei Tūpa yande poravo ñepei guârosa rereco ãgua. ⁵ Oime ñepei yande Yar, ñepei yande yeroysa, oime avei ñepei poroâpiramosa. ⁶ Oime ñepei Tūpa, ahe opacatu yande Ru, opacatu yande cuaisar, ahe oporavíqui opacatu yande rese, secoi avei yande rese no.

⁷ Iyavei Cristo niha yande yacatu ñepei-peí mbahecuada ombou. ⁸ Sese aipo ehi icuachiapri aracahendar pipe: “Oso ivave, víraso secopipireta oyeupi; omundo avei porerecosa ava upe” ehi.

⁹ ¿Mara oya aipo ehi: “Oso ivave”? Yipindar ogüeyi co ivi pipe. ¹⁰ Acoi ogüeyi vahe co ivi pipe oso ivate catusave ‘taico opacatu rupi’ oya. ¹¹ Ahe niha ombou amove apóstol seco ãgua, ambuae upe ombou Vu ñehe mombehu ãgua, ambuae upe ombou ñehesa pîsirosa mombehu ãgua, ombou avei ambuae upe viroyasar râro ãgua iyavei iporombohe ãgua. ¹² Ēgue ehi ava viroyasar mbohe oyeupe mboravíqui apo ambuae viroyasar moviracua tupri catu ãgua. ¹³ Opacatu yaico tupri rane itera oyese Jesús rese yeroysa pipe iyavei yaicua tuprira Tūpa Rahir recocuer. Ahese yaico tuprira yande Cristo rese inungar ava ipihañemoñeta tupri catu vahe, ahese yasupitira Cristo recocuer yaico. ¹⁴ Evocoiyase ndahe iri chira chîhivahe

tēi nungar ova-ova tēi vahe yaico inungar-ra que ivitu yande reraso vahe oyeupi. Ndayayembopa uca iri chira ava co coti tēi oporombohe vahe upe, que yande rerova pota vahe upe mbahe tēi pipe. ¹⁵ Yande rumo evocoiyase yañehera mbahe supi eté vahe rese poroaisusa pipe iyavei yaroya catu-catu irira Cristo opacatu yande recocuer pipe. Ahe niha yande rerecuar secoi. ¹⁶ Esepia, ahe yande mboya tupri oyese, yande moenda tupri avei yande rereco, ñgue ehi ahe yande mboyemboya oyese ñepei vahe nungar. Ñepei-peyaporavíqui tuprise, ahese opacatu yayeroya catu itera, yayemoviracua catu aveira yande yeaisusa pipe.

Cristo yande recocuer mbopiasu

¹⁷ Che aipo ahe Tūpa rer pipe pēu che pe cuaisa pipe: peico iri eme ava Tūpa cuaparēhi nungar. Ahe yuvirecoi vahe ité opihañemoñeta raisa pipe, ¹⁸ ndoicatui mbahe renducua tupri água iyavei ndovirecoi tecovesa Tūpa suindar oyese yuvireco. Esepia, ndoicuai Tūpa ñehe opihañemoñetaehisa pipe yuvireco. ¹⁹ Ndoyuvinochi iri mbahe tēi apo água iyavei oyemondo ité mbahe tēi pipe. Ndosiñuiyei eté opacatu güemimbotarai apo água yuvireco. ²⁰ Pe rumo ndapeyembohei eté evoco nungar mbahe rese Cristo rese peicose, ²¹ supi eté pesenduse porombohesa supi tupri vahe Jesucristo resendar iyavei peyembohese secocuer rese. ²² Ahe yande mbohe yande recocuerai yipindar vahe reya água. Esepia, ahe naporai vahe yande mbopa tēi yande pihañemoñeta rai apo água. ²³ Pesecuñaro catu pe yapisacasa. ²⁴ Peicoño ité avei pe recocuer piasu pipe. Sese niha Tūpa yande apo yande reco ivi tupri água yande reco maranehi vaherā supi tupri vahe pipe, inungar ahe.

²⁵ Sese ndaperemira iri chira, iya rumo peñeha ñepei-pey mbahe supi tupri vahe rese peyeupe. Esepia niha, yande opacatu ñepei ava rete resendar nungar yaico.

²⁶ Peyemboangaipai rene peñemoirose, iyavei ndiyai peñemoiro ari momba peico. ²⁷ Peipota ucai rene Caruguar upe peyeupe mbahe apo água.

²⁸ Acoi imonda rai vahe, timonda iri eme; toporavíquiño ava iparaisu vahe pítivií água.

²⁹ Ndapeñeha rai chira, iyacatu rumo peñeha tuprira ñehesa aviyé vahe pipe ambuae pe ñehe rendusar mongueréhi catu água yuvireco yande Yar rese. ³⁰ Peyapoi rene mbahe Espíritu Santo mbovihaéhi água. Ahe niha Tūpa ombou yandeu 'toicua ava co cheundar oipisira ari ipa vahe pipe poropísirosa ñepei reseve vahe yuvireco' oya.

³¹ Peyepepi co nungar mbahe sui: piha vĩracuasa, mbahe mboasi pĩratasa, ñemoirosa, pe rãse aisa, opacatu pe ñehe rai, opacatu ambuae mbahe-mbahe tẽi sui avei. ³² Iya rumo peico tupri ambuae upe pe yeaisusa pipe. Peñeroño itera peyeupe yepi inungar Tũpa iñero Guahir Cristo rese pẽu.

5

Mara ehira ava Tũpa rahir yuvireco

¹ Pe niha Tũpa rahir sembiaisu peico. Sese peyemonguerẽhi catu secocuer moña ãgua. ² Peico pe poroaisusa pipe, inungar Cristo yande raisu iyavei oyemondo yande recocuer rese, ovesa nungar seropovẽhepri Tũpa uve. Ahe aviye ité inungar mbahe sãacua vahe chupe.

³ Pe niha Tũpa upendar ité peico. Sese ndapeyemboaguasai chietera iyavei ndapeicoi chira ambuae mbahe naporai vahe pipe, que yemombotasa opacatu mbahe rese. ⁴ Ndapeñehe rai chira que poromochisa rese, que ëgue ehi tẽi vahe rese, anise que co coti-coti tẽi vahe rese. Esepia, evoco nungar ndahei mbahe aviye vahe. “Aviye ndeu” peye catuñora rumo Tũpa upe peico. ⁵ Peicua niha acoi oyemboaguasa vahe, oyapo vahe mbahe naporai vahe, que yemombotasa (esepia, ahe inungar mbahe rahanga mboeteisa), evoco nungar ndoyuvirecoi chira Tũpa povrïve iyavei Tahir Cristo povrive. ⁶ Ndapeyembopa ucai chira evoco nungar ñehesa tecocuer ëgue ehi tẽi vahe upe. Esepia, evoco nungar mbahe apo pipe sui ou Tũpa ñemoirosa ava seroyasarẽhi upe. ⁷ Sese ndapeyemboyai chira evoco nungar ava rese.

⁸ Peicua niha yipindar peico pĩtumimbisa nungar mbahe-mbahe tẽi pipe. Cûritei rumo peico tesapesa nungar pipe yande Yar rese. Sese peico tupriño ité Tũpa suindar poroesapesa pipe. ⁹ Esepia, poroesapesa pipe yande recose, yayapo opacatu mbahe tupri ava upe yande reco ïvi tuprisave, mbahe supi tupri vahe pipe. ¹⁰ Sese peyembohe catu mbahe Tũpa piha rupindar apo ãgua rese. ¹¹ Peyepepi ité opacatu pĩtumimbisa nungar ava rembiapo ai, ëgue ehi tẽi vahe sui. Iya peicua uca voira co nungar mbahe. ¹² Esepia, ahe sembiapo yemochïsa ñomipri tẽi vireco yuvireco. ¹³ Acoi yambojecua ucase rumo evoco nungar mbahe tesapesa nungar pipe, ahese oyecua tupri secocuer naporai vahe. ¹⁴ Esepia, co tesapesa ombojecua tupri opacatu mbahe recocuer yandeu. Sese aipo ehi:

“Peyemopoãse pe oque vahe nungar, peyepepi omano vahe nungar pãhu sui.

Ahese niha Cristo pe recocuer resapera” ehi.

15 Sese pemahecua tupri pe recocuer rese. Peicoi rene ndayaracuai vahe nungar; peicora rumo pe yapisaca tuprisa pipe. 16 Peiporu catu ñepei-peí ari yande Yar upe nara pe recoveseve. Esepia, cûritei tecocuer co ivi pipe mbahe têi. 17 Sese peico eme ndoyemboaracuai vahe; iya rumo peyembohe catu yande Yar remimbotar apo ãgua. 18 Ndahei chira caguar têi peico, evocoí mbahe ndoporopoisui mbahe têi apo uca ãgua. Peico catura rumo Espíritu Santo pe mbohesa pipe. 19 Peñehé catu Salmo pipe, opacatu Tüpa upendar sapucaisa pipe avei peyeupe; pesapucái, pemboetei avei opacatu pe piha pipe yande Yar. 20 “Aviye” peyera opacatu mbahe rese yande Ru Tüpa upe yande Yar Jesucristo rer pipe yepi.

Omenda vahe cuaitarã mbiguaí reseve

21 Peyemboyeroya catu ambuae rese Cristo mboeteisa pipe peico.

22 Cuña tomboyeroya omer, inungar yande Yar omboyeroya yuvireco. 23 Esepia, imer güembireco cuai ãgua secoi, ëgue ehi avei niha Cristo viroyasar cuai ãgua oico. Viroyasar Písrosar avei secoi, inungar güetecuer ité sereco. 24 Evocoiyase inungar seroyasar omboyeroya Cristo yuvireco, cuña avei niha ëgue ehira opacatu omer mboyeroya yuvireco.

25 Iyavei cuimbahe osaisura güembireco, inungar Cristo osaisu opacatu viroyasar, omondo güecocuer chupe nara. 26 Ëgue ehi yande recocuer moatiro yande angaipa sui i pipe Tüpa Ñehengagüer reroyasave. 27 Iyavei oyeupe yande rerecora yande reco catuprisa pipe iyavei yande reco quihaëhisa pipe ‘tipo eme que mbahe têi secocuer rese’ oya, ‘toyuvirecoi cheu nara güeraño ité güeco tuprisave’ ohesa pipe. 28 Ëgue ehi aveira ava güembireco raisu inungar ahe oyeaisu. Acoi ava osaisu vahe güembireco, oyeaisu ité ahe ae. 29 Supi eté, ndipoi eté que ava ndosaisui vahe güetecuer. Ahe rumo ocaruño ité oyemoviracua ãgua, oñearo tupri avei. Ëgue ehi avei Cristo opacatu viroyasar upe. 30 Esepia, chupendar ité yaico setecuer nungar. 31 “Sese ava oseyara vu, osi güembireco rese güeco ãgua; ñuvirío yuvirecoira ñepei ava nungar.” 32 Ahe ñehesa pipe oime mbahe oyecua ramo vahe aviye vahe ité. Ahe Cristo opacatu seroyasareta resevendar ñehesa. 33 Ëgue ehi eté ñepei-peí pesaisu pe rembireco pe yeaisu nungar. Iyavei cuña tomboetei tupri omer yuvireco.

6

1 Chihivahe, pemboyeroya pe yesupa, pe si avei yande Yar raisu pipe. Esepia, ahe niha pe cuaita. 2 Co porocuaita yipindar omombehu vahe porovasasa pisi ãgua imboavíyesa

pipe aipo ehi: "Pemboeteira pe ru, pe si avei. ³ Êgue peyese, pe rorivetera iyavei pe reco pâhumbucu catura co ivi pipe" ehi.

⁴ Iyavei pe iyesupa, pemoñemoiro ucai rene pe rahir. Iyacatu rumo pemboacua imboaracuasa tupri pipe, imbohesave avei yande Yar upe saisusa pipe.

⁵ Pe avei no mbiguai, pembooyeroya catura pe rerecuar co ivi pipe imboeteisave. Ichui pe siquiyepave avei mbahe tupri pipe mbahe peyapora inungar-ra Jesucristo upe ité mbahe peyapo vaherã viña. ⁶⁻⁷ Peporaviqui tupri catu chupe nara, ndahei chira rumo pe repiaseño imbovîha âgua têi; peporaviquira rumo pe querêhisa pipe Cristo rembiguai pe recosa pipe opacatu pe rorivetesave yande Yar upe pe cuaita mboaviye tupri âgua. ⁸ Esepio, peicua Tûpa omboepira opacatu yandeu yayapose mbahe avîye vahe mbiguai yaicose, anise que ndahei vahe mbiguai avei.

⁹ Iyavei pe serecuar, peico tupri aveira pe rembiguai upe pe recoasiêhisa pipe. Peicua niha pe opacatu Tûpa pe rerecuar ivave chini vahe povrîve peicose. Ahe niha ndayande raisu yoaviratii yande rereco.

Ava Cristo rese yuvirecoi vahe yoepisa resendar

¹⁰ Sese peyemovîracua catu yande Yar rese, ipíratasa rese avei. ¹¹ Peñearo tupri catu Tûpa píratasa pipe pe yemovîracua âgua Caruguar pe mbopa têiêhi âgua. ¹² Esepio, yande ndahei ava ité amotarêhisave yayepihamovîracua. Yande rumo yayepihamovîracua espíritu naporai vahe ndoyecuai vahe upe iyavei co ivi pipendar Caruguar ipírata vahe pítumimbisa pendar reroyaëhi âgua. ¹³ Sese peipisi catu opacatu mbahe Tûpa ombou vahe pêu pe yoepi âgua. Evocoiyase yepe oime têira mbahe têi pêu viña, peyemovîracuaño itera rumo chupe.

¹⁴ Êgue peye aveira peyemovîracua catu ñehesa supi tupri vahe pipe. Iyavei peyoepira pe reco ivi tuprisa pipe.

¹⁵ Peyemoingatu voi Tûpa Ñehengagüer ñeroisa resendar mombehu âgua yepi. ¹⁶ Iyavei pereco catu Tûpa rese pe yeroyasa peyese. Ahe inungar sundao yoepisa. Ipípe peyoepira caruguar uhu tata resendar nungar pe ãtoisa sui.

¹⁷ Poropísirosa inungar sundao ãca ndiru, ipípe tapeyoepi; peiporu avei Tûpa Ñehengagüer, ahe niha inungar quise pucu Espíritu vireco vahe. ¹⁸ Peyeroqui catu Espíritu píratasa pipe ari yacatu rupi Tûpa upe opacatu yeruresa pipe. Pemahemoha catuño ité pe yeruresa pipe. Peyeroquiño ité avei opacatu ava Tûpa reroyasar rese yepi. ¹⁹ Peyeroqui avei che rese. Evocoiyase Tûpa tombou che ñehe âgua cheu che siquiyêhisa pipe ñehesa ñepisirosa icuapi ramo vahe cua uca âgua ava eta upe. ²⁰ Tûpa niha che cuai co ñehesa mombehu âgua. Ichui

tēi cūritei soquendapri aico. Peyeroqui catu che rese che siquyeēhisa pipe co ñehesa mombehu ãgua.

Ñehesa ipa vahe

²¹ Yande rīvri Tíquico, yande rembiaisu, che pītiviisar ombaoaviye vahe ocuaita yande Yar upe mboravíquisa rese, ahe omombehura opacatu che recocuer, mbahe che rembiapo avei pēu. ²² Sese amondo eipeve pēu ore recocuer mombehu ãgua 'ipipe toyemonguerēhi catu yuvireco' viya.

²³ Yande Ru Tūpa iyavei yande Yar Jesucristo tomondo opacatu viroyasar upe teco catupri ãgua, iporoaisu ãgua, oyese yeroya ãgua avei. ²⁴ Tūpa tosovasa opacatu yande Yar Jesucristo raisupar saisusa ñepei reseve vahe pipe. Aipo rupive.

PABLO REMBICUACHIA FILIPO PENDAR UPE FILIPENSES

Pablo mahenduhasa Jesús reroyasar Filipo pendar upe

¹ Che, Pablo, iyavei Timoteo oroico Jesucristo rembiguai. Aicuachía co che ñehe pēu, pe Tūpa upendar Jesucristo rese peico vahe tecua Filipo ve, Jesús reroyasar rārosar uve, seroyasar rese ihañeco vahe upe avei. ² Yande Ru Tūpa, yande Yar Jesucristo tape rovasa pe reco tupri ãgua.

Pablo yeruresa Jesús reroyasar rese

³ Pe rese che mahenduhasa pípe, “Aviye ndeu” ahe Tūpa upe yepi. ⁴ Iyavei che ayerurese, ari rupi ayeroqui opacatu pe rese Tūpa upe che viharetesa pipe yepi. ⁵ Esepia, oyoya yañepitivii Jesucristo resendar ñehesa icatupri vahe rese, acoi pe seroya ramo suive. ⁶ Che aicua co Tūpa omboipi mbahe aviye vahe güemimbotar apo pe rese, ahe omboaviye tupri itera acoi ari pipe oyevise yande Yar Jesucristo.

⁷ Aviye ité aipo rupi che piñañemoñeta areco opacatu pe rese. Esepia, che opoaisu ité. Opacatu niha oyoya yaipisi Tūpa porovasasa yepe co che roquendasave aí, anise que co cotí rupi aico mborerecuar rovai co ñehesa písirosa resendar repi ãgua iyavei amboyecua vaherā ahe ñehesa supi tupri vahe yuvireco chupe. ⁸ Tūpa oicua ité che opoaisu etepri opacatu. Esepia, Jesucristo niha pe raisu uca cheu. ⁹ Che aporandu vite Tūpa upe che yeruresa pipe: “Toicua tupri oaracuasa pipe oyeaisu catu-catu iri ãgua yuvireco” ahe pēu. ¹⁰ Ipipe sui peicuara mbahe aviye catu vahe poravo ãgua yepi; ñgue peye aveira pe recocuer moatiro ãgua peico. Evocoiyase ndipoi chira angaipa pe rese acoi Jesucristo ouse curi. ¹¹ Perecora pe recocuer aviye vahe ité Jesucristo ombou vahe pēu Tūpa mboetei ãgua.

Cristo Pablo recovesa ité secoi

¹² Che rivireta, aipota peicuara co mbahe tēi co oyapo vahe yuvireco cheu, ahe ichui setá catu ava osendura Jesucristo resendar ñehesa yuvireco. ¹³ Evocoiyase opacatu mborerecuar guasu poravíquisa pendar iyavei opacatu ambuae ava oicuapa che roquendas Jesucristo rupi che guata sui tēi yuvireco. ¹⁴ Iyavei setá etepri yande rivri che repiase soquendapri che recose yuvireco, oyemonguerëhi catu Tūpa Ñehengagüer mombehu ãgua osiquiyeëhisa pipe. Yande Yar rese evocoiyase oyeroyá catu yuvireco.

¹⁵ Supi eté oime ava oñehe angahu tēi vahe Jesucristo rese che reroīrosa pipe tēi. Oime rumo amove ava oñehe tupri Jesucristo rese opihañemoñeta tuprisa pipe. ¹⁶ Evocoí ava oñehe tupri oporoaisusa pipe, ahe oicua coháve che roquendase yuvireco, “Co ñehesa Tūpa ñehe písirrosa resendar, ahe supi eté vahe, ndahei temira tēi” ahese. ¹⁷ Evocoí ambuae ava Cristo rese oñehe angahu tēi vahe oyeupe nara tēi oipota mbahe. Ahe che reco momara pota catu co che roquendasave che rēi viteseve. ¹⁸ Mara etemo che areco aipo mbahe-mbahe tēi viña. Yepe amove ava ipihañemoñeta rai yuvireco viña, opacatu rumo ñehesa Cristo rese. Ahe niha che mbovíha.

Che mbovíha catu aveira. ¹⁹ Esepiá, che aicua co opacatu mbahe-mbahe tēi sui añepisirora pe yeruresa pipe iyavei che pítiviira Jesucristo Espíritu. ²⁰ Che aipota ité, asāro avei opacatu che recocuer sui che chihí ãgua añehe vaherã opacatu che siquiyehisa pipe. Evocoiyase yepe amanora, anise aicovera, tomboetei catu ava Cristo che recocuer repiase yuvireco. ²¹ Esepiá, Cristo che recovesa ité secoi; amanose rumo, aviyéño itera cheu. ²² Aicove vitese co ivi pipe, aicatura aporavíqui tupri yande Yar recocuer rese. Evocoiyase ndaicuai uma revo aviyera cheu. ²³ Ndaicatui co ñuvirío che pihañemoñetas rereco: amove amano pota che so ãgua ivave Cristo píri. Ahe aviyé catura cheu viña. ²⁴ Pēu nara rumo aviyé catu aicove vitese co ivi pipe. ²⁵ Sese che aicua aicove vite vaherã pe pítivii vite ãgua, pe guata tupri vite catu ãgua iyavei pe viharete catu ãgua pe Jesús reroyasa pipe. ²⁶ Evocoiyase che rereco vitera peye pe píri. Ahese pe viharetesa pipe, “Imboeteipri Jesucristo tasecoi” aipo peyera che repiase.

²⁷ Co catu toyoya tupri pe recocuer co ñehesa aviyé vahe Jesucristo resendar rese. Evocoiyase asose pe repia, anise amombrí aicose pe sui, asendu pota pe resendar ñehesa aviyé vahe, pe yemoviracuasa resendar, pe pihañemoñetasa yoyasa resendar iyavei pe poravíqui píratasa resendar pe poreroyasave co ñehesa poropísirrosa resendar rese. ²⁸ Iyavei ndapeyembosiñiyeyi chira pe amotaréhimbar sui. Evocoiyase ahe oicuara yuvireco chupe ité Tūpa omondora imocañí ãgua; pe rumo Tūpa pe písirora curi. ²⁹ Supi eté ndahei Jesucristo recocuer reroya ãgua güeraño Tūpa oipota pēu, sese pe yemombaraisu ãgua avei oipota. ³⁰ Esepiá, pe, che avei oyoya tupri yaporavíqui pírata yande amotaréhimbar pâhuve yaico. Iyavei acoi pesepia yipindar che aporavíqui pírata che amotaréhimbar pâhuve vichico, iyavei cûritei peyandu mara ahe aporavíqui pírata vite ipâhuve yuvireco.

2

Cristo yemominisa, seco ivatesa resendar avei

¹ Iyavei Cristo pe monguerēhi, pe mboviha oporoaisusa pipe oico, Espíritu avei secoi pe rese. Peyeaisu tupri iyavei pe yeaisusa pipe peñepitivii. ² Sese che mboviha catu peye: perecora pihañemoñetasā ñepei reseve, oyoya guasu avei peyeaisura, oyoya aveira pe pihañemoñetasā, ñepei reseve mbahe pe remimbotar rese avei. ³ Ndapeyapoi chira mbahe peyeupe güeraño tēi. Ndapeyapoi chiaveira mbahe pe yemboivate aisave. Iyacatu rumo pe reco yemominisa pipe ambuae avīye catu perecora peyesui. ⁴ Pesecai rene mbahe avīye vahe peyeupe nara güeraño; iyacatu rumo peseca avei mbahe avīye vahe ambuae ava reco tupri ãgua.

⁵ Inungar Cristo pihañemoñeta, ëgue peye tupri aveira.

⁶ Yepe ahe Tūpa recocuer vireco, “Taseya eme Tūpa recocuer areco vahe ivive che so ãgua” ndehi.

⁷ Opa ité rumo oseya, oyemboava inungar mbiguai tēi ou.

⁸ Ëgue ehi oyemomini.

Vu porocuaita reroyasa pipe ou iyavei omano poromochisa pipe curusu rese.

⁹ Sese Tūpa omboivate catu, omondo avei sererguā ivate catu vahe opacatu ambuae rer sui.

¹⁰ Evocoiyase ahe terer ivate catu vahe renduse ‘toñenopihā opacatu iva pendar, ivi pipendar, opacatu omano vahecuer avei yuvireco’ oya.

¹¹ Ichui toicua opacatu, “Jesucristo ité yande Yar” tehi yande Ru Tūpa mboetei ãgua yuvireco.

Jesús reroyasar tesapesa nungar yuvirecoi co ivi pipe

¹² Evocoiyase che rembiaisu, yepe che amombri aico pe sui viña, iya rumo pe che reroya vité ité peye inungar aicose pe pâhuve cuese. Che aipota peicora písirrosa pipeño ité Tūpa mboeteisave ichui pe siquyesa pipe. ¹³ Esepia, Tūpa ombou pe querēhisa semimbotar apo ãgua. Güemimbotar rupi avei ombou píratasa imboaviye ãgua pêu.

¹⁴ Peyapo opacatu mbahe pe ñehe-ñehe tēiēhisa pipe, pe yepoepi-epiēhisa pipe avei. ¹⁵ Sese tipo eme mbahe pe rembiavi que pe reco raisa pe rese. Evocoiyase peicora Tūpa rahir ndayangaipai vahe ava mbahe-mbahe tēi oyapo vahe pâhuve. Ahe ipâhuve pe recocuer osesapera, inungar tataendi osesape pítumimbisave. ¹⁶ Pemombehuse ñhesa tecovesa resendar yuvireco chupe, acoi ouse Cristo curi, aviharetera pe rese. Esepia, pe rese che poraviquisa ëgue ndehi tēi vaherā. ¹⁷⁻¹⁸ Jesucristo recocuer rese pe yerojasa, ahe inungar mbahe seropovēhepri Tūpa upe. Aviyeteramo ichui tēi che yucara

yuvireco. Ahe omboavíye tuprī itera pe porerecosa Tūpa upe. Yepe che yucara yuvireco viña, che rumo ayembovīhañora opacatu pe rese. Pe avei, pevīhañora che rese.

Pablo oicuachía Timoteo, Epaafroditō recocuer resendar

¹⁹ Che ayeroya yande Yar Jesús rese amondo pīhaivi vaherā Timoteo pe repia. Ahe omboyevise ñehesa pe recocuer resendar, ahese che aviharetera. ²⁰ Iyavei ndipoi eté ambuae ava Timoteo nungar che pīhañemoñetasa rupi tuprī imahenduha vahe pe rese pe reco tuprī ãgua. ²¹ Esepia, opacatu oseca güemimbotar tēi apo ãgua, ndosecai eté Jesucristo remimbotar yuvireco. ²² Pe niha peicua Timoteo reco tuprisa opacatu upe. Iyavei che pítivii Tūpa Ñehengagüer mombehu ãgua, inungar chīhivahe oipítivii oyesupa, ñgue ehi che pítivii oico. ²³ Sese che aipota imondo ãgua pe repia acoi aicuase mara ehira che rereco yuvireco. ²⁴ Che rumo ayeroya yande Yar rese aso pīhaivi vaherā che teieté pe repia.

²⁵ Iyavei revo aviye catu co yande rivrī Epaafroditō amboyevira pe pīri ahe pembou vahe che pítivii ãgua mbahe cheu ipane vahe rese. Ahe che ndugüer oporavíqui pīrata vahe Tūpa upe. ²⁶ Esepia, ahe pe repia pota ité opacatu. Iyavei ahe ehiño oico pēu peicuase imbaheasi. ²⁷ Supi eté imbaheasi oico, seni eté omano viña. Ipare rumo Tūpa oiparaisuereco, ndahei ahe güeraño oipítivii, che avei che paraisuereco co viharēhisa yeapi-apiñoëhi ãgua cheu. ²⁸ Sese che amondo pota poyava ité pe pīri sese pe yembovīha iri ãgua, che mbovīha iri ãgua avei. ²⁹ Peipisi tuprī pēu iyepotase pe viharetesa pīpe. Esepia, ahe yande rivrī yande Yar rese secoi vahe ité. Pesaisu itera evoco nungar ava yepi. ³⁰ Yande Yar rese oporavíquise che pīri seni omano. Ahe niha oyemondo ité mbahe-mbahe tēi porara ãgua che pítivii pīpe. Esepia, pe ité ndapeicatui che pítivii peye.

3

Oicoete ai vahe ité

¹ Iyavei, che rivreta, peyembovīhaño yande Yar rese peicose. Ndachecuerai eté ñehesa aicuachía vahecuer cuachía iri ãgua pēu. Iyavei aviye catu ité pēu nara. ² Peñearo acoi ava cave nungar tēi sui, oyapo vahe mbahe tēi iyavei güetecuer omomara tēi vahe. ³ Yande rumo imbocircuncidapri nungar supi eté vahe Tūpa mboyeroyasar yaico. Esepia, yayerure Espíritu pipe Tūpa upe; yayembovīha avei Jesucristo reroyasar yande recosa rese. Ndahei yande retecuer rese tēi yayeroya, ⁴ yepe che supi eté ayeroya catura ambuae ava sui evoco nungar mbahe rese viña. ⁵ Esepia, che imbocircuncidapri aico ocho ari pipe che hare, israelita, Benjamín

suindar aico. Iyavei che hebreo, hebreo rahir avei aico no. Che yipindar fariseo recocuer areco. Evocoiyase ayembohe tupri fariseo aracuasa judío porocuaita resendar rese vichico. ⁶ Ipípe sui tēi eté aseca-seca catu ayapo vaherā mbahe opacatu ava Jesucristo reroyasar upe vichico. Co porocuaita reroyasa rese rumo ndipoi eté ava “mara” ehi vahe yuvireco cheu. ⁷ Opacatu co mbahe aviyé ité cheu aracaco viña. Cūritei rumo Jesucristo rese aicose, ēgue ehi tēi vahe nungar areco. ⁸ Iyavei opacatu que ambuae mbahe aviyera cheu viña, areco rumo inungar iti che Yar Jesucristo recocuer cuasa pípe. Opacatu ahe mbahe aseyá Cristo rese che reco água. Supi eté Cristo rereco água areco opacatu ambuae mbahe iti nungar tēi ⁹‘taico sese’ che yapave. Ndahei porocuaita mboaviyesa rese tēi aseca che reco catupri água, che rumo aseca Jesucristo rese che yeroyasa pípe sui ēgue ahe vaherā. ēgue ehi eté Tūpa che pisi seco catupri vahe nungar Cristo rese che yeroyasa pípe. ¹⁰ Che aipota ité Cristo cua tupri catu água. Iyavei areco pota píratasa icuerayevi agüer resendar cheyese. Iyavei aipisi pota iparaisu agüer. Iyavei inungar ahe omano, ēgue ahe pota avei. ¹¹ ēgue tahe avei che cuerayevi água omano vahe pāhu sui, ahe co che asāro vichico.

Pablo osupiti pota ité güeco maranehi água

¹² “Asupiti ité opacatu co mbahe” ndahei eté. Iyavei, “Ndaseco marai vahe ité aico” ndahe vitei chietera. Che rumo aseca vite ahe tecocuer che recorā. Esepia, Jesucristo che pisi ité oyeupe nara. ¹³ Che rivireta, “Che ae tēi co tecocuer ihivi vahe opa ité ayapo vichico” ndahei chira pēu. Co rumo mbahe che ayapo, ayemboesarai opacatu che reco agüer sui. Iyavei opacatu che recovesa rese aguata tenondeño ité. ¹⁴ Esepia, Tūpa che renoi ivave che so água aipisi vaherā iporerecosa ivapendar Jesucristo rese che recose. Ahe niha aipota catu ité cheyeupe nara.

¹⁵ Aipo rupi iya yande pihañemoñetara opacatu yande yaracua tupri vahe. Que revo yande pihañemoñetase que ambuae mbahe rese tēi, ahe Tūpa oicua ucara yandeu. ¹⁶ Co rese rumo yaicora yande yembohesa yareco vahe rupi tupriño ité.

¹⁷ Che rivireta, peico che nungar iyavei pemahecua tupri ava ore recocuer moñasar rese. ¹⁸ Iyavei amombehu setá yupagüer pēu, cūritei amboyevi iri che yasehosa pípe imombehu pēu. Setá ité oime ava co ñehesa Cristo mano agüer curusu resendar amotaréhimbár. ¹⁹ Ahe rumo imocañipirā yuvirecoira curi. Oyemongueréhi opacatu mbahe tēi apo água rese yuvireco yepi. Ahe niha otūpa nungar ité vireco. Iyavei güeco ivate aisa pípe oyapo mbahe tēi yande mochi ai vahe yuvireco. Co ivi pipendar mbahe-mbahe tēi reseño ité

ipihañemoñeta yuvireco. ²⁰ Yande rumo ivave nara ité yaico. Iyavei yasāro ité yaico iwa sui ou vaherā yande Písicos, ahe yande Yar Jesucristo. ²¹ Ahe opíratasa pipe virecora opacatu mbahe opovrīve. Ahe opíratasa pipe avei osecuñaropara yande retecuer ēgue ehi tēi vahe, ahese inungar ahe setecuer sendi yai, nimarai vahe, ēgue yahe aveira yande yaico.

4

Yayemboviha yande Yar rese yepi

¹ Sese che rívireta, che rembiaisu, peyemoviracuara yande Yar rese yepi. Che niha opoepia pota ité. Pe inungar porerecosa imbourpri peico cheu. Esepi, che vihasa ité peico.

² Ambuae mbahe, Evodia iyavei Síntique toyuvirecoi oyecupihir nungar ité yande Yar reroysa pipe yuvireco. ³ Nde niha che pítivii tupri vahecuer che poraviquisa rese eve. Eipítivii evoco cuña. Esepi, ahe niha oyembopihavíracua ité che pítiviise Tūpa Ñehengagüer písicos resendar mombehu água yuvireco cuese. Oyoya Clemente rese iyavei ambuae oporaviqui vahe rese che rupi yuvireco. Ahe serer opa icuachiapri yuvireco Tūpa cuachiar tecovesa apiréhi vahe resendar pipe.

⁴ Peyembovharete ari yacatu rupi yande Yar rese yepi, “¡Peyembovihaño ité!” ahe aipo pēu. ⁵ Pemboyecua catu opacatu ava upe pe reco mbegüesa. Esepi, cōimi yande Yar yevi iri água yandeu.

⁶ “¿Mara ahera pīha vichico?” ndapeyei chira que mbahe rese. Iyacatu rumo peyerurera opacatu evoco nungar mbahe rese Tūpa uve, peporandura evoco mbahe rese iyavei, “Aviye ndeu” peyera chupe. ⁷ Evocoyase Tūpa omondora güeco tuprisa pēu, pe Jesucristo rese peico vahe. Co teco tuprisa niha aviye catu ité opacatu ava pihañemoñetasa sui. Ipípe sui Tūpa osárora pe piha, pe pihañemoñetasa avei pēu.

Yandepihañemoñetara opacatu mbahe aviye vahe rese

⁸ Co ipa, che rívireta: yande pihañemoñetara opacatu mbahe supi tupri vahe rese, poromboetei água rese, mbahe ihívi vahe rese, mbahe maranehi rese, mbahe yande mboviha vahe rese, opacatu mbahe aviye vahe icuapri vahe rese. Iyavei yande pihañemoñetara que ambuae mbahe aviye vahe rese, imboeteipri vahe rese avei.

⁹ Iyavei peyapo ité acoi mbahe che opombohe vahecuer, pesendu vahe che aipo ahese, che repia vahecuer yapose peye. Evocoyase Tūpa güeco tuprisa reseve secoira pe rese.

Filipo pendar porerecosa Pablo upe

¹⁰ Aviharete yande Yar rese. Esepia, pemahenduha irimi che rese pe porerecosa mbou āgua cheu. “Sesarai yuvireco che sui” ndahei chira pēu. Pe rumo yipindar ndapeicatui eté che pītvii āgua peye. ¹¹ “Ipane mbahe cheu” ndahei chira pēu. Esepia, ayembohe che viharete āgua mbahe che rembierereco rese. ¹² Aicua mara yahe yande paraisusa pipe yaico, aicua avei mara yahe mbahe rereco ati āgua. Ayembohe avei che viha āgua opacatu mbahe oimese cheu, que chehitarose, ndache riepoise, que oimese sumbire vahe mbahe cheu, que mbahe ipanese cheu. ¹³ Aicatu opacatu mbahe uve che yemoviracua āgua. Esepia, Cristo ombou che pīrata āgua. ¹⁴ Pe rumo peyapo mbahe aviyе vahe cheu che pītvii eteprisave peye mbahe-mbahe tēi oimese cheu.

¹⁵ Iyavei pe Filipo pendar peicua avei acoi yipindar peipisise pīsirosa resendar Tūpa Ņehengagüer acoi che sose Macedonia sui, ndipoi eté Jesús reroyasar ambuae tecua pendar iporereco vahe yuvireco che rese. Pe güeraño pembou pe porerecosa, “Aviye” pe hesa pipe che pītvii āgua. ¹⁶ Iyavei aicose Tesalónica ve, pembou pe porerecosa cheu ūvirío yupagüer che pītvii āgua. ¹⁷ Ndachepihañemoñetai mbahe arocuaño tēi vaherā pe sui. Che rumo aipota Tūpa omboyevira pēu co pe porerecosa pembou vahe cheu. ¹⁸ Che opa aipisi pe porerecosa Epafroditu upe pembou vahe. Evocoiyase oimeño ité iyavei sumbire vite cheu. Ahe pembou vahe cheu aviyе ité, inungar itaisi sīacua vahe, iyavei inungar mbahe seropovēhepri aviyе vahe Tūpa upe. ¹⁹ Evocoiyase yande Ru Tūpa, ombahe eta porañete vahe sui omondora opacatu mbahe ipane vahe pēu Jesucristo rese oime vahe. ²⁰ ¡Ēgue tehi timboeteisa yande Ru Tūpa! ¡Ahe apirēhi vahe secoi yepi!

Ñehesa ipa vahe

²¹ Aviyе, pemombehu che mahenduhasa opacatu Tūpa reroyasar Jesucristo rese yuvirecoi vahe upe eipeve. Iyavei opacatu Jesús reroyasar yuvirecoi vahe che rese, ahe avei omondo omahenduhasa yuvireco pēu. ²² Iyavei opacatu ambuae yuvirecoi vahe cohabe Jesús reroyasar iyavei acoi mborerecuar guasu rētave yuvirecoi vahe, ahe ité avei omondo omahenduhasa yuvireco pēu.

²³ Yande Yar Jesucristo tape rovasa opacatu. Aipo rupive.

PABLO REMBICUACHIA COLOSA PENDAR UPE COLOSENSES

Pablo mahenduhasa Jesús reroyasar Colosa pendar upe

¹ Che, Pablo, Jesucristo apóstol aico Tūpa remimbotar rupi yande rívrí Timoteo reseve. ² Co aicuachía pēu, pe Cristo rese peico tuprī vahe Colosa ve, Tūpa upendar peico vahe. Yande Ru Tūpa tape rovasa, tombou pe reco tuprī ãgua pēu.

Pablo yeruresa Jesús reroyasar rese

³ Ari yacatu ore yeroqui pipe, “Aviye ndeu” orohe yande Yar Jesucristo Ru Tūpa upe pe rese. ⁴⁻⁵ Esephia, oroyandu acoi oyepota ramose Tūpa ñehe supi eté vahe, aviye vahe písirosa resendar pēu, peyapisaca tuprī sese. Ipipe sui peyeroya ivave pe reique ãgua Tūpa porerecosa pisi ãgua. Ahe ichui peyeroya tuprī Jesucristo rese iyavei pesaisu opacatu ambuae Tūpa rembiporavo yepi. ⁶ Co ñehesa imombehusa avei opacatu iví rupi, setá ava oipisi tuprī avei yuvireco. Inungar acoi pesenduse yipindar Tūpa porovasasa resendar ñehesa, ipipe sui peicua tuprī catu ahe porovasasa supi eté vahe. ⁷ Co ñehesa yande rembiaisu yande mboetasa Épafras pe mbohe. Ahe mbia yande Yar Jesucristo rese oporavíqui vahe ore rupi, ocuaita viroya tuprī vahe pe pâhuve. ⁸ Ahe omombehu oreu Espíritu pipe pe ore raisusa resendar.

⁹ Sese avei ore aipo nungar rendu ramoseve ndoroyeriquipai pe rese. Oroyeroqui, oroporandu pe rese ‘toicua tuprī opacatu Tūpa remimbotar ombahecuasa Espíritu suindar pipe, senducua tuprisa pipe avei yuvireco’ ore yapave pēu. ¹⁰ Ipipe sui tapeguata tuprī yande Yar rupi seroyasar tuprī pe recosa pipe. Tapemboaviye tuprī opacatu semimbotar; mbahe pe rembiapo tuprī pereco catu sovaque. Ipipe sui avei tapeicua tuprī catu Tūpa recocuer peico. ¹¹ Iyavei tombou catu pe momirata ãgua güecocuer píratasa pipe sui. Evocoiyase oimese que mbahe tēi pēu, peñemosafiora pe reco mbegüesa pipe. ¹² “Aviye ndeu” peyera pe viharetesa pipe yande Ru Tūpa uve. Esephia, ahe omoingatu pe recocuer peipisi ãgua iporerecosa oime vaherā opacatu sembiporavo upe acoi yuvirecoi vahe Tūpa poroesapesa pipe. ¹³ Ahe niha yande písiro Caruguar povrī sui. Ëgüe ehi yande reraso Guahir güembiaisu povrīve. ¹⁴ Ahe Tahir yande písiro iyavei yande angaipa rese iñero yandeu.

Jesús omano curusu rese Tūpa upe opacatu mbahe moingatu āgua

¹⁵ Jesucristo niha omboynecua uca Vu recocuer ndoyecuai vahe güecocuer pipe. Ahe avei niha yipisuive ivate catu vahe opacatu mbahe yapopri sui. ¹⁶ Esepia, Tūpa niha opacatu mbahe oyapo uca Guahir upe aracahe: ivive, ivave avei; oyecua vahe, ndoyecuai vahe avei no. Ipipe sui avei yapopri opacatu iva pendar mborerecuar, mborerecuar guasu iyavei mborerecuar ivate catu vahe. Ëgüe ehi ipipe sui opacatu mbahe yapopri, chupe nara avei. ¹⁷ Ahe oicove yipisuive aracahe opacatu mbahe reimeëhi viteseve. Ahe avei omoime vite opacatu mbahe yandeu. ¹⁸ Iyavei ahe niha yande rerecuar tenonde secoi yandeu opacatu seroyasar yaico vahe. Esepia, ahe rane yipindar vahe iyavei ahe rane avei ocuerayevi. Evocoiyase ahe ivate catu vahe opacatu sui. ¹⁹ Esepia, Tu oipota opacatu güecocuer reseve secoi āgua sese yepi. ²⁰ Iyavei 'che Rahir recocuer pipe sui taroyevi iri opacatu mbahe cheyeupe ivi pipendar, iva pendar avei' oya. Ëgüe ehi Jesús oipiyyere vuvi curusu rese Tūpa upe opacatu mbahe moingatu āgua.

²¹ Yipindar pe pihañemoñeta raisa pipe sui tēi amombri Tūpa sui peico yamotarëhisa pipe mbahe pe rembiapo ai rese. ²² Cüritei rumo Tūpa iñero pēu pe reroyevi oyeupe Cristo mano pipe. Ahe niha Ëgüe ehi Vu rovai iperahapri pe rereco oyeupe nara, pe reco maranehí āgua mbahe aviëhisa pipe ava rovaque. ²³ Ëgüe peye āgua rumo peyemoviracuaño itera Cristo rese pe yeroyasa pipe yepi. Ndapeyepepii chiaveira mbahe oime vaherä rese pe yeroyasa sui pesendu vahe co ñehesa ñepisirosa resendar pipe. Ahe imombehusa opacatu ivi rupi. Che niha Pablo, icuapri, aico co ñehesa mombehu āgua.

Pablo icuaita Jesús reroyasar rese hañeco āgua

²⁴ Cüritei aviha pe rese che yemomborara pipe. Ëgüe ahe iporara che rete rese cohabe vichico. Ëgüe ehi avei Cristo oye-momborara vite viroyasar rese. Esepia, yande seroyasar setecuer nungar yaico. ²⁵ Jesús reroyasar pítivií āgua niha Tūpa che cuai. Sese amombehu opacatu iñehengagüer pēu pe reco tupri āgua rese. ²⁶ Ahe ñehesa aracahe suive ndicuasai vahe ité. Cüritei rumo Tūpa omboynecua viroyasar upe. ²⁷ Chupe ité omboynecua pota co ñehesa porañete vahe omboynecua ramo vahe ava ndahei vahe judío upe. Co ndicuasai vahe, ahe Cristo pe rese secoi vahe. Co yande remiaro yareco vaherä teco ori porañete vahe curi.

²⁸ Ore niha Cristo recocuer oromombehu opacatu ava upe. Orombohe avei ava yaracua tupri āgua ore aracuasa pipe 'toyuvirecoi tupri ité Cristo rese Tūpa rovai' ore hesa pipe.

29 Co rese niha che aporaviquí etepri opacatu Cristo píratasa pipe.

2

¹ Che aipota peicua che yemboaquisa pe recocuer rese, Laodicea pendar recocuer rese, setá ambuae ava che cuaparéhi recocuer rese avei ² ‘toyemongueréhi catu, toyemboyoya guasu oyeaisusa pipe yuvireco’ viya. Iyavei ‘senducua tuprisa pipe toyuvirecoi mbahe tupri pipe’ viya opacatu pēu. Esepia, ichui avei peicua tuprira co mbahe imboye-cuapi ramo, ahe niha Cristo. ³ Ahe vireco opacatu mbahe yande mboaracua água, mbahe renducua tupri água avei. ⁴ Aipo mbahe amombehu pēu ava oñehe tupri aisa pipe tēi pe mbopaéhi água. ⁵ Iyavei yepe amombri aico pe sui viña, pe rese chemahenduha pipe rumo aicoveño pe reseve yepi. Aicua peguata tupri aise pe reco ívisa pipe, ndapeyepepiise co cotí rupi Jesucristo reroyasa sui. Sese che mbovihareteño ité peye.

Jesús suindar tecocuer piasu

⁶ Evocoiyase inungar acoi peipisi Jesucristo pe Yarã, égue peye aveira peico sese ari yacatu rupi ⁷ pe yemoviracuasa pipe. Pe yembohesa rese peyemomirata catura Cristo rese pe yeroyasa pipe. Iyavei, “Aviye ndeu” peye itera Túpa upe ari yacatu yepi.

⁸ Peicua catu, peyembopa ucai rene aracahendar tēi ava aracuasa pipe. Esepia, ahe égue ehi tēi vahe, ava suindar tēi yembohesa, ívi pipendar ava seco ívate catu vahe pihañemoñetasa tēi. Ndahei Cristo suindar porombohesa.

⁹ Esepia, Cristo vireco opacatu Vu Túpa reco oyese.

¹⁰ Evocoiyase pe pereco Túpa reco Cristo rese peicose. Ahe opacatu mborerecuar ívi pipendar iyavei íva pendar rerecuar secoi. ¹¹ Iyavei sese peicose, ahese inungar imbocircuncidapri peico. Ndahei rumo pe rete rese iyavei ndahei ava rembiapo tēi. Co rumo Cristo oyapo vahe pe recocuer rese. Esepia, ahe virocua pe recocuerai pe sui.

¹² Pe ápiramosa pipe ndoyavii pe recocuerai ñotimbrí Cristo reseve. Égue ehi avei ndoyavii pe recocuer ocuerayevi vahe seseve avei, peyeroyase Túpa píratasa rese. Ahe niha ombogüerayevi vahe Guahir omano vahe pāhu sui. ¹³ Pe niha acoi cuece omano vahe nungar peico Túpa upe pe angaipa pipe, pe ndahei vahe judío peico vahe. Ahe rumo pe recocuer mbogüerayevi Guahir reseve iyavei iñero pe angaipa rese pēu.

¹⁴ Ahe yande cañi rāgüer rumo opa omboepi. Esepia, yande iporocuaita pipe yaico imboaviye água viña, evocoiyase imocañipri tēi yaico ipovrive viña; ombou rumo Guahir

curusu rese yatica ãgua yande cañi rãgürer sui yande renose ãgua. ¹⁵ Ëgüe ehi ahe omano pipe curusu rese caruguar, ipovri pendar mborerecuareta reseve secopi. Ëgüe ehi seco reroyi, inungar vavasa pendar ipisipri serasosa opacatu ava rembiepiave.

Peseca iva pendar mbahe pe recocuer upe nara

¹⁶ Evocoiyase toñehe-ñehe tẽi eme que ava pe rembihu rese yuvireco, pe igua rese avei; anise que ndapemboeteise judío pieta, que ari, yasi osẽ ramomi vahe, anise que judío ari mbituhusa avei no. ¹⁷ Esephia, opacatu co mbahe, ahe yipindar vahe, “Ëgüe ehira Cristo ou” hesa tẽi yandeu. Co rumo Cristo ité cute. ¹⁸ Peyapisacai rene acoi ava “ndapeipisi chira porerecosa iva pendar ndaperoyaaise ore ñehe” ehi tẽi vahe rese pẽu. Acoi ava “Tũpa rembiguai pemboeteira” ehi tẽi vahe yuvireco. Ahe avei, “Che seco mbegüe vahe aico” ehi angahu tẽi. Iyavei, “Che asepia che quer nungar pipe iva pendar mbahe” ehi tẽi. Esephia, ahe oyemboivate ai oaracula rai tẽisa pipe yuvireco. ¹⁹ Evocoii rumo ndoyuvirecoi yande cuaisar Cristo rese yuvireco. Ahe omoviracua vahe opacatu viroyasar yepi. Evocoiyase ahe omboyemboya tupri oyese, ñepei vahe nungar vireco oyeupe Vu Tũpa remimbotar rupi.

²⁰ Pe omano vahe nungar peico Cristo rese. Evocoiyase ndahe iri co ivi pipendar pihañemoñetasavrive peico. ¿Ma-hera evocoiyase peroia vite co ivi pipendar porocuaita ëgüe ehi tẽi vahe, ²¹ inungar “pepocoii rene co mbahe rese, pe-hui rene evocoii nungar mbahe” ehi tẽi vahe? ²² Opacatu co nungar porocuaita ocañi tẽi vaherã. Esephia, ahe ava remimbotar tẽi yembohesa, iporocuaita tẽi avei. ²³ Co mbahe aviye angahu aracuasa supi eté vahe. Esephia, seroyasar ahe ehiño oyeruresa uve, oyecomomini tẽi iyavei omombaraisu güetecuer yuvireco viña. Ahe aracuasa rumo ëgüe ehi tẽi vahe. Esephia, ndayande pítivii eté yande yepepi ãgua yande remimbotarai sui.

3

¹ Cûritei rumo ocuerayevi vahe peico Cristo rese. Sese peseca catu co mbahe aviye vahe iva pendar. Aheve ivave Cristo oguapi oĩ güeco mborerecuasa pipe Vu acato coti. ² Pepihañemoñeta mbahe iva pendar rese, ndahei chira ivi pipendar mbahe rese tẽi. ³ Esephia, cûritei omano vahe nungar peico pe recocuerai upe. Iyavei Cristo reseve peico Tũpa piri, inungar-ra ivave viña. ⁴ Cristo niha yande recovesa ité secoi. Sese ahe oyevi irise curi, ëgüe peye aveira perecora ipiri seco ori porañetesa.

Yande recocuer yipindar iyavei yande recocuer piasu

⁵ Evocoiyase pepoi opacatu co mbahe naporai vahe co ivi pipendar tēi pe rese oime vahe sui: ndapeyemboaguasai chira, ndapeyapoi chira mbahe tēi pe recocuer pipe, ndapeipota rai chira pihañemoñeta raisa, ndapeipota rai chiaveira ambuae ava mbahe (esepia, ahe niha oyoya mbahe rahanga tēi mboeteisa rese). ⁶ Acoi oyapo vahe co nungar mbahe, ahe Tūpa ñemapirosoa oipisira seroyaëhisa pipe yuvireco. ⁷ Ëgüe peye avei yipindar pe recocuerai pipe peico. ⁸ Cüritei rumo peseya opacatu co mbahe-mbahe tēi: pe ñemapirosoa, pe poroyucai aisa, pe reco raisa, pe ñehe mara-mara tēisa iyavei pe ñehesa ndayamombehui vahe. ⁹ Ndaperemirai chira peyese. Esepia, pepoi yipindar pe reco ai sui iyavei pe rembiapo ai sui. ¹⁰ Iyavei peipisi tecocuer piasu, aviyé vahe. Ipipe peyembohe ari yacatu yande Aposar Tūpa recocuer rese peico, icua tupri catu äqua. ¹¹ Ndahe iri ivate yandeu “che griego aico” ehi vahe; que “che judío aico” ehi vahe. Iyavei “imbocircuncidapri aico”, “nimbocircuncidapri aico” ehi vahe avei. Iyavei que “ahe ambuae tecua pendar secoi”, “ahe chorí”, “ahe ava rembiguai tēi secoi” ehi vahe. Aníse que “che ndahei ava rembiguai aico” ehi vahe. Co rumo ivate vahe yandeu: Cristo ivate catu vahe opacatu sui. Iyavei oyoya guasu opacatu yande piha pipe yareco.

¹² Esepia, Tūpa pe raisu etepri iyavei pe poravo ‘toyuvirecoi cheu nara’ oya. Evocoiyase peyapora co nungar mbahe: peporoaisura, peavara peyeupe, peñemominira, pe reco mbegüera iyavei peñemosañora. ¹³ Ëgüe peyera peñemosa oyeupe, peñero aveira opacatu oyeupe acoi pe pāhu pendar oñemirose pēu. Inungar Cristo ñerosa ombou yandeu, pe avei ëgüe peyera ambuae ava upé. ¹⁴ Iyavei peyeaisu catura. Esepia, ahe yande mboyemboya tupri oyese yepi. ¹⁵ Acoi teco tuprisa Cristo ombou vahe pēu, tape mbohe pe pihañemoñeta tupri äqua. Esepia, co rese Tūpa pe renoi ñepei ava nungar pe reco äqua. Iyavei, “Aviye ndeu” peyera chupe.

¹⁶ Topita tupri Cristo ñehengagüer pe piha pipe. Pe aracuasa tuprisave peyembohe tupri, peyemonguerëhi catu sapucaisa Tūpa resendar rese. Pesapucal opacatu sapucaisa Tūpa upendar pe piha pipe, “Aviye ndeu” pe hesave yepi. ¹⁷ Iyavei opacatu que mbahe peyapo vahe, que peñeha vahe avei peyapo yande Yar Jesús rer pipe. Jesús rer pipe avei, “Aviye ndeu” peyera Tūpa upé yepi.

Jesús reroyasar cuaita resendar

¹⁸ Iyavei pe no cuña omenda vahe: pemboyeroyara pe mer. Ahe niha pe cuaita pe yande Yar rese peico vahe. ¹⁹ Pe avei

no imer: pesaisu pe rembireco. Perecoi rene pihavíracuasa pipe.

²⁰ Pe avei no chihivahe: peroya aveira pe yesupa. Esepio, ahe yande Yar oipota. ²¹ Pe avei no tu: pemoñemoiro ucai rene pe rahir peyeupe. Esepio, aviyeteramo niqueréhi iri chira ocuaise pēu.

²² Pe avei no mbiuai: peroya tupri avei pe rerecuar co ivi pipe yepi. Aní chira ahe pe repiaseño pembovihara. Iyacatu rumo pemboyeroyara pe pihañemoñeta tuprisa pipe, Tūpa sui pe siquyesa pipe avei. ²³ Opacatu mbahe peyapo vahe, peyapo pe queréhisave yande Yar mboviha água. Ndahei chira ava mboviha água tēi. ²⁴ Esepio, peicua tupri co: yande Yar omboura oporerecosa yandeundar. Esepio niha, Cristo upe nara ité mbahe peyapo. Ahe niha pe Yar supi tupri vahe. ²⁵ Acoi ava oyapo vahe mbahe naporai vahe, oipisi aveira güembiapo ai reprí. Tūpa niha nomboyoaviratí yande raius.

4

¹ Pe avei serecuar: peyapo mbahe ihívi vahe pe pihañemoñeta tuprisa pipe pe rembiguai upe. Peyemomahenduha co rese: pe avei pereco pe rerecuar ivave.

² Iyavei no opacatu peyeroqui catu ari rupi pe mahemohasa pipe. "Aviye ndeu" peye Tūpa upe. ³ Peyeroqui avei ore rese. Tore pítivií Tūpa oñehengagüer mombehu vite água. Toroñehé vite avei co ñehesa Cristo resendar Tūpa omboycua ramo vahe rese yandeu. Sese tēi niha co che roquendasa. ⁴ Evocoiyase peyeroqui che rese, tamombehu tupri catu co ñehesa opacatu upe senducua tupri catu água. Ëgüe tahe che cuaita mboaviye.

⁵ Peico tupri pe aracuasa pipe ava ndahei vahe Cristo reroyasar rovaque. Peyapo tupri mbahe co tecocuer aviyé viteseve. ⁶ Pe reco aviyé tuprisa pipe peñehera yepi. Iyavei peicua tuprira ñehesa mboyevi água ñepei-peí ava uve.

Ñehesa ipa vahe

⁷ Co yande rivri, yande rembiaisu, Tíquico, che pítivií tuprisar, ahe oporavíqui tupri yande Yar recocuer rese che rupi. Ahe omombehura che recocuer resendar pēu. ⁸ Sese co amondo pēu ore recocuer cua tupri água, pe mongueréhi catu água avei. ⁹ Co Onésimo avei osora supi. Ahe avei yande rembiaisu, yande rivri seco tupri vahe pe recua pendar. Ahe ñuvirío mbia omombehura pēu opacatu mbahe oime vahe coháve.

¹⁰ Aristarco, che ndugüer che roquendasave, omondo omahenduhasa pēu iyavei Marcos, Bernabé rihir. Pe revo peicuaño Marcos so água eipeve; osose pe piri, peipisi tupriñora. ¹¹ Iyavei omahenduhasa omondo Jesús, ahe serer acoi Justo, pēu. Co güerañomi Jesús reroyasar pāhuve judío oporavíqui vahe che rupi yuvireco Tūpa mborerecuasave nara. Ahe niha che mboviha yuvireco yepi. ¹² Epafras avei omondo omahenduhasa pēu. Ahe pe recua pendar ité, Jesucristo rembiguai. Ahe oyeroqui vahe pe rese yepi ‘toyemoviracua tupri iyavei toyuvirecoi Tūpa remimbotar rupi yuvireco’ oyapave. ¹³ Che aicua ité secocuer. Ahe oyemboaqüi oyeruresa pipe pe recocuer rese, Laodicea pendar recocuer rese, Hierápolis pendar recocuer rese avei. ¹⁴ Iyavei yande rembiaisu Lucas, oporoposano vahe, Demas reseve omondo omahenduhasa yuvireco pēu.

¹⁵ Pemboaviravemi eipeve yande rívrí Laodicea pendar oreu, cuña Ninfa serer vahe avei iyavei opacatu oñemonuha vahe Tūpa reroyasar yuvireco. ¹⁶ Peyeroquíre, pemondo co cuachiar Laodicea pendar Jesús reroyasar upe iyeroqui água. Iyavei Laodicea pendar cuachiar rese peyeroqui avei. ¹⁷ Iyavei emombehu Arquipo upe aipo ere: “Emboaviye tupri Tūpa nde cuaisa” ere.

¹⁸ Che Pablo aico. Che ité aicuachía co che mahenduhasa pēu. Tapemahenduha víte che roquendasave che rese. Aviye pēu. Yande Aposar tape pítivii. Aipo rupive.

PABLO REMBICUACHIA YIPINDAR VAHE TESALONICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano reseve iyavei Timoteo, aicuachía co che ñehe pēu, ore rivireta, peñemonuha vahe Tūpa upe tecua Tesalónica ve, yande Ru Tūpa, yande Yar Jesucristo rese peico vahe. Tape rovasa pe reco tupri ãgua yande Ru Tūpa, yande Yar Jesucristo avei.

Tesalónica pendar yeroyasa resendar ñehesa

² Ore, “Aviye ndeu” orohe arí rupi Tūpa upe opacatu pe rese yepi. Iyavei oremahenduha pe rese ore yeruresa pipe. ³ Pe niha yande Yar rese pe yeroya tuprisa pipe peporaviquiño yepi, iyavei pe poroaisusa pipe peyapo mbahe Tūpa upe, iyavei peñemosaña mbahe tēi upe Jesucristo rārosa pereco vahe rese. Sese oremahenduha pe rese arí yacatu rupi yande Ru Tūpa rovai. ⁴ Ore rivireta, Tūpa niha pe raisu, oroicua avei ahe ité pe poravo. ⁵ Esepia, acoi oromombehuse ñehesa písirrosa resendar, ndahei ñehesa oreyesuindar tēi oromombehu pēu; Espíritu Santo reco píratasa pipe rumo oroñehe. Iyavei oroicua ité co ñehesa supi eté vahe. Peicua avei niha acoi pe pāhuve oroicose, oroico tupriño ité, orosecaño avei pe reco tupri ãgua.

⁶ Ipare pemboyeapi ore recocuer peico iyavei yande Yar recocuer avei no. Iyavei yepe peparaisu mbahe-mbahe tēi pāhuve peico viña, peipisiño ité rumo co ñehesa pe vihasa pipe Espíritu Santo ombou vahe pēu. ⁷ Evocoya pe reco pipe pemboycua catu pe reco catuprisa Tūpa reroyasar Macedonia pendar upe, Acaya pendar upe avei. ⁸ Esepia, pe Tūpa ñehe peicua uca Macedonia rupi, Acaya rupi avei. Ndahei rumo co rupiño, opacatu rupi avei oicua yuvireco Tūpa reroyasa pereco vahe peyese. Sese ore ndoromombehu iri chira pe recocuer. ⁹ Esepia, ahe avei omombehu yuvireco oreu acoi ore so agüer pe píri, pe ore písí tupri agüer avei. Iyavei omombehu mbahe rahanga sui pe poi agüer Tūpa oicove vahe rupi pe guatasa yuvireco, pe chupe nara mbahe apo ãgua avei no. ¹⁰ Omombehu avei pesāro vahe Tūpa Rahir Jesús iyevi ãgua iva sui yuvireco oreu, acoi Tūpa ombogüerayevi vahe omano vahe pāhu sui. Ahe niha yande písirora Tūpa ñemoirosa ipírata vahe ou vaherā sui.

2

Tesalónica pendar yero yasa mbo yecuasa

1 Ore rivireta, pe niha peicua ore so agüer pe piri ndahei ëgue ehi tēi vahe. 2 Peicua tupri avei niha acoi cuese yipindar mara-mara tēi ava ore rereco yuvireco tecua Filipo ve. Tūpa rumo ore pītivii oñehengagüer pīsirosa resendar mombehu ãgua opacatu ore siquiyehisa pipe ore amotaréhimbar pāhuve. 3 Esepia, ndoroyavii eté ore ñehe iyavei ndoroñehi ore pihañemoñeta raisa tēi pipe pēu, ndahei avei ore porombopa ãgua oroñehi. 4 Tūpa rumo ore recoāha, ichui ore cuai oñehengagüer pīsirosa resendar mombehu ãgua; ëgue ehi ore ñehe, ndahei ava tēi mbovihā ãgua. Tūpa yande pihañemoñetasa oicua vahe rumo orombovihā. 5 Peicua niha ore ndoroñehi ñehesa icatupri catu vahe tēi rese pe mbopa ãgua, iyavei ndahei guarePOCHI potasave tēi oroñehi tupri. Tūpa niha oicua. 6 Ore ndorosecai eté ava ore mboetei catu ãgua pe, que ambuae ava eta avei no. 7 Ehi oroyandu ucara ore mbororecuasa Jesucristo ore cuaisa pēu viña; oroyemominíño rumo oroico pe pāhuve inungar acoi cuña osāro tupri vahe omembrí imboacua. 8 Ëgue orohe avei ore pe raisu. Sese ndahei Tūpa Ñehengagüer año oromondo pota pēu, ore recocuer avei no. Esepia, opoaisú ité. 9 Ore rivireta, peye-momahenduha acoi ore paraísu agüer rese, ore poravíqui agüer rese avei ari, pītu reseve. Ndahei que ñepei mañeco tēi ãgua mbahe rese oromombehu Tūpa Ñehengagüer oroico pēu.

10 Pe niha ore repia peye Tūpa avei oicua, ore reco tuprisa, ore rembiapo supi eté vahe, ihívi vahe pe Jesús reroyasar pāhuve. 11-12 Peicua niha, inungar mbia guahir upe, ëgue orohe pe mongueréhi, pe mbovihasa avei ñepei-peí opacatu. Iyavei oromondo pe cuaitarā pe reco tupri ãgua Tūpa remimbotar rupi. Ahe niha oñehi pēu peico vaherā sese imborerecuasa porañetesave.

13 Co rese, “Aviye ndeu” orohe Tūpa upe ari yacatu rupi. Esepia, Tūpa Ñehengagüer, oromombehu vahe pēu, peipisi ité, “Co Tūpa ñehe, ndahei ava tēi ñehe” aipo peye ité pe chupe. Supi eté Tūpa ñehe. Ahe niha osecuñaro ité pe recocuer peroyare. 14 Ore rivireta, acoi cuese peiporara mbahe-mbahe tēi pe mu eta pāhuve peicose; ëgue ehi tupri avei Jesús reroyasar Judea pendar yuvirecoi vahe Jesucristo recocuer rese. Imu judío ae oseca-seca yamotaréhisave yuvireco. 15 Ahe niha oyuca yande Yar Jesús yuvireco. Ahe avei oyucapa Tūpa ñehe mombehusar yuvireco aracahe. Ore avei opa ore mombo yuvireco. Ndoviroyai Tūpa yuvireco iyavei opacatu ava amotaréhimbar tēi yuvirecoi. 16 Esepia, acoi oroñehi

potase ava ndahei vahe judío upe iñepisiro ãgua rese, ahe rumo ndoipotai yuvireco oreu. Ipipe sui oyemboangaipa catu yuvireco. Cûritei rumo Tûpa ñemoirosa ipírata vahe ou iharive yuvireco cute.

Pablo oso pota iri Tesalónica pendar repia

¹⁷ Ore rivireta, yepe ndayayoepia iri yayepépi raimise yandeyesui, ore piha pipe rumo, “Ahé” oroheño ité pëu. Iyavei orequeréhiño ité yepi oroso iri vaherã pe repia.

¹⁸ Orosáha tẽi ore so ãgua pe repia yepi; che Pablo teiteté setá yupagüer tẽi aso pota. Caruguar rumo ndoipotai. ¹⁹ ¿Ava sui pihá orosáro mbahe aviye vahe? ¿Uma ore vihasa? ¿Uma ore mboviharete catura? ¡Peño itera acoi yande Yar Jesucristo yevise curi! ²⁰ Pe ité niha ore mbovihara peye, iyavei orovihá catura pe rese no.

3

¹⁻² Evocoiyase che nañemosa irise pe repiaéhi rese, chepihañemoñeta yande rivri Timoteo mundo ãgua pe repia; “Che güeraño tapita Atenas ve” ahe. Esepia niha, ahe oporavíqui vahe Tûpa upe ore rupi, omombehu vahe co ñehesa písirrosa resendar Cristo suindar ou vahe. Ahe amondo pëu pe moviracua catu ãgua, pe mongueréhi catu ãgua avei peyeroya catu vaherã Cristo rese. ³ Evocoiyase tipo eme oyembosiñuiye vahe co mbahe tẽi pe mombaraisuse. Peicua niha yaiporara rane itera co nungar mbahe. ⁴ Iyavei niha acoi oroico vitese pe piri, “Yande paraisu rane itera mbahe yavai vahe” orohe voi eté acoi pëu. Ahe niha cûritei peicua. ⁵ Evocoiyase che nañemosa irise, amondo Timoteo ‘¿yuvirecoño ité pihá Tûpa rese?’ che yapave. Che asiquiye, “Aviyeteramo Caruguar omondora mbahe tẽi pipe yuvireco” ahe ‘ore poravíqui agüer evocoiyase ocañi têira’ che hesave.

⁶ Cûritei rumo Timoteo oyevi Tesalónica sui, güeru ñehesa aviye vahe pe resendar oreu pe Tûpa reroyasa, iyavei pe poroaisusa resendar avei. Iyavei aipo pemahenduha ore rese pe poroaisusa pipe. Iyavei pe ore repia pota tẽi peye no; inungar ore pe repiasa pota tẽi avei. ⁷ Sese, ore rivireta, ore paraisu pâhuve ore mboviharete peye, co oroicuase pe reco tupri Tûpa reroyasa pipe. ⁸ Cûritei ore mopoase catu iri oroyanduse pe yemoviracua tuprisa yande Yar rese. ⁹ ¿Mara yahera pihá, ‘Aviye ndeu’ yande he tupri catu ãgua Tûpa upe?’ orohe pe reco tuprisa rese, iyavei ore yemboviha catusa rese avei no ¹⁰ pítu, ari rupi oroporandu Tûpa upe ore so ãgua pe repia eipeeve iyavei Tûpa reroyasa ipane vîte vahe mboaviye tupri ãgua pëu.

¹¹ Iyavei ore oroopota ore p̄itiv̄ira yande Ru Tūpa, yande Yar Jesucristo avei ore so āgua pe piri. ¹² Evocoiyase yande Yar tape moviracua catu, tombou catu avei pe yeaisu āgua, iyavei opacatu raisu catu āgua, inungar ore orovireco pe raisusa. ¹³ Ip̄ipe sui tape moviracua pe reco maranehi p̄ipe pe mbahe aviēhisave yande Ru Tūpa rovai acoi oyevise yande Yar Jesús opacatu ovoya reseve. Ēgue tehi p̄eu.

4

Teco tupri Tūpa oipota

¹ Ore rivireta, cūritei oroñehe pota p̄eu pe cuitarā rese yande Yar Jesús rer pipe: inungar cūritei pe recocuer pereco, ēgue peyeño ité catu peico ore pe mbohe agüer rupi Tūpa mboetei āgua.

² Pe niha, peicua acoi ore pe mbohe agüer yande Yar Jesús rer pipe. ³ Esepia, Tūpa oipota pe reco maranehi āgua oyeupe. “Tipo eme que ñepei oyemboaguasa t̄ei vahe” ehi. ⁴ Iyavei peico tupri pe rembireco rese pe reco ̄visa pipe Tūpa remimbotar rupi, iyavei pemboetei tuprīra sereco yepi. ⁵ Peicoi rene ava Tūpa ndoicuai vahe reco pipe pe remimbotar t̄ei apo āgua. ⁶ Tipo eme avei oyapo vahe co nungar angaipa yande rivri reco momara āgua t̄ei. Esepia, Tūpa omondora oñemoirosa ip̄irata vahe evoco nungar ava upe. Evoco niha yipisuive oromombehu vahe p̄eu. ⁷ Esepia, Tūpa niha yande poravo yande reco maranehi āgua, ndahei angaipa pipe yande reco āgua t̄ei. ⁸ Sese acoi ndosendu potai vahe co yembohesa, ndahei eté ava t̄ei viroiro, ahe rumo Tūpa ité viroiro yuvireco acoi ombou vahe oEspíritu Santo p̄eu.

⁹ Iyavei co peyepāhuve pe yeaisusa rese, ndaicuachía iri chira p̄eu. Esepia, Tūpa ité niha pe mbohe pe yeaisu āgua opacatu. ¹⁰ Ēgue peye niha opacatu yande rivireta co Macedonia rupindar raisu peico. Co catu peyapo che rivireta: pe mbouvicha v̄ite catu pe poroaisusa. ¹¹ “Peico tupriño avei pe reco mbegüesa pipe; mbahe pe rembiapo reseño tupri pehañeco; peporaviqui pe po pipe ité” aipo orohe acoi p̄eu cuese. ¹² Evocoiyase pe mboyeroyara ava ndahei vahe Jesús reroyasar yuvireco; iyavei ēgue peyera mbahe p̄eu ipaneehi āgua avei no.

Oyevira yande Yar co ̄vi pipe

¹³ Ore rivireta, ore oroopota peicua aveira manosa recocuer; sese ndapeicoi chira pe viharēhisa pipe inungar co ava ndoyeroyai vahe Tūpa rese. ¹⁴ Esepia, yande yaroya: Jesús omano, ichui ocuerayevi. Evocoiyase yande avei yaroya

Tūpa Guahir Jesucristo reseve ombogüerayevira opacatu acoi seroyasa pipe omano vahe yuvireco.

¹⁵ Sese co oromombehu pēu, ahe niha yande Yar porombohesa: yande yaicove vîte vahe co iví pipe, acoi oyevise yande Yar, ndahei chira yande rane omano vahecuer sui yayemboya yande Yar rese. ¹⁶ Esepia, yande Yar ité ogüeyi irira iva sui ou mborerecuar ivate vahe ñehesa pipe; ahese oyeendura Arcangel ñehe iyavei Tūpa remimbi moñehe píratasa. Ahese seroyasar omano vahecuer rane opúhara yuvireco. ¹⁷ Ipare voi yande yaicove vîte vahe, serasopri yaicora opacatu iva quiha rese co yande Yar rovaichi água ivitu rupi. Ëgüe yahera yande Yar píri yaico vaherä apirëhi. ¹⁸ Sese peyemonguerëhi catu co ñehesa pesendu vahe rese.

5

¹ Iyavei no, acoi ari yande Yar yusa resendar ore ndoroicuachiai chira pēu. ² Esepia, pe peicua tupri co yande Yar ari oyepotara imohaëhisa pipe, inungar acoi imonda rai vahe oyepota pítu pipe. ³ Acoi ava aipo ehise yuvireco: "Opacatu aviye ité yaico, ndipo iri mbahe-mbahe tēi yandeu" ehise, ahese inungar acoi cuña imembirasi aviyeteramo tēi, ëgüe ehi aveira, aviyeteramo tēi icañi oura iharive, ahese ndoicatui chira ichui oñemi yuvireco. ⁴ Pe rumo, ore rivireta, ndahei pítmimbisa pendar nungar peico. Evocoiyase oyepotase yande Yar ari, ndahei chira imonda rai vahe nungar pe resapiha tēi ou. ⁵ Esepia, pe opacatu peico vahe Tūpa poroesapesa pipe, ndahe iri yande pítmimbi pipendar yaico. ⁶ Evocoiyase ndayaicoi chira co ambuae yuviroque tēi vahe nungar pihañemoñetasa pipe; iyacatu rumo yande yayemopoase yande pihañemoñeta tuprisa pipe. ⁷ Acoi yuviroque vahe, yuviroque pítu pipe; iyavei acoi osavaipo vahe, osavaipo avei pítu pipe yuvireco. ⁸ Yande rumo yaico vahe Tūpa poroesapesa pipe. Evocoiyase yareco tuprira yande pihañemoñetasa yande reco tupri água yepi. Iyavei yayoepira yande yeroyasa pipe, poroaisusa pipe avei no. Iyavei inungar acoi sundao vireco oãca ndíru guarepochi apopri yuvireco oãca repi água, yande avei tayareco yande remiaro yande ñepisiro água. ⁹ Esepia niha, Tūpa yande poravo ndahei yaico vaherä iñemoírosa pipe nara; ahe rumo yande poravo yasupiti vaherä ñepisiro yande Yar Jesucristo rembiapo sui. ¹⁰ Esepia, ahe omano yande recocuer rese oyese yande rereco água opacatu yande recove vitese, yamanose avei. ¹¹ Sese peyemonguerëhi catu, iyavei peyemoviracua catu vite peyeupe inungar co peyapo peico.

Pablo omboaracua Jesús reroyasar oico

¹² Iyavei no, ore rivireta, pembooyeroya acoi oporavíqui vahe yuvireco pe pāhuve. Ahe niha pe cuai vahe yuvireco, iyavei pe mboaracua vahe yande Yār uve nara yuvireco. ¹³ Pembooyeroya iyavei pesaisu tupriira iporavíquisa rese. Peico tupri avei peyepāhuve.

¹⁴ Iyavei ore rivireta, pe cuaisa: pemboaracua acoi ndoporavíqui potai vahe imbohe catu água. Iyavei pemongueréhi acoi niqueréhi iri vahe. Peipítivii avei acoi ndoyemovíracuai vahe Tūpa rese güeco água. Iyavei peñemosayo opacatu ava uve yepi.

¹⁵ Peicua catu pe rereco megua potasar sui. Ndapemboyevíi chira mbahe-mbahe tēi co pe rereco megua potasar upe. Iyacatu rumo peyapo tupri mbahe aviye vahe peyeupe, opacatu ava upe avei no.

¹⁶ Peyemboviñaora ari yacatu peico. ¹⁷ Iyavei peyeroquiira ari yacatu rupi no. ¹⁸ “Aviye ndeu” peyera Tūpa upe opacatu mbahe rese. Esepia, ahe niha Tūpa oipota yandeu Cristo rese yaico vahe.

¹⁹ Iyavei ndapemombituhui chira mbahe Espíritu Santo oyapo pota vahe pe rese. ²⁰ Ndapeyamotaréhii chira Tūpa ñehe imombehupri. ²¹ Pesáhapa rane opacatu mbahe. Ichui pepisira mbahe aviye vahe peyeupe. ²² Peyepepi opacatu mbahe naporai vahe sui.

²³ Tūpa acoi ombou vahe teco tuprisa yandeu tape pehapa tupri oyeupe nara. Iyavei tosāro tupri opacatu pe espíritu, pe hā, pe rete avei pe reco maranehi água co yande Yār Jesucristo yevi irise. ²⁴ Ahe acoi pe poravo vahe oyeupe nara seco tupri vahe. Ahe omboaviyera opacatu co mbahe.

Pablo imahenduha Jesús reroyasar rese

²⁵ Ore rivireta, peyeroqui ore rese.

²⁶ Pemboavirave opacatu yande rivri eipe pendar pe yeovaupitesa pipe.

²⁷ Che opocuai yande Yār rer pipe: peyeroqui co cuachiar opacatu yande rivireta upe.

²⁸ Yande Yār Jesucristo tape rovasa tupriño pe rereco. Aipo rupive.

PABLO REMBICUACHIA IMOÑUVIRIOSA TESALONICA PENDAR UPE TESALONICENSES

Pablo mahenduhasa Jesús reroyasar Tesalónica pendar upe

¹ Che, Pablo, Silvano, Timoteo reseve, aicuachía co ore ñehe pẽu, ore rivireta, peñemonuha vahe Tūpa uve tecua Tesalónica ve, yande Ru Tūpa, yande Yar Jesucristo rese peico vahe. ² Tombou pẽu oporovasasa pe reco tupri ãgua yande Ru Tūpa, yande Yar Jesucristo avei.

Tūpa omombaraisura viroyasarëhi Jesucristo yevise curi

³ Ore rivireta, “Aviye ndeu” orohe itera Tūpa upe pe recocuer rese yepi. Esepia, Tūpa rese pe yeroyasa tuvicha-vicha iri, tuvicha-vicha iri avei pe yeaisusa opacatu peyeupe pereco vahe. ⁴ Evocoiyase, ore oroñehe pe rese ore vihasa pipe Tūpa reroyasar ñemonuhasa rupi. Esepia, acoi ava mbahe-mbahe tēise pẽu, peñemosão chupe pe Cristo rese pe yeroyasa pipe. ⁵ Co niha omboynecua Tūpa reco ïvisa ava upe. Esepia, ipipe pe rereco omborerecuasave pe reique ãgua. Sese niha, peparaisu vite tēi peico.

⁶ Tūpa omombaraisura acoi pe mombaraisusarer. Iya ité ñgue ehi vaherã chupe. ⁷ Pe rumo imombaraisupri peico vahe, Tūpa omondora pe pituhu ãgua, ore pituhu ãgua avei, acoi yande Yar Jesús oyevise tata rendigüer pähuve iva sui opacatu güembiguai seco pírata catu vahe reseve. ⁸ Ahe oura opacatu Vu Tūpa reroyasarëhi mombaraisu ãgua iyavei oyesuindar ñehesa poropísrosa resendar rendu tēisar mombaraisu avei. ⁹ Evocoiparaísura yuvireco, imocañipri yuvirecoira apirëhi. Iyavei imboyepepisara amombri yande Yar reco píratasa porañetesa sui. ¹⁰ Acoi ouse ahe ari pipe, yande Yar imboeteiprira opacatu seroyasar pähuve; ipähuve pe peicora. Esepia, peroya ité oromombehu vahe pẽu.

¹¹ Co rese oroyerqui pe rese yepi: oroporandu yande Ru Tūpa upe tape rereco tupri güemienoi pe recosa pipe. Iyavei oroyerqui chupe, tomboaviye güeco píratasa pipe opacatu ñepei-peí mbahe aviye vahe peyapo pota vahe iyavei opacatu mbahe pe rembiapo aviye vahe sese pe yeroyasa pipe. ¹² Evocoiyase yande Yar Jesucristo rer imboeteiprira pe recocuer pipe sui; iyavei pe imboeteiprira peico yande Yar rese peico vahe yande Ru Tūpa, yande Yar Jesucristo pe raisusave.

2

Yande Yar Jesús yevisa resendar mombehu tuprisa

¹ Iyavei, ore rivireta, ore oromombehu potami pēu opacatu acoi yande Yar Jesucristo yevisa resendar yande monuha vaherā oyesa. ² Peicua catu, tapepihañemoñeta rerova eme iyavei peyembosiquiyei rene que ava “che añahe Espíritu pipe” ehi vahe sui, que icuachiapri sui, que ñehesa pesendu vahe sui inungar-ra ore ñehesa ité viña “oyepota ari Jesús yevisa” ehi tēi vahe yuvireco pēu. ³ Peicua catu peyembopa ucai rene ñepei yepe ava upe. Esepio, yipindar ari Jesucristo yu ãgua renonde, yuguerura mbahe-mbahe tēi aposar. Ahe Tūpa amotarēhisar yuvirecoi vahe. Ahese oyemboyecuara ava yangaipa guasu vahe. Ahe ocañi tēi vaherā. ⁴ Oyemboivate aira opacatu Tūpa rer rerecosar amotarēhisave iyavei ndoipotai chira ambuae mboetei. Oique aveira, oguapi Tūpa rēta pipe inungar-ra Tūpa ité viña. “Supi eté che Tūpa aico” ehi tupri tēira oī.

⁵ ¿Ndapemahenduhai vo acoi che ñehengagüer rese pe pāhuve aico vitese cuese? ⁶ Co imombitasar peicua cūritei. Ihari oyepotase voi, oyemboyecuara. ⁷ Co porocuaita amotarēhisar ndoyemboyecua vitei vahe rembiapo oime cūritei. Co güeraño ipane imombitasar renose ãgua ipāhu sui, ⁸ ahese voi oyemboyecuara acoi ava yangaipa guasu vahe. Yande Yar Jesús rumo oyucara oñehe pipe, omocañi itera güendigüer pīratasa pipe oyevise curi. ⁹ Yucasa renonde rumo, acoi ava yangaipa guasu vahe oura Caruguar pīratasa pipe; güerura güeco pīratasa tuvicha vahe; omboyecua angahura poromondiisa. ¹⁰ Oyapo angahura opacatu mbahe tēi oporombopa ãgua oico ava ocañi tēi vaherā upe. Esepio, evocoí ava ndosendu potai porombohesa supi eté vahe oñepisiro ãgua yuvireco. ¹¹ Sese Tūpa oseyara co porombopasa reroya ãgua yuvireco ¹² ‘ipipe tocañi tēi co ava, opacatu mbahe supi eté vahe reroyaëhisar, acoi oyemboviha catu vahe mbahe-mbahe tēi rese yuvireco’ oya.

Iporavopri ip̄isiropirā

¹³ Ore rumo, “Aviye ndeu” orohera Tūpa upe pe recocuer rese yepi, ore rivireta, yande Yar rembiaisu peico vahe. Esepio, Tūpa niha pe poravo yipisuive pe p̄isiro ãgua pe reco maranehi ãgua rese Espíritu pipe iyavei porombohesa supi eté vahe reroya ãgua. ¹⁴ Sese niha, Tūpa oñehe yandeu yande piha pipe co ñehesa p̄isirosa resendar pipe, ore oromombehu vahe pēu ‘tovireco che Rahir Jesucristo reco porañetesa’ oya.

¹⁵ Sese ore rivireta, peyemoviracua iyavei peresarai eme acoi oromombehu vahecuer iyavei oroiyuachía vahe acoi pēu. ¹⁶ Yande Yar Jesucristo teieté, yande Ru Tūpa avei, yande

raisusa yande rovasasa pipe ombou vahe vihasa apirēhi vahe yandeu iyavei yande reco tupri rāro āgua,¹⁷ ahe tape monguerēhi, tape moviracua avei opacatu ñehesa aviye vahe rese, opacatu mbahe pe rembiapo aviye vaherā rese avei.

3

Pablo oporandu Jesucristo reroyasar yeroquisa rese oyeupenara

¹ Ore rivireta, co mbahe ipa vahe amombehu pota pēu: peyeroqui ore rese. Evocoiyase toyepota pihaivi yande Yar ñehengagüer opacatu rupi; tipisia tupri imboeteisa pipe inungar oyepota pe pāhuve. ² Peyerure avei ore repi āgua rese ava ndaseco pōrai vahe, ipihañemoñeta rai vahe sui. Esepia niha, ndaopacatui Tūpa rese ipihañemoñeta yuvireco. ³ Yande Yar rumo seco ñvi vahe. Ahe pe recocuer moviracuara iyavei pe rārora mbahe tēi sui. ⁴ Ore oroyeroya yande Yar rovai peyapo vahe rese iyavei peyapo viteño vaherā rese acoi ore pe cuai agüer. ⁵ Yande Yar tape pītivii pe poroaisu āgua inungar Tūpa oporoaisu iyavei Cristo ñemosasa rereco āgua.

Yande cuaita yande poraviqui āgua

⁶ Ore rivireta, opocuai yande Yar Jesucristo rer pipe: acoi ndoporaviqui potai vahe yande rivri pe pāhuve, peyepepiño ichui, acoi ndoviroya potai vahe avei ore porombohesa oromombehu vahe pēu. ⁷ Pe peicua mara peyera ore recocuer moña āgua peico. Ore oroicose pe pāhuve, ndoroico tēi,⁸ ndorohu tēi avei ambuae tembihu imboepipirēhi. Ore rumo que ñepei mañeco tēiēhi āgua rese oroporaviqui orecuerai rane ité ari, pītu reseve. ⁹ Iya ité niha mbahe rese ore porandu āgua pēu ore pītivii āgua rese viña; ore rumo oroporaviqui pe ore recocuer rupi pe guata āgua rese. ¹⁰ Acoi oroico vitese pe pāhuve, oromondo pe cuaitarā: acoi ndoporaviqui potai vahe, ahe tocaru eme. ¹¹ Oroyandu amove aipo pe pāhu pendar yuvirecoiño tēi ndoporaviqui vahe. Evocoí omañeco tēi ambuae ava recocuer. ¹² Ore oromondo acoi ava upemborocuaita yande Yar Jesucristo rer pipe: toporaviqui güeco quiririsa pipe; ipipe sui yuvirecovera.

¹³ Ore rivireta, pecuerai eme mbahe aviye vahe apo. ¹⁴ Oimese ndoviroyai vahe ore remimombehu co cuachiar pipe, peicua tupri evocoí nungar. Peyemboa eme sese. Evocoiyase tochī ahe. ¹⁵ Pereco eme catu yamotarēhisa chupe; iyacatu rumo pemboaracua catuñora inungar yande rivri.

Ñehesa ipa vahe

16 Aviye, yande Yar ae tombou güeco tuprisa pe reco tupri
ãgua pẽu ari yacatu rupi opacatu pe reco pipe. Tasecoi pe rese
ari yacatu.

17 Che, Pablo, aicuachía co mahenduhasa che po pipe ité
pẽu. Che rembicuachía icuapri opacatu che cuachiar pipe.
18 Yande Yar Jesucristo tape rovasa opacatu yepi. Aipo rupive.

PABLO REMBICUACHIA YIPINDAR VAHE TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, aicuachía che ñehe ndeu, Timoteo. Nde niha che rahir Tūpa reroyasa pipe ereico. Che niha Jesucristo apóstol aico, yande Písicosar Tūpa porocuaita rupi iyavei yande Yar Jesucristo porocuaita rupi. Ahe niha yande remiaro. Tombou yande Ru Tūpa, yande Yar Jesucristo oporovasasa, oporoparaísuecasa ndeu nde reco tupri água.

Pablo, “Eicua catu porombohesa co cotí tēi vahe sui” ehi Timoteo upe

³ Iyavei acoi aipo ahe ndeu cuese che so água Macedonia ve: nde epita co tecua Efeso ve. Evocoiyase eremboaracuara co ava co cotí tēi oporomboaracua vahe, toporomboaracua eme pihañemoñetasa co cotí-cotí tēi vahe rese yuvireco. ⁴ Toyapisaca eme avei tecocuer ipapapri tēi vahe rese, tecocuer aracahendar ëgüe ehi tēi vahe rese avei. Ahe ichui osẽ yeacasa naporai vahe yepi; ndayande pítivii rumo Tūpa remimbotar reroya tupri água rese.

⁵ Sese co amondo porocuaita ndeu yande yeaisu água yande pihañemoñeta catuprisa pipe, yande reco yapisaca tuprisave, iyavei yande yeroyasa supi eté vahe pipe. ⁶ Esepiá, amove ava oime ichui oyearacua moçañi oñeho-ñeho tēisa pipe yuvireco. ⁷ Oporombohe pota tēi Tūpa porocuaita rese; ndosenducuai rumo oporombohesa yuvireco, “Supi tupri revo yaporombohe” ehi tēi yuvireco viña.

⁸ Yaicua niha co porocuaita aviye ai eté yaiporuse Tūpa remimbotar rupi eté. ⁹ Yaicua avei acoi porocuaita ndahei ava aviye vahe upe nara. Ahe rumo ndiporeroysi vahe mboaracua água, ndayaracua potai vahe upe nara, angaipa viyar upe nara avei, iyavei opacatú mbahe-mbahe tēi aposar upe nara, nomboetei vahe Tūpa iyavei chupendar pihañemoñetasa; acoi vu, osi oyuca vahe; opacatu ava oporapichi vahe upendar. ¹⁰ Acoi oyemboaguasa tēi vahe, iyavei cuimbahe ambuae cuimbahe rese oyapo vahe mbahe, que cuña ambuae cuña rese avei; iyavei acoi virocua tēi vahe mbiguai ambuae ava sui, semirañete ai vahe; iyavei acoi, “Che amombehu mbahe supi eté vahe” ehi tēi angahu vahe, chupe nara ité co porocuaita; imondosa avei opacatu porombohesa nimarai vahe amotarëhisar upe nara. ¹¹ Co porombohesa nimarai vahe oyoya tupri ñehesa porañete vahe

poropísirosa resendar rese. Tūpa sovasapri secoi, ahe che cuai vahe sese.

Pablo oparaísuereseca rese, “Avíye ndeu” ehi Tūpa upe

12 “Avíye ndeu” ahe yande Yar Jesucristo upe. Ahe niha ombou píratasa co che ñehe água. Esepio, ahe oyeroya che rese. Sese che mundo oñehengagüer mombehu água. 13 Yepe che yipindar che ñehe-ñehe tēi sese; aseca-secaño mbahe-mbahe tēi che rembiapoguã yamotaréhimbave che yemboivate aisa pipe, Tūpa rumo, che paraisuerecoño. Esepio, che ahese, ndahe vitei Cristo reroyasar aico; ndaicua vitei mbahe ayapo vahe. 14 Ëgüe ehi yande Yar ombou catu oporovasasa che rese iyavei ombou che oyese yeroya água iyavei che poroaisu água Jesucristo rese che recosa pipe.

15 Iya peroya co supi eté vahe, che aipota avei opacatu oyapisacara yuvireco sese: Jesucristo ou co ivi pipe ava yangaipa vahe písiro água. Che rumo acoi ivate catu vahe yipindar aico ipáhuve. 16 Sese Tūpa che paraisuereco che rese rane Jesucristo reco mbegüe tuprisa mboyecua água. Ëgüe ehi che recocuer upe ambuae ava seroya água. Ipípe sui osupitira tecovesa apiréhi vahe yuvireco. 17 ¡Sese yamondo imboeteisa apiréhi yande Rerecuar ndopai vahe upe! ¡Ahe nomanoi vahe, ndayasepiai vahe, ahe ñepei vahe Tūpa!

18-19 Che rahir Timoteo, co amondo nde cuaitarā ndeu nde reco moviracua água mbahe tēi recopi água Cristo rese nde yeroyasa pipe nde pihañemoñeta catuprisa pipe avei. Supi tupri cuese Tūpa reroyasar oñehe yuvireco nde rese serer pipe. Amove ava opihañemoñeta tupri reroyaëhisave, omocañi uca Tūpa rese oyeroysa 20 inungar vahe Himeneo rese, Alejandro yuvirecoi. Ahe che amondo Caruguar povrîve ‘evocoiyase toicua tiñehe-ñehe tēi eme Tūpa upe yamotaréhisave yuvireco’ che yapave.

2

Ñehesa yeruresa resendar

1 Iyavei no, co che opomongueréhi pe yerure água, peporrandu, pemondo avei “avíye” pe hesa Tūpa upe opacatu ava recocuer rese. 2 Iyavei peyerure opacatú mborerecuar rese. Evocoiyase tayareco yande reco tupri Tūpa mboetei tuprisa pipe, yande poromboeteisa pipe avei. 3 Co avíye ité; ahe niha yande Písiosar Tūpa remimbotar. 4 Supi eté ahe oipota opacatu ava ñepisiro iyavei co porombohesa supi eté vahe cua tupri água. 5 Esepio, ñepeiño ité Tūpa, iyavei ñepeiño ité ava oicatu vahe yande reraso Tūpa upe: ahe Jesucristo. 6 Esepio, Jesucristo omano opacatu ava yangaipa vahe repirā ipísiro

água. Ahe imombehusa chupendar arí iporavopri rupi. ⁷ Sese che supi eté apóstol, icuaipri aico Tūpa Ñehengagüer mombehu água, ava ndahei vahe judío mbohe água, co yeroysa rese iyavei supi eté vahe rese. Supi eté ndopombopai.

⁸ Evocoiyase che aipota opacatu rupi ava toyerure yuvireco. Tomopuha opo yuvireco opíhañemoñeta catuprisa pipe, ombahe mboasiéhisa pipe, oyeacaéhisa pipe avei. ⁹ Iyavei cuña toyemonde tupriño turucuarño tēi pipe yuvireco. Aní chira rumo oáca moporañeteisa pipe yuvirecoi; tomondo eme avei mbahe sendí vahe inungar oro oyese yuvireco. Iyavei turucuar sepi rusu vahe tomonde eme yuvireco. ¹⁰ Iyacatu rumo yuvirecoi tuprira güembiaapo aviye vahe pipe, inungar cuña oyemondo tupri vahe Tūpa upe yuvireco yepi. ¹¹ Iyavei cuña tosendu porombohesa oquiririsa pipe imboyeroyasave. ¹² Ndaipotai cuña oporombohe ava rehii pâhuve iyavei toyocuai eme cuimbahe. Iyacatu rumo iquiririñora yuvireco. ¹³ Esepia, Tūpa oyapo yipindar Adán; ipare Eva oyapo. ¹⁴ Adán ndahei imbopapri; cuña rumo oyembopa uca. Ichui ovíapi angaipa pipe. ¹⁵ Oñepisirora rumo ocuaita mboavíyesa pipe oyese yeroysa rereco pipe, iporoaisusa pipe, güeco maranehisa pipe avei.

3

Tūpa reroyasar rārosar cuaita

¹ Iyavei co supi eté: acoi amove oico pota vahe Tūpa reroyasar rāro água, ahe oipota mboraviquí aviye catu vahe. ² Sese acoi vireco vahe ocuaita Tūpa reroyasar rāro água, ahe secoi tuprira mbahe aviye vahe pipe yepi. Ipípe ava noñehei chira yamotaréhisave. Iyavei omendara ñepei cuña reseño ité. Toñearo tupri avei yuvireco, toyapo mbahe supi eté vahe, tiporomboetei tupri avei. Iyavei omoinguera oyepíri ava oyepota vahe güëtave. Oicua aveira ava mbohe tupri água. ³ Iyavei ndahei chira caguar tēi. Ndosecai chiaveira ovava água. Iyacatu rumo seco mbegüera opacatu ava upe. Ndoipota rai chiaveira guarePOCHI. ⁴ Iyavei oicua tuprira güëta pipendar rāro água. Ombohe aveira guahir iporeroya água, iporomboetei água avei. ⁵ Esepia, acoi ndoicuai vahe güëta pipendar rāro, ¿mara ehira evocoiyase Tūpa reroyasar rāro? ⁶ Tūpa reroyasar rārosar rumo ndahei chira oipisi ramo vahe Tūpa opíha pipe. Esepia, aviyeteramo oyemboivate ai tiétera. Ipípe sui imocañipri avei secoira Caruguar nungar. ⁷ Iyavei oyecua uca tupri ranera Tūpa reroyasaréhi pâhuve. Ahese ndipoi chira imboeteiéhisa iyavei ndovíapi chira Caruguar povrive.

Tūpa reroyasar rese ihañeco vahe cuaita

⁸ Iyavei Tūpa reroyasar rese ihañeco vahe yuvirecoira oporomboeteisa pipe. Tomboaviye oñehe. Ndahei chira caguar tēi; ndahei chiaveira guarepochi pota raisar tēi. ⁹ Iyacatu rumo, porombohesa supi eté vahe rese oyemboya catura opīhañemoñeta catuprisa pipe yuvireco. ¹⁰ Iyavei secoãhasa ranera. Acoi osē tuprise, ahese toyuvirecoi Tūpa reroyasar rese ihañeco vaherā. ¹¹ Iyavei sembireco yuvirecoi aveira oporomboeteisa pipe, nimahechiroi chira, osāro tupriña güecocuer yuvireco, iyavei imboyeroyapri aveira opacatu mbahe rese yuvireco. ¹² Iyavei Tūpa reroyasar rese hañecosar ñepeiño itera sembireco, oicua aveira guahir rāro tupri ãgua, güëta pipendar rāro ãgua avei. ¹³ Esepia, Tūpa reroyasar rese hañecosar oyapo tuprise oporavíquisa yuvireco, ipipe sui imboyeroyasara. Osiquiyeéhisave avei secoira Jesucristo reroyasa pipe.

Tūpa reco oyecua ramo vahe reroya tuprisa

¹⁴ Che aso pihaiivi pota nde repia. Aicuachía rumo co che ñehe ndeu ¹⁵ acoi che aracahese, ereicuañora rumo pe reco tupri ãgua ava Tūpa rese yuvirecoi vahe pâhuve; ahe acoi Tūpa oicove vahe upendar yuvirecoi, oyemovíracua tupri vahe yuvireco co porombohesa supi eté vahe mboyecua ãgua. ¹⁶ Supi eté tuvichá etepri Tūpa reco oyecua ramo vahe reroya tuprisa:

Cristo oyemoporëhi yande reco nungar pipe yandeu.

Ipare Espíritu pipe imboyecuasa secocuer supi tupri vahe.

Iyavei Tūpa rembiguai rembiepiave secoi.

Ichui imombehusa opacatu ivi rupi; opacatu rupi avei seroya-asa.

Iyavei ipisipri secoi ivave nara.

4

Oimera ava oyepipi vahe Tūpa rese oyeroyasa sui yuvireco coiye

¹ Iyavei Espíritu aipo ehi tupri yandeu: coiye, ari cañi renonde, amove ava oyepipira Tūpa rese oyeroyasa sui yuvireco. Omboyeroyara espíritu oporombopa tēi vahe, porombohesa Caruguar suindar avei. ² Oyapisacara ava aipo ehi tēi vahe rese, semirañete ai vahe ñehe rese avei yuvireco. Ëgüe ehira opīhañemoñetasa mocañi tēi yuvireco. ³ Co ava niha, “Aní chira yamenda” ehi tēi ava upe yuvireco; “Aní chira yahu opacatu mbahe” ehi avei chupe. Tūpa rembiapo rumo co tembihu poromovíracuasa. Sese Jesús reroyasar iyavei oicua tupri vahe mbahe supi eté vahe yuvirohura ‘aviye ndeu’ ohesa pipe Tūpa upe yuvireco. ⁴ Esepia, opacatu

mbahe Tūpa rembiapo, aviye ité. Ahe ndiyai chira yaroïro yaipisise, "Aviye ndeu" yande hesa pipe chupe.⁵ Esepio, Tūpa oñeho pipe yande yeroquise co tembihu rese, osovasa yandeu.

Cristo rembiguai aviye vahe resendar

⁶ Acoi erembohese co mbahe rese yande rivireta iyavei ereyemoviracuase ñehesa poreroyasa resendar rese iyavei porombohesa aviye vahe nde yese erereco vahe rese, ahese Jesucristo rembiguai aviye vahe ereicora.

⁷ Ndereyapisacai chira rumo acoi mbahe aracahendar co ivi pendar yapisaca tēisa rese. Eyembohe catu yande Yar uveño ité nde reco ãgua. ⁸ Esepio, yepe aviyeño chīhi yande retecuer yamoviracua viña, yande Yar upe yande reco ãgua aviye catu opacatu yande reco uve nara. Esepio, ahe yande pītiviira yande recove ãgua cūritei iyavei curi yande recove ãgua. ⁹ Co supi eté vahe, evocoiyase yande yaroyara opacatu yepi. ¹⁰ Sese niha yaporavíquí etepri. Esepio, yande yayeroya ité Tūpa ndopai vahe rese, ahe opacatu ava Pīsirosar, iyavei viroyasar Pīsirosar catu ité secoi.

¹¹ Co porombohesa eremombehura ava pāhuve, erembohe aveira sese. ¹² Tipo eme ava nde reroïro vahe chīhivahe catu nde reco rese. Nde rumo ereico tuprira Tūpa reroyasar rovaque. Eñehe Tūpa reroyasave nde reco tuprisa pipe. Esaisu tupri nde yeroyasave nde recocuer maranehi pipe. ¹³ Che yepota renondeve, eyeroqui catu Tūpa Ñehengagüer rese opacatu ava rovaque. Emonguerēhi catu yande rivireta iyavei erembohe tuprira. ¹⁴ Nderepoi chira Tūpa ndeu mbahecuasa ombou vahe sui. Esepio, ava Jesús reroyasar rārosar upe Tūpa omombehuse nde cuitarā, omondo opo nde harive yuvireco.

¹⁵ Ndehañeco catu co mbahe rese; tosepia catu opacatu ava nde recocuer yemoingatu catusa yuvireco. ¹⁶ Iyavei eñearo tupri, eicua catu nde porombohesa rese; eyemoviracua sese ité nde hañeco. Acoi ëgue erese, ipīsiropri ereicora; nde ñehe rese oyapisaca vahe avei ipīsiropri yuvirecoira.

5

Mara ehira Jesús reroyasar oyepāhuve yuvireco

¹ Eremboaracua pīrata eme mbia cuacuami. Iyacatu rumo eremboaracuara mbegüe rupi inungar nde yesupa ité sereco. Iyavei mbia chīhivahe upe ereñehe tuprira secocuerā rese inungar nde rivri upe. ² Cuña otīaro vahe upe avei ereñehe tuprira inungar nde si ité sereco; iyavei cuñatai eremboaracua tuprira inungar nde reindri ité ererecora opacatu nde reco catuprisa pipe.

³ Acoi imer mano vahecuer ité ereipítiviira que mbahe ipane vahe rese. ⁴ Que oimese imembri, anise que semiariro, toyembohe rane ocuaita mboaviye ãgua yuvireco chupe. Ëgüe tehi guaisu mboyevi chupe, ahe niha Tüpa remimbotar. ⁵ Iyavei acoi cuña imer mano vahecuer, acoi supi eté ahe ae secoi vahe, ahe oyeroya ité Tüpa rese, iyavei oyeroquiño ité ari, pítu yacatu yepi. ⁶ Osecase rumo mbahe güemimbotar yuvireco, ahese omano vahe tēi secocuer yuvirecoi. ⁷ Eyocuai tupri ava co ñehesa rese; ichui ndahei chira ava ñehepora tēi yuvirecoi. ⁸ Acoi ava rumo nosaroi vahe omu; acoi güëta pipendar nosaroi vahe avei, ahe ndoguata iri Tüpa rese oyeroysa rupi iyavei mbahe tēi catu Jesús reroyasaréhi sui.

⁹ Icuachiasara rumo ambuae cuña imer mano vahecuer pähuve ivate catu sesenta sui iharavíter vahe, iyavei ñepeíño ité omer vireco vahecuer. ¹⁰ Icuapríra secocuer icatuprisa rese, omboacua tuprise chihivahé oyesuindar, omoinguese ava güëta pipe, ihañecose ava Tüpa reroyasar rese ipi sei ãgua, oipítiviise ava iparaisu vahe, oyapo tuprise opacatu mbahe aviyévahe.

¹¹ Ereicuachía eme iharavíter ndosupitii vahe sesenta cuachiar pipe. Esepia, amove güemimbotar pipe tēi oyepipi Cristo sui, omenda yupagüe pota iri vahe. ¹² Ipípi oimera Tüpa poronupasa chupe. Esepia, yipíndar oyemondo Tüpa upeño ité oyecuachiase. Ipare rumo nomboaviyei eté oñehé. ¹³ Iyavei oí yacatu rupi tēi oguatase oico, ahese virecora oatéhisa, iyavei imahechiroi tēira, oñangareco tēira opacatu rese, omombehu-mbehu tēi aveira mbahe naporai vahe. ¹⁴ Sese co aipota acoi imer mano vahecuer cuñatai vite vahe: tomenda iri, timembí iri avei yuvireco, iyavei tosáro tupri güëta pipendar. Sese yamotaréhimbar secocuer ndahei chira oñehepora tēi vireco yuvireco. ¹⁵ Esepia, oime ité amove oyepipi vahe güemimbotar pipe Caruguar rupi güeco ãgua.

¹⁶ Acoi oimese que cuña Tüpa reroyasar vireco vahe que cuña imer mano vahecuer oyepiri, ahe toipítivií yuvireco. Ahe sese evocoiyase tüparo pendar nihañecoi chira. Ahese oicatura supi eté imu ndipoi vahe rese hañeco ãgua yuvireco.

¹⁷ Iyavei acoi Tüpa reroyasar rärosar osáro tupri vahe, ahe toipisi catu ava poropítiviisa imboyeroyasave. Acoi oyemondo vahe Tüpa Ñehengagüer mombehu ãgua, ava mbohe ãgua avei, ahe co poropítiviisa oipisi catura. ¹⁸ Esepia, aracahendar icuachiapri pipe aipo ehi: “Ereiyuru ãpichi rene tivi oporavíqui vahe trigo cambesar” ehi. Iyavei aipo ehi: “Mbía oporavíqui vahe iyacatu oipisira oporavíqui reprí” ehi.

¹⁹ Iyavei nde, ndereroyai chira mbahe omombehu vahe Tūpa reroyasar osāro vahe yamotarēhisave yuvireco. Oimese que ñuvirío sepiasar, que mbosapi, ahese ramo ereroyara.

²⁰ Acoi oimese rumo angaipa aposar ipāhuve, ahese eremboaracuara opacatu ava rovaque. Evocoiyase ambuae osiquiyera angaipa apoēhi ãgua yuvireco.

²¹ Iyavei che orocuai Tūpa rovaque, Jesucristo rovaque iyavei opacatu Tūpa rembiguai iva pendar rovaque avei: ereyapo tuprira co mborocuaita, nderemomahuatii chira ava imboaracua nde remimbotar rupi tēi. ²² Ndahei chira pihaivi eresenoi mbia mborocuaita rese ihañeco vaherā. Aviyeteramo nde rese pāve mbahe oimera. Eñearo tupri nde reco maranehisa pipe.

²³ Nde rie mbaherasisa upe ndereihui chira i güeraño tēi, chihimi rumo uva ricuer ereihuñomira chupe.

²⁴ Amove ava angaipa oyecua tupri oyeupe porandu ãgua renonde. Oime rumo acoi oñomi vahe oangaipa yuvireco. Ipare tēi icuasa. ²⁵ Inungar avei acoi mbahe ava rembiapo oime aviye vahe oyecua tupri vahe no, acoi ndoyecuai vahe ité nañomisai chira.

6

¹ Iyavei co ava mbiguai Jesús reroyasar, ahe oyeroja tuprira güerecuar yuvireco ava oñehe-ñehe tēiēhi ãgua Tūpa rer rese, yande porombohesa rese avei no. ² Acoi co mbiguai virecose güerecuar Tūpa viroya vahe yuvireco, ahese ndovirecoi chira imboyeroyaēhisa Jesús reroyasar recosa rese. Iyacatu rumo omboyeroya tupri catura güerecuar yuvireco. Esepia, serecuar oipisi vahe iporavíquisa, ahe Jesús reroyasar saisupri yuvirecoi yepi.

Tūpa rese yande pihañemoñetasa sepirusu vahe nungar

Eporombohe, emombehu co mbahe: ³ oimese oporombohe vahe oyesuindar pihañemoñetasa co coti tēi vahe rese, ndoyoyai vahe yande Yar Jesucristo porombohesa aviye vahe rese, ndoyoyai vahe avei yande yembohesa Tūpa rese yande yeroya tuprisa rese, ⁴ ēgue ehi vahe oyemboivate ai tēi mbahe renducuaēhisave. Iyavei oporandu-randu tēi ñehesa rese secoāha ãgua inungar imbaheasi vahe. Ichui osē mbahe pota raisa, ñemoirosa, ñehe-ñehe tēisa, yemboyeroyaēhisa ⁵ iyavei iporoacasa ndopai vahe ava yaracua rai vahe pāhuve. Ndoicuai rumo mbahe supi tupri vahe yuvireco. Ipihañemoñeta Tūpa rese omahenduhasa pipe mbahe rereco ati ãgua yuvireco viña. ⁶ Yayembovihañose mbahe yande rembiereco rese, ahese Tūpa rese yande pihañemoñetasa inungar mbahe sepirusu vahe yandeu. ⁷ Esepia, ndayarui eté niha

mbahe yahase co ivi pipe iyavei ndayarasoí chiaveira mbahe yamanose yande yeupi. ⁸ Iyacatu rumo yarecose yande remihura, yande yemonde água avei, sese yayembovíhañora yaico. ⁹ Amove rumo ava, “Mbahe rerecosar ité taico” ehi tiête viña, ndoyemoviracuai rumo tecohañasa upe. Ipare oviapi mbahe tēi pipe, setá mbahe pota raisave, ipipe oyecomomara. Ipare oyemocañi tēi. ¹⁰ Esepiá, guarepochi pota raisa sui osẽ opacatu mbahe naporai vahe. Amove ava ipota raisa pipe oyepepi Tūpa reroyasa sui iyavei omombaraisu güecocuer ipipe ahe ae yuvireco.

Tūpa rese yande reco vīracuasa

¹¹ Nde rumo, Tūpa rese ereico vahe, eyepepi opacatu co nungar mbahe naporai vahe sui. Eico nde reco ívisa pipe, ndemahenduhaño ité Tūpa rese. Eroya, esaisu, eñemosá avei eico nde reco mbegüesave. ¹² Eyemoviracua ité mbahe tēi uve Tūpa reroyasa rese. Erepoi rene tecovesa apiréhi vahe sui, sese niha Tūpa oñeha ndeu. Iyavei eremombehu ité niha Tūpa reroyasa nde reco água ava eta rovai. ¹³ Cüritei Tūpa rovaque, ahe opacatu mbahe moingovesar iyavei Jesucristo rovaque, ahe niha omombehu tupri ité supi eté vahe Poncio Pilato rovai, che orocuai ¹⁴ ndererovai chira che remimombehu ‘tipo eme, mara ehi, ehi tēi vahe yuvireco ndeu’ che yapave. Nderepoi chietera co nde reco tuprisa sui acoi ouse yande Yar Jesucristo. ¹⁵ Acoi oyepotase arí imombehupri curi, ahese Tūpa omboyevira Guahir. Ahe niha ñepei vaheño ité imboeteipri, seco pírata catu vahe. Aheño ité niha mborerecuar ivate catu vahe rerecuar. ¹⁶ Aheño ité teco apiréhi vahe, tesapesa secoi; ndipoi oyemboya vahe sese, ndipoi eté que ava osepiá vahe. ¡Égüe tehi, imboeteipri tasecoi opacatu opíratasa apiréhi vahe rese!

¹⁷ Acoi imbahe eta vahe co ivi pipe eyocuai: toyemboívate ai eme, iyavei toyeroaya rai eme ombahe eta rese tēi yuvireco. Esepiá, ahe égüe ehi tēi vahe. Iyacatu rumo Tūpa rese oyero-yara yuvireco. Ahe niha opacatu mbahe icatupri vahe ombou yandeu nara yande rembiporuguã. ¹⁸ Eyocuai avei evocoí ava: toyuvirecoi mbahe yar nungar mbahe avíye vahe aposa pipe. Iyavei toyemoingatuño acoi mbahe vireco vahe mboyaho água ambuae ava upe yuvireco. ¹⁹ Evocoíyase virecora mbahe avíye vahe, apiréhi vahe oyeupe nara yuvireco curi tecovesa supi eté vahe rereco água.

Timoteo cuaitarā ipa vahe

²⁰ Timoteo, esáro tupri co porombohesa supi tupri vahe Tūpa ombou vahe ndeu. Ereyapisacai rene ava tēi pihañemoñetasa égüe ehi tēi vahe rese, iyavei porombohesa

co cotí tēi vahe rese avei. Esepio, amove ava aipo ehi co porombohesa rese, “Co ité, yande mboaracuara” ehi tupri tēi vahe yuvireco chupe. ²¹ Ipípe sui niha amove ava oyaví Tūpa reroyasa yuvireco.

Aviye, yande Aposar tandem rovasa. Aipo rupive.

PABLO REMBICUACHIA IMOÑUVIRIOSA TIMOTEO UPE TIMOTEO

Pablo mahenduhasa Timoteo upe

¹⁻² Che, Pablo, amondo co cuachiar ndeu, che rembiaisu, che rahir nungar, Timoteo. Che niha Jesucristo apóstol aico Tūpa remibotar rupi acoi “che amondora teco piasu che reroyasar uve” ehi vahe rupi tupri. Ahe cūritei oime yandeu Jesucristo rese yande recose. Yande Ru Tūpa iyavei yande Yar Jesucristo tombou oporovasasa, oporoparaísuerecosa nde reco tupri água ndeu.

Pablo oyocuai Timoteo Cristo recocuer mombehu água

³ Che yeroqui pāhuve, chemahenduha nde rese pītu, ari yacatu rupi. “Aviye ndeu” ahe Tūpa upe nde recocuer rese. Che aporavíqui tupri ité Tūpa rese che pihañemoñeta tuprisa pipe yepi inungar che ramoi eta oyapo yuvireco aracahe. ⁴Ndacheresarai eté acoi nde yaseho agüer sui. Iyavei oroeopia pota tēi che yembovharete água. ⁵Supi eté chemahenduhaño ité nde Tūpa reroyasa supi eté vahe erereco vahe rese. Iyavei nde yari Loida, nde si Eunice, ahe niha yipindar ēgue ehi yuvireco. Evocoiyase ayeroyaño ité nde rese, nde avei ēgue erese.

⁶Sese che oromonguerēhi embouvicha catu co Tūpa ombou vahe ndeu acoi amondose che po nde harive; ahe ereco catu ndeyeupe. ⁷Esepia, Tūpa nomboui siquyesa yandeu. Ahe rumo ombou yande reco movíracuasa, poroaisusa, iyavei yande mbopihañemoñeta tupri água. ⁸Evocoiyase eresiquiye eme catu yande Yar recocuer mombehu. Nderechī chiaveira che roquendasua tēi. Esepia, yande Yar recocuer mombehusa sui tēi niha che roquenda yuvireco. Iyacatu rumo, nde avei ereñemosaña co mbahe-mbahe tēi Tūpa pīratasa pipe. Ahe oura ndeu ñehesa pīsirosa resendar mombehusa sui. ⁹Tūpa niha yande pīsiro iyavei yande renoi yande reco tupri água sese, ndahei yande rembiapo pipe. Ahe rumo güemimbotar rupi yande raisu Cristo Jesús rese yande recose. Ahe Tūpa ité yande raisu yipisuiive ivi apo viteéhiseve. ¹⁰Cūritei rumo ahe omboyecua oporoaisusa yande Pīsirosar Jesucristo ouse, acoi ou vahe co ivi pipe manosa pīratasa recopi água. Iyavei ñehesa pīsirosa pipe avei oicua uca tecovesa ndopai vahe.

¹¹Tūpa niha che cuai co ñehesa mombehu água. Che cuai avei apóstol che reco água iyavei che porombohe água. ¹²Sese

niha che opacatu aiporara co mbahe-mbahe tēi vichico. Nachi eté rumo yande Yar rese che yeroysa pipe. Esepi, aicua ahe vireco pīratasa acoi ñehesa ombou vahe cheu imocañiēhi ãgua acoi Jesús yevi ãgua rupi eté.

¹³ Erecoveño ité porombohesa aviye vahe che suindar, iyavei eicoño ité Tūpa rese nde yeroysa pipe iyavei poroaisusa yareco vahe pipe Cristo rese yaicose. ¹⁴ Esāro avei co ñehesa aviye vahe Tūpa ombou vahe ndeu Espíritu Santo reco pīratasa pipe yareco vahe yandeyese.

¹⁵ Ereicua niha co ava opacatu Asia pipendar oyepepiño che sui yuvireco. Ipāhuve yuvirecoi mbia ñuvirío, ahe serer: Figelo, Hermógenes. ¹⁶ Yande Yar tomondo paraisuerecosa Onesíforo mu upe. Esepi, Onesíforo setá yupagüer che mboviha. Iyavei nochí eté ava rovaque che roquendasa sui. ¹⁷ Ouse rumo Roma ve, ndopituhui eté che reca. ¹⁸ Yande Yar tomondo oporoparaisuerecosa chupe ahe ari pipe curi. Iyavei nde ereicua tuprī ité ahe mbia yande pītivii vahe Efeso ve.

2

Jesucristo sundao oyemoviracua vahe

¹ Iyavei nde no, che rahír, eyemoviracua mbahecuada Jesucristo ombou vahe pipe ndeu. ² Acoi che porombohesa eresendu vahe ava rehii rovaque amondo vahe ndeu, embohe tuprī mbia oyeroysa vahe, oicatu vahe avei ambuae mbohe ãgua.

³ Nde eyemoviracuaño teco asi upe Jesucristo uve nara inungar sundao oyemoviracua vahe ité. ⁴ Ñepei yepe sundao ndosirii eté ocuaita sui. Esepi, ahe oyemoingatu voi eté ocuai ãgua güerecuar upe. ⁵ Iyavei iguayi rai vahe, ndoipisi chira porerecosa oguayi tuprīēhi pipe. ⁶ Iyavei yande inungar que ava oñotí vahe mbahe, ahe rane omonuha güemiti yaviyese oyeupe yepi. ⁷ Eyapisaca tuprī co che ñehe rese. Yande Yar niha osenducua uca tuprīra opacatu co mbahe ndeu.

⁸ Iyavei no ndemahenduha Jesucristo rese. Ahe niha ocuerayevi vahe. Iyavei aracahendar mborerecuar David suindar secoi. Co niha ñehesa ñepisirosa resendar amombehu vahe vichico. ⁹ Co ñehesa mombehusa sui tēi che mombaraisu yuvireco. Che roquendasave aviye oporapichi vahe che rereco yuvireco. Tūpa Ñehengagüer mombita rumo ndoicatui eté yuvireco. ¹⁰ Sese che añemosayo opacatu mbahe-mbahe tēi upe opacatu Tūpa rembiporavo recocuer aviye ãgua rese ‘tovireco catu pīsirosa porañete, apirēhi vahe Jesucristo rese yuvireco’ che yapave.

11 Co niha supi tupri vahe:

Yamanose Cristo rese, ahese yaicove aveira sese.

12 Yañemosase mbahe tēi upe, ahese yande yaicora mborere-cuar imborerecuasave ipiri.

“Ndaicuai Jesucristo”yahese, ahese ahe avei,

“Ndopocuai vahe” ehiñora yandeu.

13 Yepe co coti tēi yarovara yande recocuer seroyaëhisave, ahe rumo ndovirovai chietera güeco ïvisa.

Esepia, ndoicatui, “Ndahei che ahe aico” ehi vaherā.

Ava osē tupri vahe güecoähasa Tūpa upe nara

14 Emomahenduha yuvireco co ñehesa rese, iyavei eyocuai Tūpa rovaque: topoi ñehepoepi-episa sui yuvireco, co ñehepoepi-episa ëgue ehi tēi vahe. Esepia, omomara ambuae ava osenduse iñehe rai yuvireco. **15** Eyapo tupri mbahe opacatu nde catugüer rupi nde recocuer mboyecua água Tūpa rovai inungar oporavíqui tupri vahe, nochi vahe. Ëgue ere, eporombohe tupri ñehesa supi eté vahe rese. **16** Eyepepi ñehe tēisa, ëgue ehi tēi vahe sui. Esepia, co nungar ñehesa tēi ombouvicha catu mbahe naporai vahe. **17** Iyavei iporombohesa rai oyembouvicha inungar caracha vai ndocuera catui vahe, oyembouvicha-vichaño yepi. Ëgue ehi Himeneo, Fileto **18** oyavi porombohesa supi eté vahe sui yuvireco. “Opa cuerayevisa. Ndipo iri chira” ehi tēi yuvireco. Ipípe Jesús reroyasar oipihañemoñeta rerova yuvireco. **19** Tūpa rumo omondo mbahe moviracua tupri água, sese icuachiasa aipo ehi vahe: “Yande Yar oicua ité oyeupendar ava” ehi, iyavei, “Opacatu yande Yar rer vireco vahe, toyepipi mbahe naporai vahe sui yuvireco yepi” ehi.

20 Oi guasu pipe, ndahei guarePOCHI, oro apopri güeraño oime, oime avei ïvírape, ñaihu apopri avei no. Ñepei iporupirā ari imboeteisa pipe nara, ambuae rumo ari rupi iporupirā. **21** Acoi ava oñemoatiro vahe co tecocuerai sui Tūpa upe nara, ahe ipehasa inungar vaso oro apopri poromboeteisa pipe iporupirā; ahe ava oyemoingatu voi eté oico mbahe icatupri vahe apo água Tūpa upe.

22 Eyepepi mbia chihivahé pihañemoñeta rai tēisa sui. Emohivi tupriño ité nde recocuer sereco. Eyeroyaño ité Tūpa rese. Esaisu catu avei ava, eico avei nde reco tupri pipe, inungar Jesucristo reroyasar oyapo oipihañemoñeta tuprisa pipe yuvireco. **23** Eremboyeroyai rene ñehesa porandu-randu tēisa, ëgue ehi tēi vahe. Ereicua niha ichui tēi oime yeamotaréhisa yepi. **24** Iyavei yande Yar rese oporavíqui vahe, ndiyai oyeeccopi oñehe pipe yuvireco. Iyacatu rumo, aviyera secocuer opacatu upe, oporombohe

tuprira, oñemosañora ombahe mboasiēhisa pipe oico. ²⁵ Iyavei omboaracuara güeco asiēhisa pipe acoi ava ndiporeroysi vahe. Esepio, aviyeteramo Tūpa osecuñarora ipihañemoñeta raisa oyeupe yevi iri äqua: ipipe sui porombohesa supi eté vahe oicuara yuvireco. ²⁶ Ipype sui avei toyemopoase, toyuvinose Caruguar povri sui semimbotar apo iriēhi äqua.

3

Mara ehira ava arí ipa vahe pipe curi

¹ Iyavei tereicua arí ipa vahe yepotasa, ahese oimera tecocuer yavai catu vahe. ² Ahese ava ahe ae tēi oyeaisura yuvireco, guarepochi tēi oipota raira, oyemboivate aira, oyemboetei ai tēi aveira. Oñehe raira Tūpa rese yamotarēhisave. Nomboyeroyai chira oyesupa yuvireco. Setá aveira, "Aviye ndeu" ndehi vahe ava upe. Iyavei nomboetei chira Tūpa rese pihañemoñetasa yuvireco. ³ Ndosasuisi chira oyesuindar yuvireco. Niñeroi chiaveira oyeupe yuvireco. Iyavei imahechiroi aira. Noñemosai chira mbahe tēi apo äqua yuvireco. Güeco asi pipe avei yuvirecoira. Iyavei opacatu mbahe aviye vahe oyamotarēhira yuvireco. ⁴ Iyavei omondora ava yamotarēhimbar upe, ndiporomboetei chira güemimbotar apo yuvireco. Iyavei oyemboivate aira yuvireco, osecara güemimbotar tēi oyemboviha äqua yuvireco. Ipype rumo Tūpa ndosasuisi chira yuvireco. ⁵ Ahe inungar-ra Tūpa rese ité yuvirecoi vahe viña. Tūpa pīratasa rumo nomboyecuai chietera güembiaipo pipe yuvireco oyese.

Sese nde, eyepepiño evoco nungar ava sui. ⁶ Esepio, evoco nungar ava pāhuve oime yuviroiqueño tēi vahe oírupi cuña ndoicatui vahe angaipa rerecosar mbopa äqua. Esepio, ahe cuña opihañemoñeta raisa pipe yuvirecoi vahe. ⁷ Yepe oyapisaca tupri tēira ñehesa rese yuvireco viña, ndosupitii eté rumo co porombohesa supi eté vahe renducua äqua yuvireco. ⁸ Inungar co ava ipaye vahe Janes, Jambres serer vahe oyemboyere Moisés amotarēhi yuvireco, ëgue ehi avei evoco ava porombohesa supi eté vahe amotarēhisar yuvireco. Ahe oyemomara vahe opihañemoñeta rai pipe yuvireco. Ndovirayai eté Jesús porombohesa yuvireco. ⁹ Ndoporombopa iri chira rumo yuvireco. Esepio, opacatu ava oicuara yuvireco imbahecuaëhi rese, inungar co ñuvirío mbia Moisés amotarēhimbar yuvirecoi aracahe.

Timoteo cuaitarā ipa vahe

¹⁰ Nde rumo che reco rupi tupri ité ereico. Esepio, ereroya tupriño ité che porombohesa, che pihañemoñetasa, che Cristo rese yeroyasa, che reco mbegüesa, che poroaisusa iyavei che ñemosasa ¹¹ opacatu mbahe tēi porarasa rese. Nde

niha ereicua opacatu mbahe tēi oime vahe cheu co tecua guasu, Antioquía ve, Iconio ve, Listra ve avei no, iyavei che paraíusa mara-mara tēi che rerecose yuvireco. Yande Yar rumo che písiro opacatu evocoí mbahe-mbahe tēi sui. ¹² Supi eté opacatu acoi Jesucristo rese güecocuer vireco pota vahe oiporarara mbahe-mbahe tēi yuvireco. ¹³ Ava secocuer naporai vahe rumo, iporombopa serai vahe avei ombou-vicha catura güecocuerai; oporombopa-mbopa tēira yuvireco. Iporombopasa pipe rumo ambuae omboyevira chupe.

¹⁴ Nde rumo ereyemovíracuaño itera acoi ereyembohe vahe rese. Ahe ereroya tupriño ité. Esepiá niha, nde mbo-hesar ereicua. ¹⁵ Iyavei eyemomahenduha co rese: nde chihivahé suive ité niha ereicua Tūpa ñehe icuachiapri eico. Ahe niha nde mombahecua vahe nde písiro água Jesucristo reroyasa pipe. ¹⁶ Opacatu co ñehesa icuachiapri ou vahe Tūpa sui, aviye ai eté porombohe água, iyavei poromboyapisaca água, poromboaracua tupri água iyavei ava upe ñehe tupri água secocuer mohívi água yepi. ¹⁷ Ichui, ava Tūpa rese yuvirecoi vahe oyemoingatu voira opacatu tecocuer tupri apo água yuvireco.

4

¹ Iyavei no, co rese che orocuai pota Tūpa rovaque, Jesucristo rovaque avei acoi ou vaherā omborerecuasa reseve oicove vahe, omano vahe recocuer rese porandu água. ² Emombehu Tūpa Ñehengagüer ari rupi. Erova ité ava reco. Eporomboaracua, eporomongueréhi tupri avei opacatu nde reco asiéhisa pipe. ³ Esepiá, coiyé ava ndosendu pota iri chira porombohesa aviye vahe yuvireco. Ahese güemimbotar tēi osecara ombohe água, güemimbotar tēi avei omombehu ucara oyeupe yuvireco. ⁴ Iyavei oyepepíra co mbahe supi eté vahe sui. Viroyara rumo opacatu ava remimombehu tēi yuvireco. ⁵ Nde rumo, ererecoveñora nde aracua tuprisa. Eñemosáño mbahe naporai vahe upe. Ndehañeco catu ñehesa písirosa resendar mombehu água. Emboavíye tupri avei opacatu nde poravíquisa.

⁶ Viroví ari che retecuer mondo água manosave inungar mbahe seropovéhepri yande Yar upe. ⁷ Ayapopa che recoeté pipe che poravíquisa aviye vahe che amotaréhíimbar pâhuve. Amboavíye che cuaita. Ndayepepíi eté che yeroyasa sui. ⁸ Cûritei che râro ivave co porerecosa che poravíqui aviye vahe resendar. Yande Yar mborerecuár seco ñvi vahe niha omboura cheu ahe ari pipe. Ndahei chira cheu güeraño. Ombou aveira opacatu Cristo raisusa pipe iyevisa osâro vahe upe yuvireco.

Pablo, "Eyu rane che repia" ehi Timoteo upe

⁹ Ndepoyava catu eyu che repia. ¹⁰ Esepio, Demas che reya co mbahe ivi pipendar tēi potasave, ichui tēi oso tecua Tesalónica ve. Crescente oso tecua Galacia rupi. Iyavei Tito oso Dalmacia ve. ¹¹ Lucas güeraño oicove che piri. Eseca Marcos, tou nde rupi che pītvii ãgua mboravíqui rese. ¹² Tíquico amondo tecua Efeso ve. ¹³ Acoi ereyuse, eru avirave che yemboyohasa aseyá vahe Troas ve Carpo rētave. Iyavei cuachiar guasu, ambuae cuachiar reseve, ahe aipota catu vahe; erupa eyu.

¹⁴ Alejandro, guarepochi mombesar, oyapo mbahe tēi cheu. Yande Yar rumo oicuara sembiapogüer rese chupe. ¹⁵ Iyavei nde eicua catu ichui. Esepio, ahe yande amotaréhi mbahe yande remimombehu rese oico.

¹⁶ Yipindar añehese che yoepi ãgua mborerecuareta rovai, ndipo eté que che pītvii sar; opacatuño ité che reya yuvireco. Tūpa tiñero sese yuvireco chupe. ¹⁷ Yande Yar Jesucristo rumo che pītvii. Che momirata co ñehesa pīsirrosa resendar mombehu tupri ãgua opacatu ava ndahei vahe judío upe. Êgue ehi avei che renose mbahe tēi sui. ¹⁸ Ahe che pehara opacatu mbahe-mbahe tēi sui iyavei che pīsirrosa oyepiri ivave che so ãgua. ¡Êgue tehi timboeteisa catu yande Yar apiréhi vahe yepi!

Mahenduhasa opacatu upe

¹⁹ Emombehu che mahenduha Prisca upe, Aquila upe iyavei opacatu Onesíforo rēta pendar upe avei. ²⁰ Erasto opita Corinto ve, Trófimo rumo imbaheasi, evocoiyase aseyá Mileto ve. ²¹ Ndepoyava catu eyu irohi yu renondeve. Imahenduha yuvireco nde rese Eubulo, Pudente, Lino, Claudia iyavei opacatu yande Yar viroya vahe yuvireco.

²² Yande Yar Jesucristo toico nde rese. Iyavei Tūpa tape rovasa opacatu pe rereco. Aviye. Aipo rupive.

PABLO REMBICUACHIA TITO UPE TITO

Pablo mahenduhasa Tito upe

¹ Che, Pablo, Tūpa rembiguai aico iyavei Jesucristo apóstol semimbou aico Tūpa rese yeroyasa mundo ãgua sembiporavo eta upe iyavei Tūpa rese pihañemoñetasa supi tupri vahe cua uca tupri ãgua. ² Esephia, tecovesa apirëhi vahe rārosa pipe sui viroyara, oicua aveira yuvireco. Tūpa ndoporombopai vahe niha omombehu co tecovesa mundo ãgua ïví apo viteëhiseve oico. ³ Ichui cûritei arí oyepota yandeu iñehengagüer cua ãgua. Sese Tūpa, yande Písicos, che cuai oñehengagüer mombehu. ⁴ Tito, co che ñehe aicuachía ndeu; nde niha che rahir ité ereico Jesucristo rese yande recosa pipe. Esephia, oyoya yaroya vahe yaico. Yande Ru Tūpa, yande Písicos Jesucristo tombou oporovasasa nde reco tupri ãgua ndeu.

Tito poravíquisa caha pâhu Creta ve

⁵ Che oroeya vitu co caha pâhu Creta ve mbahe opita vite vahe moingatu tupri ãgua. Iyavei, “Eiporavo ava, Jesucristo viroya vahe râro ãgua ñepei-peí tecua rupindar” ahe acoi ndeu cuese. ⁶ Evocoí Jesucristo viroya vahe rârosar toyuvirecoi güeco tupri ãgua. Tipo eme “co oyapo mbahe” ehi-ehi têi vahe yuvireco oyeupe. Ñepeiño güembireco virecora yuvireco; tahir evocoiyase Jesucristo reroyasar pâvera. Iyavei ndoyuvirecoi chira ndoyemboaracuai vahe nungar oporeroyaëhisa pipe ambuae ava ñeheëhi ãgua sese yuvireco. ⁷ Acoí Jesucristo reroyasar rârosar yuvirecoi vahe, ahe icuaita mbahe Tūpa upendar rese. Sese taseco ïví tupri yuvireco. Iyavei toico eme oporeroyaëhisa pipe, toñemoiro eme avei, ndahei chiaveira caguar têi; ndivava serai chiaveira, tiguarepochi pota rai eme yuvireco. ⁸ Iyacatu rumo omoinguera ava oyepota vahe güêtave oyepiri. Iyavei aviyé aira yepi. Osâro tuprira güecocuer. Iyavei taseco ïví güeco catupri pipe Tūpa upe. Tosâro tupri avei opihañemoñetasa yuvireco. ⁹ Iya oyemboya catu oyembohesa supi tupri vahe rese yuvireco. Ipípe sui tomonguerëhi catu ambuae yuvireco co ñehesa maranehi pipe iyavei ambuae seroïrosar pihañemoñeta mohivi ãgua.

¹⁰ Esephia, oime setá nimbahe reroyai vahe; judío “peyembocircuncida pe ñepisiro ãgua” ehi vahe pâhuve oime catu evocoí nungar. Ahe omondo-mondo têi vahe oñehe, ombopa têi vahe avei ava yuvireco. ¹¹ Ëgue ehi vahe iyacatu

pemonguiriri. Esephia, ahe niha setá ava oñemu vahe omboyerapepi uca porombohesa supi tupri vahe sui yuvireco. Oporombohe mbahe co cotí tēi vahe rese guarePOCHI rereco água tēi yuvireco.

¹² Ñepei mbia, otúpa ñehe mombehusar, Creta iguar ae aipo ehi omu rese oñehe: “Co Creta iguar yuvirecoi vahe semirañete ai, mbahe mimba nungar tēi, icaru ai, yangaipa vai yuvireco yepi” ehi oñehe. ¹³ Supi eté aipo ehi; sese emboaracua pírata ité. Evocoiyase toviroya tupri Tūpa yuvireco. ¹⁴ Iyavei toviroya eme co judío oyesui tēi mbahe omombehu vahe iyavei ava porocuaita tēi yuvireco. Esephia, ahe oyemboyere mbahe supi vahe sui yuvireco.

¹⁵ Acoi ava ndaseco marai vahe upe opacatu mbahe nimarai. Ndiporeroyai vahe, ipihañemoñeta rai tēi vahe upe rumo, ndipoi eté mbahe nimarai vahe. Esephia, ipihañemoñeta, yaracuasa avei naporai eté. ¹⁶ Iyavei, “Che aicua Tūpa” ehi tupri tēi angahu yuvireco. Mbahe sembiapo rese rumo icuasa seroyaéhisa yuvireco. Ahe niha ava ndosephia potai vahe, ndiporeroyai vahe yuvireco, ndoicatui mbahe aviye vahe apo yuvireco yepi.

2

Porombohesa nimarai vahe

¹ Nde ñehe toyoya tupri co porombohesa nimarai vahe rese yepi. ² Evocoiyase mbia otíaro catu vahe Tūpa reroyasar toñearo tupri, imboyeroyapri toyuvirecoi, tosáro tupri güecocuer, tovireco tupri avei Tūpa reroyasa, oporoaisusa. Iyavei güeco mbegüesa pipe toñemosa mbahe-mbahe tēi upe. ³ Ëgüe tehi avei cuña otíaro vahe Tūpa reroyasar yuvireco: güeco tupri tovireco oporomboeteisa pipe yuvireco. Iyavei timahechiroi eme, ndosavaipoi chiaveira. Ahe rumo omboyerecuara güecocuer aviye vahe, ⁴ ombohera cuñatai imer raisu água, imembrí raisu água avei. ⁵ Tombohe avei seco tupri água, iñearo tupri água angaipa sui iyavei sēta pipendar rese hañeco tupri água yuvireco. Tomboaracua avei seco aviye água, imer mboyeroya água avei. Evocoiyase noñehe-ñehe tēi chira ava Tūpa Ñehengagüer rese yuvireco.

⁶ Ëgüe ere avei emonguerëhi mbia chihivahe secocuer rese iñearo tupri água. ⁷ Iyavei emboyecua nde recocuer aviye vahe opacatu mbahe rese yuvireco chupe; nde imbohe tuprisa pipe emboyecua nde reco maranehisa, nde poromboeteisa avei. ⁸ Iyavei ereñehera nde reco tupri pipe. Ipipe ambuae noñehe rai chira yuvireco nde rese. Evocoiyase yande amotarëhimbar yuvinochira ndoicatuise, “Mbahe” ohe água yuvireco yandeu.

⁹ Emboaracua avei mbiguai yuvirecoi vahe: toviroya opacatu mbahe rese güerecuar, tomboyeroya imboeteisave,toiñehopoepi eme avei yuvireco. ¹⁰ Iyavei toñomi eme mbahe. Iyacatu rumo seroyapri tupri yuvirecoira. Evocoiyase opacatu osepiase seco tuprisa, omboeteira yande Pisirosar Tūpa recocuer resendar yembohesa yuvireco.

¹¹ Tūpa niha omboyecua oporoaisusa yandeu. Ahe güeru pisirosa opacatu ava upe. ¹² Co poroaisusa Tūpa suindar yande mbohe mbahe-mbahe tēi iyavei yande remimbotar tēi reya ãgua. Iyavei yande mbohe co iví pipe yande ñearo tupri ãgua, yande reco iví ãgua iyavei Tūpa mboetei ãgua. ¹³ Iyavei yasāro yande viharetesa pipe Tūpa omboaviye vaherā güemimombehu, ahe Jesucristo yande Tūpa seco ivaté vahe, yande Pisirosar yevi irisa oporañetesa pipe. ¹⁴ Ahe oyemondo oyeyuca uca yande rese yande pisirosa ãgua opacatu mbahe-mbahe tēi sui yande reco moatiro tupri ãgua. Evocoiyase yande yaico chupe nara güeraño ité yande querëhisave opacatu mbahe aviye vahe apo ãgua.

¹⁵ Evocoí rese erembohera, eremonguerëhira, eremboaracua aveira opacatu nde porocuaita pipe. Sese tipo eme que nde reroírosar.

3

Jesús reroyasar cuaita

¹ Co rese emomahenduha: toyapo ava mborerecuar guasu porocuaita yuvireco iyavei opacatu ambuae mborerecua-recuarmi porocuaita avei. Iyavei toyemoingatu tupri opacatu mbahe aviye vahe apo ãgua yuvireco. ² Toñeho-ñeho tēi eme ambuae ava rese yuvireco. Iyavei tiñemoiro serai eme, toporoaisu, tomboyecua avei güeco mbegüesa opacatu ava upe yuvireco.

³ Esepio, yipindar yande avei ndayande mbahecuaí yaico iyavei ndayaroyai Tūpa. Ocañi tēi vahe yaico, iyavei yande mbiguai tēi yaico opacatu mbahe yande remimbotar apo pipe; iyavei yaseca-seca mbahe tēi vahe yande yembovíha ãgua. Iyavei yaicoño mbahe tēi pipe, yaipotaño tēi ambuae ava mbahe, yamotarëhimbri yaico iyavei yandeyeupe ae-ae yayeamotarëhi. ⁴ Ipare rumo Tūpa, yande Pisirosar, omboyecua güeco tuprisa, oporoaisusa opacatu ava upe. ⁵ Yande pisirosa, ndahei rumo yande rembiapo aviyesa sui, ahe rumo vireco oporoparaísuecasa yandeu nara. Ichui omoatiro yande recocuer yande reco mopiasu. Iyavei Espíritu Santo pipe yande recocuer recuñaro tecove piasu rereco ãgua. ⁶ Iyavei yande Pisirosar Jesucristo rembiapo sui Tūpa ombou catu oEspíritu Santo yandeu, ⁷ ipipe yande reco ai sui yande

renose yande reco ūvi tupri ãgua oporoaisusa pipe ‘toipisi co tecovesa apirëhi güemiaro yuvireco’ oya.

⁸ Aipo ñehesa supi eté vahe. Che aipota sese ereporombohera. Ipipe Tüpa reroyasar toyapo mbahe aviye vahe yuvireco. Evocoí ñehesa aviye ité opacatu oiporu vaherä yuvireco. ⁹ Ereyepepira rumo opacatu co nungar mbahe sui: yipindar ñehesa yepoepi tëisa sui, ipare aracahendar ava recocuer rese ñehesa sui. Ereyepepi aveira iporomoñemoiro serai vahe sui, Moisés porocuaita resendar sui tëi ñehepoepi-episa sui avei. Esepia, evocoí nungar mbahe ëgue ehi tëi vahe.

¹⁰ Acoi ava omoimese yemboyahosa Tüpa reroyasar pähuve, eñehe chupe. Nande reroyaíse, eñehe iri chupe. Nande reroya catu itese, eremosera peyesui. ¹¹ Tereicua evocoí nungar ava oyavi vahe güecocuer yepi, ahe ae oyemocañi vahe oangaipa pipe oico.

Tito upendar ñehesa

¹² Acoi amondose Artemas, anise Tíquico ndeu, eyu pihaivi che repia tecua Nicópolis ve. Esepia, aheve apita pota sôhisa vahe pituhu râro. ¹³ Eipitivii opacatu nde catugüer rupi ava recocuer moingatusar Zenas, Apolos avei. Ahe chupe emondo mbahe semimbotar. Evocoiyase toyuviraso tupri oguatasa rupi; tipane eme que mbahe chupe yuvireco. ¹⁴ Iyavei ambuae Jesús reroyasar eipe pendar toyembohe avei yuvireco mbahe tupri apo ãgua iyavei ava mbahe chupe ipane vahe pitivii ãgua. Evocoiyase secocuer aviye itera yuvirecoi.

Mahenduhasa iyavei porovasasa ipa vahe

¹⁵ Opacatu yuvirecoi vahe cohaye che piri omundo omahenduhasa yuvireco ndeu. Iyavei emombehu che mahenduhasa yande mboripar iporeroya vahe upe. Tüpa tape rovasa eipeve opacatu. Aipo rupive.

PABLO REMBICUACHIA FILEMÓN UPE FILEMON

Pablo mahenduhasa Filemón upe

¹ Che, Pablo, che roquendasas Jesucristo recocuer sui tēi. Aicuachía co che ñehe yande rívrí Timoteo reseve ndeu, Filemón. Nde niha ore rembiaisu iyavei ore ndugüer ité Tūpa upe mboravíqui apo água ereico. ² Iyavei amondo co cuachiar yande reindri Apia upe, Arquipo upe avei. Ahe avei yande ndugüer mboravíqui apo água Tūpa upe nara yuvirecoi, iyavei opacatu Jesús reroyasar nde rētave Oñemonuha vahe upe nara. ³ Yande Ru Tūpa, yande Yar Jesucristo tombou oporovasasa, güeco tuprisa avei pēu.

Filemón poroaisusa iyavei Cristo rese iyeroyasa

⁴ Che niha, “Aviye ndeu” ahe yande Ru Tūpa upe che yeruresa pipe nde rese yepi. ⁵ Esepio, ayandu aipo nde eresaisu iyavei ereroya yande Yar Jesús. Eresaisu avei opacatu ambuae seroyasar. ⁶ Aporandu Tūpa upe nde rese nde ereyerojase yande Yar rese inungar ore ‘toicua tupri opacatu mbahe aviye vahe orovireco vahe nde Rahir Jesucristo reroyasa sui’ viya. ⁷ Cherorivete, ayemongueréhi catu opacatu nde poroaisusa rese. Che rívrí, nde niha eremongueréhi catu opacatu yande Yar reroyasar yuvireco.

Pablo oporandu mbahe aviye vahe rese Onésimo upe nara

⁸ Sese yepe che aico Cristo apóstol nde cuai água viña. ⁹⁻¹⁰ Che rumo aporandu ndeu nde poroaisusa rese mbahe aviye vahe apo água co nde rembiguaíger Onésimo upe nara. Che niha Pablo, acuacuami vichico. Cûritei rumo aico soquendapri Jesucristo recocuer sui. Co Onésimo secoi che rahir nungar yande Yar reroyasa pipe coháve che roquendasave.

¹¹ Aracaco co nde rembiguai secoise nde piri, ēgüe ehi tēi vahe secocuer ndeu viña. Cûritei rumo ēgüe ndehi iri chira oico ndeu, iyavei cheu no. ¹² Amboyevi co imondo ndeu eipeve. Eipisi inungar-ra che itera viña. ¹³ Che aipota opita vaherā nde nungar tupri che pítivi água viña, co soquendapri vite che recose Jesucristo ñehengagüer sui. ¹⁴ Che rumo ndaipotai mbahe apo nde pihañemoñetasa cuaéhi viteseve. Nde rumo ereyapora co mbahe aviye vahe nde remimbotar rupi, ndahei chira che nde cuaisa pipe. ¹⁵ Aviyeteramo Onésimo oyepepi pucu raimi nde sui oyevi iri vaherā nde piri nara. ¹⁶ Ndahe iri chira mbiguai tēi. Ahe rumo aviye catu itera mbiguai güeco agüer sui. Esepio, yande rívrí niha yande

rembiaisu secoi cūritei. Che asaisu etepri iyavei nde eresaisu catu irira che sui. Ndererecoi chira ava nungar tēi; erereco tuprira saisusa pipe yande rivri nungar tupri ité yande Yar upé nara.

¹⁷ Inungar nde rivri che rereco eve. Ëgüe ere tupri aveira combia pisi. ¹⁸ Acoi oyapose mbahe ndeu, anise virocuase que mbahe nde sui, cheu emombehu. Che evocoiyase amboepira ndeu. ¹⁹ Che Pablo, aicuachía che po pipe ité seroya tupri água, ahe co amboepira ndeu; che nde mbohesa pipe sui ereroya yande Yar. Ipipe inungar ireve vahe ëgüe ere cheu. Che rumo, “Ndereve cheu” ndahei eté ndeu. ²⁰ Supi eté, che rivri, eyapomi mbahe icatupri vahe cheu che remimbotar yande Yar Cristo reroyasa pipe. Ipipe che mboviha catumi eve.

²¹ Che aicuachía ndeu. Esepiá, aicua nde ereyapo tuprira aipo che porandusa, iyavei ereyapo catu itera co sui. ²² Iyavei amoha Túpa che renose vaherã che roquendasa sui pe yeruresa pipe che so água eipeve pe repia. Sese emoingatumí avei che pituhu água.

Mahenduhasa, porovasasa ipa vahe

²³ Che ndugüer, Epafras, omondo omahenduhasa ndeu. Ahe avei soquendapri coháve yande Yar Jesucristo recocuer rese. ²⁴ Iyavei Marcos, Aristarco, Demas, Lucas che ndugüer oporavíqui vahe Túpa uve, ahe avei omondo omahenduhasa yuvireco ndeu.

²⁵ Yande Yar Jesucristo tape rovasa opacatu eipeve. Aipo rupive.

ICUACHIAPRI HEBREO YUVIRECOI VAHE UPE HEBREOS

Guahir Jesucristo pipe Tūpa oyemboye cuayandeu

¹ Aracahe suive setá yupagüer Tūpa omombehu uca yande ramoi eta upe oñehe mombehusar upe. Iyavei ambuae mbahe rupi oseca imombehu tupri água yuvireco chupe. ² Cūritei yandeu omoñehe uca Guahir. Chupe avei oyapo uca opacatu mbahe. Ahe mbahe sembiapo chupe nara ité. ³ Ahe niha Vu Tūpa recocuer porañetesa secoi. Êgüe ehi eté, ahe Vu recocuer tupri ité. Ahe opacatu mbahe omoviracua oñehe píratasa pipe. Yande angaipagüer sui yande moatiro pare oso, oguapi Vu acato coti oñi ivave cute.

Tūpa Rahir seco ivate catu Vu rembiguai ivá pendar sui

⁴ Tūpa Rahir secoi ivate catu vahe Vu rembiguai ivá pendar yuvirecoi vahe sui. Ahe vireco omborerecuasa ivate catu vahe ichui. ⁵ Esepia, Tūpa aipo ndehi eté güembiguai upe: “Nde che Rahir ereico; co pipe amondo nde recove água” ndehi eté.

Iyavei:

“Che Tu aicora, ahe evocoiyase che rahir secoira” ndehi avei chupe.

⁶ Ichui rumo ombouse Guahir ñepei vahe co ivi pipe aipo ehi: “Tomboetei opacatu che rembiguai yuvireco”

ehi. ⁷ Evocoiyase güembiguai rese oñehe Tūpa aipo ehi icuachiaprí aracahendar pipe:

“Ayapo che rembiguai ivitu nungar, tata nungar avei cheu oporavíqui vaherā” ehi.

⁸ Tahir rese ñhesa rumo aipo ehi icuachiaprí aracahendar pipe:

“Che Yar Tūpa, nde mborerecuasa rumo apirēhi vaherā ité.

Ereporocuai nde reco ivi tuprisa pipe yepi.

⁹ Mbahe ihívi vahe raisusar ereico.

Iyavei mbahe naporai vahe raisuēhisar.

Sese nde Yar Tūpa ité, nde poravo, omondo avei torivetesu ndeu ivate catu vahe opacatu nde mboetasa sui” ehi.

¹⁰ Iyavei aipo ehi iri:

“Nde, ore Yar, yipisuive eremoviracua vahe ivi.

Nde ité avei ereyapo ivá.

¹¹ Opacatu co nde rembiapo opa vaherā tēi, inungar turucuar cuacua oyearo vahe opa.

Nde rumo apirēhi vaherā ité ereico.

¹² Ipare ereyapara inungar turucuar yapapri iyavei eresecuñarora inungar oturucuar osecuñaro vahe.

¡Nde rumo ndereñecuñaroi chietera!

Iyavei nde recocuer ndopai vaherā ité” ehi.

¹³ Ndahei que ñepei iva pendar güembiguai upe Tūpa aipo ehi: “Eguapi che acato coti, ahese che amondora nde amotaréhimbar nde povrīve” ehi.

¹⁴ Esepiá, opacatu Tūpa rembiguai espíritu yuvirecoi chupe oporavíqui água, icuaipri avei ava ipísiropirā pítivii água.

2

Yandemahemoha tuprira yande písirosa rese

¹ Sese iyacatu co ñehesa yasendu vahe rese yayapisaca tupri catu co tecocuer piásu sui yande yepepiéhi água. ² Esepiá, co Tūpa rembiguai remimombehugüer seroyapri ité secoi, iyavei oyemboangaipa vahe, ndoviroyai vahe avei imombaraísupri ité sembiapo rupi yuvirecoi aracahe. ³ ¿Mara yahera píha evocoiyase yande yañemi Tūpa ñemoírosa sui viña acoi ndayandemahemoha tupriise co yande písirosa avíye vahe rese? Esepiá, yande Yar ahe rane ité omombehu co ñehesa ñepisirosa resendar. Ipare sendusar, “Supi eté co ñehesa” ehi yuvireco. Ichui ahe avei omombehu yuvireco yandeu. ⁴ Iyavei Tūpa oyapo setá mbahe yavai rai vahe poromondiisa ndayasepiai vahe. Iyavei oEspíritu Santo pipe, omboyoavirati mbahecuada imbou yandeu güemimbotar rupi ‘toicua yuvireco co ñehesa supi tupri vahe’ oyapave.

Jesucristo ava nungar tupri secoi

⁵ Ndahei güembiguai povrīve omundo Tūpa ivi oime vaherā, acoi oromombehu vahe pēu. ⁶ Oime rumo icuachiapri aracahendar pipe omombehu tupri vahe:

“Che Yar, ¿uma vo evocoiyase ava?

¿Mahera ndemahenduha ava tēi rese, iyavei eresāro no?

⁷ Ndaseta aríimi erereco ivi coti catu nde rembiguai sui.

Ipare voi rumo eremondo nde porañetesa imboeteisave chupe.

⁸ Iyavei opacatu erereco uca mbahe nde rembiapo ipovrīve” ehi imombehu.

Êgüe ehise Tūpa, ndoseyai eté que ñepei yepe mbahe ipo pendaréhi. Cûritei rumo ndaopacatu tupri vitéi mbahe ipovrīve.

⁹ Yaicua niha Jesú, ahe Tūpa güembiguai sui ndaseta araviter ivi coti catu vireco. Oporoaisusa pipe oipota imano água opacatu ava repirā. Cûritei rumo iyemombaraísu pare, omundo oporañetesa imboeteisave chupe.

¹⁰ Iyavei opacatu mbahe oime Tūpa upe, ichuindar avei ‘toyuviroique opacatu che rahir che reco porañetesave’ oya-pave. Sese omombaraisu uca Guahir Jesucristo ‘tomboaviye tupri rane che remimbotar Poropisirosar güeco ãgua’ oya. ¹¹ Esephia, opacatu vireco ñepei Vu yuvireco co seco catupri vahe, seco mbocatuprisar avei. Sese Tahir nochi eté, “Che rivireta peico” ohe ãgua viroyasar upe. ¹² Ahe aipo ehi icuachi-apri aracahendar pipe:

“Añehera nde rese che rivireta upe.

Asapucai aveira sapucaisa ndeu opacatu ava ndeu oñemonuha vahe pâhuve” ehi.

¹³ Iyavei aipo ehi:

“Che ayeroya itera sese” ehi.

Ichui aipo ehi iri:

“Co oroico Tūpa rahir cheu ombou vahe rese” ehi icuachiapri pipe aracahe.

¹⁴ Inungar ava vireco vahe guahir, oyoya soho, suví; ëgue ehi avei Jesús vireco voho, vuví yande nungar; omano pipe sui omocañi vaherã iporoyuca ai vahe píratasa; ahe Caruguar.

¹⁵ Opacatu ava manosa sui osiquiyesa pipe mbiguai tẽi nungar yuvirecoi vahe güecove viteseve, evoco nungar sui senose ãgua, ëgue ehi Jesús. ¹⁶ Esephia, ahe ndoui Tūpa rembiguai pítivii ãgua, ahe rumo ou Abraham suindareta pítivii ãgua.

¹⁷ Sese niha tivireta nungar tupri ité oyapo Tūpa, “Toime che rovaque pahi rerecuar ivate catu vahe seco tupri vahe; taseco mbegüe avei, tomondo güetecuer ava angaipa repirã ñeroisa reime ãgua” ehi. ¹⁸ Esephia, ahe avei oiporara Caruguar poroätoisa. Sese cûritei ahe oicatu ité ava Caruguar remiatoi pítivii ãgua.

3

Jesús ivate catu vahe Moisés sui

¹ Evocoiyase, che rivireta, iporavopri, pe Tūpa remienoi peico vahe chupe nara. Peyapisaca tupri Jesucristo recocuer rese. Ahe secoi yandeu apóstol iyavei pahi ivate catu vahe yande yeroyasa. ² Ahe ité niha omboaviye tupri Vu remimbotar, osenoise imbou co tecocuer apo ãgua inungar Moisés omboaviye tupri ocuaita Tūpa mbahe râro aracahe. ³ Jesús rumo imboeteipri catu Moisés sui. Inungar acoi oi aposar imboeteipri catu oi sui secoi. ⁴ Esephia, ñepei-peí oi vireco oaposar viña. Tūpa rumo opacatu mbahe aposar secoi. ⁵ Supi eté Moisés Tūpa rembiguai güeco pipe omboaviye opacatu oporaviquisa itúparo rese. Esephia, omombehu Tūpa omboye-cua pota vahe ava upe yepi. ⁶ Cristo rumo tahir güeco pipe omboaviye ocuaita Vu tûparo rese. Ahe tûparo yande yaico

yayeroyaño itese Cristo rese iyavei yasāroño itese yande yembovihasa pipe co mbahe avíye vahe oime vaherā yandeu curi.

Mbituhusa Tūpa upendar yuvirecoi vahe upe

⁷ Sese inungar aipo ehi Espíritu Santo icuachiapri aracahendar pipe:

“Co pipeve voi, pesenduse Tūpa ñehe,

⁸ peyepihamoatai rene catu chupe, ndapeicoi chira ava ndiava reroyai vahe nungar acoi ivi iporupirēhisa rupi Tūpa recoāhasar yuvirecoi vahe aracahe.

⁹ Aheve avei acoi che recoāha tēi pe ramoi mbahe güembiapo pipe, yepe cuarenta araviter rupi osepia tēi mbahe che rembiapo yuvireco viña.

¹⁰ Sese añemoiro ahe ava upe, aipo ahe:

‘Ipihañemoñeta rai co coti tēi vahe rese yepi iyavei ndoicua potai eté che recocuer yuvireco’ ahe chupe.

¹¹ Sese che añemoiro ahe ava upe, ‘Ñepei reseve ndapepituhui chietera che pituhusa pipe’ ahe yuvireco chupe” ehi aracahe.

¹² Che rivireta, peñearo catu; tipo eme que ñepei ipihañemoñeta naporai vahe Tūpa reroyaēhisa pipe oyepipi vaherā ichui. ¹³ Iya rumo peyemonguerēhi catu ñepeipei ari yacatu rupi cūritei pe recove pipe angaipa upe pe yembopa uca iriēhi ãgua, pe mbahe reroya iriēhi ãgua rese avei. ¹⁴ Esepia, yayemoviracua tuprise Cristo rese yande yeroyasa yipisuive yareco vahe pipe yande mano ãgua rupi eté, ahese yaico itera sese.

¹⁵ Supi niha acoi aipo ehi ñehesa:

“Co pipe voi pesenduse Tūpa ñehe, peyepihamoatai rene catu chupe; ndapeicoi chira ava ndiava reroyai vahe nungar” ehi vahe.

¹⁶ ¿Ava pīha acoi ava iñehe mara vahe yuvireco Tūpa ñehe rendu pare chupe? Moisés remienose Egipto ivi sui ēgue ehi yuvireco. ¹⁷ ¿Ava upe pīha acoi Tūpa oñemoiro cuarenta araviter rupi? Acoi oyemboangaipa vahe omanopa vahe yuvireco ivi iporupirēhisa rupi. ¹⁸ ¿Uma upe pīha acoi ñepei reseve, “Ndapeiquei chietera che pituhusa pipe pe pituhu ãgua” ehi Tūpa? Acoi víroyaēhisar upe aipo ehi. ¹⁹ Sese yaicua seroyaēhi pipe ndoicatui yuviroique ipipe.

4

¹ Oime vite Tūpa remimombehu yande yaique vaherā ipiri yande pituhu ãgua. Sese iya ité yañearo tupri. Aní chira que ñepei pe pāhu pendar ndoiquei chira. ² Esepia, yandeu avei imombehusa ñehesa poropisirosa resendar inungar yande ramoi upe ivi iporupirēhi rupi yuvireco aracahe. Co ñehesa

rumo ndoipítivii eté ahe ava yuvireco. Esepio, ahe osendu yuvireco seroyaēhisave tēi. ³ Yande rumo yaroya vahe, yaiquera yande pituhu āgua, ahe chupe Tūpa aipo ehi:

“Sese añemoiro ahe ava upe; ñepei reseve,

‘Ndoyuviroiquei chietera che pituhusa pipe opituhu āgua yuvireco’ ahe” ehi.

Tūpa rumo yipive ité opa omboaviye oporavíquisa iva, ivi.

⁴ Esepio, co imbosietesa ari resendar ñehesa oime icuachiapri aracahendar pipe:

“Tūpa opituhu opacatu oporavíquisa sui imbosietesa ari pipe” ehi.

⁵ Iyavei aipo ehi iri icuachiapri pipe:

“Ndoyuviroiquei chietera che pituhusa pipe opituhu āgua yuvireco” ehi.

⁶ Ipane vite rumo amove ava yuviroique vaherā ahe pituhusave. Acoi yipindar osendu tēi vahe rumo ñehesa poropisirosa resendar, ndoyuviroiquei eté seroyaēhisa pipe yuvireco. ⁷ Sese Tūpa omombehu tupri iri ambuae ari, chupe ité, “Co pipe” ehi. Ahe acoi coiyé mborerecuar guasu David upe omombehu ucase aracahe yandeu icuachiapri pipe, aipo ehi vahe:

“Co pipe voi, pesenduse Tūpa ñehe,
peyepihamoatai rene catu chupe” ehi vahe.

⁸ Ehi revo Josué omondose co pituhusa israelita upe aracahue viña, Tūpa evocoiyase noñehe iri chira co ambuae ari rese viña. ⁹ Evocoiyase oimeño itera mbituhusa iporavopri ava Tūpa upendar upe nara: ¹⁰ Acoi oique vahe evocoiyase pituhusa pipe, opituhu oporavíquisa sui inungar Tūpa opituhu omabahe mboaviye pare aracahe. ¹¹ Sese yayemoviracua catura yande reique āgua evocoi mbituhusa pipe. Aní chira ava aracahendar seroyaēhisar recocuer rupi tupri avei yaicora.

¹² Esepio, Tūpa Ñehengagüer oicove vahe, ipírata avei. Ahe inungar avei quise saimbe catu vahe que ambuae quise pucu saimbe yoya vahe sui. Ahe oique vahe ité yande avíterve; ēgue ehi avei iñehengagüer oñatoi eté yande hā, yande espíritu avei. Iyavei omboyecua tupri ité yande pihañemoñeta. ¹³ Ndipoi eté niha mbahe Tūpa rembiapo ñomipri ichui. Opacatu ité oicua, osepia avei opacatu mbahe. Ahe niha oporandura opacatu yande recocuer rese yandeu curi.

Jesús niha pahi ivate catu vahe secoi

¹⁴ Jesús, Tūpa Rahir, pahi ivate catu vahe secoi yandeu oique vahe ivate Tūpa piri. Sese yayemoviracuaño itera sese yande yeroyasa pipe. ¹⁵ Esepio, yande pahi ivate catu vahe oicuaño

ité yande recocuer pīrataēhisa. Ahe avei niha yande nungar aracaco viroparaisu opacatu mbahe-mbahe tēi güecoāhasa. Ahe rumo ndoyemboangaipai eté ipipe. ¹⁶ Sese yayemboya catura yande yeroyasa pipe yande Tūpa rese. Esepia, ahe yande raisu ité. Ipipe sui tayande paraisuereco güeco aviyesa pipe yande pītivii ãgua mbahe tēi oimese yandeu.

5

¹ Opacatu pahi ivate catu vahe iporavopri secoi ava pāhu sui ava recocuer reropovēhe ãgua Tūpa upe iyavei porerecosa mundo ãgua chupe, mbahe mimba yucapri reropovēhe ãgua avei ava angaipa repirā. ² Ahe pahi niha oiporara avei teco asisa ambuae ava nungar. Sese güeco asiēhisa pipe oipītivii ava ndayaracuai vahe, oyavi vahe avei. ³ Ahe rumo güeco pīrataēhisa pipe viropovēhe mbahe mimba yucapri Tūpa upe oangaipa repirā, opacatu ambuae ava angaipa repirā avei. ⁴ Ndiyai chira que ava oyesui tēi pahi oyeapo. Tūpa ité rumo osenoira imboetei uca ãgua inungar acoi Aarón upe aracahe. ⁵ Ëgüe ehi avei Cristo, ahe noñeenoi pahi ivate catu vahe güeco ãgua oyesui tēi. Tūpa ité osenoi imboetei uca ãgua acoi aipo ehise:

“Nde che rahir ereico, co pipe amondo nde recove ãgua” ehi.

⁶ Aipo ehi avei ambuae icuachiapri pipe:

“Nde ereico pahi ivate catu vahe apirēhi vaherā, inungar tupri mbia Melquisedec serer vahe” ehi.

⁷ Co ivi pipe Cristo oicove vitese, oyeroqui pīrata oyasehosa pipe Vu Tūpa upe yepi. Esepia, ahe oicatu ipīsiro ãgua manosa sui. Ëgüe ehi iporeroya tuprisa pipe, Tu osendu iyeroqui yepi. ⁸ Yepe Tahir ité viña, güeco paraisu pipe rumo oyembohe imboyeroya ãgua; ⁹ evocoiya güeco pipe omboaviye güeco catuprisa. Ipipe sui güeru poropīsirosa ndopai vahe opacatu viroyasar upe nara. ¹⁰ Esepia, Tūpa niha osenoi pahi ivate catu vahe seco ãgua inungar Melquisedec aracahe.

Peicua catu, “Ndaroyai eté co tecocuer piásu” pe hesa sui

¹¹ Orovireco vite mo setá mbahe ore ñehe ãgua pēu co mbahe tecocuer resendar rese. Yavai etepri rumo imombehu tupri ãgua. Esepia, pe ndapesenducua tupri vitei eté.

¹² Aracacove peporombohera viña; peipota vite rumo pēu mbahe ndayavaimi vahe imombehu iri ãgua yembohesa Tūpa suindar. Ndapeyemoviracuai rumo; peihu iri pota cambi mbahe sāta vahe hu rāgüler sui. ¹³ Esepia, acoi ëgüe ehi vahe pītani osi rese ocambu vite vahe nungar tēi pe recocuer. Ipipe sui ndapeyembohei eté Tūpa Ñehengagüler rese mbahe tupri pe reco ãgua. ¹⁴ Co tembihu sāta vahe rumo ahe ava ocuacua

vahe upē nara. Esepiā, ahe oyembohe tupri catu ñehengagüer rese güeco tupri ãgua yepi. Ipípe sui oicua ité mbahe avíye vahe poravo mbahe naporai vahe sui.

6

¹ Sese ndiyai yayembohe yembohesa yipindar vahe Cristo resendar ahe avei-vei vahe rese. Iya rumo yaguata catu tenonde inungar ava oicua catu vahe mbahe. Ipípe sui tayaicua seroyasa pipe ambuae mbahe Tūpa suindar co mbahe rese yembohe iri rágüer sui. Ahe yipindar vahe co: yande ñecuñarosa, yande reco ai sui yande poisa, manosa apiréhi vahesave yande rerasoëhi ãgua, iyavei Tūpa rese yande yeroyasa, ² yembohesa poroäpiramosa resendar, po mondosa Tūpa reroyasar haríve, omano vahe cuerayevisa iyavei ava recocuer rese porandusa resendar avei. ³ Tūpa oipotase yayembohera ambuae mbahe yavai catu vahe rese.

⁴ Acoi ava yipindar osenducua vahe Tūpa remimbotar, osâha vahe avei Tūpa suindar porerecosa iyavei oyandu ité Espíritu Santo güecocuer pipe, ⁵ osâha vahe avei Tūpa Ñehengagüer avíye vahe iyavei osâha chîhi ipíratasa curi oime vaherã viña, ⁶ oyepepise rumo ichui, ndayaicatu iri seco reroyevi iri ãgua Tūpa upē. Esepiā, yaticapri nungar iri eté vireco Tūpa Rahir iyavei ambuae ava omoñehe-ñehe têi iri sese. ⁷ Esepiā, ava inungar ivi osupite vahe amar oquise yepi. Iha tuprise mbahe miti oyese oporaviqui vahe upē, evocoiyasse evocoi nungar ava oipisira porovasasa Tūpa suindar. ⁸ Ahe ivi rese yu pâve têi oyesuse, ahe naporai eté. Evocoi nungar ava Tūpa poromocañisavrive têi, sapipirã têi avei yuvirecoira curi.

Yande remiaro avíye vahe yande moviracua tupri vahe

⁹ Che mboripar saisupri, yepe aipo orohe pêu viña, oromoha ité rumo mbahe avíye catu vahe pêu co ñepisirosa pare. ¹⁰ Esepiā niha, Tūpa seco avíye vahe, ahe ndasesarai chietera pe rembiapo avíye vahe sui pe poroaisusa pemboyecua vahe peipítivise seroyasar. Ahe niha co peyapoño vite peico. ¹¹ Ore rumo oroipotaño ité ñepei-peí pe pemboyecuaño itera arí cañi rupi eté co pereco vahe pe querëhisa pe remiaro avíye vahe rupiti ãgua. ¹² Ndoroipotai pe atëhisa perecora co tecocuer upē. Oroipota rumo pe saquicue moñara acoi ava yande Yar rese oyerojasa pipe iyavei güeco ñemosasa pipe oipisi vahe porerecosa imombehupri Tūpa sui.

¹³ Peyemomahenduha acoi Tūpa güemimbotar omombehuse Abraham upē: “Che rer pipe amboavíyera co mbahe ndeu” ehise chupe aracahe. Esepiā, ndipoi eté ambuae ivate catu vahe ichui ñgue ehi vaherã. Sese ahe güerer ité osenoi ¹⁴ aipo

ehi chupe: "Supi eté oroovasa itera, iyavei setara ava nde suindar" ehi. ¹⁵ Evocoiyase Abraham osāro güeco mbegüesa pipe, ēgue ehi ipisi oyeupendar Tūpa remimombehu. ¹⁶ Ava omoingatu potase oñehe, ivate catu vahe rer pipe omoin-gatu yuvireco yepi. Ēgue ehise yuvireco, ndiya iri eté ipare oñehe vitera sese. ¹⁷ Tūpa güerer pipe ité omoingatu oñehe omombehuse güemimbotar aracahe 'toicua tupri che remimombehu pisí água che ñehe ñepei reseve vahe yuvireco, iyavei amboaviye itera che remimombehu chupe' oyapave aipo ehi aracahe. ¹⁸ Ēgue ehi oime ñuvirío mbahe imboye-poepipiréhi: Tūpa niha ndoporombopai vahe ité, ipipe avei yande mongueréhi catu yande yaseca vahe iporopítiviisa iyavei yayeroya vahe ñearosa yandeu ombou vahe rese. ¹⁹ Co mbahe yasāro vahe omoviracua tupri yande hā, inungar mbahe carite guasu mombitasa omoviracua tupri carite ivitu sui. Ēgue ehi yande remiaro oique turucuar guasu tūparo asiasa cupeve oí imaranehi catu vahesave ivave. ²⁰ Aheve Jesús oique yande raperā mboi água. Ēgue ehi ahe apiréhi vahe ité pahi ivate catu vahe güeco água, inungar tupri Melquisedec aracahe.

7

Jesús pahi Melquisedec nungar tupri ité

¹ Co Melquisedec aipo mborerecuar guasu Salem pendar, iyavei pahi Tūpa ivate catu vahe upendar secoi aracahe. Abraham oyevise peri rupi ovavasa sui ou mborerecuar guasu eta momba pare, ahese aipo osē voi eté oso Abraham rovaichi Tūpa porovasasa mundo água chupe. ² Iyavei aipo Abraham omondo oporerecosa vavasa sui mbahe güeru vahe diez vahe sui ñepei-peí chupe. 'Mborerecuar guasu seco ívi vahe' oyapave Melquisedec ehi. Iyavei ahe mborerecuar Salem pendar, ahe tecua Salem 'mbahe tupri' oya; sese mborerecuar guasu mbahe tupri vahe secoi. ³ Ahe iyesupa rumo ndicuasai eté iyavei ichi, tamoi, ari iharagüer ndicuasai vahe ité. Ndicuasai avei imano agüer yuvireco. Secocuer rumo inungar Tūpa Rahir recocuer; ahe pahi apiréhi vahe ité.

⁴ Peyapisaca tupri co mbia recocuer rese: ivate ité secoi aracahe. Yande ramoi Abraham teiteté avei omondo diez sui ñepei-peí mbahe porerecosa mborerecuar guasu eta sui güembierocua chupe. ⁵ Moisés porocuaita pipe rumo opacatu Leví suindar pahi eta yuvirecoi vahe vireco ité ocuaita opacatu ava sui diez sui ñepei-peí iporavíquimi rerocua água yuvireco. Abraham suindar ité niha ēgue ehi yuvireco. ⁶ Yepe Melquisedec ndahei Leví suindar viña, ahe rumo oipisi ité Abraham sui evocoi porerecosa; Abraham, ahe acoi oipisi

vaherā mbahe Tūpa remimombehu. Êgüe ehi Melquisedec Abraham rovasa. ⁷ Supi eté sovasapri sui oporovasa vahe ivate catu secoi yepi. ⁸ Evocoi levita suindar oipisi ava poravíqui reprí diez sui ñepei-pei. Ahe ava rumo omano vaherā tēi yuvirecoi. Icuachiapri aracahendar pipe rumo Melquisedec serer vahe oicoveño vahe ité. ⁹ Ndoyavii evocoiyase opacatu pahi eta Levi suindar omondo vahe porerecosa Abraham rupive chupe yuvireco viña. ¹⁰ Esepia, Abraham oyeseve vite Levi oyesuindar vireco, evocoiyase ihaëhi viteseve oyeepia Melquisedec rese yuvireco aracahe.

¹¹ Ava israelita yuvirecoi vahe oipisi mborocuaita pahi levita sui yuvireco; ahe Aarón suindar yuvirecoi. Supi etese rumo ava virecose Tūpa suindar güeco catuprisa evocoii mborocuaita reroya pipe viña, evocoiyase ndoyemboye-cuai chietera ambuae pahi viña. Ndahei chira rumo ahe Aarón nungar, ahe Melquisedec nungar itera. ¹² Esepia, Tūpa osecuñaro evocoii pahi cuaita, osecuñaro aveira supive mborocuaita; ¹³ iyavei yande Yar, ahe sese acoi icuachiapri pipe ñehesa, ndahei Levi suindar, ahe rumo ambuae judío ramoi suindar. Ahe ichui acoi ndipoi eté osē vahe ambuae pahi. ¹⁴ Esepia, icuapri ité yande Yar Judá suindar secoise. Iyavei Moisés noñehei ahe ichuindar turi vahe rese oñehese pahi cuaita rese.

¹⁵ Iyavei co oyecua tupri catu itera, oyecuase pahi ipiasu vahe Melquisedec nungar. ¹⁶ Ahe rumo ndahei porocuaita “uma sui oséra pahiguā” ehi vahe sui oique pahi güeco ãgua; güecocuer pírata ndopai vahe reseve oique. ¹⁷ Esepia, Tūpa ité aipo ehi oñehese sese:

“Nde pahi apirëhi vaherā ité ereico inungar Melquisedec” ehi. ¹⁸ Sese mborocuaita aracahendar opa ité. Esepia, ahe nipi-ratai, ndayande pítivii eté. ¹⁹ Esepia, Moisés porocuaita ndosecocuer mbocatupri eté ava. Yande rumo yasāro mbahe avíye catu vahe yande recocuer uve nara. Supi niha yayem-boya Tūpa rese.

²⁰ Tūpa rumo oñeho omoingatu ñepei reseve güerer pipe. Ambuae pahi rumo ndahei ñepei reseve senoipri yuvirecoi Tūpa rer pipe. ²¹ Yande Yar rumo Tūpa osenoi ñepei reseve güerer pipe pahi seco ãgua icuachiapri pipe aipo ehise chupe: “Yar Tūpa osenoi ñepei reseve, sese nosecuñaro chietera: ‘Nde pahi apirëhi vaherā ité ereico’ ehi”

ehi icuachiapri pipe. ²² Sese Jesús rese yaicua Tūpaomboaviyera güemimbotar ipiasu vahe yandeu avíye catu vahe yípindar vahe sui. ²³ Yípindar setá pahi yuvirecoi. Opa-opaño rumo omano. ²⁴ Jesús rumo nomanoi vahe ité, sese nomondoi chietera pahi güecosa ambuae upe. ²⁵ Sese ahe oicatu ité ñepei

reseve viroyasar Tūpa rese oyemboya vahe pīsiro āgua apirēhi. Esepia, ahe oicove vaherā ité apirēhi oyeroqui vaherā Vu Tūpa upē sese.

²⁶ Supi eté Jesús pahi ivate catu vahe secoi. Evoco nungar niha ipane ité yandeu yipindar. Ahe ndaseco marai vahe, ndoyapoi vahe mbahe tēi güeco maranehisa pipe, ndahoyoyai avei ava angaipa viyar rese, iyavei ahe ivate catu vahe iva pendar sui. ²⁷ Ndahei eté ambuae pahi eta nungar secoi, ndoyuca ranei ari yacatu rupi mbahe mimbā Tūpa upe seropovēhe āgua yipindar oangaipa rese, ipare opacatu ambuae angaipa rese. Ñepei reseve ité rumo güete viropovēhe opacatu ava angaipa repirā. ²⁸ Moisés porocuaita rupi iporavopri pahi ivate catu vaherā ava ndahei seco tupri vahe; Tūpa rumo Moisés porocuaita pare osenoí ñepei reseve Guahir seco catupri vahe ‘tasecoi pahi ivate catu vahe apirēhi vaherā ité’ oya.

8

Jesús Tūpa remimbotar ipiasu vahe omoime yandeu

¹ Co rupi eté oroyepota ore remimombehu mbahe aviyē catu vahe upē. Yareco ité evoco nungar pahi ivate catu vahe. Ahe oguapi Vu acato coti omborerecuasa pipe ivave oī. ² Aheve pahi secoi oporaviqui Vu rēta supi eté vahe pipe. Ahe ivave ité yande Aposar rembiapo, ndahei ava tēi rembiapo.

³ Opacatu pahi ivate catu yuvirecoi vahe senoisa mbahe oporerecosa iyavei mbahe mimbā yucapri viropovēhe vaherā Tūpa upe yuvireco. Sese Jesucristo avei vireco mbahe viropovēhe vaherā Vu Tūpa upe. ⁴ Ahe secoise co ivi pipe viña, ndahei chietera pahi secoi viña. Esepia, cohabe oime vite ité pahi mbahe viropovēhe vahe Moisés porocuaita rupi yuvireco. ⁵ Co ivi pipendar pahi rumo ihañeco iva pendar rahanga rese tēi yuvireco. Yaicua niha ahe sahanga tēi. Esepia, Moisés oyapo potase tūparo, Tūpa aipo ehi chupe: “Emahecua tupri acoi ivitrive amboyecua vahe rese ndeu. Ahe inungar tupri eyapo” ehi chupe. ⁶ Yande pahi ivate catu vahe rumo, Jesús, vireco ocuaita aviyē catu vahe ambuae pahi sui. Esepia, Tūpa remimbotar ipiasu vahe Jesús güeru vahe yandeu aviyē catu vahe ité yipindar vahe sui iyavei sesendar Tūpa remimombehu aviyē catu vahe avei.

⁷ Esepia, yipindar Tūpa remimbotar oicatuse yande recocuer recuñaro āgua viña, ndipoi chira ambuae semimbotar ipiasu vahe yandeu viña. ⁸ Tūpa rembiepiave rumo ava recocuer mbahe tēi eté. Sese aipo ehi icuachiapri pipe co ava rese aracahe:
“Yande Yar aipo ehi:

'Oimera ari ayapo iri ãgua che remimbotar ipiasu vahe ahe
Israel pendar upe, Judá pendar upe avei.

⁹ Ndahoyoyai chira rumo acoi tamoi eta rese yipindar ayapo
vahe che remimbotar.

Ahese acoi opa anose ivi Egipto sui,
nomboaviyei eté rumo che porocuaita yuvireco.
Sese apoi ichui' ehi yande Yar Tüpa.

¹⁰ 'Co ari pare rumo na ahera che remimbotar apo Israel
pendareta upe' ehi yande Yar Tüpa,

'Amondora che porocuaita iyapisacasa pipe,
aicuachía aveira ipihañemoñetasasa pipe.

Evocoiyase che iTüpa aicora; ahe evocoiyase cheundar
yuvirecoira.

¹¹ Nombohe iri chira ondugüer, omu avei che cua uca ãgua
yuvireco.

Esepia niha, opacatu chihivahe catu vahe sui,
ava ocuacua catu vahe avei che cuara yuvireco.

¹² Iyavei cheñero aveira mbahe tēi sembiapogüer rese
yuvireco chupe; ndayemomahenduha iri chiaveira
yangapagüer rese' ehi yande Yar"

ehi icuachiapri pipe aracahe. ¹³ Oñehese Tüpa güemimbotar
piasu rese, omombehu yipindar vahe cañi ãgua; chihimi tēi
ipane icañipa ãgua.

9

Tüparo ivi pipendar iyavei tüparo iva pendar

¹ Evocoiyase yipindar Tüpa remimbotar vireco ava cuaitarã
iñemonuha ãgua Tüpa mboeteisa pipe iyavei vireco tüparo co
ivi pipendar. ² Ahe tüparo pipe na ehi mbahe imoingatusa:
yipindar oi Nimarai Vahe serer. Ipipe oime vera renda iyavei
mesa pan sovasapri Tüpa upendar reseve. ³ Imoñuviriosa
turucuar tüparo asiasa cupeve oime ambuae oi, ahe serer Ni-
marai Catu Vahe. ⁴ Aheve oime itaisi rapisa renda oro apopri,
aheve avei oime Tüpa porocuaita ríru oro pipe yaopri. Ahe
ipipe oime cambuchi oro apopri ahe tembihu maná ríru, ipipe
avei oime Aarón pococa ahe sori vahe, iyavei mborocuaita
cuachiapri ita ipe vahe rese oime ipipe. ⁵ Ahe mborocuaita
ríru harive oime Tüpa rembiguai rahanga oyovai yuvinohai,
"Tüpa oime ité cohove" he ãgua. Ahe ipepo oyopi tupri Tüpa
porocuaita ríru rovapisa yuvireco. Co rupive revo amombe-
hura co mbahe pẽu.

⁶ Evocoit nungar mbahe moingatupri pare, pahi eta
yuviroiqueño yipindar oi asiapri pipe ari rupi ocuaita apo
ãgua. ⁷ Imoñuviriosa oi pipe rumo pahi ivate catu vaheño
oique ñepei reseve ñepei-peí aravíter pipe, iyavei güeique

yacatu viroique mbahe mimba ruvi viropovēhe vaherā Tūpa upe oangaipa rese, ava icuaēhi pipe angaipa oyapo vahe repirā avei. ⁸ Co rese Espíritu Santo oicua uca yandeu avaño tēi ndiya vītei eté oique ipa vahe oi imaranehi catu vahe pipe Tūpa rovai oime vītese yipindar oi yasiapri. ⁹ Co opacatu mbahe yande mbohe mbahe cūriteindar rese. Esepia, co porerecosa iyavei mbahe seropovēhepri aheve Tūpa upe, nomoatiroi eté imboeteisar pihañemoñetasa. ¹⁰ Ahe rumo carusa, ihusa, ñemoatirosa nungar mbahe resendar tēi; yande retecuer resendar tēi porocuaita. Ahe rumo ēgue ehiñomi tēi yuvireco Tūpa remimbotar ipiasu vahe yu ãgua renonde.

¹¹ Poropisirosar rumo ou cute. Iyavei ahe ité cūritei yande pahi ivate catu vahe secoi mbahe aviye vahe güeru vahe yandeu. Ahe pahi reiquesa rumo ndahei ava rembiapo nungar tēi, ahe rumo aviye catu ité iyavei ndahei eté co ivi pipe yapopri. ¹² Cristo rumo oique ité imaranehi catu vahesave ivave. Ndahei rumo ovesa iyavei guaca rahir ruvi reropovēhe ãgua, ahe rumo viropovēhe vuví ité opacatu rese; ēgue ehi ahe ñepei reseve oique apirēhi vahe ñepisirosa reime ãgua yandeu. ¹³ Supi eté guaca cuimbahe ruvi iyavei ovesa ruvi, guaca cuña tanimbu acoi imondopri vahe ava seco mara vahe rese, ahe avei vireco raimi tēi píratasa ava rete moatiro ãgua. ¹⁴ Cristo ruvi rumo vireco catu ité píratasa. Esepia, Cristo, Espíritu apirēhi vahe pipe, oyemondo ahe ae Tūpa upe inungar mbahe seropovēhepri nimarai vahe, iyavei suvi yande pihañemoñetasa moatiro opacatu yande rembiapo ai manosave yande rereco vahe sui Tūpa oicove vahe upe mbahe apo uca ãgua yandeu.

¹⁵ Sese Jesucristo secoi Vu remimbotar ipiasu vahe moingatusar ava reru ãgua Tūpa upe omano pipe. Ipipe sui oime ñeroisa oyemboangaipa vahe yipindar mborocuaitavrive yuvirecoi vahe upe ‘toipisi che rembiporavo yuvireco oyeupendar mbahe apirēhi vahe che remimombehuguer rupi’ oya. ¹⁶ Que ava oicua ucase güemimbotar ombahe mondo ãgua omano renondeve, icuasa tupri ranera rumo imanosa semimbotar apo ãgua renonde. ¹⁷ Esepia, ndiya vītei eté omano vaherā recove viteseve mbahe imondosa iyarā upe. Imanore voi rumo aviye imondosa. ¹⁸ Sese yipindar vahe Tūpa remimbotar yaposa mbahe mimba ruvi piyere pipe. ¹⁹ Esepia, Moisés omombehupase mborocuaita opacatu ava upe, oipisi ovesa ragüer píra vahe iyavei ivira hisopo serer vahe räca, ahe omoaqui guaca rahir ruvi iyavei ovesa rahir ruvi, i rese oyeseha vahe pipe. Ipipe opa osipii cuachiar mborocuaita resendar, opacatu ava avei. ²⁰ Evocoiyase

aipo ehi icuachiapri pipe: “Co mbahe ruví oicua tupri uca co porocuaita Túpa ombou vahe omboyeroya ãgua pêu” ehi. ²¹ MBAHE MIMBA RUví PIPE AVEI OPA MOISÉS OSIPÍI TÚPARO IYAVEI OPACATU MBAHE IPÍPENDAR IPORUPRI. ²² POROCUAITA RUPI ETÉ TUví PIPE SENI OPACATU MBAHE OÑEMOATIROPA TÚPA ROVAQUE; NDIPOI ETÉ ÑEROISA ANGAIPA UPE MBAHE RUví PIYEREPRI POREHISE.

Túpa upe güete reropovéhe pipe Cristo omocañi angaipa

²³ Iyacatu ité imoatirosa evoco nungar mbahe mbahe mimba seropovéhepri ruví pipe. Esepio, co mbahe iva pendar nungar tēi sahangaposa; iva pendar ité rumo ipotasa seropovéhepirã mbahe avíye catu vahe evoco sui. ²⁴ Esepio, Cristo ndoiquei túparo oí imaranehi catu vahe ava rembiapo pipe tēi. Esepio, ahe iva pendar rahanga tēi. Ëgue ehi rumo ahe oique ité ivave. Aheve cûritei secoi Túpa rovai yande pítivii ãgua oyeroqui pipe. ²⁵ Judío pahi ivate catu vahe niha ñepei reseve oique araviter yacatu oí imaranehi catu vahe pipe mbahe ruví tēi reropovéhe ãgua; ndahei rumo vuví ité viropovéhe. Cristo rumo ndoyeeropovéhe píhi Túpa upe. ²⁶ Ëgue ehise rumo, yipisuive omano pihira viña. Cûritei rumo oyemboyecua co ipa ari rupi ñepei reseve, apiréhi vaherã viropovéhe ãgua güete Túpa upe ‘tocañipa angaipa’ oya. ²⁷ Supi eté opa rane itera ava omano yuvireco, ipare voi ñepei reseve oimera porandusa. ²⁸ Indó, Cristo oyeyeropovéhe ñepei reseve opacatu angaipa mocañi ãgua. Ipate rumo oyeví irise ou, ndahe iri chira angaipa recocuer rese. Ahe rumo oyevira ou guárosar písiro ãgua.

10

¹ Esepio, Moisés porocuaita mbahe avíye vahe ou vaherã rahanga tēi, ndahei ahe eté vahe ité. Sese ahe porocuaita ndoicatui eté ava Túpa rese oyemboya vahe reco mohivi tupri ãgua mbahe seropovéhepri araviter yacatundar pipe tēi. ² Porocuaita oicatusse pe angaipa sui pe moatiro tupri ãgua, ndapeyandu iri chira pe angaipa viña iyavei pahi ndovirogovéhe iri chiaveira mbahe ruví Túpa upe yuvireco viña no. ³ Co seropovéhepri rumo yande momahenduha uca ãgua tēi yande angaipagüer rese araviter yacatu. ⁴ Esepio, mbahe mimba ruví tēi nomocañi eté yande angaipa yande sui.

⁵ Sese Cristo co ivi pipe ouse, aipo ehi Túpa upe: “Ndereipota iri niha mbahe mimba tēi porerecosa seropovéhepirã ndeyeupe, nde rumo ereyapo che retecuer evoco nungará.”

⁶ Ndahei niha nde pīha rupi mbahe rapiprī mbahe mīmiba yu-
caprī ndeu seropovēhepri ñepei reseve angaipa mocañi
âgua.

⁷ Evocoiyase che aipo ahe:

'Che ayu nde remimbotar apo âgua, che Ru Tūpa, che resendar
icuachiapri remimombehu rupi tuprī mboaviye âgua'
ahe" ehi.

⁸ Yipindar aipo ehi, Tūpa ndoipotai eté, iyavei ndahei ipīha
rupi mbahe mīmiba reropovēhepri, porerecosa mbahe sapiprī
avei angaipa mboyeho âgua, yepe ahe mborocuaita rupi
seropovēhesa viña. ⁹ Ipare aipo ehi: "Che ayu nde remimbotar
apo âgua" ehi. Ahe ipipe omombopa yipindar vahe mbahe
seropovēhepri co ambuae mbahe ipiasu vahe apo âgua. ¹⁰ Tūpa
evocoiyase yande peha angaipa sui oyeupe nara. Esepia,
Jesucristo oyapo ité semimbotar mbahe ñepei reseve apirēhi
vaherā güete mondo pipe.

¹¹ Opacatu judío pahi eta ari yacatu oyapo ocuaita iyavei
mbahe mimba avei-vei vīropovēhe Tūpa upe yuvireco. Yepe
ahe vīropovēhe tēi yuvireco viña, nomocañi catui eté rumo an-
gaipa. ¹² Jesucristo rumo oyeeropovēhe ñepei reseve angaipa
repirā apirēhi vaherā. Ipare oso ivate, oguapi oī Vu acato coti.
¹³ Aheve osāro oī Vu Tūpa opase voi omondo yamotarēhimbar
ipovrīve. ¹⁴ Esepia, ñepei reseve oyeeropovēhe pipe oseco-
mohīvi tuprī Vu Tūpa rembipeha apirēhi vaherā. ¹⁵ Iyavei
Espíritu Santo aipo ehi tuprī avei icuachiapri aracahendar
pipe yandeu:

¹⁶ "Co ari pare rumo na ahera che remimbotar apo chupe'
ehi yande Yar Tūpa, 'Coye amondora che porocuaita
ipīhañemoñetasa pipe, amondo aveira iyapisacasa pipe'
ehi.

¹⁷ Ndayemomahenduha iri chietera yangapagüer rese iyavei
mbahe tēi sembiapogüer rese yuvireco" ehi aracahe.

¹⁸ Ëgüe ehi angaipa rese oimese ñeroisa, ahese ndiya iri
seropovēhesa mbahe angaipa repirā.

Yayemboya catura Tūpa rese

¹⁹ Sese che rivireta, iya ité cūritei yande reique âgua
Tūpa rovai yande siquiyeēhisa pipe Jesucristo ruví pipe sui.

²⁰ Yaicoveño itera ipiasu vahe tecocuer tecovesa yandeu om-
bou vahe pipe. Ahe niha omboi tūparo pipe asiasa turucuar
yande reique âgua Tūpa rovai. Ahe turucuar inungar Jesús
rete. ²¹ Iyavei ahe yande pahi ivate catu vahe ité secoi
Vu Tūpa rēta rārosar; ²² sese yayemboya catura Tūpa rese
yande pīhañemoñeta tuprisa pipe iyavei yande yeroysa ipa
voi vahe pipe. Supi eté ahe opa yande reco mbocatuprī
yande pīhañemoñeta raisa sui iyavei omoatiro yande rete

i maranehi pipe. ²³ Yayemoviracua catura mbahe aviye vahe yande remiaro pipe yamombehu vahe ava upe yande pihañemoñeta rerovaëhisa pipe. Esepio, Tüpa omboavíye itera mbahe güemimombehugüer yandeu. ²⁴ Iyavei yasecañora ñepei-peí yañepitivii vaherä yande yeaisu catu äqua iyavei mbahe tupri apo äqua yandeyeupe. ²⁵ Ndayamopanei chira yande ñemonuhasa Tüpa upe. Ndayaicoi chira omopane vahe nungar, iya rumo yayemonguerëhi catura ñepei-peí yandeyeupe. Esepio, viroví arí yande Yar yeví iri äqua.

²⁶ Acoi, “Tayemboangaipaño ité” yahese mbahe supi tupri vahe cua pare yaico, ndipo iri ambuae seropovëhepirã evocoí yande angaipa repirä yandeu; ²⁷ Tüpa ñemoirosa ipírata vahe güeraño oimera yandeu iyavei tata guasu apirëhi vahe opara omocañi Tüpa amotarëhimbar yuvirecoi vahe. ²⁸ Ava Moisés porocuaita ndoviroyai vahe que ñuvirío, anise mbosapi rembipeiave, ahe secocuer mombehuse, ahe yucapri ité saisuëhisa pipe yuvirecoi. ²⁹ Peyapisaca tupri co rese: ipírata catu oimera Tüpa ñemoirosa tahir reroïrosar upe curi iyavei acoi ava vireco vahe suví inungar mbahe ëgue ehi tẽi vahe iyavei viroïro tẽi vahe guaisusar Espíritu, chupe avei oimera Tüpa ñemoirosa ipírata catu vahe. Esepio, co tuví rese niha seroyapri ité Tüpa remimbotar. Ipípe avei niha ahe ava Tüpa rembipeha yuvirecoi. ³⁰ Yaicua niha yande Yar aipo ehise: “Che ité asepira, sembiapo ai amboyevira chupe” ehi aracahe. Iyavei ambuae ñehesa aipo ehi vahe: “Yar oporandura mbahe sembiapogüer rese ava oyeupendar upe” ehi. ³¹ ¡Mbahe tẽi eté yaiquese Tüpa oicove vahe ñemoirosa pipe!

³² Peyemomahenduha acoi aracaco co tesapesa nungar supi eté vahe pisi ramose, peyemoviracuaño ité pe recoähasa upe pe yemombaraisusa pipe. ³³ Esepio, acoi amove pe pãhu pendar rese iñehe-ñehe tẽi yuvireco, mara-mara tẽi avei pe rereco opacatu ava rovaque. Ambuae pe pãhu pendar evo-coiyase peipítivii pe yemombaraisusa rese. ³⁴ Pesaisuño ité avei ambuae soquendapri yuvireco. Opase pe mbahe virocua yuvireco pe sui peñemosao avei pe viharetesa pipe peico. Esepio, peicua ivave perecora mbahe aviye catu vahe iyavei apirëhi vahe. ³⁵ Sese pemocañi tẽi eme Tüpa rese pe yeroyasa. Esepio, evocoíya pe recosa pipe omoime ucara mbahe tupri pẽu curi. ³⁶ Pe rumo peyemoviracuaño itera mbahe-mbahe tẽi upe Tüpa remimbotar apo äqua semimombehugüer oime vaherä pisi äqua curi. ³⁷ Supi eté icuachiapri pipe Tüpa aipo ehi:

“Pihaivi eté oura acoi ou vahevi.

Ndiaracahei chietera.

38 Acoi cheundar seco catupri vahe rumo che rese oyeroyasa pipe oicovera.

Acoi oyepepise rumo che sui, che evocoiyase ndavihai chira sese" ehi aracahe.

39 Yande ndahei oyepepi vahe nungar yaico. Evoco nungar niha ocañi tēi vaherā yuvireco. Yande rumo yayeroya sese; ipipe yañepisiro.

11

Tūpa rese yeroyasa

¹ Supi eté yarecose yande yeroyasa Tūpa rese, ahese yaicua ahe ombou itera mbahe yasāro vahe yandeu, iyavei yaicua ité oime mbahe ndayasepiai vahe. ² Supi eté amove yande ramoi aracahendar upe, "Aviye ité" ehi Tūpa oyece yeroyasa pipe sui.

³ Tūpa rese yande yeroyasa pipe yaicua ahe oñeho pipe ité oyapo opacatu mbahe. Sese yaicua cūriteindar mbahe yasepia vahe mbahe ndayasepiai vahe apopri.

⁴ Sese oyeroya pipe Abel viropovēhe oporerecosa aviye catu vahe Caín porerecosa sui chupe. Sese, "Co ava seco catupri vahe che rovaque" ehi iyeroyasa rese oipisi tuprise iporerecosa. Yepe Abel omano viña, oimeño vite rumo Tūpa rese yeroya agüer resendar ñehesa.

⁵ Enoc avei Tūpa rese oyeroyasa pipe serasosa co ivi pipe sui, "Tomano rane" ndehi eté chupe. Ava ndoseca iri eté yuvireco. Esepia, Tūpa ité viraso secove reseve. Yipindar rumo Tūpa virasoëhi viteseve, "Enoc recocuer aviye ai rane ité chupe" ehi icuachiapri aracahendar. ⁶ Ndahei eté rumo Tūpa piha rupi yaico ndayayeroyaise sese. Esepia, oyemboya pota vahe sese, "Oime ité Tūpa" ehi rane itera, iyavei, "Oime itera mbahe secasar upe nara" ehi aveira.

⁷ Noé avei oyeroya Tūpa rese. "Oimera mbahe tēi co ivi pipe ndapesepia vîtei vahe" ehise chupe, viroya voi eté. Evocoiyase seroyasave oyapo arca oyesuindar písiro ãgua. Iyavei sese oyeroya pipe omombehu ava co ivi pipendar cañi ãgua. Ahe rumo Tūpa rese oyeroya pipe oñepisiro.

⁸ Abraham avei oyeroya Tūpa rese. Esepia, Tūpa, "Eso ambuae ivi ndeu amboyecua vaherā vahesave, ahe amondora ndeu" ehise, ombooyeroyaño ité. Yepe ahe ivi ndoicuai viña, oséño ité rumo oivi sui oso. ⁹ Ipare Tūpa rese oyeroya pipe avei secoiño ité ahe ivi pipe. Ndoyavii ambuae ivi pendar secoi vahe; oí mbahe pirer apopri pipe tēi aheve secoi. Ëgüe ehi tupri avei tahir Isaac iyavei sumino Jacob. Ahe avei oipisi vaherā Tūpa remimombehu ivi yuvireco. ¹⁰ Esepia, aipo

Abraham osāroño ité tecua ivate ovíracua vahe. Tūpa niha ahe tecua rāhasar, yaposar avei.

¹¹ Yepe Sara nimembii vahe viña iyavei Abraham ocuacuami, Tūpa rese oyeroyasave rumo oipisi pīratasa Tūpa sui guahi ãgua. Esepia, viroyaño ité Tūpa oñeho omboaviye ãgua chupe. ¹² Evocoiyase yepe Abraham ocuacuami viña, vireco rumo guahir. Ahe ichuindar sehi eteanga coiye inungar yasitata iyavei inungar ivi cuhi para guasu popi rupindar ndayaipapa catui vahe ité.

¹³ Ahe ava rumo opacatu omanopa tēi; ndoipissi eté mbahe semimombeguer oyeupendar. Ahe mbahe amombrí rupi osepiañomi tēi yuvireco oyeroysa pipe, soriveteño avei sese. Ëgue ehi oicuaño ité ndahei co ivi pipendar güecosa; ahe rumo yuvirecoveño raimi tēi co ivi pipe. ¹⁴ Aipo ehi vahe oicua uca tupri yandeu oseca vite oyeupendar ivi yuvireco. ¹⁵ Ipihañemoñetase rumo ivi güeco agüer rese yuvireco viña, oyeviririño itera aheve avei yuvireco viña. ¹⁶ Ahe rumo oipota ambuae ivi aviyé catu vahe yuvireco, ahe iva pendar. Sese Tūpa nochí eté, “Che Ru Tūpa” oyeupe hese. Esepia, vireco ité tecua imoingatupri chupe.

¹⁷ Tūpa rese yeroyasa pipe avei Abraham oyemoingatu voi guahir ñepei vahe Isaac reropovéhe ãgua Tūpa upé güecoâhasa pipe. Yepe Tūpa aipo ehi chupe aracahe viña: ¹⁸ “Nde rahir Isaac sui setá oimera nde suindar” ehi. ¹⁹ Esepia, oicua ité Tūpa vireco pīratasa ava omano vahe mbogüerayevi iri ãgua. Evocoiyase imano rāgürer sui eté oipisi iri guahir aracahe. Ahe evocoiyase omboyecua mbahe yandeu.

²⁰ Tūpa rese oyeroya pipe avei Isaac osovasa Jacob, Esaú avei mbahe oime vaherã pisi ãgua.

²¹ Iyavei Tūpa rese oyeroya pipe avei Jacob omano pota ãgua, osovasa ñepei-peí José rahir. Ahese opococa rese tēi eté oyemovíracua oyeroqui ãgua Tūpa upé imboeteisa pipe.

²² Tūpa rese oyeroya pipe avei José, omano ãgua renonde, aipo ehi: “Yande mu israelita opara yuvinose ivi Egipto sui curi” ehi. Ipare oyocuai omu oitacuer rerova ãgua aracahe.

²³ Tūpa rese oyeroya pipe avei, ohase Moisés, iyesupa oñomi mbosapi yasi rupi yuvireco. Esepia, ahe pītani icatupri ai, iyavei ndoyembosiquiyeyi eté mborerecuar guasu porocuaita yuca ãgua sui.

²⁴ Tūpa rese oyeroyasava pipe avei, ocuacuase Moisés, ndoipotai eté, “Egipto pendar mborerecuar guasu rayri membrí” oyeupe he ãgua. ²⁵ Ahe rumo oipota catu marama tēi güereco ãgua Tūpa reroyasar reseve chihí rupive mbahe tēi rese yemboviha rāgürer sui. ²⁶ Aviyé catu ité chupe Tūpa rembiporavo upé nara mbahe tēi porara ãgua Egipto

pendar mbahe eta sepiusu vahe rereco rāgürer sui. Esepio, ahe oicuaño ité oyeupe nara porerecosa Tūpa ombou vaherā.

²⁷ Tūpa rese oyeroaya pipe avei osē ivi Egipto sui osiquiyeēhisa pipe mbororecuar guasu roriēhise. Oyemoviracuaño ité oyese mbahe apo āgua; aviye osepio vahe ité Tūpa acoi ndoyecuai vahe. ²⁸ Tūpa rese oyeroaya pipe avei oyapo Pascua pieta. Opa uca oipichi ava upe oquenda rese mbahe mīm̄ba ruvī Tūpa rembiguai oporoyuca vahe ava israelita rahir ipi yucaēhi āgua.

²⁹ Tūpa rese oyeroaya pipe avei ava israelita osasa para guasu Pīra Vahe ivi ipiru vahe harī rupi yuviraso. Ipare yamotarēhimbar Egipto pendar, “Ēgue yahe avei” ehi yuvireco viña, i rumo opaño oyopi.

³⁰ Tūpa rese oyeroaya pipe avei israelita oyerece siete ari rupi tecua Jericó rese, opa ñachisa onduru. ³¹ Tūpa rese oyeroaya pipe avei Rahab, oyemondo-mondo tēi vahecuer, nomanoi eté ambuae ava mbahe-mbahe tēi vahe rupi. Esepio, ahe oipisi tupriño güētave israelita Jericó ivi repiasar.

³² ¡Setá vīte ambuae ava recocuer oime amombehu vaherā pēu! Ipane ité rumo ari imombehupa āgua: Gedeón, Barac, Sansón, Jefté, David, Samuel iyavei opacatu Tūpa ñehe mombehusar recocuer. ³³ Evoco avei Tūpa rese oyeroaya pipe osecopi ité ambuae ivi pendar, oporocuai tupri güeco ivisa pipe, oipisiño ité Tūpa suindar mbahe semimombehugüer yuvireco, oiyurumboyaño avei yaguar, ³⁴ ombogüe avei tata ipirata vahe, oyeepi avei quise pucu pipe oyuca rāgürer sui; ava nipiratai vahecuer rumo oyemomirata yuvireco, oyemoviracua ité vavasave oyese; opaño ité oamotarēhisar sundao osecopi yuvireco. ³⁵ Oime amove cuña ipāhuve vireco iri vahecuer omu manosa sui imbogüerayevipri.

Ambuae rumo omanopaño ité teco rasisa pipe, “Yasē catu co nungar mbahe sui” ndehi eté yuvireco cuerayevisa aviye catu vahe pipe güeco āgua. ³⁶ Ambuae iparaisu catu ava upe oñeroirosa pipe, onupasa pipe, oapīchi-pīchisa pipe, voquendasa pipe avei yuvireco. ³⁷ Ambuae ita pipe oapiapisave omano, amove imombitesa ivira asiasa pipe, anise ambuae yucasa quise pucu pipe, amove ipāhu pendar oguata tēi, ovesa, cavara pirer añomi tēi iyemondesa, iparaisu mbahe porēhi yuvireco nombohe catui ava ipihañemoñetasa pipe sereco iyavei mara-mara tēi vireco yuvireco no. ³⁸ Evoco seco catupri vahe yuvireco ndiyai co ivi pipendar Tūpa cuaparēhi upe vireco vaherā oyepāhuve, ahe oguata tēi ivi iporupirēhisa rupi, ivitri rupi, mbahecuar rupi avei yuvireco.

³⁹ Yepe ahe opacatu aviye ité Tūpa upe oyeroyasa rese yuvireco viña, ndoipisii eté rumo oyeupe Tūpa remimombehugüer yuvireco. ⁴⁰ Esepia, Tūpa omoime mbahe aviye catu vahe yandeu ‘oyoya tupri toipisi güecocuer ihívi tupri água che remimombehugüer rupi yuvireco’ ohesa pipe chupe, yandeu opacatu avei.

12

Yamahecua tuprira yande yeroyasa pipe Jesús rese

¹ Sese yande, yaicuase setá ité evocoai ava oimeomboyecua vahe Tūpa rese oyeroyasa, iyacatu ité yaseyapa opacatu mbahe ndayande mbohe catui vahe Tūpa upendar mbahe rese iyavei yande angaipa yande mboha tupri vahe. Ichui yayemoviracuaño itera yande cuaita Tūpa ombou vahe rese yandeu inungar ivava catu vahe. ² Yamahe tupri itera Jesús rese. Ahe ichui niha yareco yande yeroyasa Tūpa rese. Ahe avei oyese yande mboporeroya tupri catu. Oiporara curusu rese omano ochíehisa pipe. Esepia, ahe oicua ité oparaisu pare virecora oviharetesa, oguapise omborerecuasave Vu acato coti oí.

³ Pe avei catu, pepihañemoñeta Jesús recocuer rese; ahe oiporara ité mbahe rasicuer ava yangaipa vahe mara-mara tēi güerecose. Sese pecuerai eme Cristo rese peico água iyavei, “Ndorequeréhi iri” ndapeyei chira. ⁴ Esepia, pe ndape mano vitei eté angaipa upe pe yembopihaviracuasa pipe. ⁵ Peresarai eté Tūpa pe mboaracuasa sui tahir ité pe recosa pipe; icuachiapri aracahendar pipe aipo ehi:

“Che rahir, eyemoingatu voiño Yar nde mombaraísusa upe nde reco mohívi tupri água, iyavei, ‘Ndachequeréhi iri’ nderei chiaveira chupe ndeu oñehe píratase.

⁶ Esepia, Tūpa osecomohívi tupri ava güembiaísu iyavei omombaraisu rane guahir sereco água” ehi.

⁷ Peñemosáño catu pe mombaraísusa upe pe reco mohívi água. Esepia, Tūpa égue ehise pēu guahir ité pe rereco. ¿Oime pīha que ñepei ava guahir upe noñehe píratai vahe secocuer mohívi água? ⁸ Tūpa ndape recocuer mohivise inungar oyapo ambuae guahireta upe yepi, pe evocoiyase inungar-ra chihivahe ndiyesupai vahe, égue peye tēi peico chupe. ⁹ Iyavei, chihivahe tēi vite yaicose, yande yesupa co ivi pipendar yande nupa yande recocuer mohívi água, ahese yamboetei. Sese yamboetei catura yande Ru Tūpa íva pendar tecovesa rereco água. ¹⁰ Yande yesupa co ivi pipendar opihañemoñetagger rupi tēi yande nupa yaicove raimi tēise co ivi pipe; Tūpa rumo yande mombaraísu yandeu mbahe tupri água rese yande reco maranehi água inungar ahe ndaseco marai vahe. ¹¹ Supi

eté yipindar, poronupasa yaipisi ramose, tasi yandeu. Coiye rumo yande imbooyeroyasa pipe yayapo catura mbahe ihivi vahe. Ahe evocoiyase yande recocuer rerecora mbahe tupri pipe.

Peicua catu Tūpa ñehe rendu potaēhi sui

¹² Sese pemopoase iri pe reco píratasa iyavei peyemongueréhi iri pe guata água yande Yar rupi. ¹³ Ipare peseca peri ihivi vahe pe recocuer uve nara ‘toingatu che pi ndoguatai vahe’ pe yapave ‘timara catu iri eme’ pe hesa pipe.

¹⁴ Peico catu opacatu ava upe mbahe tupri pipe, peico avei pe reco maranehi pipe. Esepia, ava ndovirecoi vahe güeco maranehi, ndosepiai chietera yande Yar. ¹⁵ Peñearo tupri catu, tipo eme ava ndoipisii vahe Tūpa porovasasa pe pāhuve, iyavei tipo eme mbahe tēi que ava piha pipe; aviyeteramo opacatu rese ova tiétera. ¹⁶ Tipo eme catu pe pāhu pendar oyemboaguasa tēi vahe. Tipo eme avei ava Tūpa upendar mbahe viroiro vahe pe pāhuve inungar Esaú aracahe. Ahe omundo Tūpa porovasasa oyeupendar tahir ipi güecosa resendar mimoi repirá tēi vivri upe. ¹⁷ Iyavei peicua, ipare acoi Esaú oipisi pota Tūpa porovasasa vu sui viña. Ahe rumo ndiya iri eté sovasapirā secoi. Yepe oyasehó iteanga viña, ndiya iri eté rumo mbahe sembierecoví rägür mboyeví água chupe.

¹⁸ Peyemboyase Tūpa rese, ndahei inungar pe ramoi israelita aracahendar. Esepia, ahe ivitri Sinaí sese yapoco vahe rese tēi oyemboya vahe yuvireco; ahe ivitri rese sendí ité inungar tata rendigür; oime pítu, pítumimbi vahe, ivitu ai avei sese. ¹⁹ Iyavei ndapesendui mimbi imoñehepri, Tūpa ñehe avei. Aracahendar rumo osendu ité yuvireco. Iñehe renduse rumo, osiquiyepave ndoipota iri ahe oyeupe ñehe yuvireco. ²⁰ Esepia, ahe oyembosiquiye ité evoco porocuaita aipo ehi vahe sui: “Acoi opíro vahe ivitri rese, yepe que mbahe mimba tēi viña, ahe peyapi-yapi yuca ita pipe, anise lanza pipe avel” ehi. ²¹ Ahe mbahe oyecua vahe aipo oporombosiquiye vahe ité. Evocoiyase Moisés teieté aipo ehi: “Che siquiyepave aríri eté” ehi.

²² Pe rumo peyemboya iva pendar ivitri Sión ve, Tūpa oicove vahe recuave. Ahe tecua Jerusalén iva pendar. Aheve Tūpa rembiguai setá iteanga vahe oñemonuha imboetei água yuvireco yepi. ²³ Iyavei peyemboya opacatu ava Tūpa rahir ipi Cristo reroyasar rese, ahe serer icuachiapri ivave. Peyemboya avei Tūpa rese, ahe niha yande recocuer rese oporandu vahe secoi; iyavei peyemboya ava seco avíye vahe espíritu yuvirecoi vahe rese. Ahe niha Tūpa osecomohivi tupri sereco. ²⁴ Peyemboya avei Jesús rese, ahe omoime yandeu Tūpa

remimbotar ipiasu vahe, ahe suvi yande moatiro vahe. Ahe aviye catu yandeu Abel ruvi sui.

²⁵ Sese peicua catu, “Ndoroviroyai” peye vaherā acoi pēu oñehe vahe upe. Esepia, Moisés reroyaēhisa pipe pe ramoi noñemi eté Tūpa ñemoirosa sui yuvireco, oyeupe, “¡Peicua catu!” ehise co ivi pipe aracahe. Ëgüe ehise chupe yuvireco aracahe, ëgüe ehi catu iri tietera yandeu. Nayañemi chietera ichui cute ndayaroyaise co iva pendar, “Peicua catu” ehise yandeu. ²⁶ Tūpa oñehe pipe omboririi eté ivi aracahe; cûritei rumo yandeu aipo ehi: “Che amboriri irira ivi, ndahei chira rumo ivi güeraño, iva avei amboririira” ehi. ²⁷ ‘Amboriri irira’ aipo oyapave aipo ehi: “Opara mbahe omii vahe omocañi güembiapo Tūpa ‘topita apirēhi mbahe nomii vahe’ oyapave” ehi. ²⁸ Tūpa mborerecuasa ombou vahe yandeu ahe nomii chietera. “Aviye ndeu” yahera evocoiyase sese chupe; ipipe sui yayerure catu yande piha pipe chupe imboeteisave semimbotar rupi. ²⁹ Esepia niha, ahe inungar tata ñepei reseve mbahe omocañipa vahe.

13

Mara yahera Tūpa mboviha

¹ Ndapepoi chietera pe yeaisusa sui ñepei-pei oyeivrí nungar pe recosa pipe. ² Iyavei peresarai eme pe avasa sui ava oyepotase pe piri. Esepia, co nungar apo pipe amove ava omoingue Tūpa rembiguai güêtave icuaëhi pipe.

³ Peyemomahenduha avei soquendapri rese inungar-ra pe avei supive soquendapri peico vahe viña. Iyavei peyemomahenduha ava mara-mara tēi serecopri rese. Esepia, aviyeteramo ëgüe ehi aveira pēu.

⁴ Pe opacatu pemboetei avei mendasa, iyavei peico pe reco maranehisa pipe mendasa rese. Esepia, Tūpa oicuara oyemboaguasa tēi vahe upe.

⁵ Ndahei guarepochi tēi peipota raira. Iya rumo peyembovihaño mbahe pereco vahe rese. Esepia, Tūpa aipo ehi: “Ndoroeyai chietera, ndapoi chietera nde sui” ehi aracahe. ⁶ Evocoiyase aipo yahera Yar rese yande yeroyasa pipe:

“Che Yar che pítivii, ndasiquíyei chietera ava tēi sui oyapo potase mbahe cheu” yahera.

⁷ Peyemomahenduha pe reroguatasar rese, pēu Tūpa Ñehengagüer mombehusar rese avei. Pepihañemoñeta tupri secocuer rese, seco aprí rese avei; iTūpa reroya agüer rupi tupri avei peico.

⁸ Jesucristo recocuer noñecuñaroí vahe ité, yipisuive secoi apirēhi vahe. ⁹ Peyembopa ucai rene yembohesa co cotí tēi vahe upe. Aviye catu yayemomirata Tūpa poroaisusa rese

que mborocuaita tembihu resendar sui. Esepio, co nungar mbahe ndovireco ucai mbahe aviye vahe ohusar upe.

¹⁰ Yande rumo yareco ambuae ité Tūpa upe seropovēhepri. Ahe niha ndiyai eté pahi tūparo yipindar yuvirecoi vahe pendar yuvirohu. ¹¹ Supi eté judío pahi ivate catu vahe viroique mbahe ruvi tēi Tūpa rēta oī imaranehi catu vahe pipe seropovēhe ava angaipa rerocua āgua; ahe mbahe mimba rete rumo osapi tecua ivii yuvireco yepi. ¹² Ēgue ehi avei niha Jesúis iparaisu, omano tecua ivii ava reco mbocatupri āgua vuví pipe. ¹³ Ēgue yahe aveira yasora Jesúis upe yande paraisu āgua supi ava yande reroirosa pipe yaico. ¹⁴ Supi eté, co ivi pipe ndayarecoi eté tecua apirēhi vahe. Yande rumo yaseca evoco tecua oime vaherā yandeu curi. ¹⁵ Sese Jesúis rembiapo rese iyacatu yamboeteira apirēhi vaherā yande Yar Tūpa. Co imboeteisa inungar mbahe seropovēhepri arí rupi chupe. ¡Ēgue yahera imboetei yande ñehe pipe! ¹⁶ Peresarai eme catu ambuae ava upe mbahe tupri aposa sui. Iyavei pemondoño ité mbahe pereco vahe ambuae ava upe. Esepio, evoco nungar inungar mbahe seropovēhepri Tūpa upe. Ahe niha Tūpa oipota.

¹⁷ Pemboyeroya pe cuaisar, peyapo semimbotar. Esepio, ahe ndopituhui eté pe recocuer rāro yuvireco. Esepio, oicua Tūpa oicuara mbahe sembiapo rese chupe curi. Sese pemboyeroya catu ‘tayavai eme iporaviquisa chupe; tasorivete oporaviquisa rese yuvireco’ pe yapave. Pemboavaise rumo, nosei chietera mbahe aviye vahe ichui pe recocuer upe nara.

¹⁸ Peyerure Tūpa upe ore rese. Supi eté, ore oroyandu ité mbahe aviye vahe oroyapo ore pihañemoñeta pipe yepi. Esepio, oroyapo pota mbahe aviye vahe opacatu mbahe rese ava rembiepiave. ¹⁹ Che yevi pihaivi āgua rese ité aporandu pe yeruresa rese pēu Tūpa remimbotar rupi.

Mahenduhasa ipa vahe

²⁰ Tūpa mbahe tupri rerecosar, ahe niha ombogüerayevi vahe yande Yar Jesucristo yande rārosar ivate catu vahe, suvi pipe omboyecua güemimbotar piasu ndopai vahe imbou yandeu, ²¹ tombou pe reco mohivisa iyavei pe reco aviyesa opacatu pe semimbotar apo āgua; iyavei ahe toyapo mbahe opacatu güemimbotar yande rese Jesucristo rembiapo sui. ¡Ēgue tehi imboeteipri apirēhi tasecoi Cristo yepi!

²² Che rivreta, peñemosayo co che opomboaracua vahe rese, moviro tēi niha co ñehesa aicuacháa pēu. ²³ Aipota pe peicua yande rivri Timoteo imosesa soquendasa sui. Oyepota pihaivise, arasora cheyeupi che sose pe repia.

24 Pemombehu che mahenduha opacatu ava pe cuaisar
upe, opacatu ambuae Tūpa upendar ava upe avei. Ivi Italia
rupindar avei ombou omahenduhasa yuvireco pēu.

25 Aipo rupive, yande Ru Tūpa tape rovasa opacatu.

SANTIAGO REMBICUACHIA SANTIAGO

Mahenduhasa

¹ Che, Santiago, Tūpa, yande Yar Jesucristo rembiguai aico. Amondo che mahenduhasa doce yuvirecoi vahe Israel iguar opacatu ivi rupi oñemosai vahe upe.

Mbaecuasa ou vahe Tūpa sui

² Che rivireta, pevhareteñora peico acoi oimese tecoāhasa pēu yepi. ³ Esepia, peicua niha pe poreroyasa rese oimese mbahe tecoāhasa, ahe ipipe peyembohe pe ñemosa ãgua rese peico. ⁴ Peicoño ité pe reco ñemosasa pipe pe reco mohivi tupri catu ãgua. Evocoiyase nipane iri chira mbahe Tūpa suindar pēu.

⁵ Iyavei acoi ipanese que ava pe pāhu pendar upe yaracua ãgua, toporandu Tūpa upe. Evocoiyase ahe omboura chupe. Esepia, ahe opacatu upe mbahe ombou güecatēhiēhisa pipe iyavei ombahe mboasiēhisa pipe avei. ⁶ Iyacatu rumo evocoi ava oporandura Tūpa upe sese oyeroyá pipe, ndahei chira opīhañemoñeta rerova-rova tēisa pipe inungar acoi ivitu i ombohitu-hitu tēi vahe. ⁷ Acoi ēgue ehi-ehi tēi vahe ava ndoipisii chira mbahe yande Yar sui yuvireco. ⁸ Esepia, ñepei ari ipīhañemoñeta ñepei mbahe rese, ambuae ari ambuae rese. Ndoyemoviracuai güeco tupri ãgua rese yuvireco.

⁹ Iyavei que Jesús reroyasar seco mbegüe vahe toyemboviñareteño yepi Tūpa omboeco ivate ãgua rese. ¹⁰ Iyavei mbahe yar secoi vahe pe pāhuve, toyemboviha viteño Tūpa viroyise seco ivatesa sui. Esepia, mbahe yar yuvirecoi vahe inungar caha potri ēqüe ehi raimi tēi vahe yuvireco. ¹¹ Evocoiyase acoi ari osēse, sacú iteangase, ahese caha opa ipiru; ipotri avei opa ovíapi ichui iyavei iporañetesu opa ichui. Ēgue ehi aveira ava mbahe yar; omanora oporaviquisa sui.

Tecoāhasa, poroātoisa resendar

¹² Acoi ava oyemoviracua vahe poroātoisa upe oyemboviñara oico. Esepia, osasa tuperise evocoi poroātoisa, oipisira porerecosa, ahe tecovesa apirēhi vahe Tūpa ombou vahe guaisupar upe. ¹³ Acoi ava oyanduse poroātoisa oyeupe mbahe tēi apo ãgua, “Tūpa revo ēgue ehi cheu” ndehi chira. Esepia niha, Tūpa ãtoisar ndipoi eté mbahe tēi oyapo uca vaherā chupe. Iyavei ahe noñatoi avei mbahe tēi apo ãgua ava. ¹⁴ Co rumo ava opīhañemoñeta rai upe oñeatoi uca mbahe tēi apo ãgua yepi. ¹⁵ Güemimbotarai pipe evocoiyase oyapo angaipa. Ipare angaipa apo pipe sui ou manosa chupe.

¹⁶ Che rivireta, che rembiaisu, peyembopai rene. ¹⁷ Esepio, opacatu mbahe avíye vahe ahe Tūpa ombou vahe yandeu. Ahe niha opacatu íva rese mbahe aposar. Ndahei rumo güembiapo nungar secoi. Esepio, sembiapo oñecuñaro vahe. ¹⁸ Ahe rumo ombou ité tecovesa yandeu co ñehesa supi eté vahe pípe 'toyuvirecoi inungar yípindar mbahe miti ha seropovéhepri cheu opacatu che rembiapo sui' ohesave yandeu.

Tūpa rese yande pihañemoñetasa supi tupri vahe

¹⁹ Iyavei che rivireta, che rembiaisu, peyemomahenduha co che ñehe rese: peyapisaca tupri voira ambuae ava ñehe rese, mbegüe rupi rumo peñehera chupe iyavei ndapembahemboasi voi tēi chiaveira. ²⁰ Esepio, yambahemboasi voi tēise, ndayayapoi Tūpa remimbotar. ²¹ Evocoiyase peseya teco raisa, opacatu ambuae oime vahe mbahe naporai vahe pe pāhuve. Co catu pe yemominisave peroya catu vīte Tūpa ñehe omoingue vahe pe piha pípe. Ahe niha vireco píratasa pe písiro água.

²² Pe rumo pemboaviyera co pe mbohe vahe ñehesa; ndahei acoi pesenduño tēira. Esepio, pesenduño tēise, pe ae peyembopara. ²³ Supi eté acoi ava osenduño tēise Tūpa Ñehengagüer, ipare rumo ndovíroyai, ahe inungar acoi ava osepiáño tēi vahe vova yepiasa pipe. ²⁴ Ipare rumo oyepepise ichui, cüriteimi sesaraiño ichui. ²⁵ Acoi ndasesarai vahe ité rumo güemiendu sui iyavei oyapisaca tupri vahe co mborocuaita maranehi mbahe-mbahe tēi sui yande rerocua vahe rese iyavei oyemovíracuaño ité vahe oyapo vaherā iporocuaita, ahe oviharetera opacatu güembiapo tupri rese.

²⁶ Amove ava, "Che aguata tupri Tūpa rupi" ehi tēi. Ndoicuai rumo oñehe monguiriri água. Evocoiyase ahe ae oyembopa oico. Sembieroja evocoiyase ëgüe ehi tēi vahe. ²⁷ Yarecose rumo yande rembieroja icatupri, nimarai vahe yande Ru Tūpa rovai, ahese yaipítiviira co tiréhi, imer mano vahecuer avei iparaísusa rese. Iyavei ndayayapoi chira mbahe naporai vahe.

2

Ndayamboyoaviratii chira ava mboeteisa sereco

¹ Iyavei no, che rivireta, pe peroya vahe yande Yar Jesucristo seco porañete vahe peico, ndapeyeaisu yoavii chira. ²⁻³ Inungar-ra que ava mbahe yar oiquesse pe ñemonuhasave viña, ahe icuã penda oro vahe, iturucuar catupri ai vahe. Sese pehañeco tupri, "Eguapi co tenda avíye catu vahesave" peyera chupe. Ahe pípe avei co oiquesse pe pāhuve iparaísu vahe oturucuar cuacua vahe reseve, "Eipe peve nde epita,

anise eguapí i vive" aipo peyeñora co chupe viña. ⁴ Evocoiyase ēgue peyese, peyapo mbahe ndoyoyai vahe, naporai vahe pe pāhuve ae iyavei peyeapo ava poravosar nungar peico pe pihañemoñeta raisa pipe.

⁵ Che rīvireta, che rembiaisu, pesendu aipo ñehesa: Tūpa oiporavo ava iparaisu vahe co i vi pipe 'toyuvirecoi mbahe yar nungar che reroyasa rereco' oya, iyavei 'toipisi che remimombehuguer rupi che mborerecuasa oyeupe nara' oya-pave guaisupar upe. ⁶ Pe rumo seroñrosa pipe pemochī ava iparaisu vahe. ¿Ndahei vo mbahe yar mara-mara tēi pe rereco yuvireco yepi? Ahe niha pe mbotiriri mborerecuuar rovai pe reraso yuvireco yepi. ⁷ Ahe avei niha oñehe-ñehe tēi seroñrosa pipe yande Yar yaroya vahe rer imboyeroyapri rese yuvireco.

⁸ Supi eté yayapo mbahe aviye vahe yamboaviyese mborocuaita ivate catu vahe icuachiapri aipo ehi vahe: "Pesaisu ava pe yeaisu nungar" ehi vahe. ⁹ Acoi yayeaisu yoavirati tēise rumo, ahese yayapo angaipa, yayavi mborocuaita Tūpa rovai. ¹⁰ Esepia, acoi ava viroya vahe opacatu mborocuaita, ipare rumo oime que ñepei nomboaviye tuprī vahe, ahe oyavi opacatu mborocuaita. ¹¹ Esepia, Tūpa ité niha aipo ehi: "Ndapeyemboaguasai chira" ehi. Ahe avei aipo ehi: "Ndapeporoyucái chira no" ehi. Yepe acoi ndapeyemboaguasai chira viña, pe poroyuca pipe rumo, peyavi mborocuaita. ¹² Evocoiyase peñehe tuprīa iyavei peico tuprī aveira. Esepia, oporandura yande recocuer rese yande Yar oporocuaita pipe güeru vahe yande reco tuprī água. ¹³ Supi eté acoi ndoparaisuerecoi vahe ava, ahe chupe ndipoi chiaveira poroparaisuerecosa mborandusave. Oporoparaisuereco vahe rumo, ahe soriveté catura yuvireco ahe ari pipe mborandusave curi.

Yamboaviye itera mbahe; ndahei chira yande ñehe tēi

¹⁴ Che rīvireta, ¿aviyera pīha acoi ava, "Ayeroya yande Yar rese" ehi tēi vahe, ndoyapoise mbahe aviye vahe yuvireco? ¿Oicatura pīha ahe oñepisiro aipo ohe pipe tēi yuvireco? ¹⁵ Inungar-ra oimese que yande rīvri, anise yande reinndri upe ipanera iturucuarā, semihura ari yacatu rupindar viña. ¹⁶ Evocoiyase que pe aipo peyeñora chupe viña: "Aviye, eso tuprī eico. Eyeao eso sōhisaguer sui, ecaru tuprī" peyera. Ipare rumo ndapemondoise mbahe ipane vahe chupe, ¿aviyera pīha ava upe aipo yande he tēi viña? ¹⁷ Ēgue ehi avei, "Ayeroya yande Yar rese" yande hesa; ndayayaipoise rumo mbahe aviye vahe aipo yande hesa pipe, aipo yahe tēi yaico.

¹⁸ Aviyeteramo ava pe pāhu pendar aipo ehira cheu: "Nde ereyeroya yande Yar rese, che rumo ayapo mbahe tuprī" ehi. Che evocoiyase aipo ahera chupe: "Emboyecua ru

nde yeroysa mbahe nde rembiapoēhi pipe. Evocoiyase che amboyecuara che yeroysa oime vahe che rembiapo pipe ndeu” ahera. ¹⁹ Nde niha aipo, “Che aicua oime ñepei Tūpa” ere. Supi eté aipo ere. Co rumo caruguar avei oicua. Ichui osiquiyepave rumo ahe orírii eté yuvireco. ²⁰ ¡Mbia, tapeico eme ndayaracuai vahe! ¿Ereicua vo co nde mbahe apoēhisa nde yeroysa ēgue ehi tēi vahe? ²¹ Esepiá, Tūpa oipisi yande ramoi Abraham seco tuprisa pipe oicuavēhese porerecosa nungar guahir Isaac chupe aracahe. ²² Indó, Abraham yeroysa omboyecua ité güembiapo catupri reseve. Evocoiyase ēgue ehi ahe güembiapo tupri pipe omboaviye tupri oyeroyasa oico aracahe. ²³ Ēgue ehi yavíye icuachiapri aipo ehi vahe: “Abraham viroya ité Tūpa, evocoiyase, ‘Co seco catupri vahe’ ehi Tūpa ipisi” ehi. Ahese ava, “Abraham Tūpa mboripar ité” ehi yuvireco chupe.

²⁴ Indó, Tūpa, “Co seco catupri vahe” ehi ava upe sembiapo tupri repiase yepi, ndahei iyeroyasa rese güeraño. ²⁵ Ēgue ehi tupri avei cuña ndipiñai vahe Rahab upe. Esepiá, ahe omoingue ñuvirío ava ívi repiasar imondopri güëta pipe, ipare oñomi imondo ambuae peri rupi yamotarëhisar sui. Ipipe sui Tūpa oipisi inungar-ra seco ívi tupri vahe viña. ²⁶ Ēgue ehi yande rembiapo catupri ndayamboyecuaise yande yeroysa pipe, ahe inungar avei Espíritu ndasecoisse yande rese, yande yeroysa evocoiyase omano tēi eté oico.

3

Yande ñehe resendar

¹ Che rívireta, yipindar ndapeyeapoi chira setá etepri oporombohe vahe peyepāhuve. Esepiá, peicua niha yande oporombohe vahe yaicose, Tūpa oporandu catu itera ambuae ava sui yande porombohe agüer rese yandeu curi. ² Opacatu yande yayaví setá mbahe rese yepi. Oimese que ava ndoyavii vahe oñehe, ahe ava seco ívi tupri vahe. Iyavei oicua tupri opacatu güeco rereco tupri água. ³ Inungar acoi yamondose cavayu yuru penda sese seroguata água. Ahese opacatu cavayu retecuer yaicatu imboyahuva água. ⁴ Inungar tupri avei carite guasu, yepe tuvicha iyavei yepe ívitú omoañii opíratagüer pipe viña, serovasa rahimi pipe rumo seroguasar omohivi-hiviño seraso güemimbotar rupi. ⁵ Ēgue ehi avei yande ápecu, yepe chihimi tēi viña, ipipe rumo yayapo tēi mbahe tuvicha vahe ava upe. Inungar avei que tata chihimi vahe sui tēi yuvi guasu opa ocai. ⁶ Ēgue ehi yande ñehesa tata nungar. Iyavei yande ápecu pipe opacatu mbahe-mbahe tēi yamombehu. ¡Evocoi mbahe-mbahe tēi mombehusar yande resendar ité! Ahe amove ovireco mara

opacatu yande recocuer. Inungar tata ova-ova vahe mbahe rese. Evoco i yande ñehe tēisa caruguar suindar.⁷ Ava oicatu opacatu mbahe mimba nimasoi vahe mboaracua ãgua, vîrai, mboi iyavei mbahe îpi para guasu pipendar avei no.⁸ Ndipoi eté rumo que ava oipoepi vaherā oñeha. Yandeu ndiyai eté ipoepi ãgua. Yande ñehesa oporoyuca vahe nungar ité yepi, mbahe tēi eté.⁹ Co yande ãpecu pipe yamboetei yande Yar Tûpa, ipipe avei rumo yamomara ava, ahe ava rumo Tûpa oyapo onungar.¹⁰ Ëgüe ehi eté, yande ñehe pipe yamboetei Tûpa, ipipe avei yaroïro ava. Che rivireta, ndiyai evoco nungar mbahe yayapo yepi.¹¹ ¿Oicatura pîha osë ñepei i ohë vahe sui sêhe vahe, iro vahe avei viña?¹² ¿Ihara pîha higuera ivira rese aceituna viña? ¿Iyavei oicatura pîha uva hî rese oha higo viña no? ¡Aní, ndoicatui eté! Iyavei ndoicatui ñepei i ohë vahe sui osë i, sêhe vahe sêhe asi vahe reseve.

Mbahecusa supi eté vahe

¹³ Acoi oimese pe pâhuve yaracua vahe, oyapisaca vahe, tomboyecua catu güeco catuprisa, güeco mbegüesa avei ombahecua tuprisa pipe.¹⁴ Oimese rumo pe pihave pe poroamotarêhisa mbahe pota raisa pipe, iyavei peyeupe nara tēi mbahe peseca, ahese ndiyai peyembovîha tupri tēi ‘che yaracuá vahe aico’ pe yapave. Esepia, peremira tēira supi eté vahe mbahe rese.¹⁵ Ëgüe ehi eté evoco nungar aracuasa ndahei Tûpa suindar. Ahe rumo co ivi pipendar tēi vahe, ava pihañemoñeta sui tēi osë vahe iyavei caruguar suindar tēi avei.¹⁶ Esepia, poroamotarêhisa yande mbahe pota raisa pipe yarecose iyavei yaipotase mbahe yandeyeupe nara tēi, ichui osë ñehepoepisa iyavei opacatu mbahe tēi.¹⁷ Acoi vireco vahe rumo Tûpa suindar aracuasa, ahe vireco itera opacatu ava rovaque güeco maranehisa iyavei secoira güeco mbegüesa pipe. Ahe ndaseco asi chiaveira. Iyavei oyemoingatu voi vahe, ahe oporoparaísueroco vahe, nomboyoaviratii vahe güecocuer. Ahe ipihañemoñetasa ñepei reseve vahe iyavei oyapo tupri vahe mbahe.¹⁸ Iyavei acoi oseca vahe mbahe tupri yepi, oipisi itera opiha pipe teco ïvisa.

4

Co ivi pipendar mbahe raisusa

¹ ¿Que sui pîha ou vavasa iyavei ñehepoepi-episa pe pâhuve? Ahe ou pe mbahe pota raisa sui pereco vahe pe pihañemoñetasa pipe.² Pe peipota rai mbahe. Ipare rumo ndapeicatui sereco ãgua. Evocoiyase peporoyuca pe mbahe pota raisa pipe. Ndiyai eté rumo pêu sereco ãgua. Ipípe sui peyecoãha, pevava avei no. Ndapeyosui

eté rumo mbahe pe remimbotar. Esephia, ndapeporandui Tūpa upe.³ Acoi peporanduse rumo sese, ndapeipisii. Esephia, peporandu rai tēi, peipota pe yemboviha ãgua rese nara tēi.⁴ ¡Pe mbia, peyavi vahe pe recocuer! ¿Ndapeicuai vo acoi ava Tūpa cuaparēhi mboripar tēi yuvirecoi vahe, ahe Tūpa amotarēhimbar yuvirecoi? Ëgüe ehi eté acoi oipota vahe co ivi pipendar mbahe-mbahe tēi pipe güeco ãgua, ahe oyeapo Tūpa amotarēhimbar.⁵ Supi eté Tūpa Ñehengagüer aipo ehi: “Tūpa osaisu güecatēhisa pipe o Espíritu omondo vahe yande piha pipe” ehi.⁶ Ahe rumo yande pītvii catu oporoaisusa pipe. Esephia, icuachiapri aracahendar pipe aipo ehi: “Tūpa oyamotarēhi ava oyeecomboivate ai vahe. Oipītvii rumo seco mbegüe vahe saisusave” ehi.⁷ Sese pemboyeroya catu Tūpa. Peyemoviracua caruguar remimbotar apoēhi ãgua. Ahese ahe oyepepíra pe sui.⁸ Peyemboya Tūpa rese, ahe evocoiyase oyemboyara pe rese. Pe, angaipa viyar, ¡peñemoatiro mbahe peyapo vahe sui! ¡Iyavei pemoatiro pe pihañemoñetasa ñuvirío pereco vahe sui!⁹ ¡Tatasí pēu, tapeyaseho, perorivete iri eme, pemboasi pe angaipa pe yemboviharēhisave!¹⁰ Peñenopīha Yar rovai imboyeroyasa pipe. Ahe evocoiyase pe reco mboivatera.

Peroíro eme pe mboetasá

¹¹ Che rivireta, aní chira peñehe mara peyeupe. Acoi oñehe rai vahe iyavei viroíro vahe ambuae Jesús reroyasar, ahe oñehe rai tēi aveira mborocuaita rese seroírosave. Ëgüe peyese, evocoiyase seroyaéhisa pipe peyemboivate catura mborocuaita sui viña.¹² Oime rumo ñepeño ité ombou vahe mborocuaita yandeu iyavei oporandu vahe yande recocuer rese. Ahe güeraño avei oicatu oporopísiro iyavei oporomocañi ãgua no. Evocoiyase pe, ¡ndiyai pe cotindar reroíro ãgua pēu!

Ndayaicuai mbahe oime vaherā yande ayihive

¹³ Pesendu pe aipo peye vahe: “Cûritei, anise ayihive yasora que tecuave, anise que tecua guasuve revo. Aheve yaicora ñepei aravíter yande poravíqui ãgua. Ahese yamogana catura guareepochi” aipo peye vahe.¹⁴ ¡Ndapeicuai rumo mbahe oime vaherā pēu ayihive! ¿Mara ehi pīha yande recocuer? Ahe inungar ïvichi oyecua raimi tēi vahe, ipare opaño ocañi.¹⁵ Iyacatu aipo peyera viña: “Oipotase yande Yar yande reco ãgua, yayapora co nungar mbahe, que ambuae mbahe” peyera yepi.¹⁶ Pe rumo peñeheño pe yemboivate aisa pipe mbahe pe rembiaporã rese. Opacatu evocoi nungar mbahe rumo

naporai. ¹⁷ Esepio, acoi oicua vahe mbahe tupri apo āgua, ipare rumo ndoyapoi eté, ahe oyapo angaipa.

5

Imbahe eta vahe paraísusa resendar

¹ ¡Pe mbahe yar, pesendu co: peyaseho iyavei perāse! Esepio, peiporarara mbahe tēi peico. ² Opacatu pe mbahe eta ocañi tēi vaherā. Esepio, pe mbahe pe reco ati vahe opa ituyu. Iyavei pe turucuar yayi vahe opa avei ohu sasoi. ³ Pe oro, pe guarepochi opa oPOCHI ati-atí no. Ahe niha pe recoāha āgua, omboycua vahe mbahe tēi pēu. Iyavei pe mbahe pota raisa ndoyavii pe roho ocai vahe vireco. Esepio, pemonuha guasu tēi mbahe pereco ati vahe sereco co ari ipa vahe pipe. ⁴ Peyapisaca, acoi oipoho vahe mbahe pēu nara yuvireco, chupe ndapemboepii eté. Sese sásé tēi yuvireco. Ahe rumo yande Yar ipíratá vahe, ivate catu vahe oicua. ⁵ Co ivi pipe tēi pe peyecomodiyai peico iyavei peyemboviha co ivi pipendar mbahe rese inungar guaca imonguirapri yuca āgua. Ipípe peyemoingatu pe cañi āgua. ⁶ Pe ñehe pipe pemombaraisu ava ndoyapoi vahe mbahe yuvireco; yepe, “Mara” ndehi yuvireco pēu viña, pe rumo peyucaño.

Ñemosasa iyavei yeroquisa resendar

⁷ Che rivireta, peñemosano yande Yar yevi iri āgua rese. Inungar ava omaheti vahe osāro rane güemiti poho āgua. Esepio, ahe osāro yipindar oqui vahe iyavei ipa oqui vahe mbahe miti aviyé āgua. ⁸ Pe avei peñemosano, peyemongueréhi catu. Esepio, cōimi eté yande Yar yevi āgua cute.

⁹ Iyavei che rivireta, peñemoiroi rene peyeupe. Evocoiyase Tūpa ndoporandui chira co mbahe rese pēu. Esepio, mborerecuar guasu iva pendar oyemoingatu voi ohā yandeu porandu āgua. ¹⁰ Che rivireta, peico catu inungar Tūpa ñehe mombehusar aracahendar yuvirecoi vahe. Ahe oñemosano mbahe rasicuer upe yande Yar rer pipe oñehe āgua yuvireco. ¹¹ Yande rumo yaicua sovasaprí ava oñemosano vahe mbahe rasicuer upe yuvireco. Pesendu niha pe acoi mbia Job serer vahe ñemosasa. Ipare peicua avei mbahe aviyé vahe yande Yar oyapo chupe. Yande Yar niha oporoparaisuereco vahe.

¹² Che rivireta, peyapisaca tupri catu co che ñehe rese. Pe ñehe āgua ndapeiporui chietera que iva rer iyavei que ambuae mbahe pe ñehe reroya uca āgua. Iyacatu rumo, “Supi eté” peyese, supiño itera; “Aní” peyese, aní chiño itera Tūpa poronupasa pisiéhi āgua.

¹³ Aviyeteramo que pe pāhu pendar iparaísura oico; toyeroqui. Aviyeteramo oimera que sorivete vahe oico;

ahe tosapucái Túpa upe.¹⁴ Aviyeteramo que ava imbaheasira oico, toñehe evocoiyase Jesús reroyasar rārosar upe. Ahe tomondo aceite yande Yar rer pipe yuvireco sese. Ipare toviroyeroqui yuvireco.¹⁵ Acoi oyeroquise oyeroyasa pipe sese yuvireco, imbaheasi vahe evocoiyase ocuerara; yande Yar avei omopuhara. Acoi angaipa virecose, oime aveira ñerosa chupe.¹⁶ Sese pemombehu pe angaipa peyeupe, peyeroqui avei peyese pe yembogüera tupri uca ãgua. Ava aviyé vahe oyeroquise oquerëhisave opacatu güecocuer pipe, ahe iyeroquisa ipíratá ité.¹⁷ Acoi Túpa ñehe mombehusar Elías yande nungar avei. Ahe oporandu oyeroquisa pipe Túpa upe, “Toqui eme” ehi. Aipo ehise, ndoquii eté ivi harive mbosapi araviter imombitesa rupi.¹⁸ Ipare oyeroqui iri, ahese oqui iyavei mbahe miti iha iri.

¹⁴ Che rivireta, acoi oimese oyahuva vahe supi eté vahe sui pe pâhuve, ipare ambuae viroyevise Jesús upe,²⁰ tapeicua pe acoi viroyevi vahe angaipa viyar secocueraí sui, oipisiro ihã imano râgürer sui. Iyavei omoime ñerosa tuvichá vahe yangaipa upe. Aipo rupive.

PEDRO REMBICUACHIA YIPINDAR VAHE SAN PEDRO

Pedro mahenduhasa Jesús reroyasar opacatu rupi oñemosai vahe upe

¹ Che, Pedro, Jesucristo apóstol aicuachía co che ñehe pēu, pe Tūpa rembiporavo pe recua pípe sui peñemosai vahe iví Ponto, Galacia, Capadocia, Asia iyavei Bitinia rupi peico vahe upe. ² Supi eté pe yande Ru Tūpa rembiporavo yipisuive peico semimbotar rupi. Evocoiyase oEspíritu Santo pipe pe peha oyeupe nara viroyasar pe reco água ‘imoatiropri toyuvirecoi che Rahir ruví pipe oangaipagüer sui’ oya. Peipisi catu Tūpa porovasasa pe reco tupri água.

Tūpa suindar mbahe aviye vahe rārosa

³ ¡Imboeteipri tasecoi Tūpa, yande Yar Jesucristo Ru! Ahe niha oporoparaísuecasa pipe yande recocuer mbopiasu. Ëgüe ehi yandeu Guahir Jesucristo ocuerayevise. Ipípe sui yaicuaño ité oimera mbahe aviye vahe Tūpa suindar yandeu. ⁴ Ipípe sui avei Tūpa oipisi ucara pēu pe mombahesa ivave yapocatupri nocañii vaherā, ndituyui vaherā iyavei ndopai vaherā ité. ⁵ Pe peyeroya ité Tūpa rese. Sese niha ahe opíratasa pipe pe repi mbahe tēi sui poropísirosa pe reco água. Ahe vireco vahe imoingatupri ari ipa vahe mboyecua água pēu.

⁶ Co rese peyembovhareteño peico, yepe cüritei pe reco pipe peparaísu pucu raimi tēi setá pe recoáhasa pipe peico viña. ⁷ Esepia, pe yeroyasa Tūpa rese aviye oro, ahe sähasa tata pipe yepi. Ëgüe ehi aveira pe recocuer sähambri tata nungar mbahe yavai vahe pipe, “¿Aviye vahe ité pīha?” hesave. Yañemosase evocoi mbahe yavai vahe upe, ahese yande yeroyasa aviye catura oro ocañi tēi vaherā sui. Ëgüe yahese, “Che rese pe yeroyasa aviye ité” ehira yande Yar yandeu. Ahese yarecora teco porañetesa iyavei imboeteipri yaicora acoi Jesucristo oyevise curi.

⁸ Pe niha pesaisu yande Yar Jesucristo, yepe ndapesepiai viña; cüritei rumo sepiaëhi pipe peyeroya sese. Sese pereco ité pe viharetesa tuvichá, aviye catu vahe, ndapeicatui vahe ahe imombehu. ⁹ Esepia niha, pesupiti pe remiaro poropísirosa apírëhi vahe peico pe yeroyasa pipe.

¹⁰ Aracahe suive ava Tūpa ñehe mombehusar oicua tupri pota ité co poropísirosa resendar yuvireco ‘¿mara ehi eté pīha co tecocuer?’ oyapave yuvireco. Iyavei oñemoñeta yuvireco Tūpa oporoaisusa pipe pēu mbahe ombou vaherā

rese. ¹¹ Cristo Espíritu senondeve oicua uca mbahe Tūpa ñehe mombehusar upe aipo ehi: “Poropísiosar oyemombaraisu ranera, ipare rumo teco orisa porañete vahe oimera” ehi chupe aracahe. Sese, “¿Umara pīha evocoí mbia?” ehi; “¿Mbahesera vo oimera co Espíritu remimombehu yandeu?” ehi yuvireco. ¹² Tūpa rumo omboynecua chupe, ndahei chupe nara ité imombehupri yuvireco, pēu nara ité rumo. Ahe avei niha poropísiosa resendar ñehesa mombehusar omombehu pēu cūritei, Espíritu Santo píratasa pipe imboupri iva pendar yandeu. ¡Tūpa rembiguai avei oicua tupri pota tēi cūritei yuvireco viña!

Tūpa yande poravo yande reco maranehi ãgua

¹³ Sese pe pīhañemoñeta tuprisa pipe pemahemoha tuprira peyese Tūpa porovasasa pēu ombou vaherā rese pe yeroya catu ãgua acoi Jesucristo oyevise curi. ¹⁴ Tahir iporeroya vahe pe recosa pipe ndapeicoi chira mbahe pe remimbotarai pipe, acoi pereco vahecuer peyese Tūpa recocuer cuáhi viteseve. ¹⁵ Peicora rumo pe reco maranehisa pipe ité. Esepi, Tūpa pe poravo oyeupe nara; ahe ndaseco marai vahe ité. ¹⁶ Supi eté icuachiapri aracahendar pipe aipo ehi imombehu: “Pe tapeico seco maranehi vahe. Esepi, che ndaseco marai vahe aico” ehi.

¹⁷ Tūpa niha opacatu ava upe secocuer rese nomboyoavirati chira oporandu curi, sese pe, “Che Ru” peye vahe chupe peyembosiquiyera mbahe tēi apoëhi ãgua imboeteisave co ivi pipe peico vitese. ¹⁸ Esepi, Tūpa pe písiro aracahendar pe ramoi suindar aracuasa ëgue ehi tēi vahe sui. Peicua tupri ité niha co poropísiosa reprí nimboepisai eté que mbahe ocañi tēi vaherā pipe inungar oro, anise guarepochira viña. ¹⁹ Imboepisa rumo Cristo ruvi maranehi pipe. Ahe seropovëhepri, inungar ovesa nimarai vahe. ²⁰ Ahe Tūpa oiporavo aracahe ivi, iva apoëhi viteseve ëgue ehi vaherā. Cūritei rumo oyemboynecua pēu mbahe tupri ãgua. ²¹ Secocuer sui niha peroya Tūpa peico, ahe ombogüerayevi vahe omano vahe pâhu sui, ipare omondo oyemboeteisa, güeco porañetesa avei chupe. Ipípe sui peyeroya Tūpa rese iyavei pesäro co mbahe aviye vahe pisi ãgua ichui.

²² Cūritei Tūpa Ñehengagüer supi tupri vahe mbooyeroyasa pipe imoatirosa pe recocuer pesaisu vaherā ambuae Jesús reroyasareta. Evocoiyase ëgue peyera peyeaisu catu opacatu pe pīhañemoñeta tuprisa pipe, iyavei opacatu pe píratasa pipe. ²³ Pe niha pereco tecovesa piasu, ndahei pe yesupa omano tēi vahe suindar. Ahe rumo Tūpa Ñehengagüer supi tupri apirëhi

vahe reroya pipe. ²⁴ Esepiá, icuachiapri aracahendar pipe aipo ehi:

“Opacatu ava inungar caha, iyemboeteisa evocoiyase inungar ipotri.

Ipare ahe caha opa omano, ipotri avei opa ovíapi;

²⁵ Túpa Ñehengagüer rumo apírehí vaherā ité yepi” ehi.

Ahe co ñehesa imombehupri poropísirosa resendar pēu nara.

2

¹ Sese peseya opacatu mbahe naporai vahe; opacatu porombopasa tēi, pe reco tupri angahu tēisa, ambuae ava mbahe pota raisa, iyavei opacatu mahechiroi resendar.
² Inungar pítanimi ocuacua água oipota cambi; ñgue peye aveira pe queréhisa pipe Túpa Ñehengagüer rese pe yembohe catu iri água, peico tupri água poropísirosa pipe,³ que peicua itese yande Yar reco aviyesa.

Cristo inungar ita ndopai vahe

⁴ Peyemboya catu yande Yar rese. Ahe inungar ita ndopai vahe. Ava rumo oviroño yuvireco. Túpa rumo ahe ita oiporavo aviyе catu vahe. ⁵ Ñgue ehira pe rereco oyeupe inungar ita ndopai vahe; ipipe sui omopuhara otúparoguã pe rese. Iyavei pahi ndaseco marai vahe nungar peicora semimbotar rupi chupe. Pe evocoiyase Jesucristo rembiapo pipe sui peyapora Espíritu upendar mbahe aviyе vahe. Ahe inungar mbahe seropovéhepri aviyе vahe Túpa upe. ⁶ Esepiá, icuachiapri aracahendar pipe aipo ehi:

“Che amondo ñepei ita nungar ava aviyе vahe tecua Sión ve imoviracula água.

Ahe che rembiporavo iporañete vahe, imboeteipri.

Acoi oyerooyá vahe sese, ahe nochí chietera ichui” ehi.

⁷ Pe seroyasar peico vahe upe evocoit ahi aviyе vahe ité. Seroyasaréhi upe rumo imboaviyesa co ñehesa aipo ehi vahe: “Oí aposar rumo viroño co ita yuvireco.

Ahe ita rumo coiye víracuasa aviyе catu vahe”

ehi. ⁸ Iyavei omboaviye aipo ñehesa:

“Co ita oipihapi oiti uca ava” ehi. Esepiá, Túpa suindar ñehesa reroyaéhi pipe sui oyemondo uca mbahe tēi pipe yuvireco. Ñgue ehi vaherā ité rumo ahe secocuer yuvireco.

⁹ Pe rumo ava oyesuindar nungar iporavopri peico Túpa uve nara, imborerecuasa upendar pahi, iyavei chupendar ava seco maranehi vahe peico. Ñgue peye Túpa reco píratasa mombehu água peico. Esepiá, ahe pe renose pítumimbisa nungar pe recocuerai sui tesapessa aviyе vahe pipe pe reique

água. ¹⁰ Yipindar ndahe vitei eté Tūpa upendar ava peico, cūritei rumo ahe ité peico; yipindar ndaperecoi Tūpa poroparaisuerecosa, cūritei rumo pereco ité cute.

Peico catu Tūpa mboetei água

¹¹ Che rívireta, che rembiaisu, peico raimi tēi vahe co ivi pipe, pepoi opacatu co ivi pipendar pe pihañemoñeta raisa sui. Esepio, pemomara uca tēi pe recocuer ipipe. ¹² Pereco tupri pe recocuer aviye vahe ava Tūpa ndoicua vitei vahe rovaque. Yepe ava remieroíro peico inungar-ra mbahe tēi aposar viña, osepiase rumo pe rembiapo catupri, omboeteira Tūpa yuvireco ahe ari pipe acoi yande Yar oporanduse opacatu ava recocuer rese curi.

¹³ Yande Yar raisusa pipe pemboyeroya opacatu pe rerecuar co ivi pipe: que mborerecuar guasu ivate catu vahe, ¹⁴ anise yivirindar. Ahe pe recua pipendar rārosar imondopri ava naporai vahe mombaraisu água, iyavei ava seco catupri vahe upe, “Aviye nde recocuer” he água. ¹⁵ Esepio, Tūpa oipota pe peyapora mbahe aviye vahe ava mbahe ndoicuai vahe upe, ndayaracuai vahe upe pe rese iñehe-ñehe tēiñehi água.

¹⁶ Peico tupri ava rovaque mbiguai tēi nungar sui senosepri pe recosa pipe. Ndiyai rumo ipipe peyapo iri mbahe tēi. Peico tuprira rumo Tūpa rembiguai pe recosa pipe. ¹⁷ Pemboeteira opacatu ava. Pesaisu catu pe rívireta Jesús reroyasar; pemboetei Tūpa; pemboyeroya avei mborerecuar guasu.

Yembohesa yande Yar Jesucristo mombaraisu agüer resendar

¹⁸ Pe, ava rembiguai, pemboyeroya catu pe rerecuar imboeteisa pipe que seco catupri vahe, que ndaseco pōrai vahe avei. ¹⁹ Esepio, aviye catu yañemosase mbahe-mbahe tēi ava rembiapo upe Tūpa mboyeroya tuprisa pipe. ²⁰ Mbahe tēi aposa pipe rumo pe mombaraisuse yuvireco, ndipoi eté evocoiyasse ichui mbahe aviye vahe peñemosase evocoí nun gar mbahe upe. Co rumo acoi mbahe tupri aposa pipe pe mombaraisuse yuvireco, ipare peñemosase chupe, ahe rumo aviye catu itera Tūpa upe. ²¹ Pe paraisu água rese niha Tūpa pe poravo. Esepio, Cristo oyemombaraisu pe recocuer rese. Ahe rane ñgue ehi pe rese pe secocuer moña água. ²² Ahe ndoyapoi vahe ité angaipa iyavei ndoporombopai vahe ité. ²³ Acoi ava iñehe mara-mara tēise yuvireco chupe, nomboyevii eté iñehe raisa. Iyavei acoi omombaraisuse yuvireco, “Ayepira sese” ndehi eté. Ahe rumo, “Che Ru Tūpa seco ivi vahe oicuara chupe yuvireco” ehiño oyeupe mbahe-mbahe tēi aposar upe. ²⁴ Cristo teieté viraso yande angaipagüer güete pipe curusu rese ‘toyepepi’ angaipa sui yuvireco. Ipipe sui toyuvirecoi

teco ūvisave' oyapave yandeu. Ahe niha yapichapri secoi pe recocuer moingatu āgua.²⁵ Esepio, pe niha yipindar inungar ovesa ocañi tēi vahe peico viña. Cūritei rumo peyevi Cristo upe. Ahe pe recocuer osāro cūritei inungar ovesa rārosar.

3

¿Mara ehira ava omenda vahe recocuer yuvireco?

¹⁻² Êgue peye aveira cuña, pemboyeroya itera pe mer. Esepio, amove ndoviroya vītei Tūpa Ņehengagüer yuvireco; pemboyecuase rumo pe reco tuprisa imboeteisa avei chupe, aviyeteramo ahe avei viroyara, yepe ndapeñehi chira chupe viña. ³ Acói pemboyecua potase pe yemoporañetesa ndahei chira pe rete rese inungar oāca rese mbahe omoporañete ai vahe, ndahei chiaveira pe yemondesa sendi yai vahe oro nungar, que turucuar porañete catu vahe. ⁴ Iya rumo pe avíter pipe sui mbahe porañete ipocopi vahe pemboyecua pe reco mbegüemisa iyavei pe recoasiéhisa pipe. Evoco nungar avíye catu ité Tūpa rovaque. ⁵ Êgue ehi avei cuña seco catupri vahe güeco porañetesá imboyecua aracahe. Ahe oyeroya Tūpa rese yuvireco, omer avei omboyeroya yuvireco. ⁶ Inungar Sara aracahe, omboyeroya ité omer Abraham, "Che yar" ehi chupe. Pe inungar ichuindar peico peyapose mbahe avíye vahe pe siquiyéehisa pipe.

⁷ Iyavei pe imer, pereco mbegüera pe rembireco upe. Pemboeteira sereco. Esepio, ahe nipiñata tupri, iyavei Tūpa omboura güeco tuprisa pipe tecovesa apiréhi vahe oyoya voi pēu. Êgue peyese, Tūpa osendu itera pe yeruresa.

Paraisusa mbahe tupri aposa rese

⁸ Iyavei na peyera pe opacatu peyese inungar ūnei oñemu vahe. Oyoya tupri mbahe tapeyandu. Peyeaísu catura Jesús reroyasar pe recosa pipe. Peyemboavara oyeupe pe reco mbegüesa pipe. ⁹ Oyapose ava que mbahe tēi pēu, anise que oñeha raise, ndapemboyevi chira chupe. Iyacatu rumo mbahe tuprisa pipe pemboyevira chupe. Evoco nungar mbahe apo āgua niha Tūpa pe poravo 'toipisi che porovasasa' oyapave.¹⁰ Esepio,

"Peipotase pe recocuer aviye tupri āgua pe yembovharetesa pipe, pemombítuhu pe ūnei raisa iyavei ndapeporom-bopai chira.

¹¹ Pepoi aveira mbahe tēi sui, pesecara mbahe avíye vahe.

Peseca teco tuprisa peyeupe nara, peguata supi.

¹² Esepio, supi eté, yande Yar osāro ava seco catupri vahe iyavei osendu oyeupe yeruresa.

Ava mbahe tēi aposar rumo ndoipisii eté" ehi.

¹³ Ndipoi chira revo que ava mbahe tēi oyapo vahe pe recocuer upe yuvireco, pequerēhise mbahe aviye vahe apo. ¹⁴ Peparaisuse rumo mbahe pe rembiapo aviye vahesa rese, ¡sovasaprí peico! Peyembosiquiyei rene que ava sui. ¹⁵ Pemboeteñora rumo Cristo pe Yar secosa rese pe piha pipe. Peyemoingatu voira ava pe remiaro rese oporanduse pēu pe querēhisa pipe imombehu tuprī água. ¹⁶ Ëgüe peyera rumo pe reco mbegüesa pipe imboeteisave. Peico tuprīa pe pihañemoñeta tuprī rereco. Acoi que oñeho rai vahe pe Cristo reroyasa recocuer rese, ahe yuvinochira oñeho sui curi.

¹⁷ Tūpa oipotase pe yemombaraisu, aviye catu mbahe aviye vahe apo pipe yepi mbahe tēi apo rāgüler sui. ¹⁸ Esepi niha, Cristo teiteté omano yande angaipa repirā ñepei reseve. Güeco maranehī pipe ëgüe ehi ava recocuerai rese opacatu pe reraso água Vu Tūpa upe. Ahe omano güete rese. Ipare rumo ocuerayevi güeco espíritu pipe. ¹⁹ Güeco espíritu pipe avei oso, omombehu Vu Tūpa remimbotar ava hā soquendapri yuvirecoi vahe upe. ²⁰ Ahe ava Noé recosendar ndiporeroyai vahe yuvireco aracahe. Tūpa osāro güeco mbegüesa pipe secocuer moingatu água viña Noé oyapo viteseve arca oico. Ahe ipipe oñepisiro ochomi tēi yuvireco amarusu sui. ²¹ Ahe i osāhangapo i poroāpiramosa, ahe omboyecua yande ipisiropri yande recosa. Poroāpiramosa rumo i pipe ndahei yande rete moatiro água. Co rumo yaporandura Tūpa upe, yande pihañemoñetasa moatiro água. Ipipre sui evocoiyase yañepisirora yande Yar Jesucristo cuerayevisa pipe. ²² Ahe oso ivave oguapi oī Vu acato coti. Opacatu sembiguai eta, mborerecuareta, opacatu imborerecuasa ipírata vahe avei ipovri pendar yuvirecoi.

4

Yandehañeco yandeyese mbahecuaasa Tūpa suindar yaipisi vahe pipe

¹ Cristo oiporara mbahe rasicuer güete rese. Pe avei evocoiyase peyemoingatu voi ëgüe peye vaherā peico chupe nara. Esepi, acoi ava oyemomborara vahe güete pipe oseya angaipa yuvireco. ² Ipipre sui ndoyuvireco iri chira ari rupi ava tēi pihañemoñetasa pipe. Tūpa remimbotar rupi eté rumo oyapo pota mbahe co ivi pipe yuvirecoi vitese. ³ Ëgüe peye pucu rane niha pe rembiapo ai pipe peico ava Tūpa reroyasarehī recocuer nungar rupi tuprī. Ahese mbahe-mbahe tēi peyapo pe pihañemoñeta raisa pipe, savaiposa, pietasave pe rāse tēi pipe pe aracuasa pemocañi pe ihu tēisa pipe, pemboetei avei mbahe rahanga tēi peico. ⁴ Cūritei rumo pe mboriparer, ndoyemboviñai tēi pe rese, ndapeico irise

supi semimbotarai apo âgua. Ahe oñehe-ñehe tēi yuvireco pe recocuer piasu rese. ⁵ Ahe chupe rumo oimera porandusa. Esepia, yande Yar oyemoingatu opacatu ava recocuer rese oporandu âgua omano vahe upe, oicove vite vahe upe avei curi. ⁶ Sese niha co ñehesa písirosa resendar imombehusa ava omano vahe upe. Yepe omano co ivi pipe inungar opacatu ambuae ava oangaipa repirā, iespíritu rumo yuvirecoi apirēhi inungar Tūpa.

⁷ Virovi rumo ari ipa vahe oico, sese pe yapisacasa pipe pepihañemoñeta tupri iyavei peyerure catuño ité pe yeroya tuprisa pipe. ⁸ Co catu opacatu tupri ité peyeaisura pe piha pipe. Esepia, ëgue yahera poroaisusa pipe yande ñero voira seta ava yangaipa vahe upe. ⁹ Peipisi tupri ava yuviraso vahe pe rētave; “¿Mbahe rese piha co ou?” peyei rene pe pihañemoñeta pipe pe piri ou vahe upe. ¹⁰ Ñepei-pei yande yaiporura Tūpa suindar mbahecuaña yareco vahe ambuae Jesú reroyasar rese hañeco tupri âgua. Yaiporu tuprira co Tūpa porovasasa setá vahe yande cuaita mboaviye tupri âgua. ¹¹ Acoi pemombehuse Tūpa suindar mbahe, pemombehura inungar iñehe ité; acoi peporopítivi potase, peyapoño opíratasa pēu Tūpa ombou vahe pipe. Opacatu mbahe peyapo vahe peyapo ‘tomboetei ava yuvireco Tūpa yande Yar Jesucristo rembiapo pipe sui’ pe hesa pipe. Esepia, chupendar ité imboeteisa iyavei imborerecuasa. Ëgue tehi apirēhi vaherā ité.

Yemombaraisusa Cristo reroyasar yande recosa pipe

¹² Che rivireta, che rembiaisu, ndapeyesapiha ucai chira, acoi oimese mbahe-mbahe tēi yande recoâhasa pēu ‘ndoyavii, ndipoi chietera evoco nungar mbahe cheu viña’ pe hesa pipe. ¹³ Yayembovihareteñora rumo ipipe. Esepia, yande rereco yande Yar yemombaraisu agüer nungar pipe yuvireco. Evocoiyase yayemboviharete itera acoi yande Yar oyevise güeco píratasa pipe. ¹⁴ Iñehe marase yuvireco pēu Cristo reroyasar pe recosa rese, sovasapri peico. Esepia, Tūpa Espíritu güeco porañetesu pipe secoi eté pe rese. ¹⁵ Acoi pe pāhu pendar omombaraisuse yuvireco, ndahei chira rumo iporapichisa rese, ndahei chiaveira imondasa sui, que mbahe tēi aposta rese. Ndahei chiaveira que ambuae ava mbahe rese iñemañeco téisa sui ëgue ehira serecosa. ¹⁶ Co rumo acoi peparaisuse Cristo reroyasar pe recosa pipe, ndapechí chietera. Pesapucaira rumo Tūpa upe imboeteisa pipe serer pereco vahe rese.

¹⁷ Esepia, oyepota ité ari Jesú reroyasar upe rane ité tecocuer rese porandu âgua. Ëgue ehise yandeu, mbahe tēi

catu itera Jesús reroyasaréhi upe. ¹⁸ Yavaise seco catupri vahe upe iñepisiro ãgua, ¿mara ehira píha ava ndaseco põrai vahe ava angaipa viyar yuvirecoi vahe upe? ¹⁹ Sese peyemombo-rarase Túpa remimbotar rupi, iyacatu peguataño itera mbahe aviye vahe pipe. Iyavei peyemondo itera yande Aposar upe ahe pe hã rãro ãgua. Esepiá, ahe niha yeroyasa ité secoi.

5

Aracuasa Jesú斯 reroyasar upe

¹ Che amboaracua pota pe pãhu pendar Jesús reroyasar rãrosar. Inungar avei niha che aico iyavei asepia vahe ité yande Yar mombaraisu agüer. Inungar ahe vireco teco orisa, ñgue ahe aveira acoi yande Yar oyevise curi. ² Pesãro tupri catu Túpa upendar ava eta pe remiaro co omondo vahe pẽu inungar ovesa rese yangarecuar osãro tupri vahe ovesa; peyapora pe queréhisa pipe ité. Ahe niha Túpa oipota, ndahei ambuae yande cuaisa pipe tãi, ndahei avei guarepochi pota raisave yayapo. Yayapora rumo mboraviqu yande queréhisa pipe ité. ³ Ndapeicoi chira pe remiaro upe inungar que mborerecuar güeco ivatesa pipe oporocuai pírata vahe. Pemboyecuara rumo pe recocuer aviye vahe chupe imbohesa tupri pipe. ⁴ Evocoiyase acoi oyevise yande Yar, yande rãrosar ivate catu vahe, ahese peipisira mbahe porerecosa, teco ori porañete apiréhi vahe.

⁵ Iyavei no pe mbia chihivahe, pemboyeroyara ava pe rãrosar peico. Iyavei opacatu peyemboyeroyara pe reco mbegüesa pipe peyeupe peico. Esepiá,

“Túpa ava oyeecomboivate ai vahe amotaréhimbar secoi; ava seco mbegüemi vahe upe rumo ombou oporovassasa” ehi.

⁶ Peyecomombegüe catu peico Túpa píratasa povrîve. Evocoiyase pe reco mboivatera curi. ⁷ Opacatu mbahe rese pe píhañemoñeta atisa pemombehura Túpa upe. Esepiá, ahe pe rãrosar ité secoi.

⁸ Pearacua cañii rene peyesui, pemahemoha ari rupi peyese. Esepiá, pe amotaréhimbar Caruguar pe reco momara pota yepi inungar yaguar oñaro vahe oguata tãi oporoeca ‘tamomara ava’ oyapave. ⁹ Sese peyemoviracuara Túpa rese pe yeroyasa pipe Caruguar upe. Esepiá, peicua niha opacatu rupi avei yande rivireta Túpa rese yuvirecoi vahe iparaísco nun gar mbahe pipe. ¹⁰ Peparaísumi pare rumo, Túpa teieté pe reco mohivi tuprira, iyavei pe reco moviracuara, pe momirata aveira pe yepepi iriêhi ãgua ichui. Ahe niha oporovassasa pipe yande poravo oyeupe nara, yande yaso vaherã supi teco ori ndopai vahesave yande Yar rese yande

recosa pipe. ¹¹ Êgüe tehi tasecoi güeco píratasa apírëhi vahe pipe.

Mahenduhasa ipa vahe

¹² Yande rívrí Silvano omboaviye tupri vahe ité ocuaita yepi, ahe che pítiisa pipe co ayapo imondo che rembicuachía ndipucuimi vahe pe mboaracua catu água 'ipiye toicua tupri catu yuvireco co porovasasa oipisi vahe, supi eté omboyecua vahe Túpa poroaisusa' che hesave. ¡Peyemoviracua tupri ité sese!

¹³ Iyavei Babilonia pendar Jesús reroyasar yuvirecoi vahe oyoya vahe pe rese iporavopri, ahe ombou omahenduhasa yuvireco pěu. Marcos, che rahir nungar avei imahenduha pe rese. ¹⁴ Peyeovaupite "avirave" apo pe yeaisusa pipe.

Tapereco tecocuer tupri yande Yar Jesucristo rese peico vahe. Aipo rupive.

IMOÑUVIRIOSA PEDRO REMBICUACHIA SAN PEDRO

Pedro mahenduhasa Jesús reroyasar upe

¹ Che, Simón Pedro, apóstol, Jesucristo rembiguai aico. Co aicuachía che ñehe pēu nara, pe peipisi vahe yande Yar rese pe yeroyasa aviye vahe inungar ore. Esepia, yande Yar Tūpa, yande Písicosar Jesucristo seco ñvi vahe yuvirecoi. ² Tapeipisi catu porovasasa iyavei teco tuprisa Tūpa, yande Yar Jesús cua tupri pipe.

Jesús reroyasar recocuer

³ Tūpa ombou güeco pírata pipe opacatu mbahe ipane vahe yande recove água, sese yande pihañemoñeta catu água avei yande secocuer cua tupri pipe. Ahe yande poravo güeco porañetesesa pipe, güembiapo porañete vahe pipe avei. ⁴ Ipípe avei oseyá oñehe imboaviyepirá yandeu; ahe iñehe ñgue ndehi tēi vahe, aviye catu vahe ité. Co yandeu iñehesa pipe sui perecora Tūpa reco aviye vahe peyese pe yepepi água mbahe tēi sui. Ahe acoi oime vahe co ñvi pipe ava remimbotar tēi sui. ⁵ Sese pe peyeroya vahe Jesús rese, peyemomirata catu aveira peyapo vaherá mbahe aviye vahe. Peseca aveira Tūpa remimbotar cua tupri catu água. ⁶ Iyavei peñearo tuprira. Ipare peñemosáño aveira mbahe tēi upe. Ipípe sui peyemondo tupri catura Tūpa upe. ⁷ Ipare peyeaisura peyeívrí nungar pe recosa pipe. Ipípe sui peseca catu vitera ava raisu tupri água.

⁸ Esepia, perecose evocoi nungar mbahe pe recocuer pipe, pembouvicha catuse avei, ahese pe recocuer ñgue ndehi tēi chira, peicua tupri catu aveira yande Yar Jesucristo. ⁹ Acoi ndovirecoi vahe rumo evocoi nungar mbahe oyese, ahe oyeapo inungar ndasesapisoí vahe, anise mbahe ndosepia tuprii vahe, sesaraiño oangaipa rese ñero agüer sui. ¹⁰ Sese che rivireta, peyemoviracua catu Tūpa pe renoisa mboyecua água iporavopri pe recosave. Ñgue peyese, ndapeviapi chittera mbahe tēi pipe. ¹¹ Evocoi nungar pipe sui pe pisi tuprira omborerecuasa ndopai vahe pipe yande Yar, yande Písicosar Jesucristo.

¹² Sese niha opomomahenduhaño itera evocoi nungar mbahe rese, yepe peicua, peicoveño avei mbahe supi tupri vahe rese. ¹³ Aviyeño itera revo che recove viteseve opomomahenduha vité co aracuasa rese. ¹⁴ Esepia, yande Yar Jesucristo oicua uca cōimi che mano água cheu. ¹⁵ Opombohera

rumo opacatu che catugüer rupi co tecocuer rese che manore pe mahenduha ãgua.

Co osepia vahe ité Jesúis mborerecoasa yuvireco

¹⁶ Co porombohesa oromombahu vahe p  u yande Yar p  ratasa resendar, iyev   iri ãgua resendar avei, ndahei oreysui t  i. Ore rumo orosepia vahe it   ore resa pipe yande Yar mborerecoasa. ¹⁷ Orosepia niha yande Ru T  pa omboeteise Guahir iyavei omondose chupe seco pora  ete iri ãgua aipo ehise o  ehe g  eco pora  etes pipe: “Co che Rah  , che rembiaisu it  , sese niha che ayembovharete vichico” ehise. ¹⁸ Ore it   niha aipo ñehesa orosendu iva suindar oroicose yande Yar rupi ivit   imboeteipri vahesave.

¹⁹ Ahe ñehesa omboyecua catu ñehesa aracahendar T  pa ñehesa mombehusar remimombehug  er supi tupri vahe Cristo resendar. Iya it   p  u pe yapisaca tupri ãgua sese; inungar que tataendi p  tusave osesape vahe oico acoi os  se voi c  he rerusar yasitata guasu ou,   gue ehi co ñehesa pe piha pipe sesape. ²⁰ Peicua catu co mbahe, co ñehesa aracahendar icuachiapri T  pa suindar it  , ndahei yandeyesui t  i yaicua imombehu ãgua. ²¹ Esepia, ndahei i  nehe mombehusar oyesui t  i omombehu yuvireco. Ahe rumo ava seco catupri vahe it  . T  pa it   omombehu uca o  ehe chupe Esp  ritu Santo p  ratasa pipe aracahe.

2

Oprombopa vahe porombohesa

¹ Yuvirecove rumo aracahe porombohesar oprombopa t  i vahe Israel ivi rupi. Oime aveira niha pe p  ahuve co nungar oprombopa t  i vahe yuvireco. Ahe ñemisa pipe oprombohera co coti t  i vahe ava reco momara t  i ãgua; evocoiya g  eco pipe oicuacu  ora oyar opisiosar. Co rumo g  ecocuer momba pihaivi ãgua t  i   gue ehira yuvireco. ² Set   ava oguatara secocuerai rupi. Ipipe sui ambuae ava o  ehe rai t  ira porombohesa supi tupri vahe rese yuvireco. ³ Mbahe pota raisa pipe pe mbopara yuvireco co porombohesa co coti t  i vahe rese. Ica  i rumo oime  o itera yuvireco chupe. Yipisuive it   niha ahe imoca  ipir   yuvirecoi.

⁴ Esepia, aracahe T  pa ni  eroi et   g  embiguai oyemboangaipa vahe upe. Ahe opa it   omondo mbahe t  isave.   gue ehi seyapa p  tumimbisave, inungar ñapichimbr   carena pipe yapocatupri yuvireco ca  isave nara. ⁵ Iyavei acoi T  pa ni  eroi avei ava aracahendar ndaseco p  rai vahe ivi pipe yuvirecoi vahe upe. Omoca  i it   amarusu pipe ahe ava yuvireco. No   acoi omombehu vahe tecocuer ih  vi vahe resendar iyavei

ava siete yuvirecoi vahe supindar, ahe güeraño ité oipísiro. ⁶ Iyavei opa omocañi tata pipe tecua Sodoma, Gomorra avei; ēgue ehi imbotanimbu tupri ‘na ahe aveira niha ambuae ava che reroyaëhisar upe curi’ ohesave. ⁷ Lot güeraño rumo ahese oipísiro. Ahe mbia aviyе vahe secocuer; ndoyembovihai tēi ambuae ava recocuer mbahe-mbahe tēi yuvirecoi vahe repiase.

⁸ Co mbia aviyе vahe secoise ahe ava pāhuve arı rupi, tasi tēi ipihañemoñeta pipe osepiase, osenduse avei mbahe tēi yuvirecoi vahe rembiapo. ⁹ Indó, yande Yar oicua viroyasar renose ãgua mbahe tēi sui; oicua avei mbahe tēi pipe yuvirecoi vahe rereco imombaraisu ãgua arı cañise curi. ¹⁰ Tūpa omombaraisu catu itera acoi ndopoi vahe güemimbotarai sui, viroiro vahe yande Yar mborerecuasa, oyeecomboivate ai vahe güemimbotar aposa pipe, acoi osiquiyeëhisa pipe oñehe rai vahe seco ivate, ipírata vahe rese. ¹¹ Tūpa rembiguai eta iva pendar rumo yepe ipírata catu vahe, omborerecuasa vireco catu vahe avei yuvireco viña, niñehe-ñehe tēi rumo Yar rovai yuvireco sese.

¹² Co ava mbahe mimba nungar tēi ndovirecoimi eté opihañemoñetasa yuvireco. Opoco voiño tēi mbahe rese; evoco nungar yuviroha yucapirā tēi eté. Ahe oñehe rai tēi vahe mbahe güemienducuaëhi rese. Mbahe mimba nungar tupri avei rumo omanora yuvireco güecocuerai pipe. ¹³ Oyemombaraïsu uca ambuae ava mombaraïsusu pipe sui tēi, “Yayembovihha mbahe yande rembiapo ai rese” ehi tēi eté yuvireco viña. ¡Oporamochi pipe tēi rumo yuvirecoi, yuvirasose pe pietasave pe piri, güeco rai reseve oyembovihha oporombopasa tēi pipe yuvireco!

¹⁴ Osepiase cuña, oipota voiño tēi; ndaporambai avei iyemboangaipasa chupe. “Yayapoño mbahe” ehiño ndoyembohe catui vahe upe. Evoco nungar oyembohe-mbohe catu mbahe pota raisa reca ãgua oyeupe yuvireco. Ava ocañi tēi vaherā yuvirecoi. ¹⁵ Ocañi tēi secocuer yuvireco Tūpa ñehe mombehusar Beor rahir Balaam recocuerai nungar pipe. Esepi, oyepepi tecocuer aviyе vahe sui mbahe tēi apo ãgua guarapochi pota raisa pipe yuvireco. ¹⁶ Tūpa rumo oyaca yangaipa rese guaricu omoñehe ucase ava ñehe pipe chupe. Ahese ramo opoi oaracuaëhisa sui.

¹⁷ Co ava oporambohe vahe inungar ivicuar ipiru vahe. Iva quihä ivitu remimombo nungar tēi avei. Apirëhi vahe ité imombopirā yuvireco pítumimbi catu vahesave nara. ¹⁸ Esepi, oñehe tupri ai angahu tēi ava monguerëhi ãgua ava pihañemoñeta raisa rupi seroyevi ãgua. Ipipe sui ombopa tēi ahe ava seco catupri pota vahe yuvireco evoco nungar

mbahe tēi pīpe iyevi iri āgua. ¹⁹ “Opacatu mbahe apo yaicatu yande reco pīpe” ehi tēi yuvireco. Ahe ae rumo mbiguai tēi nungar yuvirecoi güecocuerai apo pīpe. Esepio, noyuvinose catui eté ichui. Supi eté, yayapoño itese que mbahe tēi, ahe evocoiyase mbiguai nungar ité yande rereco uca. ²⁰ Esepio, acoi oicua vahe yande Yar, yande Pīsirosar Jesucristo yuvireco, ipīpe oyepipi co iví pipendar mbahe-mbahe tēi sui, oyeiti uca irise rumo co nungar mbahe tēi pīpe, ichui ndoicatu iri yuvinose. Ipare mbahe tēi catu yipindar secocuer sui yuvireco chupe. ²¹ Oyeupe Tūpa porocuaita imondopri aviye vahe cua pare oyepepise ichui, aviye catura revo ndoicuaise co tecocuer ihīvi vahe yuvireco viña. ²² Supi tupri ité yavīye ñehesa sesendar: “Cave rumo ohu iri ogüehe. Iyavei cuchi oyasu pare, oyevi iri tuyuve oyemboavaete āgua” ehi vahe.

3

Yande Yar yevisa

¹ Che rivireta, che rembiaisu, co aicuachía iri che ñehe pēu. Ipīpe opomopihāñemoñeta tupri uca pota che pe mboaracuasa pīpe. ² Peyemomahenduha aracahendar Tūpa ñehe mombehusar seco catupri vahe ñehengagüer rese, yande Yar Poropīsirosar porocuaita rese avei acoi apóstol pe mbohe vahecuer yuvireco.

³ Peicua ranera co ari imombehupri ipa vahe virovise, oimera ava ahe oviroírora co tecocuer aviye vahe Tūpa suindar güemimbotarai pīpe yuvireco ⁴ aipo ehira, “¿Marase tēi vo aipo oura Tūpa Rembiporavo imombehupri ou vaherā curi? Esepio, yande ramoi opa tēi omano yuvireco. Cūritei opacatu ahe tupriño tēi tecocuer aracahe iví apo suive” ehi tēira yuvireco. ⁵ Ahe nimahenduha potai yuvireco co aracahendar rese. Esepio, Tūpa oyapo oñehe pīpe iva, iví avei, ahe iví osē vahe i sui, i pāhuve avei secoi. ⁶ Coiye i pīpe avei opa omocañi iví, ombouse amarusu aracahe. ⁷ Cūriteindar rumo iva, iví imoingatupri tata uve nara Tūpa porocuaita rupi. Evocoi tata pīpe avei ocañi tēira ava mbahe tēi aposar yuvirecoi vahe curi.

⁸ Che rivireta, che rembiaisu, peresarai rene co mbahe sui: yande Yar upe ñepei ari inungar mil araviter; mil araviter evocoiyase inungar ñepei arimi tēi chupe. ⁹ Esepio, yande Yar ndiaracahei eté oñehe mboaviye āgua; inungar amove ava, “Iharacahe tēi” ehi yuvireco viña. Ahe rumo aviye etepri güeco mbegüesa pīpe yandeu. Esepio, ndoipotai que ñepei yepe yande cañi tēi āgua; ahe rumo oipota opacatú tupri ité yande recocuer ñecuñaro āgua.

¹⁰ Yande Yar ari yande resapiha tēira inungar imonda rai vahe ou pītu pīpe yepi. Ahese iva ocañi tupri tēira

viapugüer ipírata vahe pipe curi. Opacatu mbahe yapopri opara yuvirocai. Ipípe sui co ivi opacatu ipor reseve ocañi tēi etera.

¹¹Opacatu ité niha co mbahe yapopri ocañi tēi vaherā. Sese, ipeyemoviracuaño itera pe reco maranehisa rese Tūpa rese pe pihañemoñetasa pipe! ¹²Pesāroño Tūpa yepotasa resendar ari, iyavei peyapo opacatu peicatugüer rupi ‘toyepota poyava voi’ pe yapave. Ahe ari pipe iva opara ocañi tēi eté tata pipe. Ipípe sui opacatu mbahe yapopri ticupa tuprira curi. ¹³Yande rumo yasāro ité iva, ivi ipiasu vahe Tūpa remimombehu. Aheve opacatu ava yuvirecoira güeco aviyesá pipe.

¹⁴Sese che rembiaisu, pesāro viteseve co tecocuer, ēgüe peyera opacatu peicatugüer rupi pe reco tuprī ãgua pe angaipaëhi pipe, pēu Tūpa, “Peyavi mbahe” ehiëhi ãgua. ¹⁵Tapeicua co: yande Yar seco mbegüe yandeu yande p̄isiro ãgua. Ēgüe ehi avei yande rembiaisu Pablo icuachía oyeupe Tūpa omboou vahe mbahecusa pipe pēu. ¹⁶Opacatu ocuachiar pipe omombehu evoco nungar mbahe pēu, yepe amove yavai senducua ãgua yuvireco viña. Sese amove ndoyemoviracua tuprī vahe yande Yar rese iyavei ndoyemboaracua tuprī vahe, ahe co coti tēi virova ñehesa, inungar oyapo ambuae ñehesa icuachiapri Tūpa suindar rese. Ipípe güecocuer omocañi tēi ahe.

¹⁷Che rivri, che rembiaisu, peicua ité niha evoco mbahe; sese peñearo tuprira pe yembopa ucaëhi ãgua ava ndiporeroyai vahe upe Tūpa rese pe recocuer yemoviracuasa sui pe yepepiëhi ãgua. ¹⁸Peicua tuprī catura rumo yande Yar Porop̄isirosar Jesucristo iyavei peicoveño itera iporovasasa pipe. ¡Ēgüe tehi imboeteipri tasecoi cūritei apirëhi vaherā! Aipo rupive che ñehe pēu.

JUAN REMBICUACHIA YIPINDAR VAHE SAN JUAN

Ñehesa tecovesa resendar

¹ Co cuachiar pipe oromombelu pēu co yipisuive secoi vahe. Ahe orosendū, orosepia avei ore resa pipe ité iyavei oropoco ité sese. Ahe niha Tūpa Ñehe tecovesa resendar. ² Co tecovesa oyemboycua, orosepia iyavei ahe secocuer oromombelu. Ahe tecovesa apirēhi oromombelu vahe pēu. Ahe Vu rese secoi vahe oyemboycua vahe oreu. ³ Oromombelu co orosepia vahe, orosendu vahe ñepei vahe nungar pe reco ãgua ore rese inungar ore oroico yande Ru Tūpa rese, Tahir Jesucristo rese avei. ⁴ Evocoiyase cûritei oroicuachía evocoi mbahe pēu yande yembovharete catu ãgua.

Tūpa tesapesa secoi

⁵ Iyavei Jesucristo ore mbohe co ñehesa rese, ahe oromombelu pēu: yande Ru Tūpa niha tesapesa secoi; ndipoi eté pítumimbisa sese. ⁶ “Che aico tupri Tūpa rese” yahese, yaicoño rumo angaipa pipe, ahe inungar pítumimbi vahe, ahese yande remira tēi iyavei ndayayapoi mbahe supi tupri vahe. ⁷ Yaicose rumo tesapesa pipe inungar yande Ru Tūpa secoi tesapesa, evocoiyase yaico tuprira yandeyeupe. Iyavei suví yande moatiro opacatu angaipa sui.

⁸ Iyavei, “Ndarecoi angaipa che piha pipe” yahe tēise, yande ae yayembopa ipipe. Evocoiyase mbahe supi eté vahe ndayarecoi yandeyese. ⁹ Acoi yamombehuse yande angaipagüer Tūpa upé, ahese ahe omboura oñeroisa yande angaipa rese yandeu iyavei omoatirora opacatu mbahe-mbahe tēi yande sui. Esepia, ahe seco ñvi vahe. ¹⁰ Iyavei, “Che ndacheangaipai eté” yahe tupri tēise yaico, evocoiyase Tūpa semirañete ai vahe nungar yareco. Ipípe ndayaroyai iñehengagüer.

2

Jesucristo yande reco moingatusar

¹ Che rahireta, co aicuachía pēu pe angaipaëhi ãgua. Que revo ava oime oyemboangaipa vahe pe pâhuve, yareco rumo yande Pítivíisar yande Ru rovai. Ahe Jesucristo, seco ñvi vahe. ² Ichui oime avei ñeroisa yande angaipa rese yandeu iyavei opacatu ava uve. Esepia, ahe omano curusu rese yande angaipa mocañi ãgua yande sui.

³ Acoi yayapo tuprise Tūpa porocuaita, ahese supi eté yaicua Tūpa. ⁴ Oime amove ava “che aicua Tūpa” ehi

vahe; nomboaviyei rumo iporocuaita. Ahe semirañete ai vahe, ndovirecoi mbahe supi tupri vahe oyese. ⁵ Acoi yamboaviyese iñehengagüer, ahese supi eté yasaísu Tūpa. Ipipe sui yaicua yande reco tupri Jesucristo rese. ⁶ Acoi “aico tupri Tūpa rese” ehi vahe, ahe secoira Jesucristo nungar.

Mborocuaita ipiasu vahe resendar

⁷ Iyavei, che rivireta, ndaicuachiai mborocuaita ambuae ipiasu vahe pēu. Aheño ité mborocuaita pereco vahe yipisuive. Ahe acoi yipindar pesendu vahe. ⁸ Co aicuachía vahe rumo ogüeru mborocuaita ipiasu vahe. Ahe supi eté tesapesa Jesucristo vireco vahe iyavei pereco vahe avei. Esepio, pítumimbi opara. Tesapesa evocoiyase osesape.

⁹ Oime amove ava “che aico tesapesave” ehi angahu tēi vahe; oyamotaréhiño rumo ambuae omboetasa Tūpa reroyasar. Evoco nungar recocuer pítumimbisave tēi vite. ¹⁰ Acoi osaisu vahe ambuae omboetasa Tūpa reroyasar, ahe secoi tesapesave. Sese nomboangaipa ucai omboetasa. ¹¹ Acoi ndoyambotai vahe omboetasa, pítumimbisa pipe tēi secoi, ndoicuai avei que rupi güecocuer virecora. Esepio, pítumimbi vahe nomboesapisoí.

¹² Che rahireta, co aicuachía pēu nara. Esepio, Tūpa iñero pe angaipa rese pēu Jesucristo recocuer pipe. ¹³ Pe, yesupa peico vahe upe co aicuachía. Esepio, peicua yipisuive oicove vahe. Aicuachía avei pēu, mbia chihivahe. Esepio, pesecopi Caruguar. ¹⁴ Iyavei pe tahireta aicuachía opacatu pēu. Esepio, peicua vahe niha yande Ru Tūpa. Aicuachía avei pēu, pe iyesupa. Esepio, peicua yipisuive oicove vahe. Aicuachía avei pēu, mbia chihivahe. Esepio, peyemoviracua etepri, peipisi avei Tūpa Ñehengagüer pe piha pipe. Ipipe pesecopi Caruguar.

¹⁵ Evocoiyase pesaisu eme co mbahe tēi ivi pipendar. Acoi ava co mbahe tēi osaisu vahe, ahe ndosaisui yande Ru Tūpa yuvireco. ¹⁶ Esepio, opacatu co mbahe tēi ndahei yande Ru Tūpa suindar; ahe rumo co ivi pipendar suindar. Ahe niha opacatu yande pihañemoñeta raisa, yaipota vahe sese yamahese, iyavei opacatu yande rembiereco rese yande yemboívate ai tēisa. ¹⁷ Co ivi pipendar mbahe tēi iyavei ava mbahe pota raisa opa pota ité ocañi. Acoi ava oyapo vahe rumo Tūpa remimbotar, yuvirecoira apiréhi vaherā ité.

Mbahe supi eté vahe iyavei mbahe ndahei vahe supi

¹⁸ Che rahireta, co ari ipa vahe ité yandeu. Iyavei acoi pesendu “oura Jesucristo amotaréhimbar” ehi vahe, ahe cüritei setá oyemboyecua yamotaréhimbar yuvireco. Sese yaicua ari ipa vahe yepota áqua. ¹⁹ Ahe oyepepi yande pāhu sui; ndahei eté rumo yande rivri yuvireco Tūpa rese. Esepio, acoi yande

rívri itese, ahese opitara yande piri yuvireco viña. Ëgüe ehi oyecua ndahei opacatu yande rívri yuvirecoi.

²⁰ Cristo omundo Espíritu Santo pēu. Sese opacatu pe peicua mbahe supi tupri vahe. ²¹ Pe niha peicua co mbahe supi eté vahe. Sese aicuachía co pēu. Esephia, mbahe supi eté vahe sui ndoui temira. ²² Acoi “Jesús ndahei Poropísiosar imboupri” ehi vahe, ahe semira tēi vahe, yamotaréhimbar yuvirecoi. Ahe niha ndoviroyai Tu, Tahir avei yuvireco. ²³ Acoi ava “evocoi ndahei Tūpa Rahir” ehi vahe, ndovirecoi Tu oyese yuvireco. Acoi “evocoi niha Tūpa rahir” ehi vahe rumo, ahe vireco yande Ru Tūpa oyese yuvireco.

²⁴ Sese yipisuive pesendu vahe ñehesa peyapocatu pe piha pipe. Ëgüe peyese, ahese peico tuprira Jesucristo rese, Tu rese avei. ²⁵ Esephia, Jesucristo aipo ehi: “Pe perecora co tecovesa apiréhi vahe peyese” ehi yandeu.

²⁶ Sese co ava pembopa pota vahe resendar aicuachía pēu. ²⁷ Pe pereco Espíritu Santo Jesucristo ombou vahe pēu. Sese ndiyai eté ambuae pe mbohera. Espíritu ae pe mbohe opacatu mbahe rese oico. Iporombohesa supi eté, ndoporombopai vahe. Sese peicoño Jesucristo rese Espíritu Santo pe mbohesa rupi.

²⁸ Iyavei che rahireta, peicoño ité Cristo rese yareco vaherā sese yande yeroyasa. Acoi ogüeyise iva sui curi, ahese nayachí chietera sovai ichui. ²⁹ Pe niha peicua Jesucristo seco ïvi vahe. Iya peicua avei opacatu oyapo vahe mbahe ihívi vahe, ahe Tūpa rahir ité yuvirecoi.

3

Tūpa rahir yuvirecoi vahe

¹ Mara ehi rutei Tūpa yande raisu. Ahe aipo ehi yandeu: “Pe niha che rahireta peico” ehi, ahe supi eté aipo ehi. Sese niha co ava ndoviroyai vahe Tūpa, ndoicatui eté yande recocuer cua água. Esephia, ndoicuai Tūpa recocuer yuvireco. ² Che rivireta, yaico ité Tūpa rahir. Yande rumo ndayaicua tupri vitei yande reco água ipare. Cûritei rumo co mbahe yaicua: acoi oyemboyeucuese Jesucristo, yaicora inungar. Esephia, yasephia itera opacatu seco reseve. ³ Iyavei opacatu osäro vahe Jesucristo yuvireco, oyepepiño ité opacatu angaipa sui güeco catupri água, inungar ahe secoi.

⁴ Opacatu ava oyemboangaipa vahe, ahe oyavi Tūpa porocuaita. Esephia, angaipa Tūpa porocuaita mboavíyeëhisa yepi. ⁵ Pe rumo peicua Jesucristo ou co ïvi pipe yande angaipagüer moçañi água. Ahe niha ndovirecoi eté angaipa oyese. ⁶ Opacatu ava sese yuvirecoi vahe ndoyapoi angaipa.

Acoi ava yangaipa vahe rumo ndosepiai, ndoicuai avei secocuer yuvireco. ⁷ Che rahireta, peyembopa uca eme ambuae ava upe, acoi oyapo vahe mbahe aviye vahe yepi, ahe secocuer aviye vahe ité inungar Jesucristo. ⁸ Acoi oyapo vahe angaipa, ahe Caruguar suindar. Esepiá, Caruguar yipisuve ité oyapo angaipa. Sese ou Túpa Rahír Caruguar rembiapo moçañipa água.

⁹ Opacatu yuvirecoi vahe Túpa rese ndoyapoi angaipa. Esepiá, ahe vireco ité Túpa recocuer oyese yuvireco. Sese ndoicatu iri angaipa apo água yuvireco. Esepiá, ahe Túpa rahír ité yuvirecoi. ¹⁰ Icuapri ité Túpa rahír yuvireco, icuapri avei Caruguar rahír yuvirecoi vahe. Esepiá, acoi ndoyapoi vahe mbahe tupri iyavei ndosaisui vahe Túpa reroyasar, ahe ndahei eté Túpa rahír yuvirecoi.

Yayeaisura ñepei-peiyande yacatu

¹¹ Co niha ñehesa, acoi pesendu vahe yipisuve, ahe co yayeaisura ñepei-peí. ¹² Ndayaicoi chira inungar Caín, ahe Caruguar remimbohe oyuca vivri. ¿Mahera píha oyuca? Esepiá, tivri oyapo mbahe aviye vahe; Caín rumo oyapo mbahe naporai vahe.

¹³ Che rivireta, pepihañemoñetai rene Túpa ndoicuai vahe pe reroírose yuvireco. ¹⁴ Yande rumo yaicua aracacondar yande hā cañi tēi agüer. Cúritei rumo yasē evocoí nungar sui tecovesa apiréhi vahe pipe yande reco água. Esepiá, yande niha yasaisu yande rivireta Túpa rese yuvirecoi vahe. Acoi ndosaisui vahe rumo ahe ihā ocañi tēi vité ité yuvireco. ¹⁵ Opacatu ava ndoyambotai vahe yande rívrí, ahe iporapichi serai vahe nungar. Pe rumo peicua ava iporapichi serai vahe ndovirecoi tecovesa apiréhi vahe oyese. ¹⁶ Jesucristo niha omundo güecocuer manosave yande recocuer repírá. Ichui yande yaicua poroaisusa. Sese yande avei ëgue tayahe yande rivireta rese. ¹⁷ Acoi ava vireco tēi vahe mbahe eta oyeupe nara, osepiáño tēi rumo vivri upe mbahe ipane vahe, iyavei ndoipítivií, ahe ndovirecoi Túpa poroaisusa oyese yuvireco. ¹⁸ Che rahireta, yande poroaisusa rumo ndahei chira yande ñehe pipe tēi, iyacatu rumo yamboyecua mbahe yande rembiapo pipe.

Yande yeroyasa yareco vahe Túpa rovai

¹⁹⁻²⁰ Ëgue yahese, yande yaicua yande recocuer supi eté vahe pipe yaico. Acoi, "Ndahei revo Túpa rahír aico" yahese, ahese Túpa rovaque yayemomahenduhara evocoí nungar rese: "Túpa niha tuvichá catu yande píhañemoñetasui. Ahe opacatu mbahe oicua." Sese yayeroyara. ²¹ Supi eté che rivireta, yaicua itese yande píha pipe yande reco tupri Túpa

rese, ahese yayeroyaño itera sovai. ²² Ahe avei niha ombou opacatu mbahe yandeu yaporanduse chupe. Esephia, yamboyeroya iporocuaita iyavei yayapo semimbotar yaico. ²³ Co ité iporocuaita: yaroyara Tahir Jesucristo iyavei yayeaisura ñepei-peí Tüpa yande cuaisa rupi tupri. ²⁴ Acoi yaroyase iporocuaita, ahese yaicora Tüpa rese; ahe avei secoira yande rese. Iyavei ahe ombou Espíritu yandeu. Ichui yaicua Tüpa secoi yande rese.

4

Espíritu Tüpa suindar iyavei espíritu Cristo amotarëhimbar

¹ Che rahireta, aní chira peroia opacatu “Espíritu pipe añahe” ehi vahe. Iyacatu rumo pesáha rane ‘¿Tüpa suindar ité píha?’ pe hesa pipe. Esephia, setá vai oporombohe angahu tēi vahe oguata opacatu ivi rupi yuvireco. ² Co rese peicuara ava Espíritu Tüpa suindar vireco vahe: “Jesucristo ou opacatu güete reseve” ehise, aipo ehi vahe vireco Espíritu Tüpa suindar ité. ³ Acoi aipo ndehi vahe rumo, ndovirecoi eté Espíritu Tüpa suindar oyese. Ahe rumo vireco espíritu Cristo amotarëhimbar tēi. Aracaco niha pesendu ñehesa acoi yamotarëhisar espíritu ou vaherā resendar. Ahe cûritei secoi co ivi pipe.

⁴ Che rahireta, pe rumo Tüpa suindar peico. Iyavei pesecopi ité acoi semira tēi vahe peico. Esephia, Espíritu secoi vahe pe rese, ahe ipírata catu Caruguar sui. ⁵ Evoco co ivi pipendar tēi yuvirecoi vahe. Esephia, oñeha mbahe ivi pipendar rese tēi yuvireco. Iyavei ava supindar ae ité oyapisaca iñehe rese yuvireco. ⁶ Yande rumo Tüpa suindar yaico. Acoi oicua vahe Tüpa oyapisaca yande ñehe rese yuvireco. Acoi ndahei vahe Tüpa rahir, ahe yande ñehe ndosendu potai yuvireco. Sese yande yaicuara vireco vahe Espíritu supi eté vahe, yaicua aveira vireco vahe espíritu oporombopa tēi vahe.

Tüpa oporoaisu vahe

⁷ Che rivireta, che rembiaisu, yayeaisu ñepei-peí. Esephia, yeaisusa Tüpa suindar. Opacatu osaisu vahe ava, ahe Tüpa rahir, oicua ité avei Tüpa yuvireco. ⁸ Acoi ndosaisui vahe ava, ahe ndoicuai Tüpa yuvireco. Esephia, Tüpa yeaisusa secoi. ⁹ Ëgue ehi ombojecua oporoaisusa yandeu. Ahe niha, ombou Guahir ñepei vahe co ivi pipe ichui yande recove água. ¹⁰ Ndahei yande rane yasaisu Tüpa. Ahe rane rumo yande raisu iyavei ombou Guahir imano água yande angaipa repirã. Ahe niha poroaisusa supi eté vahe.

¹¹ Che rivireta, che rembiaisu, ëgue ehi Tüpa yande raisu. Evocoiyase ëgue yahe aveira yande yayeaisu ñepei-peí yepi. ¹² Ndipoi eté ava osepia vahe Tüpa. Yayeaisuse rumo, Tüpa

secoi yande rese. Iporoaisusa evocoiyase oime ité yande rese. ¹³ Ahe ombou oEspíritu yandeu; ipipe sui yaicua sese yande reco iyavei yaicua ahe secoise yande rese. ¹⁴ Iyavei orosepia vahe, oromombehu: yande Ru ombou Guahir ava ivi pipendar písiro água. ¹⁵ Acoi ava “Jesús niha Tūpa Rahir” ehi vahe, ahe secoi eté Tūpa rese; Tūpa evocoiyase secoi sese.

¹⁶ Ëgüe yahe icua, seroya tupri água co Tūpa yande raisusa. Ahe niha yeaisusa. Acoi vireco vahe oporoaisusa, yuvirecoi avei sese; ahe avei secoi sese. ¹⁷ Ëgüe yahe Tūpa poroaisusa mboaviye tupri ichui yande siquieëhi água acoi oyepotase ari cañi yandeu. Esepia, yande yaico co ivi pipe inungar Jesucristo. ¹⁸ Yasaïsu tupri itese Tūpa, ndipoi chira siquyesa yandeu. Ëgüe yahese, opara siquyesa yande sui. Esepia, cañisa sui oime siquyesa yandeu. Sese acoi ava osiquiye ai vahe, ndoporoaisu tupri eté.

¹⁹ Yipindar Tūpa yande raisu. Sese cûritei yande avei yasaïsu Tūpa. ²⁰ Amove ava aipo ehi tēi: “Che asaisu Tūpa” ehi. Ahe ramoseve rumo viroïro omboetasa Tūpa reroyasar. Evocoiyase ahe semira tēi vahe. Esepia, acoi ndosaisui vahe omboetasa Tūpa reroyasar sepiase, ndoicatui Tūpa ndayasepiae vahe raisu água. ²¹ Jesucristo ombou co porocuaita yandeu: acoi osaisu vahe Tūpa, tosaisu avei omboetasa seroyasar yuvireco.

5

Yande mbahe-mbahe tēi co ivi pipendar recopisa

¹ Opacatu viroya vahe Jesús Tūpa Rembiporavo Poropisirosar seco rese, ahe Tūpa rahir yuvirecoi. Iyavei osaisu vahe ava, osaisu avei tahir yuvireco. ² Yande yasaïsuse Tūpa, yayapose avei iporocuaita, ahese yaicua yasaïsu avei ava Tūpa rahir yuvirecoi vahe. ³ Yamboavíyesa Tūpa porocuaita, ahese yamboyecua Tūpa raisusa yaico. Iyavei iporocuaita ndahei yavai etepri yapo água. ⁴ Esepia, opacatu Tūpa rahir yuvirecoi vahe osecopi mbahe-mbahe tēi ivi pipendar Cristo rese yeroyasa pipe yuvireco. ⁵ Acoi oyeroya vahe Jesucristo Tūpa Rahir secosa rese, ahe oicatu co ivi pipendar mbahe-mbahe tēi recopi água yuvireco.

Tūpa rahir recocuer resendar ñehesa

⁶ Co Jesucristo yusa icuasa i pipe ñapiramombrise: ndahei i reseño, suvi rese avei icuasa. Espíritu avei oseco mombehu. Esepia, ahe omombehu mbahe supi eté vahe yepi. ⁷ Evocoiyase oime mbosapi imboyecuasar: ⁸ Espíritu, i, iyavei suvi. Ahe mbosapi oyoya tupri. ⁹ Yaroya revo ava remimombehu; Tūpa remimombehu rumo aviye catu vahe

ité ichui. Esephia niha, ahe Guahir omombehu.¹⁰ Acoi viroya vahe Tūpa Rahir vireco ité ahe semimombehu opoha pipe. Acoi ndoviroyai vahe rumo Tūpa, semirañete ai vahe nungar tēi vireco. Esephia, ndoviroyai Tūpa ñehe Tahir resendar.¹¹ Co Tūpa remimombehu: ahe ombou yandeu tecovesa apirēhi vahe. Co tecovesa Tahir rese secoi.¹² Acoi oipisi vahe Tūpa Rahir opoha pipe, ahe vireco avei co tecovesa. Acoi ndoipisisi vahe rumo, ndovirecoi eté tecovesa oyese.

Poromboaracuasa ipa vahe

¹³ Co aicuachía pēu, pe pereco vahe Tūpa Rahir, peicua ãgua pe supi eté pereco tecovesa apirēhi.

¹⁴ Yande rumo yayeroya co rese: yaporanduse mbahe rese Tūpa remimbotar rupi chupe, ahese ahe yande ñehe osendu.¹⁵ Evocoiyase yaicuase ahe osendu yande yeruresa, yaicua avei mbahe yande porandusa ombou vaherā yandeu.

¹⁶ Acoi osepia vahe yande mboetasa Tūpa reroyasar oyemboangaipa vahe, ahe rumo ndahei manosave nara, oyeroquira sese. Evocoiyase Tūpa omondora secove ãgua chupe. Oime rumo angaipa ahe güeru manosa. Che, “Peyeroqui evocoi nungar angaipa rese” ndahei pēu.¹⁷ Opacatu mbahe-mbahe tēi ahe angaipa. Oime rumo angaipa ndayande rerasoi vahe manosave.

¹⁸ Yaicua Tūpa rahir ndoyapoi angaipa yuvireco. Esephia, Tahir osāro evocoi nungar. Ichui Caruguar ndopocoi sese.

¹⁹ Sese yaicua yande Tūpa rahir yaico. Iyavei opacatu ava ndoviroyai vahe Tūpa, ahe Caruguar povri pendar tēi yuvirecoi.²⁰ Iyavei yaicua Tūpa Rahir ogüeru oaracuasa yandeu Tūpa supi eté vahe cua ãgua iyavei yaico co supi eté vahe rese. Ahe niha Tahir Jesucristo, ahe avei Tūpa supi eté vahe iyavei tecovesa apirēhi vahe.²¹ Che rahireta, peñearo tupri tūpa angahu tēi sui. Aipo rupive co che ñehesa amombehu pēu.

IMOÑUVIRIOSA JUAN REMBICUACHIA SAN JUAN

Mbahe supi eté vahe iyavei yeaisusa

¹ Che, icuaipri, aicuachía co che ñehe pēu pe Tūpa rembiporavo peico vahe opacatu eipeve peico vahe upe. Che niha supi eté opoaisu. Ndahei rumo che güeraño opoaisu, opacatu oicua vahe porombohesa supi eté vahe avei pe rāisu yuvireco. ² Opoaisu ité mbahe supi eté vahe yande piha pipe yareco vahe rese. Ahe ndopai chivaherā ité. ³ Yande Ru Tūpa, yande Yar Jesucristo, Tūpa Rahir, tombou oporovasasa, oporoparaisuerecosa pēu nara. Tombou avei güeco tuprisa, güeco supi eté vahe pipe oporoaisusa pipe avei pēu.

⁴ Che mboviharete aicuase pe pāhu pendar yuvirecoi vahe güecocuer aviyesa pipe. Esepia, ahe viroya porombohesa supi eté vahe yuvireco. Ahe niha yande Ru Tūpa porocuaita yandeu. ⁵ Iyavei, che rivireta, che rembiaisu, tayayeaisu catu ñepei-pei. Co aicuachía vahe ndahei porocuaita ipiasu vahe. Ahe niha acoi yipindar icuachiapri pēu. ⁶ Co yande yeaisusa, yande guata tupri äqua Tūpa porocuaita rupi. Co Tūpa porocuaita yipisuive pesendu vahe, ahe omombehu yande yeaisu tupri äqua yandeu.

Iporombopa serai vahe resendar

⁷ Setá vai oguata ivi yacatu rupi oporombopa tēi vahe yuvireco. Ahe, "Jesucristo ou güete reseve" ndehi eté yuvireco. Ahe oporombopa tēi vahe Jesucristo amotarēhimbar yuvirecoi. ⁸ Peñearo catu pe poraviquí reprimocañi tēiäqua. Tapeipisi catu opacatu Tūpa porerecosa peyeupe nara.

⁹ Oime ava oyepepiño vahe Cristo porombohesa sui. Ahe Tūpa ndovirecoi opiha pipe yuvireco. Acoi oyapisaca tupri vahe Cristo porombohesa rese, ahe vireco Tūpa, Tahir avei oyese. ¹⁰ Acoi oyepotase ava oporombopa tēi vahe pēu, ndovirecoi vahe co porombohesa, ndapeipisii chira pe rētave. Iyavei ndapemboaviravei chiaveira. ¹¹ Acoi pemboaviravese, pe avei pehara sembiapo pipe.

Ñehesa ipa vahe

¹² Che niha amombehu pota setá mbahe pēu. Namombehu potai rumo cuachiar pipe. Che teieté aso pota pēu che ñehe äqua. Ahese yayemboviharetera oyese.

13 Iyavei Tūpa rembiporavo oñemonuha vahe cohave opacatu omondo omahenduhasa yuvireco pēu. Aipo rupive co che ñehesa amondo pēu.

IMOMBOSAPI SA JUAN REMBICUACHIA SAN JUAN

Gayo recocuer aviye vahé resendar

¹ Che, icuaipri, aicuachía co che ñehe ndeu, che mboripar, che rembiaisu, Gayo. Che supi eté oroaisu yepi.

² Che rembiaisu, che rivri, cūritei nde recocuer erereco tupri Tūpa rese. Che ayeroqui nde rese opacatu nde reco tupri água iyavei tipo eme mbaherasisa ndeu. ³ Che aviharete asenduse yande rivri ñehe nde recocuer resendar yugüeruse coháve. Ahe aipo ehi yuvireco cheu: “Evocoí Gayo oyemoviracua tupri mbahe supi eté vahé pipe” ehi yuvireco ndeu. ⁴ Ndipoi eté niha ambuae ñehesa asendu vahé che mboviharete catu vahé que che rahireta oguatase co porombohesa supi eté vahé rupi yuvireco.

⁵ Che rivri, che rembiaisu, ereyapo tupri opacatu mbahe yande rivreta upe iyavei ambuae tecua pendar oyepota vahé upe avei. ⁶ Ahe omombehu ore ñemonuhasave opacatu nde poroaisusa resendar yuvireco oreu. Eyapo catu mbahe icatupri vahé; eipítivii catu chupe mbahe ipane vahé rese iguataño água Tūpa remimbotar rupi yuvireco. ⁷ Esepia, ahe oguata yuvireco Jesucristo rer pipe. Ndoipisi eté rumo mbahe ipane vahé opítivii água yuvireco ava Tūpa reroysasaréhi sui. ⁸ Sese yande ñgue yahera yaico evocoí nungar upe ñehesa supi eté vahé rese ipítivii água.

Diótreves recocuerai iyavei Demetrio recocuer aviyesá

⁹ Che aicuachía che ñehe eipeve Tūpa upe oñemonuha vahé upe cuese. Diótreves rumo ndovíroyai ore mborerecuasa. Esepia, ahe oipota rai mborerecuár güeco água ipähuve. ¹⁰ Evocoiyase asose eipeve, amboaracuara opacatu Tūpa viroya vahé rovai sembiapo ai rese. Esepia, ahe oñehe-ñehe tēi ore rese, ndahei ahe güeraño, ndoipisi potai avei güétave yande rivreta oyepota vahé. Iyavei ndoipotai ambuae upe ipisi água sétave. Acoi oipisise, omombo voiño ité ñemonuhasa sui. ¹¹ Che rivri, che rembiaisu, ereicorí rene evocoí ava recocuer nungar. Ereicora rumo ava aviye vahé recocuer rupi. Esepia, oyapo vahé mbahe aviye vahé, ahe Tūpa suindar. Acoi oyapo vahé rumo mbahe naporai vahé, ahe ndoicuái vahé Tūpa.

¹² Opacatu, “Demetrio aviye ité” ehi yuvireco. Ahe supi eté aipo ehi; aipo avei ore oromombéhu. Pe niha peicuaño ore oromombéhu mbahe supi eté vahé.

Ñehesa ipa vahe

¹³ Che niha amombehu pota setá mbahe ndeu. Namombehu potai rumo cuachiar pipe tēi ndeu. ¹⁴ Esepio, aso pota ité nde repia. Ahese voi yañemoñetara oyeovai eté.

¹⁵ Eico tupri. Yande mboripar coha pendar omondo omahenduhasa yuvireco ndeu. Iyavei, eyapo mbahe icatupri vahe, emombehu nde teieté che mahenduhasa ñepei-pei yande mboripareta upe eipeve. Aipo rupive.

JUDAS REMBICUACHIA SAN JUDAS

Judas mahenduhasa Jesús reroyasar upe

¹ Che, Judas, aico Jesucristo rembiguai, Santiago rívri. Che aicuachía co che ñehe pēu. Pe niha yande Ru Tūpa rembiaisu semienoi peico. Jesucristo niha pe rāro opacatu mbahe-mbahe tēi sui. ² Tūpa tombou catu pēu pe paraísuerecosa pe reco tupri ãgua pe raisusa pipe.

Oprombohe vahe ava mbopa tēi ãgua resendar

³ Che rívireta, che rembiaisu, yipindar chepihañemoñeta ité yande písirosa resendar cuachía ãgua pēu viña. Ipare rumo chepihañemoñeta iri: iyaño revo che aicuachía pe yemoviracua tupri catu ãgua yembohesa yaroya vahe rese. Ahe yembohesa yaroya vahe ñepei reseve imondopri opacatu yandeu Jesucristo rese yaico vahe. ⁴ Esepia, amove ava iporombopa serai vahe yuviroique mbegüe angahu pe pâhuve. Aracahe suive rumo Tūpa Ñehengagüer icuachiapri pipe omombehu evoco nungar ava imocañisa tēira yuvireco. Ahe ava ndaseco pōrai vahe, “Tūpa aviye ité, ndoyapoi chietera mbahe yandeu” ehi tiête yuvireco. Sese oyapoño mbahe tēi. Iyavei, “Jesucristo ndahei yande Rerecuar” ehiño tēi vahe yande Yar ñepei vahe upe yuvireco.

⁵ Che opomomahenduha pota iri acoi peicua tupri vahe rese. Yipindar yande Yar Tūpa vínose yande ramoi eta Egípto sui. Ipare rumo opa omocañi viroyasaréhi. ⁶ Inungar avei Tūpa rembiguai yipindar vahe yuvirecoi, nomboavíyei vahe ocuaita. Ipípe sui Tūpa osoquenda pítumimbi ndopai vahe-save ari cañise nara.

⁷ Iyavei ava Sodoma pendar, Gomorra pendar iyavei ahe tecua ívirindar avei inungar acoi Tūpa rembiguai oyemondo mbahe tēi pipe, ahe avei oyemondo vahe oyemboaguasaguasa tēi ãgua yuvireco. Iyavei cuimbahe, cuimbahe rese; cuña, cuña rese no. Ipípe sui oiporara tata guasu apírëhi vahe yuvireco. Ahe opita opacatu yande yembosiquiye ãgua.

⁸ Ëgüe ehi avei niha evoco nungar ava pe pâhu pendar. Esepio, ahe oqueraisa nungar reroyasa pipe sui tēi omonguiha viteño güecocuer oangaipa pipe. Iyavei ndovíroyai vahe yande Yar mborerecuasa. Ahe avei oñehe-ñehe tēi vahe íva pendar rese yuvireco. ⁹ Aracahe Tūpa rembiguai ívate vahe Miguel oyepoepi-epi Caruguar rese yuvireco Moisés retecuer rese. Yepe ahe Tūpa rembiguai rerecuar viña, ndiyai rumo chupe

iñehe mara ãgua Caruguar upe. Evocoiyase aipo ehi chupe: “¡Tūpa oicuara co rese ndeu!” ehiño. ¹⁰ Evocoí ava pe pāhu pendar rumo oñehe tēiño vahe que mbahe ndosenducuai vahe rese yuvireco. Iyavei co mbahe oicua vahe oyesui tēi inungar mbahe mimba ndipihañemoñetai vahe oyesui tēi imbahecua, ahe oiporu yuvireco oyemocañi ãgua tēi.

¹¹ ¡lparaisu yuvireco! Caín recocuer rupi tupri avei oyapo mbahe yuvireco. Inungar Balaam guarepochi pota raisave tēi oyaví güeco yuvireco. Inungar Coré omano oporeroyaëhisa pipe.

¹² Pe peñemonuhase pe yeaisusa pipe pe caru ãgua, ahese ahe avei yuviroique pe pāhuve; noyuvinochi eté ocaru ãgua pe piri. Ndapeicuai rumo ahe pe recocuer monguiha ãgua tēi yuviroique vahe pe pāhuve. Evocoí inungar ovesa rārosar oyese tēi ihañeco vahe yuvireco. Iyavei ahe inungar iva quiha ndovirecoi vahe i, ivitu remimombo tēi. Ahe avei inungar ivira ndihai vahe ohasa rupi, ipiru vahe, evocoiyase ahe sapohopri. ¹³ Inungar avei acoi iai pipe itu omombo tiyui vahe oyesui yepi. Ëgue ehi avei evocoí mbia rembiapo poromochisa. Iyavei inungar yasitata amove omocañi vahe guaper co coti tēi oso pítumimbisave, ëgue ehi aveira ava Tūpa sui oyepepi vahe pítumimbisa apirëhíve secocuer yuvirecoi.

¹⁴ Iyavei Enoc, Adán raquicuerindar imboseisa rupi oyesu vahe, ahe oñehe evocoí nungar ava naporai vahe recocuer resendar rese aracahe aipo ehi: “Co che asepia che queraisa nungar pipe yande Yar turi iva pendar rehii reseve ¹⁵ opacatu ava recoáha ãgua iyavei icañi mombehu ãgua opacatu mbahe-mbahe tēi aposar upe, opacatu oñehe-ñehe tēi yamotarëhisave yuvirecoi vahe upe avei” ehi. ¹⁶ Ahe mbia niha oporoviroïro yuvireco. Iyavei oseca oyeupe nara mbahe güemimbotar tēi apo ãgua. Ahe oyemboivate ai vahe oñehe pipe tēi yuvireco. Iyavei oñehe tupri ai angahu tēi ambuae ava upe imbahe rerocua ãgua ichui.

Jesús reroyasar upendar poromboaracuasa

¹⁷ Pe rumo, che rivireta, che rembiaisu, peyemomahenduha acoi yande Yar Jesucristo apóstol ñehengagüer rese ¹⁸ aipo ehi vahe: “Co ari cañi renonde oimera ava viroïro ai vahe Tūpa rembiapo yuvireco. Iyavei oyapoño itera güemimbotarai yuvireco” ehi vahe. ¹⁹ Ahe ava niha omboyahoyaho ucara ava Jesús reroyasar yuvireco. Güecocuer iVi pipendar tēi vireco vahe. Ahe niha ndovirecoi Tūpa Espíritu yuvireco.

²⁰ Pe rumo, che rivireta, che rembiaisu, peyemoviracua pe poreroyasa maranehi vahe rese. Iyavei peyeroqui Espíritu Santo pe rārosa pipe. ²¹ Peñearo tupri Tūpa pe raisusa

pipe. Iyavei pesāro viteño yande Yar Jesucristo yande paraisuerecosa pipe tecovesa ndopai vahe mondo ãgua yandeu.

²² Pesaisu ava ndoviroya tuprii vahe Jesús. ²³ Amove ava pesecoreroyevi voi icañi rãguer sui. Ambuae peiparaisuereco. Peicua catura rumo, pesiquiye catu secocuerai sui; ndapeipotai chira mbahe sembiapo ai que ñepei yangaipa pipe pe viapiëhi ãgua.

Tüpa mboetei tuprisa

²⁴⁻²⁵ Tüpa yande Písicosar ñepei vahe vireco píratasa pe rãro angaipa pipe pe viapiëhi ãgua. Ahe avei pe rerecora güecocuer porañetesave pe reco angaipaëhisa pipe. Ichui peicora pe viharetesa pipe. Ahe imboeteipri tasecoi. Êgue tehi timboyeroyasa seco píratasa iyavei imborerecuasa yande Yar Jesucristo sui, yipisui, cüritei apirëhi vaherã.

TŪPA REMIMBOYECUA JUAN UPE APOCALIPSIS

Jesucristo yemoporēhisa

¹ Che, Juan, aicuachía mbahe imboavíye pihaivipirā pēu acoi Tūpa omboyecua vahe Guahir Jesucristo upe 'tomboye-cua ovíroyasar yuvirecoi vahe upe' oyapave. Ahe niha Jesucristo oicua uca Vu rembiguai pipe imboyecua uca água güembigui che recose cheu. ² Che supi eté amombehu opacatu mbahe asepia vahecuer iyavei amombehu evocoí Tūpa Ñehengagüer acoi Jesucristo oicua uca tupri vahe mbahe supi eté vahe.

³ Sorivete catura acoi ava oyeroqui vahe co Tūpa suindar ñehesa rese, acoi ava oyapisaca tupri vahe sese, viroya vahe avei icuachiapri pipendar yuvireco. Esepia, ari cañi viroví ité yandeu.

Juan oicuachía siete tecua pendar Jesús reroyasar ñemonuhasa upe

⁴ Che, Juan, aicuachía Jesús reroyasar siete tecua Asia ivi rupindar yuvirecoi vahe upe. Peipisi porovasasa, teco tuprisa Tūpa suindar, ahe yipivé vahe ité, cüriteindar apiréhi vahe avei; siete espíritu suindar avei no, ahe senda rovai yuvinohai vahe, ⁵ iyavei Jesucristo suindar, evocoí omombehu tupri vahe ñehesa supi vahe. Ahe acoi yipindar ocuerayevi vahe iyavei mborerecuar ivate catu vahe secoi opacatu ambuae-ae tēi mborerecuar sui. Ahe yande raisu iyavei yande písiro yande angaipa sui vuví pipe, ⁶ iyavei yande rereco mborere-cuarā, pahiguā avei no Vu Tūpa upe yande poravíqui água. ¡Egüe tehi imboeteipri tasecoi opíratasa pipe apiréhi vaherá!

⁷ ¡Esepia, Cristo iva quīha rese oura curi!

Ahese opacatu ava osepiara yuvireco,
yamotaréhisarer, oicutu vahecuer avei.

Iyavei opacatu tecua ivi pipendar ahese oyaseho tēira yuvireco sepiase.

Êgüe ehi etera curi.

⁸ "Che aico yipindar iyavei ipandar" aipo ehi yande Yar Tūpa opacatu mbahe mboavaisaréhi evocoí yipivé vahe ité, cüriteindar apiréhi vahe avei.

Juan osepia quer nungar pipe Jesucristo porañetesa

⁹ Che, Juan, pe riquehir aico, iyavei che pe nungar Tūpa povrí pendar aico, cheparaisu avei vichico Jesucristo rese che recosave che ñemosasa pipe. Che roquendasa vichico

caha pāhumi para guasu avíterve Patmos serer vahesave Tūpa Ñehengagüer mombehusa pipe sui tēi, Jesucristo recocuer mombehusa pipe sui tēi avei no. ¹⁰ Acoi yande Yar ari pipe Espíritu povrīve aicose, asendu che raquicuei oñehe pīrata vahé aviye acoi mimbí ñehe ¹¹ aipo ehi: “Eicuachía mbahe eresepia vahe. Ipare emondopa siete tecua pendar che reroyasar ivi Asia rupindar upe: Efeso ve, Esmirna ve, Pérgamo ve, Tiatira ve, Sardis ve, Filadelfia ve, ipa Laodicea ve” ehi cheu.

¹² Che evocoiyase ayemboyere sese ‘¿ava pīha oñehe cheu?’ che yapave. Ahese asepia siete tupri vera hi oro apopri, ¹³ iyavei asepia ipāhuve mbia aviye tupri ava ité viña, ituru-cuar pucucuer ipi rupi tupri ité sese, sumbicuasa evocoiyase oro apopri ipochiha rupi tupri ité oyepota. ¹⁴ Iha morochí inungar acoi mbahe saviyu vahe, inungar avei yesapi ñapirata morochí vahe, sesa evocoiyase aviye tupri ité tata rendigüer. ¹⁵ Ipi evocoiyase sendi yai eté, aviye acoi bronce ocai vahe horno pipe, iyavei iñehe ipíratá iteanga inungar itu riapugüer. ¹⁶ Oacato coti vireco siete tupri yasitata, iyavei iyuru sui osē quise pucu saimbe yoya vahe. Sova evocoiyase aviye ari rendigüer ipíratá vahe.

¹⁷ Sepia ramoseve, aviapi ipive inungar omano vahe. Ahe rumo omundo opo oacato coti che rese aipo ehi cheu: “Nderesiquíyei chira. Esepia, che yipindar ité aico, ipandar avei. ¹⁸ Aicove vahe ité; yepe amano viña, cūritei rumo aicove iri ndopai chivaherā ité aico. Che areco che mborere-cuasa ava recocuer mocañi água. ¹⁹ Sese eicuachía co mbahe eresepia vahe: cūriteindar oime vahe mbahe iyavei mbahe oime vaherā curi. ²⁰ Co acoi ndereicuai vahe eresepia vahe siete yasitata che acato coti, ahe yuvirecoi Tūpa rembiguai siete tecua rupindar che reroyasar rārosar; evocoiyase vera hi oro apopri, ahe yuvirecoi siete tupri tecua pīpendar che reroyasar” ehi.

2

*Ñehesa siete tupri tecua-tecua pendar Jesús reroyasar upe.
Ñehesa Efeso pendar upe*

¹ “Eicuachía Tūpa rembiguai Efeso pendar che reroyasar rārosar upe: ‘Acoi vireco vahe oacato coti siete yasitata, ahe acoi oguata vahe siete vera hi yacatu rupi, aipo ehi imombehu: ² Che aicua opacatu mbahe pe rembiapo, pe poravíqui pīratasa iyavei pe yemovíracuasa. Aicua avei ndapeipotai ava naporai vahe pe pāhuve yuvirecoi vaherā. Pesecoāha avei ava, ore apóstol oroico, ehi tēi vahe; ipare peicua iporombopa tēisa yuvireco. ³ Che aicua peñemosaoño peyemombaraisu peico che raisupave; ndapecuerai eté ipipe.

⁴ Che rumo aicua oime mbahe ndahei vahe che piha rupi pe recocuer: ndapeyeāsu iri inungar yipindar. ⁵ Sese peyemom-ahenduha yipindar pe recocuer aviye vahe rese; pemboasi mbahe pe rembiapo, peyevi Tūpa upe; peyeāsu iri catu inungar yipindar. Anise ayevira pēu, arocuapara pe vera hi senda sui acoi ndapeyeviise Tūpa upe. ⁶ Co rumo mbahe pe rembiapo aviye cheu: ndapeipotaise nicolaítas rembiapo mbahe. Che avei niha ndaipotai eté. ⁷ ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi oyemoviracua vahe mbahe-mbahe tēi apoēhi água, itohu amondora ivira ha tecovesa resendar oime vahe teco orisave che Ru piri, ehi' erera icuachía chupe.

Ñehesa Esmirna pendar upe

⁸ “Eicuachía avei Tūpa rembiguai Esmirna pendar che reroyasareta rārosar upe: ‘Acoi yipindar vahe, ipandar avei; ahe acoi omano vahe viña, ocuerayevi iri rumo. Ahe ombou co ñehesa pēu aipo ehi: ⁹ Che aicua pe yemombaraisusa, pe paraíusa avei; pe rumo mbahe yar nungar ité peico iva pendar mbahe rese. Aicua avei pe rese ava semira tēi vahe, ore Tūpa rembiporavo judío oroico, ehi tēi vahe. Ndahei rumo ahe yuvirecoi. Esepia, Caruguar reroyasar tēi evoco yuvirecoi. ¹⁰ Ndapesiquíyei chira pe paraísu água sui. Esepia, Caruguar osoquenda ucara amove pe pāhu pendar secoáha água; pe paraísu rane itera niha diez ari rupi peico. Acoi peyemoviracua tuprise ité chupe, Cristo rese ité amanora, pe hesave, ahese amondora porerecosa tecovesa pēu. ¹¹ ¡Acoi osendu pota vahe, toyapisacaño Espíritu omombehu vahe rese opacatu che reroyasar upe! Acoi ava oyemoviracua vahe mbahe-mbahe tēi apoēhi água, ahe imanore ihā ndoiporarai chira imoñuviriosa manosa pipe, ehi' erera icuachía chupe.

Ñehesa Pérgamo pendar upe

¹² “Eicuachía avei Tūpa rembiguai Pérgamo pendar che reroyasareta rārosar upe: ‘Aipo ehi acoi vireco vahe quise pucu saimbe yoya vahe: ¹³ Che aicua pe recosa. Aheve acoi Caruguar oguapi oī; mborerecuar guasu nungar imboyeroy-apri secoi. Pe rumo peyemoviracuaño ité chupe che recocuer rese peico. Ndapeseyai eté che rese pe yeroyasa yepe oyuca tēi che recocuer mombehu tuprisar Antipas evoco tecua Caruguar recosave. ¹⁴ Che rumo aicua mbahe pe resendar: eiþeve amove ava ndoyepepi potai eté Balaam porombohesa sui yuvireco. Ahe omboaracua Balac israelita mboangaipa uca água, toyuvirohuño mbahe roho seropovéhepri mbahe rahanga upendar tēi, oya, iyavei, toyemboaguasaño yuvireco, oyapave avei. ¹⁵ Iyavei amove ava pe pāhuve ndoyepepi potai

eté nicolaíta porombohesa sui yuvireco. ¹⁶ Sese pemboasi pe recocuerai, peyevi Tüpa upe, anise che aso poyava voira pēu, ahese avavara chupe yuvireco che yuru pipe sui osē vahe quise pucu pipe, ehi. ¹⁷ ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! Acoi ava oyemoviracua vahe mbahe-mbahe tēi apoëhi ãgua, semihura amondora ndasepiasai vahe maná. Iyavei amondora ita morochi vahe chupe. Ahe ita rese icuachiasara terer ipiasu vahe oĩ, evocoii ava oipisi vahe güeraño oicuara, ehi' erera icuachia.

Ñehesa Tiatira pendar upe

¹⁸ “Eicuachía avei Tüpa rembiguai Tiatira pendar che reroyasareta rārosar upe: ‘Tüpa Rahir acoi vireco vahe güesa inungar tata rendigüer, ipi avei inungar acoi bronce rapipri aipo ehi imombehu: ¹⁹ Che aicua mbahe opacatu pe rembiapo; aicua pe poroaisusa, che rese pe yeroyasa, mbahe rese pe hañecosa iyavei pe yemoviracuasa. Aicua avei yipindar sui mbahe peyapo catú aviye vahe. ²⁰ Oime rumo mbahe pe rembiavi: peñemosayo evocoii cuña Jezabel pe pāhu pendar upe, ahe acoi oñehe tēi angahu vahe Tüpa rese viña. Ahe rumo ombopa tēi oporombohesa pipe che rembiguai iyemboaguasa-guasa tēi uca ãgua sereco iyavei ohu uca mbahe roho mbahe rahanga tēi upe seropovëhepri yuvireco chupe. ²¹ Che amondo vite tēi ari chupe, tomboasi oangaipa Tüpa upe oyevi ãgua, che yapave viña. Ahe rumo ndopoi potai eté oyemboaguasa tēisa sui. ²² Evocoiyase cûritei che amombaheasi ucara supave ino; iyavei acoi sesendarer yuvirecoi vahe, ahe avei iparaisu catura yuvireco acoi noñecuñaro potaise ité yuvireco. ²³ Ipare ayucapara imembrí ichui. Ëgue ehi opacatu che reroyasar oicuara yuvireco che aicua tupri ité opacatu ava pihañemoñetasa iyavei ñepei-peí pe yacatu amondora pe rembiapogüer reprí pēu. ²⁴ Pe rumo opacatu Tiatira pendar ndaperoyai vahe co porombohe raisa iyavei ndapeyembohei vahe Caruguar suindar aracuasa, ndicuasai yavai vahe, ehi vahe rese, pēu ndarecoi que ambuae che porocuaita. ²⁵ Peyemoviracuañora rumo evocoii mbahe pereco vahe rese, acoi che ayevise voi vitu curi. ²⁶ Acoi ava oyemoviracua vahe mbahe-mbahe tēi apoëhi ãgua, oyapo vahe che remimbotar mano rupi eté, chupe amondora mborerecuar seco ãgua opacatu ivi rupi ²⁷ inungar che Ruombou che mborerecuarã cheu; ëgue ehi aveira oporocuai opacatu tecua rupi inungar acoi vara guarepochi, mbahe riapiipa uca ãgua, aviyera acoi mahemoinda ñaihu apopri viña. ²⁸ Iyavei amondora yasitata cõhe rerusar chupe. ²⁹ ¡Acoi

ava osendu pota vahe, toyapisacaño Espíritu omombehu vahe rese opacatu che reroyasar yuvirecoi vahe upe! ehi' erera icuachía.

3

Ñehesa Sardis pendar upe

¹ "Eicuachía avei Tūpa rembiguai Sardis pendar che reroyasareta rārosar upe: 'Acoi ava vireco vahe siete tupri Tūpa espíritu iyavei acoi siete tupri yasitata no aipo ehi imombehu: Che aicua mbahe opacatu pe rembiapo; aicua yepe amove ava, Co mbia yuvirecoi vahe ité Tūpa upe nara, ehi pēu viña; omano vahe nungar tēi rumo peico. ² Peyemopoase catu peico iyavei pemonguerēhi catu acoi viroya vīte vahe. Esepia, oyepepipa pota ité yuvireco viña. Supi eté mbahe pe rembiapo che Ru rovaque, ndahei supi tupri vahe. ³ Peyemomahenduha acoi porombohesa peipisi vahe rese; pepoi rene ichui. Peyevi catu Tūpa upe. Ndapeyemopoaseise rumo, asora pēu inungar imonda rai vahe, ēgue ahera vicho pe resapiha. ⁴ Oime rumo amove ava pe pāhu pendar ndoy-apoi eté angaipa yuvireco, evocoyase inungar ava oguata vahe oturucuar morochi vahe rese, ēgue ehi aveira ahe güeco maranehi pipe oguata che rupi yuvireco. Esepia, ahe chupe iya ité. ⁵ Acoi ava oyemoviracua vahe mbahe-mbahe tēi apoēhi ãgua, ahe sese imondesara turucuar morochi vahe. Ahe serer namboyehoi chira cuachiar tecovesa resendar pipe sui, asenoira rumo che Ru rovai iyavei sembiguai eta rovaque avei curi. ⁶ ¡Acoi ava osendu pota vahe, toyapisacaño Espíritu omombehu vahe rese che reroyasar yuvirecoi vahe upe! ehi' erera icuachía.

Ñehesa Filadelfia pendar upe

⁷ "Eicuachía avei Tūpa rembiguai Filadelfia pendar che reroyasareta rārosar upe: 'Co seco maranehi vahe, supi tupri vahe ité, vireco vahe mborerecuasa aracahendar mborerecuas guasu David nungar, acoi omboise que oquenda, ñepei yepe que ava nomboyai chietera; iyavei acoi omboyase, ñepei yepe que ava nomboi chiete aveira, ahe aipo ehi: ⁸ Che rumo aicua mbahe opacatu pe rembiapo. Esepia, che amondo pe rovaque inungar oquenda imboipri pēu pemombehu vaherā che recocuer. Ahe que ñepei yepe ava nomboyai chietera yuvireco. Esepia, yepe pe nimirata tuprii vahe, peroya ité rumo che ñehe iyavei ndacheñomi eté ava sui peye. ⁹ Co Caruguar reroyasar semira tēi vahe, ore Tūpa rembiporavo judío oroico, ehi tēi vahe, ndahei rumo ahe eté vahe yuvirecoi. Ahe amoñenopihapa ucara pe rovai, toicua yuvireco che pe raisusa, che yapave. ¹⁰ Esepia, peroya ité che porocuaita,

peyemoviracua ité evocoī mbahe tēi upe peico. Evocoīyase che opoepira acoi ari tecoāhasa ouse opacatu ivi rupindar upe curi.¹¹ Ayevi poyavara. Peyemoviracua catu Tūpa reroyasa pereco vahe rese. Evocoīyase ūnepei yepe que ava ndovirocuai chietera Tūpa suindar porerecosa pe sui.¹² Acoi oyemoviracua vahe mbahe-mbahe tēi apoēhi āgua yuvireco, ahe che Ru piri nara ité yuvirecoira. Ahe evocoīyase inungarra che Ru Tūpa rēta vīracuasa ndopai vahe yuvireco. Sese arova ucara che Ru Tūpa rer iyavei che Ru Tūpa recua rer avei no, ahe Jerusalén piasu, evocoī ou vaherā iva pendar che Ru Tūpa sui, iyavei che rer ipiasu vahe ité arovara sese no.¹³ ¡Acoi ava osendu pota vahe, toyapisacaño Espíritu remimombehugüer rese che reroyasareta upe! ehi' erera icuachía.

Ñehesa Laodicea pendar upe

¹⁴ “Eicuachía avei Tūpa rembiguai Laodicea pendar che reroyasareta rārosar upe: ‘Evocoī seco tuprī vahe, omombehu vahe mbahe supi tuprī vahe ité, ahe ichui oime opacatu Tūpa rembiapo, ahe aipo ehi:¹⁵⁻¹⁶ Che aicua mbahe opacatu pe rembiapo. Pe inungar i ndahei sōhisa vahe iyavei ndahei sacu vahe. I sacu raimi tēi vahe nungar peico pe rembiapo pipe. ¡Nepei reseve vahe rumo aipota, ndahei iguayi tēi vahe! Pe recocuer rumo iguayi tēi vahe nungar, sese opomboyeviñora cheyesui.¹⁷ Esepia, pepihañemoñeta: Che mbahe yar ité, opacatu mbahe areco, nipanei eté mbahe cheu, peye viña. Pe rumo ndapeicuai pe paraísusa che Ru rovaque inungar ndasesapisoī vahe peico. Iyavei ndapeyavii nditurucuai vahe peico.¹⁸ Sese opomboaracua; peseca iva pendar oro tatave imoatiropri nungar che sui pe paraísuēhi iri āgua che Ru rovaque; peseca avei turucuar morochi vahe teco tuprisa peyeupe che suindar nani tuprī vahe nungar pipe pe recoēhi āgua, pe chīēhi āgua avei iyavei inungar ava oseca mosa güesa upe nara osareco iri āgua, ēgue peye aveira.¹⁹ Che añehe pīrata seco mohivi āgua che rembiaisu upe yepi. Peyemonguerēhi catu, pemboasi ité pe recocuer che Ru Tūpa upe pe yevi āgua.²⁰ Esepia, inungar que ava oquenda omotara oquendipive ohā viña, ēgue ahe pe pīhave vichico; pesenduse che ūnehe, pemboira cheu. Che evocoīyase aiquera pe pīri, yacarura oyepiri.²¹ Acoi ava oyemoviracua vahe mbahe-mbahe tēi apoēhi āgua yuvireco, ahe amboguapi ucara che ipive imoi che porocuasave, inungar che mbahe tēi reco reroyi pare, aguapi che Ru ipive vīte.²² ¡Acoi ava osendu pota vahe, toyapisacaño Espíritu remimombehugüer rese che reroyasareta upe! ehi imombehu pēu' erera icuachía” ehi Jesúś cheu.

4

Tūpa mboeteisa ivave

¹ Ipare asepia mbahe inungar oquenda oyemboi vahe ivave. Ahese evocoī ūneha īpīrata vahe mimbi nungar yipindar oñeha vahe cheu, ahe asendu iri: “Eyeupi ave. Che evocoiyase mbahe amboyecuara ndeu mbahe imboaviyepirā curi” ehi.

² Ahe pipeve voi, Espíritu pīratasa pipe aico iyavei asepia tenda ivave, ahe iharive ūnepe oguapi oī. ³ Co oguapi vahe ndoyavii eté ita jaspe porañetesa iyavei ndoyavii cornalina porañetesa no. Iyavei oime oyere tupri vahe tenda rese inungar arco iris sendi vahe, inungar esmeralda. ⁴ Iyavei asepia evocoī rese oyere tupri ambuae veinticuatro tenda, ahe iharive oguapi yuvinoi veinticuatro avei icuaipri yuvirecoi vahe; iturucuar morochi vahe yuvireco iyavei oaca rese omboyeretupri oro apopri yuvireco. ⁵ Evocoiyase Tūpa renda sui yuvinose overa-vera vahe, iyavei siapu guasu vahe, osunu vahe no; iyavei siete tupri tataendi sendipa yuvireco evocoī tenda rovai, ahe co siete tupri Tūpa espíritu. ⁶ Evocoī tenda rovai oime avei ndoyavii tupri para guasu tipiu vahe oyecua tupri vahe mbahe ipipe.

Ambuae tenda pāhu rupi oyere tupri Tūpa renda rese irungatu iva pendar yuvirecove vahe, ahe sesa oyere tupri vahe sese, ahe osareco tupri vahe güenonera, guaquiuei coti avei no. ⁷ Yipindar yuvirecove vahe pāhu pendar ahe ndoyavii tupri yagua pīta; saquicuerindar ndoyavii tupri guaca cuimbahe; imombosapisa ndoyavii eté ava; imoirungatusa cute ndoyavii vira guasu oveve vahe. ⁸ Evocoī iva pendar irungatu yuvirecove vahe vireco oyacatu seis tupri opepo yuvireco iyavei vireco opacatu güete rese güesa. Ndopituhui eté ari, pītu rupi aipo ehi yuvireco:

“¡Santo, santo, santo ité secoi, yande Yar Tūpa ité, ahe mbahe mboavaisarēhi, yipivé vahe ité, cūriteindar, apirēhi vahe!”

ehi yuvireco.

⁹ Evocoī yuvirecove vahe omboetei yuvireco, “Aviye ndeu” ehi co oguapi vahe oī tenda harive ndopai vahe upe. ¹⁰ Egüe ehise evocoiyase veinticuatro tupri icuaipri yuvirecoi vahe, ahe oñenopīha imboeteisa pipe sovai yuvireco. Ipare osequii oaca resendar oyere tupri vahe omborerecuasa resendar sovai aipo ehi:

¹¹ “Ore Yar Tūpa, iya ité nde mboeteisa, ndeu sapucaisa nde pīratasa rese.

Esepia, nde ereyapo vahe mbahe opacatu; nde remimbotar rupi niha oime opacatu mbahe”

ehi yuvireco chupe.

5

Ovesami upe güeraño iyacatu cuachiar imboyaprí mboi água

¹ Che asepia cuachiar Tūpa vireco vahe oacato cotí, icuachiprí ipipe cotí, ocar cotí avei no, imboyaprí siete sello pipe.

² Ipare asepia Tūpa rembiguai seco ivate vahe, ahe oporandu pírata oico aipo ehi: “¿Ava upe vo iya cuachiar mboi água iyavei sello imboyeroyaprí mondoro água no?” ehi. ³ Ndipoi eté rumo que iva pendar, ivi pipendar, ivivri pendar oicatu vaherã cuachiar pipira sepia água viña. ⁴ Evocoiyase che ayasehó iteanga. Esepia, ndipoi eté que ñepei yepe oime angara avíye vahe cuachiar pipira sepia água viña. ⁵ Ahese icuaiprí pâhu pendar ñepei aipo ehi cheu: “Ereyaseho iri eme. Esepia niha, evocoai ava yagua píta yahe vahe chupe, Judá suindar, acoi mborerecuar guasu David suindar avei, ahe niha Caruguar osecoreroyi. Sese iya ité chupe siete sello mondoro cuachiar pipira água” ehi.

⁶ Evocoiyase, asepia Tūpa rovai iva pendar irungatu yuvirecove vahe pâhuve, icuaiprí yuvirecoi vahe mbiterve, ñepei ava Ovesamí nungar ihäi, avíye seropovëhepri. Ahe niha vireco siete tuprí sâchi, siete tuprí avei sesa; sesa evocoiyase siete tuprí Tūpa espíritu yuvirecoi opacatu ivi rupi imboguataprí. ⁷ Ipare evocoai Ovesamí oso, oipisi cuachiar evocoitenda haríve oguapí vahe yacato cotí sui; ⁸ ipisi pare, evocoirungatu yuvirecove vahe, iyavei veinticuatro tuprí icuaiprí, ahe oñenopihapa Ovesamí rovai yuvireco. Oyacatu ñepei-peivireco arpa yuvireco, itaisí ríru oro apoprí, ahe avei vireco yuvireco, ahe itaisí niha Tūpa reroyasar yeruresa. ⁹ Osapucai ipiasu vahe sapucaisa pipe aipo ehi yuvireco:

“Ndeu iyacatu ité cuachiar pisi água,
imboyaprí mondoro água avei no.

Esepia niha, nde yucaprí seropovëhepri ereico.

Evocoiyase nde ruvi pipe eremboepipa Tūpa upe nara opacatu ava ambuae-ae tēi vahe, ñehe ambuae-ae tēi vahe avei, ñepei-pei tecua yacatu rupindar, ivi rupindar avei yuvireco.

¹⁰ Iyavei eremomborerecuu uca Tūpa upe nara, erembopahi uca avei no, ipare ahe oporocuaira opacatu ivi rupi yuvireco” ehi osapucai yuvireco.

¹¹ Ipare asepia, asendu avei Tūpa rembiguai rehii ñehe evoco oyere tuprí vahe tenda rese yuvireco, iyavei evoco yuvirecove vahe ñehe, icuaiprí ñehe avei asendu setá iteanga yuvirecoi. ¹² Ahe aipo ehi pírata yuvireco no:

“¡Co Ovesami yucapirer, ahe chupe iyacatu ité mborerecuasa pisi água, opacatu Tūpa suindar porerecosa pisi água, mbahecuada,
piratasa, mboyeroyasa, poromboeteisa, iyavei sapucaisa pisi água avei no!” ehi.

13 Ahese asendu avei opacatu Tūpa rembiapo ivave yuvirecoi vahe, ivi pipendar, ivíri rupindar iyavei para guasu pipendar, aipo ehi yuvireco:

“¡Toime sapucaisa, Tūpa upendar mboyeroyasa, imboeteisa, iyavei píratasa, ahe timondosa apírēhi vaherā Tūpa acoi güendave oguapi vahe upe, Tahir Ovesami nungar upe avei no!” ehi.

14 Evocoi irungatu ava yuvirecove vahe, “¡Égüe tehi eté!” ehi yuvireco. Iyavei icuaipri veinticuatro tupri yuvirecoi vahe, ahe oñenopihā yuvireco sovai imboeteisave.

6

Siete sello

1 Ipare asepia acoi Ovesami omondoro yipindar vahe sello siete vahe cuachiar mboyasa sui. Ahese asendu avei ava irungatu yuvirecoi vahe pāhu pendar oñeho pírata. Íñehe ndoyavíi osunu vahe, “¡Erio!” ehi cheu. 2 Ahese asepia cavayu morochi vahe, ahe ava ihari pendar vireco virapar. Chupe omundo yeguaca yuvireco. Égüe ehi ahe osē seco pírata catu vahe ava reco reroysi água.

3 Omendorose acoi Ovesami imoñuviriosa sello, ahese asendu imoñuviriosa yuvirecove vahe pāhu pendar ñehe, “¡Erio!” ehi vahe cheu. 4 Ipare osē cavayu píra vahe, ahe ava ihari pendar oipisi píratasa mbahe tuprisa rerocua água ivi pipendar ava sui ‘toyeyuca-yuca tēi yuvireco’ oyapave. Ipare imondosa quise pucu chupe.

5 Omendorose acoi Ovesami imombosapisa sello, ahese asendu imombosapisa yuvirecove vahe pāhu pendar ñehe, “¡Erio!” ehi vahe cheu. Amahe sese, ipare asepia cavayu sū vahe, ahe ava ihari pendar vireco opo pipe mbahe rāhasa.

6 Ipare asendu yuvirecove vahe cotindar ñehe, ahe aipo ehi: ‘Népei kilo trigo serocuasa guarepochi ñepei ari resendar mboraviquí reprí pipe, mbosapi kilo cebada evocoiyase serocuasa avei ñepei ari resendar mboraviquí reprí pipe no. Pemocañi eme mbahe quira iyavei uva ricuer avei no’ ehi.

7 Evocoi Ovesami omendorose imoirungatusa sello, ahese asendu ava imoirungatusa ñehe aipo ehi: “¡Erio!” ehi cheu.

8 Amahe, ipare asepia cavayu iyu rasí vahe, ahe ava ihari pendar serer Tehögür. Ipare saquicuei ou vahe oico ahe serer Omano-vahe-recosa. Ahe chupe yuvireco imondosa

teco píratasa ivi imoirungatusa yahocuer rupi iguata água ava yuca água vavasa pipe, tieporéhi pipe, mbaherasi pipe, mbahe ipi pipe avei no.

⁹ Evoco Ovesami omondorose imbopoyandeposa sello, ahese asepia mbahe seropovéhepri rendavríve ava hã, ahe yucasa vahe yuvireco Túpa Ñehengagüer mombehusa sui tẽi iyavei Jesús reroyasa sui tẽi avei no. ¹⁰ Ahe aipo ehi pírata yuvireco: “Ore Yar Túpa seco maranehi, supi tupri vahe, ¿mbahese vo eremombaraisura ore yucasarer yuvirecoi vahe ivi pipendar ore repisave?” ehi yuvireco. ¹¹ Ipare imondosa iyacatu turucuar morochi vahe chupe, ahese aipo ehi: “Pepituhu vité rane, tayaviyepa rane pe rivireta retacuer Cristo upendar mbahe aposa pipe yucapri pe nungar yuvireco” ehi.

¹² Ipare Ovesami omondorose imoñepei ovasa sello, ahese oime ivi ririi ipíratá vahe. Ari evocoiyase sū, aviye acoi turucuar sū vahe mano sendar yemondesa iyavei yasi pírá inungar tuvi, ¹³ yasitata evocoiyase opa ovíapi iva sui ivi rese yuvireco no inungar acoi higo hacri ombosururu vahe ivitu ai yepi. ¹⁴ Ahese iva ndoyecua iri cute inungar acoi cuachiar yeapoapipri vahe, opacatu tupri avei ivitri, caha pãhu avei no osiri güenda sui yuvireco. ¹⁵ Mborerecuareta avei co ivi pipendar yuvirecoi vahe opa tẽi oñemi mbahecuar pipe yuvireco, ita guasu pãhu rupi avei yuvireco no, oyoya guasu seco ivate vahe, sundao rerecuareta, mbahe yar seco píratá vahe, iyavei opacatú tupri mbiguai eta, ava ndahei vahe mbiguai avei; ¹⁶ iyavei aipo ehi yuvireco ivitri upe, itape guasu upe avei no, “¡Eviapi ore haríve, toroñemipa tẽi Túpa sui iyavei Ovesami sui acoi ombou vahe co poronupasa ipíratá vahe oreu! ¹⁷ Esepia, oyepota ité Túpa ñemoirosa oreu. Ndipoi chietera ava oyemoviracua tupri vahe oyese chupe” ehi yuvireco.

7

Israel suindar iporavopri yuvirecoi vahe

¹ Ipare asepia irungatu tupri Túpa rembiguai iva pendar yuvinohai vahe irohi coti, norte coti, ari sësa coti, caharu coti avei no omombituhu tupri vahe irungatu ivitu yuvirecoi vahe ivi hari rupi ipeyuëhi água, que para guasu pipe angara viña, que ñepei yepe ivira ro angara viña no. ² Ipare asepia avei ambuae Túpa rembiguai iva pendar ou vahe ari sësa coti sui, ahe vireco oyese Túpa oicove vahe rer mondosa. Ahe niha osapucai píratá evoco irungatu tupri Túpa rembiguai iva pendar yuvirecoi vahe upe, oipisi vahe píratasa ivi, para guasu momara água yuvireco, aipo ehi: ³ “¡Ndapemomara vité chira rumo ivi, para guasu avei, ivira avei no, co ndoromondo

viteiseve ava Tūpa rembiguai eta upe isiva rese Tūpa rer icuachiapri!" ehi.

⁴ Ipare asendu Tūpa rer oipisi vahe retacuer: ciento cuarenta y cuatro mil tupri, evoco opacatu doce judío ramoi suindar pāhu sui iporavopri yuvireco. ⁵ Doce mil tupri yuvirecoi iporavopri Judá suindar, doce mil tupri Rubén suindar, doce mil tupri Gad suindar, ⁶ doce mil tupri Aser suindar, doce mil tupri Neftalí suindar, doce mil tupri Manasés suindar, ⁷ doce mil tupri Simeón suindar, doce mil tupri Leví suindar, doce mil tupri Isacar suindar, ⁸ doce mil tupri Zabulón suindar, doce mil tupri José suindar, ipa evoco iyase doce mil tupri Benjamín suindar.

Ava rehii iturucuar morochi vahé

⁹ Ipare asepia setá iteanga ava, opacatu ivi rupindar, ambuae-ae tēi vahe, ambuae-ae tēi vahe iñehe yuvireco iyavei secua ambuae vahe avei no. Ahe opūhapa vahe Tūpa rovai Ovesami rovai avei yuvireco no, ahe ndayaicatui eté ipapapa água. Esepia, setá etepri yuvireco iyavei iturucuar morochí vahe pāve; pindo-pindomi vireco opove yuvireco no. ¹⁰ Ipare opacatu guasu oñehe pírata yuvireco aipo ehi:

“¡Poropísirosa yande Ru Tūpa suindar, ahe oguapi vahe oí güendave, iyavei Ovesami suindar avei no!” ehi.

¹¹ Iyavei opacatu Tūpa rembiguai iva pendar yuvirecoi vahe oyere tupri Tūpa renda rese, icuaipri rese avei yuvinoha iyavei irungatu yuvirecove vahe rese avei no; ahese oyeaivi omboya ité osiva ivi rese senda rovai Tūpa mboeteisave yuvireco, ¹² aipo ehi:

“¡Égue tehi!

Sapucaisa, poromboeteisa, mbahecusa, ‘¡Aviye ndeu’ hesa, poromboyeroyasa, mborerecuasa,
teco píratasa avei tasecoi yande Ru Tūpa upe!
¡Égue tehi apiréhi vaherá ité yepi!” ehi.

¹³ Ahese icuaipri ipāhu pendar aipo ehi cheu cute: “¿Ereicua vo co ava rehii iturucuar morochi vahe pāve yuvirecoi, ereicua que sui pīha yugüero?” ehi. ¹⁴ Che evoco iyase, “Nde rumo ereicua” ahe chupe. Ipare ahe aipo ehi cheu: “Co acoi yuvinose tupri vahe ité teco asisa sui yuvireco, inungar oyosei, omomorochi vahe oturucuar, égue ehi avei güecocuer imomorochi Ovesami ruví pipe yuvireco.

¹⁵ “Sese Tūpa renda rovai yuvirecoi, chupe mbahe apo água ari, pītu rupi avei sēta pipe.

Güendave oguapi vahe oí, güecocuer pipe osepira.

¹⁶ Evoco ndiyumbiasi iri chira yuvireco, ndihusei iri chiaveira, iyavei ari ndoyope iri chira, ndasacuvasi iri chiaveira chupe no.

17 Esepi, evoco Ovesa secoi Vu renda rovai,
ahe osārora ava rehii sereco inungar ovesa rārosar.
Ipare opara viraso tecovesa resendar i ndopai vahesave
imboihu āgua.
Tūpa evocoiyase omombituhupara imboyasehosa sui
yuvireco" ehi.

8

Imoñuvirío ovasa sello iyavei itaisi rapisa oro apori

¹ Ipare coiye cute co Ovesami omondorose imoñuvirío ovasa sello cuachiar mboyasa ichui, ahese sīu tupri ivave ñepei hora yemombitesa rupive. ² Ichui asepia siete tupri Tūpa rembiguai iva pendar yuvinohai vahe Tūpa rovai, chupe opa imondosa siete tupri mimbi. ³ Ipare ou ambuae Tūpa rembiguai iva pendar oro itaisi rapisa reseve, iyavei ou ohā itaisi rapisa renda rovai; ipare imondosa tuvichá itaisi chupe oicuavēhe vaherā oyoya tupri opacatu ava Tūpa upendar yeruresa rese oro mbahe reropovēhepri renda harive; ahe Tūpa renda rovai chini vahe. ⁴ Itaisi rātachi evocoiyase oso Tūpa rembiguai iva pendar po sui. Ëgue ehi oyepota oso Tūpa recosave, oyoya tupri chupendar yeruresa rese. ⁵ Ipare evocoiyase Tūpa rembiguai iva pendar opoco itaisi rapisa rese, omboapipo mbahe reropovēhepri renda pendar tātapii pipe. Ipare opa omombo ivi harí rupi. Aheseve voi osunu vahe opororo-roró, overa-vera iyavei ivi oririi.

Siete vahe mimbi

⁶ Evocoiyase siete tupri Tūpa rembiguai iva pendar oyemoingatu voi güemimbi moñehe āgua yuvireco.

⁷ Yipindar vahe Tūpa rembiguai omoñehe güemimbi, ahese imombosa ivi harí rupi amanda iyavei tata oyeseha vahe tuví rese. Ipare opa ocai ivi mombosapisa yahocuer. Oyoya tupri ivira mombosapisa yahocuer rese iyavei capihi reseve avei opa yuvirocái.

⁸ Imoñuviriosa Tūpa rembiguai omoñehe güemimbi. Ahese imombosa para guasu pipe inungar tupri acoi ivitri sendi vahe tata pipe; ipare para guasu mombosapisa yohacuer oyeapo tuví. ⁹ Iyavei para guasu mombosapisa yahocuer pipendar ava omano yuvireco. Ipare carite guasu mombosapisa yahocuer pipendar opa tupri avei imocañisa.

¹⁰ Ipare imombosapisa Tūpa rembiguai iva pendar omoñehe güemimbi, ahese yasitata tuvichá vahe oviapi iva sui ou. Sendi guasu inungar acoi ivira rese tata sendi guasu vahe. Ahe oviapi iai mombosapisa yahocuer pipe iyavei ivi sui iohē vahe mombosapisa yahocuer pipe avei no. ¹¹ Yasitata

rer evocoiyase Iro-vahé. Ipare i mombosapisa yahocuer iró iteanga. Evoco i pipe setá ava omano yuvireco.

¹² Imoirungatusa Túpa rembiguai omoñehe güemimbi. Ipare ari mombosapisa yahocuer imegua, yasi mombosapisa yahocuer, iyavei yasitata mombosapisa yahocuer avei no. Ichui imombosapisa yahocuer ndosesape iri yuvireco ari mombosapisa yahocuer pipe, pítu mombosapisa yahocuer pipe avei no.

¹³ Ipare asepia, asendu avei no vira guasu ovevese i va mbiter rupi, aipo ehi pucu oñeho oico: “¡Too, too! ¡Iparaisu catura moco ava yuvirecove vité vahe ivi pipe yuvireco acoi omoñehese ambuae mbosapi Túpa rembiguai güemimbi yuvireco!” ehi.

9

¹ Túpa rembiguai imbopoyandeposa omoñehese güemimbi, ahese asepia yasitata ovíapi vahe i va sui ou ivive. Ipare chupe imondosa ivicuar picucu pítumimbi vahe mboisa. ² Ipare omboise ivicuar rovapisa, ichui opúha tātachi, inungar acoi horno guasu pipe sui oséh vahe. Evocoiyase evoco i tātachi ndosesape uca iri ari upé, naporéhi iri eté mbahe. ³ Iyavei evoco i tātachi sui opa yuvinose tucru guasu rehí oñemosai opacatu ivi rupi; chupe avei imondosa seco pírata água inungar acoi mbaherumbiquiápe. ⁴ Icuaisa rumo opacatu capihi mbahe rocrí iyavei ivira momaraéhi água, égue ehi rumo acoi ava nomboyecuai vahe osiva rese Túpa rer, chupe nara ité. ⁵ Nimondosai rumo mborocuaita chupe ava yuca água. Égue ehi rumo ‘tomombaraisu pucu rane moyandepo yasi rupi sereco’ oyapave tēi, inungar tupri acoi mbaherumbiquiápe rasíauer.

⁶ Evoco i ari rupi ava oipota tēira omano água yuvireco viña. Imanosa rumo que vitera yuvireco ichui.

⁷ Tucru guasu rehí inungar cavayu imoingatupri vavasave nara yepi; oaca rese evocoiyase vireco ndoyaví yeguaca oro apopri, iyavei sova avíye tupri ité ava repiaca. ⁸ Iha ndoyaví cuña ha, sái evocoiyase ndoyaví tupri yagua píta rai. ⁹ Setecuer evocoiyase oyopia tupri guarePOCHI apopri, iyavei ipopo riapuguer avíye tupri ité acoi cäreto riapuguer cavayu vinoña vahe vavasave. ¹⁰ Vireco vuguai rese opopiar avíye mbaherumbiquiápe popiar. Ahe niha vireco opíratasa moyandepo yasi rupi ava momara água tēi. ¹¹ Evoco i tucru guasu rerecuar, ahe icuapri ivicuar ipicucu vahe mboi água. Ahe serer hebreo ñehe pipe Abadón; griego ñehe pipe evocoiyase Apolión ehi.

¹² Opa yipindar vahe mbahe-mbahe tēi; oime vité rumo co pare ñuvirío mbahe tasí vahe.

¹³ Imoñepei ovasa Tūpa rembiguai omoñehese güemimbi, ahese asendu ñehesa itaisi rapisa renda oro apopri Tūpa rovaindar irungatu sāchi vahe pāhu sui. ¹⁴ Ahe aipo ehi evocoímoñepei ovasa Tūpa rembiguai upe: “Eyorapa evocoíirungatu Tūpa rembiguai ñapichimbri iai guasu Eufrates ivirindar” ehi. ¹⁵ Evocoiyase opa yorasa ava mombosapisa yahocuer yuca ãgua yuvireco. Esepio, evocoíimoingatupri co ari rupi tuprise nara yuvireco. ¹⁶ Ipare asendu sundao rehii cavayu harive yuvirecoi vahe, ahe setacuer doscientos millones tupri.

¹⁷⁻¹⁸ Ëgüe ehi asepia cavayu rehii che quer nungar pipe, ihari pendar evocoiyase vireco opochiha rupi tupri oyoepisa guarepochi apopri yuvireco, ahe iparagüer píra vahe tata nungar, sovi vahe, iyu vahe avei no. Cavayu rehii ãca evocoiyase aviye tupri yagua píta ãca, iyuru sui evocoiyase yuvinose-nose tata, tātachi iyavei azufre. Ipipe sui ava mombosapisa yahocuer opa tupri omano yuvireco. ¹⁹ Esepio niha, cavayu píratasa iyuru rese chini, suguai rese avei no; ahe suguai ndoyavii tupri ité mboi ãca, ipipe avei ava omomara.

²⁰ Ava rumbirer rumo nomanopa vitei vahe co mbahe tēi sui yuvireco, nosecuñaro eté güecocuerai yuvireco. Ndopoi potai eté caruguar mboetei aisa sui, iyavei opacatu mbahe rahanga tēi oro apopri, guarepochi, bronce, ita, anise ivira apopri mboeteisa sui avei yuvireco. Evocoímbahe apopri rumo ndosarecoi vahe, ndosendui vahe ité mbahe, ndoguatai vahe avei. ²¹ Iyavei noñecuñaro potai eté oporapichisa sui yuvireco, opaye aisa sui, que cuña, que cuimbahe ambuae rese angaipa aposa sui, omonda raisa sui avei.

10

Tūpa rembiguai iva pendar vireco vahe icuachiapri cuachiarmi

¹ Ipare asepia ambuae Tūpa rembiguai iva pendar ipíratá vahe ogüeyise iva sui ou mbahe pítu pāhuve; ahe ñaca rese arco iris oyere tupri. Sova sendí aviye ari, setima evocoiyase ndoyavii tata rendigüer opúha tupri vahe. ² Cuachiarmi oyemboi vahe vireco opove. Opi oacato cotindar pipe opíro para guasu rese, ambuae opíve evocoiyase opíro ivi rese.

³ Evocoiyase sāse píratá, inungar yagua píta rāse; sāsese, evocoiyase siete tupri osunu vahe ñehe oyendu yuvireco.

⁴ Oñehepase, ahese iñehe che aicuachiara viña; asendu rumo iva sui ñehesa aipo ehi vahe: “Eremboyecuai rene acoi siete tupri osunu vahe ñehe, ndereicuachiai chietera” ehi cheu.

⁵ Evocoiyase Tūpa rembiguai asepia vahecuer, ahe acoi opíro vahe para guasu rese, ivi rese avei opo oacato cotindar

omopooha iva coti. ⁶ Ichui Tūpa ndopai vahe rer pīpe evoco oyapo vahe iva, ivi, para guasu iyavei opacatu mbahe ipor reseve, omoingatu oñehe aipo ehi: “Nasarosa iri chitera; ⁷ oyepotase rumo imoñuvirío ovasa Tūpa rembiguai upe güemimbi moñehe ãgua, ahese imboavíyesara Tūpa remimbotar yipindar ndicuasai vahe, ahe acoi omombehu vahe güembiguai oñehe mombehusar upe aracahe” ehi.

⁸ Néhesa asendu vahe iva sui oñehe iri cheu aipo ehi: “Eso, tereipisi cuachiarimi imboipri Tūpa rembiguai vireco vahe evoco opíro vahe para guasu rese ohā, ivi rese avei no” ehi. ⁹ Evocoiyase aso Tūpa rembiguai upe, aporandu cuachiarimi rese, ahese ahe aipo ehi cheu: “Ndo co, eipisi, ehu. Nde yuru pīpe evocoiyase sêhera eiri nungar, nde avíterve rumo irora” ehi cheu.

¹⁰ Ahese aipisi cuachiarimi cute Tūpa rembiguai sui, ipare ahu; yipindar sêhé che yuru pīpe inungar eiri, amocopase rumo, che avíterve iró cheu. ¹¹ Evocoiyase aipo ehi yuvireco cheu: “Nde ereñehe irira Tūpa aipo ehi vahe rese ambuae-ae tecua pípendar rese, ivi rupindar rese, ambuae-ae iñehe vahe rese, mborerecuar rese avei no” ehi.

11

Ñuvirío ava Tūpa recocuer mombehusar

¹ Ipare ombou vara mbahe râhasa yuvireco cheu, ichui aipo ehi yuvireco cheu no: “Erio, teresâhapa tûparo, mbahe reropovéhepri renda avei, ipare opara ereipapa ipípendar Tūpa mboeteisar retacuer” ehi. ² “Nderesâhai chira rumo ñachimbrí pīpe tûparo rocar rupi. Esepia, evoco opa imondosa ava Tūpa ndoicuai vahe upe, ahe opírora tecua nimarai vahe rese yuvireco cuarenta y dos yasi rupi” ehi. ³ “Ipare ñuvirío ava amondora che recocuer mombehu ãgua opacatu ava upe mil doscientos sesenta ari rupi. Ahe omondera turucuar ipo guasu vahe yuvireco” ehi.

⁴ Co ava ñuvirío, ahe inungar ñuvirío ivira Olivo iyavei inungar ñuvirío vera hí yuvinoha vahe ivi Yar rovai. ⁵ Acoi que oimese ovireco mara pota vahe, ahese che reco mombehusar yuru sui osëra tata sapipa ãgua; ëgue ehira ava omano que che reco mombehusar reco momara potasar. ⁶ Co ñuvirío vireco opíratasa oqui vahe mombita ãgua, acoi ari rupi che reco mombehu viteseve yuvireco; iyavei vireco píratasa i recuñaro ãgua tuví pīpe yuvireco, imombaraisu uca ãgua avei ivi opacatu-catú tēi mbaherasi pīpe güemimbotar rupi.

⁷ Omboavíyepase rumo Tūpa reco mombehusa yuvireco, ahese osëra ivicuar guasu ipicucu vahe sui mbahe ípi vai.

Ahe ovavara sese, osecopira, ichui oyucara. ⁸ Sehögür evocoiyase yangarecuavëhi tëi yugüeru tecua guasu rocar rupi, ahe tecua pipe avei yande Yar oyatica curusu rese yuvireco, ahe tecua pendar upe amove ava, "Sodoma pendar nungar yuvirecoi" ehi yuvireco; "Egipto pendar nungar yuvirecoi" ehi avei yuvireco no. ⁹ Ipare mbosapi ari yemombitesa rupi, ava-ava tëi tecua rupindar, ava ambuae-ae tëi vahe, iñehe ambuae vahe iyavei ambuae-ae ivi rupindar osephiaño tëira sehögür yuvireco iyavei ahe noñotí ucai chietera ava upe yuvireco. ¹⁰ Ava yuvirecove vahe ivi pipe, ahe oviharetera yuvireco imano rese. Ëgüe ehira sorivete, iporerecora oyese yuvireco. Esepio, evocoi ñuvirío ava Tüpa ñehe mombehusar imombaraisupirer yuvirecoi.

¹¹ Mbosapi ari yemombite pare rumo, Tüpa opa ombogüerayevi, ahese opûhapa yuvireco. Evocoiyase ava opacatu osepio vahe osiquiyé iteanga yuvireco ichui. ¹² Ipare ahe ñuvirío osendu yuvireco ñehesa ipírata vahe iva suindar aipo ehi vahe: "¡Peyeupipa ave ivate!" ehi. Evocoiyase opa oyeupi ivave yuviraso iva quiha pâhu rupi oamotarëhisareta rembiepiave. ¹³ Aheseve voi oime ivi riri tuvichá vahe, ichui tecua guasu im bodiesa yahocuer opa onduru; ahese siete mil tupri ava opa omano yuvireco. Evocoiyase ava rumbirer, osiquiyepave tëi osapucai Tüpa iva pendar upe imboeteisa pipé yuvireco.

¹⁴ Opa mbahe-mbahe tëi moñuviriosa cute; ou poyava irira rumo imombosapisa.

Imoñuvirío ovasa Tüpa rembiguai omoñehe güemimbi

¹⁵ Imoñuvirío ovasa Tüpa rembiguai omoñehese güemimbi, ahese oyeendu ñehesa ipírata vahe iva suindar aipo ehi vahe: "Yande Yar Tüpa, Sembiporavo Poropísírosar avei vireco co ivi pipendar mborerecuasa opovrîve yuvireco cute.

Ahe evocoiyase mborerecuuar apírëhi vaherä itera secoi" ehi. ¹⁶ Evocoiyase veinticuatro tupri icuaipri, evocoi oguapi vahe yuvinoi Tüpa renda rovai, ahe oyeaivi omboya ité osiva ivi rese imboeteisa pipe yuvireco, ¹⁷ aipo ehi:

"Aviye ndeu ore Yar, Tüpa mbahe mboavaisarëhi, nde acoi yipisuive vahe ité,

ereicoveño avei cûritei.

Esepio, nde píratasa tuvichá vahe pipe ereporocuai eico.

¹⁸ Ambuae tecua rehii pendar nde amotarëhi ité yuvireco.

Nde ñemoirosa rumo cûritei oyepota, iyavei nde porandusa oime voira ava omano vahe upe.

Iyavei eremondora mbahe porerecosa nde rembiguai eta nde ñehe mombehusar upe,

ndeundar seco catupri vahe upe, iyavei acoi nde rer mboeteisar upe no, que seco ivate vahe upe, que seco ivi coti catu vahe upe avei no; iyavei eremocañira co ivi pipe mbahe tēi rerusar” ehi yuvireco.

¹⁹ Ahese oyemboi tūparo iva pendar, iyavei oyecua tupri cuachiar porocuaita resendar riru. Ipare overa-vera, siapu guasu, osunu, ivi oriri, amanda osururú avei no.

12

Cuña iyavei mbahe ipi oporomocañi vahe

¹ Evocoiyase iva rese oyecua mbahe poromondiisa tuvichá vahe ambuae mbahe mboyecua água: oime cuña iturucuar inungar ari rendiguer, aviyé opíro vahe yasi rese ohā, oaca yeguaca rese doce tupri yasitata vireco. ² Co cuña ipuruha oico, sásé tēi omembri iha pota água oyesui. Esepiá niha, oiporará ité tasicuer. ³ Ipare coiyé oyecua iva rese ambuae mbahe mboyecua tuprisa: mbahe ipi píra vahe, ahe ñaca siete tupri, sachi evocoiyase diez iyavei vireco yeguaca oaca yacatu. ⁴ Suguai evocoiyase ombotiriri yasitata iva pendar imombosapisa sui ñepei iyahocuer seraso. Ipare opa omombo ivive. Ahe evocoiyase opita osáro cuña imembira pota vahe rovai ohā, “Tahupaño voi imembri oha ramoseve” ehi viña. ⁵ Ipare co cuña membra oha cuimbahemi, ahe mborerecuar virecora mbococa guarePOCHI apopri, ipírata catu vahe sec-oira opacatu ava ivi rupindar upe. Ichui serocuasa voi serosa Tūpa rovai. ⁶ Cuña evocoiyase oñemi ivi iporupirēhisave oso. Aheve omoingatu Tūpa iyemboerecua água, eipeve icaru água mil doscientos sesenta ari rupi.

⁷ Oime avei vavasa ivave; ahese Tūpa rembiguai iva pendar ivate catu vahe Miguel güeru ovoya eta ovava água mbahe ipi oporomocañi vahe upe ivoya upe avei yuvireco. ⁸ Ndoicatui eté rumo Miguel recopi água yuvireco. Sese ndipoi eté ivave seco água yuvireco chupe. ⁹ Ëgüe ehi imboyepepísma mbahe ipi oporomocañi vahe reco píratasa sembiguai eta reseve; opa imombosa ivi pipe yuvireco. Evocoí mboi vai, “Caruguar” ehi vahe yuvireco chupe; “Satanás” ehi avei yuvireco chupe. Evocoí niha ava ombopa-mbopa tēi vahe opacatu ivi pipe yuvireco.

¹⁰ Evocoiyase asendu ñehesa ipírata vahe ivave, aipo ehi vahe:

“Cûritei oime poropísrosa, píratasa iyavei yande Tūpa mborerecuasa, Poropísrosar mborerecuasa avei no. Esepiá niha, imboyepepísma iva sui acoi oseca-seca vahe yande rívrí Tūpa reroyasareta recocuer momara água pítu, ari yacatu rupi yande Ru Tūpa rovai.

11 Yande rívrí osecoreroyí Ovesami ruví piyere pipe sui yuvíreco iyavei acoi secocuer mombehu tuprisa pipe sui avei no.

Esephia niha, ndosiquíyei eté güetecuer mocañí água yuvíreco. Ahe rumo oyemoingatu voi eté omano água.

12 ¡Peyemboviha catu pe iva iguar peico vahe!

Pe rumo, ¡peparaísu catura íví pipe, para guasu pipe avei peico vahe!

Esephia niha, Caruguar ogüeyí pěu oñemoirosa pipe, oicuase güeco pucuëhi água" ehi.

13 Ipare mbahe ípi oporomocañí vahe oicuase imombopri güecose íví rese, ahese omoña cuña imembrí cuimbahemi reseve yamotaréhisa pipe. 14 Evocoí cuña upe rumo imondosaño ñuvirío vira guasu pepo iveve água chupendar ívi imoingatupri ava poréhisave seco água, amombri mbahe ípi oporomocañí vahe sui. Aheve oyopoi mbosapi araviter yemombitesa rupive. 15 Ipare mbahe ípi oporomocañí vahe oyuru rupi ombotípmacua cuña raquicuei íai apo 'tocañí tēi' oyapave viña. 16 Íví rumo oime co cuña pítivíisa, ahe oyeca. Ipare opa omoco íai evocoí mbahe ípi oporomocañí vahe rembiapo. 17 Evocoiyase, oñemoiró iteanga cuña rese, ipare oso ovava ambuae ichuindar rehii rese, ahe omboyeroya vahe ité Túpa porocuaita yuvíreco iyavei yuvírecoi tupri vahe Jesucristo remimombehu rupi. 18 Ipare mbahe ípi oporomocañí vahe opita para guasu popíve ohã.

13

Ñuvirío mbahe ípi vai

1 Ipare asephia para guasu pipe sui osëse mbahe ípi vai, ahe siete tupri ñaca vahe iyavei diez tupri sáchi. Guächi yacatu evocoiyase vireco ñepei-peí oyeguaca, iyavei oäca yacatu rese vireco terer Túpa upe mbahe tēi vahe. 2 Co mbahe ípi vai avíye tupri acoi yaguar iparañ vahe; iyavei ípi avíye tupri oso pi, iyuru evocoiyase avíye yagua píta yuru. Mbahe ípi oporomocañí vahe evocoiyase omondo opíratasa iyavei omborerecuasa chupe. 3 Ñepei mbahe ípi vai ãca oyeapicha guasu vahe ndoyavií omano vaherã ité viña; ahe rumo ocuera tupri iriño evocoiyase opacatu guasu ava sepiase, ndoyembovihai. Ichui víroya catu yuvíreco. 4 Omboetei guasu mbahe ípi oporomocañí vahe sereco yuvíreco. Esephia, omondo omborerecuasa mbahe ípi vai upe. Ipare ahe avei omboetei ai yuvíreco no, aipo ehi yuvíreco: "Ndipoi eté mbahe ípi vai nungar, iyavei ndipoi eté ava oicatu vahe ovava vaherã sese" ehi yuvíreco.

⁵ Iyavei mbahe ipi vai upe ipotasa iyemboivate ai ãgua oñehe pipe ava rovaque iyavei Tüpa reroiro ãgua avei no, iyavei mborerecuar guasu seco ãgua cuarenta y dos yasi rupi. ⁶ Ëgue ehi iñehe mara-mara tẽi Tüpa rese, iñehe-ñehe tẽi avei serer maranehi rese, sëta rese, iva pendar rese avei no. ⁷ Imondosa avei chupe vavasa apo uca ãgua Tüpa upendar ava eta upe secopi ãgua. Ipare imondosa avei mborerecuar seco ãgua chupe ava ambuae-ae tẽi vahe upe, secua ambuae vahe upe, ambuae-ae tẽi iñehe vahe upe, iyavei ambuae ivi rupindar upe avei no. ⁸ Ipare omboetei ai sereco yuvireco opacatu ava ivi pipendar acoi ivi apoëhi suive ndovirecoi vahe güerer Ovesami cuachiar tecovesa resendar pipe, ahe niha acoi yucapirer.

⁹ Que amove osendu pota vahe, toyapisacaño co rese:

¹⁰ “Acoi ava oyeoquenda uca vaherã, oyeoquenda ucaño itera; iyavei acoi ava omano vaherã quise pucu pipe, ipipeño ité omanora.”

Co pipe oyecua Tüpa rese yeroyasa iyavei ipíratasa ava chupendar rese.

¹¹ Ipare asepia ambuae mbahe ipi vai osẽ vahe ivivri sui. Co vireco ñuvirio guachi ndoyavii tupri Ovesa rachi, mbahe ipi oporomocañi vahe ñehe pipe rumo oñehe oico. ¹² Ahe vireco opacatu evocoiparindar vahe mbahe ipi vai mborerecuasa sovaque, iyavei ava ivi pipendar yuvirecoi vahe upe ombotei uca yipindar mbahe ipi vai, ahe acoi ocuera tupri vahe oyeapichasa oyuca rägür sui. ¹³ Iyavei oyapo setá mbahe poromondiisa mbahe mboyecua ãgua. Iva sui eté niha oiti uca tata ivive imbou opacatu ava rembiepiave. ¹⁴ Ombopa tẽi ava ivi pipendar yuvirecoi vahe mbahe poromondiisa pipe evocoiparindar yapo ãgua chupe yipindar mbahe ipi vai rovai. Ipare oporocuai yapichapri ocuera tupri vahe rahangapo ãgua imboeteisave. ¹⁵ Ipare imondosa píratasa chupe tecovesa mondo ãgua evocoiparindar sahanga upe ‘toñehe, toyuca uca avei ava opacatu omboeteiñhisar’ oyapave. ¹⁶ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecopri vahe upe, mbiguai tẽi upe, ahe chupe, “Toyecuachía opo oacato cotindarve yuvireco, anise osivave” ehi. ¹⁷ Ahese ava ndipoi eté oicatu vahe mbahe rerocua, anise que mbahe mundo ãgua acoi ndovirecoise mbahe ipi vai rer, anise serer retacuer ndovirecoise oyese no.

¹⁸ Iya pereco mbahecua co renducua tupri ãgua. Acoi osenducua vahe toicua tupri mbahe ipi vai rer retacuer. Evocoiparindar yapo ãgua evocoiparindar sahanga upe ‘toñehe, toyuca uca avei ava opacatu omboeteiñhisar’ oyapave. ¹⁹ Ipare ava opacatu yuvirecove vahe upe, seco mbegüemi vahe upe, seco ivate vahe upe avei, que mbahe yar upe, que iparaisu vahe upe, ava nimañecopri vahe upe, mbiguai tẽi upe, ahe chupe, “Toyecuachía opo oacato cotindarve yuvireco, anise osivave” ehi. ²⁰ Ahese ava ndipoi eté oicatu vahe mbahe rerocua, anise que mbahe mundo ãgua acoi ndovirecoise mbahe ipi vai rer, anise serer retacuer ndovirecoise oyese no.

14

144,000 ava iporavopri sapucaisa

¹ Ipare asepia Ovesami ivitri Sión rese imoha. Ahe supi yuvirecoi ciento cuarenta y cuatro mil tupri ava evoco oicuachía vahe Ovesami rer, Tu rer avei osiva rese yuvireco. ² Ipare asendu mbahe riapu iva sui ou vahe; ndoyavii acoi itu guasu riapugüer iyavei ndoyavii eté acoi osunu vahe opororo-roró iteanga vahe; ndoyavii avei acoi ava setá vahe omoñehese arpa yuvireco, ēgue ehi siapugüer. ³ Ipare osapucai sapucaisa ipiasu vahe yuvireco Tūpa rovai iyavei iva pendar irungatu yuvirecove vahe rovai, icuaipri eta rovai avei no. Ñepei yepe que iva pendar ndoicatui eté evoco sapucaisa rese oyembohe vaherā. Ēgue ehi rumo ava ciento cuarenta y cuatro mil tupri yuvirecoi vahe, evoco oñepisiro vahe ivi pipendar pāhu sui, ahe güeraño tupri ité oicatu osapucai yuvireco. ⁴ Co ava ndoyapoi vahe ité mbahe co coti tēi cuña rese. Esepia, oñearo tupri güeco catuprisa pipe yuvireco; iyavei osaquicue moñaño ité Ovesami que iguatasa rupi. Opa serocuasa ava pāhu sui iyavei inungar yipindar mbahe seropovēhepri Tūpa upe, Ovesami upe avei. ⁵ Ndipoi eté que temira sese. Esepia niha, ndipoi eté mbahe oyavi vahe yuvireco.

Mbosapi Tūpa rembiguai omombehu iñehe ava upe yuvireco

⁶ Evocoiyase asepia ambuae Tūpa rembiguai iva pendar oveve vahe iva mbiter rupi iyavei vireco Tūpa Ñehengagüer p̄isirosa resendar ndopai vahe imombehu água opacatu ava co ivi pipendar upe: opacatu ivi rupindar upe, ava ambuae-ae vahe upe, iñehe ambuae-ae vahe upe, opacatu tecua rupindar upe avei no. ⁷ Ipare oñehe p̄irata aipo ehi: “Pesikiye Tūpa sui iyavei pesapucai seco ivatea rese chupe no. Esepia niha, cüritei oyepota ari chupe ava recocuer rese iporandu água. Pemboetei catu oyapo vahecuer iva, ivi, para guasu, i ohē vahe avei no” ehi.

⁸ Ambuae Tūpa rembiguai iva pendar raquicuerindar aipo ehi oico: “¡Oviapi Babilonia guasu cute! ¡Esepia niha, evoco opa ombosavaipo opacatu ambuae tecua pendar ohigua yemboaguasa tēisa resendar pipe!” ehi.

⁹ Ipare ambuae Tūpa rembiguai iva pendar imombosapisa, saquicue moña aipo ehi p̄iratá iri oico: “Acoi que ava ombotei vahe mbahe ipi vai sereco, sahanga avei no, iyavei acoi oyembohe catu vahe oyecuachía água osiva rese, que opo rese no, ¹⁰ oipisi itera Tūpa ñemoirosa ip̄irata vahe ité; ipare omombaraisura setecuer azufre ocai vahe pipe güembiguai iva pendareta reco maranehí rovaque, Ovesami rovaque avei

no. ¹¹ Tātachi icaigüer pendar evocoiyase oyeupira ndopai vaherā, ahese ndipoi chietera pituhusa pītu, ari pipe evoco mbahe ipi vai mboeteisar upe, sahanga mboeteisar upe avei no, iyavei acoi vireco vahe serer cuachiapri oyese yuvireco no” ehi.

¹² ¡Egüe ehira Tūpa rese ité yuvirecoi vahe yeroysa oyecua ahe acoi iporocuaita mboavíye tuprisar, Jesús reroya tuprisar avei yuvireco!

¹³ Ahese asendu ñehesa iva pendar aipo ehi vahe cheu: “Eicuachía co: Co pipe suive sorivete catura acoi ava omano vahe yande Yar rese yuvireco” ehi.

“Egüe ehi eté –ehi Espíritu imombehu–, opituhura opravíquisa sui yuvireco. Esepia, mbahe sembiapo rerācua osora ivave supi” ehi.

Ivi pipendar recoãhasa

¹⁴ Ahese asepia iva quiha morochí vahe; iharive ndoyavii ava oguapi vahe oñi. Vireco niha oyeguaca oro apoprí oñca rese iyavei mbahe miti asiasa saimbé vahe vireco opove. ¹⁵ Ipare osē ambuae Tūpa rembiguai tūparo sui. Ahe osapucai pírata evoco iva quiha harive chini vahe upe: “¡Eyasia nde remiti iyavei emonuha nde rembiasia! ¡Esepia, nde remiti ivi pendar yaviye ité!” ehi ava recocuer uve chupe. ¹⁶ Evocoiyase evoco chini vahe oyasia güemiti ivive oico, ahese opa omonuha güembiasia.

¹⁷ Ipare osē ambuae Tūpa rembiguai tūparo sui, ahe avei vireco mbahe miti asiasa saimbé vahe. ¹⁸ Ipare ambuae Tūpa rembiguai osē mbahe reropovéhepri renda sui, ahe tata rese hañecosar secoi. Iyavei oñeha pírata evoco vireco vahe mbahe miti asiasa upe aipo ehi: “¡Eyasia uva ha apacuar, evoco oime vahe ivi pipe! ¡Esepia niha, ope yaviye!” ehi. ¹⁹ Evocoiyase co Tūpa rembiguai inungar oyasia vahe uva ha egüe ehi ope ava ipeha ivi pipendar. Ipare ope oyapocatu Tūpa ñemoirosa rāro água. ²⁰ Ipare inungar uva ha icambepri tecua cupeve, egüe ehi co ava imombaraisu; ichui osē tuví evoco tipigüer oyepota ité cavayu yuru penda rupi eté sese, ahe ipucucuer trescientos kilómetros tupri ité.

15

ipa siete tupri Tūpa rembiguai güeru mbaherasi yuvireco

¹ Ipare asepia ivave ambuae mbahe mboyecuasa tuvichá vahe poromondiisa: siete Tūpa rembiguai, siete tupri mbaherasi ipa vahe vireco vahe, ahe ipá vahe ité Tūpa ñemoirosa.

² Iyavei asepia para guasu ndoyavii yepiasa oyeseha vahe tata rese. Ahe ipopive yuvínoha atí mbahe ipi vai recopisar, sahanga recopisar iyavei nomondo uca potai vahe serer

cuachía ãgua yuvireco oyese. Ahe vireco Tūpa upendar arpa yuvireco.³ Ipare osapucai Tūpa rembiguai Moisés sapucaisa yuvireco, iyavei Ovesami sapucaisa aipo ehi:

“Tuvichá opacatu mbahe nde rembiapo, che Yar Tūpa opacatu mbahe mboavaisarëhi; nde recocuer supi tupri vahe ité; seco ïvi vahe.

¡Too, nde mborerecuar guasu opacatu ïvi rupindar ereico!” ehi.

⁴ “Yar, nde sui opacatu ité osiquiyera yuvireco nde mboetei ãgua.

Nde güeraño ité ereico seco maranehi vahe, opara yugüeru opacatu ambuae tecua rupindar iyavei nde mboeteira yuvireco. Esepiña niha, sepiasa nde rembiapo supi tupri vahe” ehi.

⁵ Ipare asepiña ivave oyemboise Tūpa rëta imaranehi vahe. Aheve acoi yapocatusa mborocuaita resendar. ⁶ Evocoiyase ichui yuvinosepa evocoí siete Tūpa rembiguai vireco vahe siete tupri mbaherasi vai yuvireco. Ahe iturucuar secose vahe, ndiquihai vahe, sendí iteanga. Vumbicuasa ipe vahe oro apopri pipe evocoiyase oyeumbicua oPOCHIHA rupi tupri yuvireco. ⁷ Ipare ñepei evocoí irungatu ïva pendar yuvirecove vahe pâhu pendar omondo siete tupri Tūpa rembiguai upé siete Tūpa ñemoirosa riru oro apopri, ahe oicove vahe ité, ndopai vahe. ⁸ Ipare Tūpa rëta omboapipo tâtachi, evocoí ou vahe Tūpa reco porañetesa iyavei ipíratasa sui. Aheve ndiyai eté que ava upé seique ãgua acoi opase voi eté omomba siete tupri mbaherasi vai vireco vahecuer siete Tūpa rembiguai.

16

Siete Tūpa ñemoirosa riru

¹ Evocoiyase asendu ñehesa ipírata vahe osë vahe Tūpa rëta pipe sui. Ahe aipo ehi siete Tūpa rembiguai yuvirecoi vahe upé: “Peso, tapeipiyyerepa ïvi harí rupi evocoí siete tupri mbahe riru pipendar Tūpa ñemoirosa” ehi.

² Yipíndar vahe Tūpa rembiguai opa oipiyere ïgua riru pipendar ïvi harí rupi; evocoí opacatu ava vireco vahe mbahe ipi vai rer oyese sahanga mboeteisar tēi avei, ahe chupe oime setá caracha vai tasi vahe.

³ Tūpa rembiguai imoñuviriosa opa oipiyere ïgua riru pipendar para guasu pipe. Ahe evocoiyase oyeapo omano vahe ruví nungar; ichui opa omano opacatu mbahe yuvirecove vahe ipipe.

⁴ Tūpa rembiguai imombosapisa opa oipiyere ïgua riru pipendar iai pipe, i ohë vahe pipe avei no. Ipare opa ahe

oyeapo tuví yuvíreco. ⁵ Co pare asendu Túpa rembiguai i rese ihañeco vahe ñehesa aipo ehi:

“Nde seco tupri vahe ité ereico evocoia ava upe erembouse nde ñemoirosa, che Yar Túpa,

secó maranehi vahe.

Nde yipisuvendar ité ereico.

⁶ Esepio, ahe opa oyuca ndeundar ava iyavei nde ñehe mombehusar yuvíreco.

Cûritei rumo eremboihu uca tuví pipe.

¡Evocoi nungar upe aviyesa rupi eté!” ehi.

⁷ Asendu avei ambuae ñehesa mbahe reropovëhesa renda sui aipo ehi vahe: “Supi eté, che Yar Túpa, opacatu mbahe mboavaisarëhi, nde ava recocuer mombaraísusa supi tupri vahe ité iyavei nde reco ivi vahe ité no” ehi.

⁸ Túpa rembiguai imoirungatusa, opa oipiyere mbahe ríru pipendar ari rese, ipare ari upe imondosa píratasa ava rapipa ãgua. ⁹ Ipare opacatu ité ava yuvirocaipa tupri; ndoyevi eté rumo Túpa upe iyavei nomboeteiño ité yuvíreco. Ëgue ehi rumo iñehe mara-mara têiño mbaherasi rerecose Túpa upe yuvíreco.

¹⁰ Túpa rembiguai imbopoyandeposa oipiyere mbahe ríru pipendar mbahe ipi vai renda rese. Ahese aviyeteramo têi serecuar ipovri pendar avei píatumimbisave yuvírecoi. Ava evocoiyase oñeapecusu-suhi têi yuvíreco mbahe rasicuer pâhuve; ¹¹ ndopoíño ité rumo mbahe-mbahe têi apoa sui yuvíreco, ahe rumo iñehe mara-mara têiño Túpa ivate vahe rese oyeupe mbahe tasí vahe pâhuve yuvíreco.

¹² Túpa rembiguai imoñepei ovasa oipiyere mbahe ríru pipendar iai guasu Eufrates pipe. Ahe evocoiyase opa ipiru peri apo ãgua añihivei coti sui mborerecuareta yu ãgua.

¹³ Ipare asepia mbahe ipi oporomocañi vahe, mbahe ipi vai, ndahei vahe Túpa ñehe mombehusar supi vahe avei, ahe yuvírecoi vahe yuru rupi yuvinose mbosapi caruguar vireque nungar. ¹⁴ Co Caruguar suindar yuvírecoi, ahe oyapo poromondiisa mbahe mboyecuasa yuvíreco. Ipare opa yuvinose opacatu ivi rupi mborerecuareta monuha ãgua vavasave nara, acoi ari cañi pipe Túpa mbahe mboavaisarëhi amotarëhisave.

¹⁵ “Peyapisaca tupri che ñehe rese, che aviyeteramo têi ayura imonda rai vahe nungar curi. Sorivetera acoi ava imahemoha vahe oyemonde tupri vahe güembiapo aviye vahe pipe. Ahese nochí chietera oico che sui” ehi.

¹⁶ Ipare opa omonuha mborerecuareta hebreo ñehe pipe serer Armagedón ve.

¹⁷ Evocoiyase imbosietesa Tūpa rembiguai oipiyyere iñemoirosa mbahe rīru sui ivitū rupi. Ipare iva pendar Tūpa rēta pipe sui osē ñehesa ipírata vahe evoco ou vahe senda sui: “¡Opa ité yaposa cute!” ehi. ¹⁸ Ahese oime overa vahe, mbahe siapu guasu vahe iyavei osunu vahe. Ipare ivi orírii ipírata catu vahe opacatu ivi rīrii sui ava yuvirecove viteseve ivi pipe. ¹⁹ Tecua guasu oyeca-yeca mbosapi rupi, opacatu tecua evocoiyase opa onduru ivi pipendar. Ipare Tūpa oyemomahenduha evoco tecua guasu Babilonia pendar rembiapo ai rese, evocoiyase omondo oñemoirosa ipírata catu vahe chupe. ²⁰ Opacatu caha pāhu, ivitri avei ocañipa ité yuvireco. ²¹ Iyavei yuviroviapipa iva sui ava harive amanda guasu, ahe iposiigüer cuarenta kilos rutei. Ava rumo iñehe mara-mara tēiño vi te ité Tūpa upe yuvireco amanda sui tēi. Esepi niha, evoco Tūpa poronupasa ivaté catu vahe.

17

Cuña oyemondo-mondo tēi vahe mocañisa

¹ Siete Tūpa rembiguai vireco vahecuer mbahe rīru yuvireco, ipāhu pendar ñepei ou aipo ehi cheu: “Erio, amboyecuara co cuña yaguasa serai vahe upe ñemoirosa ndeu, ahe evoco oguapi i harive oī” ehi. ² “Co cuña rese yaguasa-guasa tēi mborerecuareta ivi pipendar yuvireco iyavei ava ivi pipendar inungar osavaipo vahe ndopoi potai eté oyemboaguasasa sui yuvireco” ehi cheu.

³ Ipare che quer nungar pipe Espíritu omboyecua vahe cheu, Tūpa rembiguai iva pendar che reraso ava porēhisave. Aheve asephia cuña mbahe ipi vai pīra vahe harive chini. Evoco mbahe ipi vai opacatu rupi oyapete tupri ñehesa vai Tūpa amotarēhisa sereco oyese, iyavei vireco siete tupri oāca, diez tupri guāchi. ⁴ Co cuña turucuar, suendi vahe, pīra vahe avei no, iyavei oyemoendi yai oro pipe oico, ita iporañete ai vahe pipe, opohir pipe avei no. Vireco igua rīru oro apopri. Ipipe omboapipo mbahe yavaeté vahe sereco oyemboaguasaguasa tēisa; ⁵ iyavei icuachiapri isiva rese terer ndicuasai vahe aipo ehi vahe: “Co Babilonia guasu, cuña yaguasa-guasa tēi vahe si, opacatu ava ivi pipendar secocuer yavaeté vahe si avei no” ehi. ⁶ Ipare aicua evoco cuña osavaipo vahe oī Tūpa reroyasar ruví pipe iyavei acoi Jesús recocuer mombehusa sui tēi yucapri vahe ruví pipe avei no.

Co asepiase che quer nungar pipe, ndache mbovihai eté. ⁷ Ahese ahe Tūpa rembiguai iva pendar aipo ehi cheu: “¿Mahera vo nderevihai eico? Aicua ucara mo ndeu co imombehusa ndicuasai vahe cuña resendar, iyavei acoi mbahe ipi vai vireco vahe siete tupri oāca, diez tupri avei acoi sāchi”

ehi. ⁸ “Acoi mbahe ipi vai eresepia vahe ahe yipive secoi vahe, cûritei rumo ndipo iri; osëra rumo ivicuar guasu ipicucu vahe sui omano ãgua renonde curi. Acoi ava ivi pipendar ndovirecoi vahe güerer cuachiar tecovesa resendar pipe yuvireco yipive ivi apoëhiseve, ahe ndovihai chira yuvireco osepiase evoco mbahe ipi vai yipive oicove vahe viña, ndoicove iri rumo, oyevi irira curi.

⁹ “Co rese icuasara uma vireco mbahecua senducua ãgua: Co siete tupri vahe ñaca ahe omombehu ‘siete tupri ivitri’ oyapave. Ahe iharive evoco cuña oguapi oï iyavei ahe siete ñaca avei omoporëhi ‘siete tupri mborerecuar’ oyapave. ¹⁰ Cinco tupri mborerecuar evoco ipâhu pendar ndipo iri yuvireco, ñepeiño evocoiyase oporocuai cûritei oico, ambuae rumo ndou vitei. Ouse rumo ipandar, ou raimi têira. ¹¹ Mbahe ipi vai secoi vahe yipindar, ndoicove iri cûritei, ahe imbohochosa secoira mborerecuarã, yepe siete tupri vahe mborerecuar guasu mboetasa viña, ahe rumo ocañi têi vaherã secocuer” ehi.

¹² “Evoco diez tupri vahe sachi, ahe mborerecuar diez tupri ndoyuviroique vitei vahe oporocuai vaherã yuvireco. Oyoya rumo oporocuai raimi têira mbahe ipi vai reseve yuvireco curi. ¹³ Co diez tupri mborerecuar yuvirecoi vahe oyoya guasura ipihañemoñeta evoco mbahe ipi vai upe omondo vaherã píratasa iporocuai ãgua yuvireco. ¹⁴ Ipare ovavara Ovesami rese yuvireco; Ovesami rumo osecoreroyira. Esepio niha, ahe yande Yar opacatu ava Yar iyavei mborerecuar guasu secoi no opacatu mborerecuareta rerecuar, iyavei acoi ava yuvirecoi vahe sese, ahe senoipri yuvirecoi iyavei iporavopri oyemoviracuaño vahe ité supi oguata ãgua yuvireco” ehi.

¹⁵ Iyavei Tüpa rembiguai aipo ehi cheu: “Evoco para guasu eresepia vahe, iharive cuña yaguasa-guasa têi vahe oguapi oï, ahe ‘ava rehii tecua yacatu rupindar, iñehe ambuaeae vahe iyavei opacatu ambuae têi vahe ivi rupindar’ oyapave. ¹⁶ Evoco eresepia diez tupri vahe sachi mbahe ipi vai rese, ahe ndoyambotai chira cuña yaguasa-guasa têi vahe; iyavei osequii tupri seya; ohupara soho, ipare opara osapi. ¹⁷ Tüpa niha omundo ipiha pipe mbahe güemimbotar apo ãgua ‘ahe toyemonguerëhi yuvireco omborerecuasa mondo ãgua mbahe ipi vai upe; tomboaviye rane ité che remimombe-huguer yuvireco’ oyapave. ¹⁸ Iyavei evoco cuña yaguasa-guasa têi vahe eresepia vahe, evoco niha tecua guasu ivi pipendar mborerecuareta vireco vahe opovrive yepi” ehi Tüpa rembiguai cheu.

Babilonia viapi agüer

¹ Ipare asephia ambuae Tūpa rembiguai ipírata vahe ogüeyi vahe iva sui. Vireco mbororecuasa ivate vahe, ahe sendigüer osesape tupri ivi rupi. ² Iyavei oñehe pírata oico aipo ehi: “¡Oviapi tecua Babilonia cute!

Caruguar yuviroique sese, opacatu caruguar naporai vahe iyavei vĩrai vai nungar yuviroique sese.

³ Esephia niha, opacatu ambuae ivi rupindar inungar osavaipo vahe ndopoi potai eté yemboaguasasa sui, evocoiyase mbororecuareta ivi pipendar oyapo mbahe tēi yuvireco sese, iyavei mbahe mboepisar ivi pipendar oyemombahe eta imbahe porañete ai vahe pota raisa pipe sui yuvireco” ehi.

⁴ Evocoiyase asendu ambuae ñehesa iva sui ou vahe, ahe aipo ehi:

“Peyepepi evocoi tecua guasu sui, pe peico vahe cheundar evocoi yangaipa rese imboyoyaëhi ãgua.

Iyavei ñepei yepe taperupití eme imbaherasisa.

⁵ Esephia niha, yangaipagüer oyepota ité ivave.

Tūpa evocoiyase oyemomahenduha mbahe-mbahe tēi sembiapogüer rese chupe.

⁶ Inungar ahe ambuae upé, ëgue peye tupri avei chupe; pemboepi ñuvirío rupi mbahe sembiapogüer chupe; pemomirata catu mbahe igua ñuvirío rupi pemboyeseha imondo chupe;

⁷ pemondo setecuer mombaraisusa chupe, tiparaïsu tahoya iyemondo-mondo tēi agüer iyemboetei ai agüer rese avei no.

Esephia niha, ahe aipo ehi opîha pipe oico:

‘Cohave che aguapi vîte mbororecuar che reco nungar pipe.

Ndahei imer mano vahecuer che aico, iyavei ndacheparaïsu chietera’ ehi viña.

⁸ Sese niha aviyeteramo tēi oura mbaherasisa chupe:

paraïsus, tieporëhi, manosa; ipare sapisara.

Esephia niha, yande Yar Tūpa mbahe mboavaisarëhi secoi, ahe, ‘Tomano’ ehi chupe” ehi.

⁹ Evocoiyase mbororecuar ivi pipendar yuvirecoi vahe co cuña resenderer, chupe oyemondo-mondo tēi vahecuer imbahe eta rese, oyaseho tēira yuvireco iyavei ndoyembovihai chira sese osepiase evocoi cuña râtachi yuvireco curi.

¹⁰ Opitañora amombrive osiquiyepave, iparaïsus sui aipo ehi tēira yuvireco:

“¡Ndeparaisu catu, tecua guasu Babilonia, nde reco pírata vahe tie viña!

Esephia niha, co aviyeteramo tēi ou nde mombaraisu catusa” ehira yuvireco.

¹¹ Evocoiyase ava mbahe mboepisar ivi pipendar yuvirecoi vahe, ahe avei oyaseho tēira iyavei ndoyembovihai chietera evocoi tecua rese yuvireco. Esepi niha, ndipo iri chietera que virocua vaherā imbahe yuvireco ichui, ¹² co opacatu mbahe sep̄i vaherā ahe: oro, guarepochi, ita iporañete ai vahe, mbohir sendi vahe, turucuar secose vahe, turucuar sendi vahe, iyavei p̄iraumbi vahe, p̄ira vahe no; iyavei opacatucatu tēi ivirape siacua vahe; mbahe-mbahemi marfil apopri, ivira icatupri vahe apopri, bronce apopri, guarepochi apopri, mármol avei; ¹³ mbahe serocuapri yahu vahe canela, tembihu moiacuasa; itaisi, mirra, mbahe siacua vahe; uva ricuer, mbahe quira, trigo cuhi avīye vahe, trigo avei; iyavei mbahe mimb̄a ovosii vahe no, ovesa, cavayu, cāretomi iyavei mbiguai no. ¹⁴ Aipo ehi tēira yuvireco co tecua guasu upe:

“¡Nderereco iri acoi mbahe ha ereipota etepri vahe; iyavei eremocañi tēi apirēhi opacatu nde mbahe eta nde yemboeteisa avei!” ehira.

¹⁵ Evocoiyase evocoi mbahe mboepisareta oyemombahe eta vahecuer co mbahe rese tecua guasu sui, ahe opitañora amombrive osiquiyepave iparaísusa repiase yuvireco. Oyaseho tēira iyavei ndoyembovihai tēi chira yuvireco no, ¹⁶ iyavei aipo ehi tēira yuvireco:

“¡Too! ¡Iparaisú iteanga tecua guasu pendar!

Inungar tie cuña acoi oyemonde tupri vahecuer secoi cuese viña iyavei iturucuar suendi,
p̄ira vahe; oro pipe oyemboetei vahecuer,
itami iporañete vahe pipe iyavei mbohir sendi vahe pipe oyemboetei vahe no.

¹⁷ ¡Aviyeteramo tēi rumo opa ocañi imbahe eta ichui!” ehi.

Evocoiyase opacatu ava carite guasu pipendar rerecuar, ava imbehi ivirindar carite guasu reroguatasar, i rupi oporavíqui vahe oyeupe nara mbahe rereco água, ahe opaño opita amombrive yuvireco ichui ¹⁸ iyavei co tecua rātachi repiase, ahese osapucai p̄irata tēi yuvireco: “¡Ndipo eté niha yipisui tecua na ehi vahe!” ehi yuvireco. ¹⁹ Ipare imboasipave omundo ivi cuhi oācave yuvireco, oyaseho iyavei ndoyembovihai tēi, ipare osapucai tēi yuvireco aipo ehi:

“¡Too! ¡Iparaisu catu tecua guasu pendar!

Esepi niha, evocoi tecua guasu mbahe eta pipe sui ava i rupi oporavíqui vahe oyemombahe yar yuvireco viña.

¡Aviyeteramo tēi rumo opa ocañi!” ehi.

²⁰ Peyembovihaño evocoi tecua rese, pe iwa pendar, iyavei opacatu chupendar peico vahe, pe no Jesús apóstol peico vahe,

opacatu Tūpa ñehe mombehusar peico vahe avei no.

Esephia niha, co tecua omocañisa pípe Tūpa oyapo mbahe tupri pēu nara.

²¹ Ahese Tūpa rembiguai iva pendar seco pírata vahe osupi ita inungar mbahe mbocuhisa, ipare omombo para guasu pípe aipo ehi:

“Na ehi aveira tecua guasu Babilonia mocañisa.

Imombopri secoira.

Ipare ndapesepia iri chietera apirēhi vaherā” ehi.

²² “Ndasendusa iri chietera ocar rupi arpa moñehesar, mimbi moñehesar, iyavei mimbi guasu moñehesar avei no; ndererecoi chietera ava oporavíqui vaherā, ndasendusa iri chiaveira ita mbahe mbocuhisa monarasa nde suindar.

²³ Iyavei ñepei yepe que tataendi ndosesapei chietera ndeu, ndasendusai chiaveira ava aivu mendasa rupi, yepe niha nde ava upe mbahe mondoso secu pírata etepri vahe opacatu rupi ereico viña.

Iyavei erembopa-mbopa tēi opacatú ambuae tecua rupindar eico nde payesa pípe” ehi

Tūpa rembiguai chupe.

²⁴ Esephia niha, evoco tecua guasu pípe oyecua Tūpa ñehe mombehusar ruví, Tūpa upendar ava ruví, iyavei opacatu ava yucapri vahe ivi pipendar ruví avei.

19

¹ Co pare, asendu ava rehii ñehe pírata ivave aipo ehi vahe: “¡Imboeteipri yande Yar tasecoi!

Poropísirosa, teco porañetesa iyavei ipíratasa ahe yande Ru Tūpa suindar.

² Esephia niha, ahe oyapo mbahe supi eté vahe, ‘Tocañi’ ehise co cuña oyemboaguasa-guasa tēi vahe nungar tecua guasu upe evoco niha oseco momara tēi vahe ava ivi pipendar güeco rai pípe; ichui Tūpa osepí oyeupendar” ehi.

³ Ipare aipo ehi iri yuvireco no:

“¡Imboeteipri yande Yar tasecoi!

Esephia niha, evoco tecua rātachi ndopai chietera” ehi.

⁴ Evocoiyase veinticuatro tupri iva pendar icuaipri yuvirecoi vahe iyavei irungatu iva pendar yuvirecove vahe, ahe Tūpa mboeteisa pípe oyeaivi ivi rese yuvireco. Ipare aipo ehi yuvireco no: “¡Egüe tehi! ¡Imboeteipri yande Yar tasecoi!” ehi. ⁵ Evocoiyase Tūpa renda sui tupri oyeendu ñehesa aipo ehi vahe:

“¡Pemboetei yande Ru Tūpa opacatu peroya vahe, que seco ivi cotí catumi vahe, que seco ivate vahe avei, pe pesiquiye vahe imboyeroya áqua!” ehi.

Pieta mendasa Ovesami resendar

6 Asendu avei ava rehii ñehe, inungar acoi itu guasu riapu, ndoyavii avei osunú guasu vahe aipo ehi:

“¡Imboeteipri yande Yar tasecoi!

Esephia niha, yande Yar Tūpa opacatú mbahe mboavaisaréhi omboipi oporocuai.

7 Tayayemboviha catu yaico iyavei tayamondo yande viharetesa, yande sapucaisa yande Ru Tūpa upe.

Esephia niha, cûritei oyepota mendasa arí Ovesami upendar. Sembireco evocoiyase opa oyemoingatu oico:

8 chupe ipotasa iyemonde água turucuar secose vahe, ndiquihai, sendi vahe pipe.

Esephia niha, co turucuar secose vahe ‘Tūpa rese yuvirecoi vahe recocuer ihívi vahe’ oyapave aipo ehi” ehi.

9 Evocoiyase Tūpa rembiguai, “Na ere icuachía: ‘Sorivete catu acoi ava mendasave ichohopri yuvireco’ ere” ehi cheu. Iyavei aipo ehi cheu no: “Co niha Tūpa ñehesa supi tupri vahe ité” ehi.

10 Ipare añenopiha Tūpa rembiguai rovai imboetei água. Ahe rumo aipo ehiño cheu: “Égüe erei rene. Esephia, che Tūpa rembiguai têi aico nde nungar iyavei nde rivireta nungar oguata vahe Jesús ñehengagüer rupi. Emboetei Tūpa” ehi.

Esephia niha, evoco Jesús recocuer mombehusar moñehe ucasar, ahe niha acoi omombehu uca vahe Tūpa ñehe mombehusar upe.

Cavayu morochi vahe reroguatasar

11 Evocoiyase asephia íva oyemboi vahe. Aheve aviyeteramo têi cavayu morochi vahe oyemboyequa, evocoiyase ava sese oyeupi vahe rer: “Ocuaita-omboaviye-tupri-vahe iyavei Supi tupri vahe” ehi. Esephia, güeco ívisa pipe oporocuai iyavei oyapo vavasa.

12 Sesa evocoiyase ndayaviyei eté acoi tata rendigüer; iyavei oáca rese setá vireco oyeguaca, iyavei vireco terer icuachiapri oyese; ahe güeraño ité oicua.

13 Iturucuar evocoiyase imopirapri tuví pipe; serer evocoiyase, “Tūpa Ñehe” ehi.

14 Sundao rehii íva pendar saquicuerive yuvirecoi. Iturucuar secose vahe pâve morochí vahe, ndiquihai vahe avei. Ahe cavayu morochi vahe haríve yuvirecoi.

15 Iyuru pipe sui osë quise pucu saimbe vahe opacatu ambuae-ae tecua rupindar momara água. Ahe oyocuaira oamotaréhisar guarepochi apopri opo pendar pipe. Iyavei osecoähara in-

ungar uva opive otiamii vahe yuvireco iyavei omboihura evocoí uva ricuer paraisu catusa resendar pipe. Ahese Tūpa mbahemboavaisaréhi oñemoiro itera chupe.

16 Oturucuar popi rese vireco icuachiapri ohivipi rese avei aipo ehi vahe:

"Mborerecuareta rerecuar guasu iyavei ava Yar ivate catu vahe" ehi.

¹⁷ Ipare asepia Tūpa rembiguai opūha vahe arisave. Ahe os-apucai pírata opacatu vīrai mbahe rohoguar upe oveve vahe iva rese: "¡Perio! ¡Peñemonuha Tūpa suindar carusa guasusave; 18 pehu co mborerecuareta roho, sundao eta rerecuar roho iyavei ava oico eté vahe roho, cavayu roho, ihari pendar roho avei, opacatu ava roho ava nimañecosai vahe roho, mbiguai roho, seco ivi coti catumi vahe roho, seco ivate vahe roho avei!" ehi.

¹⁹ Ahese asepia mbahe ipi vai iyavei mborerecuareta ivi pipendar osundao reseve-seve. Ahe oñemonuha yuvireco ovava ãgua evoco cavayu hari pendar rese iyavei isundao rese avei no. ²⁰ Co mbahe ipi vai yipindar vahe soquendas, oyoya evoco Tūpa ñehe mombehusar angahu tēi rese. Ahe acoi oyapo vahe mbahe yavai rai vahe yipindar mbahe ipi vai rovague, evoco mbahe yavai rai vahe apo pipe ombopambopa tēi ava, acoi seroyasar vireco vahe mbahe ipi vai rer oyese iyavei omboetei vahe sahanga yuvireco. Evocoiyase co mbahe ipi vai iyavei Tūpa ñehe mombehusar angahu tēi, ahe opa imombosa secove reseve ipa azufre ocai vahe pipe yuvireco. ²¹ Ambuae evocoiyase evoco cavayu morochi vahe hari pendar yuru pipe sui osē vahe quise pucu pipe opa omano yuvireco. Evocoiyase opacatu vīrai mbahe rohoguar opa soho pipe oyemohitaro yuvireco.

20

Mil araviter resendar ñehesa

¹ Ipare asepia Tūpa rembiguai ogüeyi vahe ou ivi sui ivicuar guasu ipicucu vahe mboyasar iyavei carena ipo guasu vahe opove vireco. ² Ipare oipisi mbahe ipi oporomocañi vahe mboi nungar aracahendar, ahe niha Caruguar secoi, Satanás serer vahe; ahe oicuhacua carena pipe mil araviter rupi imoi. ³ Ahese omombo ivicuar guasu ipicucu vahe pipe. Aheve osoquenda. Omondo sello soquenda rese opacatu ambuaeae tecua rupindar mbopa-mbopa tēi iriëhi ãgua rese acoi osupitise voi mil araviter. Coiye rumo mil araviter pare, imosesa raimi tēira.

⁴ Ipare asepia tenda, iharive setá ava oguapi yuvinoi evoco oipisi vahe omborerecuasa yuvireco ava upe mbahe rese porandu ãgua. Iyavei asepia ava hā evoco opa vahecuer oyasia ñaca yuvireco Jesús recocuer mombehusa sui tēi iyavei Tūpa Ñehengagüer mombehusa pipe sui tēi avei. Ahe ava nomboetei vahe mbahe ipi vai yuvireco; sahanga avei nomboetei yuvireco no; iyavei nomondo ucai vahe avei osiva rese serer yuvireco, opo rese avei. Ahe asepia opa ocuerayevi yuvireco.

Ipare oporocuai Cristo rese mil aravíter rupi yuvireco. ⁵ Ahe co yipindar vahe cuerayevisa. Ambuae ava omano vahe rumo ndocuerayevi iri eté yuvireco osupitise voi mil aravíter. ⁶ ¡Sorivete catu acoi ava vireco vahe yipindar cuerayevisa yuvireco! ¡Esepio niha, ahe Tüpa upendar ité yuvireco! Imoñuviriossa manosa evocoiyase chupe ndipo iri eté. Ëgüe ehira rumo ahe Tüpa upe naraño ité pahi yuvirecoira, Cristo upe avei. Ipare mborerecuar yuvirecoira sese mil aravíter rupi.

Caruguar recopisa

⁷ Acoi osupitise rumo mil aravíter cute, ahese Caruguar yorasara soquendasa sui. ⁸ Ichui oséra opacatú ava ivi piendar mbopa-mbopa tēi oico; oséra ivi Gog mbopa tēi água, ivi Magog mbopa tēi água avei. Ipare omonuhara vavasave nara isundai eta. Esepio niha, ahe sehii etepri yuvireco inungar ivi cuhi para guasu popi rupindar.

⁹ Ëgüe ehi yugüeru ati amombri sui, oyerepa tupri Tüpa recua rese yuvireco no, evocoiyase Jerusalén sembiaisu rese avei. Tüpa rumo ombou tata iva sui, ahe ipipe opa tupri ité osapi. ¹⁰ Caruguar evocoiyase, ava mbopa-mbopa tēisar, ahe opa imombosa ipa azufre ocai vahe pípe. Aheve acoi opa imombosa mbahe ipi vai iyavei Tüpa ñehe mombehusar angahu tēi vahe avei no. Aheve iparaísura pítu, ari yuvireco apiréhi vaherã.

Tüpa oguapira güendave ava recocuer rese porandu áqua ari ipa vahe pipe

¹¹ Evocoiyase asepio tenda imboeteipri, morochi vahe. Iharive oime ava oguapi vahe oí. Sovai ivi iyavei iva opa ocañi tupri tēi. Ndoyecua iri eté co coti rupi yuvireco. ¹² Ipare asepio omano vahecuer seco ivate vahe, seco mbegüemi vahe avei no opúha yuvinoha Tüpa rovai; ahese cuachiar opa ipípirasa yuvireco, iyavei ambuae cuachiar. Ahe cuachiar tecovesa resendar. Omano vahecuer upe evocoiyase porandusa evocoiyase cuachiar pipendar mbahe sembiapogüer rese. ¹³ Omano vahecuer opa yuvinose para guasu pípe sui, iyavei tehögüer recosa sui opa yuvinose; ichui opacatú mbahe sembiapogüer rese porandusa yuvireco chupe no. ¹⁴ Ipare manosa recua opa imondosa tata nungar ipa pípe. Evocoiyase ipa niha imoñuviriossa manosa. ¹⁵ Aheve opa imondosa acoi ndovirecoi vahe güerer icuachiapri cuachiar tecovesa resendar pípe.

¹ Ipare asepia iva piasu iyavei ivi piasu. Esephia niha, yipindar vahe mbahe opa ité ocañi yuvireco, para guasu avei no. ² Che asepia tecua nimarai vahe, ahe Jerusalén piasu, evoco ogüeyi vahe Tūpa sui ou. Opacatu imoingatusa tupri vahe, inungar acoi cuña omenda áqua oyemboetei tupri omevi upe. ³ Ipare asendu ñehesa pírata tenda suindar aipo ehi vahe: “Tūpa cûritei oicove ava rehii pâhu rupio oico. Ahe oicove vaherá ité sese yuvireco yepi, ahe ava evocoiyase chupe nara ité yuvirecoira. Ahe teiteté niha secoira yuvireco chupe. ⁴ Ahe niha omombituhura opacatu ava resai; iyavei ava nomanoi chietera; ndoyasehoi chira yuvireco; ndipoi chira vîharêhisa, tecoasisa avei chupe. Esephia niha, opacatu mbahe oime vahecuer yipindar, ndipo iri eté” ehi.

⁵ Ahese evoco oguapi vahe tenda harive oí, ahe aipo ehi cheu: “Che ayapo mbahe opacatu ipiasu vahe” ehi. Iyavei aipo ehi: “Eicuachía. Esephia niha, co ñehesa supi tupri vahe ité, evocoiyase iya ité peyeroya sese” ehi.

⁶ Ipare aipo ehi cheu: “Opa ité yaviye. Che aviye acoi letra omboipi vahe A sui yepi, Z rupi. Esephia, che yipive vahe ité, ipandar avei. Acoi ava ihusei vahe amboihuño têira i tecovesa resendar ndasepii vahe pipe. ⁷ Acoi ava oyemoviracua vahe ité mbahe-mbahe têi apoëhi áqua, ahe oipisira co mbahe opacatu omahera yuvireco. Evocoiyase che aicora chupendar ité, ahe evocoiyase che rahir ité yuvirecoira. ⁸ Acoi ava osiquiye ai vahe rumo che recocuer sui, ndache reroysi vahe, ava ndiporoepia potai vahe, oporoyuca vahe, acoi ava oyemboaguasa têi vahe, ipaye serai vahe, mbahe rahanga mboeteisar têi iyavei opacatu ava semira-mira têi vahe, ahe opara yuviraso ipa nungar azufre ocai pírata vahe pipe. Ahe niha imoñuvirío manosa” ehi.

Tecua Jerusalén piasu

⁹ Evocoiyase ou ñepei siete Tūpa rembiguai pâhu pendar acoi siete tupri igua ríru, siete mbaherasi ipa vahe vireco vahecuer ipipe, ahe aipo ehi cheu: “Erio, amboyecuara cuña omenda vahevì ndeu, Ovesami rembirecoví” ehi. ¹⁰ Evoco che quer nungar pipe Espíritu osepia uca vahe cheu, che reraso ivitri guasu ivate vahesave. Aheve omboyecuara tecua guasu Jerusalén nimarai vahe cheu, ogüeyi vahe Tūpa sui.

¹¹ Ahe tecua sendí iteanga Tūpa rendigüer pipe. Sendigüer evocoiyase oyoya tupri ita iporañete vahe rese, oyoya avei ita jaspe serer vahe ipírerimi vahe rese. ¹² Oyerepa tupri tecua guasu rese ñachisa tuvichá vahe, ivaté iteanga iyavei vireco doce oquenda guasu. Evocoiyase ñepei-peí Tūpa rembiguai oquenda yacatu; iyavei Israel suindar doce tupri vahe serer icuachiasa oquenda yacatu rese. ¹³ Vireco niha mbosapi

oquenda añihivei cotí, mbosapi norte cotí, mbosapi irohi cotí iyavei mbosapi caharu cotí no. ¹⁴ Tecua guasu ãchisa vireco doce tupri ita imoviracuasa. Ahe sese evocoit doce tupri yuvirecoi vahe Ovesami apóstol rer icuachiasa yuvireco.

¹⁵ Evocoit Túpa rembiguai oñehe vahe cheu vireco vara oro apopri tecua rãha ãgua, opacatu soquendipi rãha ãgua, ñachisa rãha ãgua avei no. ¹⁶ Tecua guasu pucucuer oyoya tupri ipigüer rese. Evocoiyase Túpa rembiguai osâha tecua guasu ruvichagüer; osâhase ipucucuer dos mil dos cientos kilómetro tupri ité; ipucucuer, ihivategüer iyavei ipigüer oyoya pâve tupri ité no. ¹⁷ Ipare osâha ñachisa: osâhase ipigüer sesenta y cinco metro tupri. Evocoit Túpa rembiguai osâha ava rembiporu pipe.

¹⁸ Tecua ãchisa ahe ita porañete vahe Jaspe serer vahe apopri; tecua evocoiyase oro pâve tupri, aviye vidrio secose catu vahe. ¹⁹ Ñachisa moviracuasa vireco opacatu ambuae ita-ita têi iporañete vahe pâve: yipindar iviracuasa jaspe, imoñuviriosa zafiro, imombosapisa ágata; imoirungatusa esmeralda; ²⁰ imbopoyandeposa ónica; imoñepei ovasa, cornalina; imoñuvirío ovasa, crisólito; imombosapi ovasa, berilo; imoirungatu ovasa, topacio; imbopoyandepo ovasa, crisoprasa; co opoyandepo yovaivesa ahe jacinto; imoñuvirío yovaivesa, amatista. ²¹ Doce tupri vahe oquenda guasu ahe doce tupri mbohir; ñepei-pei oquenda ñepei mbohir sui yapopri. Calle guasu tecua aviter rupindar evocoiyase oro pâve, inungar vidrio yande porëhi tupri vahe ipipe.

²² Ndasepiai eté evocoit tecua guasu pipe ñepei yepe tûparo. Esepia niha, yande Yar Túpa mbahe mboavaisarëhi, Ovesami reseve yuvirecoi aheve. ²³ Evocoit tecua guasu ndovireco iri eté ari, yasi güesape ãgua. Esepia niha, Túpa ité osesape güendigüer pipe, iyavei Ovesami tataendi nungar secoi aheve yuvirecoi vahe upe. ²⁴ Sendigüer osesapera opacatu tecua rupindar iguatasa rupi, iyavei ava mbahe yar mborerecuar ivi pipendar opara güeru omabahe eta porañete vahe yuvireco chupe. ²⁵ Evocoiyase soquendipi nimboyasai chietera ari yacatu rupi. Pitu ndipoi chiaveira aheve. ²⁶ Ipare opara aheve ambuae tecua mbahe eta, porañete vahe omoingue yuvireco; ²⁷ ava angaipa viyar rumo, Túpa remimbotarëhi oyapo vahe, iporombopa serai vahe, ahe ndoyuviroiquei chietera aheve. Ëgue ehi rumo acoi ava vireco vahe güerer icuachi-apri Ovesami cuachiar tecovesa resendar pipe yuvireco, ahe güeraño yuviroiquera aheve.

22

¹ Ipare Túpa rembiguai omboyecua iai tecovesa resendar

cheu, t̄ipiu, oyecua tupr̄i, osē vahe Tūpa iyavei Ovesami renda porañete vahe sui. ² Calle guasu mbiter rupi oso. Iyavei iai ique yacatú oime ̄vira tecovesa resendar, iha vahe doce yupagüer rupi ñepei araviter pipe. Iyavei evocoí ̄vira ro aviye ai ava opacatu rupindar mbogüera ãgua. ³ Ndipoi chietera aheve que mbahe t̄evr̄i pendar. Tūpa renda porañete vahe iyavei Ovesami renda avei chinira evocoí tecua guasu pipe. Aheve sembiguai eta omboeteira yuvireco. ⁴ Osapiara sova iyavei virecora serer osiva rese yuvireco. ⁵ Aheve ndipoi chietera p̄tu, iyavei ava aheve yuvirecoi vahe ndosecai chietera tataendi. Ndosecai chiaveira que ari güesape ãgua yuvireco. Esepi niha, yande Yar Tūpa tejeté osesapera. Ipare ahe ava mborerecuar apir̄ehi vaherā ité yuvirecoira sese.

Cōimi eté Jesucristo yevi ãgua

⁶ Ipare Tūpa rembiguai aipo ehi cheu: “Co ñehesa supi tupr̄i vahe ité, sese iya ité peyeroya. Iyavei yande Yar Tūpa acoi omboynecua tupr̄i vahe mbahe oyesuindar oñehe mombehusar upe, ahe ombou güembiguai ̄va pendar mbahe omboavíye poyava voi vaherā mboyecua ãgua viroyasareta upe” ehi.

⁷ “¡Ayevi poyava voira curi! ¡Sorivete catura acoi ava viroya vahe ñehesa Tūpa suindar mbahe oime vaherā resendar co cuachiar pipe!” ehi.

⁸ Che, Juan, asepiá iyavei asendu ité co mbahe. Sendu pare voi, añenopihá evocoí Tūpa rembiguai rovai imboetei ãgua viña. ⁹ Ahe rumo aipo ehiño cheu: “Aní ereñenopihá che rovai. Esepi niha, che Tūpa rembiguai t̄ei aico, nde nungar, nde rivireta nungar avei evocoí oñehe vahe Tūpa Ñehengagüer rese yuvireco, iyavei inungar opacatu viroya vahe co cuachiar pipendar icuachiapri yuvireco no. Tūpa catu pemboetei” ehi.

¹⁰ Aipo ehi avei cheu no: “Ereicuacui rene co ñehesa Tūpa suindar mbahe oime vaherā resendar sereco, evocoí icuachiapri cuachiar pipe. Esepi niha, ari cōimi secoí imboavíye ãgua. ¹¹ Acoi ava mbahe t̄ei aposar, toyapoño mbahe t̄ei; iyavei acoi ava seco rai vahe, taseco raiño ité oico; acoi ava seco tupr̄i vahe rumo, ahe toyapoño mbahe tupr̄i oico; iyavei acoi ava Tūpa upe oyemondo tupr̄i vahe ité, ahe taseco tupr̄iño avei oico chupe” ehi.

¹² “Supi eté ayevi poyavara, iyavei arura mbahe porerecosa ñepei-peí ava rembiapogüer rupi-rupi amondo vaherā chupe. ¹³ Che aico inungar letra A iyavei Z, yipindar vahe, ipandar vahe avei no; yipive vahe ité apir̄ehi vaherā” ehi.

¹⁴ “Sorivete catura acoi ava omoatiro vahe güecocuer. Esepiá, ahe oipisira ̄vira ha tecovesa apir̄ehi vahe resendar. Ipipe sui oiquera tecua guasu pipe. ¹⁵ Ava rehii ndiporeroysi vahe rumo opitapara ocarve t̄ei yuvireco, iyavei ava ipaye

serai vahe, oyemboaguasa-guasa tēi vahe, oporoyuca vahe, mbahe rahanga upe tēi oyeroqui vahe, iyavei opacatu ava oipota rai vahe oporombopa-mbopa tēi ãgua yepi” ehi.

¹⁶ “Che, Jesús, amondo che rembiguai iva pendar mbahe mombehu ãgua opacatu che reroyasar upe oñemonuha vahesa rupi-rupi. Che aico mborerecuar guasu David suindar. Iyavei aico ñungan yasitata guasu sendi vahe añihiveindar no” ehi cheu.

¹⁷ Espíritu Santo iyavei Ovesami rembireco aipo ehi: “¡Perio!” ehi ava upe yuvireco. Iyavei acoi ava osendu vahe iñehe, “¡Perio!” tehi ambuae ava upe yuvireco. Iyavei acoi ava ihusei vahe, toyugüeruño; acoi ava oipota vahe, toipisi i tecovesa resendar ndasepii vahe yuvireco.

¹⁸ Opacatu acoi ava osendu vahe co ñehesa Tūpa suindar mbahe oime vaherã resendar icuachiapri co cuachiar pipe yuvireco, ahe chupe, “Peicua catu” ahe. Amove que ava co mbahe resendar omboyeapi iri vahe, ahe chupe Tūpa omboyeapi aveira co cuachiar pipendar mbahe-mbahe tēi imombehupri. ¹⁹ Amove que ava virocua vahe co cuachiar pipe sui ñehesa Tūpa suindar, Tūpa avei evocoiyase ndoipotai chira chupe co cuachiar pipe imombehupri ivira ha tecovesa resendar rereco ãgua iyavei co tecua maranehi pipe seique ãgua.

²⁰ Acoi co mbahe mombehusar aipo ehi: “Supi eté ayevi poyavara” ehi.

Ñgue tehi ayase. ¡Erio, che Yar Jesús!

²¹ Yande Yar Jesucristo tape rovasa opacatu. Aviye, aipo rupive.